

宋高僧传

释
赞
宁

文硕阁

wenshuoge.com

目录

关于我们	4
序	6
卷一	8
卷二	13
卷三	21
卷四	29
卷五	39
卷六	48
卷七	58
卷八	71
卷九	80
卷十	88
卷十一	96
卷十二	105
卷十三	115
卷十四	124
卷十五	137
卷十六	147
卷十七	157
卷十八	169
卷十九	180
卷二十	192
卷二十一	202
卷二十二	212
卷二十三	220
卷二十四	231
卷二十五	239
卷二十六	248
卷二十七	256
卷二十八	264
卷二十九	272
卷三十	282
后序	290
卷一	291
卷二	296
卷三	304

卷四	312
卷五	322
卷六	331
卷七	341
卷八	354
卷九	363
卷十	371
卷十一	379
卷十二	388
卷十三	398
卷十四	407
卷十五	420
卷十六	430
卷十七	440
卷十八	452
卷十九	463
卷二十六	475
卷二十七	483
卷二十八	491
卷二十九	499
卷三十	509
后序	517

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

序

○进高僧传表

（臣）僧（赞宁）等言，自太平兴国七年伏奉敕旨，俾修《高僧传》与新译经同入藏者。（臣）等遐求事迹，博采碑文，今已撰集成三十卷，谨诣阙庭进上。益琅函而更广，延玉历以弥长。（臣）等诚忧诚恐，兢惕之至。（臣）等闻浑仪之外，别有释天；法海之中，多生僧宝。释天可则，阿难记事而载言；僧宝堪称，慧皎为篇而作传。猗欤我佛，号大遍知，知教法之无依，委帝王之有力。当二千载之后，属一万年之初，伏惟应运统天睿文英武大圣至明广孝皇帝陛下，神龙在天，爱日升上，土疆开辟，四夷请吏而贡琛，时律均和，百谷登敷而栖亩，耕籍田而又劝，赐酺饮以咸欢，儒术特兴，玄风爰振。是以麒麟非中国之物，白雉非草莽之禽，今游苑囿之间，且类牢笼之畜。近以从澶至濮，黄河牵一带之清；自古及今，青史载千年之应。斯盖陛下从不动之地，示为长寿之王。翻译成经，制甚深之御序；回文作颂，演无尽之法音。仍降凤书，令编僧史。属此雍熙之运，伸其贞观之风，合选兼才，岂当末学？得不擒犀截角，搴翠删毛，精求出类之人，取法表年之史。所恨空门寡学，释胄何知！或有可观，实录聊摹于陈寿；如苞深失，戾经宜罪于马迁。副陛下遗贤必取之心，助陛下坠典咸修之美。今遇乾明圣节，谨令弟子赐紫显忠、同元受敕相国寺赐紫智轮进纳，伏乞睿慈，略赐御览。恭惟圣主是文章之主，微臣非惇史之臣。傥示天机，令知凡例。如得操北斗而斟酌，或示刀圭；执南箕而簸扬，方除糠粃会。（臣）等冒黷天颜，无任惶惧激切屏营之至，谨言。

端拱元年十月日左街天寿寺通慧大师赐紫臣僧赞宁上表○批答

敕通慧大师赞宁，省所令左街天寿寺赐紫僧显忠进编修《大宋高僧传》三十卷事，具悉。一乘妙道，六度玄门，代有奇人，迭恢圣教。若无纂述，何以显扬？铎尔真流，栖心法苑，成兹编集，颇效辛勤，备观该总之能，深切叹嘉之意。其所进《高僧传》，已令僧录司编入《大藏》。今赐绢三十匹，至可领也。故兹奖谕，想宜知悉。冬寒，想比清休否？遣书指不多及。

十八日敕○大宋高僧传序

（臣）闻贤劫绵长，世间宏廓，天与时而不尽，地受富以无疆，最灵之气创于中，大圣之师居于上。伟哉！

释迦方隐，弥勒未来，其间出命世之人，此际多分身之圣，肆为僧相，喜示沙门。言与行而可观，槩兼觚而争录。是以王巾《僧史》，孙绰《道贤》，摹列传以周流，象世家而布，盖欲希颜之者，慕藺之俦，成飞锡之应真，作曳山之上士。时则裴子野著《众僧传》，释法济撰《高逸沙门传》，陆杲述《沙门传》，释宝唱立《名

僧传》，斯皆河图作《洪范》之椎轮，土鼓为《咸池》之坏器。焉知来者，靡旷其人。慧皎刊修，用实行潜光之目；道宣缉缀，续高而不名之风，令六百载行道之人弗坠于地者矣。爰自贞观命章之后，西明绝笔已还，此作蔑闻，斯文将缺。时有再至，肃杀过而繁华来；世无久虚，地天泰而圣明出。

我应运统天睿文英武大圣至明广孝皇帝陛下，阳龙挺德，斗电均威。践大道也，牺、黄输执御之劳；多天才也，周、孔行弟子之职。讲信修睦，崇德报功，一统无遗，百王有愧，四海若窥于掌内，万机皆发于宸衷。然而玄牝留神，释天淡虑。长生授术，时开太一之坛；续法延期，僧度倍千之戒。浮图揭汉，梵夹翻华，将佛国之同风，与玉京而合制。慨兹释侣，代有其人，思景行之莫闻，实纪录之弥旷。（臣）等谬膺良选，俱乏史才，空门不出于董狐，弱手难探于禹穴。而乃循十科之旧例，辑万行之新名。或案诔铭，或征志记，或问车酋轩之使者，或询耆旧之先民，研磨将经论略同，雠校与史书悬合。勒成三帙，上副九重，列僧宝之瑰奇，知佛家之富贵。昔者嘉祥笔削，尽美善于东南；澄照纂修，足英髦于关辅。盖是拘于墟也，传不习乎？岂若皇朝也，八极张罗，举之则无物不至；四夷弭伏，求之则何事不供。（臣）等分面征搜，各涂构集，如见一家之好，且无诸国之殊，所以成十科者，易同拾龠其正传五百三十三人，附见一百三十人。矧复逐科尽处，象史论以摅辞；因事言时，为传家之系断。厥号《大宋高僧传》焉。庶几乎铜马为式，选千里之骏驹；竹编见书，实六和之年表。观之者务进，悟之者思齐，皆登三藐之山，悉入萨云之海，永资圣历，俱方皇明，齐爱日之炳光，应嵩山之呼寿云尔。

时端拱元年乾明节臣僧赞宁等谨上译经篇第一（变梵成华，通凡入圣。法轮斯转，诸佛所师）。义解篇第二（寻文见义，得意忘言。三慧克全，二依当转）。

习禅篇第三（修至无念，善恶都亡。亡其所亡，常住安乐）。明律篇第四（严而少恩，正而急护。婴守三业，同彼金汤）。护法篇第五（家有良吏，守藏何虞？法有名师，外御其侮）。

感通篇第六（逆于常理，感而遂通。化于世间，观之难测）。遗身篇第七（难舍易捐，施中第一。以秽漏体，回金刚身）。读诵篇第八（十种法师，此为高大。染枸椹花，果时瓢赤）。

兴福篇第九（为己为他，福生罪灭。有为之善，其利博哉）。

杂科声德十（统摄诸科，同归高尚。唱导之匠，光显佛乘）。

卷一

◎译经篇第一之一（正传三人附见一人）○唐京兆大荐福寺义净传

释义净字文明，姓张氏，范阳人也。髫髻之时，辞亲落发，遍询名匠，广探群籍，内外闲习，今古博通。年十有五，便萌其志，欲游西域，仰法显之雅操，慕玄奘之高风。加以勤无弃时，手不释卷，弱冠登具，愈坚贞志。咸亨二年，年三十有七，方遂发足。初至番禺，得同志数十人，及将登舶，余皆退罢。净奋励孤行，备历艰险。所至之境，皆洞言音。凡遇酋长，俱加礼重。鹫峰、鸡足，咸遂周游；鹿苑、瘴林，并谐瞻瞩。诸有圣迹，毕得追寻。经二十五年，历三十余国，以天后证圣元年乙未仲夏，还至河洛，得梵本经律论近四百部，合五十万颂，金刚座真容一铺，舍利三百粒。天后亲迎于上东门外，诸寺缁伍具幡盖歌乐前导，敕于佛授记寺安置焉。初与于阗三藏实叉难陀翻《华严经》。久视之后，乃自专译。起庚子岁至长安癸卯，于福先寺及雍京西明寺译《金光明最胜王》《能断金刚般若》、《弥勒成佛》、《一字咒王》、《庄严王陀罗尼》、《长爪梵志》等经，《根本一切有部毗奈耶》、《尼陀那目得迦》、《百一羯磨摄》等，《掌中》《取因假设》、《六门教授》等论，及《龙树劝诫颂》，凡二十部。北印度沙门阿你真那证梵文义，沙门波仑、复礼、慧表、智积等笔受证文，沙门法宝、法藏、德感、胜庄、神英、仁亮、大仪、慈训等证义，成均太学助教许观监护，缮写进呈。天后制《圣教序》，令标经首。暨和帝神龙元年乙巳，于东洛内道场译《孔雀王经》，又于大福先寺出《胜光天子》、《香王菩萨咒》、《一切庄严王经》四部，沙门盘度读梵文，沙门玄伞笔受，沙门大仪证文，沙门胜庄、利贞证义，兵部侍郎崔湜、给事中卢粲润文正字，秘书监驸马都尉杨慎交监护。帝深崇释典，特抽睿思，制《大唐龙兴三藏圣教序》。又御洛阳西门，宣示群官新翻之经。二年，净随驾归雍京，置翻经院于大荐福寺，居之。三年，诏入内与同翻经沙门九旬坐夏。帝以昔居房部，幽厄无归，祈念药师，遂蒙降祉，荷兹往泽，重阐鸿猷。因命法徒更重传译于大佛光殿，二卷成文，曰《药师琉璃光佛本愿功德经》。帝御法筵，手自笔受。睿宗永隆元年庚戌，于大荐福寺出《浴像功德经》、《毗奈耶杂事二众戒经》、《唯识宝生》、《所》、《缘释》等二十部，吐火罗沙门达磨末磨、中印度沙门拔弩证梵义，罽宾沙门达磨难陀证梵文，居士东印度首领伊舍罗证梵本，沙门慧积、居士中印度李释迦度颇多读梵本，沙门文纲、慧沼、利贞、胜庄、爱同、思恒证义，玄散智积笔受，居士东印度瞿昙金刚、迦湿弥罗国王子阿顺证译，修文馆大学士李峤、兵部尚书韦嗣立、中书侍郎赵彦昭、吏部侍郎卢藏用、兵部侍郎张说、中书舍人李义二十余人次文润色，左仆射韦巨源、右仆射苏瑰监护，秘书大监嗣虢王邕同监护。景云二年辛亥，复于大荐福寺译《称赞如来功德神咒》等经，太常卿薛崇嗣监护。自天后久视迄睿宗景云，都翻出五十六部，二百三十卷。又别撰《大唐西域求法高僧传》、《南海寄归传内法传》。别说《罪要行法》、《受用三法》、《水要法》、《护命放生轨仪》，凡五部，九卷。又出《说一切有部跋率堵》，即诸律中犍度跋渠之类，盖梵音有楚夏耳，约七十八卷。净虽遍翻三藏，而偏攻律部，译缀之暇，曲授学徒。凡

所行事皆尚急护。漉囊涤秽，特异常伦。学侶传行，遍于京洛，美哉，亦遗法之盛事也。先天二年卒，春秋七十九，法腊五十九，葬事官供所出。《跋窣堵》唯存真本，未暇覆疏，而逼泥曰，然其传度经律，与奘师抗衡。比其著述，净多文。性传密咒，最尽其妙，二三合声，尔时方晓矣。今塔在洛京龙门北之高冈焉。

系曰：译之言易也，谓以所有易所无也。譬诸枳橘焉。由易土而殖，橘化为枳。枳橘之呼虽殊，而辛芳干叶无异。又如西域尼拘律陀树，即东夏之杨柳，名虽不同，树体是一。自汉至今皇宋，翻译之人多矣。晋魏之际，唯西竺人来，止称尼拘耳。此方参译之士，因西僧指杨柳，始体言意。其后东僧往彼，识尼拘是东夏之柳。两土方言，一时洞了焉。唯西唯东，二类之人未为尽善。东僧往西，学尽梵书，解尽佛意，始可称善传译者。宋齐已还，不无去彼回者，若入境观风必闻其政者，奘师、净师为得其实。此二师者两全通达，其犹见玺文知是天子之书，可信也。《周礼》象胥氏通夷狄之言，净之才智，可谓释门之象胥也欤！

○唐洛阳广福寺金刚智传

释跋日罗菩提，华言金刚智。南印度摩赖耶国人也。华言光明，其国境近观音宫殿补陀落伽山。父婆罗门善《五明论》，为建支王师。智生数岁，日诵万言，目览心传，终身无忘。年十六，开悟佛理，不乐习尼犍子诸论，乃削染出家，盖宿殖之力也。后随师往中印度那烂陀寺，学修多罗、阿毗达磨等。洎登戒法，遍听十八部律。又诣西印度学小乘诸论及《瑜伽三密陀罗尼门》。十余年全通《三藏》。次复游师子国，登楞伽山，东行佛誓。裸人等二十余国。闻脂那佛法崇盛，泛舶而来，以多难故，累岁方至。开元己未岁，达于广府，敕迎就慈恩寺，寻徙荐福寺。所住之刹，必建大曼籥罗灌顶道场，度于四众。大智、大慧二禅师、不空三藏皆行弟子之礼焉。后随驾洛阳，其年自正月不雨迨于五月，岳渎灵祠，祷之无应。乃诏智结坛祈请。于是用不空钩、依菩萨法，在所住处起坛，深四肘，躬绘七俱胝菩萨像，立期以开光，明日定降雨焉。帝使一行禅师谨密候之。至第七日，炎气烛烛，天无浮翳。午后，方开眉眼，即时西北风生，飞瓦拔树，崩云泄雨，远近惊骇。而结坛之地，穿穴其屋，洪注道常质明，京城士庶皆云：“智获一龙，穿屋飞去。”求观其处，日千万人，斯乃坛法之神验也。于时帝留心玄牝，未重空门，所司希旨，奏外国蕃僧遣令归国，行有日矣。侍者闻智，智曰：“吾是梵僧，且非蕃胡，不干明敕，吾终不去。”数日，忽乘传将之雁门，奉辞，帝大惊，下手诏留祝初，帝之第二十五公主甚钟其爱，久疾不救，移卧于咸宜外馆，闭目不语，已经旬朔。有敕令智授之戒法，此乃料其必终，故有是命。智诣彼，择取宫中七岁二女子，以绯绁缠其面目，卧于地，使牛仙童写敕一纸，焚于他所，智以密语咒之。二女冥然诵得，不遗一字。智入三摩地，以不思議力令二女持敕诣琰摩王。食顷间，王令公主亡保母刘氏护送公主魂随二女至，于是公主起坐，开目言语如常。帝闻之，不俟仗卫，驰骑往于外馆。公主奏曰：“冥数难移，今王遣回，略覲圣颜而已。”可半日间，然后长逝。自尔帝方加归仰焉。武贵妃宠异六宫，荐施宝玩，智劝贵妃急造金刚寿命

菩萨像，又劝河东郡王于毗卢遮那塔中绘像；谓门人曰：“此二人者寿非久矣。”经数月，皆如其言，凡先觉多此类也。智理无不通，事无不验，经论戒律秘咒余书，随问剖陈，如钟？1111受。有登其门者，智一觐其面，永不忘焉。至于语默兴居，凝然不改，喜怒逆顺，无有异容，瞻礼者莫知津涯，自然率服矣。自开元七年，始届番禺，渐来神甸，广敷《密藏》，建曼籥罗，依法制成，皆感灵瑞。沙门一行钦尚斯教，数就谘询，智一一指授，曾无遗隐。一行自立坛灌顶，遵受斯法，既知利物，请译流通。十一年，奉敕于资圣寺翻出《瑜伽念诵法》二卷、《七俱胝陀罗尼》二卷，东印度婆罗门大首领直中书伊舍罗译语，嵩岳沙门温古笔受。十八年，于大荐福寺又出《曼殊室利五字心陀罗尼》、《观自在瑜伽法要》各一卷，沙门智藏译语，一行笔受，删缀成文。复观旧随求本中有阙章句，加之满足。智所译总持印契，凡至皆验，秘密流行，为其最也。两京稟学，济度殊多，在家出家，传之相继。二十年壬申八月既望，于洛阳广福寺命门人曰：“白月圆时，吾当去矣。”遂礼毗卢遮那佛，旋绕七匝，退归本院，焚香发愿，顶戴梵夹并新译教法，付嘱訖，寂然而化。寿七十一，腊五十一。其年十一月七日葬于龙门南伊川之右，建塔旌表。传教弟子不空奏举，敕谥国师之号。灌顶弟子中书侍郎杜鸿渐，素所归奉，述碑纪德焉。

系曰：五部曼籥罗法，摄取鬼物，必附丽童男处女，去疾除妖也绝易。近世之人，用是图身口之利，乃寡征验，率为时所慢。吁，正法饑薄，一至于此！

○唐京兆大兴善寺不空传（慧朗）

释不空，梵名阿月佉跋折罗，华言不空金刚，止行二字，略也。本北天竺婆罗门族，幼失所天，随叔父观光东国。年十五，师事金刚智三藏，初导以梵本《悉曇章》及《声明论》，浹旬已通彻矣。师大异之，与受菩萨戒，引入金刚界大曼荼罗，验以掷花，知后大兴教法。洎登具戒，善解一切有部，谙异国书语。师之翻经，常令共译。凡学《声明论》，一纪之功，六月而毕。诵《文殊普贤行愿》，一年之限，再夕而终。其敏利皆此类也。欲求学《新瑜伽五部三密法》，涉于三载，师未教诏。空拟回天竺，师梦京城诸寺佛菩萨像皆东行，寐寤乃知空是真法器，遂允所求。授与《五部灌顶护摩阿闍梨法》及《毗卢遮那经》、《苏悉地轨则》等，尽传付之。厥后师往洛阳，随侍之际，遇其示灭，即开元二十年矣。影堂既成，追谥已毕，曾奉遗旨，令往五天并师子国，遂议遐征。初至南海郡，采访使刘巨邻恳请灌顶，乃于法性寺相次度人百千万众。空自对本尊祈请旬日，感文殊现身。及将登舟，采访使召诫番禺界蕃客大首领伊习宾等曰：“今三藏往南天竺师子国，宜约束船主，好将三藏并弟子含光，慧等三七人、国信等达彼，无令疏失。”二十九年十二月，附昆仑舶，离南海至诃陵国界，遇大黑风。众商惶怖，各作本国法禳之，无验，皆膜拜求哀，乞加敕护，慧等亦恸哭。空曰：“吾今有法，汝等勿忧。”遂右手执五股菩提心杵，左手持《般若佛母经》夹，作法诵《大随求》一遍，即时风偃海澄。又遇大鲸出水，喷浪若山，甚于前患。众商甘心委命，空同前作法，令慧诵《娑竭

龙王经》，逡巡，众难俱息。既达师子国，王遣使迎之。将入城，步骑羽卫，骈罗衢路。王见空，礼足请住宫中，七日供养。日以黄金斛满盛香水，王为空躬自洗浴，次太子、后妃、辅佐，如王之礼焉。空始见普贤阿闍梨，遂奉献金宝锦绣之属，请开《十八会金刚顶瑜伽法门毗卢遮那大悲胎藏建立坛法》，并许含光，慧釐等同受五部灌顶。空自尔学无常师，广求《密藏》及诸经论五百余部，本三昧耶诸尊密印仪形色像坛法羯帜，文义性相，无不尽源。一日，王作调象戏，人皆登高望之，无敢近者。空口诵手印，作于慈定，当衢而立，狂象数头顿皆踢跌，举国奇之。次游五印度境，屡彰瑞应。至天宝五载还京，进师子国王尸罗迷伽表及金宝瓔珞、《般若》梵夹、杂珠白等，奉敕权止鸿胪。续诏入内立坛，为帝灌顶。后移居净影寺。是岁终夏愆阳，诏令祈雨。制曰：“时不得暍，雨不得暴。”空奏立孔雀王坛，未尽三日，雨已浹洽。帝大悦，自持宝箱赐紫袈裟一副，亲为披擐，仍赐绢二百匹。后因一日大风卒起，诏空禳止，请银瓶一枚作法加持，须臾戢静。忽因池鹅误触瓶倾，其风又作，急暴过前，敕令再止，随止随效。帝乃赐号曰智藏焉。天宝八载，许回本国，乘驿骑五匹，至南海郡，有敕再留。十二载，敕令赴河陇节度使哥舒翰所请。十三载，至武威，住开元寺，节度使洎宾从皆愿受灌顶，士庶数千人咸登道场，弟子含光等亦受五部法。别为功德使开府李元琮受法，并授金刚界大曼荼罗。是日道场地震，空曰：“群心之至也。”十五载，诏还京，住大兴善寺。至德初，銮驾在灵武凤翔，空常密奉表起居，肃宗亦密遣使者求秘密法。洎收京反正之日，事如所料。乾元中，帝请入内，建道场护摩法，为帝受转轮王位七宝灌顶。上元末，帝不豫，空以《大随求真言》祓除，至七过，翼日乃瘳，帝愈加殊礼焉。空表请入山，李辅国宣敕令于终南山智炬寺修功德。念诵之夕，感大乐萨？1111舒毫发光，以相证验，位邻悉地，空曰：“众生未度，吾安自度耶？”肃宗厌代，代宗即位，恩渥弥厚。译《密严》、《仁王》二经毕，帝为序焉。颁行之日，庆云俄现，举朝表贺。永泰元年十一月一日，制授特进试鸿胪卿，加号大广智三藏。大历三年，于兴善寺立道场，敕赐锦绣褥十二领、绣罗幡三十二首，又赐道场僧二七日斋粮。敕近侍大臣诸禁军使并入灌顶。四年冬，空奏天下食堂中置文殊菩萨为上座，制许之，此盖嫌？陈如是小乘教中始度故也。五年夏，有诏请空往五台山修功德，于时彗星出焉。法事告终，星亦随没。秋，空至自五台，帝以师子骢并御鞍辔遣中使出城迎入，赐沿道供帐。六年十月二日，帝诞节，进所译之经表云：“爰自幼年，承事先师三藏十有四载，稟受瑜伽法门。复游五印度求所未授者，并诸经论，计五百余部，天宝五载却至上都。上皇诏入内立灌顶道场，所赍梵经尽诈翻度。肃宗于内立护摩及灌顶法。累奉二圣令鸠聚先代外国梵文，或绦索脱落者修，未译者译。陛下恭遵遗旨，再使翻传，利济群品。起于天宝迄今大历六年，凡一百二十余卷，七十七部，并目录及笔受等僧俗名字，兼略出念诵仪轨，写毕，遇诞节，谨具进上。”敕付中外，并编入《一切经目录》中。李宪诚宣敕赐空锦彩绢八百匹，同翻经十大德各赐三十匹。沙门潜真表谢。僧俗弟子赐物有差。又以京师春夏不雨，诏空祈请，如三日内雨，是和尚法力；三日已往而霈然者，非法力也。空受敕立坛，至第二日大雨云足。帝赐紫罗衣并杂彩百匹，弟子衣七副，设千僧斋，以报功也。空进表请造文殊阁，敕允奏。贵妃、韩王、华阳公主同成之，舍内库钱约三千万计。

复翻《孽路茶王经》，宣赐相继，旁午道路。至九年，自春抵夏，宣扬妙法，诫勸门人。每语及《普贤愿行出生无边法门经》，劝令诵持，再三叹息。其先受法者，偏令属意观菩提心本尊大印，直诤阿字了法不生证大觉身，若指诸掌，重重嘱累。一夜，命弟子赵迁：“持笔砚来，吾略出《涅槃荼毗仪轨》以贻后代，使准此送终。”迁稽首三请“幸乞慈悲久祝不然，众生何所依乎”？空笑而已。俄而示疾，上表告辞。敕使劳问，赐医药，加开府仪同三司，封肃国公，食邑三千户，固让不俞。空甚不悦，且曰：“圣众俨如舒手相慰，白月圆满，吾当逝矣。奈何临终更窃名位？”乃以五股金刚铃杵先师所传者，并银盘子、菩提子、水精数珠留别，附中使李宪诚进。六月十五日，香水澡沐，东首倚卧，北面瞻望阙庭，以大印身定中而寂，享年七十，僧腊五十。弟子慧朗次绍灌顶之位。余知法者数人。帝闻，辍视朝三日，赐绢布杂物，钱四十万，造塔钱二百余万。敕功德使李元琮知护丧事。空未终前，诸僧梦千仞宝台摧，文殊新阁颓，金刚杵飞上天。又兴善寺后池无故而涸，林竹生实，庭花变萎。七月六日荼毗，帝诏高品刘仙鹤就寺置祭，赠司空，谥曰大辩广正智三藏。火灭，收舍利数百粒。八十粒进内。其顶骨不然，中有舍利一颗，半隐半现，敕于本院别起塔焉。空之行化利物居多，于总持门最彰殊胜，测其忍位莫定高卑。始者玄宗尤推重焉，尝因岁旱，敕空祈雨。空曰：“过某日可祷之，或强得之，其暴可怪。”敕请本师金刚智设坛，果风雨不止，坊市有漂溺者，树木有拔仆者。遽诏空止之。空于寺庭中捏泥媪五六，溜水作梵言骂之，有顷开霁矣。

玄宗召术士罗公远与空换法，同在便殿，空时时反手搔背。罗曰：“借尊师如意。”时殿上有花石，空挥如意击碎于其前，罗再三取如意不得，帝欲起，空曰：“三郎勿起，此影耳。”乃举手示罗，如意复完然在手。又北邙山有巨蛇，樵采者往往见之，矫首若丘陵，夜常承吸露气。见空，人语曰：“弟子恶报，和尚如何见度？每欲翻河水陷洛阳城以快所怀也。”空为其受归戒，说因果，且曰：“汝以瞋心故受，今那复恚恨乎？吾力何及？当思吾言，此身必舍矣。”后樵子见蛇死涧下，臭闻数里。空凡应诏祈雨，无他轨则，但设一绣座，手簸旋数寸木神子，念咒掷之。当其自立于座上已，伺其吻角牙出目瞬，则雨至矣。又天宝中，西蕃、大石、康三国帅兵围西凉府，诏空入，帝御于道常空秉香炉，诵《仁王密语》二七遍，帝见神兵可五百员在于殿庭，惊问空。空曰：“毗沙门天王子领兵救安西，请急设食发遣。”四月二十日果奏云：“二月十一日城东北三十许里，云雾间见神兵长伟，鼓角喧鸣，山地崩震，蕃部惊溃。彼营垒中有鼠金色，咋弓弩弦皆绝。城北门楼有光明天王怒视，蕃帅大奔。”帝览奏谢空，因敕诸道城楼置天王像，此其始也。空既终，三朝所赐墨制一皆进纳。生荣死哀，西域传法僧至此，今古少类矣。嗣其法位，慧朗师也。御史大夫严郢为《碑》，徐浩书之，树于本院焉。系曰：传教令轮者，东夏以金刚智为始祖，不空为二祖，慧朗为三祖，已下宗承所损益可知也。自后歧分？别。咸曰：“传瑜伽大教，多则多矣，而少验者何？”亦犹羽嘉生应龙，应龙生凤皇，凤皇已降，生庶鸟矣。欲无变革，其可得乎！

卷二

◎译经篇第一之二（正传十五人附见八人）○唐洛京圣善寺善无畏传（达摩掬多）

释善无畏本中印度人也，释迦如来季父甘露饭王之后，梵名戍婆揭罗僧诃，华言净师子，义翻为善无畏；一云输波迦罗，此名无畏，亦义翻也。其先自中天竺，因国难分王乌荼。父曰佛手王，以畏生有神姿，宿赍德艺，故历试焉。十岁统戎，十三嗣位，得军民之情。昆弟嫉能，称兵构乱，阇墙斯甚。薄伐临戎，流矢及身，掉轮伤顶。天伦既败，军法宜诛，大义灭亲，忍而曲赦。乃？泪白母，及告群臣曰：“向者亲征，恩已断矣。今欲让国，全其义焉。”

因致位于兄，固求入道。母哀许之，密与传国宝珠，犹诸侯之分器也。南至海滨，遇殊胜招提，得法华三昧。聚沙为塔，仅一万所。黑蛇伤指而无退息。复寄身商船，往游诸国，密修禅诵，口放白光。无风三日，舟行万里。属商人遇盗，危于并命。畏恤其徒侣，默讽真言，七俱胝尊全现身相，群盗果为他寇所歼。寇乃露罪归依，指踪夷险。寻越穷荒，又逾毒水，才至中天竺境，即遇其王。王之夫人，乃畏之女兄也，因问舍位之由，称叹不足。是日携手同归，慈云布阴，一境丕变。畏风仪爽俊，聪睿超群，解究五乘，道该三学，总持禅观，妙达其源。艺术伎能，悉闻精练。初诣那烂陀寺，此云施无厌也，像法之泉源，众圣之会府。畏乃舍传国宝珠莹于大像之额，昼如月魄，夜若曦轮焉。寺有达摩掬多者，掌定门之秘钥，佩如来之密印，颜如四十许，其实八百岁也，玄奘三藏昔曾见之。畏投身接足，奉为本师。一日侍食之次，旁有一僧，震旦人也，畏视其钵中见油餌尚温，粟饭犹暖，愕而叹曰：“东国去此十万余里，是彼朝熟而返也？”掬多曰：“汝能不言，真可学焉。”后乃授畏《总持瑜伽三密教》也，龙神围绕，森在目前，其诸印契，一时顿受。即日灌顶，为人天师，称曰三藏。夫三藏之义者，则内为戒、定、慧，外为经、律、论，以陀罗尼总摄之也。陀罗尼者，是菩提速疾之轮，解脱吉祥之海，三世诸佛生于此门，慧照所传，一灯而已。根殊性异，灯亦无边。由是有百亿释迦微尘三昧，菩萨以纲总摄于诸定，顿升阶位，邻于大觉，此其旨也。于时畏周行大荒，遍礼圣迹，不惮艰险。凡所履处，皆三返焉。又入鸡足山，为迦叶剃头，受观音摩顶。尝结夏于灵鹫，有猛兽前导，深入山穴。穴明如昼，见牟尼像，左右侍者如生焉。时中印度大旱，请畏求雨。俄见观音在日轮中，手执军持注水于地。时众欣感，得未曾有。复锻金如贝叶，写《大般若经》。

熔中金为？睹波，等佛身量焉。母以畏游方日久，谓为已歿，旦夕泣泪而丧其明，泊附信问安，朗然如故。五天之境，自佛灭后，外道峥嵘九十六宗，各专其见。畏皆随所执破滞析疑，解邪缚于心门，舍迷津于觉路。法云大小而均泽，定水方圆而任器，仆异学之旗鼓，建心王之胜幢，使彼以念制狂，即身观佛。掬多曰：“善男子，汝与震旦有缘，今可行矣。”畏乃顶辞而去。至迦湿弥罗国。薄暮次河，而无

桥梁，畏浮空以济。一日，受请于长者家，俄有罗汉降曰：“我小乘之人，大德是登地菩萨。”乃让席推尊，畏施之以名衣，升空而去。畏复至乌苌国，有白鼠驯绕，日献金钱。讲《毗卢》于突厥之庭，安禅定于可敦之树，法为金字，列在空中。时突厥宫人以手按乳，乳为三道飞注畏口。畏乃合掌端容曰：“我前生之母也。”又途中遭寇，举刃三斫而肢体无伤，挥剑者唯闻铜声而已。前登雪山大池，畏不？，掬多自空而至曰：“菩萨身同世间，不舍生死。汝久离相，宁有病耶？”言讫冲天，畏洗然而愈。路出吐蕃，与商旅同次，胡人贪货，率众合围，畏密运心印，而蕃豪请罪。至大唐西境，夜有神人曰：“此东非弟子界也，文殊师利实护神州。”礼足而灭，此亦犹迦毗罗神送连眉也。畏以驼负经，至西州，涉于河，龙陷驼足，没于泉下，畏亦入泉。三日止住龙宫，宣扬法化，开悟甚众。及牵驼出岸，经无沾湿焉。初畏途过北印度境，而声誉已达中国，睿宗乃诏若那及将军史献出玉门塞表以候来仪。开元初，玄宗梦与真僧相见，姿状非常，躬御丹青，写之殿壁。及畏至此，与梦合符，帝悦有缘，饰内道场，尊为教主，自宁、薛王已降皆跪席捧器焉。宾大士于天宫，接梵筵于帝座，礼国师以广成之道，致人主于如来之乘，巍巍法门，于斯为盛。时有术士握鬼神之契，参变化之功，承诏御前，角其神异。畏恬然不动，而术者手足无所施矣。开元四年丙辰，赍梵夹始届长安，敕于兴福寺南院安置。续宣住西明寺，问劳重叠，锡赍异常。至五年丁巳，奉诏于菩提院翻译。畏奏请名僧同参华梵，开题，先译《虚空藏求闻持法》一卷，沙门悉达译语，无著笔受缀文，缮写进内。帝深加赏叹，有敕畏所将到梵本并令进上。昔有沙门无行西游天竺，学毕言归，方及北印，不幸而卒。其所获夹叶悉在京都华严寺中，畏与一行禅师于彼选得数本，并《总持妙门》先所未译。十二年，随驾入洛，复奉诏于福先寺译《大毗卢遮那经》。其经具足梵文有十万颂；畏所出者，撮其要耳，曰《大毗卢遮那成佛神变加持经》七卷，沙门宝月译语，一行笔受，删缀辞理，文质相半，妙谐深趣，上符佛意，下契根缘，利益要门，斯文为最。又出《苏婆呼童子经》三卷、《苏悉地揭罗经》三卷，二经具足咒毗柰耶也，即秘密禁戒焉。若未曾入曼荼罗者，不合辄读诵，犹未受具人盗听戒律也。所出《虚空藏菩萨能满诸愿最胜心陀罗尼求闻持法》一卷，即《金刚顶梵本经成就一切义图略》译少分耳。畏性爱恬简，静虑怡神，时开禅观，奖劝初学。奉仪形者莲华敷于眼界，禀言说者甘露润于心田，超然觉明，日有人矣。法侣请谒，唯尊奉长老宝思惟三藏而已，此外皆行门人之礼焉。一行禅师者，帝王宗重，时贤所归，定慧之余，阴阳之妙，有所未决，亦咨禀而后行。畏尝于本院铸铜为塔，手成模范，妙出人天。寺众以销冶至广，庭除深隘，虑风至火盛，灾延宝坊。畏笑曰：“无苦，自当知也。”鼓铸之日，果大雪蔽空，灵塔出炉，瑞花飘席，众皆称叹焉。又属暑天亢旱，帝遣中官高力士疾召畏祈雨。畏曰：“今旱，数当然也，若苦召龙致雨，必暴，适足所损，不可为也。”帝强之曰：“人苦暑病矣，虽风雷亦足快意。”辞不获已，有司为陈请雨具，

幡幢螺钹备焉，畏笑曰：“斯不足以致雨。”急撤之。乃盛一钵水，以小刀搅之，梵言数百

咒之。须臾有物如龙，其大如指，赤色矫首，瞰水面，复潜于钵底。畏且搅且咒，顷之，有白气自钵而兴，径上数尺，稍稍引去。畏谓力士曰：“亟去，雨至矣。”力士驰去，回顾见白气疾旋，自讲堂而西，若一匹素翻空而上。既而昏霾，大风震电，力士才及天津桥，风雨随马而骤，街中大树多拔焉。力士入奏而衣尽沾湿矣。帝稽首迎畏，再三致谢。又邙山有巨蛇，畏见之，叹曰：“欲决潞洛阳城耶？”以天竺语咒数百声，不日蛇死。乃安禄山陷洛阳之兆也。一说畏曾寓西明道宣律师房，示为粗相，宣颇嫌鄙之。至中夜，宣扞虱投于地，畏连呼“律师扑死佛子”。宣方知是大菩萨，诸吉旦摄衣作礼焉。若观此说，宣灭至开元中仅五十载矣，如畏出没无常，非人之所测也。二十年，求还西域，优诏不许。二十三年乙亥十月七日，右胁累足，奄然而化，享龄九十九，僧腊八十。法侣凄凉，皇心震悼，赠鸿胪卿。遣鸿胪丞李现具威仪，宾律师护丧事。二十八年十月三日，葬于龙门西山广化寺之庭焉。定慧所熏，全身不坏。会葬之日，涕泗倾都，山川变色，僧俗弟子宝畏禅师、明畏禅师、荥阳郑氏、琅邪王氏痛其安仰，如丧考妣焉。乾元之初，唐风再振，二禅师刻偈，诸信士营龕，弟子舍于旁，有同孔墓之恋。今观畏之遗形，渐加缩小，黑皮隐隐，骨其露焉。累朝旱涝，皆就祈请，征验随生，且多檀施。锦绣巾？，覆之如偃息耳。每一出龕，置于低榻，香汁浴之，洛中豪右争施禅？净巾澡豆，以资浴事。

今上禳祷，多遣使臣往加供施，必称心愿焉。○唐洛京智慧传

释智慧者，梵名般刺若也，姓？答摩氏，北天竺迦毕试国人，颖悟天资。七岁发心，违侍二亲，归依三宝。时从大德调伏军教诵《四阿含》，满十万颂，《阿毗达磨》三万颂。及年应法，随师往别国，纳具足戒，诵《萨婆多》近四万颂，《俱舍》二万八千颂，又诵《大婆沙》，兼通其义。七年于彼专习小乘、后诣中天竺那烂陀寺，禀学大乘《唯识》、《瑜伽》、《中边》等论、《金刚般若经》、因明声明医明王律论等，并依承智护、进友、智友三大论师。复游双林，经八塔，往来瞻礼十有八年。闻南北竺颇尚持明，遂往谘禀。彼有灌顶师名达摩耶舍见慧勤重可教，授《瑜伽法入曼荼罗三密护身五部印契经》，于一年诵彻三千五百余颂。常闻支那大国，文殊在中，锡指东方，誓传佛教。乃泛海东迈，垂至广州，风飘却返，抵执师子国之东。又集资粮，重修巨舶，遍历南海诸国。二十二年。再近番禺，风涛遽作，舶破人没，唯慧存焉。夜至五更，其风方止，所赍经论，莫知所之。及登海？，其夹策已在岸矣，于白沙内大竹

筒中得之，宛为鬼物扶持而到。乃叹曰：“此大乘理趣等经，想脂那人根熟矣1遂东北行，半月达广州，即德宗建中初也。属帝违难，奉天贞元二年始届京辇。见乡亲神策军正将罗好心，即慧舅氏之子也，悲喜相慰。将至家中，延留供养。八年，上表举慧翻传，有敕令京城诸寺大德名业殊众者同译，得锺宾三藏般若开释梵本，翰林待诏光宅寺沙门利言度语，西明寺沙门圆照笔受，资圣寺道液、西明寺良秀、庄严寺应真、醴泉寺超悟、道岸、空、并充证义。六月八日，欲创经题，敕右街功

德使王希迁与右神策军大将军王孟涉、骠骑大将军马有邻等送梵经出内。缙伍威仪乐部相间，士女观望，车骑交骈，迎入西明寺翻译。即日赐钱一千贯、茶三十串、香一大合，充其供施。开名题曰《大乘理趣六波罗蜜多经》，成十卷。又《华严长者问佛那罗延力经》、《般若心经》各一卷，皆贞元八年所译也。是岁十月缮写毕。二十八日设彩车，大备威仪，引入光顺门，进帝览，忻然，慰劳勤至。敕于神策军赐斋食，慧绢五百匹、冬服一副，余人赐各有差。慧表谢，答诏褒美。同日请译经，奉天定难功臣开府仪同三司检校太子詹事罗好心上表云：“臣表弟沙门般刺若先进《大乘理趣六波罗蜜》梵本经，伏奉今年四月十九日敕令王希迁精选有道行僧于西明寺翻译。今经帙已终，同诣光顺门进上。”答诏云：“卿之表弟早悟大乘，远自西方，来游上国，宣六根之奥义，演双树之微言。念以精诚所宜钦重，是令翻译，俾用流行。卿夙慕忠勤，职司禁卫，省览表疏，具见乃怀，所谢知。”好心以朱？围逼之际，颇有战功，预其中兵，为帝宠重。慧得好心启导，译务有光，帝制《经序》焉。慧后终于洛阳，葬龙门之西冈，塔今存矣。

○唐玉华寺玄觉传

释玄觉高昌国人也，西土种姓未得闻焉。学慕大乘，从玄奘三藏研核经论，亦于玉华宫参预翻译。及《大般若经》向就，同请翻《宝积经》，奘辞脍然。觉因梦一浮图庄严高大，忽然摧倒，遂惊起告奘。奘曰：“非汝身事，此吾灭之征耳。”觉暗悲安仿，劝诸法侣竞求医药。觉后莫测终焉。

○唐益州多宝寺道因传（嵩公宝暹）

释道因，姓侯氏，濮阳人也。稟祐居醇，含章纵哲，覃？之岁，粹采多奇，髻髻之辰，殊姿特茂。孝爱之节，慈顺之风，率志于斯，因心以极。年甫七岁，丁于内艰，啜粒绝浆，殆乎灭性。成人之德，见称州里。免丧之后，思酬罔极，出家之志，人莫我移。便诣灵岩寺求师诵习，曾不浹旬，通《涅槃经》二帙，举众惊骇，谓为神童。落发已来，砥砺其行，揣摩义章，即讲《涅槃》，宿齿名流，咸所叹服。及升上品，旋学律仪，又于彭城嵩法师所传《摄大乘》。嵩公懿德玄猷，兰薰月映，门徒学侣，鱼贯鳧趋，讲室谈筵，为之器隘。遂依科戒而为节文，年少沙门且令习律，晓《四分》者，方许入听。因夏腊虽幼，业行攸高，独于众中，迴见推揖，每敷《摄论》，即令覆讲。后隐泰岳，凡经四秋。将诣洛中，属昏季陵夷，法网严峻，僧无徒侣，弗许游方。于是杖锡出山，子焉超迈，恐罹刑宪，静念观音。少选之间，有僧錫至，皓然白首，请与偕行。迨至铜街，暨于金地，俯仰之际，莫知所在。咸谓善逝之力，有感斯见。未几，因避难三蜀，居于多宝寺。好事者素闻道誉，乃命开筵《摄论》、《维摩》，听者千数。时有宝暹法师，东海人也，殖艺该洽，尤善大乘，昔在隋朝，英尘久播，学徒来请，接武磨肩。暹公傲尔其间，仰之弥峻，每至因之论席，肃然改容，沈吟久之，方用酬遣。因抗音驰辩，雷惊波注，尽妙穷微，藏牙折角。益州总管邓国公窦玘、行台左仆射赞国公窦轨、长史申国公高士

廉、范阳公卢承庆，及前后首僚，西南岳牧，并国华朝秀，重望崇班，共籍芳声，俱申虔仰。乃于彭门山寺习道安居。此寺往经废毁，院宇凋弊，因慨然构怀，专事营缉，未移再稔，蔚成净常又以九部微言，三界式仰，缅惟法尽，将翳龙宫。遂于寺之比岩，刻书经典，穷多罗之秘帙，尽毗尼之正文。纵尧世之洪水襄陵，任赵简之北山燎狩，必无他虑，与劫齐休。既而清猷远畅，峻业遐昭，遂简宸衷，乃纡天纆，追赴京邑，止大慈恩寺，与玄奘法师翻译校定梵本，兼充证义。奘师偏奖赏之，每有难文，同加参酌，新翻弗坠，因有力焉。慧日寺主楷法师者，聪爽温瞻，声蔼鸿都，首建法筵，请开奥义。帝城缁俗，具来谘禀，欣焉相顾，得所未闻。因研几史籍，尤好老庄，咀其菁华，含其腴润，包四始于风律，综五声于文绪，故所讲训，内外该通。其专业者，《涅槃华严》、《大品》、《维摩》、《法华》、《楞伽》等经，《十地》、《地持》《毗昙》、《智度》、《摄大乘》、《对法》、《佛地》等论，及《四分》等律。其《摄论》、《维摩》仍著章疏。已而能事毕矣，示疾终于长安慧日寺，则显庆三年三月十一日也，春秋七十二。越明年正月，旋神座于益部，二月八日窆于彭门光化寺石经之侧。道俗送葬，数有数千。弟子玄疑等嗣其香火。至龙朔中，中台司藩大夫李俨制《碑》，欧阳通书焉。

○唐波凌国智贤传（会宁）

释若那跋陀罗，华言智贤，南海波凌（亦曰诃凌）国人也，善三藏学。麟德年中，有成都沙门会宁欲往天竺，观礼圣迹，泛舶西游，路经波凌，遂与智贤同译《涅槃》后分二卷。此于《阿笈摩经》内译出，说世尊焚棺、收舍利罗等事，与《大涅槃》颇不相涉。译毕寄经达交州，宁方之西域。至仪凤年初，交州都督梁难敌遣使同会宁弟子运期奉表进经，入京。三年戊寅，大慈恩寺沙门灵会于东宫启请施行。运期奉侍其师，因心莫比，师令赍经行化，故无暇影随往西域也。

○唐洛京白马寺觉救传

释佛陀多罗，华言觉救，北天竺罽宾人也。赍多罗夹，誓化脂那，止洛阳白马寺，译出《大方广圆觉了义经》。此经近译不委何年，且隆道为怀，务甄诈妄，但真诤不谬，岂假具知年月耶？救之行迹，莫究其终。大和中，圭峰密公著疏判解，经本一卷，后分二卷成部，续又为《钞》，演畅幽邃。今东京、太原、三蜀盛行讲演焉。

○唐五台山佛陀波利传（顺贞）

释佛陀波利，华言觉护，北印度罽宾国人。忘身徇道，遍观灵迹，闻文殊师利在清凉山，远涉流沙，躬来礼谒，以天皇仪凤元年丙子，杖锡五台，虔诚礼拜，悲泣雨泪，冀睹圣容。倏焉见一老翁从山而出，作婆罗门语，谓波利曰：“师何所求耶？”波利答曰：“闻文殊大士隐迹此山，从印度来，欲求瞻礼。”翁曰：“师从彼国

将《佛顶尊胜陀罗尼经》来否？此土众生多造诸罪，出家之辈亦多所犯。《佛顶神咒》除罪秘方，若不赍经，徒来何益？纵见文殊，亦何能识？师可还西国，取彼经来，流传此土，即是遍奉众圣，广利群生，拯接幽冥，报诸佛恩也。师取经来至，弟子当示文殊居处。”波利闻已，不胜喜跃，裁抑悲泪，向山更礼。举头之顷不见老人。波利惊愕，倍增虔悖遂返本国取得经回，既达帝城，便求进见。有司具奏，天皇赏其精诚，崇斯秘典，下诏鸿胪寺典客令杜行絳与日照三藏于内共译。译讫，𦘔绢三十匹，经留在内。波利垂泣奏曰：“委弃身命，志在利人。请帝流行，是所望也。”帝愍其专切，遂留所译之经，还其梵本。波利得经，弥复忻喜，乃向西明寺访得善梵语僧顺贞，奏乞重翻。帝俞其请，波利遂与顺贞对诸大德翻出，名曰《佛顶尊胜陀罗尼经》，与前杜令所译者，咒韵经文少有同异。波利所愿既毕，却持梵本入于五台，莫知所之。或云波利隐金刚窟，今永兴龙首冈有波利藏舍利之所焉。

大历中南岳云峰寺沙门法照入五台山礼金刚窟，夜之未央，责扑地。忽见一僧长七尺许，梵音朗畅，称是佛陀波利。问曰：“阿师如此自苦，得无劳乎？有何愿乐？”照对曰：“愿见文殊。”曰：“若志力坚强，真实无妄，汝可脱履于板上，咫尺圣颜，令子得见。”照遂瞑目，俄已入窟。见一院题额云金刚般若寺，字体曾健，光色闪烁。其院皆是异宝庄严，名目不暇。楼观复沓，殿宇连延，罽毘密，铃铎交鸣，可二百所。间有秘藏，中藏《金刚般若》并一切经法，人物魁伟，殆非常所睹也。文殊大圣处位尊严，拥从旁午，宣言慰劳，分茶赋食。波利引之出去。照苦乞在寺，波利不许。临别勉之，努力修进，再来可祝照还至板上蹑履，回眸之际，波利隐焉。

系曰：道家尸解，说有多端。或隐真形而存假质，矧以登地大士、漏尽罗汉？或此在他亡，或分身易态，皆以之为游戏耳，以之为利物焉。其佛陀波利出没无恒，变化何极，出金刚窟接法照师，盖与之有缘，闯然而现。故杜多迦叶久隐诸峰，晋法显往游灵鹫，见于山下焉。

○唐尊法传

释尊法，西印度人也，梵云伽梵达磨，华云尊法。远逾沙磧，来抵中华，有传译之心，坚化导之愿。天皇永徽之岁，翻出《千手千眼观世音菩萨广大圆满无碍大悲心陀罗尼经》一卷。经题但云西天竺伽梵达磨译，不标年代。推其本末，疑是永徽、显庆中也。又准《千臂经序》云：“智通同此三藏译也。”法后不知其终。

○唐西京慧日寺无极高传（阿难律木叉师迦叶师）

释无极高，中印度人，梵云阿地瞿多华云无极高也。出家氏族未凭书之。高学穷满字，行洁圆珠，精练五明，妙通三藏。永徽三年壬子岁正月，自西印度赍梵夹来届

长安，敕令慈门寺安置。沙门大乘琮等十六人、英公李世反、鄂公尉迟德等十二人，同请高于慧日寺浮图院建陀罗尼普集会坛，所须供办。法成之日，屡现灵异，京中道俗咸叹希逢。沙门玄楷等固请翻其法本。以四年癸丑至于五年，于慧日寺从《金刚大道场经》中撮要而译，集成一部，名《陀罗尼集经》一十二卷，玄楷笔受。于时有中印度大菩提寺阿难律木叉师、迦叶师等，于经行寺译《功德天法》，编在《集经》第十卷内，故不别出焉。

○唐广州制止寺极量传

释极量，中印度人也，梵名般刺蜜帝，此言极量。怀道观方，随缘济物，展转游化，渐达支那（印度俗呼广府为支那，名帝京为摩诃止那也），乃于广州制止道场驻锡。众知博达。祈请颇多，量以利乐为心，因敷秘蹟。神龙元年乙巳五月二十三日，于《灌顶部》中诵出一品，名《大佛顶如来密因修证了义诸菩萨万行首楞严经》，译成一部十卷。乌菟国沙门弥伽释迦（释迦稍讹，正云钵？，此曰云峰）译语，菩萨戒弟子前正议大夫同中书门下平章事清河房融笔受，循州罗浮山南楼寺沙门怀迪证译。量翻传事毕，会本国王怒其擅出经本，遣人追摄，泛舶西归。后因南使入京，经遂流布，有惟憲法师、资中礼公各著《疏》解之。

○唐洛京大遍空寺实叉难陀传

释实叉难陀，一云施乞叉难陀，华言学喜，葱岭北于遁人也。智度恢旷，风格不群，善大小乘，旁通异学。天后明扬佛日，崇重大乘，以《华严》旧经，处会未备，远闻于阗有斯梵本，发使求访，并请译人。叉与经夹同臻帝阙，以证圣元年乙未于东都大内大遍空寺翻译。天后亲临法座，焕发《序》文，自运仙毫，首题名品。南印度沙门菩提流志、沙门义净同宣梵本，后付沙门复礼、法藏等于佛授记寺译成八十卷。圣历二年功毕。至久视庚子，驾幸颍川三阳宫，诏叉译《大乘入楞伽经》，天后复制序焉。又于京师清禅寺及东都佛授记寺译《文殊授记》等经，前后总出一十九部，沙门波仑、玄轨等笔受，沙门复礼等缀文，沙门法宝、恒景等证义，太子中舍贾膺福监护。长安四年，又以母氏衰老，思归慰覲，表书再上，方俞，敕御史霍嗣光送至于阗。暨和帝龙兴，有敕再征。景龙二年，达于京辇，帝屈万乘之尊，亲迎于开远门外。倾都缁侣，备幡幢导引。仍饰青象，令乘之入城，敕于大荐福寺安置。未遑翻译，遘疾弥留，以景云元年十月十二日，右胁累足而终，春秋五十九岁。有诏听依外国法葬。十一月十二日于开远门外古然灯台焚之，薪尽火灭，其舌犹存。十二月二十三日，门人悲智、敕使哥舒道元送其余骸及斯灵舌还归于阗，起塔供养。后人复于茶毗之所，起七层塔，土俗号为华严三藏塔焉。

○周西京广福寺日照传

释地婆诃罗，华言日照，中印度人也。洞明八藏，博晓五明，戒行高奇，学业勤悴，

而咒术尤工。以天皇时来游此国，仪凤四年五月，表请翻度所赍经夹，仍准玄奘例，于一大寺别院安置，并大德三五人同译。至天后垂拱末，于两京东西太原寺（西太原寺后改西崇福寺，东太原寺后改大福先寺）及西京广福寺，译《大乘显识经》、《大乘五蕴论》等凡一十八部，沙门战陀般若提婆译语，沙门慧智证梵语。敕诸名德助其法化，沙门道成、薄尘、嘉尚、圆测、灵辩、明恂、怀度证义，沙门思玄、复礼缀文笔受，天后亲敷睿藻，制序冠首焉。照尝与觉护同翻《佛顶》，深体唐言，善传佛意。每进新经，锡赉丰厚。后终于翻经小房，享年七十五。天后敕葬于洛阳龙门香山，塔见存焉。

○周洛京魏国东寺天智传

释提云般若，或云提云陀若那，华言天智，于阗国人也。学通大小，解兼真俗，

咒术禅门，无不谙晓。永昌元年，来届于此，谒天后于洛阳，敕令就魏国东寺（后改大周东寺）翻译。即以其年己丑至天授二年辛卯，出《华严经法界无差别论》等六部七卷，沙门处一笔受，沙门复礼缀文，沙门德感、慧俨、法明、恒景等证义。智终年卒地，莫得而闻。

○周洛京佛授记寺慧智传（明仁全）

释慧智，其父印度人，婆罗门种，因使游此方，而生于智。少而精勤，有出俗之志，天皇时从长年婆罗门僧，奉敕度为弟子。本既梵人，善闲天竺书语；生于唐国，复练此土言音。三藏地婆诃罗、提云若那、宝思惟等所有翻译，皆召智为证，兼令度语。后至长寿二年癸巳，智于东都佛授记寺自译《观世音颂》一卷。不详所终。有沙门明？者，不知何许人，出家隶业，悉在佛授记寺。尤善毗尼，兼闲经论。天册万岁元年，敕令刊定经目？所专纂录，编次持疑，更与翻经大德二十余人同共参正，号曰《大周经录》焉。智升云：“虽云刊定，繁秽尤多。徒见流行，实难凭准。”盖此录支经别品，杂沓不伦，致为升公之所黜矣。

○周洛京寂友传

释弥陀山，华言寂友，睹货逻国人也。自幼出家，游诸印度，遍学经论，《楞伽》、《俱舍》，最为穷核。志传像法，不吝乡邦，杖锡孤征，来臻诸夏，因与实叉难陀共译《大乘入楞伽经》。又天授中，与沙门法藏等译《无垢净光陀罗尼经》一卷。其经，佛为劫比罗战荼婆罗门说，延其寿命。译毕进内，寻辞帝归乡，天后以厚礼饯之。

卷三

◎译经篇第一之三（正传十四人附见三人）○唐京师总持寺智通传

释智通，姓赵氏，本陕州安邑人也。隋大业中出家受具，后隶名总持寺。律行精明，经论该博。自幼挺秀，即有游方之志，因往洛京翻经馆学梵书并语，晓然明解。属贞观中有北天竺僧赍到《千臂千眼经》梵本，太宗敕搜天下僧中学解者充翻经馆缀文、笔受、证义等。通应其选，与梵僧对译，成二卷。天皇永徽四年，复于本寺出《千臂陀罗尼观世音菩萨咒》一卷、《观自在菩萨随心咒》一卷、《清净观世音菩萨陀罗尼》一卷，共四部五卷。通善其梵字，复究华言，敌对相翻，时皆推伏。又云“行瑜伽秘密教，大有感通”。后不知所终。

○唐京师奉恩寺智严传

释智严，姓尉迟氏，本于阗国质子也，名乐。受性聪利，隶鸿胪寺，授左领军卫大将军上柱国，封金满郡公，而深患尘劳，唯思脱屣。神龙二年五月，奏乞以所居宅为寺，敕允，题

榜曰奉恩是也。相次乞舍官入道，十一月二十四日墨制听许。景龙元年十一月五日，孝和帝诞节剃染。寻奉敕于此寺翻经，多证梵文，诸经成部，严有力焉。严重译出《生无边法门陀罗尼经》。后于石磬谷行头陀法，又充终南山至相寺上座，体道用和，率从清谨。不知其终。

○唐洛京天竺寺宝思惟传

释阿你真那，华言宝思惟，北印度迦湿蜜罗国人，刹帝利种。幼而舍家，禅诵为业。进具之后，专精律品，而慧解超群，学兼真俗，乾文咒术，尤攻其妙。加以化导为心，无恋乡国。以天后长寿二年，居于洛都，敕于天宫寺安置。即以其年创译至中宗神龙景午于佛授记、天宫、福先等寺，出《不空■索陀罗尼经》等七部。睿宗大极元年四月，太子洗马张齐贤等缮写进内。其年六月，敕令礼部尚书晋国公薛稷、右常侍高平侯徐彦伯等详定入目施行。那自神龙之后，不务翻译，唯精勤礼诵，修诸福业。每于晨朝磨香为水，涂浴佛像，后方饮食。从始泊终，此为恒业。衣钵之外，随得随施。后于龙门山请置一寺，制度皆依西域，因名天竺焉。门徒学侶同居此寺，精诚所感，灵应实繁。寿百有余岁，以开元九年终于寺，构塔旌表焉。

○唐洛京长寿寺菩提流志传

释菩提流志，南天竺国人也，净行婆罗门种，姓迦叶氏。年十二，就外道出家，事波罗奢罗，学《声明》、《僧？》等论。历数、咒术、阴阳、讖纬、靡不该通。年

逾耳顺，方乃回心，知外法之乖违，悟释门之渊默，隐居山谷，积习头陀。初依耶舍瞿沙三藏学诸经论，其后游历五天，遍亲讲肆。高宗大帝闻其远誉，挹彼高风，永淳二年，遣使迎接。天后复加郑重，令住东洛福先寺译《佛境界》《宝雨》、《华严》等经，凡十一部。中宗神龙二年，又住京兆崇福寺，译《大宝积经》。属孝和厌代，睿宗登极，敕于北苑白莲池、甘露亭，续其译事，翻度云毕，御序冠诸。其经旧新凡四十九会，总一百二十卷。先天二年四月八日进内，此译场中沙门思忠、天竺大首领伊舍罗等译梵文，天竺沙门波若屈多、沙门达摩证梵义，沙门履方、宗一、慧觉笔受，沙门深亮、胜庄、尘外、无著、怀迪证义，沙门承礼、云观、神灏、道本次文。次有润文官卢粲、学士徐坚、中书舍人苏高、给事中崔璩、中书门下三品陆象先、尚书郭元振、中书令张说、侍中魏知古，儒释二家，构成全美。《宝积》用贤既广，流志运功最多，所嫌者古今共译《一切陀罗尼》末句云“莎祇诃”，皆不窃考清浊，遂使命章有异。或云“萨婆诃”，或云“？幡诃”等，九呼不伦，楷定梵音，悉无本旨。此非梵僧传诵不的，自是执笔之误，故劝莎（桑巴反）祇（无可反）诃（呼个反）为正矣。志开元十二年，随驾居洛京长寿寺。十五年十一月四日，嘱诫弟子五日斋时，令侍人散去，右胁安卧，奄然而卒，春秋一百五十六。帝闻轸悼，敕试鸿胪卿，谥曰《开元一切遍知》三藏。遣内侍杜怀信监护丧事，出内库物，务令优赡。用卤簿羽仪，幡幢花盖，阗塞衢路。十二月一日，迁窆于洛南龙门西北原，起塔，勒石志之。系曰：西域丧礼，其太简乎？或有国王酋长，倾心致重者，勿过舁之火葬。若东夏僧用卤簿导丧车，罕闻之矣。呜呼！道尊德贵，不言而邀，此不其盛欤！

○唐罗浮山石楼寺怀迪传（般若力善部末摩）

释怀迪，循州人也。先入法于南楼寺，其山半在海涯，半连陆岸，乃仙圣游居之灵府也。迪久探经论，多所该通，七略九流，粗加寻究。以海隅之地，津济之前，数有梵僧寓止于此，迪学其书语，自兹通利。菩提流志初译《宝积》，召迪至京证义，事毕南归。后于广府遇一梵僧，赍多罗叶经一夹，请共翻传，勒成十卷，名《大佛顶万行首楞严经》是也。迪笔受经旨，缉缀文理，后因南使附经入京，即开元中也。又乾元元年有铨宾三藏般若力、中天竺婆罗门三藏善部末摩、个失密三藏舍那并慕化入朝，诏以力为太常少卿，末摩为鸿胪少卿，并员外置，放还本土。或云：“各赍经至，属燕赵阻兵，不遑宣译，故以官品荣之。”

○唐京兆慈恩寺寂默传

释牟尼室利，华言寂默。其为人也，神宇高爽，量度真率。德宗贞元九年，发那烂陀寺，拥锡东来。自言从北印度往此寺出家，受戒学法焉。十六年，至长安兴善寺。十九年，徙崇福醴泉寺。复于慈恩寺请行翻译事，乃将奘师梵本，出《守护国界主陀罗尼经》十卷，又进《六尘兽图》。帝悦，檀施极多。元和元年六月十九日，卒于慈恩寺。初默说中天竺摩伽陀国那烂陀寺周围四十八里，九寺一门，是九天王

所造。默在寺日，住者万余，以大法师处量纲任，西域伽蓝无如其高广矣。案《守护国界主经》是般若译，牟尼证梵本，翰林待诏光宅寺智真译语，圆照笔受，鉴虚润文，澄观证义焉。

○唐丘慈国莲华寺莲华精进传

释勿提提羼鱼，华言莲华精进，本屈支城人也，即龟兹国，亦云丘慈，正曰屈支。时唐使车奉朝到彼土，城西门外有莲华寺，进居此中，号三藏绊刍。奉朝至诚祈请，开译梵夹，传归东夏。进允之，遂译出《十力经》，可用东纸三幅成一卷，是佛在舍卫国说。安西境内有前践山，山下有伽蓝，其水滴溜成音可爱，彼人每岁一时采缀其声以成曲调，故《耶婆瑟鸡》，开元中用为羯鼓曲名，乐工最难其杖撩之术。进寺近其滴水也。其经是沙门悟空同《十地回向轮经》共十一卷，赍进。贞元中请编入《藏》，值圆照续录，故述其由。

○唐北庭龙兴寺戒法传

释尸罗达摩，华言戒法也，本于阗人。学业该通，善知华梵，居于是国，为大法师。唐贞元中，悟空回至北庭，其本道节度使杨袭古与龙兴寺僧请法为译主，翻《十地经》。法躬读梵文并译语，沙门大震笔受，法超润文，善信证义，悟空证梵文。又译《回向轮经》，翻传才毕，缮写欲终，遇北庭宣慰中使段明秀事讫回，与北庭奏事官牛昕、安西奏事官程锷等相随入朝，为沙河不通，取回鹘路，其梵夹留北庭龙兴寺藏。赍所译唐本至京，即贞元五载也。法译事方终，却回豁丹，豁丹一云于遁，此皆岭北人之呼召耳，若五印度语云瞿萨怛那，华言乳国，亦云地乳也。

○唐莲华传

释莲华，本中印度人也。以兴元元年杖锡谒德宗，乞钟一口归天竺声击。敕广州节度使李复修鼓铸毕，令送于南天竺金果寺。华乃将此钟于宝军国毗卢遮那塔所安置。后以《华严》后分梵夹附舶来，为信者般若三藏于崇福寺翻成四十卷焉。一云：梵夹本是南天竺乌荼国王书献脂那天子，书云：“手自书写《华严经》百千偈中所说善财童子五十五圣者，善知识入不思议解脱境界普贤行愿品，谨奉进上，愿于龙华会中奉觐云”，即贞元十一年也。至十二年六月，诏于崇福寺翻译，锜宾沙门般若宣梵文，洛京天宫寺广济译语，西明寺圆照笔受，智柔、智通缀文，成都府正觉寺道恒、鉴虚润文，千福寺大通证义，澄观、灵邃详定，神策军护军中尉霍仙鸣、左街功德使窦文场写进，十四年二月解座。

○唐大圣千福寺飞锡传

释飞锡，未知何许人也。神气高邈，识量过人。初学律仪，后于天台法门一心三观

，与沙门楚金栖心研习。天宝初游于京阙，多止终南紫阁峰草堂寺。属不空当途传译，慎选英髦，锡预其数，频登笔受、润文之任。代宗永泰元年四月十五日，奉诏于大明宫内道场同义学沙门良贲等十六人参译《仁王护国般若经》并《密严经》。先得多罗叶时，并是偈颂，今所译者多作散文。不空与锡等及翰林学士柳抗重更详定，锡充证义正员，辞笔不愧斯职也。

系曰：锡外研儒墨，其笔仍长，时多请其论撰，如《忠国师》、《楚金》等碑，与晋陵德宣、吴兴昼公同猎广原，不知鹿死何人之手。然宣锡二公亦有不羁之失，缘饰过其实。如昼公合建中之体，？事得其伦。唯虚与实，不可同日也。

○唐京师大安国寺子邻传

释子邻，姓范氏，兖州乾封大范村人也。父峻朝，不喜三宝，或见桑门，必加咄唾，有问其故，即欲驱焉。邻生已数岁，小字邻儿，见著袈裟者，则生慕羨之意。开元初，东都广爱寺庆修律师游于岱宗，经范氏之舍。邻一见之，喜贯颜色，拜求出家。问曰：“父母云何？”对曰：“不令堂亲知，知则遭捶挞矣。师但先去，某乃影随。”律师行五里间，邻已至矣。及洛寺，受教之易，若甘之受和焉。染削已，或名志邻。至十一年，忽思二亲，辞归宁觐。其父丧明，母终已三载矣。因诣岳庙，求知母之幽趣，即敷坐具，诵《法华经》，誓见天齐王为期。其夜，岳神果召邻问：“何故恳苦如是？”邻曰：“母王氏亡来已经除服，敢问大王：母今胡在？”王顾簿吏，对曰：“王氏见系狱受苦。”邻曰：“我母何罪？”王曰：“生和尚时，食鸡卵，又取白傅头疮，坐是之故，职汝之由。”邻悲号委顿，求王请免。曰：“縶縻有分，放释无门。然则为法师计，请往？山礼阿育王塔，或可原也。”邻诘朝遵途，到句章山寺，叩头哀诉，五轮著地，礼毕投策，至四万数，俄闻有呼邻声，若蔡顺之解，望空见云气中母谢曰：“承汝之力，得生忉利天矣，故来报汝。”倏然不见。邻后求解经论，至于关辅间，外学兼通，美声籍甚。以名僧之选，恒入肃宗内殿应奉，高其舌端，精于捷对，御前口占，叙述皇道，时辈靡及。敕赐紫方袍，充供奉僧。代宗即位，更崇释氏。永泰中，不空重译《仁王护国》、《密严》等经，邻与千福寺法崇、西明寺慧静、保寿寺圆寂分职证义，并良贲润文。邻莫测其终。先所礼塔，今抵山育王寺后峰之翠微茅庵基及井存焉。井实方池，其水碧色，绿苔泛泛然，辞人游者，诗咏绝多矣。

○唐醴泉寺般若传

释般若，罽宾国人也。貌质魁梧，执戒严整，在京师，充义学沙门。宪宗敦崇佛门，深思翻译，奈何有事于蜀部，刘辟阻命，王承宗未平，朝廷多故。至元和五年庚寅，诏工部侍郎归登、孟简、刘伯刍、萧？等就醴泉寺译出经八卷，号《本生心地观》

此之梵夹乃高宗朝师子国所进者，写毕进上。帝览有敕，“朕愿为序”。寻颁下其文，冠于经首，三藏赐帛，证义诸沙门锡赉有差。先于贞元中译《华严经》后分四十卷，此盖乌荼国王所进者，于时而赐紫衣。后大中中，法宝大师玄畅奏请入藏焉。

○唐上都章敬寺悟空传

释悟空，京兆云阳人，姓车氏，后魏拓跋之远裔也。天假聪敏，志尚典坟，孝悌之声，蔼于乡里。属玄宗德被遐方，罽宾国愿附大唐，遣大首领萨婆达奚与三藏舍利越摩于天宝九载来朝阙庭，请使巡按。明年，敕中使张韬光，将国信行官庄吏四十余人西迈。时空未出俗名，奉朝授左卫泾州四门府别将，令随使臣自安西路去。至十二载至健陀罗国，罽宾东都城也，其王礼接唐使。使回，空笃疾，留健陀罗。病中发愿，瘞当出家。遂投舍利越摩落发，号达摩驮都，华言法界，当肃宗至德二年也。泊年二十九，于迦湿弥罗国受具足戒，文殊矢涅地为亲教师，邬不羼提为羯磨阿遮利，耶驮里巍地为教授，于蒙鞞寺讽声闻戒，习根本律仪。然北天竺国皆萨婆多学也。后巡历数年，遍瞻八塔，为忆君亲，因咨本师舍利越摩再三方允。摩手授梵本《十地》、《回向轮》、《十力》三经，共一夹，并佛牙舍利。以赠别空行从北路，至睹货罗国，五十七蕃中有一城，号骨咄国，城东有小海。空行次南岸，地辄摇动，云阴雨暴，霆击雹飞。乃奔就一大树间，时有众商咸投其下。商主告众曰：“谁赍佛舍利异物殊珍耶？不尔，龙神何斯忿怒？有则投于海中，无令众人惶怖。如藏匿者，自贻伊咎。”空为利东夏之故，潜乞龙神宥过。自卯达申，雨雹方霁。回及龟兹，居莲华寺，遇三藏法师勿提提羼鱼，善于传译。空因将《十力经》夹请翻之。寻抵北庭，大使复命。空出梵夹，于阗三藏戒法为译主，空证梵文并度语，翻成《十地回向轮经》。事讫，随中使段明秀以贞元五年己巳达京师，敕于跃龙门使院安置。进上佛牙、舍利、经本，宣付左神策军缮写，功德使窦文场写毕进呈，敕署空壮武将军、试太常卿。乃归章敬寺。次返云阳问二亲，坟树已臧矣。凡所往来，经四十年，于时已六十余。所翻经三本，共十一卷。翻经大德圆照《续开元录》皆编入《藏》，复记空之行状焉。

○唐京师满月传（智慧轮）

释满月者，西域人也。爰来震旦，务在翻传瑜伽法门，一皆贯练。既多神效，众所推钦。开成中，进梵夹，遇伪甘露事去未旋踵，朝廷无复纪纲，不暇翻译。时悟达国师知玄好学声明，礼月为师，情相款密，指教梵字并音字之缘界，《悉曇》八转，深得幽趣。玄曰：“异哉，吾体两方之言，愿参象胥之未，可乎？”因请翻诸禁咒，乃与菩提祇日罗金刚悉地等重译出《陀罗尼集》四卷，又《佛为毗戍陀天子说尊胜经》一卷，详核三复，曲尽佛意。此土先已有《陀罗尼集》十二卷，新翻四卷，未闻入《藏》。月等俱不测其终。次有般若斫迦三藏者，华言智慧轮，亦西域人。大中中，行大曼籊罗法，已受灌顶为阿闍梨，善达方言，深通密语，著《佛法根

本》。宗乎大毗卢遮那，为诸佛所依，法之根本者，陀罗尼是也。至于出生无边法门，学者修戒定慧以总持助成，速疾之要，无以超越。又述《示教指归》，共一千余言，皆大教之铃键也，出弟子绍明，咸通年中刻石记传焉。

论曰：无漏海中，震潮音而可怪；总持言下，书梵字而不常。未闻者闻，闻光音天之余响；未解者解，解最上法之所诠。圣贤饮之为醇醪，凡劣啜之成糟粕。若夫有缘则遇，无道则违。秦狱既械其利防，此无缘也；汉庭肇迎其白马，斯有感焉。听彼异呼，览其横字，情可求而呼相乱，字虽殊而意且同。是故《周礼》有象胥氏通六蛮语，狄鞮主七戎，寄司九夷，译知八狄。今四方之官，唯译官显著者何也？疑汉已来多事北方，故译名烂熟矣。又如周秦轩使者，奏籍通别国方言，令君王不出户庭坐知绝遐异俗之语也。若然者，象胥知其远也，方言知其近也。大约不过察异俗、达远情者矣。懿乎东汉，始译《四十二章经》，复加之为翻也。翻也者，如翻锦绮，背面俱花，但其花有左右不同耳。由是翻译二名行焉。初则梵客华僧，听言揣意，方圆共凿，金石难和，碗配世间，摆名三昧，咫尺千里，覩面难通。次则彼晓汉谈，我知梵说，十得八九，时有差违，至若怒目看世尊、彼岸度无极矣。后则猛、显亲往，奘、空两通，器请师子之膏，鹅得水中之乳，内竖对文王之间，杨雄得绝代之文，印印皆同，声声不别，斯谓之大备矣。逃观道安也，论五失三不易。彦琮也籍其八备，明则也撰翻经仪式，玄奘也立五种不翻，此皆类《左氏》之诸凡，同史家之变例。今立新意，成六例焉。谓译字译音为一例，胡语梵言为一例，重译直译为一例，粗言细语为一例，华言雅俗为一例，直语密语为一例也。初则四句，一译字不译音，即陀罗尼是。二译音不译字，如佛胸前夔字是。三音字俱译，即诸经律中纯华言是。四音字俱不译，如经题上二字是。第二胡语梵言者，一在天竺，纯梵语。二雪山之北是胡。山之南名婆罗门国，与胡绝，书语不同，从羯霜那国字源本二十余言，转而相生，其流漫广，其书竖读同震旦欤？至吐货罗，言音渐异，字本二十五言，其书横读。度葱岭南，迦毕试国言字同吐货罗，已上杂类为胡也。若印度言字，梵天所制，本四十七言，演而遂广，号《青藏》焉。有十二章，教授童蒙，大成《五明论》，大抵与胡不同。五印度境弥亘既遥，安无少异乎？又以此方始从东汉传译，至于隋朝，皆指西天以为胡国，且失梵天之苗裔，遂言胡地之经书。彦琮法师独明斯致，唯征造录，痛责弥天，符佛地而合《阿含》，得之在我；用胡名而迷梵种，失则诛谁？唐有宣公，亦同鼓唱。自此若闻弹舌，或睹黑容，印定呼为梵僧，雷同认为梵语。琮师可谓忙于执斧捕前白露之蝉，曾在回光照后黄衣之雀。既云西土有梵有胡，何不南北区分，是非料简？致有三失。一改胡为梵，不析胡开，胡还成梵，失也。二不善胡梵二音，致令胡得为梵，失也。三不知有重译，失也。当初尽呼为胡，亦犹隋朝已来总呼为梵，所谓过犹不及也。如据宗本而谈，以梵为主；若从枝末而说，称胡可存。何耶？自五天至岭北，累累而译也，乃疑琮公留此以待今日，亦不敢让焉。三亦胡亦梵，如天竺经律传到龟兹，龟兹不解天竺语，呼天竺为印特伽国者，因而译之。若易解者犹存梵语。如此胡梵俱有者是。四二非句，纯华言是也。第三重译直译者，一直译，如五印夹牒直来东夏译者是。二重译，如经传岭北楼兰、焉耆，不解天竺言，且译为胡语，如梵云邬波陀耶

，疏勒云鹖社，于阗云和尚。又天王，梵云拘均罗，胡云毗沙门是。三亦直亦重，如三藏直赍夹牒而来，路由胡国，或带胡言。如觉明口诵《昙无德律》中有和尚等字者是。四二非句，即赍经三藏虽兼胡语，到此不翻译者是。第四粗言细语者，声明中一苏漫多，谓泛尔平语言辞也，二彦底多，谓典正言辞也。佛说法多依苏漫多，意住于义，不依于文，又被一切故。若彦底多非诸类所能解故。亦名全声者，则言音分明典正，此细语也。半声者，则言音不分明而讹僻，此粗语也。一是粗非细，如五印度时俗之言是。二唯细非粗，如法护、宝云、奘师、义净，洞解声明音律，用中天细语典言而译者是。三亦粗亦细，如梵本中语涉粗细者是。或注云此音讹僻，即粗言也，四二非句阙。第五华言雅俗者，亦云音有楚夏同也。且此方言语，雅即经籍之文，俗乃街巷之说，略同西域。细即典正，粗即讹僻也。一是雅非俗，如经中用书籍言是。二是俗非雅，如经中乞头博颊等语是。二亦雅亦俗，非学士润文，信僧执笔，其间浑金璞玉交杂相投者是。四二非句阙。第六直语密语者，二种作句，涉俗为直，涉真为密，如婆留师是。一是直非密，谓婆留师翻为恶口住，以恶口人人不亲近故。二是密非直，婆留师翻为菩萨所知彼岸也，既通达三无性理，亦不为众生所亲近故。三两亦句，即同善恶真俗，皆不可亲近故。四二非句，谓除前相故。又阿毗持呵娑（目数数得定），郁婆提（目生起拔根弃背）、婆罗（目真实离散乱）此诸名在经论中，例显直密语义也。更有胡梵文字，四句易解。凡诸类例括彼经论，解者不见其全牛，行人但随其老马矣。或曰：“翻梵夹须用此方文籍者，莫招滥涉儒雅之过乎？”通曰：“言不关典，非子史之言，用其翻对，岂可以委巷之谈而糅于中耶？故道安云：‘乃欲以千载上之微言，传所合百王下之末俗’，斯为不易矣。”或曰：“汉魏之际，盛行斯意，致使陈寿《国志》述临儿国云：‘浮屠所载，与中国《老子经》而相出入。盖老子西出关，过西域之天竺，教胡为浮屠。’”“此为见译家用道德二篇中语，便认云与《老子经》互相出入也。设有华人能梵语，与西僧言说，两相允会，可便谓此人为天竺人耶？盍穷其始末乎？是知若用外书，须招此谤。如童寿译《法华》，可谓折中，有天然西域之语趣矣。今观房融润文于《楞严》，僧肇征引而造论，宜当此诮焉。苟参鄙俚之辞，曷异屠沽之谱？然则糅书勿如无书，与其典也，宁俗。傥深溺俗，厥过不轻；折中适时，自存法语，斯谓得译经之旨矣。故佛说法多依苏漫多也。又传译之兴，奉行之意，不明本起，何示将来？今究其宣扬，略陈梗概。夫教者不伦，有三畴类；一显教者，诸乘经律论也（不同瑜伽论中显了教，是多分大乘藏教）；二密教者，《瑜伽灌顶五部护摩三密曼籥罗法》也；（瑜伽隐密教，是多分声闻藏教）；三心教者，直指人心，见性成佛，禅法也。次一法轮者，即显教也，以摩腾为始祖焉。次二教令轮者，即密教也，以金刚智为始祖焉。次三心轮者（义加此轮），即禅法也，以菩提达磨为始祖焉。是故传法轮者以法音传法音；传教令轮者，以秘密传秘密；传心轮者，以心传心，此之三教、三轮、三祖，自西而东，化凡而圣，流十五代（汉、魏、晋、宋、齐、梁、陈、隋、唐、朱梁、后唐、石晋、刘汉、郭周、今大宋），法门之贻厥孙谋，万二千年，真教之克昌厥后。”或曰：“译场经馆，设官分职，不得闻乎？”曰：“此务所司，先宗译主，即赍叶书之三藏明练显密二教者充之。次则笔受者。必言通华梵，学综有空，相问委知，然后下笔。西晋伪秦已来立此员者

，即沙门道含、玄奘、姚嵩、聂承远、父子。至于帝王，即姚兴、梁武、天后、中宗，或躬执翰，又谓为缀文也。次则度语者，正云译语也。传度转令生解，亦名传语，如翻《显识论》，沙门战陀译语是也。次则证梵本者，求其量果，密能证知，能诠不差，所显无谬矣。如居士伊舍罗证译《毗奈耶》梵本是也。至有立证梵义一员，乃明西义得失，贵令华语下不失梵义也。复立证禅义一员，沙门大通充之。次则润文一位，员数不恒，令通内外学者充之。良以笔受在其油素，文言岂无俚俗，傥不失于佛意，何妨刊而正之。故义净译场，则李峤、韦嗣立、卢藏用等二十余人，次文润色也。次则证义，盖证已译之文所诠之义也。如译《婆沙论》，慧嵩、道朗等三百人考正文义，唐复礼累场充任焉。次则梵呗，法筵肇后，梵呗前兴，用作先容，令生物善，唐永泰中方闻此位也。次则校勘，讎对已译之文，隋则彦琮覆疏文义，盖重慎之至也。次则监护大使，后周平高公侯寿为总监检校，唐则房梁公为奖师监护，相次许观、杨慎交、杜行縉等充之。或用僧员，则隋以明穆、昙迁等十人监掌翻译事，诠定宗旨。其处则秦逍遥园、梁寿光殿、瞻云馆、魏汝南王宅。又隋炀帝置翻经馆，其中僧有学士之名。唐于广福等寺，或宫园不定。又置正字字学，玄应曾当是职，后或置或否。朝廷罢译事，自唐宪宗元和五年至于周朝，相望可一百五十许岁，此道寂然。迨我皇帝临大宝之五载，有河中府传显密教沙门法进请西域三藏法天译经于蒲津，州府官表进，上览大悦，各赐紫衣，因敕造译经院于太平兴国寺之西偏。续敕搜购天下梵夹，有梵僧法护、施护同参其务，左街僧录智照大师慧温证义。又诏沧州三藏道圆证梵字，慎选两街义解沙门志显缀文，令遵、法定、清沼笔受，守岷、道真、知逊、法云、慧超、慧达、可瑰、善祐、可支证义，伦次缀文，使臣刘素、高品王文寿监护，礼部郎中张洎、光禄卿汤悦次文润色，进《校量寿命经》、《善恶报应经》、《善见变化》、《金曜童子》、《甘露鼓》等经，有命授三藏天息灾、法天、施护师号，外试鸿胪少卿、赐厩马等。笔受证义诸沙门各赐紫衣并帛有差。

御制新译经序，冠于经首。观其佛日重光，法轮发轳，赤玉箱而启秘，青莲朵以开芳，圣感如然，前代孰堪比也。又以宣译之者乐略乐繁，隋之已前，经题简少；义净已降，经目偏长。古则随取强名，后则繁尽我意。又旧翻秘咒，少注合呼。唐译明言，多详音反，受持有验，斯胜古踪。净师大译诸经，偏精《律部》，自高文彩，最有可观。金刚智也秘藏祖师，阿目？也多经译匠，师资相接，感应互彰。无畏言辞且多朴实。觉救加佛顶之句，人无间然。日照出显识之文，刃有余地。思惟《■索》，学喜《华严》，密语断章，大人境界。流志《宝积》，菩提曼荼，华胥之理致融明，灌顶之风标秘邃，迪公勤其笔受，般若终乎译常其余诸公，皆翻夹牒，欲知状貌，聊举喻言。其犹人也，人皆人也，奈何姿制形仪，各从所肖，肖其父焉。若如此，大则同而小有异耳。良由译经是佛法之本，本立则道生。其道所生，唯生释子，是以此篇冠首。故曰先王将海，必先有事于河者，示不忘本也。”

卷四

◎义解篇第二之一（正传二十人附见七人）○唐京兆大慈恩寺窥基传

释窥基，字洪道，姓尉迟氏，京兆长安人也。尉迟之先与后魏同起，号尉迟部，如中华之诸侯国，入华则以部为姓也。魏平东将军说六代孙孟都生罗迦，为隋代州西镇将，乃基祖焉。考讳宗，唐左金吾将军松州都督江由县开国公。其鄂国公德则诸父也，《唐书》有传。基母裴氏梦掌月轮吞之，寤而有孕。及乎盈月诞弥，与群儿弗类，数方诵习，神晤精爽。奘师始因陌上见其眉秀目朗，举措疏略，曰：“将家之种，不谬也哉。脱或因缘相扣，度为弟子，则吾法有寄矣。”复念在印度时计回程次，就尼闍子边占得卦甚吉，“师但东归，哲资生矣”。遂造北门将军，微讽之出家。父曰：“伊类粗悍，那胜教诏？”奘曰：“此之器度，非将军不生，非某不识。”父虽然诺，基亦强拒。激勉再三，拜以从命，奋然抗声曰：“听我三事，方誓出家。不断情欲，荤血、过中食也。”奘先以欲勾牵，后令入佛智，佯而肯焉。行驾累载前之所欲，故关辅语曰“三车和尚”。即贞观二十二年也。一基自序云：“九岁丁艰，渐疏浮俗。”若然者，三车之说，乃厚诬也。至年十七，遂预缁林。及乎入法，奉敕为奘师弟子，始住广福寺。寻奉别敕选聪慧颖脱者入大慈恩寺，躬事奘师，学五竺语，解纷开结，统综条然。闻见者无不叹伏。凡百识度跋渠，一览无差，宁劳再亿。年二十五，应诏译经，讲通大小乘教三十余本。创意留心，勤勤著述，盖切问而近思，其则不远矣。造《疏》计可百本。奘所译《唯识论》，初与窾、尚、光四人同受，润色、执笔、检文、纂义，数朝之后，基求退焉。奘问之，对曰：“夕梦金容，晨趋白马，虽得法门之糟粕，然失玄源之醇粹，某不愿立功于参？。若意成一本，受责则有所归。”奘遂许之。以理遣三贤，独委于基，此乃量材授任也。时随受撰录所闻，讲周疏毕。无何，西明寺测法师亦俊朗之器，于《唯识论》讲场得计于闾者，赂之以金，潜隐厥形，听寻联缀，亦疏通论旨。犹数座方毕，测于西明寺鸣椎集僧，称讲此论。基闻之，惭居其后，不胜怅快。奘勉之曰：“测公虽造《疏》，未达因明。”遂为讲陈那之论，基大善三支，纵横立破，述义命章，前无与比。又云，请奘师唯为己讲《瑜伽论》，还被测公同前盗听，先讲。奘曰：“五性宗法，唯汝流通，他人则否。”后躬游五台山，登太行，至西河古佛宇中宿，梦身在半山，岩下有无量人唱苦声，冥昧之间，初不忍闻。徙步陟彼层峰，皆琉璃色，尽见诸国土。仰望一城，城中有声曰：“住住，咄，基公未合到此。”斯须，二天童自城出，问曰：“汝见山下罪苦众生否？”答曰：“我闻声而不见形。”童子遂投与剑一镡曰：“剖腹当见矣。”基自剖之，腹开，有光两道晖映山下，见无数人受其极苦。时童子入城，持纸二轴及笔投之，捧得而去。及旦，惊异未已。过信夜，寺中有光久而不灭，寻视之，数轴发光者，探之，得《弥勒上生经》。乃忆前梦，必慈氏令我造《疏》通畅厥理耳。遂援毫次，笔锋有舍利二七粒而陨，如吴含桃许大，红色可爱。次零然而下者，状如黄粱粟粒。一云，行至太原传法，三车自随，前乘经论箱帙，中乘自御，后乘家妓女仆食馔。于路间遇一老父，问乘何人。对曰：“家属。”父曰：“知法甚精，携家属偕，恐不称教。基闻之，

顿悔前非，赧然独往。老父则文殊菩萨也。此亦厄语矣。随奘在玉华宫参译之际，三车何处安置乎？基随处化徒，获益者众。东行博陵，有请讲《法华经》，遂造《大疏》焉。及归本寺，恒与翻译旧人往还。屡谒宣律师。宣每有诸天王使者执事，或冥告杂务。尔日基去方来，宣怪其迟暮，对曰：“适者大乘菩萨在此，善神翼从者多，我曹神通为他所制故尔。”以永淳元年壬午示疾，至十一月十三日长往于慈恩寺翻经院，春秋五十一，法腊无闻。葬于樊村北渠，纡三藏奘师莹陇焉。弟子哀恸，余外执紼会葬，黑白之众盈于山谷。基生常勇进，造弥勒像，对其像日诵《菩萨戒》一遍，愿生兜率，求其志也。乃发通身光瑞，烂然可观。复于五台造玉石文殊菩萨像，写金字《般若经》毕，亦发神光焉。弟子相继取基为折中，视之如奘在焉。大和四年庚戌七月癸酉，迁塔于平原，大安国寺沙门令俭检校塔亭，徙棺，见基齿有四十根不断玉如众弹指言是佛之一相焉。凡今天下佛寺图形，号曰百本疏主真，高宗大帝制赞。一云玄宗。然基魁梧堂堂，有桓赳之气，而慈济之心，诲人不倦，自天然也。其符彩则项负玉枕，面部宏伟，交手十指若印契焉。名讳上字多出没不同者，为以《慈恩传》中云，奘师龙朔三年于玉华宫译《大般若经》终笔，其年十一月二十二日令大乘基奉表奏闻，请御制序。至十二月七日通事舍人冯义宣由，此云灵基，《开元录》为“窥基”，或言“乘基”，非也。彼曰大乘基，盖慧立、彦惊不全斥，故云大乘基，如言不听泰耳，犹谨遣大乘光奉表同也。今海内呼慈恩法师焉。

系曰：性相义门，至唐方见大备也。奘师为《瑜伽》、《唯识》开创之祖，基乃守文述作之宗。唯祖与宗，百世不除之祀也。盖功德被物，广矣大矣。奘苟无基，则何祖张其学乎？开天下人眼目乎？二师立功与言，俱不朽也。然则基也，鄂公犹子，奘师门生，所谓将家来为法将，千载一人而已。故《书》有之，厥父菑，厥子乃肯播，矧能肯获”，其百本疏主之谓欤！

○唐京师西明寺道世传

释道世，字玄暉，姓韩氏，厥先伊阙人也。祖代因官为京兆人焉。生且渥润，渐而聪敏，俄厌众沙，思参救蚁。二亲钟爱，遏绝其请，久而遂心。时年十二，于青龙寺出家，从执德瓶，止临欣鉴，律宗研核，书籍钻寻，特慕上乘融明实性。于时籍甚，三辅钦归。显庆年中，大帝以玄奘师所翻经论，未几诏入内，及慈恩寺大德更代行道，不替于时，世亦预其眩及为皇太子造西明寺，爰以英博召入斯寺，时道宣律师当涂行律，世且旁敷，同驱五部之车，共导三乘之轨，人莫我及，道望芬然。复因讲贯之余，仍览甚深之藏。以为古今绵代，制作多人，虽雅趣佳辞，无足于传记。由是摭文囿之菁华，嗅大义之瞻亘，以类编录，号《法苑珠林》，总一百篇，勒成十帙。始从劫量，终乎杂记，部类之前，各序别论。令学览之人，就门随部，检括所知，如提纲焉，如举领焉。世之用心周乎十稔，至总章元年毕轴，兰台郎李俨为之都序，此文行于天下。又著《善恶业报》及《信福论》共二十三卷，《大小乘禅门观》及《大乘观》共十一卷，《受戒仪式》《礼佛仪式》共六卷，《四分律

讨要》五卷、《四分律尼钞》五卷、《金刚经集注》三卷，十部都一百五十三卷。世颇多著述，未测其终。名避太宗庙讳，多行字耳，故时称玄懔焉。

○唐京兆大慈恩寺普光传

释普光，未知何许人也。明敏为性，爰择其木，请事三藏奘师。勤恪之心，同列靡及。至于智解，可譬循环，闻少证多，奘师默许。未参传译，头角特高，左右三藏之美，光有功焉。初，奘嫌古翻《俱舍》，义多缺然，躬得梵本，再译真文，乃密授光，多是记忆西印萨婆多师口义。光因著《疏》解判。一云其《疏》至圆晖略之为十卷，如汉之有沱欤？又尝随奘往玉华宫译《大般若经》，厥功出乎裨赞也，时号大乘光。观夫奘自贞观十九年创译，讫麟德元年，终于玉华宫，凡二十载，总出大小乘经律论七十五部一千三百三十五卷，十分七八是光笔受，或谓嘉光、普光也。若验从辩机同参译务，即普光是也。

○唐京兆大慈恩寺法宝传（胜庄）

释法宝，亦三藏奘师学法之神足也。性灵敏利，最所先焉。奘初译《婆沙论》毕，宝有疑情，以非想见惑，请益之。奘别以十六字入乎论中，以遮难辞。宝白奘曰：“此二句四句为梵本有无？”奘曰：“吾以义意酌情作耳。”宝曰：“师岂宜以凡语增加圣言量乎？”奘曰：“斯言不行，我知之矣。”自此■？颉颃于奘之门，至乎六离合释义，俱舍宗以宝为定量矣。光师往往同迦湿弥罗余师礼记衍字也。时光、宝二法师若什门之融睿焉。后越精义学，令问孔胶。长安三年，于福先寺、京西明寺预义净译场，宝与法藏胜庄等证义，于时颇露头角，莫之与京欤。

○唐京师西明寺圆测传（薄尘灵辩）

释圆测者，未详氏族也。自幼明敏，慧解纵横。三藏奘师为慈恩基师讲新翻《唯识论》，测略守门者隐听，归则缉缀义章。将欲罢讲，测于西明寺鸣钟召众，称讲《唯识》。基嫌其有夺人之心，遂让测讲训。奘讲《瑜伽》，还同前盗听受之，而亦不后基也。迨高宗之末，天后之初，应义解之选，入译经馆，众皆推挹。及翻《大乘显识》等经，测充证义，与薄尘、灵辩、嘉尚攸方其驾。所著《唯识疏钞》，详解经论，天下分行焉。

○唐京师安国寺元康传

释元康，不详姓氏。贞观中游学京邑，有彭亨之誉。形拥肿而短，然其性情酋勇，闻少解多，群辈推许。先居山野，恒务持诵《观音》，求加慧解，遂感鹿一首角分八歧，厥形绝异。康见之，抚而驯伏，遂豢养之，乘而致远曾无倦色。以《三论》之文荷之于背，又以小轴系之于尾，曳入上都，意为戏弄：说有之徒不达空性，我

与轻轴碾之，令悟真理。又衣大布，曳纳播，戴竹笠，笠宽丈有二尺。装饰诡异，人皆骇观。既入京城，见一法师盛集讲经化导。康造其筵，近其座，便就所讲义申问，往返数百言，人咸惊康之辩给如此。复戏法师曰：“甘桃不结实，苦李压低枝。”讲者曰：“轮王千个子，巷伯勿孙儿。”盖讥康之无生徒也。康曰：“丹之藏者赤，漆之藏者黑，随汝之赤者非纁熏绛焉，入汝之黑者非铅墨焉。”举众皆云：“辞理涣然，可非垂迹之大士也？”帝闻之，喜曰：“何代无其人！”诏入安国寺讲此《三论》。遂造疏，解中观之理。别撰《玄枢》两卷，总明《中》、《百门》之宗旨焉。后不测其终。系曰：康师曳纳播者何？通曰：“梵言立播，华言裹腹衣，亦云抱腹，形制如偏袒，一幅才穿得手，肩袖不宽。著在左边，右边施带，多贮绵絮。然是御寒之服，热国则否，用此亦圣开。流于东土，则变成色帛，而削幅缀于左右袖上，垂之制曳然，旌表我通赡经论。一本则曳一支，多则多曳。未知稽古自何人始乎？今单言播，略立字耳，全非御寒之意，翻为我慢之衣。既失元端，而多滥作，别形圣教以俟后贤，此外无施异制以乱大伦。《诗》曰：服之不称，身之灾也，吁！”

○唐简州福聚寺靖迈传

释靖迈，梓潼人也。少孺褻持，长高志操，特于经论研核造微。气性沉厚，不妄交结，游必择方，抵于京辅。贞观中，属玄奘西回，敕奉为太穆太后于京造广福寺，就彼翻译。所须吏力，悉与玄龄商量，务令优给。遂召证义大德谙练大小乘经论为时所尊尚者，得一十一人，迈预其精选，即居慈恩寺也。同普光寺栖玄、广福寺明？、会昌寺辩机、终南山丰德寺道宣同执笔缀文，翻译《本事经》七卷。迈后与神窻笔受于玉华宫及慈恩寺翻经院，皆推适变，故得经心矣。后著《译经图纪》四卷，铨序古今经目、译人名位、单译、重翻、疑伪等科，一皆条理，见编于《藏》。开元中，智升又续其题目焉。

○唐新罗国顺规传

释顺规者，浪郡人也，本土之氏族，东夷之家系，故难详练。其重译学声教，盖出天然。况乎因明之学，奘师精研，付授华僧，尚未多达，规之克通，非其宿殖之力，自何而至于是欤？传得奘师真唯识量，乃立决定相违不定量。于乾封年中因使臣入贡附至。于时奘师长往向及二年。其量云：“真故极成色，定离眼识，自许初三摄，眼所不摄故，犹如眼根。”良以三藏隐密周防，非大智不明。规为宗云：“不离于眼识，自许初三摄，眼所不摄故，犹如眼识也。”如此善成他义。时大乘基览此作，便见规所不知。虽然，终仰边僧识见如此，故叹之曰：“新罗顺规法师者，声振唐蕃，学包大小，业崇迦叶，唯执行于杜多，心务薄拘，恒驰声于少欲。”既而蕴艺西夏，传照东夷，名道日新，缙素钦揖。虽彼龙象不少，海外时称独步，于此量作决定相，违基师念。远国之人有兹利慧，搪突奘师，暗中机发，善成三藏之义，惜哉！规在本国稍多著述，亦有传来中原者，其所宗，法相大乘了义教也。见

《华严经》中始从发心便成佛已。乃生谤毁不信。或云：“当启手足，命弟子辈扶掖下地，地则徐裂，规身俄坠。”时言生身陷地狱焉。于今有坑，广袤丈余，实坎？然，号“顺规捺落迦也。”

系曰：曲士不可以语道者，束其教也。是故好白者以黑为污，好黑者以白为污焉。规怒心尤重，猛利业增如射箭，顷堕在地狱，列高僧品次，起秽以自臭邪通曰：“难信之法易速谤诮，谤诮岂唯一人乎？俾令众所知识者直陷三涂，乃知顺规真显教菩萨也。况乎赵盾为法受恶，菩萨乃为法亡身。斯何足怪？君不见尼蓐外道一一谤佛，而独使提婆生陷，后于法华会上受记作佛，静言思之。”

○唐京兆大慈恩寺嘉尚传

释嘉尚，未知何许人也。慧性天资，瑰奇气质，篇聚坚守，性相克攻，勤在进修，务于翻译。远栖心于奘三藏门，见宗庙之富，窥室家之好。久稽考《瑜伽师地》、《佛地论旨》、《成唯识论》，深得义趣。随奘于玉华宫译《大般若经》，充证义缀文，多能杰出。及三藏有疾，命尚具录所翻经论合七十五部，总一千三百三十五卷。又录俱胝画像一千帧，造十俱胝像，写经放生燃灯，令尚宣读。奘合掌欢喜曰：“吾心中愿也，汝代导之，得没而无悔焉。”奘卒，著述疏钞出杂集，义门夥多。天后朝同薄尘、灵辩等预译场证义，功绩愈繁。尚初侍奘师在玉华宫翻经，至初会《严净佛土品》，说诸佛菩萨以神通愿力盛大千界上妙珍宝诸妙香花及意乐所生五尘妙境供养庄严说法处，与寺主慧德夜睹玉华寺内广博严净，伎乐盈满。又闻三堂讲法。明日白奘，欢喜符合。尚不知所终。

○唐淄州慧沼传（大愿尘外）

释慧沼，不知何许人也。少而警慧，始预青衿，依于庠序，诵习该通。入法修身，不违戒范，乃被时谚沼阁梨焉。次攻坚于经论，善达翻传。自奘三藏到京，恒窥壶奥。后亲大乘基师，更加精博。及菩提流志于崇福寺译《大宝积经》，沼预其选，充证义，新罗、胜庄法师执笔，沙门大愿、尘外皆一时英秀，当代象龙。于时武平一充使，卢藏用、陆景初总预斯常中书侍郎崔湜因行香至翻经院，叹曰：“清流尽在此矣，岂应见隔？”因奏请乞同润色新经。初，沼证义于义净译场，多所刊正，讹言舛义，悉从指定，无敢逾制。后著诸《疏》义，号淄州沼也。

○唐京兆大慈恩寺彦惊传

释彦惊，未知何许人也。贞观之末，观光上京，求法于三藏法师之门。然其才不迨光、宝，偏长缀习学耳。于玄儒之业，颇见精微。辞笔之能，殊超流辈。有魏国西寺沙门慧立性气■？，以护法为己任，著《传》五卷，专记三藏自贞观中一行盛化及西域所历夷险等，号《慈恩传》，盖取寺题也。及削藁云毕，虑遗诸美，遂藏于

地穴。至疾亟，命门徒掘土出之而卒。其本数年流散他所，搜购乃获。弟子等命惊排次之，序引之，或文未允，或事稍亏，重更申明，曰《笺述》是也，乃象郑司农笺毛之诂训也。或有调之曰：“子与隋彦琮相去几何？”对曰：“赐也何敢望回，虽长卿慕蔺，心宗慕于玉宗，故有以也。《诗》曰：‘言念君子，温其如玉’，自许亦颜之士也。”或人许焉。惊不知终所。

○唐新罗国义湘传

释义湘，俗姓朴，鸡林府人也。生且英奇，长而出离，逍遥入道，性分天然。年临弱冠，闻唐土教宗鼎盛，与元晓法师同志西游，行至本国海门唐州界，计求巨舰，将越沧波。倏于中涂遭其苦雨，遂依道旁土龕间隐身，所以避飘湿焉。迨乎明旦相视，乃古坟骸骨旁也。天犹墨霖，地且泥涂，尺寸难前，逗留不进。又寄埏埴之中，夜之未央，俄有鬼物为怪。晓公叹曰：“前之寓宿，谓土龕而且安；此夜留宵，托鬼乡而多祟。则知心生故种种法生，心灭故龕坟不二。又三界唯心，万法唯识。心外无法，胡用别求？我不入唐。”却携囊返国，湘乃只影孤征，誓死无退。以总章二年附商船达登州岸，分卫到一信士家，见湘容色挺拔，留连门下既久，有少女丽服靓妆，名曰善妙，巧媚诲之，湘之心石不可转也。女调不见答，顿发道心于前，矢大愿言：“生生世世归命和尚，习学大乘，成就大事，弟子必为檀越供给资缘。”湘乃径趋长安终南山智俨三藏所，综习《华严经》。时康藏国师为同学也。所谓知微知章，有伦有要。德瓶云满，藏海嬉游，乃议回程，传法开诱。复至文登旧檀越家，谢其数稔供施，便慕商船，逡巡解缆。其女善妙预为湘办集法服并诸什器，可盈篋笥，运临海岸。湘船已远，其女咒之曰：“我本实心供养法师，愿是衣篋跳入前船，言讫，投篋于骇浪。有顷，疾风吹之若鸿毛耳，遥望径跳入船矣。其女复誓之：“我愿是身化为大龙，扶翼舳舻，到国传法。”于是攘袂投身于海，将知愿力难屈，至诚感神，果然伸形夭矫或跃，蜿蜒其舟底，宁达于彼岸。湘入国之后，遍历山川，于驹丽、百济风马牛不相及地，曰：“此中地灵山秀，真转法轮之所。”无何，权宗异部聚徒可半千众矣。湘默作是念，大《华严》教，非福善之地不可兴焉。时善妙龙恒随作护，潜知此念，乃现大神变于虚空中，化成巨石，纵广一里，盖于伽蓝之顶，作将堕不堕之状。群僧惊骇，罔知攸趣，四面奔散。湘遂入寺中，敷阐斯经，冬阳夏阴，不召自至者多矣。国王钦重，以田庄奴仆施之。湘言于王曰：“我法平等，高下共均，贵贱同揆。《涅槃经》八不净财，何庄田之有？何奴仆之为？贫道以法界为家，以孟耕待稔，法身慧命籍此而生矣。”湘讲树开花，谈丛结果，登堂睹奥者则智通、表训、梵体、道身等数人，皆啄巨絜飞出迦留罗鸟焉。湘贵如说行，讲宣之外，精勤修练，庄严刹海，靡憚暄凉。又常行义净洗秽法，不用巾帨，立期干燥而止。持三法衣，瓶钵之余，曾无他物。凡弟子请益，不敢造次，伺其怡寂而后启发，湘乃随疑解滞，必无滓核。自是已来，云游不定，称可我心，卓锡而居。学侣蜂屯，或执笔书绅，怀铅札叶，抄如结集，录似载言，如是义门随弟子为目，如云《道身章》是也。或以处为名，如云《锥穴问答》等数章。《疏》皆明《华严》性海毗卢遮那无边契经义例也。湘终于本国，塔亦存焉，号海

东华严初祖也。

○唐京兆大慈恩寺义忠传

释义忠，姓尹氏，潞府襄垣人也。年始九岁，宿殖之性，志愿出家，得淄州沼阁梨为师，若凤巢中之生宛鸟雏也。少秉奇操，慧解不伦。沼授与《大涅槃经》，时十三岁矣。相次诵彻四十卷，众皆惊骇，号空门奇童也。二十登戒，学《四分律》，义理淹通。旁习《十二门论》二本，即当讲演。沼师知是千里之骏，学恐失时，闻长安基师新造疏章，门生填委，声振天下。乃师资相将，同就基之讲肆，未极五年，又通二经五论，则《法华》、《无垢称》及《百法》、《因明》、《俱舍》《成唯识》、《唯识道》等也。由兹开奖，弟子繁多，讲树别茂于枝条，义门旁开于关窍，乃著《成唯识》、《论纂要》、《成唯识论钞》三十卷、《法华经钞》二十卷、《无垢称经钞》二十卷。《百法论疏》最为要当，移解二无我归后，是以掩慈恩之繁，于今盛行勿过忠本。所谓列群玉，贯众花，玉装琼树之林，花缀蜀机之锦。辈流首伏，声彩悠扬。况基师正照于太阳，忠也旁銜于龙烛，四方美誉，千里归心者，不可胜算矣。传持靡怠，仅五十余年，计讲诸教七十许遍。至年七十二，忽起怀土之心，归于昭义，示同初夏诵戒行道。每一坐时，面向西北，仰视兜率天宫，冥心内院，愿舍寿时得见天主，永离凡浊，终得转依。一日，晨兴澡洗讫，整肃容仪，望空礼拜，如有哀告之状。少顷，结加趺坐，嘱付流通教法之意毕，忽异香满室，彩云垂空。忠合掌仰视曰：“秽弱比丘，何烦大圣躬来引接？”言尽而化。乡人道俗建塔供养，全身不坏，至今河东乡里高冈存焉。

○唐新罗国黄龙寺元晓传（大安）

释元晓，姓薛氏，东海湘州人也。卅{彭采}之年，惠然入法，随师稟业，游处无恒。勇击义围，雄横文阵，屹屹然，桓桓然，进无前却，盖三学之淹通，彼土谓为万人之敌，精义入神，为若此也。尝与湘法师入唐，慕奘三藏慈恩之门，厥缘既差，息心游往。无何，发言狂悖，示迹乖疏，同居士入酒肆倡家，若志公持金刀铁锡，或制疏以讲杂华，或抚琴以乐祠宇，或闾阎寓宿，或山水坐禅，任意随机，都无定检。时国王置百座仁王经大会，遍搜硕德，本州以名望举进之。诸德恶其为人，潜王不纳。居无何，王之夫人脑婴痈肿，医工绝验，王及王子臣属祷请山川灵祠，无所不至。有巫覡言曰：“苟遣人往他国求药，是疾方瘳。”王乃发使泛海入唐，募其医术。溟涨之中，忽见一翁由波涛跃出登舟，邀使人入海，睹宫殿严丽，见龙王。王名钤海谓使者曰：“汝国夫人是青帝第三女也，我宫中先有《金刚三昧经》，乃二觉圆通示菩萨行也。今托仗夫人之病，为增上缘，欲附此经出彼国流布耳。”于是将三十来纸重沓散经付授使人。复曰：“此经渡海中，恐罹魔事。”王令持刀裂使人膈肠，而内于中，用蜡纸缠滕，以药傅之，其膈如故。龙王言“可令大安圣者铨次缀缝，请元晓法师造疏讲释之，夫人疾愈无疑。假使雪山阿伽陀药力亦不过是。”龙王送出海面，遂登舟归国。时王闻而欢喜，乃先召大安圣者粘次焉。大安

者，不测之人也，形服特异，恒在市廛，击铜钵唱言“大安大安”之声，故号之也。王命安，安云“但将经来”不愿入王宫阙。安得经，排来成八品，皆合佛意。安曰：“速将付元晓讲，余人则否。”晓受斯经，正在本生湘州也，谓使人曰：“此经以本始二觉为宗，为我备角乘，将案几，在两角之间置其笔砚。”始终于牛车造《疏》，成五卷。王请日于黄龙寺敷演，时有薄徒窃盗新《疏》，以事白王，延于三日，重录成三卷，号为《略疏》。洎乎王臣道俗云拥法堂，晓乃宣吐有仪，解纷可则，称杨弹指，声沸于空。晓复昌言曰：“昔日采百椽时，虽不预会。今朝横一椽处，唯我独能。”时诸名德俯颜惭色，伏膺忏悔焉。初晓示迹无恒，化人不定，或掷盘而救众，或匍水而扑焚，或数处现形，或六方告灭，亦杯渡、志公之伦欤？其于解性，览无不明矣。《疏》有广略二本，俱行本土。略本流入中华，后有翻经三藏改之为论焉。

系曰：海龙之宫自何而有经本耶？通曰：经云龙王宫殿中有七宝塔，诸佛所说诸深义，别有七宝篋满中盛之，谓《十二因缘》、《总持三昧》等。良以此经合行世间，复显大安、晓公神异，乃使夫人之疾为起教之大端者也。

○周京兆崇福寺神楷传（明恂）

释神楷，姓郭氏太原人也，即汉末林宗之后。世袭冠裳，后随父宦于秦，为京兆人也。昆弟六人，楷居其季。幼而聪敏，立志弗群，不乐浮荣，誓求剪落，礼明恂法师为弟子，即大乘恂也，洎乎年满受具，于经论义理，大小该通，耳闻口诵，譬鲜之易染。遂讲《摄大乘》、《俱舍》等论，颖悟辈流罕有齐驾。后因讲《净名经》，见古师判处，喟然叹曰：“美则美矣，未尽善也。”乃于安陆白赵山撰《疏》，一云在越州剡石城寺述作素有巧性，于剡溪南岩之下，映水塑貌。今有池，已涸矣，岩下石隙缝间幽暗，然中有木棺者，云是楷殡于此。游人下窥，历历皆睹。又言楷因慈恩、西明等寺度公王出家，及翻经论，敕诸道高行才学僧并赴京师，遂应诏而入，配居崇业寺。至天后朝，方行其《疏》。后卒于此寺，弟子迁塔于南逍遥园焉，实大乘基之法门犹子也。

系曰：楷师遗迹，何京兆、剡溪二处？孰是？令人疑惑，若两家之俱见犇训焉。此乃古人名显于四方，因子孙南北迁徙，追念先宗，遂有侨置焉。如晋氏渡江，衣冠之家多立祖先之遗迹同也。若然者，剡则是楷曾游历之地也。

○周京兆广福寺会隐传

释会隐，不详何许人也。精明之气，绰有盈余，处于等夷，若鸡群之见鹤也。天皇帝朝慎选高学名德，隐膺斯眩麟德二年敕北门西龙门修书所，同与西明寺玄则等十人于一切经中略出精义玄文三十卷，号《禅林要钞》，书成奏呈，敕藏秘阁。隐亦尝预翻译，玄则颇闻著述，高宗朝斯为龙象之最焉。

○周虎丘山寺僧瑗传

释僧瑗，字辩空，姓郁氏，高平昌邑人也。姬水疏源，狼亭袭庆，鲁相继昌侯之业，历载弥光；少传纂尚书之风，清尘不昧。瑗夙殖奇颖，早擅嘉祥，母赵氏娠孕之日，侧侍圣贤浮空游乐。及年六岁，随母入舍利塔，见圣僧像，欣然跳跃，状若旧交，因启母出家。母以其尚幼，抑而未许。至年十三，方遂其志，依虎丘寺慧严法师为弟子。谦揖之操，出自生知；辩慧之能，业称上首。以龙朔二年奉敕剃剪，冥符所应，还隶此山。暨严公长往，乃依慧谔禅师受具足戒，听常乐寺聪法师《三论》，甚深无相，疑滞豁除，方便解脱，怡然独悟。因智从心证，遂诣江宁融禅师求学心法。摄念坐禅，众魔斯伏；勤行精进，猛兽恒驯。是以名称普闻，声光八绝，旗亭趋利，削迹无践。冬夏不易，常披一纳。或滴水以充于夕渴；或数粒将济于朝饥；或风雪凛凛，礼诵无替于六时；或炎暑纷々，经行不亏于少暄。称扬叹美，容色湛如；毁辱诃骂，欢喜而受。每荫以长松，属思鸿远。清泉独坐，映定水以雕文，虚室高栖，蔼禅枝而荡虑。撰《武丘名僧苑》一卷、《注郁子》两卷、《文集》三卷，盖道俗之仪表，人物之师范焉。永昌元年十二月二十日见身有疾，谓弟子曰：“吾闻尸所到处，便为秽恶，出就别方，乃称离罪尔。”门弟子等迎止于通波亭北静志庄，忽闻异香从空而下。瑗遗训勤切，正观叮咛，灭后可依外国法。言讫合掌而终，春秋五十有一。缁素奔恸，咸悲眼灭。弟子僧义玄及雉山县尉檀信等同遵师旨，如法阖维，收其舍利，于寺建塔，勒铭于所。

○唐会稽山妙喜寺印宗传

释印宗姓印氏，吴郡人也。母刘氏始娠，邻家咸见一沙门端雅，徐步入印舍，白刘曰：“愿为子焉。”母梦同此，再三陈让，不克。父梦有馈繖檀香木，童子跪授付刘。刘顿厌荤膻，俗间食味膈在唇吻之外。及生而长，从师诵通经典，末最精讲者《涅槃经》。咸亨元年在京都，盛扬道化。上元中，敕入大爱敬寺居，辞不赴，请于蕲春东山忍大师谕受禅法。复于番禺遇慧能禅师。问答之间，深诣玄理。还乡地，刺史王胄礼重殊伦，请置戒坛，命宗度人，可数千百。续敕召入内，乃造慈氏大像。所著《心要集》，起梁至唐，天下诸达者语言总录焉。又奉敕江东诸寺院天柱、报恩各置戒坛度人。又纂百家诸儒士三教文意表明佛法者，重结集之。手笔逾高，著述流布。至先天二年二月二十一日示终，嘱循轮王法葬之，年八十七。会稽王师乾立《塔铭》焉。

○唐太原府崇福寺宗哲传

释宗哲，西河平遥人也。稚岁而有奇相，聪颖天资，既寻师范，砥节饰躬。属玄奘三藏新翻诸经论，哲就其门，请益无替，凡几周星，备穷诸典，若指于掌，于奘门下号为得意哲，犹隋慧布之题目焉。后因讲唱，厥义日新，时谓之为“法江”。哲曰：“为吾谢此品藻焉，殊不知法海在乎太原矣。”所指者盖浮丘为沧溟也。哲悯

学者不达其意而师，悖哉，乃著义例，寰海之内莫不企羡。其如说佛位三事喻中，沼法师言三点三目，强分上下，胜劣配属，太成巧诬。哲云三事俱得。然无名师品量。退而省之，哲其得矣。号之“得意”岂虚也乎！沼师所以成余师之说也。

○唐洛京佛授记寺德感传

释德感，姓侯氏，太原人也。仪容瑰丽，学业精赡，众典服勤，于《瑜伽论》特振声彩。天皇大帝征为翻经大德。又与胜庄、大仪等同参义净译场，对扬受赐，言谢浏亮。帝悦，寻授封昌平县开国公，累井田至三千户。帝为赞曰：“河汾之宝，山岳之英，早祛俗累，夙解尘纓。缁门仰德，紺宇驰声。式亚龙树，爰齐马鸣。”为时君之所贵，为若此也。御制风行，缁伍荣之。后充河南佛授记寺都维那，晚升寺任，中外肃然。终年六十余，著《义门》行于世。如其七方便人回心渐顿悟义，与湛法师为雠敌耳，故交绥而退焉。

○唐太原崇福寺浮丘传

释浮丘，姓张氏太原人也。挺然奇表，慧悟绝伦。于《瑜伽论》差成精博，旁综群书，言分雅俗，四方学者争造其门。然讷于宣剖，敏于通解，深藏若虚，庸庸品类多所不知。于时哲公露其头角，博闻强识之者惧其抵触，岂况诸余乎？哲惟神伏丘之义学，故谓为“法海”焉。享年七十余，终于所居，然未闻其有所著述矣。

卷五

◎义解篇第二之二（正传十四人附见五人）○周洛京佛授记寺法藏传（大仪）

释法藏字贤首，姓康，康居人也。风度奇正，利智绝伦，薄游长安，弥露锋颖，寻应名僧义学之眩属奘师译经，始预其间，后因笔受、证义、润文，见识不同而出译常至天后朝，传译首登其数。实叉难陀赍《华严》梵夹至，同义净、复礼译出新经。又于义净译场，与胜庄、大仪证义。昔者从焯杜顺传《华严》法界观，与弟子智俨讲授此晋译之本，智俨付藏，藏为则天讲新《华严经》，至《天帝网义十重玄门》、《海印三昧门》、《六相和合义门》、《普眼境界门》，此诸义章皆是《华严》总别义网，帝于此茫然未决。藏乃指镇殿金师子为喻，因撰义门，径捷易解，号《金师子章》，列十门总别之相，帝遂开悟其旨。又为学不了者设巧便，取鉴十面，八方安排，上下各一，相去一丈馀，面面对，中安一佛像，燃一炬以照之，互影交光。学者因晓刹海涉入无尽之义。藏之善巧化诱，皆此类也。其如宣翻之寄，亦未能舍，盖帝王归信缁伍所凭之故。洎诸梵僧罢译，帝于圣历二年己亥十月八日，诏藏于佛授记寺讲大经，至《华藏世界品》，讲堂及寺中地皆震动，都维那僧恒景具表闻奏。敕云：“昨请敷演微言，阐扬秘蹟。初译之日，梦甘露以呈祥；开讲之辰，感地动以标异。斯乃如来降迹，用符九会之文；岂朕庸虚，敢当六种之震。披览来状，欣惕于怀”云。其为帝王所重，实称非虚，所以华严一宗付授澄观，推藏为第三祖也。著《般若心经疏》，为时所贵，天下流行。复号康藏国师是欤！

○唐荊州玉泉寺恒景传

释恒景，姓文氏，当阳人也。贞观二十二年敕度，听习三藏，一闻能诵，如说而行。初就文纲律师隶业毗尼，后入覆舟山玉泉寺，追智者禅师习《止观门》。于寺之南十里别立精舍，号龙兴是也。自天后、中宗朝，三被诏入内供养为受戒师。以景龙三年奏乞归山，敕允其请。诏中书、门下及学士于林光宫观内道场设斋。先时追召天下高僧兼义行者二十余人，常于内殿修福，至是散斋，仍送景并道峻玄奘各还故乡。帝亲赋诗，学士应和，即中书令李峤、中书舍人李？¹¹等数人。时景等捧诗振锡而行，天下荣之。景撰《顺了义论》二卷，《摄正法论》七卷，《佛性论》二卷。学其宗者，如渴之受浆。至先天元年九月二十五日卒于所住寺，春秋七十九。弟子奉葬于寺之西原也。

系曰：江陵玄奘与三藏法师形影相接，相去几何。然其名同实异，亦犹蔺相如得强秦之所畏，马相如令杨雄之追慕。然则各有所长短，亦可见也。○唐中岳嵩阳寺一行传

释一行，俗姓张，巨鹿人也，本名遂，则唐初佐命郟国公公谨之支孙也。？岁不群，聪黠明利，有老成之风。读书不再览，已暗诵矣。因遇普寂禅师大行禅要，归心

者众，乃悟世幻，礼寂为师，出家剃染。所诵经法，无不精讽。寂师尝设大会，远近沙门如期必至，计逾千众。时有征士卢鸿，隐居于别峰，遁高学富，朝廷累降蒲轮，终辞不起。大会主事先请鸿为导文，序赞邑社。是日鸿自袖出其文，置之机案。钟梵既作，鸿谓寂公曰：“某为数千百言，况其字僻文古，请求朗俊者宣之，当须面指钁而授之。”寂公呼行，伸纸览而微笑，复置机案。鸿怪其轻脱。及僧聚于堂中，行乃攘袂而进，抗音典裁，一无遗误。鸿愕视久之，降叹不能已，复谓寂公曰：“非君所能教导也，当纵其游学。”自是三学名师，罕不咨度。因往当阳，值僧真，纂成《律藏序》，深达毗尼。然有阴阳讖纬之书，一皆详究，寻访算术，不下数千里，知名者往询焉。未至天台山国清寺见一院，古松数十步，门枕流溪，淡然岑寂。行立于门屏，闻院中布算，其声赅赅然。僧谓侍者曰：“今日当有弟子自远求吾算法，计合到门，必无人导达耶？”即除一算子。又谓侍者曰：“门前水合却西流，弟子当至。”行承其言而入，稽首请法，尽授其决马，门前水复东流矣。自此声振遐迩，公卿籍甚。玄宗闻之，诏入，谓行曰：“师有何能？”对曰：“略能记览，他无所长。”帝遂命中官取宫籍以示之，行周览方毕，覆其本，记念精熟，如素所习。唱数幅后，帝不觉降榻稽首曰：“师实圣人也。”嗟叹良久。寻乃诏对无恒，占其灾福，若指于掌，言多补益。时邢和璞者，道术人，莫窥其际，尝谓尹？曰：“一行和尚真圣人也。汉落下惲造历云：‘八百岁当差一日，则有圣人定之。’今年期毕矣。属《大衍历》出，正其差谬，则落下闳之言可信。非圣人孰能预于斯矣！”又于金刚三藏学《陀罗尼秘臚》，登前佛坛，受法王宝，复同无畏三藏译《毗卢遮那佛经》，开后佛国，其传《密藏》，必抵渊府也。睿宗、玄宗并请入内集贤院，寻诏住兴唐寺，所翻之经，遂著《疏》七卷，又《摄调伏藏》六十卷、《释氏系录》一卷、《开元大衍历》五十二卷。其历编入《唐书历律志》，以为不刊之典。又造游仪，黄赤二道以铁成规，于院制作。次有王媪者，行邻里之老嫗，昔多贍行之贫，及行显遇，常思报之。一日拜谒云：“儿子杀人，即就诛矣。况师帝王雅重，乞奏减死，以供母之残龄！”如是泣涕者数四，行曰：“国家刑宪，岂有论请而得免耶？”命侍僧给与若干钱物，任去别图。媪戟手曼骂曰：“我居邻周给迭互，绷褌间抱乳汝。长成，何忘此惠耶！”行心慈爱，终久不乐。于是运算毕，召净人戒之曰：“汝曹挈布囊于某坊闲静地，午时坐伺，得生类投囊，速归。”明日，果有猪彘引窑七个，净人分头驱逐，猪母走矣，得窑而归。行已备巨瓮，逐一入之，闭盖，以六乙泥封口，诵胡语数契而止。投明，中官下诏入问云：“司天监奏昨夜北斗七座星全不见，何耶？”对曰：“昔后魏曾失荧惑星，至今帝车不见。此则天将大儆于陛下也。夫匹夫匹妇不得其所，犹陨霜天旱，盛德所感，乃能退之。感之切者其在葬枯骨乎！释门以慈心降一切魔，微僧曲见，莫若大赦天下。”玄宗依之。其夜占奏北斗一星见，七夜复初，其术不可测也。又开元中尝旱甚，帝令祈雨，曰：“当得一器上有龙状者，方可致雨。”敕令中官同于内库中遍视之，皆言弗类。数日后指一古鉴，鼻盘龙，喜曰：“此真龙也。”乃将入坛场，一日而雨。其异术通感为若此也。玄宗在大明宫，从容密问社稷吉凶并祚运终毕事，行对以他语。帝询之不已，遂曰：“陛下当有万里之行。”又曰：“社稷毕得终吉。”帝大悦。复遗帝一金合子，形若弹丸，内贮物，撼必有声，发之不得，云：“有急则开。”

”帝幸蜀，仓黄都忘斯事，及到成都，忽忆后之，则药分中当归也。帝曰：“伊药产于此，师知朕违难至蜀当归也。”复见万里桥，曰：“一行之言，信其神矣。”命中官焚香祝之，乃告谢也。及昭宗初封吉王，至太子德王，唐为梁灭，终行之言“社稷毕得终吉”也。开元十五年九月于华严寺疾笃，将舆病入辞，小间而止。玄宗此夜梦瞰禅居，见绳床纸隔开扇，晓而验问，一如所睹。乃诏京城名德致大道场，为行祈福，危疾微愈。其宠爱如是。十月八日随驾幸新丰，身无诸患，口无一言，忽然浴香水换衣，趺坐正念，怡然示灭。一云：辞告玄宗后，自驾前东来嵩山谒礼本师，即寂也。时河南尹裴宽正谒寂，寂云：“有少事，未暇与大尹款话。且请踟蹰休息也。”宽乃屏从人，止于旁室，伺寂何为。见洁净正堂，焚香默坐，如有所待。斯须，叩门连声云：“天师一行和尚至（僧号天师，始见于此，言天子师也）。”行入，颇谄切之状，礼寂之足，附耳密语，其貌愈恭。寂但颔秋曰：“无不可者。”语讫又礼，礼语者三，寂唯言“是是，无不可者”。行语讫，降阶入南室，自关其户。寂乃徐召侍者曰：“速声钟，一行已灭度。”左右疾走视之，瞑目而坐，手掩伺息，已绝。四众弟子悲号沸渭，撼动山谷，乃停柩于罔极寺。自终及葬，凡经三七日，爪甲不变，髭发更长，形色怡悦，时众惊异。帝览奏悲怆曰：“禅师舍朕，深用哀慕。丧事官供，诏葬于铜人原，谥曰大慧禅师。御撰《塔铭》天下释子荣之。”

○唐京兆西崇福寺智升传

释智升，未详何许人也。义理悬通，二乘俱学，然于毗尼，尤善其宗。此外文性愈高，博达今古，每嫌裴道真、道安，至于明？、宣律师各著《大藏目录》，记其翻传年代人物者，谓之《晋录》魏汉等《录》，乃于开元十八年岁次庚午，撰《开元释教录》二十卷，最为精要。何耶？诸师于同本异出、旧目新名，多惑其文，真伪相乱。或一经为两本，或支品作别翻，一一裁量，少无过者。如其旧录江泌女子诵出经，黜而不留，可谓藻鉴。杜塞妖伪之源，有兹独断。后之圆照《贞元录》也，文体意宗，相糅不知几百数里哉。麟德中道宣出《内典录》十卷，靖迈出《图纪》四卷，升各续一卷。经法之谱，无出升之右矣。

○唐中大云寺圆晖传（怀远崇讷）

释圆晖，未详何许人也。关辅之间，声名籍甚，精研性相，善达诸宗。幼于《俱舍》一门，最为锐意。时礼部侍郎贾曾归心释氏，好乐斯文，多命晖谈此宗相，然其难者则非想见惑，繁者则得非得章。爰请晖师略伸梗概，究其光师《疏义》繁极难寻。又圣善寺怀远律师愿心相合，因节略古《疏》，颂则再牒，而《释论》乃有引而具注，甚为径捷，学者易知。后有崇讷著《金华钞》十卷以解焉。光、宝二师之后，晖公间出，两河间、二京道、江表、燕、齐、楚、蜀盛行晖《疏》焉。

○唐京兆华严寺玄逸传

释玄逸，姓窦氏，即玄宗神武皇帝从外父也。繁柯壹咨叶，莫我与京，昆友侄弟，多升朝列，或以靡丽自持，或以官荣相抗。逸乃风神秀朗，萧洒拔俗，悟色空之迹，到真寂之场，糠粃膏粱，么么轩冕。既而形厕缙伍，学追上流，秘藏香龕，披阅通理。一日，喟然兴叹曰：“去圣日远，编简倒错，或止存夏五，或滥在鲁鱼，加以笔紕偷行，校讎丧句。若蓂度失其夹叶，犹《礼记》脱错后先，日见乖讹，迷而不复，有一于此，彝伦攸蓐¹遂据古今所撰目录，及勘诸经，披文已浩于几案，积卷仍溢于堂宇。字舛者详义而纶之，品差者赅理而纲之。星霜累迁，功业克著。非夫心断金石、志坚冰檠者，曷登此哉！既综结其科目，谅条而不紊也，都为三十卷，号《释教广品历章》焉。考其大小乘经律论，并东西土贤圣集，共一千八十部，以蒲州、共城二邑纸书，校知多少，缚定品次，俾后世无闷焉。其章颇成伦要，备预不虞，古之善制。有乐陵尹灵琛为序。逸后不知所终。

○唐长安青龙寺道氤传

释道氤，俗姓长孙，长安高陵人也。父容，殿中侍御史。母马氏梦五色云覆顶，因有娠焉。母常听讲读大乘经，晓夜不辍，意行太任之胎教也。逮乎诞弥，异香芬馥；成于童稚，神气俊秀，学问详明。应进士科，一举擢第，名喧日下，才调清奇，荣耀亲里。后有梵僧扣门分卫，饭讫，愿寓宵宿。氤接之谈话，言皆诣理，梵僧称叹。明晓辞诀，方出门，闪然不见。氤由此无调选之心矣，乞愿出家。将知良珠度寸，虽有百仞之水，不能掩其云也，何君亲而能阻入道之猛利心焉？乃礼京招福寺慎言律师为师，请益无替。及登戒法，旋学律科，又隶经论，如是内外偕通矣。时有兴善寺复礼法师善属文，谓氤曰：“籍汝少俊，可为余造《西方赞》一本。”遂褰纸援毫，略不停缀，斯须已就，其辞典丽。清净佛国，境物庄严，临文若现前矣。礼师读讫，顾左右诸德曰：“奇才秀句，吾辈莫能测也。”自后伏膺窗案，昼夜精励，辩给难褒，善于立破。礼师仰其风规，尝于稠人广众中宣言曰：“氤之论端，势若泉。”浦从此闻天，供奉朝廷。玄宗幸雒，敕与良秀、法修随驾。御史李？同请氤于天宫寺讲《净业障经》，其《疏》亦氤之著述也。时一行禅师国之师匠，过虑将来佛法谁堪磅礴？谁可阐扬？奏召天下英髦学兼内外者集千洛京福先寺，大建论常氤为众推许，乃首登座，于《瑜伽》、《唯识》、《因明》、《百法》等论，竖立大义六科，敌论诸师茫然屈伏。一行惊异曰：“大法梁栋，伊人应焉。余心有凭，死亦足矣。”及乎大驾西还，敕令扈从。乃有小疾，上表，帝降中使赐药并方，诏曰：“法师将息，朕此药并方甚好，服食必差。所患痊愈，早来西京。”其顾遇也若此。仍属此际一行迁神，敕令东宫已下京官九品已上并送至铜人原蓝田设斋，推氤表白，法事方毕。宰相张燕公说执氤手曰：“释门俊彦，宇内罕匹。幸附口录向所导文一本，置于篋筒。”由是其文流行天下也。开元十八年，于花萼楼对御定二教优劣，氤雄论奋发，河倾海注。道士尹谦对答失次，理屈辞殫，论宗乖舛。帝再三叹美，诏赐绢伍伯匹，用充法施。别集《对御论衡》一本，盛传于代。后撰《大乘法宝五门名教》并《信法仪》各一卷、《唯识疏》六卷、《法华经疏》六卷、《御注金刚经疏》六卷。初，玄宗注经，至“若有人先世罪业应堕恶道，乃至

罪业则为消灭”，虽提免翰，颇见狐疑，虑貽谬解之愆，或作余师之义。遂诏胤决择经之功力，剖判是非。奏曰：“佛力经力，十圣三贤，亦不可测。陛下曩于般若会中，闻熏不一，更沈注想，自发现行。”帝于是豁然若忆畴昔，下笔不休，终无滞碍也。续宣胤造《疏》矣。四海向风，学徒鳞萃，于青龙寺执新《疏》，听者数盈千计，至于西明、崇福二寺。讲堂悉用香泥，筑目水际至于土面，庄严之盛，京中甲焉。开元二十八年，有疾将终，遣门弟子赍遗表云：“某末品轻生，虚均雨露，得陪缁伍，许自精修。虽常袒右肩，无施举袂之役，而执锡舒步，得蠲负载之劳。属以时畅玄功，德扬真化，不谓勤劬慕学，造次养生。今月十六日苦肠忽加，汤药无救。泉门自掩，安沐尧风；夜台一归，宁逢舜日。有定瘞于苍陇，无再谒于丹墀”云。时帝览恻怛，遣中使内给事贾文瑰将绢五十匹，就院吊赠，宣口敕奉问。胤弟子等适闻法师迁神寂灭，痛惜良深，未审拟于何处安厝。赐到绢帛等，圣恩追悼，生荣死哀，光于僧伍。俗寿七十三，僧腊五十三。以其年秋八月十二日葬于终南山阴逍遥园侧，白塔存焉。

○唐京师安国寺良贲传

释良贲，姓郭氏，河中虞乡人也。世袭冠裳，法门之流，不标祖祢，故阙如也。贲识鉴渊旷，风表峻越，外通坟典，内善经论，义解之性，人罕加焉。永泰中，不空盛行传译，实难其人，贲预其翻度。代宗请为菩萨戒师。因新出《仁王护国经》敕令撰《疏》解判，曲尽经意，以所住寺为《疏》目，曰青龙也。原夫是经已当三译，一晋太始三年法护译一卷，名《仁王般若》；次秦罗什出，名《仁王护国般若波罗蜜》；次梁承圣三年真谛于洪州宝因寺译，名《仁王般若》，并《疏》六卷。然则晋本初翻，方言尚隔。梁朝所译，隐而不行。伪秦之经，传流宇内。奈何止言波罗蜜而阙多字？则是亏其到义。是以肃宗皇帝斋心沐德，请不空重译。及肃皇晏驾，代宗成先圣之愿言，诏兴译务，敕军容使鱼朝恩监护于南桃园，起乎告朔，终乎望日，帝御承明殿灌顶道场躬执旧经，对译新本，而复为序冠于经首，仍敕贲造《疏》通经。贲上表曰：“学孤先哲，有玷清流，叨接翻传，谬膺笔受。幸扬天阙，亲奉德音，令于大明宫南桃园修《疏》赞演，宸光曲照，不容避席。穷玄珠于贝叶，但益惭惶；捧白璧于丹墀，宁胜报劬。仰酬皇泽，俯课忠勤，既竭愚诚，庶昭玄造。”贲勤勤笔削，三卷克成，奏乞流行。复上笺疏：“今年二月二十一日恩命令在内园修撰《经疏》，微僧寡学，惧不称旨。洗心涤虑，扣寂求音，发明起自于天言，加被仰凭于佛力，咸约经论，演畅真宗，亦犹集群玉于昆山，纳大川于溟海。火生于木，与两曜而俱明；识转于如，体一相而等照。成道者法也，载法者经也，释经者疏也，广度群有同于大通，是菩提心如陛下意。所撰经疏，缮写毕功，文过万言，部有三卷。施行窃惭于愚见，裁成冀答于圣恩。并《念诵仪轨》一卷，《承明殿讲密严经对御记》一卷同进上，轻尘玄览，祇畏无任。”答诏云：“法师智炬高明，辞峰迴秀，亲凭梵夹，宣阐微言，幽蹟真宗，演成章疏。开如来之秘藏，示群有之迷津，贯玉联珠，钩深致远。再三披阅，颇谓精详。传之招提，永为法宝也。”皇命褒扬，释门翕盛。又属章信寺初成，执《疏》伏膺者常数百众，虽纸贵如

玉，无以加焉。其在安国寺讲筵，官供不匮。数年之内，归学如林。大历七年正月，不空奏请入《目录》，敕依。贯于六年徙居集州，教授传经，不遑宁处，至十二年三月十日，无疾枕肱，终于符阳，春秋六十一，夏腊二十九。宕渠嘉川之人，哀悼法梁摧折，阁维收灰中舍利百余粒。遗表中进《念诵仪对御记》二卷，以其先进者遂留在内中之故，令门弟子赍之重进。后于上都城东置坟塔焉，即大历十三年也。赍累朝供奉应制，辞辩富赡，学问高深。末涂沦蹶，同利涉之徙移，若神会之流外，吁哉！

○唐越州礼宗传

释礼宗，俗姓宋，会稽人也。道气酋壮，志求玄微，愿遂出尘，史除鞅绊。闻长寿寺和尚通达禅观，往叩其关，学习之心，未尝少懈。师诲之曰：“汝之出尘，有大利益，可谓良玉度尺，虽有十仞之土，不能迷其光矣。”乃奋藻摅华，注《涅槃经》，怀铅握槊，周于二载。挫锐解纷，怡然理顺，遂成夹注八十卷焉。及郑卿尚书典郡，闻其盛名，致疏往请，确然拒而不赴。景龙二年，有御史大夫冯思忽尔暴终，入一处，有二童子持簿领冯庭对判官厅，按覆罪愆，令望彼巨树枝柯可覆数亩。判官身旁旧识者张思义，招手呼冯曰：“吾是汝舅，曾为洛阳仓吏，被长官越格诬杀，兼假贷太平寺中钱及油面，于今未脱。汝所坐者，不合于天后宫中乱越，致此暴卒。可发愿造《涅槃经》，铸钟。”登即关奏，判放却还人世。临行，张语冯曰：“在阎浮一日造功德，得福无量，胡忍一生不修功德耶？此《涅槃经》者，礼宗大师注解，从天台传授，每有善神守护。”时张差押冯往诸司考校轻重生处，嘱之曰：“汝去洛城道光坊内十字街第三宅是吾家。家有池亭竹树，为问妻儿安否？”冯起寻经本，未获，而又死，经三日，立限归写经铸钟功毕。冯在世得四十八年终。宗亡，春秋九十七焉。

○唐钱塘天竺寺法洗传

释法洗，姓孙氏。母初梦吞明珠，遂黜鱼恶羣。诞弥厥月，生有异表。十五辞亲从师，依年受具。行学一集，蔚为教宗，卷伊吕立功之致，陋黄绮肆志之适。遗形理性，与山木为群。故地恩贞大师嘱之以《华严经》、《菩萨戒》、《起信论》，心以静铄，智与经冥。一夕梦乘大踰直截沧溟，横山当前，峻与天极。不觉孤帆鸢戾，怀襄上济，峰竦竦而忽焉，云溶溶而在下。既寤，形若委衣，流汗轻醒。自此句义不思而得，一部全文常现心境，事事无碍之旨如贯花焉。天宝六年，于苏州常乐寺绩卢舍那像，化示群品。大历二年，于常州龙兴寺讲，才登法座，忽有异光如曳红缕，渐明渐大，萦旋杳空。久修行者会中先睹。前后讲大经十遍，撰《义记》十二卷。大历十三年十一月七日，沙门慧觉梦巨塔陷地二级。无何，洗示疾而终，春秋六十一，慧命四十二。受法弟子太初付以香炉谈柄。寻阳正觉、会稽神秀，亦犹儒氏之有游夏焉。洗初讲天竺寺，盛阐《华严》。时越僧澄观就席决疑，深得幽趣。及终，吴兴皎然为《碑》，邗城肃公为《颂》，合扬其美哉。

○唐京师兴善寺潜真传（道超）

释潜真，字义璋，姓王氏太原华族，后徙为夏州朔方崇道乡人也。考珍，真即仲子也。年在学数，业尚典坟。幼好佛书，抑从天性，甫及弱冠，投迹空门。开元二十六年隶名于本城灵觉寺，明年纳具戒。自此听习律乘，涉游论海，凡曰讲筵，无不探赜。属代宗朝新译《文殊师利菩萨佛刹庄严经》，敕真造《疏》，奏云：“此经凡有三译；一西晋太熙中法护翻，名《佛土严净经》，文势多古，语简理幽；二天后久视中实叉难陀于清禅寺翻，名《文殊受记经》三即今大历六年所译也。伏唯宝应元圣文武皇帝陛下，天垂帝策，人归宝图，德厚乾坤，明侔日月，仁恕滋物，夷狄仰德，而输诚慈惠，利生正教，承风而演化。顷者鄜坊节度使兼御史中丞杜冕奏为国请诸大乘经，明诏下于墺园，梵旨开于贝叶因请三藏不空译此经等数十部。续有敕下，天下梵宇各置文殊菩萨像，以旌圣功也。又诏以文殊菩萨为上座，皆三藏所请。三藏学究瑜伽，解穷法印，身口意业，秘密修持，戒定慧学，显通宣畅，唐梵文字，声韵具知。传译此经，善符圣旨，文质相兼，璨然可观。潜真识智愚昧，学艺庸浅，幸陪清众，谬在翻传，虚空藏经，课虚润色，猥蒙驱策，述《疏》赞扬，虽文义荒芜，已传京邑。今之所作，盖有由焉。有金阁寺大德道超禅师，学尽法源，行契心本，亲睹灵境，密承圣慈，故久在清凉，属兴净业，仍于现处建窠塔波。寻覲法缘，来诣京国。以此经为大事，以大圣为本师，显扬圣德，无过此者。乃稽首三藏，誓传大圣法门，不以潜真庸虚，转祈和尚，邀令述作。和尚不念前之鄙陋，又令赞释此经。窃恐难契真詮，敢不尽其愚讷。”即大历八年十一月，《疏》成奏过。真学通内外，性相融明，考覆幽玄，研精教理，探赜今古，比较亲疏，分别异同，归于一义，辩犹泉涌，思入虚凝，直笔而书记于绝，唱结成三卷，以作准绳，现在未来，永无疑网矣。又述《菩提心义》、《发菩提心戒》各一卷，《三聚净戒》及《十善法戒》共一卷。兼禀承不空秘教，入曼籊罗登灌顶坛受成佛樱显密二教，皆闻博瞻。关内河东，代历四朝，阐扬妙旨，弟子繁多。加复纲纪兴善、保寿二处伽蓝，惩劝僧尼，真有力也。以贞元四年戊辰五月十四日遗诫门人，以疾而卧。二十一日，右肋累足，口诵弥陀佛号，终于兴善寺本院。春秋七十一，僧夏四十九云。

○唐代州五台山清凉寺澄观传

释澄观，姓夏侯氏，越州山阴人也。年甫十一，依宝林寺（今应天山）霈禅师出家，诵《法华经》。十四，遇恩得度，便隶此寺。观俊朗高逸，弗可以细务拘。遂遍寻名山，旁求秘藏，梯航既具，壶奥必臻。乾元中，依润州栖霞寺醴律师，学《相部律》。本州依昙一，隶《南山律》，诣金陵玄璧法师，传关河《三论》。《三论》之盛于江表，观之力也。大历中，就瓦棺寺传《起信》、《涅槃》。又于淮南法藏，受海东《起信疏》义。却复天竺诃法师门，温习《华严大经》。七年，往剡溪，从成都慧量法师，覆寻《三论》。十年，就苏州，从湛然法师习天台《止观》、《法华》、《维摩》等经疏。解从上智，性自天然，所学之文，如昨抛舍，鲍静记

井，蔡邕后身，信可知矣。又谒牛头山忠师、径山钦师、洛阳无名师，咨决南宗禅法。复见慧云禅师，了北宗玄理。观自谓己曰：“五地圣人，身证真如，栖心佛境，于后得智中起世俗念，学世间技艺。况吾学地，能忘是心？”遂翻习经、传、子、史、小学、《苍》、《雅》天竺《悉昙》诸部异执，《四围》、五明、秘咒、仪轨，至于篇颂笔语书踪，一皆博综。多能之性，自天纵之。大历十一年，誓游五台，一一巡礼，祥瑞愈繁。仍往峨嵋，求见普贤，登险陟高，备观圣像。却还五台，居大华严寺，专行《方等》忏法。时寺主贤林，请讲大经，并演诸论。因慨《华严》旧疏，文繁义约，脍然长想。“况文殊主智，普贤主理，二圣合为《毗卢遮那》，万行兼通，即《大华严》之义也。吾既游普贤之境界，泊妙吉之乡原，不疏《毗卢》，有辜二圣矣。”观将撰《疏》，俄于寤寐之间，见一金人当阳挺立，以手迎抱之，无何咀嚼都荆觉即汗流，自喜吞纳光明遍照之征也。起兴元元年正月，贞元三年十二月毕功，成二十轴，乃饭千僧以落成也。后常思付授，忽夜梦身化为龙，矫首于南台，蟠尾于山北，籀攫碧落，鳞鬣耀日。须臾，蜿蜒化为千数小龙，腾跃青冥，分散而去。盖取象乎教法支分流布也。四年春正月，寺主贤林请讲新《疏》。七年，河东节度使李公自良复请于崇福寺讲。德宗降中使李辅光宣诏入都，与闕宾三藏般若译乌荼国王所进《华严》后分四十卷。观苦辞，请明年入，敕允。及具行，至蒲津，中令梁公留安居，遂于中条山栖岩寺祝寺有禅客，拳眉剪发，字曰痴人，披短褐，操长策，狂歌杂语，凡所指？，皆多应验。观未至之前，狂僧驱众僧洒扫曰：“不久菩萨来此。”复次壁画散脂大将及山麋之怪，往往不息。观既止此寺，二事俱静。五月，内中使霍仙鸣传宣催入。观至，帝颇敦重，延入译场刊正。又诏令造《疏》。遂于终南草堂寺编成十卷，进呈，敕令两街各讲一遍为《疏》。时堂前池生五枝合欢莲华，一华皆有三节，人咸叹伏。寻译《守护国界主经》，观缀文润色。顺宗在春宫，尝垂教令述《了义》一卷、《心要》一卷并《食肉得罪因缘》。泊至长安，频加礼接。朝臣归向，则齐相国抗、韦太常渠牟，皆结交最深。故相武元衡、郑絪、李吉甫、权德舆、李逢吉、中书舍人钱徽、兵部侍郎归登、襄阳节度使严绶、越州观察使孟简、洪州韦丹，咸慕高风，或从戒训。以元和年卒，春秋七十余。弟子传法者一百许人，余堪讲者千数。观尝于新创云花寺般若阁下画《华藏世界图相》，又著《随疏演义》四十卷，允齐相请述《华严经纲要》一卷、《法界玄鉴》一卷、《三圣圆融观》一卷、《华严》、《法华》、《楞伽》、《中观论》等。别行《小钞疏》共三十卷。设无遮大会十二中，其诸塑绩形像，缮写经典，不可殫述。门人清河记观平时《行状》云：“观恒发十愿：一长止方丈但三衣钵，不畜长；二当代名利，弃之如遗；三目不视女人，四身影不落俗家；五未舍执受，长诵《法华经》；六长读大乘经典，普施含灵；七长讲《华严大经》；八一生昼夜不卧；九不邀名惑众伐善；十不退大慈悲普救法界。”观逮尽形期，恒依愿而修行也。

○唐京师西明寺良秀传（谈筵）

释良秀，姓郭氏，蒲津人也。年及佩髻，挺然离俗，乃往中条山柏梯寺披削，诵通

经业，受具律仪。誓以传讲为己事，勤苦忘疲，《三藏》俱寻，九流外贍。于时籍甚，孰不钦崇。贞元四年，奉诏与罽宾国般若三藏同译《大乘理趣六波罗蜜经》十卷。至五年二月四日解座，写本进过。寻奉德宗敕令秀造《疏》，上表云：“去年十一月二十八日右街功德使王希迁奉宣，令良秀等修撰新翻《大乘理趣六波罗蜜经疏》者。伏闻至道同源，圣人一贯，大雄示相，演妙音于独园，宝位分身，霈湛恩于双阙。开佛日于圣日，降丝纶于法轮，所以杨化慈航，致人寿域。不然，岂得握真符而契合，应休运以感通？况以此经，如来之密印，群生之度门，得白马之宝函，启青龙之秘藏，是第一义理去筌蹄，于最后乘说无分别。加以天文焕发，睿思昭回。真如契心，已阐微于释氏；般若制序，谅纘文于太宗。慈云溥润于大根，湛露垂滋于贝叶。良秀等材惟末学，性异生知，谬寄讨论，伏增殒越。上承严旨，徒侧管以窥天；虔奉本师，惧升堂而鼓瑟。所修撰《疏》一部，谨附王希迁随表奉进，伏乞圣慈，许令同修《疏》沙门谈筵于当寺赞演及流布中外。所冀落落真言，示丹青于新学；明明像教，流粉泽于将来。”帝览奏，敕内给事毛瑛琦宣慰良秀、谈筵、道恒等：“宜共赐绢九十匹，至可领龋比修《疏义》，甚大勤劳也。秋热，兼问师等各平安好在。”秀之辞笔义端，时少伦匹。终没罔知时代焉。

○唐京师西明寺慧琳传

释慧琳，姓裴氏，疏勒国人也。始事不空三藏，为室洒，内持密藏，外究儒流，印度声明，支那诂训，靡不精奥。尝谓翻梵成华，华皆典故，典故则西乾细语也。遂引用《字林》、《字统》、《声类》、《三苍》、《切韵》、《玉篇》诸经杂史，参合佛意，详察是非，撰成《大藏音义》一百卷。起贞元四年迄元和五载，方得绝笔，贮其本于西明藏中。京邑之间，一皆宗仰。琳以元和十五年庚子卒于所住，春秋八十四矣。殆大中五年，有奏请入《藏》流行。近以海中高丽国，虽三韩夷族，偏尚释门，周显德中，遣使赍金入浙中求慧琳《经音义》，时无此本，故有阙如。

卷六

◎义解篇第二之三（正传十四人附见六人）○唐京师崇福寺惟憲传（慧震弘礼）

释惟憲，俗姓连氏，齐大夫称之后，本冯翊人，官居上党，为潞人也。九岁割爱，冠年纳戒。母氏昆弟归于法门，故憲从其受教，澜漪内湛，葳蕤外发。嗜学服勤，必无倦色。乃辞渭阳，寻师隶业，或经筵首席，或论集前驱，或参问禅宗，或附丽律匠。其志渊旷，欲皆吞纳之。年临不惑，尚住神都，因受旧相房公融宅请。未饭之前，宅中出经函云：“相公在南海知南铨，预其翻经，躬亲笔受《首楞严经》一部，留家供养。今筵中正有十僧，每人可开题一卷。”憲坐居第四，舒经见富楼那问生起义，觉其文婉，其理玄，发愿撰《疏》，疏通经义。及归院，矢誓写文殊菩萨像，别诵名号，计一十年，厥志坚强，遂有冥感，忽梦妙吉祥乘俊猊自憲之口入。由兹下笔，若大觉之被善现谈《般若》焉。起大历元年丙午也。及将彻简，于卧寐中见由口而出，在乎华严宗中文殊智也。勒成三卷，自谓从浅智中衍出矣。于今盛行。一说《楞严经》初是荆州度门寺神秀禅师在内时得本，后因馆陶沙门慧震于度门寺传出，憲遇之，著《疏》解之。后有弘礼法师者，蜀人也，作《义章》，开释此经，号《资中疏》。其中亦引震法师义例，似有今古之说，此岷蜀行之，近亦流江表焉。

○唐京师千福寺怀感传

释怀感，不知何许人也。秉持强悍，精苦从师，义不入神，未以为得。四方同好就雾市焉，唯不信念佛。少时径生安养，疑冰未泮，遂谒善导，用决犹豫。导曰：“子传教度人，为信后讲，为渺茫无诣？”感曰：“诸佛诚言，不信不讲。”导曰：“若如所见，令念佛往生。岂是魔说耶？子若信之，至心念旃，当有证验。”乃入道场三七日，不睹灵瑞。感自恨罪障深，欲绝食毕命。导不许，遂令精虔，三年念佛。后忽感灵瑞，见金色玉毫，便证念佛三昧。悲恨宿垢业重，妄构众愆，忏悔发露，乃述《决疑论》七卷（即《群疑论》是也）。临终，果有化佛来迎，合掌面西而往矣。

○唐吴兴法海传

释法海，字文允，姓张氏，丹阳人。少出家于鹤林寺。白驹匪食其场苗，金翅俄翔其海面，曲从师教，周览群经，大壑纳川，邓林聚羽。是以圆入一性，学阶空王，擅当代独悟之名，剖先贤不决之义，一时外学《六籍》该通。尝谓人曰：“佛法一门，极唯心地，余皆椎轮也。”天宝中，预扬州法慎律师讲肆，同昙一、灵一等推为颜、冉焉。复与杼山昼公为忘形之交，林下之游。黑白二徒，多从求益焉。

○唐洛京佛授记寺慧苑传

释慧苑，京兆人也。少而秀异，蔚有茂才，厌彼尘寰，投于净域，礼华严法藏为师。陶神练性，未几深达法义，号上首门人也。有勤无惰，内外该通，华严一宗，尤成精博。苑依《宝性论》立四种教，为有四类不识如来藏，如生盲人，则凡夫、声闻、辟支、初心菩萨也。一迷真异执教，当凡夫；二真一分半教，当二乘；三真一分满教，当初心菩萨；四真具满教，当识如来藏者也。诸师处判，或依或违，然其纲领教乘一家之说。次以新译之经未有音释，披读之者取决无从。遂博览经书，恢张诂训，撰成二卷，俾初学之流不远求师，览无滞句，旋晓字源。然禀从贤首之门，不负庭训之美也。

○唐处州法华寺智威传（慧威）

释智威，姓蒋氏，缙云人也。颖脱尘蒙，心游物表，少事师于轩辕氏炼丹山。闻天台宗教盛，遂负笈往沃洲石城寺，亲灌顶禅师求请心要。既而得一融道，体二居宗，定慧方均，寂照相半，虽云自了，急在利他。天与多能，富有辞藻，著《桃岩寺碑》，与《头陀寺碑》气度相表。后以法眼付授慧威焉。时传威是徐陵后身，其利智雄才，断可知矣。又释慧威，姓留氏东阳人也。簪角之年，露其旧习，挟开爱网，径入空门，不滞一方，仍参三益。闻缙云大威禅师盛行禅法，裹足造焉。刻志忘劳，睹威墙奥。一日千里，罔不推称，至有成业，时谓小威。然其乐静居山，罕交人事。指教门人，不少杰出者，左溪玄朗矣。威常修止观，匪弃光阴，说与行而并驰，语将嘿而齐贯，落落然汪汪然，人无得名焉。

○唐台州国清寺湛然传

释湛然，俗姓戚氏，世居晋陵之荆溪，则常州人也。昔佛灭度后十有三世，至龙树，始用文字广第一义谛。嗣其学者号法性宗。元魏、高齐间有释慧文默而识之，授南岳思大师，由是有三观之学。洎智者大师蔚然兴于天台，而其道益大。以教言之，则然乃龙树之裔孙也，智者之五世孙也，左溪朗公之法子也。家本儒墨，我独有迈俗之志，童？邈焉异于常伦。年二十余，受经于左溪，与之言，大骇。异日谓然曰：“汝何梦乎？”然曰：畴昔夜梦披僧服，掖二轮，游大河之中。”左溪曰：“嘻，汝当以止观二法度群生于生死渊乎？”乃授以本师所传止观。然德宇凝精，神锋爽拔，其密识深行，冲气慧用，方寸之间，合于天倪。至是始以处士传道，学者悦随，如群流之趣于大川也。天宝初年，解逢掖而登僧籍。遂往越州昙一律师法集，广寻持犯开制之律范焉。复于吴郡开元寺敷行止观。无何，朗师捐代，挈《密藏》独运于东南，谓门人曰：“道之难行也，我知之矣。古先至人静以观其本，动以应乎物，二俱不住，乃蹈于大方。今之人或荡于空，或胶于有，自病病他，道用不振。将欲取正，舍予谁归？”于是大启上法，旁罗万行，尽摄诸相，入于无间。即文字以达观，导语默以还源。乃祖述所传章句凡十数万言。心度诸禅，身不逾矩，三学俱炽，群疑日溃，求珠问影之类，稍见罔象之功行。止观之盛，始然之力也。天宝末，大历初诏书连征，辞疾不就。当大兵大饥之际，揭历法流，学徒愈繁，瞻

望堂室，以为依怙。然慈以接之，谨以守之，大布而衣，一床而居，以身诲人，耆艾不息。建中三年二月五日，示疾佛陇道场，顾语学徒曰：“道无方，性无体，生欬死欬，其旨一贯。吾归骨此山，报尽今夕，要与汝辈谈道而诀。夫一念无相谓之空，无法不备谓之假，不一不异谓之中，在凡为三因，在圣为三德。炷则初后同相，涉海则浅深异流，自利利人，在此而已。尔其志之！言讫隐几，泊如而化，春秋七十二，法腊三十四，门人号咽，奉全身起塔，纡于智者大师莹兆西南隅焉。入室弟子吴门元浩，可谓迹其人近其室矣。然平日辑纂教法，明决前疑，开发后滞，则有《法华释签》、《法华疏记》各十卷、《止观辅行传弘诀》十卷、《法华三昧补助仪》一卷、《方等忏补阙仪》二卷、《略维摩疏》十卷、《维摩疏记》三卷、《重治定涅槃疏》十五卷、《金铉论》一卷，及《止观义例》、《止观大意》、《止观文句》、《十妙不二门》等盛行于世。详其然师，始天宝，终建中，以自证之心，说未闻之法，经不云乎，“云何于少时大作佛事”，然师有焉。其朝达得其道者唯梁肃学士，故拈鸿笔成绝妙之辞。彼题目云：“尝试论之，圣人不兴，其间必有命世者出焉。自智者以法传灌顶，顶再世至于左溪，明道若昧，待公而发。乘此宝乘，焕然中兴。盖受业身通者三十有九僧，搢绅先生高位崇名屈体承教者又数十人。师严道尊，遐迹归仁，向非命世而生，则何以臻此！观夫梁学士之论，议偕齐，非此人何以动鸿儒，非此笔何以铭哲匠？盖洞入门室见宗庙之富，故以是研论矣。吁，吾徒往往有不知然之道！《诗》云：“维鹄有巢，维鸠居之。”梁公深入佛之理窟之谓欤！有会稽法华山神邕作真赞，至大宋开宝中吴越国王钱氏追重而誄之，号圆通尊者焉，可不是欤！

○唐苏州开元寺元浩传

释元浩，姓秦氏，字广成，吴门人也。绮岁依晋陵灵山寺慧日禅师出家，具满律戒，配本州龙兴寺，寻为荆溪湛然禅师嘱累弟子。初受《法华》止观，已得醍醐，唯以裂大网，感大果、成大行、归大处以为大愿。宴居三昧，常随佛后，希夷自得，人莫能知，其秘密深远如海印三昧，不言出处，常行佛事，与夫难行苦行、更相祖述、默传心要，为论为记、灵芝瑞草以为功德传于后世者，不同日而语矣。浩注解《大涅槃经》，为文首《序》，德美圆实，志愿显现，盖录其所证之意而见于文，曰：“余闻先觉之大宝曰常，在宥布和之盛典曰教，率土知化之归宗曰行，交感人心之至极曰证。然则以道御时，以法性合其运，当应物之际，与显晦同其光，恢张至化而自他昭著者，实播于鸿名。钦恭闻思，协和至极，四德克彰者，实存乎妙体。格变群家，历观诸行，至典克修，庶绩有成者，实赖乎宗本。信以授人，大明宗极，敷畅厥旨，庶几有补于将来者，实存乎妙用。博综群言以立诚训，风行十方率用归顺者，实存乎妙教矣。”此浩之法要，如王辅嗣之法《系辞》，司马迁之《自叙》，管仲能言《轻重》，孟子之传《春秋》，虽儒释不同，其义一也。以元和十二年十一月十一日示疾，右胁累足，入于涅槃，非二乘境界，真如来定也。明年十一月十三日阇维，起塔于苏州西北虎丘东山南原也。浩耽学味道，不涉余事，常随然师听其言说，曾无倦色。分析义理，流川注，必默记而暗诵，一言不失。数年

之后，人始知之。然师曰：“回也如愚。”罕为人说，多辞以不能，及被梁田二君苦劝请之，始著《涅槃经解述》。浩与上都云华寺华严澄观法师，若孔门之游夏焉。其儒流受业，翰林学士梁公肃、苏州刺史田公敦。缁流受业者，智恒、子瑜、道儒、仲仪、仲良五人，持经讲论，传之无穷。大比丘尼识微、道巽、志真、悟极，此四人者高洁之伦，深练禅观。初浩为二官所请注经，预梦甚为奇特。又庭阶生花，非人间恒所见者。祥鸟飞驯，五彩绝异。刺史崔恭撰《塔碑》，立于虎丘山罗汉石坛之左。后有行满、道暹、明旷皆著述，广天台之道欤。

○唐越州暨阳杭乌山智藏传

释智藏，姓皮氏，西印度种族，祖父从华，世居官宦，后侨寓庐陵。藏少入精舍，睹像设之繁，乃陋俗求真，而于三学各所留心，唯《律藏》也最为精敏。大历三年，游豫章，因隶名天宫寺，众恳命临坛秉度，时仰■？11，号为律虎。每登法座，提唱毗尼，堂盈席满，听受无厌。辨名理，析微言，连环可解也。贞元中，遇大寂禅师，笃明心要。及游会稽，于杭乌山顶筑小室安禅。乃著《华严经妙义》。宣吐11？？，学者归焉。至元和十四年二月，无疾而终，报龄七十九。焚收舍利圆净者，建塔于院北峰焉。杭乌山者，越俗言讹，合言杭岛，谓浙江所渡古用杭筏，到岸藏杭，故云岛也。

○唐梓州慧义寺神清传（义将）

释神清，字灵庾，俗姓章氏，绵州昌明人也。生于大安山下，昆季相次三人出俗，皆有名望，清居乎仲。处胎之际，母顿恶荤膻。及为儿，虽随戏弄，遇像礼足，逢僧稽颡。年十三，受学于绵州开元寺辩智法师。于时敕条严峻，出家者限念经千纸，方许落发。清即诵《法华》、《维摩》、《楞伽》、《佛顶》等经，有同再理。时故相乔琳为绵郡太守，惊其幼俊，躬而降礼请削染焉，则大历中也。至年十七，听习粗通，即讲《法华》一经。岁满，慧义寺依如律师受具戒。夏习尸罗，依学《新疏》。寻达大宗，乃诣上都。后以优文赡学，入内应奉。暮年钟其荼蓼，归慧义寺，讲导著述，略无闲日。以元和年中终于本寺峰顶，迁神于白门兰若，即？城北郭外也。清平昔好为著述，喜作编联，盖巨富其才，亦凿深于学。三教俱晓，该玄鉴极，彝伦咸叙，万人之敌也。受业弟子黑白四方，计一千余人。前后撰成《法华玄笺》十卷，《释氏年志》三十卷。《新律疏要诀》十卷（亦谓《清钞》）《二众初学仪》一卷，《有宗七十五法疏》一卷（亦名《法源记》，此盖解小乘所计五位色心心所不相应无为等法，体性业用，一皆详括，故云法源也），《识心论》、《澄观论》、《俱舍义钞》数卷，《北山参玄语录》十卷，都计百余轴，并行于代。就中语录博该三教，最为南北鸿儒名僧高士之所披玩焉。寺居？城之北，长平山阴，故云北山，统三教玄旨，实而为录，故云《参玄》也。观清之述作，少分明二权一实之经旨，大分明小乘律论之深奥焉。清貌古且奇，髭白而光莹。相国崔龟从时从事东川，序真赞云：“与奘三藏道颜同，摄物异，时一体耳。”门人数多，其出伦者

义将也。独明《俱舍》，兼善《起信》，海内学人望风而至。开成中北山俱舍宗不泯者，清之余素乎。东川涌潭僧正颜公著碑，本寺讲律临坛光肇，别附《语录》，略记清言行矣。

○唐京师大安国寺端甫传

释端甫，俗姓赵氏，天水人也。世为秦著姓焉。初，母张夫人梦梵僧谓曰：“当生贵子。”即出囊中舍利使吞之。及诞，所梦僧白昼入其室，摩其顶曰：“必当大兴法教。”言讫而灭。既成人，高颡深目，大颐方口，长六尺五寸，其音如钟。夫将欲荷如来之菩提，凿生灵之耳目，固必有殊祥奇表欤？始十岁，依崇福寺道悟禅师为沙弥。十七正度为比丘，隶安国寺。受具于西明寺照律师，学毗尼于崇福寺升律师，传《唯识》于安国寺素法师，通《涅槃经》于福林寺毗法师。甫又梦梵僧以舍利满琉璃器，使吞之，且曰：“《三藏》大教，尽贮汝腹矣。”自是经律论无敌于当时，囊括川注，逢源会委，滔滔然莫能济其畔岸矣。夫将欲伐株机于情田，雨甘露于法种者，固必有勇智宏辩欤？无何，谒文殊于清凉，众圣皆现；演大经于太原，倾都毕会。德宗皇帝闻其名，征之，一见大悦，常出入禁中，与儒道议论，赐紫方袍。岁时锡施，异于他等。复诏侍皇太子于东朝。顺宗皇帝深仰其风，亲之若昆弟，相与卧起，恩礼特优。宪宗皇帝数幸其寺，待之若宾友。常承顾问，注纳偏厚。而甫符彩超迈，辞理响捷，迎合上旨，皆契真乘，虽造次应对，未尝不以阐扬为务。繇是天子益知佛为大圣人，其教有大不思議事。当是时朝廷方削平区夏，缚吴幹蜀，潜蔡荡郢，而天子端拱无事。诏甫率缁属迎真骨于灵山，开法场于秘殿，为人请福，亲奉香灯。既而刑不残，兵不黠，赤子无愁声，沧海无惊浪，盖参用真宗以毗大政之明效也。夫将欲显大不思議之道，辅大有为之君，固必有冥符玄契欤？掌内殿法仪，录左街僧事，以标表净众者凡一十年。讲《涅槃》、《唯识》经论，处当仁传授宗主，以开诱道俗者，凡一百六十座。运三密于瑜伽，契无生于悉地，日持诸部十余万遍，指净土为息肩之地，严金经为报法之恩。前后供施数十百万，悉以崇饰殿宇，穷极雕绘。而方丈单床，静虑自得。贵臣盛族皆所依慕，豪侠工贾莫不瞻向，荐金宝以致诚，仰端严而礼足，日有千数，不可殫书。而甫即众生以观佛，离四相以修善，心下如地，坦无丘陵，王公舆台皆以诚接。议者以为成就常不轻行者，唯甫而已矣。夫将欲驾横海之大航，拯迷涂于彼岸者，固必有奇功妙道欤？以开成元年六月一日，西向右胁而灭，当暑而尊容若生，终夕而异香犹郁。其年七月六日，迁于长乐之南原。遗命荼毗，得舍利三百余粒，方炽而神光月皎，既烬而灵骨珠圆。赐谥曰大达，塔曰玄秘。俗寿六十七，僧腊可数。门弟子僧尼约千余辈，或讲论玄言，或纪纲大寺，修禅秉律，分作人师，五十其徒，皆为达者。会昌中相国裴公休为《碑》颂德焉。

○唐圭峰草堂寺宗密传（圆禅师照禅师）

释宗密，姓何氏，果州西充人也。家本豪盛，少通儒书，欲干世以活生灵，负俊才

而随计吏。元和二年，偶谒遂州圆禅师，圆未与语，密欣然而慕之，乃从其削染受教。此年进具于拯律师。寻谒荆南张，张曰：“汝传教人也，当宣导于帝都。”复见洛阳照禅师，照曰：“菩萨人也，谁能识之？”末见上都华严观，观曰：“毗卢华藏，能随我游者其唯汝乎？”初在蜀，因斋次受经，得《圆觉》十二章，深达义趣，誓传是经。在汉上因病僧付《华严》句义，未尝隶习，即尔之。由是乃著《圆觉》、《华严》及《涅槃》、《金刚》、《起信》、《唯识》、《盂兰盆法界观》、《行愿经》等《疏钞》及《法义》、《类例》、《礼忏》、《修证》、《图传》《纂略》。又集诸宗禅言，为《禅藏》，总而序之，并酬答书偈议论等。又《四分律疏》五卷、《钞悬谈》二卷，凡二百许卷，《图》六面。皆本一心而贯诸法，显真体而融事理，超群有于对待，冥物我而独运矣。密累入内殿，问其法要。大和二年庆成节，征赐紫方袍为大德。寻请归山。会昌元年正月六日坐灭于兴福塔院，俨若平日，容貌益悦。七日，迁于函，其自证之力可知矣。其月二十二日，道俗等奉全身于圭峰，二月十三日荼毗，得舍利数十粒，明白而润大。后门人泣而求诸煨中，必得而归，悉敛藏于石室，其无缘之慈可知矣。俗龄六十二，僧腊三十四。遗诫令舁尸施鸟兽，焚其骨而散之，勿塔，勿得悲慕，以乱禅观。每清明上山，必讲道七日而后去。其余住持仪则当合律科，违者非吾弟子。初，密道既芬馨，名惟弱赫，内众慕膻既如彼，朝贵答响又如此。当长庆元和已来，中官立功执政者孔炽，内外猜疑，人主危殆。时宰臣李训酷重于密，及开成中伪甘露发，中官率禁兵五百人出邠，所遇者一皆屠戮。时王涯、贾餗、舒元舆方在中书会食，闻难作，奔入终南投密。唯李训欲求剪发，匿之，从者止之，训改图趋凤翔。时仇士良知之，遣人捕密入左军，面数其不告之罪，将害之。密怡然曰：“贫道识训年深，亦知其反叛，然本师教法，遇苦即救，不爱身命，死固甘心。”中尉鱼恒志嘉之，奏释其罪。朝士闻之，扼腕出涕焉。或曰：“密师为禅耶，律耶，经论耶？”则对曰：“夫密者四战之国也，人无得而名焉，都可谓大智圆明白证利他大菩萨也。是故裴休论撰云：‘议者以师不守禅行，而广讲经论。游名邑大都，以兴建为务。乃为多闻之所役乎，岂声利之所未忘乎？嘻，议者焉知大道之所趣哉！夫一心者万法之总也，分而为戒定慧，开而为六度，散而为万行。万行未尝非一心，一心未尝违万行。禅者六度之一耳，何能总诸法哉？且如来以法眼付迦叶，不以法行。故自心而证者为法，随愿而起者为行，未必常同也。然则一心者万法之所生，而不属于万法。得之者则于法自在矣，见之者则于教无碍矣。本非法不可以法说，本非教不可以教传，岂可以轨迹而寻哉？自迦叶至富那奢凡十祖皆罗汉，所度亦罗汉。马鸣、龙树、提婆、天亲始开摩诃衍，著论释经，摧灭外道，为菩萨唱首。而尊者闍夜独以戒力为威神，尊者摩罗独以苦行为道迹。其他诸祖，或广行法教，或专心禅寂，或蝉蜕而去，或火化而灭，或攀树以示终，或受害而偿债，是乃法必同而行不必同也。且循辙迹者非善行，守规墨者非善巧，不迅疾无以为大牛，不超过无以为大士。故师之道也，以知见为妙门，寂净为正味，慈忍为甲盾，慧断为剑矛。破内魔之高垒，陷外贼之坚阵，镇抚邪杂，解释縲笼。遇穷子则叱而使归其家，见贫女则呵而使照其室。穷子不归，贫女不富，吾师耻之。二乘不兴四分不振，吾师耻之。忠孝不并化，荷檐不胜任，吾师耻之。避名滞相，匿我增慢，吾师耻之。故遑遑于济拔，汲汲于开

诱，不以一行自高，不以一德自耸。人有依归者，不俟请则往矣；有求益者，不俟愤则启矣。虽童幼不简于应接，虽鹳鹄不怠于叩励。其以阐教度生，助国家之化也如此。故亲师之法者，贫则施，暴则敛，刚则随，戾则顺，昏则开，堕则奋，自荣者谦，自坚者化，徇私者公，溺情者义。凡士俗有舍其家与妻子同入其法、分寺而居者，有变活业、绝血食、持戒法，起家为近住者，有出而修政理以救疾苦为道者，有退而奉父母以丰供养为行者。其余憧憧而来，欣欣而去，扬袂而至，实腹而归，所在甚众，不可以纪。真如来付嘱之菩萨，众生不请之良友。其四依之人乎？其十地之人乎？吾不识其境界庭宇之广狭深浅矣。议者又焉知大道之所趣哉？’其为识达大人之所知心为若此也。密知心者多矣，无如升平相国之深者，盖同气相求耳。”宣宗再阐真乘，万善咸秩，追谥曰定慧禅师，塔号青莲。标服执弟子礼四众数千百人矣。

系曰：“河东相国之论撰，所谓极其笔矣。然非夫人之为极笔，于他人岂极其笔乎？观夫影响相随，未始有异也。影待形起，响随声来。有宗蜜公，公则有裴相国。非相国曷能知密公，相续如环，未尝告尽，其二公之道如然。则知谛观法，王法则密公之行甚圆；应以宰官身，则裴相之言可度。今禅宗有不达而讥密不宜讲诸教典者，则吾对曰：达磨可不云乎，吾法合了义教。而寡学少知自既不能，且与烦惑相应可不嫉之乎？或有诮密不宜接公卿而屡谒君王者，则吾对曰：教法委在王臣，苟与王臣不接，还能兴显宗教以不？佛言力轮，王臣是欤？今之人情，见近王臣者则非之。曾不知近王臣人之心苟合利名，则谢君之诮也。或止为宗教亲近，岂不为大乎？宁免小嫌，嫌之者亦嫉之耳。若了如是义，无可无不可，吁哉！

○唐京师西明寺乘恩传

释乘恩，不知何许人也。肇从志学，知遍寻师，凡厕黉堂，必穷义路。常训门人曰：“好学近乎智，力行近乎仁。仁智稍成，是殊名同实，趋菩萨地，若下阪之走丸耳。”思乐人为学，不忘讲导。及天宝末，关中版荡，因避地姑臧。旅泊之间，嗟彼密迹羌虏之封，极尚经论之学。恩化其内众，勉其成功，深染华风，悉登义府。自是重撰《百法论疏》并《钞》，行于西土。其《疏》祖慈恩而宗潞府，大抵同而少闻异，终后弟子传布。迨咸通四年三月中，西凉僧法信精研此道，禀本道节度使张义朝表进恩之著述，敕令两街三学大德等详定，实堪行用，敕依，其僧赐紫衣，充本道大德焉。

○唐彭州丹景山知玄传

释知玄，字后觉，姓陈氏，眉州洪雅人也。曾祖图南，任梓州射洪县令。祖宪，考邈，皆名场不捷。母魏氏梦月入于怀，因而载诞，虽乳哺未能言，见佛像僧形，必含喜色。五岁，祖令咏花，不数步成云：“花开满树红，花落万枝空，唯余一朵在，明日定随风。”祖吟叹不怩曰：“吾育此孙，望其登甲科，雪二代之耻。今见孺

子志矣，非貽厥也已，必从空门，乖始望也。”七岁，果遇法泰法师在宁夷寺讲《涅槃经》。寺与居邻，玄日就讲集所，一聆法语，若睹前因。是夕梦其寺殿，佛手摩其顶。寤后祖父，乞为勤策，亲党观其必不可抑夺，故听之。年十一，遂其削发。乃随师诣唐兴邑四安寺，授大经四十二卷，远公《义疏》、空师《圆旨》，共一百二十五万言。皆囊括深奥矣。方年十三，指钁缁徒，露老成之气。时丞相杜公元颖作镇西蜀，闻玄名，命外座。讲谈于大慈寺普贤阁下。黑白众日计万许人，注听倾心，骇叹无已。自此蜀人弗？其名，号陈菩萨耳。传云，玄前身名知铉，汉州三学山讲《十地经》，感地变琉璃焉。玄于净众寺辩贞律师所受具戒，才听毗尼，续通《俱舍》，则长十山固律师之付授焉。复从本师下三峡，历荆襄，抵于神京资圣寺。此寺四海三学之人会要之地，玄敷演经论，僧俗仰观，户外之屦日其多矣。文宗皇帝闻之，宣入顾问，甚愜皇情。后学《唯识论》于安国信法师，又研习外典，经籍百家之言，无不该综。玄每恨乡音不堪讲贯，乃于象耳山诵《大悲咒》，梦神僧截舌换之。明日，俄变秦语矣。有杨茂孝者，鸿儒也，就玄寻究内典，直欲效谢康乐注《涅槃经》，多执卷质疑，随为剖判。致书云：“方今海内龙象，非师而谁？”次扬刑部汝士、高左丞元裕、长安扬鲁士咸造门拟结莲社。尝一日玄宴坐，见茂孝披紫服、戴碧冠，三礼毕，乘空而去。玄令人侦问，茂孝其夕诫其子曰：“吾常欲落发披缁，汲瓶挈屨，侍玄公，所累者簪冕也。吾盖棺时，殓以紫袈裟、碧芙蓉冠。”至是方验先见矣。武宗御宇，初尚钦释氏，后纳蛊惑者议，望祀蓬莱山，筑高台以祈羽化。虽谏官抗疏，宰臣屡言，终不回上意。因德阳节，缁黄会麟德殿，独诏玄与道门敌言，神仙为可学不可学耶？帝义手付老氏中理大国若烹小鲜义，共黄冠往复。玄陈帝王理道，教化根本，言神仙之术，乃山林间匹夫独擅高尚之事业，而又必资宿因，非王者所宜。辞河下倾，辩海横注，凡数千言。闻者为之股栗，大忤上旨，左右莫不色沮。左护军仇士良、内枢密杨钦义惜其才辩，恐将有？逐之命，乃密讽贡《祝尧诗》。玄立成五篇，末章云：“生天本自生天业，未必求仙便得仙，鹤背倾危龙背滑，君王且住一千年。”帝览诗微解。帝虽不纳忠谏，而嘉其识见口给也。玄即归巴岷旧山，例施巾栉，而存戒检愈更甄明。方扁舟入湖湘间，时杨给事汉公廉问桂岭，延止开元佛寺。属宣宗龙飞，杨公自内枢统左禁军，以册定功高，请复兴天竺教，奏乞访玄声迹。玄复挂坏衣，归上国宝应寺。属寿昌节讲赞，赐紫袈裟，署为三教首座。帝以旧藩邸造法乾寺，诏玄居寺之玉虚亭。大中三年诞节，诏谏议李贻孙、给事杨汉公，缁黄鼎列论义，大悦帝情。因奏天下废寺基各敕重建，大兴梵刹，玄有力焉。命画工图形于禁中，其优重如是。与相国裴公休友善，同激扬中兴教法事。八年，上章乞归故山，大行利济，受益者多。广明二年春，僖宗违难西蜀，后遣郭遵泰赍玺书，肩輿诏赴行在。帝接谈论，颇解上心。左军容田令孜与诸达官，问道勤重。帝欲旌其美，令诸学士撰玄师号，皆未愜旨。乃挥御翰云：“朕以开示悟入《法华》之宗旨也。悟者，觉也，明也，悟达大道，悟佛知见。”又云：“悟者一刹那，不悟河沙劫，所以悟者真乘了然成佛之义。今赐悟达国师为号。虽曰强名，用表朕意。”玄陈让不遂，乃乞归九陇旧庐。于正月二十一日卧内，见所曾游历圣境名迹，皆见在前。二月七日，闻空声曰：“必生净土。”乃讯之云：“孰之语耶？”空又应曰：“佛也。”七月中，闻户外有格斗之

声，逡巡一菩萨降于庭前，事摩灭矣，渐迫仅玄身，丁宁赞喻：“勿以此若为累也。”言讫而没。又于一夕，有一珠自玄左足下流去，苦楚万端，谛视其珠中明明有“晁错”二字。乃知玄是袁盎也，曾因七国反，盎奏斩错，以谢吴楚诸王，故为婴挠耳。召弟子慈灯附口上遗表，嘱令弃尸，半饲鱼腹，半啖鸟兽。吾久与西方净土有期如斯。誨诱讫，右胁面西而逝，享年七十三，僧腊五十四。玄咸通中曾游泽州，追问小远法师，同年亦同终日月焉。玄坚守禁戒，少欲，过中不食蔬果，服唯布褐，卧则刍秆。而六时行道，夜卧一更，余则禅坐。等视众生，无贵贱少长，待之如一。素结情好深者裴相国休。初，裴镇荆门，玄游五台山，路出渚宫，赠遗初无所齟齬裴知其俭约，密遣人沿路以供之，若苏秦遣舍人阴资奉张仪也。尝经骆谷真符县雍氏家枕潭，潭中有大鱼，如龙四足，而齿牙纤利，其家日饲以食，已四世矣。或欲网钓之意，则辄云雾晦冥焉。玄扣船抚其顶，瞪目而鼓跃，即为受归依。未几，乃寄梦雍氏曰：“我谢汝累世护念，今受归依，已生天而永诀矣。”次为导江玉垒山神李冰庙、益昌北郭龙门神，偕受戒法，罢其血食。有李商隐者，一代文宗，时无伦辈，常从事河东柳公梓潼幕，久慕玄之道学，后以弟子礼事玄，时居永崇里，玄居兴善寺。义山苦眼疾，虑婴昏瞽，遥望禅宫，冥祷乞愿。玄明旦寄《天眼偈》三章，读终疾愈。迨乎义山卧病，语僧录僧彻曰：“某志愿削染为玄弟子，临终寄书偈诀别”云。玄生常著《如来藏经会释疏》二卷，命僧彻撰《法鉴》以照像，若《十翼》焉。《大无量寿经疏》二卷，僧彻著《法灯》，类章指焉。《胜鬘经疏》四卷，僧彻著《法苑》以错综，犹纬书焉。又《般若心经》、《金刚经》各有《疏义》。此外秦蜀之间，作释氏杂文外篇箴论碑志歌诗，录成二十余卷，礼忏文六卷，通计三十万言。后迁塔于茶笼山附圣寺矣。中和二年，弟子左街僧录净光大师僧彻述《传》，法孙右街僧录觉辉，辉弟子伪蜀祐圣国师重孙光业僧录，绵绵爪颯，皆名公也。凤翔府写玄真，李义山执佛侍立焉。

系曰：玄公何云袁盎，又为知铉二人后身耶？通曰：人寿百年，自汉至唐，玄几经出没乎骸山泪海，断可知矣。然则玄公多才行道，近古罕闻，法嗣蕃昌，他莫与议也。

○唐京兆大安国寺僧彻传

释僧彻，不知何许人也。敏利天资，高迈逸类，稚岁聪颖，而慕悟达国师，若颜回之肖仲尼也。既而时亲函丈，颇见幽微，随侍翼从，未尝少厌。窥其门墙，其殆庶几乎。悟达凡有新义别章，咸嘱付彻畅衍之。为《如来藏经疏》著《法鉴》

四卷，《大无量寿经疏》著《法灯》二卷，《胜鬘师子吼经疏》著《法苑》十卷。观乎悟达为《疏》，若左丘明之传也。彻述三《法钞》，犹杜、服之《集解》欤？初居法乾内寺，师资角立，声彩风行，凡百官寮无不奉仰率由。彻内外兼学，辞笔特高，唱予和汝，同气相求。寻充左右街应制，每属诞辰，升麟德殿法座讲谈，敕赐紫袈裟。懿宗皇帝留心释氏，颇异前朝。遇八斋日，必内中饭僧数盈万计。帝因

法集，躬为赞呗，彻则升台朗咏。宠锡繁博，敕造緇檀木讲座以赐之。又敕两街四寺行方等忏法，戒坛度僧各三七日。别宣僧尼大德二十人入咸泰殿置坛度内。福寿寺尼缮写《大藏经》，每藏计五千四百六十一卷，雕造真檀像一千躯，皆委彻检校焉。以十一月十四日延庆节，麟德殿召京城僧道赴内讲论，尔日彻述皇猷，辞辩浏亮，帝深称许。而又恢张佛理，旁慑黄冠，可谓折冲异论者，当时号为“法将”。帝悦，敕赐号曰净光大师，咸通十一年也。续录两街僧事。初彻经江论海，勇

于揭厉，于青龙寺讲贯既循悟达国师义意，寄呈所见，蒙回八十四字云：“观君《法苑》思冲虚，解我真乘刃有余。若使龙光时可待，应怜僧肇论成初。五车外典知难敌，九趣多才恐不如。萧寺讲轩横淡荡，帝乡云树正扶疏。几生曾得闍逾意，今日堪将贝叶书。一振微言冠千古，何人执卷问吾庐？”览兹奖饰，悲喜盈襟。以广明中，巢冠犯阙，僖宗幸蜀。其夕彻内宿，明日仓黄与杜光庭先生扈从入于岷峨，再见悟达，痛序艰难。彻极多著述，碑颂歌诗。不知所终。内翰侍郎乐朋龟为真赞，凤翔、嘉州皆写其真相。弟子秦蜀之间愈多传法者。

卷七

◎义解篇第二之四（正传二十三十附见四人）○唐五台山华严寺志远传（元堪）

释志远，俗姓宋氏，家于汝南。其父早丧，孤侍孀亲，承颜之礼，匪遑晨夕。母常念《法华经》，精通五卷。远识度明敏，孤标卓然。年二十八，辞亲从师，归依荷泽宗风，晤解幽旨，经营僧事，联绵六秋。凡诸取给，未尝混互。自尔辞师寻礼，复经八年，虽博瞻两宗，情犹系滞。闻天台一枝，该通妙理，定慧双融，解进于行。十乘境观，起自一家。修性三德，清凉盛演。因命同辈追游五峰，栖遁林泉，履历前躅，晓六凡四圣之理，了开示悟入之门，百界千如，苞罗性相。即遮即照，破立同时。依正圆融，凡圣平等，豁开心目，物我双亡。仅四十年，阐扬独步。远业精道邈，志苦神和，卧不解衣，食非别请。时岁不稔，樵炊屡乖，每掬水漱流，将期永日。体有疮疥，手不涂摩，戒检遵修，警慎心口。常以四种三昧炼磨身心。至于鍼札题尺，颇闲辞翰虫篆之美。每有缁素负才学者，异其辩说，或傍搜僻隐，欲为挫锐，伺之瑕玷，求其胜负。进虽傲然踞席，退乃踏？容，来高我山，去随四悉。洎会昌四年，春秋七十七，僧腊四十八，忽绝食数朝，而说法罔憚。以二月十七日诫门人曰：“吾自生修进，不欺心口，今获二种果报，卧安觉安而无痛恼。”又曰：“天台宗《疏》务在宣传，《法华疏》十卷，本迹二门，三周记别开近显远。《玄文》十卷，五义判释。《止观》十卷，境观双修，不定顿渐，八教粗妙，遮照平等，行解圆明，一多相即一藏文句，莹玉扞从金，将践圣阶，降兹罕及。礼忏方等，必假精诚，志之永怀，副吾之意也。”于时龙象云萃，栴比座隅，咸赞希奇，同称佛号。慈海之际，奄至迁灵，风惨云愁，山昏水咽，林峦色变，徙属凄伤。阍维日，诸子奔驰，罔知所诣。虽学者如林，达其法者唯元堪，即扶风马氏之裔也。气度冲邃，道风素高，盖远倾其解脱之瓶，注以醍醐之器，可谓一灯之后复燃一灯。及武宗澄汰之际，禀师先旨，哀恻累夕，以其章疏文句，秘之屋壁。及宣宗再阐释门，重葺旧居，取其教部，置之影堂，六时经行俨若。前制《法华妙经》积岁传唱，《摩诃止观》久而敷扬。嗣继之心已极师资之礼也。

○唐越州应天山寺希圆传

释希圆，姓张氏，姑苏人也。宗亲豪富，而独舍家，从登戒法，便游讲肆。不滞一方，勤修三学，良深岁稔，尤至博通，时推俊迈，因命讲训。光启中，属徐约军乱，孙儒略地，吴苑？扰。圆由通玄寺附商船，避地于甬东。其估客偕越人也，笃重于圆，召居会稽宝林山寺。形虽么麽，性且强干，与时寡合，多事宴默。或问之，则曰：“吾逍遥乎无形之场，同师子游戏耳。”景福中，于山寺演畅经论，同声相应，求法者至。乃著《玄中钞》数卷，皆当义妙辞也。恒劝人急修上生之业，且曰：“非知之难，行之为难。汝曹勉旃。”圆六时礼忏，未尝少缺。居小房，即琅簫山顶。是山也，传云从琅簫台飞来，此处先是屠坊，故皆镇于其下。山之冢有井，有鳊裸焉，水有盈缩，应大江之潮候，甚多灵怪。一云此处禹锁浙江蛟蜃之属，其

名曰蛆。蛆有双耳，其色苍黄，或缘竹木，必风雨至矣。今或出石窍，入僧居沟渠中，见人不惊，握则跳梁如怒状，唯偏入圆房。圆手执宛转屑就，乃为之受归戒，令勿作风雹之妖。暨圆终，而多暴风雨也。圆之修习，愿见弥勒。一日讲次，屹然坐终于法座，时众闻异香？臂，天乐铮鏦，或绝或连，七日后已，此真上生之证欤！则乾宁二年四月也。还山之日，僧众置祭于寺门。无何，有人茜袍象笏拜跪怆然。恻怛之间，杳无踪迹，众莫能测焉。茶毗，收舍利七百余粒，被四明人赍往新罗国矣。

○唐绛州龙兴寺木塔院玄约传

释玄约，姓张氏，正平人也。志韵刚洁，幼萌出尘之心，既谐夙志，入州龙兴伽蓝，日诵千言，更无再受。落发之后，满足律仪，检察已心，循其戒范，精持止作，未尝穿穴。自兹名节顿高，流辈窥仰。数稔之间，律论俱赡，遍求知识，探赜玄文。戾止长安崇圣寺，以戒德之选而预临坛，讲《律》并《俱舍》共四十余遍，渊静其性，研核靡亏。著《俱舍论金华钞》二十卷，为时所贵。而二讲登席，可三百余人，皆北面受业焉。传禀门生一百许辈，汾沁之间奔走学者，迨乎老矣。终本院小房，俗寿七十六，法腊五十六。学法弟子道俗收焚坑舍利数百粒，构砖浮图于郡城之西焉。

○梁滑州明福寺彦晖传

释彦晖，姓孙氏，今东京阳武县人也。佩纛之岁，闻父读《金刚般若》，瞪目凝听，澹然欢喜。又属家内斋僧，磬梵俱作，于帘幕之下合掌欣然。登年十五，随师学法，往太原、京兆、洛阳听采忘劳。年满，于嵩山少室寺受大戒，隶习毗尼，颇通深趣。次寻经论，皆讨玄源。且曰：“为善不同，同归乎治。治则戒、定、慧也。入圣机械，此三治性之极致也。”届洛都，先达无不推伏。至乎四部悉仰柔明，临鉴则戚少欣多，执瓶则荷轻持重。三衣之外，百一之资，量足而供，更无余长。所行慈忍，匪事规求。不畜门徒，惟劳自己，勤勤化导，默默进修。是故南燕之人号为佛子。初寄明福寺，讲《百法论》也，四海英髦，风趋波委，恒溢百余，且多俊迈，精研论席，钻仰经宗。其闻硕学兼才，故有分为上下十恶。十恶者，若八伯之号焉。上十恶则洞闲性相，高建法幢，宗因喻三，立破无滞。下十恶则学包内外，吟咏风骚，击论谈经，声清口捷，赞扬梵呗，表白导宣。盖因题目之分，乃极才能之际，云恶则倒背之言，乃是极善也。其门弟子为若此也。晖《因明》、《百法》二论各讲百许遍，出弟子一百五十余人，著钞曰《滑台》，盛行于世。以乾化元年秋八月三日，气力撝然而奄化矣。春秋七十二，法腊五十二。滑人追慕其德，二众三百余人奉神枢归葬于阳武县侧，营小塔焉。

○梁东京相国寺归屿传

释归屿，姓湄氏，寿春人也。父元旭知子敏利，授以《诗》、《书》，诵览记忆，弥见过群从诸子。而窃愿出尘，父母允其频请，乃礼本郡开元寺道宗律师为力生焉。未及周星，念通《法华》、《仁王》二经。登于弱冠，而全戒足，矜持三行，靡旷四仪，习听新章，寻通讲授。后闻洛京、三辅经论盛行，结侣求师，仅于十载，疏通性相，精大小乘，名数一支，《因明》一学，《俱舍》、《唯识》《维摩》、《上生》，皆深藏若虚也。复往南燕就晖公，重覆所学，研朱益丹，犹慨义章未为尽善。乃之今东京相国寺，遂糅《新钞》，讲训克勤，门生领悟。时朱梁后主与屿？角同学庠序，狎密情浓，隔面年深。即位半载，下诏访之。屿虽知故旧，终岁不言。事不可逃，应召方入。帝见悲喜交集，宣赉丰厚。时属嘉庆节，曾下敕止绝天下荐僧道恩命，其年独赐屿紫衣，仍号演法大师。两街威仪迎导，至寺，兼敕东塔御容院为长讲院。时闽帅，以圣节进《金刚经》一藏，绢三百匹，尽赐屿焉，法侣荣之。然睹旧钞有所不安，未极其理，遂搜抉精义于三载，著成二十卷，号曰《会要草字》，写毕进呈。帝览赏叹，敕令入《藏》，屿苦辞乃止。如是十五年中，唱导无怠，学徒继荣、瞻公相继传持。至后唐清泰三年十月十日，谓门人供演曰：“余气力肫然，无常将至，汝好住修进。”焚香合掌，初夜长逝，春秋七十五，僧腊五十五。即以其月十八日迁塔于京东郊寺庄东冈焉。

○后唐洛阳长水令譔传

释令譔，姓杨氏，陕府阌乡人也。幼而履操，回求出俗，得本邑之师，授《净名经》。年既应法，乃纳戒津，大小乘教兼而学之。于名数法门，染成淳粹。《弥陀》、《中观》，幹及膏腴，声光振发，莫之与京。因游洛南长水，遇归心檀信构伽蓝，就中讲贯。一论一经，三十载中宣化，计各五十余遍。日别诵《维摩》《上生》，以为恒课。执行持心而绝瑕卯，远近宗承，若望梅者得饮焉。以清泰二年乙未岁终于邑寺，春秋七十一，法腊五十一。其年迁于山麓，？西域法火葬，获舍利，学人檀越共建塔焉。

○后唐定州开元寺贞辩传

释贞辩，中山人也。少知出尘，长誓修学，刻苦之性，人不堪其忧。一志听寻，暇则刺血书经，又针血画立观自在像，慈氏像等。尝因行道困息，有二天女来相挠恼，辩誓之曰：“我心匪石，吾以神咒被汝。”彼众不容去。自此道胜，魔亦无踪。辩负笈抵太原城听习，时中山王氏与后唐李氏封境相接，虞其觐间者，并州城内不容外僧。辩由此驱出，遂于野外，古冢间宿。会武皇帝畋游冢在围场中，辩固不知。方将入城赴讲，见旌旗骑卒，缩身还入穴中。武皇疑，令擒见，问其故，遂验冢中，敷草座，案砚疏钞罗布，遂命入府供养。时曹太后深加仰重，辩诉于太后曰：“止以学法为怀，久在王宫不乐，如桎械耳。”武皇纵其自由，乃成其业。洎王处直平，乃归中山讲训，补故伽蓝，无不谐愿。有妇人陈氏布发掩地，请辩蹈之。撰《上生经钞》，为学者所贵，时号辩《钞》者是。后终于此寺焉。

○后唐会稽郡大善寺虚受传

释虚受，嘉禾御儿人也。纳戒后，于上都习学，内外博通，传讲数本大经论，不憚宣导。咸通中，累应奉圣节充左街鉴义，辈流孰不弭伏。及广明中，京阙盗据，逃难迢迢，抵越大善寺，同好者命讲《涅槃》、《维摩》二经，即天祐年中也。因愤谦雅等师《释》、崇福《疏》，繁略不中，其犹以水济水，终无必济焉，遂撰《义评钞》十四卷。同光中方毕轴。又因讲《俱舍论疏》，有贾曾侍郎《序》，次僧圆晖《序》，皆著《钞》解之，其文富赡，昔尝染指知焉。受于《涅槃》，辩而非略，仍多驳议小远之《疏》，免为青蝇之玷。余则《法华》、《百法》、《唯识》，各有别行《义章》。受性且狷急，与人不同，畜弟子无一可中，尝自执爨爨斋食，柴生火灭，复吹又遽，怒发，汲水沃之，终日不食而讲焉。及晚年眼昏甚，登师子座，戴竹笠而讲，贵目不闪烁尔。或讥其慢众，受亦不介意。属武肃王钱氏按部至越，遂出谒见，王素向风，乃加优礼，言劳再三。暨乾化中，于会稽开元寺度戒，命之充监坛选练，吴会间行此职者，自受始也。王表于朝廷，荐其紫衣。庄宗制赐，行人赍至营丘。时受讲当《上生经疏序》，至“若洪钟而虚受”，受舍麈柄言曰：“某得名无典实，今后更为虚受，小子识之。”乃状闻王，王曰：“此僧必无恩命分，何名虚受乎？”至同光乙酉岁，受终，迨海舰赍诰牒来，稽其终日，正到青社，果符武肃之言。有《文集》数卷、《述义章》三十余卷，行之于代。

○后唐杭州龙兴寺可周传

释可周，俗姓傅，晋陵人也。出家于本部建元寺。循良厥性，切问于勤。友生勉之曰：“非其地树之不生，今豫章经谓之江，论谓之海，胡不往请业乎？”周感其开导，挈囊达彼，遇云表法师盛集，穷《法华》慈恩《大疏》，日就月将，幹运深趣。昭宗初，自江西回台越之间，命其启发。梁乾化二年，受杭州龙兴寺召开演，黑白众恒有半千。两浙武肃王钱氏命于天宝堂夜为冥司讲经，鬼神现形扈卫，往往人睹焉。尝有祭铜官祠神，巫氏久请不下，后附巫曰：“吾随从大神去西关天宝堂听法方回。”武肃王闻而郑重，赉周中金如意并钵、紫衣一副，加号精志通明焉。以天成元年，终于观音院本房。初，周乾宁四年戾止台州松山寺讲《疏》，阙《钞》，遂依《疏》节成五卷，曰《评经钞》，《音训》五帖，解宣律师《法华序钞》一卷，行于浙之左右。弟子相继不绝。

○后唐东京相国寺贞诲传

释贞诲，姓包氏，吴郡常熟人也。年始十三，出家于本州龙兴寺。其性沈静，分阴是竞。方逾一稔，诵彻《法华经》，如是恒业日周二部。年十九，于扬州择名师受具足法。自尔西之伊洛，北抵晋郊，凡有讲筵，下风求益，核其经论，穷其性相，辈流之间，罕齐驰骛。至于非朋弱友，弃背如也。唐天祐元年，至今东京相国寺寓舍，讲导《法华经》十许遍，人未归重，则知奇货之售亦有时焉。及梁氏都于是京

，人物委输。贞明二年，会宋州帅孔公仰海风规，知其道行，便陈师友之礼，舍俸财，置长讲法华经堂于西塔院。从此翕然盛集。海旁读《大藏》教文，二时行道，精进罔疲。凡世伎术百家之言，黜于议论之外，诫门徒曰：“异端之说，汨乱真心，无记不熏，何须习俗？吾止愿为师子吼，不作野干鸣也。”但专香烛涂扫，以内院为息肩之地。至后唐清泰二年二月十日，召弟子五十余人，自具香汤澡浴，令唱《上生》礼佛，罄舍衣资，为非时僧得施半斋僧乞，至十一日，望空合掌云：“劳其众圣排空相迎。”满百徒侣，尔日皆闻天乐之音，顷刻而卒，俗寿七十三，僧夏五十四腊。于寺讲贯三十余年，经讲计三十七座，览藏经二遍，修弥勒内院业。以其年二月十八日葬浚郊东寺庄之原，幡幢威仪，缁白弟子约千余人会送焉。

○后唐洛京长寿寺可止传

释可止，姓马氏，范阳大房山高丘人也。年甫十二，迥有出俗之心，依悯忠寺法贞律师。年十五，为息慈，辞师往真定习学经论。时大华严寺有仁楚法师讲《因明论》，止执卷服膺三遍，精义入神，众推俊迈。有老宿维摩和尚者，释门之奇士也，问楚师曰：“门人秀拔，孰者为先？”曰：“有幽州沙弥者温故知新，厉精弗懈。”于是求见，遂质问胜军比量，随难应变，辞不可屈。维摩曰：“后生可畏，契经所谓虽小不可欺也。”遂率力请止开讲恒阳，缁素无不钦羨焉。迨十九岁，抵五台山求戒，于受前方便，感文殊灵光烛身。已而归宁父母及师，于寺敷演。二十三往并部，习《法华经》、《百法论》。景福年中，至河池，有请讲《因明》。后于长安大庄严寺化徒数载。乾宁三年，进诗，昭宗赐紫袈裟，应制内殿。本道刘仁恭者，据有北门，控扼蕃汉，闻止之名，移书召归故乡。其父与师相次物故，母犹在堂，止持盂乞食，以供甘旨。行诵《青龙疏》三载，文彻忽有巨蟒见于房，矫首顾视，似有所告。时同院僧居晓，博物释子也，且曰：“蛇则目睛不瞬，今其动乎？得非龙也？”止焚香祝之曰：“贫道念《青龙疏》，营斋养母，苟实龙神軫念，希值一檀越。”居数日，燕师冢子曰：“制胜司徒召申供养。”时庄宗遣兵出飞狐以围之，历乎年载，百谷勇贵，止顿释忧惧，末几燕陷，刘氏父子俘归晋阳。止避乱中山，节度使王处直素钦名誉，请于开元寺安置，逐月供俸。止著《顿渐教义钞》一卷，见行于代。天成三年戊子，王师问罪，定州陷焉。招讨使王晏休得瀛王冯道书，令寻止。既见，以车马送至洛京，河南尹秦王从荣优礼待之，奏署大师，号文智焉。于长寿净土院住持。应顺元年甲午正月二十二日，忽微疾作，召弟子“助吾往生”，念弥陀佛，奄然而化。俗年七十五，僧腊五十六。闰正月二日荼毗，收遗骨。至清泰二年四月八日，建塔于龙门山广化寺之东南隅。止风神峭拔，戒节孤高，百家子史，经目无遗。该博之外，尤所长者，近体声律诗也。有《赠樊川长老诗》，流传人口。在定州日，中山与太原互相疑贰，诸侯兼并，王令方欲继好息民，因命僧斋于庆云寺。会有献曰鹄者，王曰：“燕人诗客试为咏题。”止即席而成，后句云：“不知谁会喃喃语，必向王前报太平。”王欣然。诗人李洞者风骨僻异，慕贾阼仙之模式，景福中在河池相遇，赠止三篇。时宰相孙公渥、赵公凤、马公裔孙、窦学士梦徵、符侍郎蒙、李侍郎详，皆唱予和汝，坝谑韵谐。止顷在长安讲罢，

游终南山逍遥园，是姚秦什法师译经之地，年代浸深，鞠为茂草。且曰：“吾为释子，忍不兴乎？”奏昭宗乞重修，帝允，仍旧赐草堂寺额。后请樊川净休禅伯聚徒谈玄矣。及在洛也，讲外长诵《金刚经》，不知纪极。昔多居终南山、崆峒山，故有《三山集》，诗三百五十篇，盛行于时。弟子修文、修智、修行，微见师之道焉。

○汉太原崇福寺巨岷传

释巨岷，姓任氏，西河人也。父游于艺而贲丘园。母王氏戒受八关，心归三宝，从妊岷也，更好善缘，复求福利，而生令子。及生，年甫七岁，志气敦笃，暂见佛像，注仰欣然。父母知有宿因，或携入寺，意欲忘归。至本郡净心院，见宣远论师，志恋其房，泣求摄受。二亲知不能阻其愿，咸皆可之。年十岁，诵终《法华》、《维摩》二经，日持十卷，更无间隔，如执琉璃之器。其舒徐恣制，若老成焉。迨圆满足，便习尸罗，克通开制之科，恒照欣戚之鉴。自尔大乘理趣，经论精穷，得其师门，则并部永和三学也。俾夜作昼，窗案是临，不暇诸他。除研习义章，修六事二因也，于《大般涅槃经》兼《因明论》，末年逾切。又传输金论，尽屏余缘，各讲十遍，仍求辅亮，博览群书，得义最精，又扬具美。寻禀纶言，住城内天王院，与弟子俱供亿不亏，传持无替。乾祐元年，汉祖以龙潜晋土之日，便仰岷名，特降庭臣赐紫衣，号圆智大师。续有诏宣住崇福寺讲堂院，仍充管内僧正。经年而变法于晋，检策僧徒，如风偃草。至乾祐二年十一月五日，无疾而终。于时四众含悲，一城恋德。俗龄九十三，法腊五十四。乃遵西域荼毗礼，多投香水，或执幡花，黑白之众盈郊，黯之云蔽日，未容火灭，皆捧宝瓶，待盛梁粟之形，同见熏修之体。时得舍利者，随自因缘，或多或少。别得遗骨，具表奏闻。汉主敕葬于西山天龙寺，凡事官供，起石塔。敕谥号曰达识焉。

○汉棣州开元寺恒超传

释恒超，姓冯氏，范阳人也。祖父不仕，世修儒道，而家富巨万。超生而聪慧，居童稚群，不贪戏弄。年十五，早通六籍，尤善《风骚》，辞调新奇，播流人口。忽一日因阅佛经，洗然开悟。乃叹曰：“人生富贵，喻等幻泡，唯有真乘，可登运载。”遂投驻跸寺出俗。未周三祀，方议进修，昼夜不疲，而属师亡，亦遵释氏丧仪，守礼无担孝悌之名，燕人所美。梁乾化三年，往五台山受木义戒，由是陟遐自迹，切问近思。俄征《伐木》之章，且狎成人之友，结契远求名匠，阻两河间兵未罢，路不通。南则梁祖，北则庄宗，抗衡于轻重之前，逐鹿在存亡之际。当是时也，超止于本州魏、博、并、汾之间，学大小乘经律论，计七本，讲通思于雍、洛、梁、宋名师，杳然隔绝。虽然，巡历非远，宏畅殊精，瓶满见知，翼飞名字。是故并部息尘中山贞辩，夫二人者，言行俱臻，证修有位，一见超，叹曰：“义龙之头角悉完备矣，待飞奋而为霖雨焉。1 其为硕德题目，多此类也。龙德二年，挂锡于无棣，超曰：“此则全齐旧壤，邹鲁善邻。”遂止开元伽蓝东北隅，置院讲诸经论，二

十余年，宣导各三十余遍。节操高迈，举措舒徐，缙素见之，无不怯惧。声无叱咤，语不夸奢，自然而然，且非威势凌置之所得也。前后州牧，往来使臣，向誉钦风，修名执刺，相礼重者，止令童子辞以讲贯，罕曾接对。初有所嫌，终伏其高，齐鲁之间，造秀不远数百里，造其门以诘难。诸公一睹超容，傍听议论，参乎子史，证以教宗。或问《因明》，超答以诗一首，辞新理妙，皆悉叹降。时郡守李君素重高风，欲飞章举赐紫衣。超闻惊愕，遂命笔为诗云：“虚著褐衣老，浮杯道不成。誓传经论死，不染利名生。？树遮山色，怜窗向月明。他时随范蠡，一棹五湖清。”李君复令人劝勉，愿结因缘。超确乎不拔，且曰：“而其复尔，则吾在卢龙塞外矣。”郡将闻而止。又相国瀛王冯道闻其名，知是乡关宗人，先遗其书，序以归向之意。超曰：“贫道闲人，早舍父母，志修行。本期弥勒知名，不谓浪传于宰衡之耳也。于吾何益？”门人敦喻，不得已而答书，具陈出家之人岂得以虚名薄利而留心乎？瀛王益加郑重，表闻汉祖，遂就赐紫衣。自此忽忽不乐，以乾祐二年仲春三日微疾，数辰而终于本院。院众咸闻天乐沸空，乃升兜率之明证也。春秋七十三，僧腊三十五。门人洞微与学徒百余人持心丧，倾城士庶僧尼会送城外，具茶毗礼，收舍利二百余颗分施之。外緘五十颗，于本院起塔以葬之。瀛王未知，别奏赐师号曰德正，乃刊敕文于石塔焉。

○汉洛京法林院僧照传

释僧照，姓张氏，范阳人也。年十四出家，投悯忠寺，聪晤绝俦，神仪伟秀。初受经偈，日诵数千百言，目所览者过于宿习。吐论知见，有老成之风。遂度为沙弥。受具已来，历于再闰，暗诵经典，已逾六大部矣，即《最胜王》、《大悲》《维摩》、《法华》等经。旁加听寻经论，十数年间，深文伏义，蓝出青矣。天祐中，游方南下，爰届中山，元戎王处直请住法华寺。相次易帅请之，太传陇西公连表荐赐紫方袍，加至真大师。次则扶风马公请为僧正，非所好也。及抵洛阳，有命开《法华经》讲，止法林院。况乎都阙浩穰，象龙辐凑，及照之唱导，翕如于下风伏膺矣。以乾祐元年三月二十六日，示灭于讲院，春秋七十，僧腊五十。四众号慕，侍中李公倾易定，曾为外护，复守洛宅，饰终丧礼，悉以资奉。粤四月三日迁神于城南，行茶毗法，收舍利，红润可数百粒。济阳丁公为保姚之鐸职，为树塔于广化之寺南岗。照平昔讲凡七十余座，勤勤为法。门生颇多。宰臣马公孙最所钦重，前后赠诗仅数十首，洛中为美谈矣。

○汉洛阳天宫寺从隐传（梦江）

释从隐，姓刘氏，洛阳三乡人也。？年敏慧，誓欲出尘，二亲既听，乃投本邑竹阁院，依师诵习，陶练灵府。寻于嵩阳受戒毕，就长水听采，才历数年，克通《百法》、《中观》、《弥陀》三经论焉。而諲师年老，深许隐之博达性相。后于洛布金院赴请敷演。至后唐清泰中，諲付讲座，日为众三登法席。夏中长暑，览《藏经》一帙，精进苦节，人无与伦。乾祐二年正月，示疾而终，俗寿五十三，僧腊三十二。

。乃依天竺法火化，收合真体，圆净堪爱，门人树塔，至今存焉。次有长水县县泉院释梦江者，姓杨氏，本邑人也。神彩洒落，超拔凡态，遂愿出家，恒诵《仁王》、《般若》。进具后讲《百法论》。清泰中龙门广化寺请为众开演，遇帝幸其寺宣问，妙辩天逸，悦可上心，时于御前赐紫袈裟，确乎不受。训导二十余年，讲罢行道礼佛，日唯一食。慈忍于物，罕逢愠色。周显德三年疾终，缙素悲慕，为其建塔矣。

○汉杭州龙兴寺宗季传

释宗季者，俗姓俞，临安人也。稚齿瑰伟，心志刚直。尝天震邻家树，季随僵仆，有姊尼抱就膝，视之曰：“此非震死，且有生候。”至夜未央，苏而复作，遂劝令出家，事欣平寺僧。后往衢州，投巨信论师，学名数论，文义淹详，且难诘伏，锋芒如也。迨回杭，龙兴寺召讲。时僧正蕴让给慧纵横，两面之敌也。与闾丘方远先生、江东罗隐为莫逆之交也，见而申问，季作二百语褒之，让正赏叹，遂请开讲，四十余年，出弟子七八百人。汉乾祐戊申岁，疾终于本房。初，季讲次遇一异人，作胡语，问西域未来之经论，一众惊然。季眇二目，曾夜行感神光引之，常览古师之述作曰：“可俯而窥也。”遂撰《永新钞》，释《般若心经》，《晖理钞》解《上生经》，《弥勒成佛经疏钞》、《补猷钞阙》，诸别行义章，可数十卷，并行于世。季道行孤僻，性情方正，寡言语，气貌高迈，誓不趋俗舍。暨老恳请亦罕赴白衣家。居唯屡空，衍然自任，而孜孜手不释卷，乐道向终。至今此宗越多，弟子讲导不泯焉。

○周魏府观音院智？传

释智？，姓张氏，铜台永济人也。九岁，于邺都临清王舍城寺事师。暨受具戒，身器挺然八尺，面色玉如，行步若舒雁，言音如扣钟。人望之凜然，僉曰：“美丈夫也。”恒诵诸经，昼三夜三，礼佛无阙。本师知其法器，遣往滑台，抵明福寺，就晖师讲肆。期月，顿见诸法体用，喜不自任。时晖之门生■勇杰干者数十员，皆出？之下。？睢阳人请讲，未久，又今东京遇信士舍宅为万岁百法院。由此洛京、陈、许、徐、宿、维、青、琴台咸乐请其敷演，自鸠聚檀？，前后饭僧三十万。天雄军戴、张、郭三家同建观音院，命居之。？敏利之性天资，初终讲《百法论》，可百许遍。登法座，多不临文，悬述辩给。后三过览《大藏经》，以辅见知。其诵讽经咒也，尝闻户外阒然有弹指声者，感鬼神赞叹欤！魏帅陈君思让笃志归依，表荐紫衣师，号曰归政。殆临八十一，而意学欧王书体，仅入能妙。或问之，曰：“吾习来生字耳。”显德五年，年八十三，呼弟子奉晏等嘱累，令造木舆一所，敛送阇维。至其年十一月十一日奄终，奉木塔，举高三丈余。纵燎时有白鹤哀鸣，紫云旋覆。收拾舍利，建塔殓焉。

○大宋秀州灵光寺皓端传

释皓端，姓张氏，嘉禾人也。九岁，舍家入灵光精舍，师授经法，如温旧业焉。年登弱冠，受形俱无表。于四明阿育王寺遇希觉律师，盛扬南山律，端则一听旋有通明，义门无壅。寻投金华云法师学名数一支并《法华经》。后受吴兴缙伍所请讲论焉。两浙武肃王钱氏召于王府罗汉寺演训，复令于真身塔寺宣导。于时有台教师玄烛者，彼宗号为第十祖，端依附之，果了一心三观，遂撰《金光明经随文释》十卷。由是两宗法要，一径路通。忠献王钱氏借赐紫衣，别署大德，号崇法焉。后誓约不出寺门，慕远公之不渡虎溪也。高尚其事，仅二十余年，身无长衣，口无丰味，居不施关，坐唯一榻。以建隆二年三月十八日，坐灭于本房，容貌犹生。三日，焚之于城西，得舍利于煨烬之末。俗年七十二，僧腊五十二，凡著述传录记赞七十许卷，学得其门者止八十余人。端性耿介，言无苟且。一坐之间不谈世论，唯以佛法为己务，可谓傅翼之象王矣。秘书监钱昱尝典秀郡，躬睹端之标格，为著《行录》焉。

○大宋东京天清寺傅章传

释傅章，俗姓彭氏，开封东明人也。厥父譔，即邑甸之上农也，尘务之外，正见不回，恒读佛经，悬解诠旨。母邢氏尝梦入法宇，手探道器，因而娠焉。与父知怀非常之子，指腹誓令出俗。年甫十一，乃礼本邑《唯识》师秘公为师，一见异之。初授《净名》、《仁王》、《法华》三经，及削发去周罗，随秘公游五台，礼文殊应迹之地。其年受具。为息慈日，便于浚郊清朗法师座下听习《法华经》。后于睢阳道雅法师重温前业，寻学《唯识》于本师，颇揭厉于义津法水。又亲附副僧录通慧《因明》，且臻其极章。日诵三经兼二戒本，讲贯训徒，向二十载，未尝少辍广顺中，左街僧录广智大师荐闻于周高祖，赐紫方袍。大宋乾德二年，左街僧录道深荐于太祖神德皇帝，赐师号曰义明。俄示疾而终于本院，春秋五十五，法岁三十六。未绝之前，命笔作偈警世，而赠诸朋执矣。所度弟子一十五人，以其年十一月十六日上京之南原，用荼毗之法，薪尽火灭，得舌且不灰，众叹戒德。门人檀信共立塔焉，则开宝五年也。先是厥父恒务《法华经》，终后焚之，亦舌不坏。子父同验，实为罕有。相国寺清慧大师彝炳为《塔铭》焉。

○大宋并州崇福寺佛山院继伦传

释继伦，姓曹氏，晋阳人也。弱齿而壮，其志勇，其心决，求出家。本师授《法华经》，日念三纸，时惊宿习。慧察过人，登戒之后，至年二十一，学通《法华经》，义理幽赜，《唯识》、《因明》二论，一览能讲。由是著述，其钞至今河东盛行。三讲恒一百五十余徒，从其道训。又撰《法华钞》三卷。其为人也，慈忍成性，戒范坚强，人望之而心服。以刘氏据有并汾，酷重其道，署号法宝，录右街僧事，宽猛相参，无敢违拒。以伪汉己巳岁冬十月示疾，心析口述愿生知足天。终后顶热半日方冷，则开宝二年也。享年五十二。阇维毕，淘获舍利，远近分取供养焉。

○大宋齐州开元寺义楚传（修进省伦）

释义楚，俗姓裴氏，祖相州安阳人也。楚七岁来省历下，临坛大德修进因为出家师也。进乃楚之诸父也。季父省伦居香严院。进也诵《观音普门支经》向十万遍，立礼《法华经》，字字各拜，拜且彻部焉。伦则青丘主宰，禅居诵《大悲》《佛顶》俱一亿遍。楚执柯伐木，熏习相资，登此近圆，勤学不懈，敏慧夙成，《俱舍》一宗，造微臻极。遂传讲圆晖《疏》十许遍。后该览《大藏》三遍，乃慨儒家为佛教之文而多谬解，解既谬欤，事多误用。拟白乐天《六帖》，纂释氏义理、文章、庶事、群品，以类相从，建其门目，总括大纲，计五十部。随事别列四百四十门，始从法王利见部，终师子兽类部，其间物类，检括周旋，令供笔之时必无告乏矣。一十年中，孜孜罔倦，起晋开运二年至显德元年毕，进呈，世宗敕付史馆，赐紫衣，仍加号明教大师。以开宝中终于龙兴伽蓝。俗寿七十四，法腊五十四。楚始谋此作，随得便书，裒多益寡，日居月诸，郁成编录。忽因本院门古石上有六帖二字，天然分明。睹此灵符，乃知宿定，搜今斡古，笔不停缀。时枢密相国王公朴为楚作序，冠于编首，今行于寰海矣。初，楚著述心亦劳止，而双目丧明，医工莫疗。遂冥心忏过，虑删碎教文，裁量差脱，如是虔虔更无间息，再岁还明，人谓其征感焉。

○大宋杭州慈光院晤恩传

释晤恩，字修已，姑苏常熟人也。姓路，母张氏尝梦梵僧入其家而妊焉。及稚孺，见沙门相，必起迎迟。年十三，闻诵《弥陀经》，遂求出家。亲党饶爱，再三沮之，乃投破山兴福寺受训。后唐长兴中受满分戒，登往昆山慧聚寺，学南山律。晋天福初，从携李皓端师听习经论，悬解之性天然，时辈辄难抗敌。后微闻天台三观六即之说，冥符意解。汉开运中，造钱唐慈光院志因师，讲贯弥年，通达《法华》、《光明经》、《止观论》，咸洞玄微。寻施覆述，出弟子相次角立。雍熙三年八月朔日，恩于中夜睹白光自井而出，明灭不恒，谓门人曰：“吾报龄极于此矣。”乃绝粒禁言，一心念佛。次梦拥纳沙门执金炉焚香，三绕其室，自言“祖师灌顶来此相迎，汝当去矣。”梦觉，呼弟子至，犹闻异香。至二十五日为弟子说止观旨归及观心义。辰时，端坐面西而化，享年七十五，僧腊五十五。其夜院僧有兴、文偃等皆闻空中丝竹嘹亮而无沚鼓，且多铃铎，渐久渐远，依？西去。迨九月九日，依西域法焚，获舍利青白圆粒无？。恩平时谨重，一食不离衣钵，不畜财宝，卧必右胁，坐必加趺。弟子辈设堂居，亦同今之禅室。立制严峻，日别亲视明相，方许净人施粥，曾有晚饮薯蕷汤者，即时摒出龕堂。每一布萨，则漉洒不止，盖思其大集满洲之言耳。偏诲人以弥陀净业救生死事，受教得生感祥可见者，往往有之。凡与人言，不问贤不肖，悉示以一乘圆意。或怪不逗机者，乃曰：“与作毒鼓之缘耳。”不喜杂交游，不好言世俗事。虽大人豪族，未尝辄问名居，况迂趋其门乎？先是天台宗教，会昌毁废，文义残缺。谈妙之辞，没名不显。恩寻绎十妙之始终，研核五重之旨趣，讲《大玄义》、《文句》、《止观》二十余周，解行兼明，目足双运。

使《法华》大旨全美流于代者，恩之力也。又嫌昔人科节与荆溪记不相符顺，因著《玄义》、《文句》、《止观》、《金光明》、《金铉论科》，总三十五帖，见行于世。吁，河汉中有鱼溯流而上者何？潜泳有所取故。恩公不宽乘戒而出弟子十有七人，求解而行行耳。

○大宋天台山螺溪传教院义寂传

释义寂字常照，姓胡氏，温州永嘉人也。母妊娠公日不喜荤血，生乃首蒙紫帽而诞焉。幼启二亲，坚求去俗，旋入开元伽蓝。师授《法华经》，期月而彻，寺之耆老称叹希有。受具已，往会稽学南山《钞》。既通律义，乃造天台山研寻止观，其所易解犹河南一遍照也。先是智者教迹，远则安史兵残，近则会昌焚毁，零编断简，本折枝摧，传者何凭？端正其学，寂思鸠集也。适金华古《藏》中得《净名疏》而已。后款告韶禅师，嘱人泛舟于日本国购获仅足。由是博闻多识。微寂，此宗学者几握半珠为家宝欤？遂于佛陇道尝国清寺相继讲训，今许王钱氏在两浙日，累请开演，私署净光大师并紫方袍，辞让不却，受而不称。及兴螺溪道场，四方学侣雾拥云屯。太平兴国五年，朝廷条贯缙伍经业，寂从山入州治寺，寺东楼安置。楼近大山，夜梦刹柱陷没于地，意颇恶之。自徙于西偏僧房，其夜春雨甚，山崩楼圯。人咸谓寂先见同修报得之眼焉。因受黄岩邑人请，乘舟泛江放生，讲《流水长者品》。至海门灵石，是智者冬居道场也，劝人修寺塑像，入缘者繁沓。今上遣高品卫绍钦入山重建寿昌寺也，诸官同命受菩萨戒。雍熙初，永安县请于光明寺受戒。古殿像隳，腹中获《发愿辞》，即唐咸通六年沙门希皎施戒，劝七乡人装塑尊像，愿舍报为男子，童真出家，常布褐传法利乐众生云。观者皆意寂之前身也。四年，临海、缙云、永康、东阳诸邑请其施戒。九月，寂至自太末，十月，寝疾本院方丈。十一月四日，嘱诫门人：“不许哭泣祭奠。应缘俗礼者，非吾弟子也。”即窆于方丈，树小塔焉。享年六十九，法腊五十矣。四方传法弟子见星而舍者数百人。寂平素讲《法华经》并《玄义》，共二十许座，《光明》、《净名》、《梵网》等经、《止观》、《金铉》等论、《法界》、《还源》等观、《禅源诠》、《永嘉集》各数遍，所著《止观义例》、《法华十妙不二门科节》数卷。自智者捐世，六代传法湛然师之后，二百余龄，寂受遗寄，最克负荷，其如炎蒸讲贯而无汗之沾洽，曾不久听而胜解佛乘。每一谈扬，则扞从金玉应，召羽商和，彼九旬说妙，相去几何？又尝寓四明育王寺，梦登国清寺上方，有宝庄严幢座，题曰文殊台，设询？阌隔，求入无由。俄睹观音菩萨从堂徐出，以手攘却行马，低迂相接。斯须，觉已与观音身混合不分，因而惊寤。自是之来，乐说无尽矣。或曰：“入普门智，乘利物悲，上合佛觉，证无上故。下合众生，凡同体故。开则群灵混成一法，得是心者，非观音而谁欤？”是以讲谈也，施戒也，自甌越之乡迨三天子障，民多稽戾，俗尚畋猎。受寂之训也，咸食樵革音，说法之功，所谓善建。由是堂室间可见者，曰澄或，曰宝翔，曰义通。及乎台之民庶，曾受戒法，迎真相来州治开元寺祭飨，皆缟素哀泣，天为之变惨，其慈摄之所感。知州郑公元龟为诗悲悼焉。

论曰：玄默垂文，圣人俯察。河雒之流有告，图书之法作程，禹受斯符，乃为经纬，本六十余字，训第表明，号《洪范》以开章，得彝伦而侦叙。帝王之法粲然可观，祖述之家翕尔宗此。我之佛道可弗然耶？教自西传，若龟马之文乍辩；声由此盛，如夏商之美惟扬。及其讲训相资，签笈互出，因分异辙，各竞颞门，施巧智之莫京，致慧心之悬合。宜乎得正信者必开正眼，见正道者必事正修，倒本前因，则以决择为主。原夫能诠之教喻图书也，所诠之理喻训第也，经容纬入，纬变经存，令表显之名言，从体义之相（去声）杂。《唯识》金推于护法，成即司南；《婆沙》奄有于余师，说同衍字。良以各迷己见，皆未极成，正不正之说恢张，玄又玄之谈崛起。大抵无名相法作名相说，非如色法影质易寻。名色交加，喜生迷竞。又以言存一意，义止一途，随情取舍之时，未为允当，随转理门之处，盖涉无文。加复教有弛张，意关详略，讨寻者非英明而莫悟，承领者非行位而那知？在人亡书，以教为折中。故论中以四种征理，理则难隐，一观待，二作用，三法尔，四证成。用斯道理，义岂惑乎？譬如甲氏背人而去，有二三子相问曰：“彼去者谁邪？”一云“乙也”。一云“丙也”。此俱未是。彼有识人云“甲也”。回面视之，是甲非乙。由其不识，遂有多名，识者一呼，应声而至。亲得自体，不涉异缘，故曰精义无二也。因义生解，解必虚通，除其执情，令生正解，断其迷执。执情断，故所执便遣。既能生解，则断障。二重断染，依他清浄，依他圆成，故得二胜果焉。不然者，认相似法，堕恶取空，曳曲木于稠林，泛胶舟于苦海，又不可胜道也。《瑜伽论》中契经体有二，一文二义。文是所依，义是能依。如是二种，总名一切所知境界也。夫以能化之教已翻，所诠之理难悟，苟非宿慧，安喻经心？宿慧当多世之熏，方能生起；经心乃大雄之意，岂易寻求？谚所谓老见事长，佛已三癯之扬历；多言或中，法从诸圣之同宣。岂得以夏虫共论其凌渤，井鱼互谈其渤遯？此诚不可也。必须近佛菩萨，善慧法师，四无碍居游戏之中，八辩音演自他之利。只如天亲大士将世尊之一言，中道圆宗成诸法之五位，如龙带涓滴而起为雨，望苗稼而施。又同《命包》作纬于《春秋》，《凿度》为资于《大易》，此皆善其通变，能其揣摩，以利根而教钝根，以正见而诱邪见，都称为摩诃般特伽也。西域蒲塞治家子以为裘，此方俊才鬻乳人而加水。成裘则易，以日见而留心；免水则难，以传来而隔手。昔以讲人论法，造疏寻宗，用成实法数之名，补大乘阙员之义。其有解法名目，随人见知，未融六释之端，何暇三隅之反？至若黎邪是报非报，化人有心无心，和合怖数之徒，闻熏灭不灭等百有余科，并《三藏》、《四含》之盘根，大小两宗之铃键，先贤之所不决，令哲之所共疑，但谓阙如，所知成障。及乎樊师西复，梵本东传，富《瑜伽》之宝林，开《唯识》之渊府，摩诃衍足杀三摩，明名数均著作之家，立破定是非之量。深山大泽，必生龙蛇，有大乘基为其高足。不缘宿习，多见生知，谓之义天，则明星有烂，谓之理窟，则善闭无关。堂堂合《周髀》之仪，轧轧应昆仑之轴。有经皆讲，无疏不成，权奇百本之名，控压四人之圣。复次光也宝也，测乎沼乎，章句之学颇长，释签之理何富！世茂《珠林》，迈编《图纪》，规附量度于鲸海，尚缀文荣于玉华，究《三论》极乎瑗康，穷《方等》归乎楷景。观公撰集《华严》，命章解相入之连环，且无难色；通绝行之断阁，故立易功。法藏从性海而游，智升自名流而出。伟欤一行，所作通神，实僧相之法王，乃人形之菩萨。

。忠、胤、琳、甫、贵、秀、诜、真，俱参译判经，尽开叶辟土。于烁宗密，美乎湛然，悟达全才，彻公令范，可以副人之求备哉！余诸上士，擅美殊方，落落英翹，互有长短。矧以佛之说经，申经者论；经由论显，论待疏通；疏总义章，义从师述。况以隔罗酆者见犹未尽，大遍知者知方得全。射侯之矢易疏，诊脉之求难中。若非亲证亲说，得自体之分明，载驱载驰，妄他求之溱暖，如摄异门分，羌别之相难知。故《智论》中吾灭度后，所有撰集者皆为《论》、《藏》摄也。俱作导师，指迷人之归路；悉衔明烛，照暗室之绩工。动戒足以行之，入定门而安矣。盖缠克断，智慧成功，咸从生死之河，尽度

涅槃之岸，此始可与言从闻且思，思至而修证大圆寂者。过此以往未知，执名滞义，问欲何为？故曰：“精义入神，以致用也。”既有所用，则舍筌蹄而直造佛地，此则深于其道者也。

卷八

◎习禅篇第三之一（正传十五人附见三人）○唐蕲州东山弘忍传

释弘忍，姓周氏，家寓淮左浔阳，一云黄梅人也。王父暨考，皆干名不利，责于丘园。其母始娠，移月而光照庭室，终夕若昼。其生也灼烁如初，异香袭人，举家欣骇。迨能言，辞气与邻儿弗类。既成童？，绝其游弄。厥父偏爱，因令诵书，无记应阻其宿熏，真心早萌其成现。一旦出门，徙倚间如有所待，时东山信禅师邂逅至焉。问之曰：“何姓名乎？”对问朗畅，区别有归，理逐言分，声随响答。信师熟视之，叹曰：“此非凡童也！具体占之，止阙七大人之相，不及佛矣。苟预法流，二十年后必大作佛事，胜任荷寄。”乃遣人随其归舍，具告所亲，喻之出家。父母忻然，乃曰：“禅师佛法大龙，光被远迩，缙门俊秀，归者如云。岂伊小呆，那堪击训，若垂虚受，固无留吝。”时年七岁也。至双峰，习乎僧业，不遑艰辛。夜则敛容而坐，恬澹自居。洎受形俱，戒检精厉。信每以顿渐之旨，日省月试之。忍闻言察理，触事忘情，哑正受尘渴方饮水如也。信知其可教，悉以其道授之。复命建浮图，功毕，密付法衣以为质要。将知斲雪山之肥膩，构作醍醐；踞海底之金刚，栖倾巨树。拥纳之侣麇至蝉联，商人不入于化城，贫女大开于宝藏，入其趣者号东山法门欤。以高宗上元二年十月二十三日告灭，报龄七十有四。是日氛雾冥暗，山石崩圯。门弟子神秀等奉瘞全身于东山之岗也。初，忍于咸亨初命二三禅子各言其志，神秀先出偈，惠能和焉。乃以法服付慧能，受衣化于韶阳。神秀传法荆门、洛下，南北之宗自兹始矣。又信禅师尝于九江遥望双峰，见紫云如盖，下有白气，横开六歧。信谓忍曰：“汝知之乎？”曰：“师之法旁出一枝，相踵六世。”信甚然之。及法融化金陵牛头山，貽厥孙谋，至于慧忠凡六人，号牛头六祖，此则四祖法又分枝矣。然融望忍则庶孽耳，安可匹嫡乎？开元中，太子文学闾丘均为《塔碑》焉。代宗敕谥大满禅师，塔曰法雨也。蕲春自唐季割属偏霸，暨开宝乙亥岁王师平江南之前，忍肉身堕泪如血珠焉。僧徒不测，乃李氏国亡之应也。今每岁孟冬，州人邻邑奔集作忌斋，犹成繁盛矣。其讳日将近，必雨雾阴惨，不然霰雪交霏，至日则晴朗焉。

○唐韶州今南华寺慧能传

释慧能，姓卢氏，南海新兴人也，其本世居范阳。厥考讳行？，武德中流于新州百姓，终于贬所。略述家系，避卢亭岛夷之不敏也。贞观十二年戊戌岁生能也，纯淑迂怀，惠性间出。虽蛮风諠俗，渍染不深，而诡行么形，驳杂难测。父既少失，母且寡居，家亦屡空，业无腴产。能负薪矣，日售荷担。偶闻麀肆间诵《金刚般若经》，能凝神属垣，迟迟不去，问曰：“谁边受学此经？”曰：“从蕲州黄梅冯茂山忍禅师劝持此法，云即得见性成佛也。”能闻是说。若渴夫之饮寒浆也，忙归，备所须留奉亲老。咸亨中，往韶阳，遇刘志略。略有姑无尽藏，恒读《涅槃经》。能听之，即为尼辨析中义。怪能不识文字，乃曰：“诸佛理论，若取文字，非佛意也

。”尼深叹服，号为行者。有劝于宝林古寺修道，自谓已曰：“本誓求师，而贪住寺取乎道也，何异却行归舍乎？”明日遂行，至乐昌县西石窟，依附智远禅师，侍座谈玄。远曰：“行者迨非凡常之见龙，吾不知，吾不知之甚矣！劝往蕲春五祖所印证去，‘吾终于下风请教也。’”未几造焉，忍师睹能气貌不扬，试之曰：“汝从何至？”对曰：“岭表来参礼，唯求作佛。”忍曰：“岭南人无佛性。”能曰：“人有南北，佛性无南北。”曰：“汝作何功德？”曰：“愿竭力抱石而舂，供众而已。”如是劳乎井臼，率净人而在先；了彼死生，与涅槃而平等。忍虽均养，心何辨知？俾秀唱予，致能知汝。偈辞在壁，见解分歧，揭厉不同，浅深斯别。忍密以法衣寄托曰：“古我先师转相付授，岂徒尔哉。呜呼！后世受吾衣者命若悬丝，小子识之。”能计回生地，隐于四会、怀集之间，渐露锋颖。就南海印宗法师《涅槃》盛集，论风幡之语，印宗辞屈而神伏，乃为其削椎髻于法性寺，智光律师边受满分戒，所登之坛即南宋朝求那跋摩三藏之所筑也。跋摩已登果位，悬记云：“后有肉身菩萨于斯受戒。”又梁末真谛三藏于坛之畔手植菩提树，谓众曰：“种此而后一百二十年，有开士于其下说无上乘，度无量众。”至是能爰宅于兹，果于树阴开东山法门，皆符前讖也。上元中，正演畅宗风，惨然不悦。大众问曰：“胡无情绪耶？”曰：“迁流不息，生灭无常，吾师今归寂矣！凶赴至而信。乃移住宝林寺焉。时刺史韦据命出大梵寺，苦辞，入双峰曹侯溪矣。大龙倏起，飞雨泽以均施；品物攸滋，逐根糗而受益。五纳之客拥塞于门，四部之宾围绕其座。时宣秘偈，或举契经，一切普熏，咸闻象藏；一时登富，悉握蛇珠；皆由径途，尽归圆极，所以天下言禅道者以曹溪为口实矣。泊乎九重下听，万里悬心，思布露而奉迎，欲归依而适愿。武太后、孝和皇帝咸降玺书，诏赴京阙，盖神秀禅师之奏举也。续遣中官薛简往诏，复谢病不起。子牟之心敢忘凤阙，远公之足不过虎溪，固以此辞，非邀君也。遂赐摩纳，袈裟一缘、钵一口、编珠织成经巾、绿质红晕花绵巾、绢五百匹，充供养云。又舍新兴旧宅为国恩寺焉。神龙三年，敕韶州可修能所居寺佛殿并方丈，务从严饰，赐改额曰法泉也。延和元年七月，命弟子于国恩寺建浮图一所，促令速就。以先天二年八月三日俄然示疾，异香满室，白虹属地，饭食讫，沐浴更衣，弹指不绝，气微目冥，全身永谢。尔时山石倾堕，川源息枯，鸟连韵以哀啼，猿断肠而叫咽。或唱言曰：“世间眼灭，吾畴依乎！春秋七十六矣，以其年十一月迁座于曹溪之原也。弟子神会若颜子之于孔门也，勤勤付嘱，语在《会传》。会于洛阳荷泽寺崇树能之真堂。兵部侍郎宋鼎为碑焉。会序宗脉，从如来下西域诸祖外，震且凡六祖，尽图绩其影。太尉房琯作《六叶图序》。又以能端形不散，如入禅定，后加漆布矣。复次蜀僧方辩塑小样真，肖同畴昔。能曾言：“吾灭后有善心男子必取吾元，汝曹勿怪。”或忆是言，加铁环缠颈焉。开元十一年，果有汝州人受新罗客购，潜施刃其元，欲函归海东供养。有闻击铁声而擒之。其塔下葆藏屈髻，布郁多罗僧，其色青黑碧缣复袷，非人间所有物也。屡经盗去，迷倒却行而还褫之。至德中，神会遣弟子进平送牙痒和一柄，朝达名公所重，有若宋之问谒能，著长篇。有若张燕公说寄香十斤并诗，附武平一至，诗云：“大师捐世去，空留法身在！愿寄无碍香，随心到南海。”武公因门人怀让铸巨钟，为撰《铭赞》，宋之问书。次广州节度宋规来礼其塔，问弟子令韬无生法忍义。宋公闻法欢喜，向塔乞示征祥。

须臾，微风渐起，异香？人，阴雨霏霏，只周一寺耳。稍多奇瑞，追繁不录。后肃宗下诏能弟子令韬，韬称疾不赴，遣明象赍传法衣钵进呈毕，给还。宪宗皇帝追谥曰大鉴，塔曰元和正真也。迨大唐季刘氏称制番禺，每遇上元烧灯，迎真身入城，为民祈福。大宋平南海后，韶州盗周思琼叛换，尽焚其寺，塔将延燎平时肉身，非数夫莫举，烟赳向逼，二僧对舁，轻如夹衲像焉。太平兴国三年，今上敕重建塔，改为南华寺矣。

系曰：五祖自何而识一介白衣，便付衣耶？通曰：“一言知心，更无疑罚况复记心轮间如指之掌。”忍师施一味法，何以在家受衣钵乎？秀师则否。通曰：“是法宁选缁白？得者则传。周封诸侯，乃分分器，同姓异姓别也。以祖师甄别精粗，以衣为信。譬如三力士射坚洛叉，一摩健那射则中而不破；二钵罗塞建提破而不度；三那罗延箭度而复穿余物也。非坚洛叉有强弱，但由射势力不同耳。南能可谓那罗延射而获赏焉。”信衣至能不传，莫同夏禹之家天下乎？通曰：“忍言受传衣者，命若悬丝，如是忍之意也。又会也禀祖法则有余，行化行则不足。故后致均部之流，方验能师之先觉，不传无私吝之咎矣。故曰知人则哲也，吁1

○唐荆州当阳山度门寺神秀传

释神秀，俗姓李氏，今东京尉氏人也。少览经史，博综多闻。既而奋志出尘，剃染受法。后遇蕲州双峰东山寺五祖忍师，以坐禅为务，乃叹伏曰：“此真吾师也。”决心苦节，以樵汲自役而求其道。昔魏末有天竺沙门达磨者，得禅宗妙法，自释迦佛相传，授以衣钵为记，世相传付，航海而来。梁武帝问以有为之事，达磨贵传径门心要，机教相乖，若水投石。乃之魏，隐于嵩丘少林寺，寻卒。其年魏使宋云于葱岭见之。门徒发其冢，但有衣履而已。以法付慧可，可付粲，粲付道信，信付忍。忍与信俱住东山，故谓其法为东山法门。秀既事忍，忍默识之，深加器重，谓人曰：“吾度人多矣，至于悬解圆照，无先汝者。”忍于上元中卒，秀乃往江陵当阳山居焉。四海缁徒，向风而靡，道誉馨香，普蒙熏灼。则天太后闻之，召赴都，肩舆上殿，亲加跪礼。内道场丰其供施，时时问道。敕于昔住山置度门寺，以旌其德。时王公已下，京邑士庶竞至礼谒，望尘拜伏，日有万计。洎中宗孝和帝即位，尤加宠重。中书令张说尝问法，执弟子礼，退谓人曰：“禅师身長八尺脰眉秀目，威德巍巍，王霸之器也。”初，秀同学能禅师与之德行相埒，互得发扬无私于道也。尝奏天后请追能赴都，能恳而固辞。秀又自作尺牋，序帝意征之，终不能起，谓使者曰：“吾形不扬，北土之人见斯短陋，或不重法。又先师记吾以岭南有缘，且不可违也。”了不度大庾岭而终。天下散传其道，谓秀宗为北，能宗为南。南北二宗，名从此起。秀以神龙二年卒，士庶皆来送葬，诏赐谥曰大通禅师。又于相王旧邸造报恩寺，岐王范燕国公张说、征士卢鸿各为碑诔。服师丧者，名士达官不可胜纪。门人普寂、义福并为朝野所重，盖宗先师之道也。

系曰：夫甘苦相倾，气味殊致。甘不胜苦则纯苦乘时，苦不胜甘则纯甘用事，如是

则为药治病，偏重必离也。昔者达磨没而微言绝，五祖丧而大义乖，秀也拂拭以明心，能也俱非而唱道。及乎流化北方，尚修练之勤；从是分歧南服，兴顿门之说。由兹荷泽行于中土。以顿门隔修练之烦，未移磐石；将弦促象韦之音，空费躁心。致令各亲其亲，同党其党，故有卢奕之弹奏，神会之徙迁，伊盖施疗专其一味之咎也。遂见甘苦相倾之验矣。理病未效，乖竞先成。只宜为法重人，何至因人损法。二弟子濯击师足，洗垢未遑，折脛斯见，其是之喻欤。

○唐袁州蒙山慧明传

释慧明，姓陈氏，鄱阳人也，本陈宣帝之孙，国亡散为编管矣。明少出家于永昌寺，怀道颇切，扣双峰之法。高宗之世，依忍禅师法席，极意研寻，初无证悟，若丧家之犬焉。忽闻五祖密付衣钵与卢居士，率同意数十许人蹑迹急追，至大庾岭，明最先见，余辈未及。能祖见已，便掷袈裟，明曰：“我来为法，非望衣钵也。”时能祖便于岭首一向指订，明皆洞达，悲喜交至，问能曰：“某宜何往？”能记之曰：“遇蒙当居，逢袁可止。”明再拜而去，便更其名，以旧云道明也。下岭，给诸僧曰：“向陟崔嵬，远望杳无踪迹。”僧即退转。一说，居士掷衣钵于磐石曰：“此衣为信，岂可力争邪？任君拈去。”明遂手掀，如负钧石，而无举分，拱立舍旃，则咸亨四年也。以明未舍家曾署诸卫，故有“将军”之号矣。宜春太守秦琢奏谥号焉。

○唐洛京荷泽寺神会传

释神会，姓高，襄阳人也。年方幼学，厥性惇明，从师传授《五经》，克通幽赜。次寻《庄》、《老》，灵府廓然。览《后汉书》，知浮图之说。由是于释教留神，乃无仕进之意，辞亲投本府国昌寺颢元法师下出家。其讽诵群经，易同反掌。全大律仪，匪贪讲贯。闻岭表曹侯溪慧能禅师盛扬法道，学者骏奔，乃辍善财南方参问，裂裳裹足，以千里为跬步之间耳。及见，能问会曰：“从何所来？”答曰：“无所从来。”能曰：“汝不归去？”答曰：“一无所归。”能曰：“汝太茫茫。”答曰：“身缘在路。”能曰：“由自未到。”答曰：“今已得到，且无滞留。”居曹溪数载，后遍寻名迹。开元八年，敕配住南阳龙兴寺。续于洛阳大行禅法，声彩发挥。先是，两京之间皆宗神秀，若不■之鱼鲋附沼龙也。从见会明心六祖之风，荡其渐修之道矣。南北二宗时始判焉，致普寂之门盈而后虚。天宝中，御史卢弈阿比于寂，诬奏会聚徒疑萌不利。玄宗召赴京，时驾幸昭应汤池，得对言理允惬，敕移往均部。二年，敕徙荆州开元寺般若院住焉。十四年，范阳安禄山举兵内向，两京版荡，驾幸巴蜀。副元帅郭子仪率兵平殄，然于飞挽索然。用右仆射裴冕权计，大府各置戒坛度僧，僧税缗谓之香水钱，聚是以助军须。初洛都先陷，会越在草莽，时卢弈为贼所戮，群议乃请会主其坛度。于时寺宇宫观，鞠为灰烬，乃权创一院，悉资苦盖，而中筑方坛，所获财帛顿支军费。代宗、郭子仪收复两京，会之济用颇有力焉。肃宗皇帝诏入内供养，敕将作大匠并功齐力，为造禅宇于荷泽寺中是也。

会之敷演，显发能祖之宗风，使秀之门寂寞矣。上元元年，嘱别门人，避座望空，顶礼归方丈，其夜示灭。受生九十三岁矣，即建午月十三日也。迁塔于洛阳宝应寺，敕谥大师曰真宗，塔号般若焉。

系曰：“修其教不易其俗，齐其政不易其宜者。贵其渐也。会师自南徂北，行曹溪之法，洛中弥盛，如能不自异，外护已成，则可矣。况乎旁无力轮，人之多僻，欲无放逐，其可得乎？或曰：“其过不多，何遽是乎？”通曰：“犯时之忌，罪不在大。失其所适，过不在深。后之观此，急知时事欤？是以佛万劫学化行者，知化行难耳。无令固已而损法，慎之哉！”

○唐润州竹林寺昙璀传

释昙璀，俗姓顾氏，吴郡人也。肇国著姓，其来弥光。丞相有佐命之勋，尚书有挺济之誉。衣冠鼎胄，太岳峻岱峰之高；令问徽猷，江汉为南国之纪。星象降精，灵耀效祉，德备胎教，香符梦征。玄圭应上圣之祥，神宝蓄河汾之气。特受异准，生而不凡，襁褓之日而童蒙来求，佩褱之时而忘身殉道。和敏而纯素，温恭而克明，神器夙昭，清风渐扇。遂勉节出尘，栖心物表，金经秘藏，一日万言，不逾岁叙，而大经淹通。遂于晚年缅怀宗匠，始事牛头山融大师。融醇鹑瑰雄，东夏之达磨欤！梵幢宝柱，大海津梁，目以上根，乃诲之曰：“色声为无生之鸩毒，受想是至人之坑阱。致远多泥，子不务乎？”璀默而审之，直轸独上，咀甘露味，饮蒲萄浆，犹金翅不食异类，帝释无共鬼居。乃晦迹钟山，断其漏习，养金刚定，趣大能位，纳衣空林，多历年所。时淮南导首广陵觉禅师、江左名德建业如法师，咸杖锡方来，降心义体，握珠怀宝，虚往实归。则天皇母临朝，龚行佛事，高其道业，周勤诏书。时栖霞约法师，梵门之秀杰，躬以敦劝朝天，抗诏皇明，恐未然也。璀曰：“支伯辞帝舜之师，干木谢文侯之命，玄畅以善论而抗宋主，惠远不下山而傲齐后，彼何人哉！”由是遁北阜，逾东岗，考？云冥，后止于竹林之玃，葺宇籛缶而告老焉。既而绍列圣之鸿徽，继前贤之能事，翼亮皇梵，保宁天人。俄端然入定，七日而灭，春秋六十二。是岁天授三年二月六日也。翌日，依天竺法火化，遗骸收灰建塔，土庶含酸，悉皆号恸。门弟子僧感、僧君页等刻石纪事，奉全师礼。正议大夫使持节润州刺史汝南郡升向风遐想，悦而久之，褒德尚贤，赞成厥美焉。

○唐金陵延祚寺法持传

释法持，俗姓张氏，润州江宁人也。仪貌邕肃，肤体至润，幼而弃俗，长事明师，天机内发，识浪外澄。年十三，闻黄梅忍大师，特往礼谒，蒙示法要，领解幽玄。后归青山，重事方禅师，更明宗极，命其入室，传灯继明，绍迹山门，大宣道化。方既出山，凡是学众，咸悉从其咨禀心要，声价腾远，海内闻知。数年之中，四部依慕。时黄梅谢缘去世，谓弟子玄赜曰：“后传吾法者可有十人，金陵法持即其一也。”是知两处禅宗重代相袭。后以法眼付门人智威。长安二年九月五日，终于延

祚寺，遗嘱令露骸松下，饲诸禽兽，令得饮食血肉者发菩提心。其日空中有神幡数首从西而来，绕山数转，众人咸见。先居幽栖故院，竹林变白。报龄六十有八矣。

○唐越州云门寺道亮传

释道亮，姓朱氏，越州人也。厥考前刺会稽郡。亮年八岁出家，极通经业。受具后学河中《三论》，复讲《涅槃经》。寻入深谷，破衣覆形，蔬食资命，不交俗务，直守童真。神龙元年，孝和皇帝诏亮与法席宗师十人，入长乐大内坐夏安居。时帝命受菩萨戒。睿宗及妃后送异锦衾毡席。二年，诏于西园问道，朝廷钦贵。大都督李孝逸、工部尚书张锡、国子监周业、崔融、秘书监贺知章、睦州刺史康诜，同心慕仰，请问禅心，多结师资，或传香火。卒年八十二，门人慧远等建塔，万齐融为《铭》纪述。

○唐荆州碧涧寺道俊传

释道俊，江陵人也。住枝江碧涧精舍，修东山无生法门，即信、忍二祖号其所化之法也。勤洁苦行，迹不出寺，经四十余载。室迕人远，莫敢请谒者，唯事杜默。如是声闻于天，天后、中宗二朝崇重高行之僧，俊同恒景，应诏入内供养。至景龙中求还故乡，帝赐御制诗，并奘，景同归枝江，卒于本寺焉。

○唐温州龙兴寺玄觉传

释玄觉，字明道，俗姓戴氏，汉末祖侃公第五、燕公九代孙讳烈渡江，乃为永嘉人也。簪角出家，韶年剃发，心源本净，智印全文，测不可思，解甚深义。我与无我，恒常固知。空与不空，具足皆见。既离四病，亦服三衣。德水沐其身，所以清淨，良药治其眼，所以光明。兄宣法师者，亦名僧也，并犹子二人，并预缁伍。觉本住龙兴寺，一门归信，连影精勤，定根确乎不移，疑树忽焉自坏。都捐我相，不污客尘。睹其寺旁别有胜境，遂于岩下自构禅。庵沧海荡其胸，青山拱其背，蓬莱仙客，岁月往还；华盖烟云，晨昏交集。粤若功德成就，佛宝郁兴；神钟震来，妙屋化出。觉居其间也，丝不以衣，耕不以食，岂伊庄子大布为裳，自有阿难甘露作饭。觉以独学孤陋，三人有师，与东阳策禅师肩随，游方询道，谒韶阳能禅师而得旨焉。或曰：“觉振锡绕庵答对”，语在别录。至若神秀门庭，遐征问法，然终得心于曹溪耳。既决所疑，能留一宿，号曰一宿觉，犹半遍清也。以先天二年十月十七日于龙兴别院端坐入定，怡然不动。僧侣悲号，以其年十一月十三日殡于西山之阳，春秋四十九。初觉未亡前，禁足于西岩，望所住寺喟然叹曰：“人物骈阗，花舆翦蔚，何用之为！其门人吴兴兴师、新罗国宣师数人同闻，皆莫测之。寻而述之曰：‘昔有一禅师，将诸弟子游赏之次，远望一山，忽而唱曰：‘人物多矣。’弟子亦不测，后匪久此师舍寿，殡所望地也。’”西山去寺里有余程，送殡繁拥，人物沸

腾，其感动也若此。又未终前，有舒雁千余飞于寺西，侍人曰：“此将何来？”空中有声云：“为师墓所，故从海出也。”弟子惠操、惠特、等慈、玄寂，皆传师之法，为时所推。后李北海邕为守括州，遂列觉行录为《碑》，号神道焉。觉唱道著明，修证悟入，庆州刺史魏靖都绢缀之，号永嘉集是也。初觉与左溪朗公为道契，朗贻书招觉山栖，觉由是念朗之滞见于山，拘情于讲，回书激劝，其辞婉靡，其理明白。俾其山世一如，喧静互用，趣入之意，暗谕于是，达者赅之。终，敕谥号无相，塔曰净光焉。

○唐金陵天保寺智威传（本净）

释智威，俗姓陈氏，江宁人也。住近青山，地盘嘉气，善符宿瑞，维岳降神。爰在童年，器殊众识，至于戏弄，曾不染俗。性恶浮饰，人皆异焉。无何一朝，忽失其所，父母莫知攸往，乃遍历诸寺寻访之，威已依天保寺统法师。诵大乘经，早数百纸，聪敏超伦，众咸叹服。年二十，遇恩剃落，隶名于幽岩寺，因从持禅师谘请禅法，妙达深理，继踵前修。既获髻珠，淡然闲放，形容温润，面如满月，言辞清雅，慧德兰芳。望重一期，声闻远近，江左定学往往造焉。其中顿悟心源，即慧忠禅师，乃命嗣山门，盛传道化。威自出止延祚寺，说法利人，广施饶益。以开元十年二月十八日，终于住寺，遗嘱林中饲鸟兽，弟子玄挺等依言奉行。春秋七十七。威一时夜行头陀，将值天晓，有三虎遇之。威截路中过，了无怖色。虎随至山门，四顾而去。每有二兔一犬庭际游戏，各无间畏。盖大悲平等，物我一均，故其然也。次司空山释本净，姓张氏，东平人也。少入空门，高其节操。游方见曹溪六祖，决了疑滞，开元初于南岳司空山闲放自处，人不我知，蔽伪之故也。天宝中因扬庭光采药，邂逅相逢，论道终日，回奏，诏赴京，于白莲华亭安置。帝知佛法幽深，孰堪商擢，敕召太平寺远法师及两街三学硕德，发问锋起，若百矢之逐一兔焉。净举措容与，四面枝梧，譬墨翟之解九攻机械矣。既而辩若建瓴，褒抗之余，乃引了义教授证。复说伽陀，一无留滞。皇情怿悦，观者叹嗟。以上元二年五月五日归寂，寿龄九十五。敕谥大晓禅师，亦带所居为名，曰司空山禅师也。

○唐睦州龙兴寺慧朗传（瓢公）

释慧朗，新定遂安人也。年二十有二，于衢州北山遇南宗顿教之首，将请为师，乃逆相谓曰：“汝久积净业，吾非汝师，可往天台，当逢哲匠。”至剡溪石城寺见一禅翁，莫知其来，鹤发冰肤，目如流电，声含钟律，神合太虚。乃问朗曰：“子将何之？”答曰：“欲往天台，求佛大法。”因同行十数里，憩林树下，而指训之曰：“法常寂然，彼亦如也。何必适远，当化有缘，宜归本生，度无量众。”言毕，求之无方，豁然本心悟佛知见，林栖谷饮，凡经数载，乃却归故邑慧安寺。净名白衣，服非法服，纯陀工巧，心如佛心。骊珠尚潜，师子未吼，弱丧之终，涉川迷津。一日，秦望山林岭振动，俄有大龟呈质，咸相谓言“此何祥也”？寻有禅僧曰，自会稽云门而来，身長八尺四寸，高鼻大目，睛光射人，明《大品》、《思益》、

《维摩》等经，兼博通诸论。众曰：“神僧也，大龟应乎此也。”朗秘菩萨行，请之为师。征《维摩经》义，答曰：“如日照萤火海沃牛迹耳。”公深器之曰：“真净名也。”景龙中，乡人吴川县尉余少兴、宗党新昌县令余仁等十数家咸共宗事，递请降临。一夕，忽睹神光从项而出，旁烛山川，盈十数里，含情之类罔不归依。公加师资之礼，由兹反拜，请朗登座。乃先示法身遍同群有，次明遍化一切皆如。道俗欣然而各叹曰：“昔山之震动，龟之鰐祥，非公之应明矣。”至是四方学禅观者臻萃。开元四年，本州牧李思绚于龙山之阳建伽蓝，延以居之。方大设戒坛，广邀律德，有光州岸公、会稽超公而为上首。既而发希有心，受具足戒，珠圆月满，内外俱明，遍临坛为戒师，旋请益为学士，众情加重，道在益尊。七年，刺史韦利器深心归向。八年，歙州长史许思恭请往治所。朗升法座，无何熊伏于前，闻钟而来，众散而去。时皆惊惧，虞其搏攫。原其有听法之心耳，其驯猛兽也若此。十三年九月二十一日，告门人曰：“吾将去矣。吾三生此州，今一生矣。”言讫，俨然而寂，春秋六十四。禀遗命荼毗建塔。学者既多颖脱，则开元寺道饮、慧祐、道禅、龙兴寺、海、宁国寺、进玉、越州宝林寺有沛、远整杭州竹林寺一行等，并传朗之法，相继若瓜瓞然。至大历十二年，新定太守萧定述《碑》，司马刘长卿书，刺史李揆篆额，所谓俱是名公，盛夸全美有矣。

○唐郢州安国院巨方传（智封）

释巨方，姓曹氏，安陆人也。弱龄干节立身，从师稟业于州治明福院朗禅师，而听诵《法华》、《维摩》二经，功毕受具。讲述南宗论数席，即拂衣而起。禅会必参，后造北宗秀公所，锐精稽考，一见默许之。秀问曰：“白云散处如何？”曰：“不昧也。”又问：“到此间后如何？”曰：“正见一枝生五叶。”秀颌之。数载之间，入室侍对，庶几真道，罕有伦？。乃辞观方，至上党寒领而居。积稔之间，学徒数百，求请无阻。凡所提唱，真妄同源，迟速异剂，得心助道，在乎修治，大较如此。郢帅吴文涣侍中钦慕其风，遣使请归府建安国院。传法化徒，尚祖风者不离于席，顿悟多矣。郢帅问曰：“今日后如何？”答云：“地布金沙，人安宝刹。”吴帅信伏。因兹一府军民，咸加宗仰。吴氏家无少长，重若神明，檀施丰厚。方后于五台山道化，涉二十余载。入灭时告众曰：“吾齿尽于此矣。”言讫长逝，春秋八十一。以开元十五年九月三日，全身入塔云。次河中府安国院释智封，姓吴氏，怀安人也。中年学道，励操谨躬，行头陀之行，卯食之后，水浆不度齿焉。于本州清静寺恒法师下落发受具，综习《惟识论》。或人所诘，责之以滞于名相。愤发罢讲，游行登武当山，见秀师会疑冰解泮。思养圣胎，倏辞出蒲津安峰山，禁足十年，木食涧饮。属州牧卫文庠请归城内，建新安国院居之。因兹奔走毳衣，蔚然繁盛。使君问曰：“某今日后如何？”对曰：“日从蒙汜出，照树全无影。”使君初不喻旨，拱揖而退。少选开晓，充拙于怀。封来往中条山二十余年，俭薄不充。得其道者不可胜纪。入灭后，门人于州北三十步建塔焉。

○唐郢州大佛山香育传

释香育，姓李氏，济阴人也。父为兖府掾。育有道性，常研习《庄老》，根器奋发。俄于释典留神，决捐俗态。趋沧州安定寺智元律师所，乞求削染。满足戒后，精力律学，垂欲卒业。一旦辞师观游圣迹，陟天台，登南岳，或入岩阿，或栖树下，未至五台。后参预秀师盛化，夙心相契，击节希声。秀问之，育答密若隐书，一皆开释。秀默异之，在丛众间，多历年所，洞彻心源，则辞秀去。入富水大佛山，劲节安禅，卯前一食。州将韩闰笃钦其道，坚召出山，育称疾而已。因是黑白之众渴仰归依，韩使君辎车继运，供施交骈，树造法堂，严饰奇丽，时来问道。韩侯问：“佛法已后事如何？”答云：“如同太虚，委在有力。”韩侯钦尚，徒众常有千计，贤不肖驳杂而居，往往闻有不测之僧预其听受焉。一旦说法次，告众曰：“善哉是会，遭遇者艰。须决所疑，无遣虚度。”命水涤盥，端坐而化，春秋七十有三矣。

○唐兖州东岳降魔藏师传

释藏师，姓王氏，赵郡人也。父为亳州掾。稚齿寻师，居然慕法，而性好独处。譙多厉鬼，持魅于人。藏七岁，只影闲房，孤形迴野，尝无少畏。至年长，弥见挺拔，故号降魔藏欵。请列青衿于广福院明赞禅师，师意其法器，乃发缽之，应对辩给，答出问表。因留执事，服勤受法，俾诵《法华》，逾月彻部，登即剃落，受具习律焉。次讲南宗论，大机将发。俄投麈尾，九州灵迹罕不登升。后往遇北宗鼎盛，便誓依栖。秀问曰：“汝名降魔，我此无山精木怪，汝翻作魔邪？”曰：“有佛有魔。”秀云：“汝若是魔，必住不思议境界也。”曰：“是佛亦空，何不思议之有？”时众莫不异而钦之。先是秀师悬记之：“汝与少？之墟有缘。”寻入泰山数年，学者臻萃，供亿克周，为金舆谷朗公行化之亚也。一日，告门人曰：“吾今老朽，物极有归，正是其时。”言讫而终，春秋九十一矣。

卷九

◎习禅篇第三之二（正传十四人附见四人）○唐京兆慈恩寺义福传（行恩）

释义福，姓姜氏，潞州铜鞮人也。幼慕空门，黍累世务，初止蓝田化感寺，处方丈之室凡二十余年，未尝出房宇之外。后隶京师慈恩寺，道望高峙，倾动物心。开元十一年，从驾往东都，经蒲虢二州，刺史及官吏士女皆赍幡花迎之，所在途路充塞，拜礼纷纷，瞻望无厌。以二十年卒，有制谥号曰大智禅师，葬于伊阙之北，送葬者数万人。中书侍郎严？之躬行丧服，若弟子焉，又撰《碑》文。神秀禅门之杰，虽有禅行，得帝王重之无以加者，而未尝聚徒开法也。洎乎普寂始于都城传教二十余载，人皆仰之。初福往东洛，召其徒戒其终期，兵部侍郎张均太、尉房琯、礼部侍郎韦陟常所信重，是日皆预造焉。福乃升堂，为门人演说，且曰：“吾没日昊，当为此决别耳。”久之，张谓房曰：“某夙岁饵金丹，未尝临丧。”言讫，张遂潜去。福忽谓房曰：“与张公游有年矣。张公将有非常之咎，名节皆亏。向来若终此法会，足以免祸。惜哉！”乃提房手曰：“必为中兴名臣，其勉之！”言讫而终。后张均陷贼庭也，受其伪官，而房翼戴两朝，毕立大节，皆终福之言矣。又释行思，姓刘氏，庐陵人也。濡润厥躬，贞谅其性。出尘之后，纳戒已还，破觚求圆，斫雕为朴，厥志天然也。往韶阳见大鉴禅师，一言蔽断，犹击蒙焉。既了本心，地瘠迭告还，复吉州阐化，四方禅客繁拥其堂。开元二十八年十二月十三日入灭于本生地，敕谥大师，号曰洪济，塔曰归真。其塔会昌中例从堙毁，后法嗣者重崇树之。

○唐京师兴唐寺普寂传

释普寂，姓冯氏，蒲州河东人也。年才稚弱，率性轩昂，离俗升坛，循于经律。临文揣义，迥异恒流。初闻神秀在荆州玉泉寺，寂乃往师事，凡六年。神秀奇之，尽以其道授焉。久视中，则天召神秀至东都论道，因荐寂，乃度为僧。及秀之卒，天下好释氏者，咸师事之。中宗闻秀高年，特下制令普寂代本师统其法众。开元二十三年，敕普寂于都城居止。时王公大人竞来礼谒，寂严重少言，来者难见其和悦之容，远近尤以此重之。二十七年，终于上都与唐寺，年八十九。时都城士庶谒者皆制弟子之服。有制赐谥曰大慧禅师。及葬，河南尹裴宽及其妻子，并缞麻列于门徒之次。倾城哭送，闾里为之空焉。裴尹之重寂，职有由矣。寂之阐化，神异颇多，裴皆目击，又得心印，归向越深。时多讥诮，裴日夕造谒，执弟子礼曾无差脱。一日诣寂，寂悬知弟子一行之亡。及寂之终灭，裴之悲恻若丧所亲，纓衰至徒步出城，妻子同尔，搢绅之讥生于是矣。

系曰：人之情也有爱恶焉，爱之者不见可恶，恶之者不见可爱矣。夫万物纷纭，任其爱恶，折中之道，可爱而不可恶。爱之者君子也，恶之者小人也，爱之不以道，则君子之病矣。裴尹冠裳在御，职事在躬，不避密行，显掇时谤，宜哉。譬诸僧耽俗务，胡不舍袈裟而衣逢掖乎？若实得道，后终期脱屣，有何不可邪？宽不抽簪，

何悖礼于丘之门坎？宽若行方外之道，复何诛焉。达人大观，物无不可矣。

○唐南岳观音台怀让传

释怀让，俗姓杜，金州安康人也。始年十岁，雅好佛书，炳然殊姿，特有灵表，识者占是出家相，非染俗贵。人宝来瑞，国庆无疆，方之麟凤龟龙，无万数也。天地无全功，气序有盈虚，纲维缺坏，补塞不足，皆冥维密祐，惟应度者乃烛厥理，非庸庸所知也。弱冠诣荆南玉泉寺，事恒景律师，便剃发受具，叹曰：“夫出家者为无为法，天上人间无有胜者，经之所谓出四衢道露地而坐也。”时坦禅师乃劝让往嵩丘觐安公，安启发之，因入曹侯溪，觐能公。能公怡然，无馨无臭，洪波泛臻大壑之广乎？《韶》？《合奏大乐之和乎？让之深入寂定，住无动道场，为若此也。能公大事缘毕，让乃跻衡岳，止于观音台。时有僧玄至拘刑岳，举念愿让师救护。让早知而勉之，其僧脱难，云是救苦观音，得斯号也亦由此焉。化缘斯尽，传法弟子曰道峻，曰道一，皆外堂睹奥也。其后一公振法鼓于洪州，其门弟子曰惟宽、怀晖。道一大缘将訖，谓宽等曰：“吾师之道存乎妙者也，无待而常，不住而至，能事集矣。金口所生，从法而化，于我为子，及汝为孙，一灯所传，何有尽者？”让以仪凤二年生，至天宝三载八月十日终于衡岳，春秋六十八，僧腊四十八。一公建塔于别峰。元和中宽、晖至京师，扬其本宗，法门大启，传百千灯。京夏法宝鸿绪，于斯为盛。至八载，衡阳太守令狐权问让前迹，权舍衣财以充忌斋。自此每岁八月为观音忌焉。宝历中，敕谥大慧禅师，塔号最胜轮。元和年中常侍归登撰《碑》云。

○唐京师大安国寺楞伽院灵著传（法皀）

释灵著，姓刘氏，绵州巴西人也。年殆志学，方遂出家，登戒寻师，不下千里。年四十，精毗尼道，兼讲《涅槃》，一律一经，勤于付授。晚岁请问大照禅师，领悟宗风，守志弥笃。后诣长安，诞敷禅法，慕道求师者不减千计，若鱼龙之会渊泽也。以天宝五载四月十日申时，示灭于大安国寺《石楞伽经院》，享寿五十六，僧夏三十六。将终，寺中亟多变怪，盖法门梁栋之颓挠也。著加趺而坐，怡然而化。三七日后荼毗，起塔于龙首岗，邻佛陀波利藏舍利之所，帝女嫫之坟右，以其年十月十日迁入塔焉。弟子朗智、道■、如一追慕师德，香火不绝。内侍上柱国天水赵思侃命释子善运撰《碑》于塔所焉。有钱塘灵智寺释法玩，俗姓冯，本长乐人也，随祖宦于江东，遂为钱塘人也。父子通，字元达，世袭冠裳，传其素业。然精核百氏之余，执志慕净名之应质，谈论多召禅林之士，于家别室供礼，愿生令嗣。弥久，玩诞于家，歧嶷之性，天发端谨。才胜衣也，后父求出俗，固不阻留。披剃登具，探赜三乘，如指掌焉。而性终耿介，于此寺之深坞，实浙江之阳也，别构兰若，去伽蓝复远，终日安禅。时同志者造门请益，玩随事指南，多有所证。以天宝二载十二月十三日，天之将晓，告侍者，端坐奄从泥曰，春秋六十五，僧腊减二十年。于时山鸟哀鸣，云雾蒙惨，远近檀越悲泣者如堵。以其月十九日迁殡于寺侧山原。有弟

子俞法界及子怀福、犹子希秀等，旧所归心，结塔营事，皆出其家。塔因会昌中所毁，今存？焉。碑石漫没，吁哉！

○唐润州幽栖寺玄素传

释玄素，字道清，俗缘马氏，润州延陵人也。生有异度，幼而深仁，乳育安静。髻髻希尚，求归释门，父母从之，出依净域。以如意年中，始奉制度，隶名于江宁长寿寺。进具已后，戒光腾烛，定水澄涟，思入玄微，行逾人表。既解色空，常慕宗匠。晚年乃南入青山幽栖寺，因事威禅师，躬历弥载，撞钟大鸣。威海以胜法，得其不刊之旨。从是伏形苦节，交养恬和，败纳衲身，寒暑不易，贵贱怨亲，曾无喜愠，时目之为婴儿行菩萨。道业既高，人希瞻礼。开元年中，僧注密请至京口，郡牧韦铣屈居鹤林，四部归诚，充塞寺宇。素纳衣空床，未尝出户，王侯稽首，不为动遥顾世名利，犹如幻焉。忽于一日，有屠者来礼谒，自生感悟，忏悔先罪，求请素明中应供，乃欣然受之，降诣其舍。士庶惊骇，咸称“异哉”。素曰：“佛性是同，无生岂别？但可度者，吾其度之，何异之有？”天宝之初，吴越瞻仰如想下生。扬州僧希玄请至江北，窃而宵遁。黑月难济，江波淼然，持舟拟风。俄顷有白光一道，引棹直渡，通波获全。楚人相庆佛日再耀。倾州奔赴，会于津所。人物拒道，间无立位，解衣投施，积若山丘。略不干其怀抱，令悉充悲田之费。礼部尚书李愔为扬州牧，斋心虔虔，二时瞻近。未几而京口道俗思渴法音，仍移牒渡江，再请还郡。二处纷诤，莫决所从。李时谓人曰：“本期奉道，反成爱憎。”因任从所请，却归南郡，其感物慕德，罕有与伦。以天宝十一载十一月十一日中夜，无疾而化，春秋八十有五。哀感人伦，恸彻城市。以其月二十一日奉全身建塔于黄鹤山西所住之地。方伯邑宰，尽执丧师之礼，率众申哀，江湖震响。素往于寺内坐禅之所，高松偃覆如盖，及移他树，还互如前。又当舍寿之夕，房前双桐无故自枯。识者以为双林之变。但真乘妙理，绝相难思，嘉瑞灵祥，应感必有。《经》云“隋缘赴感”，即其事也。有门弟子法鉴及吴中法钦，此二大士重光道原，金具别传。受菩萨戒弟子吏部侍郎齐遒、广州都督梁卿、润州刺史徐峤、京兆韦昭理、给事中韩赏、御史中丞李舟、礼部崔令钦，并道流人望，咸款师资，亦尝问道于径山，犹乐正子春于夫子，洗心瞻仰，天汉弥高。水鉴明心，悟深者众矣。泊大和中，远慕遗风，高其令德，追谥大律禅师，大和大宝杭之塔。后人多以俗氏召之曰马祖，或以姓名兼称曰马素是也。

系曰：弥天以出家子咸姓释氏，悬合后到《阿含经》，可不务乎？素师以俗姓呼之，必有由矣。噫，繁盛法嗣，犹不能遏此讹称，则知素师名翼一飞，四海仰止，故登俗域。今警将来，宜正名也。

○唐均州武当山慧忠传

释慧忠，俗姓冉氏，越州诸暨人也。孰辨甲子？或谓期颐之年。肌肤冰雪，神宇峻

爽。少而好学，法受双峰，默默全真，心承一樱行无住相，历试名山，五岭、罗浚、四明、天目，白崖倚帝，紫阁摩穹，或松下安居于九旬，或嵌空息虑于三昧。既悬明月之戒，亦净琉璃之心，已度禅定之门，不起无生之见。疑若苏卢，八风莫能动；清如净鉴，万象何所隐？可止也我，则武当千峰狎于麋鹿；可行也我，则虎溪一径分卫人间。薄游吴楚，以至于顺阳川焉。卜居党子之林泉，四十余祀；深入法王之圣定，八万广门。道声洋溢，力量充矣！开元年中，刺史前中书侍郎开国公王琚、司马太常少卿赵颐贞，信潭以清，闻风而悦，税驾扣寂，杳然虚空。礼足散金银之华，不异弥伽长者；执手见微尘之佛，等毗目仙人。上奏玄宗，征居香刹，则龙兴寺也。由是罢相、节使、王公、大人，罔不膜拜顺风，从而问道。忠博达诂训，广穷经律，降魔制外，孰之与京？不可以威畏，不可以利动，噉日而食，对月澄心，清风飞霜，劲节凌竹，辞检理诣，折彼幔幢。论顿也不留联迹，语渐也返常合道。得之于心，伊兰作緇檀之树；失之于指，甘露乃蒺藜之园。妙不可传，花多果少，世有执砾水中，若获琉璃之宝；掬泡瓶内，谓得摩尼之珠。忠所以诃之止之，不能已矣。故有超毗卢之说，令其不著佛求；越法身之谈，俾夫无染正性。岂毗卢之可越而法身之可超哉？是以虚空之心合虚空之理，纤妄若云翳，宗通如日月。朝郎结驷而至，安禅不动，受其顶谒，俨如也。盖所谓昔人不迎七步，以福于于万乘之君，岂止百寮而已哉。肃宗皇帝载定区夏，闻其德高，以上元二年正月十六日敕内给事孙朝进鹓骑迎请，其手诏曰：“皇帝信问，朕闻调御上乘以安中土，利他大士共济群。生师以法鉴高悬，一音演说，藏开秘密，境入圆明，大悲不倦于津梁，至善必明于兼济。尊雄付嘱，实在朕躬。思与道安宣扬妙用，广滋福润，以及大千。传罔象之玄珠，拔沈迷之毒箭，良缘斯在，勿以为劳。仗锡而来，京师非远。斋心已久，副朕虚怀。春寒，师得平安好！遣书指不多及。”忠常以道无不在，华野莫殊，遂高步入宫，引登正殿。霜杖初下，日照龙衣，天香以焚，风飘羽盖。时忠骧首接武，神仪肃若。天子钦之，待以师礼。奏理人治国之要，畅唐尧、虞舜之风。帝闻竦然，膝之前席。九龙洒莲华之水，万乘饮醍醐之味。从是肩舁上殿，坐而论道，不拘彝典也。寻令骠骑朱光辉宣旨住千福寺。相国崔涣从而问津，理？于心，淡之朝野。识真之士，往往造焉。洎夫宝应临御，以孝理国，匪移前眷，划开万里之天，若见三江之月。又敕内侍袁守宏迎近阙下光宅寺安置，香饭云来，紫衣天降，虽使臣拥禅门而不进，御府列玉帛而盈庭，了之如泡，观之若梦，澹然闲任，自乐天倪。亦可罗浮不归，方名宴坐；双峰长往，始契无生者哉。成圣元胎，于是乎在，固所以万行齐发、千门不累于心矣。则兜率之鼓，无形乃声，修罗之琴，不抚而韵，香传天主，花两空王，见之于忠矣。常以思大师有言，“若欲得道，衡岳武当”，因奏武当山请置太一延昌寺，白崖山党子谷置香严长寿寺，各请《藏经》一本，度僧护持。二圣御影，镇彼武当。王言惟允，有司承式。猴江雁塔，虽未饰于中峰，茅栋柴扉，便以名于梵宇。睿札题额，鸾回鹄飞，山川光煌，黑白?跃，想金殿之可期，睹瑶台之非远。至大历八年，又奏度天下名山僧中取明经律禅法者，添满三七人。道门因之，羽服缁裳，罔不庆恱。数盈万计，用福九重也。忠往在南阳，陷于贼境，固请回避，皆不允之。临白刃而辞色无挠，据青云而安坐不屈。魁帅观具禅德淡若，风韵高逸，投剑罗拜，请师事焉。于时避寇遇寇者众矣。无何，群

盗又至，乃曰：“未可以踵前也。”遂杖锡发趾，沿江而去。有𪔐其先踪，坚住不避者，尽被诛戮。则知云物气象，有如先觉，存而不论，道何深也！金籍曰“般若无知而无不知”，斯之谓欤！内德既充，外应弥广，自藏珍宝，人莫之窥。於戏，论龙奋迅，而？多不知，忉利雨花，而明彻莫识。前贤？世，正眼随灭，不亦悲夫！忽疾将亟，国医罔效，自知去辰，众问后事，乃曰：“佛有明教，依而行之，则无累矣。吾何言哉？”粤十年十二月九日子时右胁累足，泊然长往。所司闻奏，皇情悯焉。中使临吊，赙赠甚厚。敕谥号曰大证禅师。有诏归葬于党子之香严寺，循其本也。威仪手力，所在支給，具饰终之礼，哀恻梵场也。敕常修功德使检校殿中监兴唐寺沙门大济，早接道论，豁如披云，虽非门人，哀逾法嗣。凡有敷奏，圣皆允焉。在家弟子开府孙知古并弟内常侍朝进、居士景超昆季等，僧弟子千福寺志诚、光宅寺智德、香严寺主道密等，凡数万人，痛石室之末筹，悲云峰之耸塔，晨钟徒击于高殿，夕梵空奏于前山，哲人云亡，畴将仿仰！译经沙门飞锡为《碑》纪德焉。

○唐太原甘泉寺志贤传

释志贤，姓江，建阳人也。夙心刚整，幼且成规，既遂出家，寻加戒品，沾尝渐教，守护诸根，抗节修心，不违律范。天宝元年，于本州佛迹岩承事道一禅师，曾无间然，汲水拾薪，惟务勤苦。游方见金华山赤松洞，是皇初平叱石羊之地，郁林峻岭，泉湖百步许。意乐幽奇，既栖巅顶，野老负香糠蔬茹以供之。时天大旱，贤望空击石，曼骂诸龙曰：“若业龙，无能为也。其菩萨龙王，胡不遵佛敕救百姓乎？”敲石才毕，霈然而作，嫠人咸悦。后游长安，名公硕德列请为大寺功德之师，贤悚然不顾。明日遂行，登五台，寻止太原甘泉寺，道俗请学禅理者继至。无疾而终，敕谥大远禅师，旌乎厥德矣。

○唐黄龙山惟忠传

释惟忠，姓童氏，成都府人也。幼从业于大光山道愿禅师，神骥伏枥，虽止也，发蹄则超忽千里焉。游嵩岳，见神会禅师，折疑沈默，处于大方。观览圣迹，见黄龙山郁翠而奇异，乃营茅舍。其穷溪极谷而多毒龙，喷气蒙蒙，山民犯者多如中瘴焉，医工寡效。忠初不知，独居禅寂，涧饮水食，其怪物皆卷而怀矣，山民无害。或闻空中声云：“得师居此，民之多幸，令我解脱也。”乡人因号是山为伏龙，言忠弭伏鳞虫之长，故此名焉。以建中三年入灭，报龄七十八。其年九月迁塔云。

○唐南岳石头山希迁传

释希迁，姓陈氏，端州高要人也。母方怀孕，不喜荤血。及生岐嶷，虽在孩提，不烦保母。既冠，然诺自许，未尝以气色忤人。其乡洞獠，民畏鬼神，多淫祀，率以牛酒，祚作圣望。迁辄往毁丛祠，夺牛而归，岁盈数千，乡老不能禁其理焉。闻大

鉴禅师南来，学心相踵。迁乃直往，大鉴絅然持其手，且戏之曰：“苟为我弟子，当肖。”迁莞尔而笑曰：“诺。”既而灵机一发，廓若初霁。自是上下罗浮，往来三峡间。开元十六年，罗浮受具戒，是年归就山，梦与大鉴同乘一龟，泳于深池。觉而占曰：“龟是灵智也，池是性海也。吾与师乘灵智游性海久矣，又何梦邪？”后闻庐陵清凉山思禅师为曹溪补处，又掇衣从之。当时思公之门，学者麇至。及迁之来，乃曰：“角虽多，一麟足矣。”天宝初，始造衡山南寺。寺之东有石状如台，乃结庵其上，杼载绝岳，众仰之，号曰石头和尚焉。初，岳中有固、瓚、让三禅师，皆曹溪门下，僉谓其徒曰：“彼石头真师子乳，必能使汝眼清凉。”由是门人归慕焉。或问解脱，曰：“谁能缚汝？”问净土，曰：“谁能垢汝？”其答对简速，皆此类也。广德二年，门人请下于梁端。自江西主大寂，湖南主石头，往来憧憧，不见二大士为无知矣。贞元六年庚午岁十二月二十五日顺化，春秋九十一，僧腊六十三。门人慧朗、振朗、波利、道悟、道铄、智舟相与建塔于东岭。塔成三十载，国子博士刘轲素明玄理，钦尚祖风，与道铄相遇，盛述先师之道，轲追仰前烈，为《碑》纪德，长庆中也。敕谥无际大师，塔曰见相焉。

○唐成都府净众寺神会传

释神会，俗姓石，本西域人也。祖父徙居，因家于岐，遂为凤翔人矣。会至性悬解，明智内发，大璞不耀，时未知之。年三十，方入蜀，谒无相大师，利根顿悟，冥契心源。无相叹曰：“吾道今在汝矣。尔后德充慧广，郁为禅宗。其大略寂照灭境，超证离念，即心是佛，不见有身。当其凝闭无象，则土木其质。及夫妙用默济，云行雨施，蚩蚩群黎，陶然知化，睹貌迁善，闻言革非。至于廓荡，昭洗执缚，上中下性随分令入。以贞元十年十一月十二日示疾，俨然加趺坐灭，春秋七十五，法腊三十六。沙门那提得师之道，传授将来。以十二年二月二十二日，门人弟子缁俗迁座于本院之北隅，孺慕师德，号哭之声，山林为之变色。初，会传法在坤维，四远禅徒臻萃于寺。时南康王韦公皋最归心于会，及卒，哀咽追仰，盖粗入会之门，得其禅要。为立碑，自撰文并书，禅宗荣之。

○唐杭州径山法钦传

释法钦，俗姓朱氏，吴郡昆山人也。门地儒雅，祖考皆达玄儒，而傲睨林藪不仕。钦托孕，母管氏，忽梦莲华生于庭际，因折一房系于衣裳，既而觉已，便恶荤膻。及迄诞弥岁，在于髻辘，则好为佛事。立性温柔，雅好高尚，服勤经史，便从乡举。年二十有八，装赴京师，路由丹徒，因遇鹤林素禅师，默识玄鉴，知有异操。乃谓之曰：“观子神府温粹，几乎生知。若能出家，必会如来知见。”钦闻，悟识本心，素乃躬为剃发，谓门人法鉴曰：“此子异日大兴吾教，与人为师。”寻登坛纳戒，炼行安禅，领径直之一言，越周旋之三学。自此辞素南征，素曰：“汝乘流而，行逢径即止。”后到临安，视东北之高峦，乃天目之分径，隅问樵子，言是径山。遂谋挂锡于此，见苦盖覆？网，屑近而宴居，介然而坐。时雨雪方霁，旁无烟

火，猎者至，将取其物，颇甚惊异叹嗟，皆焚网折弓而知止杀焉。下山募人营小室，请居之。近山居，前临海令吴贞舍别墅以资之。自兹盛化，参学者众。代宗睿武皇帝大历三年戊申岁二月，下诏曰：“朕闻江左有蕴道禅人，德性冰霜，净行林野，朕虚心瞻企，渴仰悬悬。有感必通，国亦大庆，愿和尚远降中天，尽朕归向。不违愿力，应物见形。今遣内侍黄凤宣旨，特到诏迎，速副朕心。春暄，师得安否！遣此不多及。”敕令“本州供送，凡到州县，开净院安置，官吏不许谒见。疲师心力。弟子不算多少，听其随侍。”帝见，郑重咨问法要，供施勤至。司徒杨绾笃情道枢，行出人表，一见钦于众，退而叹曰：“此实方外之高士也，难得而名焉！”帝累赐以缣繒，陈设御馔，皆拒而不受。止布衣蔬食，悉令弟子分卫，唯用陶器行。少欲知足，无以俦比。帝闻之更加仰重，谓南阳忠禅师曰：“欲锡钦一名。”手诏赐号国一焉。德宗贞元五年，遣使赍玺书宣劳，并庆赐丰厚。钦之在京及回浙，令仆公王节制州邑名贤执弟子礼者，相国崔涣、裴晋公度、第五琦、陈少游等。自淮而南妇人礼乞号，皆目之为功德山焉。六年，州牧王颜请出州治龙兴寺净院安置，婉避韩滉之废毁山房也。八年壬申十二月示疾，说法而长逝，报龄七十九，法腊五十。德宗赐谥曰大觉。所度弟子崇惠禅师，次大禄山颜禅师，参学范阳杏山悟禅师，次清阳广敷禅师。于时奉葬礼者，弟子实相、常觉等，以全身起塔于龙兴净院。初，钦在山，猛兽鸷鸟驯狎。有白兔二跪于杖屨之间。又尝养一鸡，不食生类，随之若影，不游他所。及其入长安，长鸣三日而绝。今鸡冢在山之椒。钦形貌魁岸，身裁七尺，骨法奇异，今塔中塑师之貌，凭机犹生焉。杭之钱氏为国，当天复壬戌中，叛徒许思作乱，兵士杂宣城之卒发此塔，谓其中有宝货。见二瓮上下合，藏肉形全在而发长覆面。兵士合瓮而去。刺史王颜撰碑述德，比部郎中崔元翰、湖州刺史崔玄亮、故相李吉甫、丘丹各有碑碣焉。

○唐寿春三峰山道树传

释道树，姓闻氏，唐州人也。少以辩智，沉静虚豁，耽嗜经籍，曾无少懈。其为人也，贞固足以干事，隐括足以矫时。偶遇僧敦喻，遂誓出尘，自慨年近不惑，求法淹迟。礼本部明月山大光院惠文为授业，登即剃染。二年受具，乃观方向道，天台、南岳，无所不游。后回东洛，遇秀宗裔，如芙蓉开，通达安静。至寿州三峰，结茅而居。常有野人，服色朴素，言谈异常，于言笑之外，化作佛形、仙形、菩萨、罗汉，或放神光，或呈声响，如是涉一十年，学侣睹之，不测端绪，后皆寂尔。树告众曰：“野人作多色伎俩，眩惑于人。只消老僧不见不闻，伊伎俩有穷，吾不见不闻无荆所谓作伪心劳而日拙，其自知之，卷著怀拙而去，追无泉迹矣。”树于宝历初年示疾而终，报龄九十二。明年正月迁塔焉。系曰：大钧播物，物类纷错，穷数达变，因形移易者谓之化，谓之幻。知幻化之不异生也，始穷幻化矣。吾与汝俱幻也。推之于实，则幻化或虚；置之于虚，则幻化时实。实虚理齐，不自我之先后欤？体道无心，物我均矣。故佛言“凡所见相，唯所见心”。又云“若见诸相非相，则见如来”，树师有焉。

○唐陕州回銮寺慧空传（元观）

释慧空，姓崔，江陵人也。家世儒雅，弈叶纓纓委，父任陕服灵宝县。空丁艰天属，坚请入空门，庸报乳哺重恩。乃投回銮寺恒超下，授受经业。三载诵通，及格蒙度，听习敏利。因入嵩少，遇寂师禅会，豁如开悟。乃回三峰，于仙掌间有道流绸缪论道，薄暮主散，非止一过。州帅元公颇知归向，召之，多以疾辞，或至，必登元席。代宗皇帝闻其有道，下诏俾居京师广福寺，朝廷公卿罔不倾信。后终于寺，春秋七十八。大历八年癸丑九月四日，全身坚固而迁塔焉。次南岳东台释元观，姓袁氏，长安人也。父为河中府掾。母兄为沙门，甚敦道化，见观幼龄聪慧，风标秀举，有成人之度，因劝其出家。乃投兴善寺，诵经通利。五年得度，乃于《律部俱舍》二本，涣然条理。后出游方，登诸禅会，明悟真性，如醒宿醒。遂趋衡山，于东台而止。其道弥昌，冥有所感。恒得神人密送供施，随其众寡，不闻有阙。忽一日，神现形再拜曰：“我是此山檀越，常送薄供者，我身是也。”观问：“汝何业所致？”曰：“我前身曾称知识，体悟匪全，妄受信施，坐此为神。偶师居此，我曹馈粮，粗副私愿。今二十年已足，得遂超度，故来决别也。”观化缘斯极，嘱累禅徒而终，春秋七十九。大和四年十月二日迁塔焉。

○唐洛京龙兴寺崇皂传（全植）

释崇皂，姓姜氏，郾城人也。门传儒素，相缀簪裾。自天宝已来，安史之乱，侵败王略，家族迁荡。父为商估趋利，遵涂于巩洛间。父亡于逆旅，皂慨责曰：“少遭不造，子遗哀哉！”遂议出家。至年十八，经业蔚通得度。俄有云水之兴，游南岳。栖息数龄起回，乐南徐茅山，乃依栖霞寺。皂已登径门，道声洋溢。会赞皇李公德裕廉问是邦，延诸慈和寺。一交雅谈，如游形器之外，曰：“吾有幽忧之疾，非是居侯藩聚落之人也。”明岁遂行，重？嵩少，居于岳寺。大和戊申岁，洛下亢阳，唯岳中雨信相继。或谓为皂之德动龙神之故也。开成元年，赞皇公摄冢宰，请皂于洛龙兴寺化徒。两京缙白往来问道，檀施交骈。其所谈法，宗秀之提唱，获益明心者多矣。忽告众决别，入方丈而灭，春秋八十六。白侍郎撰《塔铭》。会昌元年辛酉八月十日入塔云。次淮南都梁山释全植，姓芮，光州人也。少稟异操，自言学作佛度生去。忽投本州荣光禅院大智下求度。师颇严谨，约其诵经。受具后，至洛阳，参问禅法，彻了无疑辞。师观方至淮南都梁山，建立茅舍。太守卫文卿命于州治长寿寺化徒。卫侯问：“将来佛法隆替若何？”植曰：“真实之物无振，自古于今，往复轨躅。有为之法，四相迁流。法当堙厄。君侯翹足可见。”预言武宗毁教也。植终年九十三，门人建塔立碑。会昌四年甲子九月七日入浮图焉。

卷十

◎习禅篇第三之三（正传十六人附见八人）○唐洪州开元寺道一传（智藏）

释道一，姓马氏，汉州人也。华以喻性，不植于高原；浪以辩识，发明于溟海。生而凝重，虎视牛行。舌过鼻准，足文大字。根尘虽同于法体，相表特异于幻形，既云在凡之境，亦应随机之教。年方稚孺，厌视尘躅，脱落爱取，游步恬旷，削发于资州唐和尚，受具于渝州圆律师。示威仪之旨，晓开制之端，浣衣?金，观门都错大龙香象，羁绊则难。权变无方，机缘有待。闻衡岳有让禅师，即曹溪六祖之前后也，于是出岷峨玉垒之深阻，诣灵桂贞篁之幽寂。一见让公，泯然无际，顿门不俟于三请，作者是齐于七人。以为法离文字，犹传蠹露，圣无方所，亦寄清源，遂于临川栖、南康龚公二山，所游无滞，随摄而化。先是，此峰岫间魑魅丛居，人莫敢近，犯之者灾衅立生。当一宴息于是，有神衣紫玄冠致礼言：“舍此地为清净梵常”语终不见。自尔猛鸷毒螫，变心驯扰；沓贪背憎，即事廉让。郡守河东裴公家奉正信，躬勤谄稟。降英明简贵之重，穷智术慧解之能。每至海霞敛空，山月凝照，心与境寂，道随悟深。自明者在乎周物，博施者期乎济众。居无何，裴公移典庐江、寿春二牧，于其进修惟勤，率化不坠。大历中、圣恩溥洽，隶名于开元精舍。其时连率路公聆风景慕，以钟陵之坏，巨镇奥区，政有易柱之弦，人同湊轂，禅宗戾止，降祥则多，顺而无违，居仅十祀，日临扶桑，高山先照；云起肤寸，大雨均沾。建中中，有诏僧如所隶，将归旧壤。元戎鲍公密留不遣。至戊辰岁，举措如常，而请沐浴讫，俨然加趺归寂，享年八十，僧腊五十。先于建昌鄱山名石门，环以绝山献，呀为洞壑，平坦在中，幽偏自久。是谋薪火尘劫之会，非议冈阜地灵之吉。亚相观察使陇西李公藩寄严厉，素所钦承，于以率徒依归，缅怀助理。爰用营福，道在观化，情存饰终，辍诸侯之旌旗，资释子之幢盖。其时日变明晦，人萃遐迩，楫覆水而为陆，炬通宵而成画。山门子来，财施如积；邑里僧供，饭香普熏。自昔华严归真于嵩阳，善导瘞塔于秦岭，礼视斋斩，人倾国城，哀送之盛，今则三之。初于林中经行，座下开示，平等垂法，不标于四科，安恬告尽，刻期于二月，此明一终之先兆也。示疾云逝，俾葬远山，凡百攀援，愿留近郭。终遂穷僻，式遵理命，此又明一晦迹之素诚也。将归灵龕，爰溯浅濑，人力未济，舟行为迟。膏雨骤下于远空，穷溪遄变于深涉，此又明一通神之应感也。惟一知真在空，无我于有，是二俱离，假一为乘。示生死者人能作佛，辨邪正者魔亦似圣。现身不留于大士，负手俄萎于哲人。弟子智藏、镐英、崇泰等奉其丧纪，宪宗追谥曰大寂禅师，丹阳公包佶为《碑》纪述，权德舆为《塔铭》今海昏县影堂存焉。又唐虔州西堂释智藏，姓廖氏，虔化人也。生有奇表，亲党异其伟器。八岁从师，道趣高邈。随大寂移居龚公山，后谒径山国一禅师，与其谈论周旋，人皆改观。属元戎路嗣恭请大寂居府，藏乃回郡，得大寂付授纳袈裟。时亚相李公兼、国相齐公映、中郎裴公通皆倾心顺教。元和九年四月八日终，春秋八十，夏腊五十五。即迁于塔，谏议大夫韦绶追问藏言行，编入《图经》。太守李渤请旌表，至长庆元年谥大觉禅师云。

○唐宣州灵汤泉兰若志满传

释志满，姓康氏，洛阳人也。幼少之年，属其家命沙门陈佛会，满意乐不舍，遂投颍川龙兴寺出家。闻洛下神会禅师法席繁盛，得了心要。南游到黄山灵汤泉所，结茅茨而止。后采黄连，乡人见满喜跃，满问：“此何处耶？”乡人曰：“黄连山，属宣城也。愿师镇此，奈何虎豹多害？”满曰：“虎亦有佛性。”乃焚香祝厌之，由兹弭息，遂成大禅院。后示寂，春秋九十一。永贞元年入塔焉。

○唐沂州宝真院光瑶传（道坚）

释光瑶，姓周氏，北京人也。幼钟荼蓼，都不胜情，誓志出家。舍讲肆，入禅林，凡向宗师，悉从求益。未遭会禅师，金錡抉？，明视十方。后到沂水蒙山，结草成庵，怡然宴坐。？费之人翕然从化。时慎邑大夫知重首创禅宫，次兖州节使王僚尚书躬请入州行化，奏署额号宝真。学侶憧憧，多沾大利。元和三年示灭，享年九十二云。又唐襄州慈恩寺释道坚，姓王氏，丹阳人也。初发心于牛头山慧忠禅祖。大历元年，栖隐池州南泉山。后诣襄汉，泊慈恩寺。元和初载，相国燕公镇于汉南，深相钦重，问道周勤，施供繁沓。遂于凤林关外造寺请居。二年示灭，春秋七十三云。

○唐扬州华林寺灵坦传

释灵坦，姓武氏，太原文水人也，则天太后侄孙。父讳宣，洛阳县令。母夏侯氏，初妊坦也，梦神僧授与宝鉴，表里莹然，且曰：“吾以此寄汝，善保护之。”及诞，亲无所苦。年甫七岁，诵习毕通，应童子举。十三从宦，旋升太子通事舍人。如是悦学不休，三教之书弥增洞达。然而恒嗟朽宅，誓入空门，已备大乘之资粮，终到涅槃之境域。于时洛都盛化荷泽寺神会禅师也，方遮普寂之光，渐没秀师之道，坦往参焉。会施善诱，顿见其心，默而许之，容其执侍。父母不能回其意。飞扬莫系，始末研磨，得破疑滞。天宝初载，召坦曰：“吾有一句，是祖祖相传至曹溪，曹溪付吾，汝谛受之。吾当有留难，遂辞游方焉。”未几，果敕移会于弋阳。坦遂向庐州浮槎寺，览大藏经。后闻忠国师自南阳诏入，于大历五年礼觐之。八年，欲出关，忠奏曰：“此人是贫道同门，俱神会弟子。”敕赐号曰大悲，兼赍墨敕。行化至梁园，时相国田公神功供养。逦迤适维杨、六合，方叹大法凌夷，忽闻空中声云：“开心地。”即见菩萨如文殊像曰：“与汝印验。”令举项以掌按之，寻观有四指赤痕，其印迹恒现。又止润州江中金山，今泽心也。其山北面有一龙穴，常吐毒气如云，有近者多病或毙。坦居之，毒云灭迹。又于江阴定山结庵，俄闻有赞叹之声。视之，则白龟二，坦为受皈戒。又见二大白蛇，身长数丈，亦为受戒忏悔。如是却往吴兴林山造一兰若，有三丈夫衣金紫，趋步徐正，称叹道场唯善，村落之民多弃罟网。元和五年，相国李公之理广陵也，以峻法操下，刚决少恩，一见坦，郑重加礼，召居华林寺。寺内有大将军张辽墓，寺僧多为鬼物惑乱。坦居，愀然无

泉矣。又扬州人多患山妖木怪之所荧惑，坦皆遏御焉。人争归信。至十年，忽见二胡人称自龟兹国来，彼无至教，远请和尚敷演。十一年五月十三日，于荷泽忌斋，告众：“吾赴远请。七月示疾，九月将灭，斯预告也。”至季秋八日，果寂尔而终。迁塔于扬州西驯翟坊之南冈，越州掾郑詹建塔。报龄一百八岁，僧腊八十四焉。坦即曹溪之孙，荷泽之子也。

○唐唐州紫玉山道通传

释道通，姓何氏，庐江人。其为童也，持重寡辞，见佛形像，必对礼叹咏不舍。因父宦于泉州南安，便求舍？披缁。诵经合格，敕度之，当天宝初载也。时道一禅师肇化建阳佛迹岩聚徒，通往焉。一师于临川南康龚公山，亦影随而去。然誓游方吴越之间，台明山谷，靡不登陟。迨乎回锡江西泐潭山门，励心僧务，不憚勤苦。贞元二年往南岳，见石头禅师，犹采缕加朱蓝之色也。四年，大寂禅师垂欲归化，昌言曰：“夫玉石润山秀丽，益汝道业，遇可居之。通闻此言，且同隐讖，殊不详练。其年秋与伏牛山自在禅师同游京洛，回至唐州西有山，峰孤林密，四绝人烟，实有尘外之趣。乃问乡人，云此山是紫玉山，通方忆大寂之悬记，我合居是峰也。乃陟崔嵬，见山脊有石方正，其色紫玉莹然，叹曰：“号紫玉者，合其称也。先师之言，非虚记也。”挂锡解囊，参学之徒雾集。始则诛茅构舍，刺史李道古作意为建禅宫焉。元和八年，弟子金藏出参礼百丈山海禅师，回见通。通愀然作色：“汝其来矣，此山有主也。”曳杖径去，襄州道俗皆迎。至七月十五日，无疾而终，春秋八十三。一云故相国于谏最所归心，尚书李翱礼重焉。

○唐雍京章敬寺怀晖传

释怀晖，姓谢氏，泉州人也。宿殖根深，出尘志远，迨乎进具，乃尚云游。贞元初，礼洪州大寂禅师，顿明心要。时彭城刘济颇德晖，互相推证。后潜岨嵎山，次寓齐州灵岩寺。又移卜百家岩，泉石幽奇。苦于禅子请问繁杂，上中条山行禅法，为法者蹶迹而往，蒲津人皆化之。元和三年，宪宗诏入于章敬寺毗卢遮那院安置，则大历中敕应天下名僧大德三学通赡者并丛萃其中，属诞辰，多于此修斋度僧焉。晖既居上院，为人说禅要，朝寮名士日来参问。复诏入麟德殿赐斋，推居上坐。元和十年乙未冬示疾，十二月十一日灭度，春秋六十二。越明年二月，门人智朗、志会等奉全身葬于灞桥北原。敕谥大宣教禅师，立碑于寺门，岳阳司仓贾岛为文述德焉。

○唐京兆兴善寺惟宽传（宝修）

释惟宽，姓祝氏，衢州信安人也。祖曰安，考曰皎。生十三岁，见杀生者，尽然不忍食。退而出家，求剪发于僧昙，受尸罗于僧崇，学毗尼于僧如，证大乘法于止观，成最上乘于大寂道一。贞元六年，始行化于闽越间，岁余而回心改服者百数。七

年，伏猛虎于会稽，作滕家道常八年，与山神受归戒于鄱阳，作回向道常十三年，感非人于少林寺。二十一年，作有为功德于卫国寺。明年，施无为功德于天宫寺。元和四年，宪宗章武皇帝诏于安国寺。五年，问道于麟德殿。其年，复灵泉于不空三藏池。十二年二月晦，大说于传法堂讫，奄然而化。报龄六十三，僧夏三十九。归葬于灊陵西原，诏谥曰大彻禅师，塔号元和正真。初，宽说心要法三十年，度黑白众殆及百千万，应病授药，安可既乎？白乐天为宫赞时遇宽，四诣法堂，每来垂一问，宽答如流，白君以师事之。门弟子殆千余，得法者三十九，入室受遗寄者曰义崇、圆照焉。唐罗浮山释宝修，俗姓周，资州人也。从师于纯德寺，志求玄理，于蕲州忍大师法裔决了重疑。后爱罗浮山石室安止，檀越为造梵宇，蔚成大寺。一日，告门人曰：“因缘相逼。”愀然不乐，众咸莫测。顺宗皇帝深重佛宗，知修之名，诏入京与三藏击问，并答翻译之意，朗畅如流。乃留居辇下。三年，终于京寺云。

○唐天台山佛窟岩遗则传

释遗则，俗氏长孙，京兆长安人也。祖冽，鄂州司马；考利涉，隐居金陵。则弱不杂俗，恬恬终日而无所营。始从张怀瓘学草书，独尽笔妙。雅耽经史，尤乐佛书，以为得吾心。一朝捐家业，从牛头山慧忠，忠所谓牛头六祖也。始天竺达磨以释氏心要至，传其道者有曹溪能、嵩山秀。学能者谓之南宗学，学秀者谓之北宗学。而信祖又以其道传慧融，融得之居牛头山，弟子以传授。由是达磨心法有牛头学。则既传忠之道，精观久之，以为天地无物也，我无物也，虽无物未尝无物也。此则圣人如影，百姓如梦，孰为死生哉？至人以是能独照，能为万物主，吾知之矣。遂南游天台，至佛窟岩，盖薜荔，荐落叶而尸居，饮山流，饭木实而充虚，虎豹以为宾，麋鹿以为徒，兀然如枯。其后衿木者见之转相告，有慕其道者曰：“道者未有弟子。”相率为筑室，图佛安僧，蔚为精舍焉。故元和已来传则道者，又自以为佛窟学，佛窟之号自则始也。一坐四十年，大官名侯赍书问讯檀舍，则未尝有报谢，礼拜者未尝而作起。时岁在庚戌季夏十有二日，召弟子曰：“汝其勉之！至十五日夜遂坐歿。是夜山下人闻若山崩，旦望之，则彩云翔泊于岩上。父老皆泣曰：“师死矣！已而视之，果然。凡则二十岁为僧腊，五十有八而终。善属文，始授道于钟山，序集融祖师文三卷，为宝志《释题》二十四章，《南游传大士遗风序》又《无生等义》。凡所著述，辞理粲然。其他歌诗数十篇，皆行于世。则元居瀑布泉西佛窟本院，建龕塔。会昌中例毁之，其院为道门所有。后开元寺僧正法光于咸通乙酉岁遂徙碑于今所，河南尹韩？为《碑》文。

○唐婺州五泄山灵默传（志闲）

释灵默，俗姓宣毗陵人也。本成立之岁，悦学忘疲，约以射策登第，以荣亲里。承豫章马大师聚众敷演。造禅关，马师振容而示相，默密契玄机，便求披剃，若熟痛之待刺耳。受具之后，苦练行门，确乎不拔。贞元初，入天台山中，有隋智者兰若

一十二所，悬记之曰：“此地严妙，非杂器所栖，若能居此，与吾无异。”默因锥白砂道撒，经于二载。猛虎来驯，近林产子，意有所依。又住东道场，地僻人稀，山神一夜震雷暴雨，悬崖委坠。投明，大树倒欹，庵侧树枝交错，茅苫略无少损。遐迩闻旃，皆来观叹。后游东白山，俄然中毒，而不求医，闭关宴坐。未几，毒化流汗而滴，乃复常矣。行次浦阳，盛化，有阳灵戍将李望请默居五泄焉。元和初亢阳，田畷惶惶。默沿涧见青蛇夭矫，瞪目如视行人，不动。咄之曰：“百姓溪竭苗死，汝胡不施雨救民邪？”至夜果大雨，合境云足，民荷其赐。属平昌孟简中丞廉问浙东废管内兰若，学徒散逸，时暨阳令李胄状举灵山，许重造院。十三年三月二十三日，澡沐焚香，端坐绳床，嘱累时众，溘然而绝。寿龄七十二，法腊四十一。高僧志闲，道行峭拔，文辞婉丽，亦江左之英达，为默《行录》焉。

○唐荆州天皇寺道悟传（崇估）

释道悟，姓张氏，婺州东阳人也。受天粹气，为法王子，生而神俊，长而谨愿。年十四，金翅始毛，麒麟方角，启白尊老，将求出家，慈爱之旨，不见听许。辄损薄常膳，日唯一食，虽体腹羸馁，弥年益坚。父母不获已而许之。遂往明州大德剃落。年二十五，依杭州竹林寺大德具戒。以勇猛力，扶牢强心，于六度门，修诸梵行。常以为疗膏肓者资上妙药，开暗冥者求善知识。不假舟楫，其济渡乎？遂蹶然振策，投径山国一禅师。悟礼足始毕，密受宗要。于语言处，识衣中珠。身心豁然，真妄皆遣。断诸疑滞，无畏自在，直见佛性，中无缁磷。服勤五载，随亦印可，俾其法雨润诸丛林。悟蓄力向晦，入深阻，实冀一飞摩霄。乃转遁于余姚大梅山，是时大历十一年也。层崖绝壑，天籁萧瑟，夔无邻落。七日不食。至诚则通，物感乃灵，猱豸廷銚，更馈橡栗。异日野夫操斧，言伐其楚，偶所遭睹，骇动悚息，驰谕朋曹，谓为神奇。曾不旬朔，诣者成市。凭嵌倚峭，且构危栋，费粮供具，环绕方丈。猛虎眈眈，侣出族游，一来座侧，敛折肢体，其类驯扰可知也。夫语法者无阶渐，涉功者有浅深，木逾钻而见火，鉴勤磨而照胆，理必然矣。是以扫尘累，遁岩薮，服形体，遗昼夜，精严不息，趣无上道，其有旨哉！如是者三四年矣。将翔云表，虑羽毛之颓铄；欲归宝所，疑道涂之乖错。故重有谘访，会其真宗。建中初，诣钟陵马大师，二年秋，谒石头上士。於戏！自径山抵衡岳凡三遇哲匠矣。至此即造父习御，郢人运斤，两虚其心，相与吻合。白月映太阳齐照，洪河注大海一味，仲尼谓颜子亚圣，然灯与释迦授记，根果成熟，名称普闻，如须弥山特立大海。繇是近佛，恢张胜因，凡诸国土，缘会则答。始卜于澧阳，次居于赭口，终栖于当阳柴紫山，即五百罗汉翱翔地也。怪松蓊郁以含风，崖山献砢岩而造天，驾潏潏之紫霞，枕清泠之玉泉。鸾凤不集于蓬璠，至人必宅于势胜，诚如是也。洪钟待叩，童蒙求我，川流星聚，虚往实归。或接武于林樾，或并肩于庐舍，户外之屦，烂其室盈矣。荆州雄藩也，都人士女动亿万计，莫不擎跪稽首，向风作焉。崇业上首以状于连帅而邀之，不违愿力，聿来赴请。及于虚落，锡及于都城。白黑为之步骤，幡幢为之车曷，生难遭想，得未曾有。彼优波鞠多者，夫何足云！有天皇寺者，据郡之左，标异他刹，号为名蓝，困于人火，荡为煨烬。僧坊主灵鉴族而谋之，以为

满人攸居，必能福我。夫荷檐大事，蔑弃小瑕。乃中宵默往，肩舆而至。二寺夕有所失，朝有所得，诤论锋起，达于尊官。重于反复，毕安其处。江陵尹右仆射裴公，搢绅清重，拥旄统众，风望眄睐，当时准程，驱车盛礼，问法勤至。悟神气洒落，安详自处，徐以软语，为之献酬，必中精微，洞过肯綮。又常秉贞操，不修逢迎，一无卑贵，坐而揖对。裴公讶其峻拔，征其善趣，谓“抗俗之志当径挺如是邪”？悟以为“是法平等，不见主客，岂效世谛，与人居而局狭邪”？裴公理冥意会，投诚归命。既见仁者，我心则降，如热得濯，躁愤冰散。自是禅宗之盛，无如此者！元和丁亥岁有背痛疾，命弟子先期告终。以夏四月晦奄然入灭。春秋六十，僧腊三十五。以其年八月五日葬之郡东隅，灵龕建塔，从僧礼也。悟身长七尺，神韵孤杰，手文鱼跃，顶骨犀起。行在于瓔珞，志在于《华严》，度人说法，雄健猛利。其一旨云“垢净共住，水波同体，触境迷著，浩然忘归。三世平等，本来清静。一念不起，即见佛心。”其悟解超顿，为若此也。先是烟焰之末，殿宇不立，顾缙褐且亏瞻礼，密念结构，罔知权舆。禅宴之际，若值神物，自道祠舍滨江水焉。凡我疆畛，富于松梓，悉愿倾倒，施僧伽蓝。命工古见之，宛若符契。于是斩巨栋，干修楹，撑崖拄壑，云屯井构。时维秋杪，水用都涸，徒众敛手，块然无谋。会一夕雨至，万株并进，晨发江浒，暮抵寺门。剗剗之际，动无乏者。其余廊庑床案，靡非幽赞。事邻语怪，阙而不书。其感摄灵癯，皆此类也。比丘慧真、文贲等禅子幽闲，皆入室得悟之者，或继坐道场，或分枝化导。时太常协律符载著文颂德焉。世号天皇门风也。又唐澧州龙潭禅院释崇信，未详氏族。信在俗为渚宫胡饼师之子，弱龄宛异，神府宽然。昔天皇寺悟禅师隐耀藏光，人莫我测。信家居寺巷，恒日提饼笥馈悟公斋食。食毕，且留一饼曰：“吾惠汝，以荫子孙。”信一日自念曰：“饼是我持去，何以返遗我邪？莫别有旨乎？”遂拱手问焉。悟公曰：“是汝持来，复汝何咎。”信闻似有惊怪，因劝出家，便求摄受，曰：“尔昔崇福善，今信吾言。”故名之也。由是躬于井臼，供亿服勤。乃问悟云：“未蒙指示心要。”悟公云：“时时相示。”信踰稟斯言，如游子之还家，若贫人之得宝。直从荆渚乃诣澧阳龙潭栖止。因李翱尚书激扬，时乃出世。后德山鉴师出其门，宗风大盛矣。

○唐邺都圆寂传（掘多）

释圆寂，不知何许人也。恒以禅观为务，勤修匪懈，就嵩山老安禅师请决心疑，一皆明焕。寂化行相部，依附者多。久居天平山，稠禅师往迹无不遍寻。时大司空严绶倾心信重。享寿一百五十五岁，咸亨二年己巳岁生（按咸亨二年辛未，合云总韦二年己巳也）。世号无生和尚是欤。寂之高岸，恒不欲人致礼邀请，必有不可犯之色，时或非之。然则志意修则骄富贵，道义重则轻王公，非其傲诞，势使然也。释掘多者，印度人也。从逾沙磧，向慕神州，不问狄鞮，旋通华语，而尚禅定。径谒曹溪能师，机教相接犹弱丧还家焉。多游五台，路由定襄。历村见一禅者结庵独坐，问之曰：“子在此奚为？”曰：“吾观静。”多曰：“观者何人？静者何物？得非劳子之形，砾子之虑乎？”其僧茫昧，拱默而已，作礼数四，请垂启发。多曰：“子出谁门邪？”曰：“神秀大师。”多曰：“我西域异道实繁有徒，最下劣者

，不堕此见。兀然空坐，蓐烂身疲，初无深益。子莫起如是见，立如是论。”早往韶阳请决所疑。能曰：“子何不自观自静邪？不观相，不观如，子游历日用，自然安乐也。”一如多所言，略无少异。伊僧起开罗网。多后莫知攸往。

○唐袁州阳岐山甄叔传

释甄叔，不知何许人也。幼而聪敏，倜傥不羁。心目融明，具大人相。观生死轮上，见九地群迷，犹如蠃螟处在蚊睫。受胜妙欲，似嚼蜡无味。遂投簪削顶，具佛瑇帟，求正觉了义，扣大寂禅师，一造玄机，万虑都寂，乃曰：“群灵本源，假名为佛，体竭形消而不灭，金流朴散而常存。性海无风，惊波自涌。心虚绝兆，万象齐照。体斯理者，不言而遍历沙界，不用而功益玄化。如何背觉，反合尘劳，于阴界中，妄自囚系。”于是形同水月流浪人天哉。叔见宜春阳岐山群峰四合，叹曰：“坤元作镇，造我法城。”才发一言，千岩响答。松开月殿，星布云廊，青岚域中化出金界。始从宴坐，四十余年，满室金光，昼夜常照。于是化缘已毕，机感难留。元和庚子岁正月十三日，忽弃尘区，还归大定。门弟子如坦、良宝等心没悲海，哀声动山，如月隐天，群星失耀。大集众木，为香楼，用作荼毗，获舍利七百粒，于东峰下建窣堵波。上足任运者命志闲为《碑》纪述矣。

○唐新吴百丈山怀海传

释怀海，闽人也。少离朽宅，长游顿门，禀自天然，不由激劝。闻大寂始化南康，操心依附，虚往实归，果成宗匠。从擅信请居新吴界，有山峻极，可千尺许，号百丈坎。海既居之，禅客无远不至，堂室隘矣。且曰：“吾行大乘法，岂宜以诸部阿笈摩教为随行邪？”或曰：“《瑜伽论》、《璎珞经》，是大乘戒律，胡不依随乎？”海曰：“吾于大小乘中博约折中，设规务归于善焉。”乃创意不循律制，别立禅居。初自达磨传法至六祖已来，得道眼者号长老，同西域道高腊长者呼须菩提也。然多居律寺中，唯别院异耳。又令不论高下，尽入僧堂。堂中设长连床，施？架挂搭道具。卧必斜枕床唇，谓之带刀睡，为其坐禅既久，略偃亚而已。朝参夕聚，饮食随宜，示节俭也。行普请法，示上下均力也。长老居方丈，同维摩之一室也。不立佛殿，唯树法堂，表法超言象也。其诸制度，与毗尼师一倍相翻，天下禅宗如风偃草。禅门独行，由海之始也。以元和九年甲午岁正月十七日归寂，享年九十五矣。穆宗长庆元年，敕谥大智禅师，塔曰大宝胜轮焉。

系曰：自汉传法，居处不分禅律，是以通禅达法者，皆居一寺中，院有别耳。至乎百丈立制，出意用方便，亦头陀之流也。矫枉从端，乃简易之业也。所言自我作古。古，故也；故，事也。如立事克成，则云自此始也；不成，则云无自立辟。今海公作古，天下随之者，益多而损少之故也。谥海公为大智，不其然乎？语曰：“利不百，不变格。”将知变斯格，厥利多矣。《弥沙塞律》有诸，虽非佛制，诸方为清静者不得可行也。

○唐潭州翠微院恒月传（真亮）

释恒月，姓韩氏，上党人也。厥父为土监商，西江往还，俄遇剽略溺死。月虽幼弱，念父葬于鱼腹，母又再行，乃决志出家，求报恩育。受教于圣善寺慧初。得度已，造嵩山禅会，便启发心要。后访道寻师，靡惮夷险，抵望湖山翠微岩下古院挂锡。四方学者如蜂得王，翕然盛化。建中元年，示疾而终，春秋七十九。其年三月十二日迁塔焉。洛京广爱寺释真亮姓侯氏，景城人也。家训儒雅，辞彩粲然。洁素持会，与群少年有异。忽以樊笼为厌，且曰：“去情除谨，是所愿也。”遂于本州开元寺智休师下披染服。然其刈薪汲水，率先于人，习行头陀行。受具已，游嵩少，遇普寂奖训，顿开蒙昧。入龙门山，居而禅默，问津者交集，声望日拢属留守尚书王公铎保矧，闻而钦奉，召入广爱寺，别住居焉。示人禅观，匪倦教诏，得道者亦多矣。以贞元四年十一月三日，忽告门人以桑榆末照，诚难久留。嘱累而终，年八十八焉。

○唐襄州夹石山思公传（昙真）

释思公，姓李氏，恒阳人也。早出家于本府龙兴寺。得度后，游伊洛间，见普寂禅师，开畅禅法。寂始见提诱，寻彻钩深。至南雍，隐夹石山，赍然自处。属牛公观政汉南，闻其声绩，请入城，谢病不应其命。牛帅亦不夺其志，檀施相望。学众？，若縋檀之围绕焉。以兴元初年示疾归灭，春秋八十四焉。亳州安国院释昙真，姓陈，维青人也。少小随父往彭门，鬻枣于逆旅，而亡所怙。真叹恨无依，乃投徐大云寺为僧。其土是嵩法师之后，经论薮泽，真玩习该通。后游胜境，入嵩山学禅观。已至任城，邂逅李中丞讽赴职谯郡，接真谈道，抵掌盱衡，如披云雾。李恨相识之晚，请以同行。时聚风亭月观，谈道达旦。李后入为京尹，因从容称奏真道盛德至。德皇下诏征，而不奉诏。贞元七年四月示灭，门人建塔云。

○唐定州大像山定真院石藏传

释石藏，姓吕，汉东人也。年邻小学，露成人之度，跪告堂亲，愿为佛子。遂志入开元寺削染受戒，愿礼嵩山寂禅师，豁悟禅法。至中山大像峰间石室，孤坐冥寂，数夏安然。同好者望风而至，蔚成丛众。陶化博陵，人咸欣戴。会州帅李公卓翹仰之切，命入城住，贵亲玄论。谢云：“野性难拘，不闲礼法，恐玷威棱。”卓躬登山访问，款密交谈，深开昏昧。遂奏院题额曰定真焉。藏预白众诀别，明日坐亡，春秋八十二。贞元十六年正月入塔，立碑颂德云。

卷十一

◎习禅篇第三之四（正传二十一人附见四人）○唐洛京伏牛山自在传（一钵和尚南印）

释自在，俗姓李，吴兴人也，生有奇瑞。稍长，坐则加趺，亲党异之。辞所爱，投径山出家，于新定登戒。及诸方参学，从南康道一禅师法席，悬解真宗，逸踪流辈，道誉孔昭，行上优游。多隐山谷，四方禅侣丛萃其门。元和中，居洛下香山，与天然禅师为莫逆之交。所游必好古，思得前贤遗迹以快逸观。龙门山得后魏三藏翻经处；王屋山得稠禅师解虎斗处，此山饮甘泉，改为甘泉寺；嵩山得梵法师马跑泉。居无恋著，所著《三伤歌》，辞理俱美，警发迷蒙，有益于代。前蜀王氏伪乾德初，有小军使陈公娶高中令骈诸孙女，若人持不杀二十余年，后在蜀为男婚娶，礼须屠宰。高初不欲，亲戚言：“自己持戒，行礼酒筵将何以娱宾也？”依违之际，遂多庖割。俄未浹旬，得疾颇异，口但慌言，已而三宿还稣，述冥间之事。初被黑衣使者迫摄入歧府城隍庙，庙神峨冠大袖，与一金甲武士晤坐。使者领高见神，武士言语纷纭，让高破戒，仍扼腕骂曰：“吾护戒神将也。为汝二十年食寝不遑，岂期忽起杀心，顿亏戒检？命虽未尽，罪亦颇深，须送冥司惩其故犯。”城隍神问高曰：“汝更修何善追赎过尤乎？”高常诵持《上生经》，其数已多，于时懵然都无记忆，恐惧之间白曰：“诵得《三伤颂》、《一钵和尚歌》。”遂合掌向神厉声而念，神与武士耸耳擎拳立听，颜色渐怡。及卒章，神皆涕泪，乃谓高曰：“且归人间，宜切营善。”拜辞未毕，飒然起坐，备陈厥事。自此《三伤》、《一钵》之歌颂，人皆传写讽诵焉。一钵和尚者歌词叶理，激劝忧思之深，然文体涉里巷，岂加《三伤》之典雅乎？在遣弟子去江南，选山水之最者，“吾愿往中终老”。到江州都昌县有好林泉，回报。在行至叶县，道俗所留。往隋州开元寺示灭，年八十一，则长庆元年也。

系曰：稽诸《律藏》，出家者犯戒，则招二罪，一违制，二业道也。高氏在家素不受戒，无违制愆，俗容有业道罪，宁得有护戒神邪？况高氏既持不杀，则冥然感止持无作之善生焉。因鲜克有终，致遭幽责，告诸五众，常畏护戒之神。夫如是，明则有戒法，幽则有鬼神欤！

次成都府元和圣寿寺释南印，姓张氏。明寤之性，受益无？，得曹溪深旨，无以为证。见净众寺会师，所谓落机之锦，濯以增妍，御烛之龙，行而破暗。印自江陵入蜀，于蜀江之南鉢，？草结茆，众皆归仰，渐成佛宇，贞元初年也。高司空崇文平刘辟之后，改此寺为元和圣寿，初名宝应也。印化缘将毕，于长庆初示疾。入灭营塔葬于寺中。会昌中毁塔，大中复于江北宝应旧基上创此寺，还名圣寿。印弟子传嗣有义？，复兴禅法焉。

○唐汾州开元寺无业传

释无业，姓杜氏，商州上洛人也。其母李氏忽闻空中言曰：“寄居得否？”已而方娠。诞生之夕，异光满室。及至成童，不为戏弄，行必直视，坐即加趺。商于缁徒，见皆惊叹，此无上法器，速令出家，绍隆三宝。年至九岁，启白父母，依止本郡开元寺志本禅师，乃授与《金刚》、《法华》、《维摩》、《思益》、《华严》等经，五行俱下，一诵无遗。年十二，得从剃落。凡参讲肆，聊闻即解。同学有所未晓，随为剖析，皆造玄关。至年二十，受具足戒于襄州幽律师，其《四分律疏》，一夏隶习，便能敷演。兼为僧众讲《涅槃经》，法筵长开，冬夏无倦，可谓生肇不泯，琳远复兴。后闻洪州大寂禅门之上首，特往瞻礼。业身逾六尺，屹若山立，顾必凝睇，声作洪钟。大寂一见异之，笑而言曰：“巍巍佛堂，其中无佛。”业于是礼跪而言曰：“至如三乘文学，粗穷其旨。尝闻禅门即心是佛，实未能了。”大寂曰：“只未了底心即是，别物更无。不了时，即是迷。若了，即是悟。迷即众生，悟即是佛。道不离众生，岂别更有佛！亦犹手作拳，拳全手也。”业言下豁然开悟，涕泪悲泣，向大寂曰：“本谓佛道长远，勤苦旷劫，方始得成。今日始知法身实相本自具足，一切万法，从心所生，但有名字，无有实者。”大寂曰：“如是如是，一切法性不生不灭，一切诸法本自空寂。经云：‘诸法从本来，常自寂灭相。’又云：‘毕尽空寂舍。’又云：‘诸法空为座。’此即诸佛如来住此无所住处。若如是知，即住空寂舍，坐空法座，举足下足，不离道常言下便了，更无渐次，所谓不动足而登涅槃上者也。”业既传心印，寻诣曹溪礼祖塔，回游卢岳、天台及诸名山，遍寻圣迹。自荑抵雍，憩西明寺，僧众咸欲举请充两街大德，业默然，叹曰：“亲近国王大臣，非予志也。”于是至上党，节度使相国李抱真与马燧，有战功，又激发王武俊同破朱滔，功多势盛，然好闻贤善，虽千里外必持币致之。深重业名行，旦夕瞻礼，麾幢往来。常有倦色，谓门人曰：“吾本避上国浩穰名利，今此又烦接君侯，岂娱心哉！”言讫，逍遥绵上抱腹山。又往清凉山，于金阁寺读《大藏经》，星八周天，斯愿方毕。复振锡南下，至于西河，初止众香佛刹，州牧董叔缠请住开元精舍。业谓弟子曰：“吾自至此，不复有游方之意，岂吾缘在此邪？”于是撞钟告众，作狮子吼，雨大法雨，垂二十年。并汾之人悉皆向化。宪宗皇帝御宇十有四年，素向德音，乃下诏请入内，辞疾不行。明年再降纶旨，称疾如故。穆宗皇帝即位之年，圣情虔虔，思一瞻礼，乃命两街僧录灵准公远赍敕旨迎请。准至作礼，白之曰：“知师绝尘物表，糠粃世务。法委国王，请师熟虑！此回恩旨，不比常时，愿师必顺天心，不可更辞以疾。相时而动，无累后人。”业笑曰：“贫道何德，累烦圣主？行即行矣。道途有殊。”于是剃发澡浴，至中夜，告弟子慧？等曰：“汝等见闻觉知之性与太虚同寿，不生不灭。一切境界本自空寂，无一法可得迷者。不了即为境惑，一为境惑，流转不穷。汝等常知心性本自有之，非因造作，犹如金刚不可破坏。一切诸法如影如响，无有实者，故经云：‘唯有一事实，余二则非真。常了一切空，无一物当情。’是诸佛同用心处。汝等勤而行之。”言讫，加趺而坐，奄然归寂。呜呼，可谓于生死得自在也！俗龄六十二，僧腊四十二。道俗号慕，如丧考妣，乃备香花幢幡，迁全身就于城西练若，积香薪而行荼毗。乃有卿云自天，五色凝空，异香西来，郁馥氤氲，阖境士庶咸皆闻睹。及薪尽火灭，获舍利罗，璨若珠玉。弟子慧？、行勤、虔纵、义幽、元度、怕泰等泣血收之，殓以金棺。乃

命郢匠琢石为塔，以长庆三年十二月二十一日安葬于练若之庭。业迁化之岁，州牧杨潜得僧录准公具述其事，遂为碑颂。敕谥大达国师，塔号澄源焉。

○唐长沙东寺如会传

释如会，韶州始兴人也。大历八年，止国一禅师门下，后归大寂法集。时禅客仰慕，决求心要，僧堂之内，床榻为之陷折，时号“折床会”，犹言凿佛床也。后徇请居长沙东寺焉。自大寂去世，其法门鼎盛，时无可敌，谚谓东寺为“禅窟”，断可知矣。时相国崔公群慕会之风，来谒于门，答对浏亮，辞咸造理。自尔为师友之契。初群与皇甫议上宪宗尊号，因被构，出为湖南观察，闲豫，归心于会也。至穆宗长庆癸卯岁，终于寺，春秋八十。时井泉预祐，异香丰馥。迁塔于城南，廉使李翱尽毁近城坟塔，唯留会所瘞浮图，以笔题曰：“独留此塔，以别贤愚矣。”刘膳部轲著碑焉。敕谥传明大师，塔曰永际。亦呼所居为“夹山和尚”是欤。

○唐南阳丹霞山天然传

释天然，不知何许人也。少入法门，而性梗概，谒见石头禅师，默而识之，思召其自体得实者，为立名天然也。乃躬执爨，凡三年，始遂落饰。后于岳寺希律师受其戒法，造江西大寂会。寂以言诱之，应答雅正。大寂甚奇之。次居天台华顶三年，又礼国一大师。元和中，上龙门香山，与伏牛禅师为物外之交。后于慧林寺遇大寒，然乃焚木佛像以御之。人或讥之，曰：“吾荼毗舍利。”曰：“木头何有？”然曰：“若尔者，何责我乎？”元和三年，晨过天津桥，横卧，会留守郑公出，呵之不去。乃徐仰曰：“无事僧。”留守异之，乃奉束素衣两袭，月给米面。洛下翕然归信。至十五年春，言“吾思林泉”，乃卜南阳丹霞山结庵。以长庆四年六月告门人曰：“备沐浴，吾将欲行矣。”乃戴笠策杖入屨，垂一足，未及地而卒，春秋八十六。膳部员外郎刘轲撰碑纪德焉。敕谥智通禅师，塔号妙觉。

○唐常州芙蓉山太毓传

释太毓，姓范氏，金陵人也。年才一纪。志在出家，乃礼牛头山忠禅师而师事焉。于是勇猛精进，求其玄旨，法器外朗，神宇禁内融。虽明了一乘，而具足万行。往雍京安国寺，进受具戒，褒然出众。加复威仪整肃，妙相殊特，如大海之不可测，如虚空之不可量。巡礼道场，摄心净域，虽智能通达，不假因师，而印可证明，必从先觉。遂谒洪井大寂禅师，睹相而了达法身，刹那而顿成大道。于时天下佛法极盛，无过洪府，座下贤圣比肩，得道者其数颇众。毓与大彻禅师、大宣教禅师、大智禅师，皆昆仲也，既而南北观方，曾无告憚，俾广闻见，闲养圣胎耳。元和十三年，止于毗陵义兴芙蓉山，故得名于山焉。毓为缘作因，有应无著，故所居感化，所至悦随，道俗相望，动盈万数。自此江南之人悟禅理者多矣。时相国崔公群坐失守出分司，后为华州，由三峰出镇宣城。其地虽通，其人则遐。崔公深乐礼谒，致

命诚请，毓以感念而现，大悲为心，莫不果欲随缘，游方顺命。宝历元年至于宛陵禅定寺，所以随顺而扬教也。至明年，告归齐云山，九月合朔，色相不动而示灭千山之院，享年八十，僧腊五十八。是日也，天地如惨，草木如摧，鸟兽悲啼，云泉断咽。缁徒士庶，孺慕充穷。十月，栖神于院之庭，从其宜也。弟子志孚、契真、清幹等既吾师示灭而后学徒存。大和二年，相国韦处厚素尚玄风，道心惇笃，以事奏闻。天子爰降德音，褒以殊礼，追谥号塔名。越州刺史陆亘詵翰论撰焉。

○唐南岳西园兰若昙藏传（灵象超岸）

释昙藏，不知何许人也，得禅诀于大寂之门。后见石头希迁禅师，所谓再染谓之赤贞也。贞元二年，嘉遁于衡岳。栖止峰之绝顶。晚年苦于脚疾，移下西园结茅，参请者繁炽。大和元年终于岳中，享龄七十。先是藏养一犬，尤灵，尝夜经行息坐次，其犬衔藏之衣归房，乃于门阃旁伏守，而吠声不绝，频奋身作猛噬之势。诘且视之，东厨有大蟒蛇，身长数丈，蟠绕小舍，为之岌。呀张其口，齟齬其声，毒气漫然。侍者白藏亟去回辟，藏曰：“死而可逃，何远之有？彼以毒来，我以慈受。毒无自性，激发则强。慈苟无缘，冤亲一揆。无人无我，法性俱空。”言讫，其蟒蛇按首徐行，闪然不见。又尝一夜，有群盗，其犬亦衔藏衣。藏语盗曰：“诸君，山叟茅舍有中意物，任拈去，终无少吝之分。”盗感其言，散分下山矣。又荆州永泰寺释灵象，姓萧氏兰陵人也。其胄裔则后梁为周所灭，支属星分，象父居长沙为编户矣。生象，宛有出尘之誓，遇诸禅会，罕不登临，止泊维青，优游自得。长庆元年住百家岩寺。未几，徙步江陵，太守王潜请居永泰寺。太和三载六月二十三日，终于住寺，春秋七十五。建塔于州北，存焉。又释超岸，丹阳人也。先遇鹤林素禅师，处众拱默而已。天宝二载，至抚州兰若，得大寂开发。四方毳侣依之。

○唐鄂州大寂院无等传

释无等，姓李氏，今东京尉氏人也。负志卓犖，辞气贞正。少随父官于南康，频游梵刹，向僧瞻像，往即忘归。既作沙门，遇道一禅师在龚公山，学侣蚁慕。等求法于其间，挺然出类。元和七年游汉上。后至武昌，睹郡西黄鹤山奇秀，遂结茅分卫。由此巴、蜀、荆、襄尚玄理者，无远不至矣。大和元载，属相国牛公僧孺出镇三江，闻等道香，普熏遐迩，命驾枉问。风虎相须，为法重人。牛公虑其兰若不隶名藉，特为奏题曰“大寂”也。憧憧往来，堂无虚位。至四年十月示灭，年八十二。弟子誓通奉全身入塔焉。

○唐天目山千顷院明觉传

释明觉，俗姓猷，河内人也。祖为官岭南，后徙居为建阳人也。觉儒家之子，风流蕴藉，好问求知，曾无倦懈。宿怀道性，闻道一禅师于佛迹岭行禅法，往造焉，遂依投剃染。由此即愿观方衡岳、天台、四明，遍尝法味。复于径山留心请决数夏，

负薪，面黑干手胝。下山至杭州大云寺，禁足院门。续移止湖畔青山顶，结庵而止。属范阳卢中丞向风躬谒，召归州治大云寺住持。元和十五年避嫌远器，隐天目山。是山也特秀，基墟跨涉四郡。有上下龙潭，深不可测，怪物往往出于中。有白鹿，毛质诡异，土人谓为山神也。觉遁是中，檀信为禅宇。长庆三年春及冬至明年二月大旱，野火蔓延，欲烧院，僧惶辩，觉曰：“吾与此山有缘，火当速灭。”少选，雷雨骤作，其火都灭，远近惊叹。以大和五年七月十九日示疾而亡。

○唐杭州秦望山圆脩传

释圆修，姓潘氏，福州闽人也。生而歧嶷，长而俊迈。忽思拔俗，寻事名师，剔发变衣，年满，于嵩阳会善寺纳戒。既而仪表容与，日新厥德，研穷经论，俄约观方。遇百丈山海禅师，根教相符，遂明心要。持杯振锡，而抵于杭。见秦望山峻极之势，有长松枝繁结盖，遂栖止于松巅。时感鹊复巢于横枝，物我都忘，羽族驯狎。由兹不下，近四十秋。每一太守到任，则就瞻仰，号鸟窠禅师焉。泊元和初，邦伯裴常棣酷重其道，请下结庵者至于三四，或为参请去说法，裴侯命八属宰官同力造伽蓝，移废额曰招贤以居之。大和七年癸丑岁九月二十二日，端坐，怡然归寂，享年九十九，僧腊八十。杭之累政良守无不倾重，税驾树阴，请谈玄极，不觉更仆移辰矣。今塔在石甌山下，南岳僧唯贞为塔铭焉。近有盗发其塔，且多怪异，止收得铭志而已。

○唐池州南泉院普愿传

释普愿，俗姓王，郑州新郑人也。其宗嗣于江西大寂，大寂师南岳观音让，让则曹溪之冢子也，于愿为大父，其高曾可知也，则南泉之禅有自来矣。愿在孕，母不喜荤血。至德二年，跪请于父母乞出家，脱然有去羈鞅之色。乃投密县大隈山大慧禅师受业，苦节笃励，胼胝鞞？，不敢为身主，其师异之。大历十二年，愿春秋三十矣，诣嵩山会善寺调律师受具，习相部旧章，究毗尼篇聚之学。后游讲肆，上《楞伽》顶，入《华严》海会，挾《中百门》观之关键，领玄机于疏论之外。当其锋者，皆旗靡辙乱。大寂门下八百余人，每参听之后，寻绎师说，是非纷错。愿或自默而语，群论皆弭曰：“夫人不言乃言尔耳。”自后舍景匿耀，似不能言者，人以其无法说，或扣其关，亦坚拒不泄。时有密赜其机者，微露头角，乃知其非无法说，时未至矣。贞元十一年，挂锡池阳南泉山，堙谷刊木，以构禅宇，蓑笠饭牛，溷于牧童。斫山畚田，种食以饶。足不下南泉三十年矣。夫洪钟不为莛？发声，声之者，故有待矣。大和年初，宣使陆公亘、前池阳太守皆知其抗迹尘外，为四方法眼，与护军彭城刘公同迎请下山，北面申礼。不经再岁，毳衣之子奔走道途，不下数百人。大和甲寅岁十月二十一日示疾。十二月二十三日，有白虹贯于禅室后峰，占之者：得非南泉谢世乎？是日西峰巨石崩，声数十里。当昼，有乳虎绕禅林而号，众咸异之。二十五日东方明，告门人曰：“星翳灯幻亦久矣，勿谓吾有去来也。”言讫而谢，春秋八十七，僧腊五十八。契元、文畅等凡九百人，皆布衣墨巾，泣血于

山门。赴丧会葬者相继于路，哀号之声震于崖谷。乙卯岁，门人奉全身于灵塔，从其教也。膳部员外郎史馆修撰刘轲钦若前烈，追德颂美焉。

○唐澧阳云岩寺昙晟传

释昙晟，俗姓王氏，钟陵建昌人也。始生有自然胎衣右袒，犹缁服焉。遂请出家于石门，年满具法，参见百丈山海禅师。二十年为侍者，职同欢喜，法必我闻，身若中涓，心居散位。续受药山举发，全了无疑，化徒孔勤，受益者众。以大和三年己酉十月二十七日示灭。敕谥大师号无相，塔名净胜焉。

系曰：商那和修，华言胎衣也，以其生带衣而诞，似缁肉而非，幼为绷褓，长且称身；出家成法服，至入灭阇维，方为煨烬焉。晟师之有胎衣，止不及为婴儿已往之服耳，此近叔离尼、商那尊者也，思过半矣。何邪？晟师去圣悬远，和修佛灭百年将胎衣示有行果之徒也，今晟以胞袒络化其教理之世，不其难乎！故曰思遇半矣。

○唐荆州福寿寺甄公传

释甄公，姓鲁氏，江陵人也。少而警慧，七岁诵通《诗》、《雅》，遂应州举，三上中第，未释褐。与沙门议论玄理，乃愿披缁，投福寿寺辩初法师，以为模范。后于洛京昭成寺讲法数座，因礼嵩山禅师，通畅心决。方至丹阳茅山，寻挂锡于苏州楞伽山，四远参玄者骈肩叠足矣。时白乐天牧是郡，接其谈道，不觉披襟解带，心游无物之场，得甄之阃阒矣。遂坚请出流水寺，不乐安止，以山水为娱情之趣耳。大和三年，示疾云终，九十岁。以其年四月十七日入塔焉。

○唐赵州东院从谔传

释从谔，青州临淄人也。童稚之岁，孤介弗群，越二亲之羁绊，超然离俗。乃投本州龙兴伽蓝，从师剪落。寻往嵩山琉璃坛纳戒，师勉之听习，于经律但染指而已。闻池阳愿禅师道化翕如，谔执心定志，钻仰忘疲。南泉密付授之，灭迹匿端，坦然安乐。后于赵郡开物化迷，大行禅道。以真定帅王氏阻兵，封疆多梗，朝廷患之。王氏抗拒过制，而偏归心于谔。谔尝寄尘拂上王氏曰：“王若问何处得此拂子？答道老僧平生用不尽者物。”凡所举扬，天下传之，号赵州法道。《语录》大行，为世所贵也。

○唐京兆华严寺智藏传

释智藏，姓黄氏，豫章上高人也。父为洪州掾。藏随父入报国寺，见供奉皓月讲《涅槃经》，微体经意，乐入佛门。年甫十三，割恩爱，辞父母，于开元寺宗法师所

受学。后修禅法，证大寂、一公宗要矣。建中元年，入长安。卢元顥素奉其道，举奏入内供养，敕令住华严寺。辇毂之间，玄学者孔炽，就藏之门，若海水之归投琴之壑矣。大和九年终于住寺，三月十二日入塔焉。

○唐潭州道吾山圆智传

释圆智，俗姓张，豫章海昏人也。总？之年，顿求出离，礼涅槃和尚，躬执瓶屨。爰登戒地，誓叩禅门，见乎药山，示其心决。后居长沙道吾山，海众相从，犹蜂蚁之附王焉。以大和九年乙卯九月十一日长逝，享年六十七。阍维，得不灰之骨数片，脑盖一节，特异而清莹，其色如金，其响如铜。乃建塔于石霜山，敕谥修一大师。宝相之塔。得其道者则普会焉。智公初领悟药山宗旨，俨师诲之曰：“吾无宝玉大弓以为分器，今赏汝犊鼻一腰，虽云微末，而表亲褻欤？”南岳僧玄泰著碑颂。

○唐明州大梅山法常传

释法常，俗姓郑，襄阳人也。稚岁从师于荆之玉泉寺。凡百经书，一览必暗诵，更无遗忘。冠年，受具足品于龙兴寺。容貌清峻，性度刚敏，纳衣囊钵，毕志卯斋。贞元十二年，自天台之于四明余姚之南七十里，寓仙尉梅子真之旧隐焉。昔梅福初入山也，见多龙穴，神蛇每吐气成楼阁，云雨晦冥。边有石库，内贮仙药神仙经籍。常寄宿于房，乃梦神人语之曰：“君非凡夫，因话及石库中圣书悬记既往将来之事，受之者为地下主，不然为帝王之师传矣。”常谓之曰：“石库之书，非吾所好。昔僧稠不顾仙经，其卷自亡。吾以涅槃为乐，厥寿何止与天偕老邪？”神曰：“此地灵府，俗气之人辄难居此，立致变怪。”常曰：“吾寓迹于梅尉之乡，非久据焉。”因号梅山也。由是编苫伐木，作覆形之调，居仅四十年，验实非常之人也。开成年初院成，徒侣辐凑，请问决疑，可六七百纳徒矣。四年，常忽示疾。九月十九日，山林摇荡，鸟兽悲鸣，辞众而逝，报龄八十八，戒腊六十九。十月十九日焚于南涧，收舍利，五色璨然圆转焉。常先隐梅岭，有僧求拄杖见之，白盐官安禅师曰：“梅子熟矣，汝曹往寻，幸能疗渴也。”进士江积为碑云尔。

○唐扬州慧照寺崇演传

释崇演，姓段氏，东平人也。出家于本州龙兴寺慧超法师之门。游方问道，见嵩阳善寂禅师，示其心法。后居都梁山，当于淮浦，四面来商毳客影附焉。相国李公绅镇抚广陵，而性刚严，少所接与，偏轻释子。或允相见，必问难锋起，祇应不供者，多咄叱而出。绅遣衙吏章幼成传意召演入府，褻对诣理，谈论铿然。绅悯然，翻不测其畛域，特加归信，请居慧照寺化导。同声相应，仅于千众。开成二年，终于净院，春秋八十四。以十月二十三日全身入塔云。

○唐杭州盐官海昌院齐安传

释齐安，俗姓李，实唐帝系之英。先人播越，故生于海门郡焉，深避世荣，终秘氏族。安在胎，母梦日兆祥。既诞而神光下烛。数岁，有异僧款门召见，摩顶曰：“凤穴振仪，龙宫藏宝，绍终之业，其在斯乎！及臻？角，亟请出家，父母呵止。安曰：“禄利之养，止于亲尔。冥报之利，不其远邪？皂组之荣，止于家尔。济拔之益，不其广邪？”二亲感其言而顺从，遂依本郡云琮禅师。虽勤劳谦默，和光同尘，而萤月殊晖，鸡鹤异态。年满登具，乃诣南岳智严律师，外捡律仪，内照实相。后闻南康龚公山大寂禅师随化度人，慈缘幽感，裹足振锡，一日造焉。大寂欣其相依，论持不倦。及其蛻去，安尽力送终。元和末，安春秋已逾七十，而游越之萧山法乐寺，以其古制垣屋靡完，补坏扶倾，不克宴坐。时海昌有法听者，缁林翹楚，于放生池鉢废地肇葺禅居焉。听谦而不自有，延请安主之，四海参学者麋至焉。道化之盛，翕然推伏。安不言寒暑，不下堂庑，无流眄，无倾听，如此者盖有年矣。而又挺身魁岸，相好庄严，眉毫绀垂，颅骨圆耸，望之者如仰嵩华而揖沧溟，曾无测其高深也。以会昌二年壬戌十二月二十二日泊然宴坐，俄尔示灭。先时竹柏尽死，至是精彩益振。爰有清响叩户，祥光满室，如环佩之锵鸣，若剑戟之交射。瑞相尤繁，事形别录。又安悬知宣宗皇帝隐曜缁行，将来法会，预诫知事曰：“当有异人至此，禁杂言，止横事，恐累佛法。”明日，行脚僧数人参礼，安默识帝，遂令维那高位安置，礼殊他等。安每接谈话，益知贵气，乃曰：“贫道谬为海众围绕，患斋不供。就上座边求一供疏。”帝为操翰摅辞，安览惊悚，知供养僧赍去，所获丰厚，殆与常度不同。乃语帝曰：“时至矣，无滞泥蟠。”嘱以佛法后事而去。帝本宪宗第四子，穆宗异母弟也，武宗怕憚忌之，沉之于宫厕，宦者仇公武潜施拯护，俾髡发为僧，纵之而逸。周游天下，险阻备尝。因缘出授江陵少尹，实恶其在朝耳。武宗崩，左神策军中尉杨公諷宰臣百官迎而立之，闻安已终，怆悼久之。敕谥大师曰悟空，乃以御诗追悼。后右貂卢简求为建塔焉。

○唐京师圣寿寺恒政传

释恒政，姓周氏，平原人也。未入法前，随入乡校，殊不嗜书籍。或见佛经，耽味不舍。后弃俗从师，就本州延和寺诠澄法师下受诵经法。既登戒已，问道于嵩少，决了无壅，遁迹三峰，放荡自在。无几，入太一山中，甫行风教，学人蚁慕。大和中，文宗皇帝酷嗜蜃蛤，沿海官吏先时递进，人亦劳止。一日，御馔中盈筯而进，有擘不张呀者，帝观其异，即焚香祝之。俄为菩萨形，梵相克全，仪容可爱，遂致于金粟檀香合，以玉绵绵覆之，赐兴善寺，令致礼之。始宣问群臣：“斯何瑞也？”相国李公德俗奏曰：“臣不足知，唯知圣德昭应。其诸佛理，闻终南山有恒政禅师，大明佛法，博闻强识。”诏入宣问，政曰：“贫道闻物无虚应，此乃启沃陛下之信心耳。故契经中应以此身得度者，即现此身而为说法也。”帝曰：“菩萨身已见，未闻说法。”政曰：“陛下睹此为常非常耶？信非信耶？”帝曰：“稀奇事朕深信焉。”政曰：“陛下已闻说法了。”皇情悦豫，得未曾有，敕天下寺院各立观

音像，以答殊休。其菩萨，至会昌毁佛舍，乃亡所在。因留政内道场中，累辞入山，宣住圣寿寺，至武宗即位，忽入终南。或问其故，曰：“吾避仇，乌可已乎哉？”后终山舍，年八十七。阖维，收舍利四十九粒，以会昌三年九月四日入塔。后有废教之敕，政之先见，若合符节焉。

系曰：蜃蛤中胡得菩萨像乎？通曰：“有所警发，时一现耳。近闻伪唐李氏国境荐饥，陂湖间多生蚌，百姓竞取而食，其年免殍什者十有七八。明年丰，民犹采之。无何，有获巨蚌可二尺余，提归擘磔，击淪曾无少损。其人咒垂放之，俄自开张，吐出佛像，长仅尺许，相好具全，若真珠色，号曰：‘珠佛’焉。献李氏，后遗与梵僧焉。此意所不及处现形者，盖经中化肉山鱼米以资饥谨。岁既丰登，胡不属厌，故现相止足之也。”

○唐大沔山灵祐传

释灵祐，俗姓赵，祖父俱福州长溪人也。祐？年戏于前庭，仰见瑞气祥云，徘徊盘郁，又如天乐清奏，真身降灵，衢巷谛观，耆艾莫测。俄有华巖之叟，状类鬪宾之人，谓家老曰：“此群灵众圣标异。此童，佛之真子也，必当重光佛法。”久之，弹指数四而去。祐以椎髻短褐，依本郡法华律师执劳，每倍于役。冠年剃发，三年具戒。时有钱塘上士义宾授其律科。及入天台，遇寒山子于途中，乃谓祐曰：“千山万水，遇潭即止。获无价宝，赈恤诸子。”祐顺途而念，危坐以思，旋造国清寺，遇异人拾得申系前意，信若合符。遂诣泐潭谒大智师，顿了祖意。元和末，随缘长沙，因过大沔山，遂欲栖止。山与郡郭十舍而遥，甿无人烟，比为兽窟。乃杂猿猱之间，橡栗充食，浹旬，有山民见之，群信共营梵宇。时襄阳连率李景让统摄湘潭，愿预良缘，乃奏请山门号同庆寺。后相国裴公相亲道合。祐为遭会昌之澄汰，又遇相国崔公慎由崇重加礼，以大中癸酉岁正月九日盥漱毕，敷座瞑目而归灭焉。享年八十三，僧腊五十九。迁葬于山之右梔子园也。四镇北庭行军泾原等州节度使、右散骑常侍卢简求为碑，李商隐题额焉。

○唐黄州九井山玄策传

释玄策，俗姓鲁，会稽人也。幼随父商估，赴天台山光明会，乃隋朝智綽禅师立教，年别九月，远近州邑黑白二众鸠聚。策睹殊异，遂于禅林寺智广师下出家。游方见江西大寂，顿开翳障。及遍参问，睹黄陂九井山奇秀，乃结茅为舍，学侣若蝉之走明也。或慰策曰：“师之耐寂漠如此乎？”策曰：“致道者忘心矣，吾乐甚哉。”以大中八年现疾而灭。续敕谥大师曰圆寂，塔名智觉焉。

卷十二

◎习禅篇第三之五（正传二十人附见四人）○唐杭州大慈山寰中传

释寰中，姓卢氏，河东蒲坂人也。禀灵特异，挺质殊伦，身支侖亭，顶骨圆峻，其声若钟响，其色犹脂凝。学通终古，辞实丰贍。年二十五，随计中甲科，然未塞其怀，复思再捷。无何，遭母之忧，遂庐于墓所。及服阕，径往北京童子寺出家。二稔未周，诸经皆览。明年，往嵩岳登戒，肄习律部。于兹博通，忽慕上乘，决往百丈山，深得玄旨。后隐南岳常乐寺，结茅于山椒。谏议大夫崔公深重其操，因别立方丈。虞渊景晞，一饭永日。然其乏水，羸瓶远求。俄尔深宵，有虎嗥啸庐侧，诘旦视之，果湓泉坼地而涌，足其汲用。后之杭，浙江之北有山号大慈。居未久，檀信爰臻。旋成巨院，四方僧侣参礼如云。属武宗废教，中衣短褐，或请居戴氏别墅焉。大中壬申岁，太守刘公首命剃染，重盛禅林。壬午岁二月十五日囑累，声毕而终。时渐溽暑，验其身一无变异，而顶门燠润。冬窆于塔所，享年八十三，法腊五十四。有说常乐寺山虎跑泉，当中公灭日，忽焉干涸。异哉！止资中之受用耳。至乾符丁酉岁，敕谥大师，号性空，塔名定慧也。缙云太守段成式为真赞焉。

○唐洛阳韶山寰普传

释寰普者，不知何许人也。禀形淳粹，克性谦冲。居于丑夷，下风请业汪汪然，其识度辄难拟议。具戒之后，经论温寻。然后杖锡南游澧阳，遇夹山而得心契，有参学举问，垂手携归，不使一机失其开诱。其所不荐，劝令披览经法，亦近秀寂之遗风耳。

○唐衡山昂头峰日照传

释日照，姓刘氏，歧下人也。家世豪盛，幼承庭训，博览经籍，复于庄老，而宿慧发挥，思从释子。即往长安大兴善寺昙光法师下，禀学纳戒，传受经法，靡所不精。因游嵩岳，问圆通之诀，欣然趣入。后游南岳，登昂头峰，直拔苍翠，便有终焉之志。庵居二十载，属会昌武宗毁教，照深入岩窟，饭栗饮流而延喘息。大中宣宗重兴佛法，率徒六十许人还就昂头山旧基，结苫盖，构舍宇。复居一十五年，学人波委。咸通中示灭，春秋一百八岁。至三年二月三日入塔，立碑存焉。天下谓其禅学为昂头照是欤。

○唐朗州德山院宣鉴传

释宣鉴，姓周氏，剑南人也。生恶荤膻，少多英敏，宿贲异操，恳愿出尘。大龙不屈于小庭，俊鹗必腾其层汉，既除美饰，当预僧流。从受近圆，即穷《律藏》，其诸性相，贯习偕通。闻重湖间禅道大兴，乃抗志云游，造龙潭信禅师，则石头宗师

之二叶也。始唯独居一室，鉴强供侍之。一夕龙潭持一枝火授鉴，鉴接而行数步，且曰：“久闻龙潭到来，龙之与潭，俱不见欤？”信曰：“子亲到矣。”机与教符，日亲丈室三十余年。后止澧阳。居无何，属武宗搜扬。洎大中还复法仪。咸通初，武陵太守薛延望坚请，始居德山，其道芬馨，四海禅徒辐凑。伏腊，堂中常有半千人矣。其于训授，天险海深，难窥边际。雪峰参见，鉴深肯重。以咸通六年乙酉岁十二月三日，忽告诸徒曰：“扪空追响，劳汝神邪？梦觉觉非，复有何事？”言讫安坐而化，春秋八十四，僧腊六十五。身据床坐，卓然七日如生在焉。天下言激箭之禅道者，有德山门风焉。今襄、邓、汉东法孙极盛者是欤。

○唐明州栖心寺藏奘传

释藏奘，俗姓朱氏，苏州华亭人也。母方娠及诞，常闻异香。为儿时尝堕井，有神人接持而出。？岁出家，礼道旷禅师。及弱冠，诣嵩岳受具。母每思念涕泣，因一目不视，迨其归省，即日而明。母丧哀毁，庐墓间颇有征祥，孝感如是，由此显名。寻游方访道，复诣五泄山，遇灵默大师。一言辨析，旨趣符合。显晦之道，日月之所然也。会昌、大中，衰而复盛。惟奘居之，荧不能惑，焚不能热，溺不能濡者也。洎周洛再构长寿寺，敕度居焉。时内典焚毁，梵夹煨烬，手辑散落，实为《大藏》。寻南海杨公收典姑苏，请奘归于故林，以建精舍。大中十二年，鄞水檀越任景求舍宅为院，迎奘居之。剡寇求甫率徒二千，执兵昼入，奘瞑目宴坐，色且无挠。盗众皆悸慑，叩头谢过。寇平，州奏请改额为栖心寺，以旌奘之德焉。凡一动止，禅者必集，环堂拥榻，堵立云会。奘学识泉涌，指鉴歧分。诘难排纵之众，攻坚索隐之士，皆立褰苦雾，坐泮坚冰，一言入神，永破沈惑。以咸通七年秋八月三日现疾告终，享年七十七，僧腊五十七。预命香水剃发，谓弟子曰：“吾七日在矣。”及期而灭。门又号慕，乃权窆天童岩，已周三载。一日，异香凝空，远近郁烈。弟子相谓曰：“昔师嘱累，令三载后当焚我身。今异香若此。”乃发塔视之，俨若平生。以其年八月三日依西域法焚之，获舍利数千粒，其色红翠。十三年，弟子戒休赍舍利，述行状，诣阙请谥。奉敕丧谥，易名曰心鉴，塔曰寿相。奘在洛下长寿寺谓众曰：“昔四明天童山僧昙粹是吾前生也，有坟塔存焉。”相去辽远，人有疑者，及追验事实，皆如其言。初任生将迎奘，人或难之。对曰：“治宅之始，有异僧令大其门，二十年之后，当有圣者居之。”比奘至止，果二十年矣。又奘将离姑苏，为徒众留拥，乃以棕拂与之曰：“吾在此矣，汝何疑焉？”暨乎潜行，众方谕其深旨。又令寺之西北隅可为五百墩以镇之。或曰：“力何可致？”奘曰：“不然，作一墩殖五株柏，可也。”凡微言奥旨，皆此类也。刺史崔琪撰《塔碑》，金华县尉邵朗题额焉。

○唐真定府临济院义玄传

释义玄，俗姓邢，曹州南华人也。参学诸方，不憚艰苦。因见黄蘗山运禅师，鸣啄同时，了然通彻。乃北归乡土，俯徇赵人之请，住子城南临济焉。罢唱经论之徒，

皆亲堂室，示人心要，颇与德山相类。以咸通七年丙戌岁四月十日示灭。敕谥慧照大师，塔号澄虚。言教颇行于世，今恒阳号临济禅宗焉。

○唐洛京广爱寺从谏传（鉴宗）

释从谏，姓张氏，本南阳人也，徙居广陵，生于淮甸焉。为性倜傥，器宇崇峙，于闾里间，为时畏服。遇相工曰：“子身長八尺，眉目秀朗，他日必荷荣寄。”谏曰：“心不愿仕，于荣寄何有？”相工曰：“所寄荷不可测也。”越壮室之年，忽深信佛理，遂舍妻孥，求僧披剃焉。甫登戒地，颇护心珠，因悟禅那顿了玄理。方数十载，同好之者自远而来请问。谏一一指订，俾其开觉。寻游洛下广爱寺挂锡。时禅客鳞集，如孝子之事父母焉。洛中有请谏设食，必排位对宾头卢尊者，其为人之钦奉皆此类矣。属会昌四年诏废佛塔庙，令沙门复桑梓，亦例澄汰。乃乌帽麻衣，潜于皇甫氏之温泉别业。后冈上乔木骈郁，巨石砥平，谏于夏中常就此入定，或补毳毳事。忽遇颓云驶雨，霆电击石，烈风兼至，凡在此者惊奔恐慑。谏唯欣然，加趺而坐，若无所闻者。或问谏，曰：“恶畜生何尔？”大中初，宣皇诏兴释氏，谏还归洛邑旧居。其子一日自广陵来覲，适与谏遇于院门，威貌严庄，不复可识。乃问曰：“从谏大德所居？”谏指之东南可寻。其子既去，遂阖门不出，其割裂爱网又若此也。咸通七年丙戌岁夏五月，忽出诣檀越家辞别曰：“善建福业，贫道秋初当远行，故相闻耳。”至秋七月朔旦，旦盥手焚香，念慈氏如来已，右胁而卧，呼门人玄章，诫之曰：“人身难得而易失，急急，于物无心，无为流转，无生灭法，一切现存。今乃生也有涯，暂与尔别。”是日无疾而化，行年八十余矣。玄章等奉遗旨，送尸于建春门外尸陀林中，施诸鸟兽。三日复视之，肌貌如生，一无近者。遂以饼饵覆之，经宿有狐狼迹，唯啖所覆，身且俨如。乃议用外国法焚之，收合余烬，起白塔于道傍。人先归信，香火不绝焉。次有杭州径山院释鉴宗，湖州长城人也。姓钱氏，即礼部侍郎徽之孙。父晟有疾，宗割股肉馈啖之，给云“他畜之肉”。未几病间，孝誉闻于亲里，乃求出家。时州开元寺有上都临坛十望大德内供奉高闲，闲善草隶，尝对懿宗御前书，甚高华望，宗誓礼为师。后出学，涉通《净名》、《思益经》，遂常讲习。闲公亦示其笔法，渐得凤毛焉。倏往谒盐官悟空大师，随众参请，顿彻心源。却复故乡，劝人营福。咸通三年辛巳，巡历名山，遂止天目东峰径山焉。道俗归心，恢扬法教。出弟子尤者天童山咸启、敕赐紫衣背山行满、皆分枝化物，至七年丙戌闰三月五示灭。迁塔于大寂岩下，梁乾化五年，吴越国王尚父钱氏表请追谥大师曰无上，祖门传法号为径山第二祖。时吴兴沈？者自号白牙先生，述德为赞记焉。

○唐洪州洞山良价传

释良价，俗姓俞氏，会稽诸暨人也。少孺从师于五泄山寺。年至二十一，方往嵩山具戒焉。登即游方，见南泉禅师，深领玄契。续造云岩，疑滞顿寝。大中末，于斯丰山大行禅法。后盛化豫章高安洞山，今筠州也。价以咸通十年己丑三月朔旦，命

剃发披衣，令鸣钟，奄然而往。时弟子辈悲号，价忽开目而起曰：“夫出家之人心不依物，是真修行。劳生息死，于悲何有？沦丧于情，太粗著乎？”召主事僧令营斋：“斋毕，吾其逝矣！”然众心恋慕，从延其日，至于七辰，食具方备。价亦随斋，谓众曰：“此斋名愚痴也。”盖责其无般若欤？及僧唱随意，曰：“僧家勿事大率。临行之际，喧动如斯。”至八日浴讫，端坐而绝，春秋六十三，法腊四十二。敕谥禅师曰悟本，塔号慧觉矣。

系曰：其却留累日，古亦有之。如价之来去自由者，近世一人而已。○唐苏州藏讷传

释藏讷，俗姓程，衢州信安人也。幼岁神气朗畅，貌质魁然。元和中告亲求出家，志不可却，直造长沙岳麓，投灵智律师请事剃染，智师察其强愿不群，乃摄度之。既披法服，寻于武陵开元寺智总律师受具足尸罗，当长庆三年也。因听律范，旋穷篇聚，语同业曰：“教门繁广，然有总门。总门之急，勿过舍筏。”遂遍参禅宗，遇马素门下高足住龙牙山，知讷法器，异日告之曰：“蕴界不真，佛生非我。子之正本，当何所名？复从谁得？”讷一言领会，千辙同归。龙牙曰：“我法眼不蒙掩矣。”既遂所求，大得安静，却回柯山，盖避会昌之搜杨也。至大中六年，郡牧崔公寿重之，于州龙兴寺别构禅室，延居之。数年，北至嘉禾，信士归依，请留住至德伽蓝。又往姑苏，时崔公钧作守此郡，闻讷名久，请居南禅院。咸通八年，浙西廉使周公宝命住招隐寺。其年秋，却返嘉禾，信士吕京舍别墅造今永安院。时乾符中群寇纷纭，禅侣分散。讷曰：“盗终不至此。”及期，寇从别道行，果无所损，其先见如此。五年十月十二日，满院阴云，雉鸣鸟噪，安坐而化，弟子号哭，却苏，至六年三月中辰前别众后终，享年八十二，僧腊五十六。时澹交为讷作真赞。至乾宁中，僧神赞进状，乞追谥号塔名。士吴重裕书碑。

○唐福州怡山院大安传

释大安，姓陈氏，闽城人也。幼年入道，顿拂尘蒙。元和十二年，敕建州浦城县乾元寺置兜率坛，始全戒足。时天雨桂子及地生朱草，刺史元锡手疏其瑞，上达冕旒。遂回御札，诏改凤栖寺号灵感坛焉。安因往洪井，路出上元，忽逢一老父曰：“子往南昌，必有所得。”及咨参律学，夜闻二僧谈论，遽了三乘之旨，乃以所习付之同人。之临川，见石巩山慧藏禅师。藏之提唱，必持弓弩以拟学人。安服拜未兴，唱曰：“看箭。”安神色不挠，答对不羗。石巩乃投弩曰：“几年射，始中半人也矣。”安游五台，入龙池沐浴，虽久浸涟漪，殊无奋暴雨雹之怪，观者惊悚。后止汾山，礼大圆禅师，复证前闻而为量果也。时豫章廉使赠太尉崔贞孝公，则魏公之季父，深契玄机，敦安之道，飞疏召之，厥誉愈昌。咸通十四年，诏宜号延圣大师，赐紫袈裟一副。中和二年示疾，所止法堂巨梁中折。三年癸卯十月二十二日，坐化于怡山丈室，春秋九十一，腊六十七。续诏赠圆智大师，塔号证真。安不尝唾地，不处温房，随化而衣，天雨而裕谥法弟子慧长入关，扬安之德，故有追谥也。

博陵司空相国仰慕前烈，遂著文颂德。诗人周朴笃重安，时入山致礼焉。

○唐长沙石霜山庆诸传（洪諲、令达）

释庆诸，俗姓陈，庐陵新淦玉笥乡人也。乃祖厥考，咸不为吏，清言放荡焉。诸始十三，礼绍銓禅翁为师，于洪井西山剃{髡采}。二十三，往嵩山受具戒，便就东洛学毗奈耶。既知听制，终谓渐宗，回抵南岳，入大洑山。次届云岩，遇道吾，垂问知意，方为二夏之僧。得石霜山，便议终焉之志。道吾躬至石霜山，日勤执侍，往还问答，语在别录。诸貌古气真，世无能识。时洞山新灭，俄为远方禅侣围绕，因入深山无人之境，结茅宴坐。时众追寻，倏有见者，皆号哭交请“出为吾曹。诸将安往”？由是晨夕被游学者扣击，可无希声以应之乎？如是二十年间，堂中老宿，长坐不卧，屹若樛机，天下谓之石霜枯木众是也。南方谓之丛林者，翻禅那为功德丛林也，为四方清则者无出其右。以光启四年戊申岁二月己亥示疾，终于山院，享龄八十二，僧腊五十九。越三月十五日葬于寺西北隅二百许步，门弟子等结坟塔作螺髻形。夏四月一日广化寺释子处讷追慕往德，恐遗美声，命南岳玄泰纂录言行。诸方弟子分行其道焉。敕谥普会大师，塔曰法相。次余杭径山院释洪諲，俗姓吴，吴兴人也。年才十九，于开元寺礼无上大师出家落饰，精加佛事，罔怠巾瓶。二十二，遣往嵩岳会善寺受满足律仪，俾诵《大比丘戒》，匝七日念终，遂习毗尼。寻传经讲，自谓为僧有逸群事业，而归礼本师，曰：“汝于十二时中，将何报答四恩三有？”諲闻斯诘，恍然失措。三日忘食，本师却招诱提耳，方明本事。如是往还云岩，次洑山，各为切磋，蔚成匠手。俄而会昌中例遭黜退，众人悲泣者，惋叹者，諲晏如也。曰：大丈夫钟此厄会，岂非命也？夫何作儿女之情乎？”时于长沙遇信士罗晏，召居家供施。盖諲执白衣比丘法，初无差失，涉于二载，若门宾焉。大中初，除灭法之律，乃复厥仪，还故乡西峰院。至咸通六年，上径山覲本师。明年，无上大师迁神，众请諲嗣其法位。始唯百许僧，后盈千数。于时四众共居，肃然无过。僖宗皇帝赐院额曰“乾符镇国”。中和三年，仍赐紫袈裟。景福二年，吴越国王尚父钱氏奏举登赐法济大师。光化四年九月二十八日，辞众而卒。较溪戚长史写貌，武肃王为真赞，传法弟子庐山栖贤寺寂公、临川义直、功臣院令达。达于两浙大行道化，卒谥归寂大师焉。初，諲有先见之明。武肃王家居石鉴山，及就戍应募为军，諲一见握手，屏左右而谓之曰：“好自爱。他日贵极，当与佛法为主。”后累立战功，为杭牧，故奏署諲师号，见必拜跪，檀施丰厚，异于常数。终时执丧礼，念微时之言矣。

○唐洪州云居山道膺传

释道膺，姓王氏，门玉田人也。生而特异，神彩朗然。处于童？，崆峒稟气。宿心拔俗，争离火宅之门；拭目寻师，遂摄锻金之子。师授经法，诵彻复求。年偶蹉跎二十五，方于范阳延寿寺受具足戒。乃令习声闻律仪，膺叹曰：“大丈夫可为桎梏所拘邪！由是拥线纳，振锡环，诣翠微山问道三载。宴居，忽睹二使者冠服颇异，

勉膺曰：“胡弗南方参知识邪？”未几，有僧自豫章至，盛称洞上禅师言要。膺感动神机，遂专造焉。如是洞上垂接，复能领会。曾问曰：“我闻思大禅师向倭国为王，虚耶？实耶？”对曰：“若是思师，佛亦不作，况国王乎？”自尔洞上印许。初住三峰，后就云居提唱。时唐之季，钟氏据有洪井，倾委信诚。每一延请入州，则预洁甘子堂以礼之。乃表于昭宗，赐紫袈裟一副并师号焉。都不留意。所化之徒，寒暑相交，不下一千余众。牛头香树围绕者皆是繖檀，金翅鸟王轩翔者不齐尺。四方馈供，千里风从，如荆南帅成綖遣赍檀施，动盈巨万。以天复元年辛酉秋示疾，至明年正月三日而化焉。豫章南平王钟氏供其丧葬。时诸道禅子各依乡土所尚者，随灵龕到处，列花树帐幔粉面之饌，谓之卓祭。一期凶礼之盛，勿过于时也，猗欤！膺出世度人，满足三十年，遗爱可知也。

○唐缙云连云院有缘传

释有缘，俗姓冯，东川梓潼人也。小学之年往成都福感寺，事定兰开士，即宣宗师矣。随侍出入，多在内中。一旦宣召，帝以笔书其衫背云：“此童子与朕有缘”，由兹召体矣。大中九年，遇白公敏中出镇益部，开戒坛，即于浮众寺具尸罗也。续于京辇听习经律五腊。后身披布褐，手执墨敕，海内游行。参见小马神照，凡同时丛林禅祖无不礼谒者。乃居除州花山，及南游至武夷山，时廉使李海为筑禅室。乾符三年，至缙云龙泉大赛山，立院。因奏祠部给额，号龙安。敕度七僧，住十八载。安而能迁，止连云院焉。太守卢约者，以谏諒之诚，请入州开元等别院，四事供施焉。天祐丁卯岁四月八日，示疾，至六月朔日终于廨署，报龄七十三，腊五十二。遗旨嘱制置扬习司空主丧务，于寺南园荼毗。火灭，散分舍利数百粒。后收四十九粒并遗骨一瓶，瘞于石塔。晋开运三年乙巳岁，文泰律师撰塔碑焉。

○唐福州雪峰广福院义存传

释义存，长庆二年壬寅生于泉州南安县曾氏。自王父而下，皆友僧亲佛，清净谨愿。存生而鼻逆羣血。乳抱中，或闻钟磬，或见僧像，其容必动以是别垂爱于膝下。九岁请出家，怒而未允。十二从家君游蒲田玉润寺，有律师庆玄，持行高洁，遽拜之曰：“我师也。”遂留为童侍焉。十七落发，来谒芙蓉山恒照大师，见而奇之，故止其所。至宣宗中兴释氏，其道也涅而不缁，其身也褒然而出。北游吴、楚、梁、宋、燕、秦，受具足戒于幽州宝刹寺讫，巡名山，扣诸禅宗，突兀飘，云翔鸟逝。爰及武陵，一面德山，止于珍重而出。其徒数百，咸莫测之。德山曰：“斯无阶也，吾得之矣。”咸通六年，归于芙蓉之故山。其年圆寂大师亦自洩山拥徒至于怡山，王真君上升之地，其徒孰（孰师已嗣德山）累累而疑关，存拒而久之。则有行实者，始以存同而议曰：“我之道巍巍乎，法門围绕之所，不可造次，其地宜若布金之形胜可矣。府之西二百里山焉，环控四邑，峭拔万仞，楚潜以支圆碧，培以群青。怪石古松，栖蛰龟鹤；灵湫邃壑，隐见龙雷。山之巔，先冬而雪，盛夏而寒。其树皆别垂藤萝，葺而以为之衣，交错而不呈其形。奇姿异景，不可殚状，虽霍

童、武夷，无以加之。实闽越之神秀，而古仙之未攸居，诚有待于我也。祈以偕行去。”秋七月，穿云蹑藓，陟险升幽，将及之。存曰：“真吾居也。”其夕山之神果效灵。翌日岩谷爽朗，烟霞飞动。云庵既立，月构旋拢，繇是几法轮于无为，树空门于有地，行实乃请名其山曰雪峰，以其冬雪夏寒，取鹫岭、猴江之义。斯则庚寅逮于乙未，存以山而道任，山以存而名出。天下之释子，不计华夏，趋之若召。乾符中，观察使京兆韦公、中和中司空颖川陈公，每渴醍醐而不克就饮，交使驰恳，存为之入府，从人愿也。其时内官有复命于京，语其道其济之拔俗悟空者，请蜕浮华而来脱屣。僖宗皇帝闻之，翰林学士访于闽人陈延效，得其实奏。于是乃锡真觉大师之号，仍以紫袈裟俾延效授焉。存受之如不受，衣之如不衣。居累夏，辛亥岁朔，遽然杖屦，其徒启而不答，云以随之，东浮于丹丘四明。明年，属王侍中之始据闽越，乃洗兵于法雨，致礼于禅林，馥存之道，常东望顶手。后二年自吴还闽，大加礼异。及闽王王氏誓众养民之外，雅隆其道，凡斋僧构刹，必请问焉。为之增宇、设像、铸钟以严其山，优施以充其众。时则迎而馆之于府之东西甲第。每将俨油幢聆法论，未尝不移时。仅乎一纪勤勤恳恳，熊罴之士，因之投迹檀那；渔猎之逸，其或弭心鳞羽。戊辰年春三月示疾，闽王走医，医至粒药以授，存曰：“吾非疾也，不可冈子之工。”卒不饵之。其后札偈以遗法子，函翰以别王庭。夏五月二日，鸟兽悲鸣，云木惨悴。其夜十有八刻时灭度，俗寿八十有七，僧腊五十有九。以其月十五日塔而藏之。尔日奔走，闽之僧尼士庶，巷无居人。闽王涟如出涕，且曰：“师其舍予，一何遽乎！遣子延禀躬祭奠之，复斋僧焉。存之行化四十余年，四方之僧争趋法席者不可胜算矣。冬夏不减一千五百。徒之环足，其趋也驰而愈离，辩而愈惑。其庶几者，一曰师备，拥徒于玄沙（今安国也）；次曰可休，拥徒于越州洞岩；次曰智孚，拥徒于信州鹅湖；其四曰惠棱，拥徒于泉州招庆；其五曰神晏，住福州之鼓山。分灯化物，皆膺圣奖，赐紫袈裟，而玄沙级宗一大师焉。

系曰：雪峰道也恢廓乎！骏奔四海学人。所出门生形色不类，何邪？玄沙乘《楞严》而入道，识见天殊，其犹谚曰“青成蓝，蓝谢青，师何常？在明经”。故有过师之说。一则雪峰自述，塔铭已尽其致也。一则玄沙安立三句，决择群见，极成洞过坎？今江表多尚斯学，此学虚通，无系了达，逍遥勿拘，知乘急也。雪峰化众，切乎杜嘿禅坐，知戒急也。其能各舍一缓，以成一全，则可乎？

○唐澧州苏溪元安传

释元安，俗姓淡，凤翔游麟人也。？年于歧阳怀恩寺从兄祐律师出家。惟经与论，无不穷核。乃问道翠微，次临济，各咀法味，若饫香积之孟也。斫雕复朴，逍遥自如。闻夹山道盛德至，造澧阳当稽问车曷，又增明净。后开乐普山，寻居苏溪，答酬请益，多偶句华美，为四海传焉。以昭宗光化元年戊午十二月迁灭，享寿六十五，法腊四十六矣。临终告众，颇多警策辞句云。

○唐明州雪窦院恒通传（招贤岑师）

释恒通，俗姓李，邢州平恩人也。家传士族，幼而知学。苏秦显达，犹怀二顷之田；元亮孤高，不羨五斗之禄。纵越旻天掷地，拖紫腰金，瞬息浮华，岂裨来业？父母终礼，年甫十三，潜入鹄山访道依师。既罢丘坟，唯披释典，精虔忏诵，恳侍巾瓶，不弭初终，蒙恩剃度。年二十，于本州开元寺具戒。后往京兆荐福寺听习经律。七八年间，寻穷藏教，乃曰：“摩腾入汉，译著斯文。圣胄来梁，复明何事？”因辞北阙，径诣南方，遇招贤岑大师。大师问曰：“何处人也？”曰：“邢州人也。”招贤曰：“我道不从彼来。”通曰：“和尚还住此无？”于是有滞皆伸，无疑不决。后指洞山、石霜，皆往参焉。招贤示灭，通以弟子礼事之。咸通末，游宣城，尚书崔寓素奉禅门，攀迎庄肃，睹通仪表拔俗，问答往还，崔甚悦服。于谢仙山奏置禅院，号瑞圣，请以居之。四方毳衲之徒，不邀自聚。博陵方议奏荐师号，坚让遂寝。中和末，文德初，群寇竞起。通领徒至四明。大顺二年，郡牧黄君晟请留居雪窦焉，蔚然盛化。天祐二年七月示疾，越九日躬入浴室，却坐绳床，集众焚香，勤勤付嘱，合掌而逝。春秋七十二，夏腊五十二。以其年八月七日迁石塔于院之西南二百余步。或曰：“通临终言：我庞勋也。”此非也。高僧无作为《行录》而无此说。若观年腊，庞勋岂正弱冠来逃难邪？

○唐袁州仰山慧寂传

释慧寂，俗姓叶，韶州湏昌人也。登年十五，恳请出家，父母都不听允。止十七，再求堂亲，犹豫未决。其夜有白色光二道从曹溪发来，直贯其舍。时父母乃悟是子至诚之所感也。寂乃断左无名指及小指，器藉跪致堂阶曰：“答谢劬劳1如此，父母知其不可留，舍之。依南华寺通禅师下削染，年及十八，尚为息慈。营持道具，行寻知识。先见耽源。数年，良有所得。后参大洩山禅师，提诱哀之。栖泊十四五载，而足跋，时号跋脚驱乌。凡于商擢，多示其相。时韦胄就寂请伽？，乃将纸画规圆相，圆围下注云：“思而知之，落第二头。云不思而知，落第三首。”乃封呈达。自尔有若干势以示学人，谓之仰山门风也。海众抠衣得道者，不可胜计，往往有神异之者，倏来忽去，人皆不测。后敕追谥大师，曰智通，塔号妙光矣。今传《仰山法示成图相》，行于代也。

○唐天台紫凝山慧恭传

释慧恭，俗姓罗氏，福州闽人也。家传儒素，不交非类。母妊之初，梦所居涌出浮图，上参于天。迨恭诞生，嶷然聪悟。年十七，举进士，名随计车。将到京阙，因游终南山奉日寺，目祖师遗像，释然世纲，遂求出家。操执僧事，备历艰辛。二十有二，适值新创安国寺受具足戒。寻乃游方，缘涉荒，而无难色。尝遇黑蛇伤指，不求医而毒螫自销。见魑魅占山，谕罪福而妖物遄息。至武陵德山，诣宣鉴禅师，领会风飞，由兹道合。因挂锡，施门人礼。鉴公顺世，后游玉山，至信州，刺史营西禅院而礼之，其徒数百人，居岁余，以郛郭喧繁，复入福州长溪马冠山。自马冠抵泉州富阳山，所至之所，檀施臻集，徒侣解钵，禅坊立就，其为士庶向奉如此。

景福三年，与门人游天台，州牧京兆杜雄留之而止。杜因创瑞龙院于紫凝山，祈恭兴扬法席，以悟沦迷。缁俗云驰，香花山积。天复三年癸亥十二月午时，命众声钟，顾瞻左右，促言云去。加趺瞑目，俨然而化，春秋八十四，僧夏六十二。闾阖顿之宗，居道德之最，歿无易名，塔无题榜，足见浮名为桎梏耳。门人上足师遂植松负土，力崇塔庙，所谓法空不坏因缘矣。因缘有之，孝行曷伤于道云。

○唐杭州龙泉院文喜传

释文喜，姓朱氏，嘉禾御儿人也。母氏方娠，梦吞桃三蒂，至诞弥不味荤膻。七岁，诣本邑常乐寺僧清国下出家，国即喜之渭阳也。勤诵经并忏文十卷，方遂削染。往越州开元寺学《法华经》，集天台《文句》，即时敷演，则救蚁分中便能讲训也。开成二年局赵郡，受近圆登习《四分律》。属会昌澄汰，变素服，内秘之心无改。遇大中初年例重忏度，于盐官齐丰寺讲说。后往礼大慈山性空禅师，诲之曰：“子何不学善财遍参乎？”咸通壬午岁至豫章观音院，见仰山，喜于言下了其心契。仰山令典常祝一日有异貌僧就求斋食，喜减已食馈之。仰山预知，故问曰：“此果位僧求食，汝供给周旋否？”答曰：“辍已分回施。”曰：“汝大得利益。”七年，旋浙右，止千顷山，筑室居之。十年，余杭刘严合、马徵请居龙泉古城院，凡十一年。乾符己亥岁，巢寇掠地至余杭，喜避地湖州余不亭，刺史杜孺休请住仁王院。光启三年，武肃王钱氏始牧杭郡，降疏请住龙泉廨署，今慈光院是也。大顺元年，威胜军节使董昌、武肃王同年发表荐论，两赐紫衣。乾宁四年奏师号，曰无著。光化三年示疾，十月二十七日加趺坐而终于州郭廨署，春秋八十，僧夏六十。终时方丈上发白色光，竹树变白。十一月二十二日，迁塔于灵隐山西坞。喜形貌古朴，骨强而瘦，戒德禅门真知识也。初，喜寓居较川。广明元年夏，有蝗飞翳天，下食田苗。喜自将拄杖悬挂袈裟，标于畎浍中。其虫将下，遂厉声叱之，悉翻飞而去。十顷之苗斯年独稔，其感通如此。或云此所传得马祖细衲内袈裟以为信宝矣。迁葬之后，大复二年壬戌八月中，宣城帅田君应杭将许思叛涣纵兵大掠。发喜塔，见肉身不坏，如入禅定，发爪俱长。武肃王奇之，遣裨将邵志祭后，重封瘞焉。

○唐明州伏龙山惟靖传

释惟靖，吴门人也。年三十许，形奇貌古，且类憨痴，入国宁寺，巡僧房唱曰：“要人出家请留下。”至经藏院，见二众阇梨大德慧政，便跪拜伸诚，愿容执侍。政公允纳，与剪饰。于天台受具，暂归谢政，便寻访名山。有知识处，必经寒煖。自尔勤于禅法，未尝发言，即居定光禅师废金地道常侵星赴禅林寺晨粥，而多虎豹，随到寺门，虎踞地若伺候。靖出，复随至金地。迟明，巨迹极多。靖恐人知，以锄灭虎迹。俄患背疽，困睡，有鸬鸟粪于疮所，非久全愈。又虞冰雪，备糠粒半斗，每日以铍合菜煮食，置糠于地窖中。遇期，用米常满不耗。靖乃筑之而云：“吾被此物知，非理也。”寻居伏龙山，山可瞰海，峰势？峣，昔僧鉴诸曾隐于是。诸即唐王相国之母弟也，能文习道，刺史多往谒之。靖续遁此山，刺史黄晟常请出州，

供施繁委。末于奉川北山置院示疾坐终，享龄七十余。窆于山下，莹塔存焉。

卷十三

◎习禅篇第三之六（正传十七人附见六人）○唐今东京封禅寺圆绍传

释圆绍，姓孙氏，其先富阳人也，祖官于南燕，因为滑台白马人焉。年及识环，天然俊迈。邻儿戏玩，我且恬然；群从追随，我惟闲静。年当十八，方遂志出家，师事明福寺正觉禅师。觉见而异之，训诸徒弟，独许绍耳，曰：“真空门之伟器也。”至年二十二，于相州义檀香灯律师边受具。登即寻师访道，效祖参玄，二翼之余，一盂之外，必无他物。唯誓禅宗立雪传衣，是其素望也。至于三湘、五岭、二蜀、两京，凡曰丛林，一皆参礼。既探至赜，顿了心机，乃挂锡于夷门，即仓垣水南寺、今为开宝也。大中十年，适遇唐相国裴公休罢调商鼎，来镇魏郊，同气相求，一言道合，即命居今东上方院也。绍将聚禅徒，患其迫窄，遂开上院之西，损上益下。时檀施臻萃，倏成巨院，拥纳之流，数盈二百，横跨夷门山之峻岭焉。绍即七祖荷泽神会禅师五叶法孙也。演其无念，示以真心，了达磨之密传，极南能之深趣。时参学之众，拥从且繁。遇元帅相国王晋公铎，以绍道行通感，神耀效灵，降甘露于玄穹，沍嘉瑞于青松，奏僖宗赐院额曰双林，师号曰法济。别敕令度侍者七人，其间法会兴盛，士庶归心，仅四十载，所化人可万计，僧尼弟子五百余人。以乾宁二年乙卯七月四日谓众曰：“急急自了去，本为逃生死。若不解玄旨，何时得脱？吾景逼崦嵫，此为最后之言也。”于方丈中寂然而化，俗寿八十五，法腊六十三。敕许于本院西南隅建塔焉。越五年二月二日重开塔，发长半寸，仪貌如生。乃以香花供养七日，远近瞻礼，称叹希奇。已而行荼毗，火中迥出五色神光，收舍利百余粒，四散随心淘选，近一千粒，温润玉洁，璨烂珠圆，验五分之熏成，匪一生之构集。四众虔仰，复迎入塔，即昭宗皇帝戊午岁也。睢阳相国袁象先理于浚郊。弟子惠霭等冀终法乳，列状乞举行谥礼，梁乾化三年癸酉，太祖敕易名曰定觉，塔曰灵化。至贞明四年九月，惠霭等欲旌表师德立碑，敕允，开封尹王公瓚之文也。

○唐蕲州黄岗山法普传（休静）

释法普，姓潘氏，庐江人也。貌古情宽，拥败纳观方。元和中，因见黄岗山色奇秀，

其峰砢磈，其林郁密，中有石坛，平坦而高峙。乃放囊挂锡，于中班荆。久之，寻附树架蓬茨，仅容身而已。未几，有人自小径而至，见普惊怪，问云：“何缘至此？”曰：“某本行山麓，见巔顶腾涨，紫气盘纡可爱，意此山有尤物，故来耳。”谛视普，迟回而去。山下行者闻而寻焉。禅学之徒，不数年遽盈百数。普却之曰：“老僧独居，无物利人，君等亦无所乏。”由是星居之庵多矣。弟子广严等携成大院，禅客翕如，传其法者无算。一日，集众辞云：“吾其终矣。汝曹善住珍惜，加趺坐胡床而卒。其身不坏散，后以香泥涂渍之。至乾符中，重立碑颂云。次洛京华严寺释休静，不知何许人也。属洞山禅道风行，静往造之，袂钁所疑，若雷复于本

位焉。北返于洛邑，开演。因赴内斋，诸名公皆执经讽读，唯静并其徒俱默坐。帝宣问：“胡不转经？”酬答响应，仍皆属对，悦可帝情。寻回平阳示灭。收舍利，四处树浮图。敕谥宝智大师，塔号无为也。

○梁邓州香严山智闲传（大同）

释智闲，青州人也。身裁七尺，博闻强记，有干略。亲党观其所以，谓之曰：“汝加力学，则他后成佐时之良器也。”俄尔，辞亲出俗。既而慕法心坚，至南方礼沔山大圆禅师盛会，咸推闲为俊敏。沔山一日召对茫然，将诸方《语要》一时煨烬，曰：“画饼弗可充饥也。”便望南阳忠国师遗迹而居。偶芟除草木，击瓦砾，失笑，冥有所证，抒颂唱之，由兹盛化。终后，敕谥袭灯大师，塔号延福焉。次舒州桐城投子山释大同，姓刘氏，舒州怀宁人也。幼性刚正，有老成气度。因投洛下保唐满禅师出俗，初习安般观，业垂成，遂求华严性海。复负锡谒翠微山法会，同伏牛元通激发请益，大明祖意。由是放荡周游，还归故土，隐投子山，结茅茨，栖泊以求其志。中和中，巢躅荡覆京畿，天下悖乱。有贼徒持刃问同曰：“住此何为？”对以佛法。魁渠闻而膜拜。脱身服装而施之下山。以梁乾化四年甲戌四月六日，加趺坐亡，春秋九十六，法腊四十六。凡居化此山三十余载云。

○梁抚州疏山光仁传（本仁居遁）

释光仁，不知何许人也。其形矬而么麽，幼则气概凌物，精爽殆与常不同。早参洞山，深入玄奥，其辩给又多于人也。尝问香严禅师，答微有偏负。曰：“某累茧重胝而至，得无劳乎？”唾地而去。后居临川疏山，毳客趋请，颇有言辞，著《四大等颂略》、《华严长者论》，行于世。终入龕中，已有白鹿至灵前屈膝而起，时众谓为作吊焉。次筠州白水院释本仁，不知何许人也。得心于洞山法席。仁罕谈道，而四方之人若影之附形，却之还至。乃徇丹阳人请，住无几时。天复中，至洪井高安白水院聚徒。垂欲入灭，先触处告违，乃集众焚香曰：“至香烟尽处，是某涅槃时。”如其言，端坐而化。次龙牙山释居遁，姓郭氏，临川南城人也。年殆十四，警世无常而守恬淡。白亲往求出家于庐陵满田寺。于嵩山受具戒，已思其择木，乃参翠微禅会，迷复未归，莫知投诣。闻洞上言玄格峻，而躬造之。遁少进问曰：“何谓祖意？”答曰：“若洞水逆流，即当为说。”而于言下体解玄微。隐众栖息，七八年间孜孜戢曜，时不我知，久则通矣。天策府楚王马氏素藉芳音，奉之若孝悌之门稟昆长矣。乃请居龙牙山妙济禅院，??徒侣常聚半千。爰奏举，诏赐紫袈裟并师号证空焉，则梁贞明初也。方岳之下，号为禅窟，窥其室得其门者亦相继矣。至龙德三年癸未岁八月遘疾弥留，九月十三日归寂。遁出世近四十余龄，语详别录。

○梁福州玄沙院师备传

释师备，俗姓谢，闽人也。少而憨黠，酷好垂钓，往往泛小艇南台江自娱。其舟若虚，同类不我测也。一日，忽发出尘意，投钓弃舟，上芙蓉山出家，咸通初年也。后于豫章开元寺具戒，还归故里，山门力役，无不率先。布纳添麻，芒鞋续草，减食而食，语默有常，人咸畏之，汪汪大度，虽研桑巧计不能量也。备同学法兄，则雪峰存师也，一再相逢，存多许与，故目之为备头陀焉。有日，谑之曰：“头陀何不遍参去？”备对曰：“达磨不来东土，二祖不往西天。存深器重之。先开荒雪峰，备多率力。王氏始有闽土，奏赐紫衣，号宗一大师。以开平二年戊辰十一月二十七日示疾而终，春秋七十四，僧腊四十四。闽越忠懿王王氏树塔。备三十年演化，禅侣七百许人，得其法者，众推桂琛为神足矣。至今浙之左右，山门盛传此宗，法嗣繁衍矣。其于建立透过大乘初门，江表学人无不乘风偃草欤？”

○梁河中府栖岩山存寿传

释存寿，不知何许人也。清标胜范，造次奚及。罢寻经论，勇冠辈流。往问津于石霜禅师，决了前疑，虚舟不系，乃为枯木，众之蓐窃矣。后还蒲坂，缁素归心。时冀王友谦受封屏翰，好奇？异，闻人一善，厚礼下之。王召入府斋，论道谈玄，不觉膝之前席，颇增奉仰，续为菩萨戒师，供施便蕃。度门人四百许员，尼众百数。寿平日罕言，言必利物。喜愠之色，人未尝见，望之若孤松凌雪焉。终时春秋九十三，加趺而坐，一月后髭发再生，重剃入塔。塔之亭，每有虎旋绕，风迹时繁。敕谥为真寂大师焉。

○梁台州瑞岩院师彦传

释师彦，姓许氏，闽越人也。早悟羈縻，忽求拔俗，循乎戒检，俄欲观方。见岩头禅师，领会无疑。初乐杜嘿，似不能言者。后为所知敦喻，允请住台州瑞岩山院。时道夔往参问，答对响捷，夔公神伏。后二众同居，彦之威德，凛若严霜。纠正僧尼，无容舛误，故江表言御众剪齐者，瑞岩为最。尝有三僧，胡形清峭，目睛转若流电焉，差肩并足致礼。彦问曰：“子从何来？”曰：“天竺来。”“何时发？”曰：“朝行适至。”彦曰：“得无劳乎？”曰：“为法忘劳。”乃谛视之，足皆不蹈地。彦令入堂，上位安置，明旦忽焉不见，云是辟支迦果人，然莫知阶级。时有不测人入法会，非止一过。彦参学时号为小彦长老。两浙武肃王钱氏累召，方肯来仪，终苦辞去。寺仓常满，尝有村媪来参礼，彦曰：“汝休拜跪，不如疾归家，救取数十百物命，大有利益。”媪匆忙到舍，儿妇提竹器拾田螺正归。媪接取，放诸水陂。又数家召斋，一一同日见彦来食至终闍维。有巨蛇缘树杪，投身火聚，当乎薪尽，舍利散飞。或风动草木上纷纷而坠。神异绝繁，具如别录。

○梁抚州曹山本寂传

释本寂，姓黄氏，泉州蒲田人也。其邑唐季多衣冠士子侨寓，儒风振起，号小稷下

焉。寂少染鲁风，率多强学，自尔淳粹独凝，道性天发。年惟十九，二亲始听出家。入福州云名山。年二十五，登于戒足，凡诸举措，若老练焉。咸通之初，禅宗兴盛，风起于大沔也。至如石头药山其名寝顿，会洞山悯物，高其石头，往来请益，学同洙泗。寂处众如愚，发言若讷。后被请住临川曹山，参问之者堂盈室满。其所酬对，激射匪停，特为衲客标准，故排五位以铨量区域，无不尽其分齐也。复注《对寒山子诗》，流行寓内，盖以寂素修举业之优也。文辞迢丽，号富有法才焉。寻示疾，终于山，春秋六十二，僧腊三十七。弟子奉龕窆而树塔。后南岳玄泰著塔铭云。

○后唐漳州罗汉院桂琛传

释桂琛，俗姓李氏，常山人也。甫作童儿，笃求远俗，斋茹一跂，调息终日。秉心惟颺，乡党所钦。二亲爱缚而莫辞，群从情缠而难脱。既冠继逾城之武，求师得解虎之俦，乃事本府万岁寺无相大师矣。初登戒地，例学毗尼，为众升台宣戒本毕，将知志大安拘之于小道乎？乃自诲曰：“持犯束身，非解脱也。依文作解，岂发圣乎？”于是誓访南宗，程仅万里。初谒云居，后诣雪峰玄沙两会，参讯勤惇良以嗣缘有在，得旨于宗一大师，明暗色空，廓然无惑。密行累载，处众韬藏。虽夜光所潜，而宝器终异，遂为故漳牧太原王公诚请于闽城西石山建莲宫而止。驻锡一纪有半，来往二百众。琛以秘重妙法，罔轻示徒，有密学恳求者，时为开演。后龙溪为军絃，勤州太保琅簪公志请于罗汉院为众宣法，诿让不获，遂开方便。不数载，南北参徒丧疑而往者，不可殫数。有角立者，抚州曹山文益、江州东禅休复，咸传琛旨，各为一方法眼，视其子则知其父矣。以天成三年戊子秋，复戒闽城旧止，遍玩近城梵宇。已俄示疾，数日安坐告终，春秋六十有二，僧腊四十。遗戒勿遵俗礼而棺而墓。于是茶毗于城西院之东冈，收其舍利，建塔于院之西，禀遗教也。则清泰二年十二月望日也。琛得法密付授耳。时神晏大师，王氏所重，以言事胁令舍玄沙嗣雪峰，确乎不拔，终为晏谗而凌置，惜哉！

○后唐福州长庆院慧棱传

释慧棱，杭州海盐人也，俗姓孙氏。初诞缠紫色胎衣。为童龀日，俊朗抗节，于吴苑通玄寺登戒。已闻南方有禅学，遂游闽岭，谒雪峰，提耳指订，顿明本性。乃述偈云：“昔时谩向途中学，今日看来火里冰。”如是亲依，不下峰顶，计三十许载。冥循定业，谨摄袈裟。泉州刺史王延彬召棱住昭庆院，禅子委输，唯虞后至。及于长乐府，居长庆院，二十余年，出世不减一千五百众。棱性地慈忍，不妄许人。能反三隅，方加印可。以长兴三年壬辰五月十七日长往，春秋七十九，僧腊六十。闽国王氏私誅之大师，号超觉。塔葬皆出官供。判官林文盛为碑纪德云。

○后唐杭州龙册寺道夔传

释道夔，俗姓陈，永嘉人也。？总之年，性殊常准，而恶腥血之气。亲党强啖以枯鱼，且虞呕哕。求出家于开元寺。具戒已，游闽入楚，言参问善知识，要决了生死根源。见临川曹山寂公，大有征诘，若昙询之间僧稠也。终顿息疑于雪峰，闽中谓之小夔布纳。时太原同名，年腊之高故。暨回浙，住越州鉴清院。时皮光业者，日休之子，辞学宏赡，探赜禅门，尝深击难焉。退而谓人曰：“夔公之道，崇论閎议，莫臻其极。”武肃王钱氏钦慕，命居天龙寺，私署顺德大师。次文穆王钱氏创龙册寺，请夔居之，吴越禅学自此而兴。以天福丁酉岁八月示灭，春秋七十。荼毗于大慈山坞，收拾舍利，起塔于龙姥山前。故僧主汇征撰《塔铭》。今舍利院，弟子主之，香火相缀焉。

○晋会稽清化院全付传

释全付，吴郡昆山人也。幼随父商于豫章，闻禅寂之说，乃有厌世之志。白求出家，父愠形于色。愠止，复白者三，父异其诚，率略许之。遂诣江夏，投清平大师。问曰：“尔来何求？”付曰：“志求法也。”清平师怜其幼而抱器，抚以纳之。夙兴夜寐，殊于群童。及长，为之落饰，寻登戒度。奉师弥谨，检身弥至，问法无？厌，见性不龌龊，清平颌而许之。一旦，谓人曰：“吾闻学无常师，吾非匏瓜，岂系于此而旷于彼乎？”遂辞师而抵宜春之仰山，礼南塔涌禅师。应对言语，深认仰山之势，顿了直下之心。仰山单辰然器重之。拳拳伏膺，栖神累载。后游于庐陵，安福县宰杨公建应国禅院，请付居之。禅徒子来，堂室芦满。杨宰罢任，其乡人复于鸽湖山建院，迎以居之。廉使上闻，锡名曰清化禅院，禅徒麇至，请问者墙进。皆不我屈，岂多让于前辈乎？有同里僧谓付曰：“父母之乡，胡可弃也？任缘徇世，愿师归欤。”遂别鸽湖而还故国。时吴越文穆王钱氏命升阶，赐之衣衾钵器，有加礼焉。丁酉岁，钱城戍将辟云峰山，建清化禅院，召以居之。次忠献王钱氏遣使锡以紫袈裟，付上章累让，再赐之，又让之，遂改以纳衣。付曰：“吾非荣其赐而饰让也，恐后人之仿吾而逞欲矣。”寻赐号曰纯一禅师，又固让之。付不以情忘情，故情真；不以道求道，故道直。所居院之殿宇堂室，人竞崇建之。铸钟千余斤。新额曰云峰清化禅院，云水之侣辐凑，眷眷不欲舍旃。开运四年丁未岁秋七月示疾，谓众曰：“生也法起，歿也法灭，起灭非言论所及也。”安然而逝，有大雨疾风，以震林木拔矣。享年六十六，腊四十有五。归窆于山之北坞，弟子应清等十余人奉师遗训，不坠其道焉。僧主汇征为塔铭。建隆二年立。

○晋永兴永安院善静传（灵照）

释善静，俗姓王氏，长安金城人也。父朗，唐威州刺史。母李氏因梦圣容照烂金色，遂尔娠焉。及生歧嶷。殆乎知学，博通群言，因掌书奏于神策军，中尉器重之。忽？浮幻，潜诣终南丰德寺，礼广度禅师，时年二十七也。泊乎削染受具，天复中南游乐普，见元安禅裔，乃融心要。北还化徒于故里，结庐于终南云居山，道俗归之如市。又起游峨嵋，礼普贤银色世界，回兴元，连帅王公礼重留之，后还故乡，

已黍离矣。留守王公营永安禅院以居之。以开运丙午岁冬鸣椎集僧嘱累，还方丈，东向，右胁而化，俗寿八十九，僧腊六十。黑白之众若丧严亲。明年正月八日，荼毗于城南，获舍利数千粒。汉乾祐三年庚戌八月八日，迁塔于长安义阳乡，石塔岿然。初，静率多先觉，往游道，避昭宗之蒙尘。又生平洗沐，舍利陨落，皆收秘，不许弟子示人。又尝禅寂次，窗外无何有白鹤驯狎于庭，若有听法之意。静令人驱斥之。凡此殊征，有而不有。晋昌军府主郭公归信焉，营构禅院，命以居之。翰林学士鱼崇谅为《塔铭》述德焉。次杭州龙华寺释灵照，本高丽国人也。重译而来，学其祖法，入乎闽越，得心于雪峰。苦志参陪，以节俭勤于众务，号照布纳焉。千众畏服，而言语似涉岛夷。性介特，以恬淡自持。初住齐云山，次居越州鉴清院。尝纚对副使皮光业，语不相投，被举摈徙龙兴焉。及湖州太守钱公造报慈院请住，禅徒翕然。吴会间僧舍三衣披五纳者，不可胜计。忠献王钱氏造龙华寺，迎取金华梁傅翕大士灵骨道具，置于此寺树塔，命照住持焉。终于此寺，迁塔大慈山之峰。

○周金陵清凉院文益传

释文益，姓鲁氏，余杭人也。年甫七龄，挺然出俗，削染于新定智通院，依全伟禅师伯。弱年，得形俱无作法于越州开元寺。于时谢俗累以拂衣，出樊笼而矫翼。属律匠希觉师盛化其徒于？山育王寺，甚得持犯之趣。又游文雅之场，觉师许命为我门之游夏也。寻则玄机一发，杂务俱捐。振锡南游，止长庆禅师法会。已决疑滞，更约伴西出湖湘，尔日暴雨不进，暂望西院寄度信宿，避溪涨之患耳。遂参宣法大师曾住漳浦罗汉，闽人止呼罗汉。罗汉素知益在长庆颖脱，锐意接之，唱导之。由玄沙与雪峰血脉殊异，益疑山顿摧，正路斯得，欣欣然挂囊栖止，变涂回轨，颺乎不拔。寻游方却抵临川，邦伯命居崇寿。四远之僧求益者，不减千计。江南国主李氏始祖知重，迎住报恩禅院，署号净慧。厥后微言欲绝，大梦谁醒？既传法而有归，亦同凡而示灭，以周显德五年戊午岁秋七月十七日有恙，国主紆于方丈问疾。闰月五日，剃发澡身，与众言别，加趺而尽，颜貌如生，俗年七十四，腊五十五。私谥曰大法眼，塔号无相。俾城下僧寺具威仪礼迎引，奉全身于江宁县丹阳乡，起塔焉。益好为文笔，特慕支汤之体，时作偈颂真赞，别形纂录。法嗣弟子天台德韶、慧明、漳州智依、钟山道钦、润州光逸、吉州文遂。江南后主为《碑》颂德，韩熙载撰塔铭云。

○周庐山佛手岩行因传（道潜）

释行因，不详姓氏，雁门人也。游方问道于江淮，见庐山北有岩，遥望如垂手焉，手下则深还可三五丈许。因独栖禅观于其中。伪唐主元宗闻之，三征召不起。岩中夜阑，有异鹿一卧千因之石屋之侧，又锦囊鸟一伏宿于石壁下，二物都无惊怖。因不度弟子，有邻庵僧为之供侍。一日小疾，谓侍僧曰：“卷上帘，我去去。”帘方就钩，下床三数步间立，屹然而化，春秋七十许。元宗命画工写真，而阎维收遗骨

，白塔在岩背焉。初因传禅法于襄阳鹿门山，寻为元宗坚请，于栖贤寺开堂唱道，不及期月，潜归岩窟。初岩如五指，中指上有松一株，因终之日，此亦枯瘁。因有经藉之学，有问则指钁先儒得失章句，是非谈论，不滞于方隅，开喻必含于教化，实得道之良士也。

系曰：凡夫舍报，尸必一同也。佛则右胁，果位坐亡，首支地者现通，身立中者彰异。其惟欲行步而化者，除后僧会外，则因公有焉。

次钱塘慧日永明寺释道潜，俗姓武，蒲津人也。生而强壮，容姿端雅。成立则身長七尺许，胸前黑子七点，若斗之纲魁焉。投中条山栖岩大通禅院，礼真寂禅师，为亲教也。戒检严明，讷言敏行。师亡之后，誓入雁门五台山，以精恪之故，躬睹文殊圣容。后诸方无定游处。未到临川，见崇寿益禅师，顿明心决。次栖衢州古寺，览阅《藏经》。尝宴坐中，见文殊现形，不觉起而作礼。及诣杭，礼阿育王塔，跪而顶戴，肠下如雨。问掌塔僧曰：“舍利人不目击，还实有否？”僧曰：“按传记云，藏在内角中，望若悬钟焉。”潜疑未已，遂苦到跪礼，更无间然。俄见舍利红色在悬钟之外，蠢?而行。潜悲喜交集。又光文大师汇征迥然肯重，自为檀越，请于山斋行三七日《普贤忏》，忽见遍吉御象在塔寺三门亭下，其象鼻直枕行忏所。汉南国王钱氏命入王府受菩萨戒，造大伽蓝，号慧日永明，请以居之。假号曰慈化定慧禅师，别给月俸以施之，加优礼也。建隆二年辛酉九月十八日示疾而终。入棺之际，有白光昼发，孛孛莹然，时众皆睹。至十月内于龙井山茶毗，所收舍利夥多。有屠者自惟恶业，展襟就火聚乞求，斯须获七颗。屠家持于印氏塔中。至开宝庚午岁，天台韶禅师建石塔，殓其真骨，癸酉岁塔顶放白光焉。

○大宋庐山圆通院缘德传

释缘德，俗姓黄，钱塘人也。父超修学儒术，而长于绩画，传周窻佛粉本，受笔法于吴兴李沼长史。德幼有出家之志，心性孤僻而寡合，遂往天台受具，习禅法于天龙寺道奩禅师。寻往江西问道，自云居住庐阜，孤节高岸，实不见有所欲。江南国主李氏召入内道场，安置，虑其不群，别构罗汉院处之。苦求入山，请住庐山新院，乃列威仪导引焉。德且装衣荷檐而入，然后升座，对答参问焉。其国主赐赆，未尝以表笺报谢。有国老宋齐丘者，礼以师道。以开宝中卒于山院。德一生服用，熟韦裤袜而已。行杜多法，供亿诸禅侣，厨无匱乏。或谓德有黄白术焉。

○大宋天台山德韶传

释德韶者，姓陈氏，缙云人也。幼出家于本郡，登戒后，同光中寻访名山，参见知识，屈指不胜其数。初发心于投子山和尚，后见临川法眼禅师，重了心要，遂承嗣焉。始入天台山，建寺院道常无几，韶大兴玄沙法道，归依者众。汉南国王钱氏尝理丹丘，韶有先见之明，谓曰：“他日为国王，当兴佛法。”其言信矣，遣使入山

旁午，后署大禅师号，每有言时，无不符合。苏州节使钱仁奉有疾，遣人赍香往乞愿焉。乃题疏云：“令公八十一。”仁奉得之甚喜曰：“我寿八十一也。”其年八月十一日卒焉。凡多此类。韶末终之前也，华顶石崩，振惊百里，山如野烧蔓延，果应韶终。焚舍利繁多，营塔，命都僧正赞宁为塔碑焉。享年八十二，法腊六十四即开宝五年壬申岁六月二十八日也。《语录》大行。出弟子传法百许人，其又兴智者道场数十所，功成不宰，心地坦夷。术数尤精，利人为上。至今江浙间谓为“大和尚”焉。

论曰：梵语禅那，华言念修也。以其触情念而无念，终日修而无修。又云正定也，正受也。正则廓然置而定矣。正受简邪思惟，增遍计故。所以奢摩他以寂静故，三摩提以观如幼故，若禅那者，俱离静幼故，始云菩萨不住此岸，不住彼岸，而度众生令登彼岸也。若然者，诸圣住处既如彼，诸圣度生复若何？稽夫法演汉庭，极证之名未著；风行庐阜，禅那之学始萌。佛陀什，秦宾而来，般若多，晋朝而至，时远公也，密传坐法，深鞫玄机，渐染施行，依违祖述。吴之僧会亦示有缘，俱未分明，肆多隐秘。及乎慧文大士，肇寻龙树之宗；思大禅翁，继传三观之妙。天台智者引而伸之，化导陈隋，名题止观。粤有中天达磨，哀我群生，知梵夹之虽传，为名相之所溺，认指忘月，得鱼执筌，但矜诵念以为功，不信已躬之是佛。是以倡言曰：“吾直指人心，见性成佛，不立文字也。”此乃乘方便波罗蜜，径直而度，免无量之迂回焉。嗟乎！经有曲指曲，指则渐修也。见性成佛者，顿悟自心本来清淨，元无烦恼，无漏智性，本自具足。此心即佛，毕了无异。如此修证，是最上乘禅也。不立文字者，经云“不著文字，不离文字”。非无文字，能如是修，不见修相也。又达磨立法，要唯二种，谓理也、行也。然则直而不迂，不速而疾，云不立文字，乃反权合道也。尔时梁武不知，魏人未重，向少林而面壁，唯慧可以神交。亦犹《白雪》虽歌，巴童寡和。后则临洺牧圉，子孙终号于强秦；避狄歧郃，文武乃成其王道。可生璨，璨生信。信下分二枝，一忍二融。融，牛头也。忍生秀与能。能传信衣，若诸侯付子孙之分器也，厥后此宗越盛焉。荫车百辆，尼拘树而展转垂枝；施雨万方，阿耨龙而连筵布润。当是时也，应其悬记，属于此人，后来得道无央数是欤！重之曰：夫禅之为物也，其大矣哉！诸佛得之升等妙，雌龙得之破障缠。率由速疾之门无过此。故今之像末，斗诤复生，师足既伤，资争未已。如闻此心是佛，便言三十二相何无？或闻一路涅槃，则曰八万法门何在？曾不知经中发菩提心，此见佛性也。云何修菩萨行，此行布修行也。因信不及，无明所迷，溺丧忘归，何由复业！或举经以示之，则对曰：“此性宗法。”或谓之曰：“莫是魔说，还可焚毁否？”且置而勿论。又欲弃之，又欲存之，不其惑乎？昔者于闐诸部谓《道行经》为婆罗门书，乌荼小乘谤大乘学作空花外道。西乾尚尔，此何惊乎？良以六代宗师，一期举唱，但破百年之暗，靡营一室之隙。殊不知禅有理焉，禅有行焉。脱或戒乘俱急，目足更资，行不废而理逾明，法无偏而功兼济。然后始可与言禅已矣。其如玄学多斥讲家，目为数宝之人，终困屡空之室。那不见经是佛言，禅是佛意，诸佛心口，定不相违。施設逗根，用有时处。况以经江高国纪之名，论海总朝宗之会。毗尼一学，轨范千途。授形俱筑释子之甚，唱随行净沙门之业，拟捐三事

，何驾一乘？终包不足之羞，岂到转依之地？通人不谄，竖子何知？佛事门中不舍一法，吠声贻责，迁怒伤人，因击鼠以破盆，为争抻而噬主，自他俱有，彼我须均，纵横尽而成一秦，气剂和而成一味者也。今从贞观及于宋朝，于山选山，露须弥而出海；于羽求羽，放金翅以腾空。令其钻仰之俦，慕此坚高之道矣。吾徒通达，无相夺伦，譬若文武是一人之艺，不能兼者，互相非斥耳。若相推重，佛法增明，酬君王度已之恩，答我佛为师之训。慎之哉！慎之哉！

卷十四

◎明律篇第四之一（正传二十人附见五人）○唐京兆西明寺道宣传（大慈）

释道宣，姓钱氏，丹徒人也，一云长城人。其先出自广陵太守让之后，洎太史令乐之撰《天文集占》一百卷。考讳申府君，陈吏部尚书，皆高矩令猷，周仁全行，盛德百代，君子万年。母娠而梦月贯其怀，复梦梵僧语曰：“汝所妊者即梁朝僧祐律师，祐则南齐剡溪隐岳寺，僧护也。宜从出家，崇树释教”云。凡十二月在胎，四月八日降诞。九岁能赋。十五厌俗，诵习诸经，依智君页律师受业。洎十六落发，所谓除结，非欲染衣，便隶曰严道常弱冠，极力护持，专精克念，感舍利现于宝函。隋大业年中，从智首律师受具。武德中依首习律，才听一遍，方议修禅。君页师呵曰：“夫适遐自迹，因微知章，修舍有时，功愿须满，未宜即去律也。”抑令听二十遍，已乃坐山林，行定慧，晦迹于终南仿掌之谷。所居乏水，神人指之，穿地尺余，其泉迸涌，时号为白泉寺。猛兽驯伏，每有所依，名花芬芳，奇草蔓延。隋末徙崇义精舍，载迁丰德寺。尝因独坐，护法神告曰：“彼清官村，故净业寺，地当宝势，道可习成。”闻斯卜焉，焚功德香，行般舟定。时有群龙礼谒，若男若女，化为人形。沙弥散心，顾纹邪视。龙赫然发怒，将搏攫之，寻追悔，吐毒井中，具陈而去。宣乃令封闭，人或潜开，往往烟上，审其神变。或送异花一奁，形似枣花，大如榆荚，香气丰香孚，数载宛然。又供奇果，季孟梨柰，然其味甘，其色洁，非人间所遇也。门徒尝欲举阴事，先是潜通，以定观根随病与药。皆此类者。有处士孙思邈尝隐终南山，与宣相接，结林下之交，每一往来，议论终夕。时天旱，有西域僧于昆明池结坛祈雨，诏有司备香灯供具，凡七日，池水日涨数尺。有老人夜诣宣求救，颇形仓卒之状，曰：“弟子即昆明池龙也。时之无雨，乃天意也，非由弟子。今胡僧取利于弟子，而欺天子言祈雨。命在旦夕，乞和尚法力加护”宣曰：“吾无能救尔，尔可急求孙先生。”老人至思邈石室，冤诉再三，云：“宣律师示我，故敢相投也。”邈曰：“我知昆明池龙宫有仙方三十首，能示余，余乃救尔。”老人曰：“此方上界不许辄传，今事急矣，固何所吝。”少选，捧方而至。邈曰：“尔速还，无惧胡僧也。”自是池水大涨，数日溢岸，胡僧术将尽矣，无能为力。及西明寺初就，诏宣充上座。三藏奘师至止，诏与翻译。又送真身往扶风无忧王寺。遇敕令僧拜等，上启朝宰，护法又如此者。撰《法门文记》、《广弘明集》、《续高僧传》、《三宝录》、《羯磨戒疏》、《行事钞》、《义钞》等二百二十余卷。三衣皆綈，一食唯菽。行则杖策，坐不倚床，蚤虱从游，居然除受，土木自得，固已亡身。尝筑一坛，俄有长眉僧谈道，知者其实宾头卢也。复三果梵僧礼坛赞曰：“自佛灭后，像法住世，兴发毗尼，唯师一人也。”乾封二年春，冥感天人来谈律相，言钞文轻重，仪中舛误，皆译之过非师之咎，请师改正。故今所行著述，多是重修本是也。又有天人云：“曾撰《瘞洄图经》，计人间纸帛一百许卷。”宣苦告口占，一一抄记，上下二卷。又口传偈颂，号《付嘱仪》十卷是也。贞观中，曾隐沁部云室山，人睹天童给侍左右。于西明寺夜行道，足跌前阶，有物扶持，履空无害。熟顾视之，乃少年也。宣遽问：“何人中夜在此？”少年曰：“某非常

人，即《毗沙门天王》之子那吒也，护法之故，拥护和尚，时之久矣。”宣曰：“贫道修行，无事烦太子。太子威神自在，西域有可作佛事者，愿为致之。”太子曰：“某有佛牙宝掌虽久，头目犹舍，敢不奉献。”俄授于宣，宣保录供养焉。复次，庭除有一天来礼谒，谓宣曰：“律师当生睹史天宫”，持物一苞，云是棘林香。尔后十旬，安坐而化，则乾封二年十月三日也，春秋七十二，僧腊五十二。累门人窆于坛谷石室，其后树塔三所。高宗下诏，令崇饰图写宣之真相。匠韩伯通塑绩之，盖追仰道风也。宣从登戒坛及当泥曰，其间受法传教，弟子可千百人。其亲度曰大慈律师、授法者文纲等。其天人付授佛牙，密令文纲掌护，持去崇圣寺东塔。大和初，丞相韦公处厚建塔于西廊焉。宣之持律，声振竺乾，宣之编修，美流天下，是故无畏三藏到东夏朝谒，帝问：“自远而来，得无劳乎？欲于何方休息？”三藏奏曰：“在天竺时常闻西明寺宣律师，秉持第一，愿往依止焉。”敕允之。宣持禁坚牢，扞虱以绵纸裹投于地。三藏曰：“扑有情于地之声也。”凡诸密行，或制或遮，良可知矣。至代宗大历二年，敕此寺三纲：“如闻彼寺有大德道宣律师传授得释迦佛牙及肉舍利，宜即诣右银台门进来，朕要观礼。”至十一年十月，敕：“每年内中出香一合，送西明寺故道宣律师堂，为国焚之祷祝。”至懿宗咸通十年，左右街僧令霄、玄畅等上表乞追赠。其年十月敕谥曰澄照，塔曰净光。先所居久在终南，故号南山律宗焉。天宝元载灵昌太守李邕，会昌元年工部郎中严厚本，各为碑颂德云。

系曰：律宗犯即问心，心有虚实故。如未得道，起覆想说，则宜犯重矣。若实有天龙来至我所，而云犯重，招谤还婆罗汉同也。宣屡屡有天之使者或送佛牙，或充给使，非宣自述也。如遣龙去孙先生所，岂自言邪？至于乾封之际，天神合沓，或写《瘡洹图经》、《付嘱仪》等，且非寓言于鬼物乎？君不见《十诵律》中诸比丘尚扬言，目连犯妄，佛言：“目连随心想说无罪。”佛世犹尔，像季嫉贤，斯何足怪也。又无畏非开元中者，贞观、显庆已来莫别有无畏否？

○唐京兆恒济寺道成传

释道成者，不知何许人也。居于天邑，演彼律乘。戒月扬光，圆而不缺；德瓶告实，满而不倾。当显庆中，敷《四分》一宗，有同雾市。时文纲律匠虽先依澄照大师，后习律文，乃登成之堂奥矣。又怀素著述，皆出其门。垂拱中，日照三藏译《显识》等经，天后诏名德十员助其法化，成与明恂、嘉尚同预证义。由是声飞神甸，位首方坛，谓之梧桐多栖凤鸟，谓之芳禴颇秀兰丛。门生孔多，无过此集，然不详终所。

系曰：成公与隋蒋州道成同号而异实，二者奚先？通曰：“隋成也精乎《十诵》，著述尤多；唐成也传乎《四分》，译讲偕妙。然其撰集则开悟迷沦，究其翻传则陶甄教道。譬犹后焰靡及乎前光，似宝或惭乎真宝，互有长短，用则无遗也。

○唐京师崇圣寺文纲传（名恪）

释文纲，姓孔氏，会稽人也。曾祖范，陈都官尚书；祖祀，祠部侍郎；考顶生逃海避隋，择木归舜，贞观始拜尚乘直长，咸光复儒业，旁通释教。是故纲也植宿根，从习气。慈母怀孕，杂食弃捐。有婆罗门僧头陀语其母曰：“若此男终绍三宝。”自尔每闻空中多异香，杂仙乐。及诞育之日，白鹤翔集，若临视焉。比襁褓中，午后不受乳哺，犹坚持斋者。童龀，随师访道。十二出家，冠年受具。精虑苦行，专念息心，藜羹糗粮，麻衣草荐。操有彝检，口无溢言。寻诣京兆沙门道成律师，禀毗尼藏。二十五讲律，三十登坛。每勤修深思，凝视反听，净如止水，巖若断山。或风雨宴居，或昼夜独得。故能吉祥在手，不舍其瓶，威德迎风，不绝于气。出笼瘠雁，坐致虚空，起屋下层，自然成就。惟甘露之婆口，喻利剑之伤人，慎之重之，广矣至矣。由是八方来学，《四分》永流，请益者举袂云临，赞叹者发声雷骇。久视中，天作淫雨，人有忧色。纲敏之，乃端坐思惟，却倚屋壁。奄至中夕，錫尔半倾，唯余背间，巖然山立，识者以为得神通，因定力故。日月灵迹，幽明潜感，兆于集事，应乎遣言。左右怪之，纲曰：“夫真实无相，尘色本空。正觉圆常，大悲湛定，不可取也。”是以一时法主，四朝帝师，同迦叶之入城，遇匿王之说戒，竹园门外别有沙弥，毕树枝间广闻？鸟。所以受润者博，入见者深。万病已痊，获欢喜之药；一心不染，解烦恼之绳。又恭承丝纶，京都翻译，追论惠用，远契如因，翘诚满朝，檀施敌国，但依布萨，尽用庄严。累历伽蓝二十余所，凡是塔庙，各已华丰。犹且刺血书经，向六百卷；登坛受具，仅数千人。至苦至勤，纳无我之海；不寝不食，种无生之田。长安四年，奉敕往歧州无忧王寺迎舍利。景龙二载，中宗孝和皇帝延入内道场行道，送真身舍利往无忧王寺入塔。其年于乾陵宫为内尼受戒。复于宫中坐夏，为二圣内尼讲《四分律》一遍。中宗嘉尚，为度弟子，赐什物彩帛三千匹，因奏道场灵感之事。六月七日，御札题榜为灵感寺是也。诸寺辟硕德以隶焉。夫其左鍤宿，右上林，南台终山，北池渭水，千门宫阙，化出云霄，万乘旌旗，天回原隰。先天载睿宗圣真皇帝，又于别殿请为菩萨戒师，妃主环阶，侍从罗拜。兜率天上，亲听法言；王舍城中，普闻净戒。恩旨赐绢三千余匹，纲悉付常住随事修营，或金地缭垣，用增上价；或宝坊飞阁，克壮全模；或讲堂经楼，舍利净土；或轩廊器物，厨库园林，皆信施法财，周给僧宝。方将示迷津，引觉路，濯热火宅，拯溺毒流，而乃奄忽神迁，斯须薪尽，虽有应化，何其速欤！以开元十五年八月十五日怡然长往，时春秋九十有二。其年九月四日，塔于寺侧焉。闻哀奔丧，执紼会葬，香花幢盖，缁素华夷，填城塞川，簪云翳景，盖数万人。有若法侣，京兆怀素、满意、承礼、襄阳崇拔、扶风凤林、江陵恒景、淄川名恪等百余人，咸曰：“智河舟迁，法宇栋桡而已哉！有若弟子，淮南道岸、蜀川神积、歧陇慧綽、京兆神慧、思义、绍觉、律藏恒暹、崇业等五十余人，并目以慈眼入于度门，金棺不追，灰骨罔答。乃请滑台太守李邕为碑。邕象彼马迁，法其班氏，以二人而同传，必百行以齐肩。不忝怀素前，不惭宣师后，李北海题品，不其韪乎！有淄州名恪律师者，精执律范，切勤求解，尝厕宣师法筵，躬问《钞序》义。宣师亲录，随喜灵感坛，班名于经末，又附丽文纲之门也。”

○唐京师恒济寺怀素传（宾律师）

释怀素，姓范氏，其先南阳人也。曾祖岳，高宗朝选调为绛州曲沃县丞。祖徽，延州广武县令。父强，左武卫长史，乃为京兆人也。母李氏梦云雷震骇，因而娠焉。诞育之辰，神光满室。见者求占，此子贵极，当为王者之师傅。也幼龄聪黠，器度宽然，识者曰：“学必成功，才当逸格。”耳闻口诵，皆谓老成。年及十岁，忽发出家之意，猛利之性，二亲难沮。贞观十九年，玄奘三藏方西域回，誓求为师。云与龙而同物，星将月以共光，俱悬释氏之天，悉丽著明之象。初寻经论，不费光阴。受具已来，专攻律部。有邳郡法砺律师一方名器，五律宗师，迷方皆俟其指南，得路咸推其乡导，著疏十卷，别是命家。见接素公，知成律匠。研习三载，乃见诸瑕，喟然叹曰：“古人义章未能尽善”咸亨元年，发起雄心别述《开四分律记》。至上元三年丙子归京，奉诏住西太原寺傍听道成律师讲，不辍缉缀。永淳元年，十轴毕功，一家新立，弹纠古疏，十有六失焉。新义半千百条也。傅翼之彪，搏攫而有知皆畏；乘风之震，砰车訇而无远不闻。所化翕然，所传多矣。复著《俱舍论疏》一十五卷，《遗教经疏》二卷，《钞》三卷，《新疏拾遗钞》二十卷，《四分僧尼羯磨文》两卷，《四分僧尼戒本》各一卷。日诵《金刚经》三十卷，讲《大律》已疏计五十余遍，其余书经画像，不可胜数。于本寺别院忽示疾，力且孱然，告秀章曰：“余律行多缺，一报将终。”时空中有天乐浏亮，奄然而逝，俗龄七十四，法腊五十三。葬日，有鸿鹤绕塔悲鸣，至暮方散。素所撰述，宗萨婆多。何邪？以法密部缘化地部出，化地从有部生，故出受体以无表色也。又斥二宗云：“相部无知，则大开量中得自取大小行也。南山犯重，则与天神言论，是自言得上人法也。”大抵素疏出，谓之新章焉。开元中，嵩山宾律师造《饰宗记》以解释之，对砺旧疏也。又谓为东西塔律宗，因传习处为名耳。大历中，相国元公载奏成都宝园寺置戒坛，传新疏，以俸钱写疏四十本，《法华经疏》三十本，委宝园光翌传行之。后元公命如净公为素作传。韦南康皋作灵坛，传授毗尼新《疏记》，有承袭者，刊名于石。其辞酋丽，其翰兼美，为蜀中口实焉。

○唐光州道岸传

释道岸，姓唐氏，世居颍川，是为大族，汉尚书令琳、司空珍、吴尚书仆射固、雍州刺史彬、凉镇北将军瑶之后也。永嘉南度，迁于光州，衣冠人物，辉映今古。岸生而不群，少而奇概，爰在髫髻，有若老成。齿胄胶庠，徇齐坟典，犹恐闻见未博，艺业有遗。遂浮江淮，达洙泗，探禹穴，升孔堂，多历年所矣。操翰林之鼓吹，游学海之波澜，讨论百家，商擢三教。乃叹曰：“学古入官，纡金拾紫，儒教也。餐松饵柏，驾鹤乘龙，道教也。不出轮回之中，俱非筏喻之义，岂若三乘妙旨，六度宏功，镕铄世间，掌握沙界哉”遂落发出家，洗心访道，一音克举，四句精通。坚修律仪，深入禅慧。夜梦迦叶来为导师，朝阅真经，宛契冥牒。由是声名籍甚，远近吹嘘，为出世之津梁，固经行之领袖。十方龙象，罔不师范焉；万国鹓鸾，无敢酬对者。向若回兹妙识，适彼殊途，议才必总于四科，济世雅符于三杰。有若越

中初法师者，秘藏精微，罔不明练，道高寰宇，德重丘山。岸闻善若惊，同声相应，乘杯去楚，杖锡游吴。云雾一披，钟鼓齐振，期牙合契，澄什联芳。由是常居会稽龙兴寺焉。杨越黎庶，江淮释子，辐凑乌合，巷少居人，罕登元礼之门，且睹公超之市。岸身遗缠盖，心等虚空，不择贤愚，无论贵贱，温颜接待，善诱克勤，明鉴莫疲，洪钟必应。皆窥天挹海，虚往实归，其利博哉，无得称也！时号为大和尚。登无畏座，讲木叉律，容止端严，辞辩清畅，连环冰释，理窟毫分，瞻仰者皆悉由衷，听受者得未曾有。于是高僧大士，心醉神倾，捐弃旧闻，佩服新义，江介一变，其道大行。孝和皇帝精贯白业，游艺玄枢，闻而异焉。遣使征召，前后数介。然始入朝，与大德数人同居内殿，帝因朝暇，躬阅清言。虽天眷屡回，而圣威难犯，凡厥目对，靡不魂惊，皆向日趋风，灭听收视。岸人望虽重，僧腊未高，犹沦居下筵，累隔先辈，惜帝有轮王之位，不起承迎，以吾为舍那之后，晏然方坐。皇帝睹其高尚，伏以尊严，偏赐衣钵，特彰荣宠。因请如来法味，屈为菩萨戒。师亲率六宫，围绕供养，仍图画于林光宫。御制《画赞》，辞曰：“戒珠皎洁，慧流清淨，身局五篇，心融八定。学综真典，观通实性，维持法务，纲统僧政。《律藏》冀兮传芳，象教因乎光盛。”比夫灵台影像，麟阁丹青，功德义殊，师臣礼异。铨择网管，统帅僧徒者，有司之任也。以岸盛德广大，至行高邈，思遍雨露，特变章程。所历都白马、中兴、庄严、荐福、罔极等寺，纲维总务，皆承敕命，深契物心，天下以为荣，古今所未有。中宗有怀罔极，追福因心，先于长安造荐福寺。事不时就，作者烦劳，敕岸与工部尚书张锡同典其任。广开方便，博施慈悲，人或子来，役无留务，费约功倍。帝甚嘉之，频邀赏锡，何间昏晓。既荷天泽，言酬恩地，遂还光州，度人置寺。于是癯陀苑囿，郁起僧坊，拘邻比丘，便为人宝，能事斯毕，夫何恨哉！江海一辞，星霜二纪，每怀成道之所，更迫钟漏之期。遂去上京，还至本处。将申顾命，精择门人，僧行超、玄俨者，是称上足也。克传珠髻之宝，俾赐金口之言，右胁而卧，示其泡幻也。以开元五年岁次丁巳八月十日灭度于会稽龙兴道场，时年六十有四。海竭何依？山崩安仰？天人感恻，道俗哀号，执紼衣衾，哀动盈万计。弟子龙兴寺慧武寺主义海、都维那道融、大禹寺怀则、大善寺道超、齐明寺思一、云明寺慧周、洪邑寺怀莹、香严寺怀彦、平原寺道纲、湖州大云寺子■、兴国寺慧纂等，秀禀圭璋，器承磨琢，荷导蒙之力，怀栝羽之恩，思播芳尘，必题贞石，乃请礼部侍郎姚弈为碑纪德。初，岸本文纲律师高足也，及孝和所重，其道克昌。以江表多行《十诵律》，东南僧坚执罔知《四分》。岸请帝墨敕执行南山律宗。伊宗盛于江淮间者，岸之力也。

○唐百济国金山寺真表传

释真表者，百济人也。家在金山，世为弋猎。表多？捷，弓矢最便。当开元中，逐兽之余，憩于田畎间，折柳条贯虾蟆成串，置于水中，拟为食调。遂入山网捕。因逐鹿，由山北路归家，全忘取贯蟆欵。至明年春，猎次，闻蟆鸣。就水，见去载所贯三十许虾蟆犹活。表于时叹惋，自责曰：“苦哉，何为口腹，令彼经年受苦？”乃绝柳条，徐轻放纵。因发意出家，自思惟曰：“我若堂下辞亲，室中割爱，难离

欲海，莫揭愚笼。”由是逃入深山，以刀截发，苦到忏悔，举身扑地，志求戒法，誓愿要期弥勒菩萨授我戒法也。夜倍日功，绕旋叩蝼，心心无间，念念翘勤，经于七宵。诘旦，见地藏菩萨手摇金锡为表策发，教发戒缘作受前方便。感斯瑞应，叹喜遍身，勇猛过前。二七日满，有大鬼现可怖相，而推表坠于岩下，身无所伤。匍匐就登石坛上，加复魔相未休，百端千绪。至第三七日质明，有吉祥鸟鸣曰：“菩萨来也。”乃见白云若浸粉然，更无高下，山川平满，成银色世界，兜率天主逶迤自在，仪卫陆离，围绕石坛，香风花雨，且非凡世之景物焉。尔时慈氏徐步而行，至于坛所，垂手摩表顶曰：“善哉！大丈夫求戒如是，至于再，至于三，苏迷卢可手攘而却，尔心终不退。”乃为授法，表身心和悦，犹如三禅意识与乐根相应也。四万二千福河，常流一切功德，寻发天眼焉。慈氏躬授三法衣、瓦钵，复赐名曰真表。又于膝下出二物，非牙非玉，乃签检之制也，一题曰九者，一题曰八者，各二字，付度表云：“若人求戒，当先悔罪，罪福则持犯性也。”更加一百八签，签上署百八烦恼名目，如求戒人，或九十日，或四十日，或三七日行忏，苦到精进，期满限终，将九、八二签参合百八者，佛前望空而掷。其签堕地，以验罪灭不灭之相。若百八签飞逗四畔，唯八、九二签卓然坛心而立者，即得上上品戒焉。若众签虽远，或一二来触九、八签，拈观是何烦恼名，抑令前人重覆忏悔已，止将重悔烦恼签和九、八者，掷其烦恼签，去者名中品戒焉。若众签埋覆九、八者，则罪不灭，不得戒也。设加忏悔过九十日，得下品戒焉。”慈氏重告诲云：“八者新熏也，九者本有焉。”嘱累已，大仗既回，山川云雾。于是持天衣，执天钵，犹如五夏比丘，？道下山，草木为其低垂覆路，殊无溪谷高下之别。飞禽鸢兽，驯伏步前。又闻空中唱告村落聚邑，言菩萨出山来，何不迎接？时则人民男女布发掩泥者，脱衣覆路者，毡罽毼承足者，花纛因美褥填坑者，表咸曲副人情，一一迪践。有女子提半端白覆于途中，表似惊忙之色，回避别行。女子怪其不平等，表曰：“吾非无慈不均也，适观缕间皆是鬘子，吾虑伤生，避其误犯耳。”原其女子，本屠家贩买得此布也。自尔常有二虎左右随行，表语之曰：“吾不入郛郭，汝可导引至可修行处。”则乃缓步而行三十来里，就一山坡，蹲踞于前。时则挂锡树枝，敷草端坐。四望信士，不劝自来，同造伽蓝，号金山寺焉。后人求戒，年年忏罪者绝多，今影堂中道具存焉。

系曰：表公革心变行，一日千里，果得慈氏为授戒法。此五十受中何受邪？通曰：“近上法见谛自誓也。发天眼通是证初二果也。非谛理现观而何？专据石坛，与多子塔前自誓同也。”或曰：“所授签检以验罪灭之相，诸圣教无文。莫同诸天传授，或魔鬼所为，不可为后法乎？”通曰：“若彰善瘴恶，利益不殊。弥勒天主是天传授，非魔必矣。诸圣教中有忏罪求征祥，证其罪灭不灭。然其佛灭度，弥勒降阎浮说瑜伽，岂可不为后世法耶？《十诵律》云：‘虽非佛制，诸方为清净者，不得不行也。’”

○唐安州十力寺秀律师传

释秀公者，齐安人也。髫年天然有离俗之意焉。既丁荼蓼，便往蜀部，礼兴律师，讽诵经典，易若温寻。又依之进具，果通达毗尼，乃为兴公传律上足弟子欤？如是四载，入长安，造宣律师门，为依止之客。勤以忘劳，涉十六年，不离函丈。穷幽诸部，陶练数家，将首疏为宗本，然向黄州报所生地。次往安陆，大扬讲训。声美所闻，诸王牧守攸共遵承正化，缁徒咸慕细行。有贞固律师居于上席；解冠诸生最显清名；余皆后殿。其诸成业，不可胜算。春秋七十余，卒于十力寺本房焉。

○唐京师崇圣寺灵蕃传

释灵蕃者，不知何许人也。勤乎切问，靡憚寻师。乾封中，于西明寺躬预南山宣师法席。然其不拘常所，或近文纲，或亲大慈，皆求益也。末涂惧失宣意，随讲收采所闻，号之曰记，以解删补钞也。若然者推究造义章之始，唯慈与蕃也。又别撰《轻重诀》，故苑陵玄胄亲睹其文，故援引之以解量处轻重仪焉。金革之故，其诀湮灭，无复可寻矣。

○唐京兆崇福寺满意传

释满意，不知何许人也。风神峭拔，识量宽和，经论旁通，专于律学。武德末，所遇邺都法砺律师，作疏解昙无德律，遂往抠衣，明其授受。如是讲导三十许年，乃传付观音寺大亮律师。亮方授越州昙一。盛化之间，出龙象之资，无过意之门也矣。

○唐京兆西明寺崇业传

释崇业，不知何许人也。初同弋阳道岸学毗尼于文纲之法集。业之服勤，淬砺罔怠，黉肆之间推居元长。与淄州名恪齐名，挺拔刚毅过之，美声洋洋达于禁闼。睿宗圣真皇帝操心履道，敕以旧邸造安国寺，有诏业入承明熏修别殿，为帝授菩萨戒，施物优渥，金回舍修菩提寺殿宇，抑由先不畜盈长之故也。开元中微疾，嘱弟子曰：“吾化穷数尽，汝曹坚以防川，无令放逸。”语讫，终于所居寺之别院。业即南山之嗣孙矣。

○唐越州法华山寺玄俨传（融济）

释玄俨，俗姓徐氏，晋室南迁，因官诸暨，遂为县族。年始十二，辞亲从师，事富春僧晖。证圣元年，恩制度人，始堕僧数，隶悬溜寺。俨幼而明敏，长则韶令，标格峻整，风仪凜然。迨于弱冠，乃从光州岸师谿受具戒。后乃游诣上京，探赜律范，遇崇福意律师并融济律师，皆名匠一方，南山上足，咸能升堂睹奥，共所印可。由是道尊戒洁，名动京师。安国授记，并充大德。后还江左，偏行《四分》，因著《辅篇记》十卷、《羯磨述章》三篇，至今僧徒远近传写。初，光州岸公尝因假寐

，忽梦神僧谓曰：“玄俨当为法器，云何教以小乘？”后乃命宣《般若》。由是研精覃思，采摭旧学，撰《金刚义疏》七卷，古德所不解，先达所未详，我则发挥光明，若指诸掌。誓以一生宣讲百遍。越邑精舍，时称法华，晋沙门昙翼曾结庵山巔，入是法三昧，感遍吉菩萨。徒观其塔类多宝，涌出以证经；宫如转轮，飞行而听法。双乌所以示兆，今尚翔鸣；六象所以呈奇，时犹隐现。不可得而思议者，盖斯之谓欤。信如来之福庭，是菩萨之隐岳。俨乃考盘是卜，束钵深栖，建置戒坛，招集律行。若夫秦衡上士，燕代高僧，数若稻麻，算同竹？，伏膺请益，蹶蹶簪簪。宴坐不出，几三十载。开元二十四年，帝亲注《金刚般若经》，诏颁天下，普令宣讲。都督河南元彦冲躬请俨重光圣日，遂阐扬幽赞，允合天心，令盲者见日月之光。聳者闻雷霆之响。俨之演畅，盖有力焉。夫乐小法者迷自我而为病，通大方者憎开空之法道。若夫会三归一，触理蠅事，自优波离已下犹或病诸。而俨纲纪小乘，演畅大法，晤佛境之非有，识魔界之为空。故能使涅槃将生死一如，烦恼与菩提齐致，发心而登佛地，非我而谁？白黑归依，当仁不让。昔僧护法师常居石城，宴坐青壁，仰其中峰，如有佛像，愿造十丈，以图兜率。良愿未谐，护公长逝。梁武皇帝诏僧祐律师驰传经理，规模刻划，意匠才施。俄而山豕潜崩，全身坐现，合高百余尺。虽金石丝竹，四天之供施常闻；功德庄严，十地之雕镌尚阙。俨乃内倾衣钵，外率檀那，布以黄金之色，熔以白银之相，铜锡铅锆，球琳琅玕，七宝由是浑成，八珍于焉具足。虽宝积献盖，界现三千；迦叶贡衣，金逾十万；如须弥之现于大海，若杲日之出于高山，此又俨之功德不可思议者也。故洛州刺史徐峤、工部尚书徐安贞，咸以宗室设道友之礼；国子司业康希铣、太子宾客贺知章、朝散大夫杭州临安县令朱元？，亦以乡曲具法朋之契。开元二十六载，恩制度人，采访使润州刺史齐遒、越州都督景讷咸、采访卢见义、泗州刺史王弼，无不停净境，禀承法训。齐公乃方舟结乘，奉迎俨于丹阳、余杭、吴兴诸郡，令新度释子躬授具戒。自广陵迄于信安，地方千里，道俗受法者殆出万人。凡礼《佛名经》一百遍，设无遮大会十筵，而入境住持，举无与比。夫秉法传授，从佛口生，有门人法华昙竣崇默、龙兴崇一、开元智符、称心崇义、香严怀节、宝林洪需觉引灌顶，皆不倾油钵，无漏浮囊。经不云乎？如旃檀林，繖檀围绕；如师子王，师子围绕。信俨之威神有在，而法主之功德不刊。将知三界无安，百灵共尽，此生已适于后息，他世应见于前心。以天宝元载岁次壬午，缘化已毕。十一月三日，现疾于绳床，七日午时，坐终于戒坛院，春秋六十有八。粤其月二十五日，窆于寺南秦山之下。高树双塔，光明逾于白云；列植千松，秀色罗于明月。经始则神邕、崇晓，住持则惟湛、道昭，并躬护圣场，亲传智樱其余三千门人，五百弟子，承般若之深法，受毗尼之密行，尽号颺门，无待弥勒。天宝十五载岁次景申，万齐融述《颂德碑》焉。

○唐杭州灵智寺德秀传

释德秀，俗姓孙氏，富阳人也。少出尘区，早栖梵宇。当圆戒检正护浮囊，匪定常师，留神律府。讲谈之外，尝哀鬼神乏食，恒以深更施其饮食。浙汭之民，倾诚畏服。及终于定山，颇多灵异，则天宝初载也。迁神座入塔时，天降舍利七颗，门人

以瓶盛之，緘于其塔。或发之，见秀齿上生舍利，纷纷而坠。后人还累璧成浮图。乡人云：“恒有白蛇蟠屈守塔，樵牧之童无敢近者。”

○唐开业寺爱同传（玄通）

释爱同，俗姓赵氏，本天水人也。代袭冠冕，弱龄挺拔，惠然肯来，为佛家子。具戒后，讲弥沙塞律，远近师稟，若鳞羽宗乎鯤凤也。昔南宋朝闕宾三藏觉寿译成此律，因出《羯磨》一卷，时运迁移，其本零落，寻求不获，学者无依。同遂于《大律》之内，抄出《羯磨》一卷，彼宗学者盛传流布，被事方全。孝和之世，神龙中盛重翻宣，同与文纲等参预译场，推为证义。义净所出之经，同有力焉。著《五分律疏》十卷，复遗嘱西明寺玄通律师重施润色。后安史？扰，焚燎丧寺，今无类矣。

○唐五台山谿律师传

释谿律师者，五台县人也。彩服出家，冠年受戒，仪则清雅，众稟纲绳。习毗尼宗秘菩萨行。谿除训徒外，守默无挠，远近有事，靡不豫知，人谓为得他心通也。一食终日，弊衣遮体，不贮颗粒，房无缕综。其强本节用，造次不可及也。入灭之日，祥云郁密，天乐铮？从，阖寺僧徒皆闻异香馥馥。乃召集寺众，执手告辞，嘱累门人，加趺而灭云。

○唐扬州龙兴寺法慎传

释法慎，姓郭氏，江都人也。孩抱之岁，誓齿空门，亲爱所钟，志不可夺。从瑤台成律师受具戒。依太原寺东塔，体解律文，绝其所疑，时贤推服。或一言曲分于象表，精理自得于环中，声振京师，如晞爱日。诸寺众请纲领，乃默然而东归。既还杨都，俯允郡愿，恒诵《金剛般若经》、《如意轮》。般若佛心，我得此心，众生亦得。如意胜愿，我如此愿，众生亦如。谓“天台止观，包一切经义；东山法门，是一切佛乘。色空两亡，定慧双照，不可得而称也。”慎暑不摄齐，食不求饱，居不易坐。四方舍施，归于大众，一身有无，均于最下。朝廷之士衔命往还，路出维杨，终岁百数，不践门闕，以为大羞。仰承一眄，如洗饥渴。慎与人子言依于孝，与人臣言依于忠，与人上言依于仁，与人下言依于礼。佛教儒行，合而为一。学者流误，故亲校经论。延来者听受，故大起僧坊。将警群迷，故广图菩萨因地。善护诸命，故曲济众生寿量。以文字度人，故工于翰墨。以法皆佛法，故兼采儒流。以我慢为防，故自负衣钵。以规矩为任，故纲正缙林。以发挥道宗，故上行恭礼。以感慕遗迹，故不远他邦。以龙象参议，故再至京国。以轨度端明，故研精《律部》欬！黄门侍郎卢藏用才高名重，罕于推挹，一见于慎，慕味循环，不能离坐。退而叹曰：“宇宙之内，信有高人！黄门于院中置以《经藏》，严以香灯，天地无疆，像法常在。太子少保陆象先、兵部尚书毕构、少府监陆余庆、吏部侍郎严挺之、河

南尹崔希逸、太尉房琯、中书侍郎平章事崔涣、礼部尚书李憺、辞人王昌龄、著作郎綦母潜，金所瞻奉，愿同洒扫。感动朝宰如此。以天宝七载十月十四日晨兴盥漱，就胡床加趺，心奉西方，既曛而灭于龙兴寺别院，春秋八十三，夏六十二。缙素弟子，北距泗沂，南逾岭徼，望哭者千族，会葬者万人。其上首曰会稽昙一、闽僧怀一、南康崇睿、晋陵义宣、钱塘谭山寺惠鸾、洛京法瑜崇元、鹤林寺法励、法海、维杨惠凝、明幽、灵祐、灵一等，罔不成乐说辩才入《法华》三昧。众所知识，物之依怙。天上甘露，正味调柔；人中象王，利根成熟。音乐树下，长流福慧之泉；雪山峰顶，仰见清凉之月。金刚决定，烦恼无余。优昙开敷，香洁盈满。法施之恩，郡居之感，哀奉色身，经始灵塔于芜城西蜀冈之原。像教也，幽公自幼及衰，恒所亲侍，后请吏部员外郎赵郡李华为碑纪述，大历八年癸丑十二月也。大理司直张从申书，赵郡李阳冰题额。其塔亦幽公经度。建塔之地，广袤如素，高卑得中。周临四衢，平视千里。门人环蒔列柏，荐以名香。其塔属会昌中例，皆毁焉。

○唐杭州华严寺道光传

释道光，姓褚氏，逾龀出家。方冠受具，诣光州和尚学通毗尼。于时夏浅德崇，坛场属望，盖天资真士，为东南义虎，云雨慈味，笙镛道声。光持《法华经》，创塔庙，泊没身不怠也。上元元年庚子仲秋示疾，终于本寺，春秋七十九，法腊五十八。是日驰阳昧昧，淫雨淫淫，思思，烈风崇朝，嘉木为折，乃东土福尽之征也。俄然喜气五色，亭亭如盖，移晷不散，偏映精庐，即西方往生之意也。初光未歿，其月三日质明，支疾凝神，依色身观，弥陀具相现在其前。满庭碧花，昔所未睹者。四日昧爽，有异人请光为和尚，遂开目弹指曰：“但发菩提心。”至五日，曼陀罗花自天而雨。门人神烈义津追慕弗遑，各分法味，流布行化，香火无穷云。

○唐扬州大云寺鉴真传

释鉴真，姓淳于氏，广陵江阳县人也。总？俊明，器度宏博，能典谒矣。随父入大云寺，见佛像，感动夙心，因白父求出家。父奇其志，许焉。登便就智满禅师，循其奖训。属天后长安元年，诏于天下度僧，乃为息慈配住本寺，后改为龙兴。殆中宗孝和帝神龙元年，从道岸律师受菩萨戒。景龙元年，诣长安。至二年三月二十八日，于实际寺依荆州恒景律师边得戒。虽新发意，有老成风，观光两京，名师陶诱。三藏教法，数稔该通，动必研几，曾无矜伐。言旋淮海，以戒律化诱，郁为一方宗首。冰池印月，适足清明；猊座扬音，良多响答。时日本国有沙门荣睿、普照等东来募法，用补缺然。于开元年中，达于扬州，爰来请问，礼真足曰：“我国在海之中，不知距齐州几千万里。虽有法而无传法人，譬犹终夜有求于幽室，非烛何见乎？愿师可能辍此方之利乐，为海东之导师乎？”真观其所以，察其翹勤，乃问之曰：“昔闻南岳思禅师生彼为国王，兴隆佛法，是乎？又闻彼国长屋曾造千袈裟来施中华名德，复于衣缘绣偈云：‘山川异域，风月同天，寄诸佛子，共结来缘。’以此思之，诚是佛法有缘之地也。”默许行焉。所言长屋者，则相国也。真乃慕比丘

思托等一十四人，买舟自广陵赍经律法离岸，乃天宝二载六月也。至越州浦，止署风山。真夜梦甚灵异。才出洋，遇恶风涛，舟人顾其垂没，有投弃栈香木者。闻空中声云：“勿投弃。”时见舳舻各有神将介甲操仗焉，寻时风定。俄漂入蛇海，其蛇长三丈余，色若锦文。后入鱼海，鱼长尺余，飞满空中。次一洋，纯见飞鸟集于舟背，压之几没。泊出鸟海，乏水。俄泊一岛，池且泓澄，人饮甘美。相次达于日本，其国王欢喜迎入城大寺安止。初于卢遮那殿前立坛，为国王受菩萨戒。次夫人、王子等，然后教本土有德沙门足满十员，度沙弥澄脩等四百人，用白四羯磨法也。又有王子一品亲田舍宅造寺，号招提，施水田一百顷。自是已来，长敷律藏，受教者多，彼国号大和尚，传戒律之始祖也。以日本天平宝字七年癸卯岁五月五日，无疾辞众，坐亡，身不倾坏，乃唐代宗广德元年矣。春秋七十七，至今其身不施漆，国王贵人信士时将宝香涂之。僧思托著《东征传》详述焉。

○唐杭州天竺山灵隐寺守直传

释守直，字坚道，钱塘人也，姓范氏，齐信安太守？之八叶。礼既冠众，君子器之。夙有丘园之期，不顾玄纁熏之锡。遂诣苏州支硎寺圆大师所受具足律仪。是夜，眼中光现长一丈余，持久方灭，盖得戒之验也。后抵江陵，依真公。三年练行。寻礼天下二百余郡，圣迹所至，无不至焉。见无畏三藏，为受菩萨戒。闻普寂大师传《楞伽》心要讲《起信》宗论二十余遍；南山《律钞》四十遍，平等一雨，大小双机在乎圆音，未尝少异。乃立愿诵《华严经》还于中宵梦神人施珠一颗。及觉，惘惘然如珠在握。是岁入五台山，转《华严经》二百遍，追夙心也。宏览《大藏经》三过，广正见也。至开元二十六年，有制举高行，道俗请正名隶大林寺，后移籍天竺住灵隐峰，时大历二年也。至五年三月，寓于龙兴净土院，谓左右曰：“夫至人乘如而来，乘如而去，示其心然也。而愚夫欲以长绳系彼白日，安可得乎？吾景落桑榆，岂淹久也？”以其年此月二十九日告终，春秋七十一，僧腊四十五。其间临坛度人多矣，显名者洞庭辩秀，湖州皎然、惠普、道庄、会稽清江、清源、杭州择邻、神偃、常州道进。昼公著《塔铭》云。

○唐洪州大明寺严峻传

释严峻，姓樊氏，濉州人也。父任碭州长史、昭王府司马。峻性地夷然，学习明利。年及十九，应进士举。倏罹荼蓼，思报劬劳，投南阳佛寺。后抵荆州玉泉山兰若，遇真禅师，示其禅观，入城泊大云寺。峻秉持戒印，用之不殒，凭附浮囊，渡之攸往。众请临坛，复举律之宗主，僇？承命。忽逢观净禅师，顿明心法。大历元年，思往清凉山，未达庐陵，见颜鲁公，一言相契，胶漆如也。二年春，宜春太守俾僧正驰疏请召。四年春，洪州刺史李华员外延入大明寺住止。三月中，俄命沐浴更衣，举望空虚，合掌而逝，春秋五十九。迁塔，弟子圆约等于寺前大泉池立碑存焉。

○唐会稽开元寺昙一传

释昙一，姓张氏，盖韩人也。其先轩辕赋姓，至良佐汉，侯于留。魏晋已还，衣冠继代。曾祖恒，隋太常卿，扈跸杨都，遂家于越。恒生孝廉翼，翼生处士藏，藏生一，令闻江南，今四叶矣。一宿植净因，生知慧性，弱而敏悟，长而聪明。年十五，从李滔先生习《诗》、《礼》，终日不违。十六，听云门寺茂亮法师经论，一闻悬解。法师异之，谓其母孟氏曰：“此佛子也，可令削发，当与授记。”亮即孝和皇帝菩萨戒师也。一闻而欢喜，有度世之志。景龙中，承恩出家，隶在僧录。年满受具于丹阳玄昶律师，学通《事钞》于当阳县胜律师。既而钻木见烟，窥墙睹奥。开元五年，西游长安，依观音寺大亮律师，传《毗尼藏》，崇圣寺檀子法师学《唯识》、《俱舍》等论，安国寺印度沙门受菩萨戒。于是莲花不染之义，甘露甚深之旨，一传慧炬，了作梵雄。远近瞻仰，如宗师矣。然刃有余地，时兼外学，常问《周易》于左常侍褚无量，论《史记》于国子司业马贞。遂渔猎百氏，囊括《六籍》，增广闻见，自是儒家，调御人天，皆因佛事。公卿响慕，京师藉甚。时丞相燕国公张说、广平宋规、尚书苏瑰、兖国陆象先、秘书监贺知章、宣州泾县令万齐融，皆以同声并为师友，虽支许之会虚嘉，宗雷之集庐岳，未云多也。《四分律》者，后秦三藏法师梵僧佛陀耶舍传诵中华，与罗什法师共为翻译，今之讲授，自此员来。魏法聪律师始为演说，聪授道覆，覆授光。洎隋朝相部励律师作《疏》十卷，西京崇福寺满意律师盛传此《疏》，付授亮律师。其所传授一，一依励律师《疏》及唐初终南宣律师《四分律钞》三卷，详略同异，自著《发正义记》十卷。明两宗之金驳，发五部之铃键。后学开悟，夜行得烛，前疑泮释，阳和解冰，佛日昭？而再中，法栋峥嵘以高峙《发正记》中？破南山持犯中可见也。二十五年，仗锡东归。明年诏置开元寺，长史张楚举为寺主，因而居焉。一声振京华，道高吴会，布大慈以摄众，修万行以表仪。顺风问道者毂击肩摩，函丈请益者波委云萃。虚受之量，随而演说，故前后讲《四分律》三十五遍，《删补钞》二十余遍焉。江淮释子受木叉者，非一登坛即不为得法。从持僧律，盖度人十万计矣。至德之际，国步多艰，缙徒慢法，罕率经教。国相王公出镇于越，以一德名素高，请为僧统。一变清静，大阐熏修，浹旬之间，回邪入正。善诱潜化，皆此类焉。始者一入关谒明达法师，目之曰：“汝人中师子也。”又遇遵善寺尼慈和，歌曰：“昙一师，解毗尼，大聪明，更无疑。”为达人之所谚多矣。天宝十四载，浙河潮水南激钱塘，大云伽蓝当兹湍洑旱，因请一讲律，学徒千人咸发大愿。每上，念摩诃般若，乃止涛激，以福伍胥、龙王。用兹庄严，祈于卫护。五月晦夜，惚恍之间，见一神人，衣冠甚伟，稽首谢曰：“蒙垂法施，即改波流。”未逾九十日，涨沙五十里，道俗惊叹，得未曾有。一蔚为法主，大扬教迹，发明前佛之付嘱，保证后佛之护念。四句作偈，受持者了于未了；一音演法，谛听者闻所不闻。非夫天地淳精，江山粹灵，与法作程，间世而生，孰能玄通密证如此其大者乎？寺中洪钟，一所作也，远征鳧氏，近法雷门。生存累年，匠其规制，歿后三日，成于熔造，声应百里，扛乎万钧，蒲牢叫而地震，师子吼而山，警悟聋俗，导引迷方，胡可言也！法谢形离，薪尽火灭，以大历六年十一月十七日迁化于寺之律院，报龄八十，僧腊六十一。即以明年十一月

二十四日迁座于秦望山，从先和尚之莹也。一春秋已高，精爽逾励，既不衰惫，初无疾苦。忽谓侍者曰：“吾将扫礼坟塔，归骨于此。”数日之后，奄然而终。江淮之南，河洛之表，衣乡衰制服，执紼送丧，号哭满山，幡花蔽野，比夫剧孟之母送车千乘，孔丘之墓栽树万株，可同年哉！门人越州妙喜寺常照、建法寺清源、湖州龙兴寺神玩、宣州隐静寺道昂、杭州龙兴寺义宾、台州国清寺湛然、苏州开元寺辩秀、润州栖霞寺昭亮、常州龙兴寺法俊等，早发童蒙，咸承训诱，三千弟子仰梁木而增悲，八万门人望綖檀而不及。时会稽徐公浩素敦乡里之旧，为碑颂德焉。大历十一年也。

卷十五

◎明律篇第四之二（正传十九人附见三人）○唐余杭宜丰寺灵一传

释灵一，姓吴氏，广陵人也。神清气和，方寸地虚，与大和元精合其纯粹。年肇九岁，僻嫌朽宅，决入梵园，堕息慈之伦，禀出家之制。暨乎始冠，受其具足，学习无倦，律仪是修。示见谈笑，欲明解脱。示人文艺，以诱世智。初不计身中有我，我中有身。德全道成，缘断形谢，以宝应元年冬十月十六日，寂灭于杭州龙兴寺，春秋三十五，凡满十五安居。临终，顾谓弟子行荼毗法，树小浮图焉。时左卫兵参军李纾、嘉兴县令李汤、左金吾卫兵曹参军独孤及相与悼梁木之既坏，虑陵谷之当迁，后之人礼应真之塔婆，昧应真之德行，故刻石于武林山东峰之阳也。一家富货殖，既而削发，推千金之产，悉让诸孤昆弟，所取者惟纳衣锡杖。自尔叩维阳法慎师，学相部律，造乎微而臻乎极。友善者慧凝、明幽、灵祐、会稽昙一、晋陵义宣、同门三益，作者七人也。一咳唾尘境，继日经行，宴坐必择山椒树下。初舍于会稽山南悬溜寺，接禅者隐空、乾靖，讨论第一义谛。或游庆云寺，复居余杭宜丰寺。寺邻生丹山，门对佳境，礚然独往。暴风偃山，正智不动，巨浪沃日，浮囊不飘。于是著《法性论》，以究真谛，此一之了语也。每禅诵之隙，辄赋诗歌事，思入无间，兴含飞动。潘阮之遗音页，江谢之阙文，必能缀之，无愧古人。循循善诱，门弟子受教，若良田之纳膏雨焉。一迹不入族姓之门，与天台道士潘志清襄阳朱放、南阳张继、安定皇甫曾、范阳张南史、吴郡陆迅、东海徐嶷、景陵陆鸿渐为尘外之友，讲德味道，朗咏终日。其终篇必博之以文，约之以修，量其根之上下而授之药焉。一居寺高隅，初无井泉，一旦呀然而涌，喷金沙之溜于庭之左右，挹之弥清，之无竭，盖精至之感矣。诗行于世，有选其尤者入《盼气集》焉。

○唐吴郡东虎丘寺齐翰传

释齐翰，字等至，吴兴沈氏之子。高祖陈国子祭酒，曾祖隋魏州司马，祖考三世不仕。翰绮岁从父至山寺，蹈高静无尘之躅，惻然有宿命之知，固请舍家。至天宝八载八月五日奉制度，配名永定寺。九载十月，跻五分坛纳形俱戒，移名开元。大历中转隶武丘，皆两州道俗所请从命也。翰道性渊默，外则淡然。迹不近名，身不关事，长在一室，寂如无人，岂比夫骈行鼓簧之士哉？颛门相部《义疏》，精敏罕俦。明《法华经》主苏湖戒坛，每当请首，则今时所谓坛长也。大历十年入流水念佛道场，是夜西方念中顿现，盖纯诚之所致也。即以其年终于本院，春秋六十八，法腊二十六。翰遇疾之日，谓门弟子曰：“有鹤从空飞下，回翔我前，尔曹见乎？必谢之期，小圣犹病，安能免哉？”受业门人如隐、戒坛宣兑等。与吴兴皎然结法门昆弟之交，俱高洁，难可轻慕焉。

○唐润州招隐寺朗然传

释朗然，俗姓魏，世袭冠冕，其先随东晋南渡，则为南徐人也。开元中入道，受业于丹阳开元寺齐大师。天宝初受具于杭州华严寺光律师。后徙灵隐寺，依远律师，通《四分律钞》，重稟越州昙一律师，精研律部《讲训》，生徒四远响应。肃宗至德二年，恩命举移，隶名于慈和寺。上元中，刺史韦儼又请为招隐统领大德。即以其年讲授之暇，著《古今决》十卷，解释《四分律钞》数十万言，繁杂义例，条贯甚明，大行于世。观其先列古人之义，有所不安，则判断之，故号决也。《决》中自序，初依天竺威律师学习，复从远一二师也。凡戒坛则二十六登，皆为坛席之主。《律钞》凡二十八过讲。有馈遗者随丰薄，受而转施悲信二田。凡于教理，披文究义，皆言宿习之力也。执持戒检，斯须不违。大历十二年冬癸卯，趺坐如常，恬然化灭，时年五十四，僧腊三十五。越十三年春辛酉，建塔于山西原，乡衰麻之徒泣血千计。高行弟子清浩、择言等。请益弟子御史中丞洪府观察使韦儼、吏部员外李华、润州刺史韩贄、湖州刺史韦损、御史大夫刘暹、润州刺史樊晃，皆归心奉信。屯田员外郎柳识为碑颂焉。

○唐越州称心寺大义传

释大义，字元贞，俗姓徐氏，会稽萧山人也。以天授二年五月五日，特稟神异，生而秀朗。七岁，父训之以经典，日可诵数千言。年十二，请诣山阴灵隐寺求师，因习内法，开卷必通，人咸叹之。属中宗正位，恩制度人，都督胡元礼考试经义，格中第一。削染，配昭玄寺。自兹听习，旁瞻玄儒。开元初，从吴郡圆律师受具。复依本州开元寺深律师，学《四分律指训》。义因游长安，深公已亡，乃抠衣法华寺玄俨律师，其俊迈出伦，俨云：“于今传法，非子而谁？”及称心本寺超律师请为寺任。开元中丧亲，誓入天台佛陇转《藏经》，答劬劳也。天宝中遂筑北坞之室，即支遁、沃洲之地也。初梦二梵僧曰：“汝居此与二十日。”至宝应初，复梦曰：“本期二十日，今满矣。魔贼将至，不宜更处。”无何，海贼袁晁窃据剡邑，至于丹丘。义因与大禹寺迴律师同诣左？朗禅师所，学止观，而多精达。前后朝贵归心者，相国杜鸿渐、尚书薛兼训、中丞独孤峻、蕞州刺史徐峤、次徐浩，皆宗人也。以大历己未岁五月终于本院，春秋八十九，僧腊六十三。殡于寺之北坞旧居，因造塔焉。义前后戒坛计二十七登，受戒弟子三万余人。终时，室中闻天乐声，验乎生诵《法华经》、《大涅槃经》、小大乘戒本，以为口业德行，非归兜率，不往净土，未可议其生处也。

○唐常州兴宁寺义宣传

释义宣者，晋陵人也。宿殖利根，桔然出俗，不烦师训，砥砺厥心。纳法后，孜孜律科，时无虚度。玄儒旁综，长在篇章，卒问捷给。而稟延陵恭让之风，雅得毗尼之体。初扬州法慎传于旧章，淮甸之间，推为硕匠。天宝初，宣敛衽抠衣，谘询弥久，辈流率服。慎且叹赏曰：“可畏乎！”宣讲终南《事钞》，请业于周律师之庭，考核尤精，乃著《折中记》六卷以解之。盖慊融济、著、胜诸师有所纰谬故也。使

是非各尽其分，人免据宗而阿比，从此立称耳。毗陵多出名士僧，有三宣、慧、德、义是欤。时于江都习业，与会稽昙一、闽川怀一、庆云灵一同门为朋也。晋陵既有三宣，慎门复出三一焉。江表资为美谈。宣天宝末盛行化导，罔究其终。

系曰：夫名以制义，所出无穷，奈何师资踵武，而犯教祖之讳乎？通曰：“《春秋》贵贱不嫌同号也。”或曰：“滕齐不敌，俱书侯，乃曰不嫌同号。号与名岂得例诸？”通曰：“号大不嫌，名小岂嫌乎？矧以义宣始为名者，安知弟子成事于南山之门邪？然出家者必也无妨。一则姓既以华从梵，咸称释氏。一则西域无讳，此合从旃。且讳者周人以事鬼神，夏商无讳明矣。况乎宣师已生兜率，小为天人，大为菩萨，岂宜以鬼神事之？致令唐初高德胜士，往往止存一字名，职由讳之极矣。属今修撰，乃阙文也。乃知真谛无讳，俗谛闻似则惧。”或曰：“今沙门姓既为释，名复不讳，言我不随俗谛，云何对君主称臣？莫西域有否？”通曰：“姓名不对王者，臣妾表疏合然。昔齐帝问王俭，遂令对见称名。自汉至唐肃宗朝，始见称臣，由此沿而不革。良以沙门德薄，日就衰微，一往无复矣。又以法委国王，诚难改作。王谓为是，楷定莫移。故佛言虽非我制，诸方为清净者，不得不行也。”

○唐苏州开元寺辩秀传

释辩秀，俗姓刘氏，汉楚王交三十一代孙也。秀幼孤，诸父哀字，礼如教立，孝自天生。而宿殖缘深，心田欲稔；因请伯氏，出家长行，哀而舍旃。事灵隐谋禅师，便能问津，图入道之意。所闻指训，如凉风入怀，醒然清悟。天宝四年，受戒于东海鉴真大师，传律于会稽昙一。至德中举高行，隶名于吴郡开元寺。乾元中，下诏天下二十五寺，各定大德七人，长讲戒律，秀应其数也。顷年于净土一门，不愆于念。尝谓人曰：“昔闻西方之行是有相大乘，此乃蓬心不直，非达观之说。何邪？夫出言即性，发意皆如，而一色一香，无非中道，况我正念乎？”秀坛场一十六番，度人孤制，律枢正持，僧纲自肯，湖南北皆宗仰焉。以建中元年六月十五日寝疾而终，春秋六十七，法腊三十五。当其逝日，有庭树一本，枝叶扶疏，朝花正敷而遽萎瘁。其年七月五日，迁灵龕于武丘西寺松门之右。门人道亮、道该、清会，偕绕繖檀之香树也。故观察使韦元甫、李栖筠、虢州刺史李纾、御史中丞李道昌尽钦慕往德，亦林下之交。较昼为碑颂焉。

○唐京师安国寺如净传

释如净，不详何许人也。甫参法位，当纳戒津，明练毗尼，砥砺名节。时恒讲勘，徒侣云屯。辞笔偕长，博达儒典。先是关中行智首律师《四分律疏》，魏郡法砺律师著《疏》别行。尔时关辅河北，各竞宗派，微似参辰。隋末唐初，道宣律师以首《大疏》为本，造《删补律钞》三卷，稍为会要，行事逗机。贞观已来，三辅、江、淮、岷蜀多传唱之。次奘三藏弟子怀素者，先习《钞宗》，后委弃宣、砺之学，于咸亨年中别述《开四分律记》，后号新章欤。至代宗大历中，新章旧疏，互相长

短。十三年，敕集三宗律匠，重定二家隆杀，时净推为宗主，语在《圆照传》。至建中二年，奏二疏并行，净之力也。盖以国相元公载笃重素公，崇其律教，乃命净为新疏主作传焉。

○唐汉州开照寺鉴源传（慧观）

释鉴源者，不知何许人也。素行甄明，范围律道，绊刍表率，何莫由斯。后讲《华严经》，号为胜集，日供千人粥食，其仓箠中米粟才数百斛，取之不竭，沿夏涉秋，未尝告匮，其冥感如此。其山寺越多征应，有慧观禅师见三百余僧持莲灯，凌空而去，历历如流星焉。开元中，崔冀公宁疑其妖妄，躬自入山宿，预禁山四方面各三十里火光。至第三夜，有百余支灯现，兼红光可千尺余。冀公蹶然作礼，叹未曾有。时松间出金色手，长七尺许，有二菩萨黄白金色闪烁然。复庭前柏树上，昼现一灯，其明如日，横布玻璃。山可三里所，宝珠一颗圆一丈，熠颿可爱。西岭山门悬大虹桥，桥上梵僧、老叟、童子间出，有二炬烂然空中，如相迎送交过之状。下有四菩萨，两两偶立，放通身光，可高六七十尺。复见大松林后忽有寺额，篆书三学字。又灯下垂绣带二条。东林之间，夜出金山。月当于午，金银二色灯列于知铉师坟侧。韦南康皋每三月就寺设三百菩萨大斋，菩萨现形捧灯，僧持香灯引挹之，炉在寺门矣。白中令敏中睹瑞，兴立此寺。大中八年，改额曰开照。源律师道化，与地俱灵哉！弟子传讲，东川所宗也。

○唐吴郡双林寺志鸿传

释志鸿，俗姓钱氏，湖州长城下若人。本名俨，志鸿字也。少出俗于石门乡寺，则梁静林也。削染受具讫，往茂苑，亲道恒师盛集，研核精微。时昙清省躬，互相切磋，卒成洪绪。然慊先德释南山《钞》，商略不均，否臧无准，捕蝉忘后，补衮不完，囊括大慈、灵蕃已下四十余师记钞之玄，勒成二十卷，号《搜玄录》。大历中，《华严疏》主澄观披寻，乃为序冠于首。然其解判不无所长，其如科节繁碎，是其短也。春秋一百有八岁，敕署为长寿大师焉。近世止行其字而已。今双林累遭兵革，加以水潦，碑碣失踪，于言行也。吁！其俨公氏族本生必与南山宣律师相同，亦为美事矣。

○唐京兆安国寺乘如传

释乘如，未详氏族。精研律部，颇善讲宣，绳准缁徒，罔不循则。代宗朝翻经，如预其任。应左右街临坛度人，弟子千数。先是五众身亡，衣资什具悉入官库，然历累朝，曷由厘革。如乃援引诸律，出家比丘生随得利，死利归僧，言其来往本无物也。比丘贪畜，自兹而省者，职由于此。今若归官，例同籍没。前世遗事，阙人举扬。今属文明，乞循律法，断其轻重。大历二年十一月二十七日敕下，今后僧亡，物随入僧，仍班告中书门牒，天下宜依。如之律匠，非止训二众而已，抑亦奋内众

之遗事。立功不朽，如公是乎！终西明、安国二寺上座。有《文集》三卷，圆照鸠聚流布焉。

○唐襄州辩觉寺清江传

释清江，会稽人也，不详氏族。幼悟幻泡，身拘羈鞅，因入精舍，便恋空门，父母沮劝，建乎难拔。礼昙一律主为亲教师，讽诵经法，寓目俱通。长者品量之曰：“释门千里驹也。”于浙阳天竺戒坛求法，与同学清源从守直和尚下为弟子。还听习一公《相疏》并南山《律钞》，间岁精义入神，举皆通畅。而善篇章，儒家笔语，体高辞典，又擅一隅之美，时少伦？其褊农之性，不与人类。尝于一公少因不足，亦有舍和尚之讥。由是游方服勤，凡云律筵，无不预者。自责己曰：“天下行半，少有如我本师者。”还会稽，一公犹老，当其僧大集时，击木唱：“某再投和尚摄受。”时一公诟骂，江雨泪而忏悔曰：“前念无知，后心有悟，望和尚大慈，施与欢喜。苟不许收，则越人不可以强售章甫也。”一公悯其数四求哀，乃曰：“为汝含垢。”遂为师资如初。江有禅观之学。大历八年于汝陂遇忠国师，因弟子说自忠曰：“此律师是和尚乡人。”乃欣然相会，寻往南阳，再谒国师，密传心要焉。

系曰：“江尝为《七夕诗》，或谓之四背中一背也。通曰：“诗人兴咏，用意不伦。慧休《怨别》，陆机《牵牛星》，屈原《湘夫人》岂为色邪？皆当时寓言兴类而已。若然者，言火则焚口，说食则疗饥也矣。江之舍师，后乃扬师之美，反权合道也。实为此诗警世无常，引令入佛智焉。其故何也？详江遇忠国师大明玄理，无以域中小乘法拘之哉 1

○唐会稽云门寺灵澈传

释灵澈，不知何许人也。禀气贞良，执操无革，而吟咏情性，尤见所长。居越？云门寺，成立之岁，为文之誉袭远。讲贯无倦，生徒戾止如闾闾焉。故秘书郎严维、刘隋州长卿、前殿中侍御史皇甫曾，睹面论心，皆如胶固，分声唱和，名散四陲。澈游吴兴，与杼山昼师一见为林下之游，互相击节。昼与书上包佶中丞，盛标拣其警句最所重者，“归湘南作，则有‘山边水边待月明，暂向人间借路行，如今还向山边去，唯有湖水无行路’句。此僧诸作皆妙，独此一篇，使老僧见，欲弃笔砚。伏冀中丞高鉴深量，其进诸乎？其舍诸乎？方今天下有故，大贤勤王，辄以非急干请视听，亦昭愚老僧不达时也。然澈公秉心立节，不可多得，其道行空慧，无惭安远。复著《律宗引源》二十一卷，为缙流所归。至于玄言道理，应接靡滞，风月之间，亦足以助君子之高兴也。”其为同曹所重也，如此。昼又赍诗附澈去见，佶礼遇非轻。又权德舆闻澈之誉，书问昼公，回简极笔称之。建中、贞元已来，江表谚曰：“越之澈，洞冰雪。”可谓一代胜士，与杭标、较昼分鼎足矣。不测其终。

○唐扬州慧照寺省躬传

释省躬，睦州桐庐人也。为童强识，耆宿呼语，怪其志大而言高，无厌樊笼。忽投圣德寺慕道从师，敕恩得度。性灵天发，于毗？道，学如温习。复择名师，得姑苏开元道恒师。恒曰：“甚矣吾得躬也，门人日益亲。”及乎探赜精微，愈征愈远，时有击论互指为迷者，必请见躬为其判之，坐分曲直。谚曰：“义尽省躬”，言到躬义无不尽也。其博综律乘，碑御师门也若此。恒曰：“自吾有躬也，恶言不闻矣。”躬避席叶拱而对曰：“某不佞也，仰师之道，若采扶桑以啖蚕。所患者，未能呕繁丝以报主耳。”恒曰：“视子吐园客五色丝，可供黼绣之资。言太谦矣。”晚赴维杨之召，广训徒焉。然其满口雌黄，品藻否臧古今之义。生徒明敏者各录之，都加润色，号《顺正记》十卷，行之。复著《分轻重物仪》别行，沿袭《十三章门条例》，外加近世现有物之重轻，颇为要用，躬复高儒学，作碑颂越多，以其曾化邗沟，故呼淮南记主，自号清冷山沙门焉。

○唐吴郡包山神皓传（维亮）

释神皓，字恒度，姓徐氏。八代祖詵，齐竟陵王西玄卅学士。子陵，梁尚书左仆射，其文与庾子山齐名，迨陈国亡，因佐吴邑，遂家姑苏。皓乃为吴郡人也。天性耿洁，风韵朗迈。幼负脱俗之姿，寻依钱塘龙泉道场一公出家。天宝六年，降版诏精择真行，一州许度三人，皓居荐首，因隶僧籍于包山福愿道常初进具于兴大师，次通《律钞》于昙一。后十讲《律钞》，五升坛常遂乘舟归包山，使野叟诛茅，山童扫石，逍遥栖息。旋增修屋宇。乾元元祀，有诏天下二十七寺，各奏大德七人，长讲戒律。因请住开元寺，欲果其愿，且惧简书，遂僊？从命。奉戒弟子开州刺史陆向前、给事中严浚、服道弟子礼部侍郎刘太真、前大理评事张象、钦风弟子前廉使亚相李栖筠请纲任海隅。一邑缁伍，三变至于道。末年工于圆宗，别置西方法社，诵《法华经》九千余部。贞元六年十月开元寺遇疾，至十二月，顾嘱弟子维亮曰：“我弃世后，可归洞庭故山置塔。”说法而终。是夜琉璃色天，星如雨，西方兆泉，密现于前。春秋七十五，僧腊四十三。门人维亮有文有道，独步当时，执师之丧，不以证而废教也。传法弟子道超、灵竣道？、道棱、维让、维诚、皆一时英迈。较昼为《坟塔碑》颂美云。

○唐京师安国寺藏用传

释藏用，不详何许人也。从其拔俗，依栖嵩山空公为师。及乎年当应法，即于汾川炬律师所受上品形俱法。登诣洛中业公讲肆，研核律文，循其奥妙，无所不臻。洎闻有禅观之学，遂登庐陟霍，涉汉泛湘，望双峰之丛林。又归，开法京辇，道既精粹，训且均敷，蔼然为物楷模，向风宗重。当建中中，已全三十许腊。寻应诏充临坛首席，相继度弟子越多。及居东城化塔，乃代宗之邸第也，推用主其纲任。缁刍至息慈，皆遵畏爱焉。席熊延客，挥麈开谈，指衡山石也，有以识前身；传曹？钵

也，有以知后际。是以门多长者之辙，室满度人之筹，益物良深，坐镇雅俗。贞元中，左司正郎王、南台崔公继和之。如是数公将议标题，兵部正郎程浩作都序，职方正郎知制诰吴通微书之。四年戊辰岁也。用公长于律学，急护任持，为上都之表则也。

○唐湖州八圣道寺真乘传

释真乘，姓沈氏，德清人也。厥父玄望孝廉举调兖州司马。母氏妊乘，有神光异气之祥。识者言“沈氏必大其閹閹。”暨诞生也瑰伟，长与宗族诸子杂处，若群草中之琪树焉。总角之后，司马以文学喻之，令修官业，且愀然如有不得已之色。居处玩戏，则以佛像班布。父观其宿习，果请出家。属颜鲁公许试经得度，时已暗诵五百纸。比令口讽，一无差跌，大见褒异。落发配住八圣道寺得戒。后于通玄寺常进师所综习毗居。进公见其俊迈也，诫同门曰：“乘虽少龄，不可以伯仲齿之。”后西上京师云华寺，学《法华》天台《疏义》，大著声望。又章信寺众僧辟其讲发，醉千日者一听而自醒，迷终身者搏闻而永悟，经宗律柄，兼讲无亏，藉甚缙行，弱赫京邑。贞元十一年，功德使梁大夫以德宗亟幸安国寺，奏乘移隶，以备应对，充供奉大德数焉。时本师无滞亦以道业，实蒙恩渥，奏举乘为国祈福。无滞忽梦乘捧一白莲华南去。无何，乘果疾，乞归田间，敕允。既还乡里，本郡守李公钊奇、田公敦、浙东率薛公戒，或踵门而劝登法座，或驰简而延莅戒坛。乘迫以法缘，悉所勉强，以是八为律学座主，四为临坛正员。凡训授度人，或巾屨结缘，一无所受。游五台山，礼文殊圣容，所见瑞相，不可胜言。后在护国寺礼《佛名经》一百周。忏法之余，撰《法华经解疏记》十卷。以元和十五年冬十月示疾而终于本寺。乘精于律法，长于演说。以长庆二年十月十三日焚身于韶村西隅，遵遗命也。万年县尉王甄为碑述德焉。

○唐杭州灵隐山道标传

释道标，富阳人也。俗姓秦氏，其远祖与嬴同姓，世为汧陇大族。及晋东渡，衣冠随之，后为杭人也。其高曾至王父，皆沿以儒素，不甘为吏，故州里尊奉之。标生则孤明，长而深趣，老而坚固，盖良善之因有自来矣。年七岁，时神清气茂，不亲凡童。倏有大沙门手摩其顶曰：“此孺子目秀如青莲，得非我释氏之威凤乎？苟能舍家，必有善称。不然乘云霓，薄天汉，吾不可得而知也。”父允其请，遂为灵隐山白云峰海和尚弟子。妙高之上，唯日月是丽；娑竭之宫，固云雷斯蓄。至德二年，诏白衣通佛经七百纸者，命为比丘。标首中其选，即日得度，蒙配天竺寺焉。永泰初受具品于灵光寺絳律师。登以护戒严谨，为时所推。毗奈多罗之言，罔不该贯。凡度人戒计六坛，为众纠绳经一十二载。置田亩岁收万斛，置无尽财，与众共之。贞元中以寺务克丰，我宜宴息，乃择高爽，得西岭之下，葺茅为堂，不于人事，用养浩气焉。标经行之外，尤练诗章，辞体古健，比之潘刘。当时吴兴有昼，会稽有灵澈，相与酬唱，递作笙簧。故人谚云：“较之昼，能清秀；越之澈，洞冰雪；

杭之标，摩云霄。”每飞章寓韵，竹夕花时，彼三上人当四面之敌，所以辞林乐府常采其声诗。由是右庶子姑臧李公益书云：“重名之下果有斯文。西还京师，有以夸耀。”又景陵子陆羽云：“夫日月云霞为天标，山川草木为地标，推能归美为德标，居闲趣寂为道标。”名实两全，品藻斯当。尔后声价轶于公卿间，故与之深者有相国李公吉甫、大司空严公綬、右仆射韩公皋、礼部侍郎吕公渭、滑毫节制卢公群、襄阳节制孟公简、同州刺史李公敷、凤翔尹孙公、浙东廉使贾公全、中书舍人白公居易、隋州刺史刘公长卿、户部侍郎丘公丹、外郎裴枢、秘阁严维、小谏朱放、越廉问薛戎、夕拜卢元辅、常州释元浩、润州释南容、金华释乾辅、吴门释光严、上都释智崇等，并心交尘外，分契林中。万境在空，驱之为射御；五峰满眼，立之为疆常文雄而再鼓不衰，神王而一战自胜者也。以长庆三年示有微疾，六月七日归灭于所居兰若。至冬十月三日，葬于旧山，春秋八十有四，法腊五十八。弟子如玢、如、行俭、省言、常俭、智猷、日超等，皆得师之法，仿仰不遑。空围绕于繖檀，恨满盈于石室，至今杭民谓之西岭和尚矣。开成五年中郑素卿录德行刊碑颂，立于天竺山之东墟存焉。

○唐衡岳寺昙清传

释昙清，未详何许人也。幼持边幅，罔或迷方，以谨昏呶，究穷佛旨。乃负笈来吴北院道恒宗师法会，与省躬犹膝薛之前后也。旋留南岳化徒，适会元和中阆州龙兴寺结界，时义嵩讲素新《疏》，杰出辈流，因云：“《僧癰律》云：齐七树相去，尔所作羯磨者，名善作羯磨。准此四面，皆取六十三步等，如是自然界约，令作法界上僧。”须尽集时，清遂广征难，如是往返，经州涉省，下两街新旧章南山三宗共定夺，嵩公亏理。时故相令狐楚犹为礼部外郎，判转牒，据两街传律断昙清义为正，天下声唱。勇执纪纲，清能干城矣。后著记号《显宗》焉。

系曰：清公南山宗崛起别峰，人咸景仰，与嵩、悟二公遇于必争之地，清果得隽。矧夫闾苑也，僻用律文，三隅不反。既成图状，学者流传，致其嵩公如填海底。至大中中玄畅公荐加褒贬，贬嵩又转沈尾闾中矣。

○唐京师西明寺圆照传（利言）

释圆照，姓张氏，京兆蓝田人也。年方十岁，笃愿依西明寺景云律师。云亦一方匠手，四部归心。照当应法，乃受近圆，谨愿执持，如怀宝器。寻究经论，访问师承，《维摩》、《法华》、《因明》、《唯识》、《涅槃》、《中观》、《华严》新经，或深入堂奥，或略从染指。仍旁求于儒墨，兼擅美于《风骚》。《律藏》珠珍，专探日用。后则霜坛秉法，雁序度人。洎乎开元年中，敕选名德僧参其译务，照始预焉。至代宗大历十三年，承诏两街临坛大德一十四人齐至安国寺，定夺新旧两《疏》是非。盖以二宗俱盛，两壮必争，被擒翻利于渔人，互击定伤于师足。既频言竞，多达帝聪，有敕令将二本《律疏》定行一家者。时照等序奏云：“按《四分

律》部主，梵云昙无德，秦言法藏。自姚秦弘始五年壬寅岁罽宾三藏佛陀耶舍，秦言觉明，讽出梵文，沙门竺佛念听而笔受，成四十五卷。至十一年岁次戊申，支法领又从西国将梵本来，于长安中寺重雠校，殆十四年辛亥译毕，沙门慧辩等笔受，成六十二卷。后有魏朝道覆律师于法聪讲下纂成《疏》六卷，北齐慧光律师造《疏》二本，次道云律师修《疏》九卷，次道晖撰《疏》七卷，隋朝法愿教《疏》十卷。自唐平一天下也，四方昌阜，三宝增明，有智首律师述《疏》二十一卷，次慧满律师造《疏》二十卷，事各一时流通绝矣。当武德元年戊寅岁，有相州日光寺法砺律师制《疏》，至九年丙戌岁成十卷，宗依《成实论》，今称《旧疏》是也。洎高宗天皇大帝咸亨元年岁在庚午，有西太原寺怀素律师撰《开四分律宗记》十卷，宗依《根本一切有部》、《大毗婆沙》、《俱舍》等论，称《新章疏》是也。至我皇帝受佛付嘱，钦尚释门，信重大乘，遵承密教。见两《疏》传授，各擅颛门，学者如林，执见殊异，数兴诤论。圣慈愍念，务息其源，使水乳无乖，一味和合。时遣内给事李宪诚宣敕，勾当京城诸寺观功德使镇军大将军刘崇训宣敕云：‘《四分律旧疏》、《新疏》宜令临坛大德如净等于安国寺律院金定一本流行。’两街临坛大德一十四人俱集安国寺，遣中官赵凤谕敕尚食局索一千二百六十人斋食并果实解斋粥一事，已上应副。即于安国寺供僧慧彻、如净等十四人，并一供送充九十日斋食，用茶二十五串，藤纸笔墨，充大德如净等金定律疏用。兼问诸大德各得好在否？又敕安国寺三纲：‘金定律疏院，一切僧俗辄不得入，违者录名奏来云。’其时天长寺昙邃、净住寺崇睿、西明寺道邃、兴？、本寺宝意、神朗、智钊、超倓、崇福寺超证、荐福寺如净、青龙寺惟僊、章信寺希照、保寿寺慧彻、圆照共奉表谢。答诏云：‘师等道著依经，功超自觉，承雪宫之旨奥，为火宅之凉。《四分律仪》，三乘肩键，须归总会，永息多门。一国三公，谁执其咎。初机眩曜，述复孔多，爰命有司俾供资费，所烦笔削，伫见裁成。所谢知悉。’其日品官杨崇一宣敕荐福、温国两寺三纲与净土院检校僧等‘严饰道场，命僧行道，用五十四人，起今月一日，转经礼佛，六时行道；至来年二月一日散。其设斋食料一事已上，令所司祇供，宜各精诚，问师等好在。’及解道场，中官李宪诚宣敕语温国寺转念道扯四分律临坛大德等：‘释门三学，以心印相传；无上菩提，以戒法为根本。道场毕日，即宜赴大安国寺楷定《律疏》，十道流行。’至二月八日，敕检校道场大德昙邃、飞锡等，道场定取十日散，设斋外，各赐绢帛。其十四人律师，并令赴安国寺修《疏》，程才品用，各得其宜。众推如净、慧彻同笔削润色，圆照笔受正字，宝意纂文金定，超倓笔受。其崇睿已下九人证义，共议篇题云：‘敕金定《四分律疏》卷第一，京城临坛大德某等奉诏定’，以此为题也。”照为首唱，诸公和之。其间厥义非长，若农夫之去草；其义合理，犹海客之采珠。可谓名解毗尼，不看他面。俄属德宗即位，改元建中，其年五月《疏》草毕。六月望，敕圆照依国子学大历新定字样抄写进本。至十二月十二日送祠部进《新金定疏》十卷。仍乞新旧两《疏》许以并行，从学者所好。敕宜依照，务其搜集，专彼研寻。著《大唐安国寺利涉法师传》十卷、《集景云先天开元天宝诰制》三卷、《肃宗代宗制旨碑表集》共二卷、《不空三藏碑表集》七卷、《隋传法高僧信行禅师碑表集》三卷、《两寺上座乘如集》三卷、《金定律疏一行制表集》三卷、《般若三藏续古今翻译图纪》二卷、《大

乘理趣六波罗蜜多经音义》二卷、《三教法王存没年代本记》三卷（上卷明佛、中道、下儒也）《翻经大德翰林待诏光宅寺利言集》二卷、《再修释迦佛法王本记》一卷、《佛现八相身利益人天成正觉记》一卷、《判方等道场欲受近圆沙弥忏悔灭罪辨瑞相记》一卷、《五部律翻译年代传授人记》一卷、《庄严寺佛牙宝塔记》三卷、《无忧王寺佛骨塔记》三卷、《传法三学大德碑记集》十五卷、《建中兴元贞元制旨释门表奏记》二卷、《御题章信寺诗太子百寮奉和集》三卷、《贞元续开元释教录》三卷。照自序云：“伏以开元十八年岁在庚午，沙门智升修撰《释教录》，洎乎甲戌，经六十五年，中间三藏翻经，藏内并无收管，恐年代浸远，人疑伪经。又先圣大历七年许编入，制文犹在。”时帝敕宜依。至今江表多集此集中经而施用焉。照于律道，颇有功多。肃代二朝，尤为杰立，累朝应奉，赐紫、充临坛两街十望大德、内供奉检校、鸿胪少卿，食封一百户。后终于别院。春秋八十二，法腊五十八云。

系曰：刊正二宗，会归一见，庶几知有定分，不横驰。求何以诸师却请双行，不其惑欤！通曰：“是此举也，则元载所请，帝乃曰俞。究其始因，乃新章也，挟力轮摧相部，独存于我，专利于人。亦犹纪昌俄遇飞卫，并其箭术，成我材官。御大辂而废其椎轮，得火生而焚其木母。窃量诸德，微愤不平，故奏双行，同不佞定。则何异乎眼头生目，匪成三点之伊，必须声后知音，方验一夔之足。因排法砺，三本生焉。旧有南山，四家出矣。又如东汉季也，灭一跋扈，生四强臣。初止政出一门，末云赂归四贵。若然者，骈？悬瘤，虽多无用。然则吾善用多矣。《大集经》云：‘如是诸见，不妨诸佛法界及大涅槃，依之修行，皆得解脱。’此通方之大解也哉。”

卷十六

◎明律篇第四之三（正传十九人附见二人）○唐朔方龙兴寺辩才传

释辩才，姓李氏，襄阳人也。母氏妊之，倏恶荤血，冥然一食，虚淡终辰。及其诞弥，异香盈室，宗党怪焉。七岁依岷山寂禅师出家，厥长者明记：每受经法，必以等身为限。字不重问，义不再思，师甚器之。年十六，遂削发，隶本州大云寺。次乃周游列郡，登陟名山，就荆州玉泉寺纳具戒。闻长安安国寺怀威律师、报恩寺义颁律师，法门具瞻，师资表率，遂伏膺请业。有疑必决，无义不通，厕于二宗，推为上首。天宝十四载，玄宗以北方人也，稟刚气，多讹风，列刹之中，余习骑射，有教无类，何可止息。诏以才为教诫，临坛度人。至德初，肃宗即位是邦也，宰臣杜鸿渐奏才住龙兴寺，诏加朔方管内教授大德。俾其训励，革猥狎之风，循毗尼之道。复命为国建法华道常及驾回，既复两京，累降玺书，末涂尤于大乘顿教留心。永泰二年，贼臣仆固怀恩外招诱蕃戎，内翦金革。才劝勉毳裘，不诛华族。大历三载，迫入充章信寺大德。时府帅虢国常公素仰才名，与护戎任公，时亲道论。十三年冬，现身有疾，至暮冬八日，垂诫门徒已，安坐绳床，默然归灭，春秋五十六。越己未岁二月迁神于寺内西北隅。先是有邑子石颙从役于城上，其夜未渠，闻管弦之声自西至，乃天乐也。异香从空散下，则生净方之兆也。才自长安而旋于塞上，既受虢公知遇，大营福业，成此精庐，皆才之敦劝矣。敕谥大师曰能觉，仍赐紫衣一副，追远之荣，声闻塞外。天复中廷尉评王儋为碑颂德云。

○唐京师章信寺道澄传

释道澄，姓梁氏，京兆人也。父涉中书舍人。生而奇表，辄恶荤肴，出家如归，无所顾恋。忽遇禅僧，摩顶与立名曰道澄，瓶锡常随，冥合律范，号律沙弥也。受具之后，习听《南山律》于诸学处，微其玷缺。然性都率略，住寺不恒，或奉恩、庄严、草堂等寺，所到便居，护生为切。建中二年，坐夏于云阳山，有虎哮吼入其门。澄徐语之，其虎摇尾舐耳而退。徙居章信寺，或问其故，澄曰：“出家者可滞一方乎？西域三时分房，俾无贪著，观门易立矣。不然者，岂通方广恕乎？”贞元二年二月八日，帝于寺受菩萨戒，京甸倾瞻，赐赆隆洽，所受而回施二田矣。五年，帝幸其寺，问澄修心法门。又敕为妃主嫔御受菩萨戒。十六年四月，敕赐号曰大圆。十九年九月十八日，终于此寺焉。

○唐钟陵龙兴寺清彻传

释清彻，未知何许人也。周游律肆，密护根门，即无常师，唯善是与。初于吴苑开元寺北院道恒律师，亲乎阃奥，深该理致，而钟华望无不推称。宪宗元和八年癸巳中，约志著记二十卷，亦鸠聚诸家要当之说，解《南山钞》，号《集义》焉。或云后堂至十年毕简，今豫章、武昌、晋陵讲士多行此义。尝览此记，繁广是宗。彻未

知其终。

系曰：彻公言行，无乃太简乎？通曰：“繁略有据，名实录也。昔太史公可弗欲广三五之世事耶？盖唐虞之前，史氏淳略，后世何述焉？今不遂富赡，职由此也。又与弗来赴告不书同也。诸有繁略不均，必祛诮让焉。”

○唐抚州景云寺上恒传

释上恒，姓饶氏，临川南城人也。童而有知，志学之年，发心舍家，从母党在空门而求摄受，教诵佛典，日计千言。壮齿，从南岳大圆大师纳戒，而听涉精苦。大历中，不去父母之邦，请于景云寺，修习无亏，亟淹年序。《南山事钞》，讲贯尤专。贞元初，徙居豫章龙兴寺，与庐阜法真、天台灵祐、荆门法裔、兴果神凑、建昌慧璿游也，谔合韵，水乳相资。法付王臣，故与姜相国公辅、颜鲁公真卿、杨冯、韦丹四君友善。提振禁防，故讲《四分律》而迁善灭罪者无央数众。坐甘露坛二十许年，十有八会，救拔群生，剡浮东震，男女得度者一万五千余人。元和十年，微云乖？，十月己亥，化于庐山东林寺，归全身于南冈石坟。住世七十七年，安居五十五夏。门人等树松柏，太原白居易为石《塔铭》云。

○唐钱塘永福寺慧琳传

释慧琳，字抱玉，俗姓柯，新安人也。？龄受业于灵隐西峰，为金和尚弟子，所传法要，断无重问。大历初，受具足戒于灵山会，习学三教，一领无遗。不乐声华，止好泉石，一入天眼二十余年，天眼即天目也。其山高三千丈，周围三百里，与天柱、庐阜等相俦匹。上有二湖，谓为左右目，登涉艰阻，数日乃到巅顶，多蛟龙，池潭三所。最上池，人不可近，气臭逆人，不可久视。或说山神作白鹿形，每五月与震泽龙会，必暴风雨焉。琳居此，率多妖异，而心不挠。元和丁亥，太守礼部员外城南杜陟。请出永福寺登坛。至己丑岁春，刺史兵部郎中裴常棣召临天竺寺坛。度人毕，归寺讲训生徒，向二十载。郡守左司郎中陆则、刑部侍郎杨凭、给事中卢元辅、中书舍人白居易、太府卿李幼公、刑部郎中崔鄯、刑部郎中路异相继九邦伯，皆以公退至院，致礼稽问佛法宗意，染指性相。此诸名公簪组上流，辞学高度，或号毗昙孔子，或名胜力菩萨，非琳何以感动哉？太和六年四月二十五日示灭，享寿八十有三，法腊六十四。以其年五月十二日葬于今永安寺西山之阳，码瑙坡之左，石塔岿然存矣。

○唐江州兴果寺神凑传

释神凑，姓成氏，京兆蓝田人也。生而奇秀，？角出尘，远慕戒律，祈南岳希操师受具，复参钟陵大寂禅师。然则志在《楞严经》，行在《四分律》，其他诸教，余力则通。大历八年，制悬经、论、律三科，策试天下出家者，中等第方度。凑应是

选，诏配九江兴果精舍。后从僧望移居东林寺，即雁门贾远之旧道场也，有甘露戒坛、白莲池在焉。既居是，嗣兴佛事，虽经论资神，终研律成务。凑羸瘠，视之颓然，州将门人医疗，而不愿进药。元和十二年九月遘疾，二十六日俨然坐终于寺。十月十九日，门人奉全身窆于寺西道北，纡雁门坟左，若僧诔葬近郭文之墓也。春秋七十四，夏腊五十一。凑以精进心脂不退轮，以勇健力挝无畏鼓，故登坛秉法垂三十年。一盂而食，一榻而居，衣缝少麻，坐荐藁秸。由兹檀施臻集于躬，即回入常住无尽财中，与众共之。每夜捧炉秉烛，行道礼佛，十二时，少有废阙，如是经四十五载。生常遇白乐天为典午于郡相善，及终，悲悼，作《塔铭》云：“本结菩提香火社，共嫌烦恼电泡身，不须惆怅随师去，先请西方作主人。”

○唐京兆圣寿寺慧灵传

释慧灵，未详何许人也。幼脱尘机，勤从诵习，及当应法，戒品方圆，锐意毗尼，探赜持犯，以行副解，心口相符。由是讲训，名望翕如也。人皆奉畏，神明如也。大中七年，宣宗幸庄严寺，礼佛牙，登大塔，宣问耆年，乃赐紫衣。其年六月，敕补灵为新寺上座矣。帝望寺西北废总持寺，乃下敕曰：“朕以政闲赏景，幸于庄严，其寺复殿重廊，连甍比栋。幽房秘宇，窈窕疏通，密竹翠松，垂阴擢秀，行而迷道，天下梵宫，高明寡匹。当建之时，以京城西昆明池势微下，乃建木浮图，高三百尺。藩邸之时，游此伽蓝，睹斯胜事。其总持寺，大业中立，规制与庄严寺正同，今容像则毁，忍草随荒，香径芜侵，尚存基址。其寺宜许重建，以副予心。”三月十一日，令三教首座辩章勾当修寺，及毕工，推灵为纲任，崇圣寺赐紫睿川充寺主，福寿寺临坛大德赐紫玄畅充都维那。灵居寺职，清众咸序，帝所钦重。寺中常贡梨花蜜，其色白，其味愈常，蜡房所取者。灵居新寺终矣。究其灵公如曾预代宗永泰中参译证义，则可年百奇岁矣。如不见不空、良贲，乃春秋夏腊无理知焉。

○唐吴郡破山寺常达传

释常达，字文举，俗姓顾，海隅人也。发迹何阳大福山，游学江淮诸胜寺。达允迪中和，克完戒法，专讲《南山律钞》。后求《涅槃》圆音，《法华》止观，复通《阴符》、《老》、《庄》百家之书，其余分时之学，尽二王之笔迹。后随方参禅，诣于宗极。俄属武宗灭法，叹曰：“我生不辰，不自我后1由是寝默山栖，委裘遁世而无焉。宣宗重建法幢，荐兴精舍，合境民人皆达之化导，故太守韦曙特加崇重。身不衣缁纁，室唯蒙薛萝，四众知归，诸方慕化，其洁白鹤鹭如也。咸通十二年，合郭僧民请绍四众教诲。或游遨糠牧，或啸傲海鉢，不出林麓，动经数载。虽贵士单车诣门，莫得而见。于七五言诗追用元和之体，著《青山履道歌》，播人唇吻。忽于自恣明辰，鸠众于长廊，合掌遂申长别，辞甚刚正。因卧疾不起，绝食七日而逝，实咸通十五年九月十六日也，春秋七十四，僧腊五十一。门人会清、傅朗奉灵柩殡于寺之东南三百步。后年即坟起塔，颖川陈言撰塔铭，邑大夫汝南周思辑为檀信，乾符四年立碑焉。

○唐越州开元寺丹甫传

释丹甫者，不知何许人也。性多警达，言必刚直，讲授惟勤，执持雅正。会稽风土，律范渊府也。甫之唱导，从之者若玄金之就磁石焉。本习业于亘文律师法集，文即省躬之游夏也，甫即躬之嗣孙。顺正命章，幹通秘蹟。越自昙一、玄俨之后，罕能追蹑，甫之声尘迈于前烈。然尔时允文匠手，相部风行，甫介于大律之间，行事之时，草从风偃焉。咸通末出门生智章等传讲，今亦法嗣存焉。或闻著《手记》，寻且未获，吁，惜哉！

○唐吴郡嘉禾灵光寺法相传

释法相，姓俞氏，吴长水人也。天宝中诞育，为婴儿卓异。七岁投师，受经法三浹旬，诵通《法华》全部。弱冠往长安安国寺，得满足戒，即大历中也。便于上京习毗尼道，诸部同异，无不该综，涉十一载，蔚成其业。传法东归，请学者如林。吴郡太守奏于开元寺置戒坛，相预临坛之眩寻充依止，兼众推为寺纲管，恒施二众归戒。行佩漉囊，器不畜长。每有鸟栖于座侧，驰？不去。会昌元年二月十日午时三刻，告弟子清？、清高：“吾当灭矣。”俨然累足右胁而逝。时众昼闻管弦清亮，乃天乐也；夕睹异光。春秋八十九，僧腊六十九。四月迁塔于来苏乡之原，白塔是也。后弟子率义州刺史曹信、大理司直吴方重修塔，发之，见相遗骨若铜色，舌相不坏，若芙蓉焉。齿全四十二。香汤沐之，重葬，盖景福二年癸丑岁五月二十二日也。高弟子公静，静弟子行蕴，蕴弟子仁表，表弟子玄杲，杲本清白之僧也，同鸿启重修灵光一寺，为兵革残毁之后也。杲公、启公后偕隐天台习禅观，相次终于山，焚之皆获舍利焉。

○唐天台山国清寺文举传

释文举，姓张氏，婺州东阳人也。年甫志学，遂投师请法。十九落发，始堕息慈。贞元三年，敕度得戒。后十五年间，以《四分律》为学，时术之，昼夜翹勤，遂登讲训。次通《法华经疏义》，得智者之膏腴焉。举身量六尺余，其形如山，其貌如玉，静若止水，动如浮云。目不回视，口无戏言，四威仪中，无非律范。丹丘二众，仰为绳准。其奔走他方听受者，与佛窟则公禅道并驱而相高也。寻敕为国清寺大德。先是智者大师答隋炀帝问，立七日金光明道场，每年九月，遐迩征镇侯伯人送供，事既无碍，黑白二众无远不届，人才填委，饮食阙焉。典座僧患之。大和中主事僧清蕴咨谋于举，置寺庄田十二顷。自此光明会不闻告乏，举之功欤！以会昌二年五月化去，门人幼清立塔于寺之西峰。春秋八十三，僧夏五十五。韩？为碑颂德也。

○唐会稽开元寺允文传

释允文，字执经，姓朱氏，今秀州嘉禾人也。权舆九岁，厥父云亡，然理命舍文奉佛。师授《维摩》、《法华》二经，敏速之性，再稔皆通，高达之士谓之重理耳。或戏问文曰：“尔出家之后，拟营何事业乎？”率然对曰：“当陟莲华台而作狮子吼。”或呵诮之曰：“耆宿前敢尔。”或曰：“志欲得大，此子将来未易测也。”至十六岁，削顶周罗，披安陀会。相次裹足西上，投嵩山临坛大德远和尚边，获无作法，时年二十三矣。是夏即就中京攻相部律宗并《中观论》，补衣分卫，寒燠四周。既扣义门，必入师室，玄枢律范，尤见精微。大和五年，为思定省，忽叹归欤。既返故乡，淹时寝疾，未遑讲唱。后闻钱塘天竺寺讲《大涅槃经》，蔚为胜集，文往学焉。星岁未周，锋芒且露。开成元年，因游台峤，止息越之嘉祥寺，众藉清芬，甄命敷其经律。文戢约听徒，颇为严毅。常训之曰：“夫绊刍行非家法，具足别解脱律仪、众同分，是其自性，于其形色精进故，怖畏故，防守故。如是方疾得道果矣。不然，则弟子既堕，师道徒施。”闻其警策，有涕泗交横，悛心革行，思过半矣。会昌三年，移居静林寺，专以《涅槃》宣导。属乎武宗澄汰，例被搜扬。昼披缝掖之衣，夜著缦条之服，罔亏僧行，唯追俗讥。大中伊始，复振空门，重整法仪，乃隶名开元寺三十人数。七年，寺之耆旧命讲律乘。乾符三年丙申秋，罢讲，览藏经。以中和二年壬寅六月二十九日微疾作而长逝，享龄七十有八，法腊五十五。其年七月十二日葬于石奇山之阳。遗言不许封树也。初文讲演升座，学徒畏惮，喑鸣之际，人皆披靡，乃戒威德之若是。于嘉祥、静林、今大善三寺，讲相《疏》二十七座，大经二十五座。其为人也貌古而修长，锐顶而黑干黑，执持密緻，振鹭在庭，未足方其洁也。然亦猎涉儒墨，慕白傅自作志，预著《方坟铭》，藏于篋笥。门人怀益，因寻阅文籍，见而悲咽，遂从先师之志，建小塔焉。后门人怀肃、思寂命名德虚受增加后序。赞宁登会稽，曾礼文真相，见法孙可翔，苦节进修，叶杜多之，行故熟其事迹也。

○梁京兆西明寺慧则传（元表）

释慧则，姓糜氏，吴郡昆山人也。九岁，博游才义，总玩儒经。善种发萌，条然厌俗，以大中七年就京西明寺出家。勤知讽诵，皆如曾习。九年，于本寺承恩得度。十四年，栖法宝大师法席覆讲，当年敕补备员大德。咸通三年，就崇圣寺讲《俱舍论》并《丧服仪》，出《三界图》一卷。七年，于祖院代畅师讲。十五年，敕署临坛正员。广明元年，巢寇犯阙，关中？扰，出华州下络避乱。中和二年，至淮南，高公骈召于法云寺。讲罢还吴，刺史杨公苦留，却游天台山国清寺挂锡。乾宁元年至明州育王寺，撰《塔记》一卷，《出集要记》十二卷。武肃王钱氏命于越州临坛。以开平二年八月八日示疾坐亡。受生七十四，法腊五十四。窆于？山之冈。八戒弟子刺史黄晟营塔。则生常不好诤直，以？为谦推人为上。除讲贯外，轮诵经咒，自《法华》已降可三四十本，以资口业。览大藏教两遍，讲钞七十遍，《俱舍》、《丧仪》、《论语》各数遍。清苦执持，近古罕有。入室弟子希觉最露锋颖焉。又元表者，贞谅之士也，言多峭直，好品藻人事，而高义解，从习毗尼，兼勤外学，书史方术，无不该览。早预京师西明寺法宝大师讲肆，迨广明中，神都版荡，遂出

江表，居越州大善寺，讲《南山律钞》。诸郡学人，无不趋集。表义理纵横，善其谈说，每挥麈柄，听者忘疲，号鉴水阁梨。著《义记》五卷，亦号《鉴水》。出门人清福，冠其首焉。

○梁苏州破山兴福寺彦翱传（寿钗梨）

释彦翱，姓龚氏，吴郡常熟人也。揭厉戒津，镕铄尘务，勤求师范，唯善是从。末扣击继宗记主，得其户牖，乃于本生地讲导，同好鸠聚，律风孔扇，号为毗尼窟宅焉。先是海隅，巫咸氏之遗壤，招真治之旧墟，古寺周围不全，墉垣而已。尝一夜有虎中猎人箭，伏于寺阁，哮吼不止。翱悯之，忙系鞋，秉炬下阁，言欲拔之。弟子辈扶遏且止者三四，伺其更阑各睡，乃自持炬就拔其箭。虎耽耳舐矢镞血，顾翱而瞑目焉。质明，猎师朱德就寺寻虎，翱告示其箭，朱德悛心罢猎焉。武肃王钱氏知重，每设冥斋，召行持明法。时覆肩衣自肱而堕，还自搭上，或见鬼物随侍焉。所谓道德盛则鬼神助也。以贞明六年六月，终于山房，年九十九岁云。次寿阁梨者，淮浦左右，贞谅不群，防护正念，时少双偶。传《南山律钞》极成，不看他面。唐季杨氏奄有广陵，频召供施。四远崇重，食惟正命。不畜盈长，户不施关。及临坛度弟子，正秉羯磨，未周三法，忽尔坐亡于覆釜之畔，闻见惊叹欤！

○后唐天台山福田寺从礼传

释从礼，襄阳人也。善事父母，颇扬乡里之誉。迨丧偏亲，乃果决舍家，于时年已壮矣。及登具足，请师传授戒文。念性殊乖，卒难舍本，往往睡魔相挠。礼忿其昏浊，作铁锥刺额兼掌，由是流血，直逾半稔，方遂诵通。自尔精持律范，造次颠沛必于是。以梁乾化中游天台，乃挂锡于平田精舍。后推为寺之上座，持重安详，喜愠不形于色，唯行慈忍。恒示众曰：“波罗提木叉是我大师，须知出家非戒，则若猿驪之脱锁焉。”每所行持，切于布萨，诫众令护惜浮囊。时夏亢阳，主事僧来告“将营罗汉斋，奈何园蔬枯悴！请阁梨为祈祷。”礼曰：“但焚香于真君堂。”真君者，周灵王太子，久闻仙去，以仙官受任为桐柏真人右弼，王领五岳司侍帝晨。王子乔来治此山，是故天台山僧坊道观，皆塑右弼形像，荐以香果而已。自此俗间号为山王土地，非也。时主事向仙祠而咒曰：“上座要雨，以滋枯悴。”至夜，云起雨霏，三日而止。又僧厨阙用水槽栈，而山上有赤树中为材，来白礼。礼曰：“某向真君道去，但庀徒具器以伺之。”无何，大风卒起，曳仆其树，取用足焉。其感动鬼神，率多此类。两浙武肃王钱氏闻之，召入州府，建金光明道场，檀施优渥。回施众僧，身唯一布纳。通夜不寐，一食常坐，且无盈长。同光三年乙酉岁冬十一月入灭，春秋七十九，僧腊五十二。火葬，收舍利，立塔存焉。

○后唐杭州真身宝塔寺景霄传

释景霄，俗姓徐氏，丹丘人也。初之听涉在表公门，后慕守言阁梨义集，敷演于丹

丘。执性严毅，寡与人交。狷急自持，多事凌置，形器恶弱。后纳请往金华东白山，奖训初学。时有江西徽猷律匠，出义记曰《龟鉴录》，多学彭亨，领徒到霄寺，正值讲次，当《持犯篇》再三叹赏。自此声溢价高。每晨滴茶，一旦化为乳焉。著记二十卷，号《简正》，言以思择力故，去邪说而简取正义也。武肃王钱氏召于临安故乡，宰任竹林寺。未几，命赴北塔寺临坛，天成二年也。次命住南真身宝塔寺，终焉。迁葬于大慈山坞，以本受师号，塔曰清凉是欵。

○后唐东京相国寺贞峻传

释贞峻，姓张氏，郑州新郑人也。唐张果先生之裔孙。今荥阳有张果里，其坟楸木贾存焉。峻风度宽裕，髻龄不弄。年十四，忽超然离俗，人莫我知。虽二亲褻衣，昆弟截路，终弗能沮之。乃投相国寺归正律师出家，神机骏发，乍观可惊。虽背碑覆棋，彼不足多也。未几，讽彻《净名》、《仁王》诸经，计数万言。时同侪戏之曰：“汝是有脚经笥也。”峻辞让斯题，恭逊而已。及削染为僧形，即听《俱舍论》，随讲诵颂八品，计六百行。至十八升论座。年满于嵩山会善寺戒坛院纳法，因栖封禅寺，今号开宝律院，学新章律疏。二十三，策名讲授，长宿称奇。当大顺二年，灾相国寺，重楼三门，七宝佛殿，排云宝阁、文殊殿里廊，计四百余间，都为煨烬。时寺众惶惶，莫知投迹。或曰如请得峻归寺，寺可成矣。乃相率往今开宝，坚请峻归充本寺上座。前后数年，重新廊庑，殿宇增华。又请为新章宗主，复开律讲，僧尼弟子日有五十余人，执疏听采。峻之律行，冰雪相高。暑无裸意，寒止举衣，食惟知量，清约太过。乾化元年，临坛秉法。及梁朝革命，所度僧尼计三千余人。以同光二年夏四月十二日微疾而终。春秋七十八，法腊五十八。葬于寺庄，纤慧云禅师塔焉。

○汉钱塘千佛寺希觉传

释希觉，字顺之，姓商氏，世居晋陵。觉生于溧阳，家系儒墨，属唐季丧乱，累被剽略，自尔贫窶。尝傭书于给事中罗隐家，偶问名居，隐曰：“毗陵商家儿，何至于此！”叹息再三，多与雇直，劝归乡修学。至年二十五，叹曰：“时不我与。或服冕乘轩，皆一期尔！”忽求出家于温州开元寺，文德元年也。龙纪中受戒，续揣摩《律部》，禀教于西明寺慧则律师，时在天台山也。则乃法宝大师之高足。广明中，关中丧乱，避地江表，觉始窥其墙，终见室家瑰富。以则出《集要记》解《南山钞》，不称所怀。何耶？古德妄相穿凿，各竞师门，流宕忘返，觉遂著记广之，曰《增晖录》，盖取曹植云“萤烛末光，增晖日月”。谦言增晖《集要》之日月也，二十卷成部。浙之东西，盛行斯录。暨乎则公长往，乃讲酬于永嘉。武肃王钱氏季弟铎牧是郡，深礼重焉。寻为愚僧所诬诉，释而不问，徙于杭大钱寺。文穆王造千佛伽蓝，召为寺主，借紫，私署曰文光大师焉。四方学者骋骛而臻。觉外学偏多，长于《易》道，著《会释记》二十卷，解《易》，至上下《系》及末文甚备。常为人敷演此经，付授于都僧正赞宁。及乎老病，乞解见任僧职。既遂所怀，唯啸傲山房。

，以吟咏为乐。年八十一，然犹抄书籍异本，曾无告倦。未终之前，舍衣物，作现前僧得施，复普饭一城僧。自此困惫，每睡见有一人纯衣紫服，肌肤软弱如绵纆焉，意似相伴。才欲召弟子将至，此人舒徐下床，后还如故。亲向赞宁说此，某知是天人耳。嘱托言毕而绝，享年八十五。生常所著拟江东《谗书》五卷，杂诗赋十五卷，注林鼎《金陵怀古》百韵诗、杂体四十章。觉之执持，未尝弛放，勤于讲训，切于进修。学则弥老而不休，官则奉身而知退，可谓高尚其事，名节俱全，长者之风，蔼然如在。所居号释氏西斋，慕吴兢之蕴积编简焉。

○周东京相国寺澄楚传

释澄楚，姓宗氏，不知何许人也。爰祖暨考，偕贲丘园，高蹈不仕。母赵氏妊楚也，忽畏膻臊之臭。及乎诞生之夕，光烂充室，邻落咸惊。洎当七岁，亲党携之入寺，见佛像，辄嗟叹而作礼。归家问父曰：“唯佛独尔，余者如何？”父曰：“蠢动皆佛，何况人矣。”楚曰：“儿愿学佛，聊报二亲劬劳。”其父默而许旃。至十岁，于相国寺礼智明为师。未几，有童子聚戏而招诱之，楚曰：“汝何愚呆好嬉戏耶？且雪山善财亦童子，还如是否？”旁有闻者奇之曰：“子异日成法门伟器必矣。”受具已来，习新章《律部》，独能趣入毗奈耶窟冗。然其击难酬答，露牙伸爪，时号律虎焉。王公大人请益者，日且众矣。晋高祖闻而钦仰，诏入内道场，赐紫袈裟，寻署大师，号真法焉。自此皇宫妃主有慕法者求出家，命楚落发度戒。表里冰霜，更无他物，命为《新章律》宗主焉。以显德六年十月十一日无疾而终，首北面西，示佛涅槃相也。俗龄七十一，僧夏五十。始末临坛度僧尼八千余人。门人慧照等依西域法焚之，得碎身，分构砖塔藏之。左街首座悟皎作《舍利塔记》焉。

系曰：楚师明律，时号宗主者何？通曰：“律有三宗，砺、素、宣是欤。宗各有主，故云也。”观夫是名也，岂无稽古乎？通曰：“宗主二字，出《阿含经》也。”论曰：原夫人有人法，禁戒威仪是也。天有天法，光洁静虑是也。我佛利见，据于大千，化境斯宽，法门必众。举其会要，不过戒也、定也、慧也。此三为路，出其生死之乡；专一为门，通其涅槃之域。若乃资乎急用，在乎毗尼。毗尼防闲三业，三业皆净，六尘自祛。圣贤践修，何莫由斯道也。故论云：“生死流转者三縛，縛心心难解脱。”当知此唯善说法律，能令解脱，非由恶说。因是而窥禁律乃度世之检括也。且夫菩萨戒净，则彰离垢之名；辟支戒完，则引无师之智。声闻戒足，时俱解脱而可期；内众戒坚，招感人天之不坠。由是观之，戒法之时大矣哉！自所推能，从言索理，则毗尼也，木叉也。因则声教律焉，果则别解脱焉。直以时论，三世诸佛咸同制也。横从界说，十方净刹悉共行之。所以优波离过去七佛，咸以戒律嘱累之。论云：“戒如捉贼，善擒制也。定如？贼，用机械也。慧如杀贼，清道路也。以此成功立效，克取究尽三菩提者，决达清静之域也。”戒律之功，功无与伦。矧以此法在师而不在资，唯闻佛制；行内而不通外，无许俗传。故曰曲授秘方，赐诸内众。事有悬合，物宜象求，在乎家人，严君设训。家人载々，同佛制教焉。妇子嘻嘻，同佛听门矣。一听一制，见其猛以济宽；一阴一阳，见其开物成务。夫

如是，知戒律是佛之家法明矣。大则三聚感三身于果中，小则形俱持尽形于因地。受既如是，随则若何？有威仪焉，有细行焉。为有顺违，乃生持犯，由是繁广，因事制宜。及佛泥丸，集成《律藏》。初惟水乳相合，一家之业无殊；后则参辰各墟，五部之分不类。梦之占征矣，宗轮之论作焉，剡浮树高，分影犹归于月窟；阿耨池溢，下流须到于孟津。迨夫大教东传，梵书西至。甘露本天人之食，汉土争尝；金乌还海上之飞，东方旧识。除经已译，问律何传？起后汉灵帝建宁三年，初翻义决律。次有比丘诸禁律至，即曹魏法时三藏游于许洛，睹魏土僧无律范，于嘉平中译《羯磨僧祇戒》本，此乃此方戒律之始也。自尔《萨婆多律》，先化关中。《五分僧祇》，风行雨施。迦叶遗部，戒本独来，婆粗富罗，闻名而已。况乎僧祇部者，法显赍归。诸师判注，云是根本大众所传，非是百载五宗也。今著传家疑其未可。何邪？所览《僧祇》现本，止三十卷文，因有数疑：一本小而末大（谓诸部文多，《僧祇》卷略）；二中不含五部意；三不应大集悬记也。或曰：“此略本传此方，犹《法华》、《华严》等经，巨万亿颂中略出一分也。《僧祇》亦尔。”又说“《昙无德律》译有重单，准《僧传》止觉明口诵也。若据《律序》，有支法领重译之文焉。”如此古今相竞，且无指归以义交征，其辞必息。寻律文本，即知异同，如众学戒初题云尸叉闍赖尼，如破伊兰叶，言此是觉明本也。如言式叉迦罗尼，如破伊罗叶，即是支法领本也。又一本三十卷，一本六十卷，谓纸墨分开不定，非也分。三十为六十，不其太相悬谬矣。若斯二译，皂白已分。复次元魏已前，诸受戒者用四分羯磨纳戒。及乎行事，即依诸律为随。何异乎执《左氏经》本专循《公羊》之传文也？至魏孝文世，有法聪律匠于北台山始手披口释，道覆律师随听抄记，遂成《义疏》。权与既尔，肯构繁乎。天轮而只候中星，大鼎而唯提附耳。邺中法砺，唐世怀素，新旧两名，各擅其美。砺乃《成实有部》，受体双陈；素惟寻祖《萨婆》，开宗独步。其有终南上士，澄照大师，筭蚤三生，逡巡千里，交接天人之际，优游果证之中，知无不为，绳愆纠谬，以护持教法为己任者，实一代之伟人焉。是以天下言行事者，以南山为司南矣。丁乎大历，新旧疏家互相短长，敕集三宗律师，重加定夺。时如净为宗主，判定二家，当建中中，始言楷正，号《金定疏》是也。至今东京三宗并盛。至于乘法出没不伦，殊涂同归，师资尚异。至若成公演化，灵著敷扬，不离三辅之间，俱覩百工之巧。文纲、道岸自北徂南，发正辅篇，从微至著，道流吴会，实赖伊人。净公作评家之师，源尚致感通之瑞，或抗表论没官之物，或成图证结界之非，或杰立一方，或才雄七众，述锋芒之义记，出豕亥之疑文。或帖纷籀，或整齐龃齬，若匪乘时之哲，便应逸气之英。不令像运之中微，降年惟永；终使寿星之下照，法命惟长。道假人扬，其在兹矣。近以提河水味，转不如前；座像尘埋，仍观更没。大小乘之交恶，上中下之相凌，活寄四邪，行违七聚。威仪既缺，生善全亏，谓律为不急之文，放僧落自由之地。马令脱轡，象阙施钩，不习律仪，难调象马。遂令教法日见凌夷，短则行果微亡，折则年龄减少，合夫《洪范》中凶短折也。又曰慈父多败子，脱或翻恶归善，变犯成持，或众主之劝修，或名师之训导，假王臣之外护，必法教之中兴。如是则同五福中之一寿五考终命欤！又曰严家无格虏，故云毗尼是正法之寿命焉。此科所班，乃是炼金液转还丹之手，劝人服之，使其近添其寿，远则升仙。故我世尊凡制一戒，获其十利功德，

意在令正法久住耳。

卷十七

◎护法篇第五（正传十八人附见一人）○唐京师大庄严寺威秀传

释威秀，不知何许人也。博达多能，讲宣是务，志存负荷，勇而有仪。其于笔语脍炙，特推明敏。无何，天皇即位，龙朔二年四月十五日敕勒僧道咸施俗拜。时则僧徒惶惑，罔知所裁。秀嗟教道之中微，叹君王之慢法，乃上表称沙门不合拜。征引诸史，爰历累朝抑挫，朝才发令，夕又改图，皆非远略也。方引经律论以为量果，词皆婉雅，理必渊明。如云故出家不存家人之礼，出俗无沾处俗之仪，其道显然，百代不易之令典也。表上，敕百官集中台都议其事。时朝宰五百三十九人请不拜，三百五十四人请拜。时大帝至六月敕不拜君而拜父母，寻亦废止。秀之为法，实谓忘身乎！抗表之际，当年四月二十一日也。时京邑僧等二百余人往蓬莱宫，申表上请。时相谓秀等曰：“敕令详议，拜否未定，可待后集。”秀等乃退。于是大集西明寺，相与谋议，共投启状，闻诸达官贵戚，若敕头然。时宣律师上雍州牧沛王启，别上荣国太夫人启等。秀之批鳞，所谓以身许法也。

○唐京兆大兴善寺复礼传

释复礼，京兆人也，俗姓皇甫氏。少出家，住兴善寺。性虚静，寡嗜欲。游心内典，兼博玄儒，尤工赋咏，善于著述，俗流名士皆慕仰之。三藏地婆诃罗、实叉难陀等译《大庄严》、《华严》等经，皆敕召礼令同翻译，缀文裁义，实属斯人。天皇永隆二年辛巳，因太子文学权无二述《释典稽疑》十条，用以问礼，请令释滞，遂为答之，撰成三卷，名曰《十门辩惑论》。宾主酬答，剖析稽疑，文出于智府，义在于心外，如斯答对，坚阵难摧。赤幡曳而魔党降，天鼓鸣而修罗退，权文学所举《稽疑》数义也，于余则难，在礼殊易。何邪？盖不知教有弛张，文存权实，谓为矛盾。故行吊伐之师，如小偏裨须请军门之命。无二既披来论，全释旧疑，乃复书云：“续晨晷之足，凿混沌之窍，百年之疑，一朝顿荆永遵觉路，长悟迷源，？烦恼之薪，餐涅槃之饭，请事斯语，以卒余年云。”此虽一时之解纷，实为万代之龟鉴也。礼之义学，时少比俦，兼有文集行于世。加复深综玄机，特明心契，作《真妄颂》问天下学士，击和者数人。当草堂宗密师铨择臻极，唯清凉澄观得其旨趣，若卢郎之米粒矣。余未体礼师之见。故唐之译务，礼为宗匠，故惠立谓之“译主”。“译主”之名，起于礼矣。妙通五竺，融贯三乘，古今所推，世罕伦匹。其论二轴编入《藏》，酬外难之攻，但用此之戈盾也矣。

○唐京兆魏国寺惠立传

释惠立，本名子立，天皇改为惠立，俗姓赵氏，天水人也。远祖因官徙寓新平，故为豳人焉。爰祖及父，俱驰高誉。立即隋起居舍人司隶从事毅之第三子也。生而岐嶷，有弃俗之志。年十五，贞观三年出家，住豳州昭仁寺，此寺即破薛举之战场也。

。立识敏才俊，神清道迈，习林远之高风，有肇融之识量。声誉闻彻，敕召充大慈恩寺翻经大德，次补西明寺都维那，后授太原寺主，皆降纶旨，令维寺任。天皇之代，以其博考儒释，雅著篇章，妙辩云飞，益思泉涌，加以直词正色，不惮威严，赴火蹈汤，无所屈挠。频召入内，与黄冠对论。皆愜帝旨，事在别传。立以玄奘法师求经印度，若无纪述，季代罕闻，遂撰《慈恩三藏行传》，未成而卒。后广福寺沙门彦惊续而成之，总十卷。故初题云沙门惠立本，释彦惊笺是也。立削藁云毕，虑遗诸美，遂藏诸地府，世莫得闻。尔后临终，令门侍掘以启之，将出，乃即终焉。初立见尚医奉御吕才妄造《释因明图注》三卷，非斥诸师正义。立致书责之，其警句有云：“奉御于俗事少闲，遂谓真宗可了，何异乎鼯鼠见釜灶之堪陟，乃言昆丘之非难；蛛螫睹棘林之易罗，亦谓扶桑之可网。不量涯分，何殊此焉！才由兹而寝。太常博士柳宣闻其事息，乃归信，以书檄翻经僧众云“其外御其侮，释门之季路也”。

○唐洛京佛授记寺玄嶷传

释玄嶷，俗姓杜氏。幼入玄门，才通经法，黄冠之侣推其明哲，出类逸群，号杜？炼师。方登极筴，为洛都大恒观主。游心《七略》，得理《三玄》，道术之流，推为纲领。天后心崇大法，杨阐释宗，义悟其食蓼非甘，却行远舍，愿友初服，向佛而归。遂恳求剃落，诏许度之，住佛授记寺，寻为寺都焉。则知在草为英，在禽为雄，信有之矣。续参翻译，悉彼宗之乖谬，知正教之可凭。或问之曰：“子何信佛邪？”嶷曰：“生死疾，宜早图之，无令临衢整辔，中流伫楫乎？有若环车望斗，劾鬼求仙，以此用心，非究尽也。”乃造《甄正论》一部，指斥其失，令归正真，施設主客问答，极为省要焉。嶷不知厥终。

系曰：知彼敌情，资乎乡导；或入必争之境，免书弗地之讥。又犹秉烛霄征，便匪如人入？。历闻玄嶷曾寄黄冠，熟其本教。及归释族，斥彼妄源。不须四月而试之，已纳一城之款矣。由是观之，脱有棘逆之者，则曰吾当说汝真。斯是之谓欤！

○唐江陵府法明传

释法明，本荆楚人也。博通经论，外善群书，辩给如流，戒范坚正。中宗朝入长安，游访诸高达，适遇诏僧道定夺《化胡成佛经》真伪。时盛集内殿，百官侍听。诸高位龙象，抗御黄冠，翻覆未安，危臬危瓦难定。明初不预其选，出场擅美，问道流曰：“老子化胡成佛，老子为作汉语化？为作胡语化？若汉语化胡，胡即不解。若胡语化，此经到此土，便须翻译。未审此经是何年月，何朝代，何人诵胡语，何人笔受？”时道流绝救无对。明由此公卿叹赏，则神龙元年也。其年九月十四日，下敕曰：“仰所在官吏废此伪经，刻石于洛京白马寺，以示将来。”敕曰：“朕叨居宝位，惟新阐政，再安宗社，展恭？之大礼，降雷雨之鸿恩，爰及缁黄，兼申惩劝。如闻天下诸道观皆画《化胡成佛变相》，僧寺亦画玄元之形，两教尊容，二俱

不可。制到后限十日内并须除毁。若故留，仰当处官吏科违敕罪。其《化胡经》累朝明敕禁断，近知在外仍颇流行，自今后其诸部《化胡经》及诸记录有《化胡》事，并宜除削。若有蓄者，准敕科罪。”其月洛京大恒道观主桓道彦等上表固执，敕批曰：“朕以匪躬忝承丕业，虽抚宁多失，而平恕实专。矧夫三圣重光，玄元统序，岂忘老教，偏意释宗。朕志款还淳，情存去伪。理乖事舛者，虽在亲而亦除；义符名当者，虽有怨而必录。顷以万机余暇，略寻三教之文。至于《道德》二篇，妙绝希夷之境。天竺有空二谛，理秘真如之谈。莫不敷畅玄门，阐扬至赜，何假《化胡》之伪，方盛老君之宗。义有差违，文无典故，成佛则四人不同，论弟子则多闻舛互。尹喜既称成佛，已甚凭虚。复云化作阿难，更成乌合。鬼谷、北郭之辈，未践中天；舍利、文殊之伦，妄彰东土。胡汉交杂，年代亦乖。履水而说涅槃，曾无典据；蹈火而谈妙法，有类俳优。诬诈自彰，宁烦缕说。经非老君所制，毁之则匪曰孝亏；文是鄙人所谈，除之则更彰先德。来言虽切，理实未安。宜悉朕怀，即断来表。”明之口给，当代无伦。援护法门，由之御侮，恶言不入耳，其是之谓乎！

系曰：《化胡经》也，二教不平，其争多矣。无若法明一言蔽之。设或凝神杼思，久不可酬。况复万乘之前，孰能卒对？昔杨素见嵩阳观画《化胡》，素曰：“何不化胡成道，而成佛乎？”道士无言。观夫明之垂问，义含两意，正为化胡成佛，旁？诸天仙言语与人不同，天言传授诸经，是谁辩译！其犹一箭射双凫，又若一发两豕从之谓欤！

○唐润州石埭山神悟传

释神悟，字通性，陇西李氏之子。其先属西晋版荡，迁家于吴之长水也。世袭儒素，幼为诸生。及冠，忽婴恶疾，有不可救之状。咎心补行，力将何施？开元中诣溪光律师，请耆域之方，执门人之礼。师示以遣业之教，一曰理忏，二曰事忏。此二者，圣之所授，行必有征。遂于菩提像前，秉不屈之心，？难捐之指。于时有异光如月？胧绀宫，极苦可以感神明，至精可以动天地。盖人之难事欤！天宝四年，受具足戒，身始披缁。八年，举尤异行，名隶于寺。逮其晚节，益见苦心。每置法华道场九旬，入长行礼念观佛三昧，于斯现前因。语门人曰：“夫阴薄日以何伤，风运空而不动，苟达于妄，谁非性也。”方结宇于劳劳山东。中据石埭，达分仙径，诸猛兽驯于禅榻，祥云低于法堂。中夜有山神现形，谓悟曰：“弟子即隋故新成侯曹世安，生为列侯，死典南岭。今师至止，愿以此地永奉经行。”言讫，隐而不见。故吏部员外李华、殿中侍御史崔益同谒悟，尝问孔老圣教优劣，请陈题品。对曰：“路伽邪典籍皆心外法，味之者劳而无证，其犹泽朽思华，乾池映月，比其释教，天何远乎？”如是往复，应答如流。华、益拱手，无以抗敌。其捍护释门，疆场畴敢侵轶乎？华乃一代之文宗，与萧颖士齐名，笔语过之。若此之儒，孰能贱角也。凡诸不逞之徒疑经难法者，悟必近取诸身，远喻于物，如理答酬，无不垂头搭翼者。十年辛卯春，寝疾，加趺坐而逝。享龄六十三，法腊二十六。阖维之日，获舍

利五百余粒，珠颗累累，粲然在瞩。门人湛一、圆一等主之，迁塔焉。

○唐金陵钟山元崇传（？禅师）

释元崇，俗姓王氏，琅簫临沂人也。晋丞相始兴文献公子薨之后，自南朝伦废，世居句容。祖祢已来，非贤即哲。崇幼而孤秀，嶷若断山。心喻芙蕖，形同玉洁，风尘不杂，立志夷简。时年十五，奉道辞家，负笈洞天，餐霞卧云，师范陶许，精研妙句，独证微隐。乃恐至理未融，解脱方阻，因归心释典，大畅佛乘，三教齐驱，邁心世表。于是声振吴越，縑素异焉。采访使润州刺史齐平阳公闻其行业，虚伫久之，适会恩制度人，哀充举首。以开元末年因从瓦官寺璇禅师谕受心要，日夜匪懈，无忘请益。璇公乃揣骨千里骏足可知，因授深法。崇灵台虚彻，可舍百神，心鉴高悬，尘无私隐。既而声价光远，物望所知，金陵诸德请移所配栖霞寺。春秋逾纪，服勤道务，彝伦有叙，时众是瞻。至德初，并谢绝人事，杖锡去郡，历于上京，遍奉明师，栖心闲境，罕交俗流。遂入终南，经卫藏，至白鹿，下蓝田，于车罔川得右丞王公维之别业。松生石上，水流松下，王公焚香静室，与崇相遇，神交中断。于时天地未泰，？狼构患，朝贤国宝，或在迈轴。起居萧舍人昕与右丞诸公，并硕学雄才，尊儒重道，偶兹一会，抗论弥日，钩深索隐，襟期许与。王箫叹曰：“佛法有人，不宜轻议也矣！及言旋河洛，登陟嵩少，怀达磨之旨要，得《华严》之会归，声价渐高，衣冠羨仰。京师名德咸请住持。志在无为，赧然不顾。乃放浪人世，追踪道，流考盘灵踪，遂东适吴越天台、四明，清心养素。数年之后，遐想钟山，飞锡旧居，考以云房，道俗咸喜，玉反山辉。大历五年，刺史南阳樊公雅好禅寂，及属县行春，顺风稽首，谕请道要，益加师礼矣。时道俗以为此寺灵胜，游憩者多，监主护持，须选名德。金议无以易禅师者。崇频告辞恳苦，众咸再三，事不获已，顺受弥缝其间，总二十年。藉四方之财，因道化之力，乐栌云构，丹闥日新，盖存乎无为无所不为者也。功成身退，安禅高顶，前后学徒，讎可胜计。至大历十二年，示疾言归，不加药饵。八月二日，卒于山院，春秋六十有五。临终，命门人无令封树，弟子如泉、澄添等奉全师教，以其月八日瘞于摄山之阳，依岩为窟，累石不磨不砢，遵遗诰也。崇身长六尺，仪表端肃，望之俨然，即之生畏。意密情恕，心和行高，天姿龙象，生此歧。享龄非永，惜哉！弟子等共建丰碑，以纪化迹，树于寺之门首焉。

○唐京兆大安国寺利涉传

释利涉者，本西域人也，即大梵婆罗门之种姓。夙龄强志，机警溢伦，宗党之中，推其达法。欲游震旦，结侣东征，至金梭岭，遇玄奘三藏，行次相逢，礼求奘度。既而群经众论，凿窍通幽，特尔远尘，归乎正道，非奘难其移转矣。奘门贤哲辐凑，涉季孟于光、宝之间。其为人也，犹帛高座之放旷。中宗最加钦重，朝廷卿相感义与游。开元中于安国寺讲《华严经》，四众赴堂，迟则无容膝之位矣。檀施繁炽，利动人心。有颖阳人韦玘，垂拱中中第，调选河中府文学，迁大理评事秘校。见

涉讲筵币帛堆积，就乞选粮，所获未厌。表请释道二教定其胜负，言释道蠹政可除。玄宗诏三教各选一百人，都集内殿，韦玘先陟高座，挫叶静能及空门思明，例皆辞屈。涉次登座，解疑释结，临敌有余，与韦往返百数千言，条绪交乱，相次抗之，棼丝自理，正直有归。涉重问韦曰：“子先登席，可非主耶？未审主人何姓？”玘曰：“姓韦。”涉将韦字为韵，揭调长吟。偈词曰：“我之佛法是无为，何故今朝得有为？无韦始得三数载，不知此复是何韦？”涉之吟作，百官悚然。帝果忆何韦之事，凜然变色曰：“玘是庶人宗族，敢尔轻蔑朕玄元祖教及凌置释门。”玘下殿俯伏待罪，叩头言：“臣非庶人之属。”涉贵其钳利口以解疏狂，奏曰：“玘是关外之人，非玄贞之族类。”敕贬象州，百姓赐涉钱绢，助造明教寺，加号明教焉。二教重熙，涉之力也。因著《立法幢论》一卷。公卿间有言曰：“涉公是韦掾之膏肓也。”涉曰：“此举也，矢在弦上，不得不发。”自此京城无不改观，言谈讲者，以涉为最焉。晚节遭其谴谪汉东，寻属宽宥，移徙南阳龙兴寺。时惠忠国师知重涉名，聊款关相谒，曰：“纳衣小僧向前，某被门徒朝要连坐于此，适观师当有贵气，可作高道国德，勿同吾也。”乃开篋提衣物，令忠师曳娄，由此襄邓之人皆惊涉如此悬记，忠师道声又光阐焉，盖涉望重之故也。上元二年，诏忠师入供养。肃宗时入宫起居，太上皇，乃引忠见上皇曰：“此人何如利涉？”则知涉才业优长，帝王器重，复多著述。大历中西明寺翻经沙门圆照撰《涉传》，成一十卷，足知言行之多也矣。

○唐越州焦山大历寺神邕传

释神邕，字道恭，姓蔡氏，东晋太尉谏即度江祖十五代孙也。因官居于暨阳，邕生于是邑。母宣氏始娠之际，率多征异。襁褓中闻唱经声，必有凝神侧听之儿。角聪晤过人。年十二辞亲学道，请业于法华寺俊师。每览孔释二典，一读能诵。同辈者罕不欣慕。开元二十六年，敕度隶诸暨香严寺名籍。依法华寺玄俨师，通《四分律钞》。俨识其志气，谓人曰：“此子数年后，卒为学者之司南矣。尔其勉之。”俨新出辅篇律记，邕挾其膏腴，穷彼衢术，一宗学者少能与其联轡方轨焉。性非局促，又从左溪玄朗师习《天台止观》、《禅门》、《法华》、《玄疏》、《梵网经》等，四教三观等义，秘藏载后，观性知空，爰至五夏，果精敷演，吴会间学者从之。天宝中本邑郭密之请居法乐寺西坊，恢拓佛舍，层阁摩霄，半澄江影，廊宇完备。后乃游问长安，居安国寺，公卿藉其风宇，追慕者结辙而至。方欲大阐禅律，倏遇禄山兵乱，东归江湖，经历襄阳，御史中丞庾光先出镇荆南，邀留数月。时给事中窦绍、中书舍人苑咸，钻仰弥高，俱受心要。著作郎韦子春，有唐之外臣也，刚气而赡学，与之酬抗。子春折角，满座惊服。苑舍人叹曰：“阇梨可谓尘外摩尼，论中师子。1时人以为能言矣。旋居故乡法华寺，殿中侍御史皇甫曾、大理评事张河、金吾卫长史严维、兵曹吕渭、诸暨长丘丹、校书陈允初赋诗往复，卢士式为之序，引以继支许之游，为邑中故事。邕修念之外，时缀文句，有集十卷，皇甫曾为序。自至德迄大历中，频受请登坛度戒，起丹阳泊乎金华，其间释子皆命为亲教师也。又以县南路通衢婺，其中百余里殊无伽蓝，释侣往来宴息无所。邕愿布法桥，接

憩行，遂于焦山可以为梵场也。得邑人骑都尉陈绍钦等率群信构净刹，一纪方乃集事焉。前吏部侍郎徐浩出佐明州，以邦国聚落，乃白廉使皇甫温奏赐额曰大历焉。先是中岳道士吴筠造邪论数篇，斥毁释教，昏蒙者惑之。本道观察使陈少游请邕决释老二教孰为至道，乃袭世尊之摄邪见，复宝琳之破魔文，爰据城堑，以正制狂。旗鼓才临，吴筠覆辙，遂著《破倒翻迷论》三卷，东方佛法再兴，实邕之力欤。未游天台，又纂地志两卷，并附于新论矣。邕颐丰角，风韵朗拔，前后廉问皆延置别榻，请为僧统，以加崇揖之礼。贞元四年戊辰岁十一月十四日，遇疾，遗教门人，趺坐端相而归寂于大历法堂焉。以十二月十四日奉灵仪于寺北原，遵僧制也。报龄七十九，法岁五十。明年冬十一月方建塔矣。秘书省校书郎陆淮为其铭，上首弟子智昂、灵澈、进明、慧照等咸露锋颖，禅律互传。至十一年，户部员外郎丘上卿为碑纪德焉。

○唐朗州药山惟俨传

释惟俨，俗姓寒，绛县人也。童龀慷慨，敏俊逸群。年十七，从南康事湖阳西山惠照禅师。大历八年，纳戒于衡岳寺希澡律师所，乃曰：“大丈夫当离法自净，焉能屑屑事细行于布巾邪？”遂谒石头禅师，密证心法，住药山焉。一夜明月，陟彼崔嵬，大笑一声，声应澧阳东九十许里。其夜澧阳人皆闻其声，尽云是东家，明辰展转寻问，迭互推寻，直至药山，徒众云：“昨夜和尚山顶大笑是欤？”自兹振誉，遐迩喧然。元和中李翱为考功员外郎，与李景俭相善。俭除谏议，鹰翱自代，及俭获谴，翱乃坐此出为朗州刺史。翱闲来谒俨，遂成警悟。又初见俨，执经卷不顾，侍者白曰：“太守在此。”翱性褊急，乃倡言曰：“见面不似闻名。”俨乃呼，翱应唯，曰：“太守何贵耳贱目？”翱拱手谢之，问曰：“何谓道邪？”俨指天指净瓶曰：“云在青天水在瓶。”翱于时暗室已明，疑冰顿泮。寻有偈云：“炼得身形似鹤形，千株松下两函经。我来相问无余说，云在青天水在瓶。”又“偈选得幽居惬野情，终年无送亦无迎。有时直上孤峰顶，月下披云笑一声”。初翱与韩愈、柳宗元、刘禹锡为文会之交，自相与述古言，法《六籍》为文黜浮华，尚理致，言为文者韩、柳、刘焉。吏部常论“仲尼既没，诸子异端，故荀孟复之，杨墨之流洗然遗落。殆周隋之世，王道弗兴，故文中子有作，应在乎诸子左右。唐兴，房魏既亡，失道尚华，至有武后之弊，安史之残。吾约二三子同致君复尧舜之道，不可放清言而废儒，纵梵书而猾夏，敢有邪心归释氏者，有渝此盟，无享人爵，无永天年。先圣明神，是纠是殛”！无何，翱邂逅于俨，顿了本心。末由户部尚书，襄州刺史，充山南东道节度使，复遇紫玉禅翁，且增明道趣，著《复性书》上下二篇。大抵谓本性明白，为六情玷污，迷而不返，今牵复之，犹地雷之复见天地心矣。即内教之返本还源也。其书露而且隐，盖而又彰，其文则《象》、《系》、《中庸》，隐而不援释教；其理则从真舍妄，彰而乃显自心。弗事言陈，唯萌意许也。韩柳览之，叹曰：“吾道萎迟，翱且逃矣！”俨陶炼难化，护法功多，回是子之心，拔山扛鼎，犹或云易。又相国崔群、常侍温造相继问道，俨能开发道意。以大和二年将欲岁冬，告众曰：“法堂即颓矣。”皆不喻旨，率人以长木而枝柱之，俨抚掌大笑云：

“都未晓吾意。”合掌而寂，春秋七十云。

系曰：尝览李文公《复性》二篇，明佛理不引佛书，援证而征，惟《易》《礼》而止。可谓外柔顺而内刚逆也，故曰得象而忘言矣。经云治世诸言皆成正法者，李公有焉。俨公一笑，声彻遐乡，虽未劳目连远寻，而《易》例有诸，隆墀永叹，远壑必盈，道感如然不知其然也。

○唐京师章信寺崇惠传

释崇惠，姓章氏，杭州人也。？稚之年，见乎器局，鸢鸟难笼，出尘心切。往礼径山国一禅师为弟子，虽勤禅观，多以《三密教》为恒务。初于昌化千顷最峰顶结茅为庵，专诵《佛顶咒》数稔。又往盐官硖石东山，卓小尖头草屋，多历年月。复誓志于潜落云寺遁迹，俄有神白惠曰：“师持《佛顶》少，结莎诃，令密语不圆。莎诃者，成就义也。今京室佛法为外教凌轹，其危若缀旒，待师解救耳。”惠趋程西上，心亦劳止，择木之故，于章信寺挂锡，则大历初也。三年戊申岁九月二十三日，太清宫道士史华上奏，请与释宗当代名流角佛力道法胜负。于时代宗钦尚空门，异道愤其偏重，故有是请也。遂于东明观坛前架刀成梯，史华登蹶如常磴道焉。时缙伍互相顾望推排，且无敢蹶者。惠闻之，谒开府鱼朝恩，鱼奏请于章信寺庭树梯，横架锋刃，若霜雪然，增高百尺。东明之梯极为低下，时朝廷公贵、市肆居民，骈足摩肩而观此举。时惠徒跣登级下层，有如坦路，曾无难色。复蹈烈火，手探油汤，仍餐铁叶，号为蕘，或嚼钉线，声犹脆飴。史华怯惧惭惶，掩袂而退。时众弹指叹嗟，声若雷响。帝遣中官巩庭玉宣慰再三，便赍赐紫方袍一副焉。诏授鸿胪卿，号曰护国三藏，敕移安国寺居之。自尔声彩发越，德望峻高。代宗闻是国一禅师亲门高足，倍加郑重焉。世谓为巾子山降魔禅师是也。

系曰：或谓惠公为幻僧欤？通曰：“夫于五尘变现者曰神通，若邪心变五尘事则幻也。惠公持《三密瑜伽护魔法》，助其正定，履刃蹈炎，斯何足惊乎？夫何幻之有哉？《瑜伽论》有诸三神变矣。

○唐洛阳同德寺无名传

释无名，姓高氏，渤海人也。祖官今西京，乃为洛阳人矣。冲孺之龄，举措卓异，口不啖辛血，性不狎喧哗，邈矣出尘，故难留滞。年二十八，若瘦雁之出笼，投师习学，依随隶同德寺。及精《律藏》解一字以无疑；闻有禅宗，思千里而请决。举领整裘，开局见路，辞飞笔健，思若涌泉。因随师游方，访祖师之遗迹，得会师付授心樱会先语诸徒曰：“吾之付法，无有名字。”因号无名也。自此志历四方，周游五岳，罗涪庐阜、双峰、公、钅卢岭、牛头、剡溪、若耶、天台、四明，罔不询问，风格高远，神操朗澈，博识者睹儿便伏，僻见者发言必摧。时德宗方纳鲜于叔明、令狐？料简僧尼事，时名有表直谏，并停。寻时鲜于叔明、令狐？等流南海百

姓。至贞元六年，往游五台，居无定所。九年十二月十二日于佛光寺先食讫，俨然坐化，春秋七十二，腊四十三。十一年闍维，获舍利一升。泽潞节度使李抱真建塔于佛光寺，贞元六年庚午岁也。或云：“名著《疏》解《弥陀经》焉。”

○唐庐山归宗寺智常传

释智常者，挺拔出伦，会履清约，遍参知识，影附南泉，同游大寂之门，乃见江西之道。元和中，驻锡庐山归宗净院。其徒响应，其法风行。无何，白乐天贬江州司马，最加钦重。续以李渤员外，元和六年隐嵩少，以著作征起，杜元颖排之，出为虔州刺史南康，曾未卒岁，迁江州刺史。渤洽闻多识，百家之书，无不该综，号李万卷矣。到郡，喜与白乐天相遇，因言浔阳庐山阜山水之最，人物贤哲隐沦。论惠远遗迹，遂述归宗禅师善谈禅要，李曰：“朝庭金榜早晚有嗜菜阿师名目。”白曰：“若然，则未识食菜阿师欤？”白强劝游二林，意同见常耳。及到归宗，李问曰：“教中有言，须弥纳芥子，芥子纳须弥。如何芥子纳得须弥？”常曰：人言博士学览万卷书籍，还是否耶？”李曰：“忝此虚名。”常曰：“摩踵至顶只若干尺身，万卷书向何处著？”李俯首无言，再思称叹。续有东林寺僧神建讲诸经论，问“触目菩提”，常略提举。神建不体，乃发状讼常示恶境界。时李判区分甚闻诣理。常有异相，目耀重瞳，遂将药？手，恒磨错，不觉目眦俱红，号赤眼归宗矣。

系曰：佛理幽邃，一言蔽之者，玄解之言。逗猛利者，药妙疾轻之验也。○唐杭州千顷山楚南传

释楚南，闽人也，俗姓张氏。爰在髫龄，冥然跪于父母前，诉志出家。投开元寺昙藹师而受训焉。当授经法，目所经睹，辄诵于口。执巾侍盥，洒扫应对，颇能谨愿。迨乎冠岁，乃落发焉。诣五台登戒，就赵郡学相部律。往上都，学《净名经》。一律一经，略通宗旨，则知顿机，不甘为渐教缚。遂往芙蓉山，根性未发。谒黄砭山禅师，问答虽多，机宜顿了。倏值武宗废教，南遂深窜林谷。大中兴教，出遇升平相裴公休出抚宛陵，请黄砭出山，南随侍。由此便诣姑苏报恩寺，专行禅定，足不逾阕，仅二十余载。乾符四年，苏州太守周慎嗣向风，请住宝林院。又请居支硎山。至五年，昌化县令徐正元与紫溪戍将饶京同召住千顷慈云院。训示禅徒之外，唯俨然在定，逾月或浹旬。光启三年，前两浙武肃王钱氏请下山供施。昭宗闻其道化，赐其鹿胎衣五事，别赉紫衣。文德六年二月，忽双虹贯堂室，二鹿蹶然入寺，法堂梁折。至五月，辞众，后于禅床垂两足、伸二臂于膝，奄然而卒。春秋七十，僧腊五十六。迁塔于院西隅。大顺二年壬子岁二月，宣州孙儒寇钱唐之封略。兵士发塔，见南全身不散，爪发俱长，悔罪而去。南公平昔著《般若经品颂偈》一卷、《破邪论》一卷，以枝梧异宗外敌，见贵于时也。

○唐南岳七宝台寺玄泰传

释玄泰者，不知何许人也。性参方正，言不浪施，心静之情，义而后动。所居兰若，在衡山之东，号七宝台。不衣蚕缕，时谓泰布纳欵。从见德山禅师，豁如自适，誓不立门徒，逍遥求志，而于词笔，笔若有神。四方后进巡礼相见，皆用平怀之礼。尝以衡山之阳多被山民莫辈斩木烧山，损害滋甚。泰作《畚山谣》，远迩传播，达于九重，敕责衡州太守禁止。岳中兰若由是得存，不为延燎，泰之力也。终年六十五。临逝说偈曰：“不用剃头，不须澡浴一堆猛炎，千足万足。”偈终，垂一足而逝。阇维，收舍利，紵坚固大师塔左，营小浮图焉。又为《冢骨偈》、《诸禅祖塔铭》、《歌》、《颂》等，好事者编聚成集而行千代焉。

○唐京兆福寿寺玄畅传

释玄畅，字申之俗姓陈氏，宣城人也。畅爰在弱龄，便持异操，戏则聚沙为塔，摘叶为香。年九岁，于泾邑水西寺依清逸上人，教授经法。年十九，削发。二十岁，往福州兜率戒坛受具足戒，听掇律科，深得宗旨。新增细缕，一染色佳，而往越中求闻异说。仰京室西明寺有宣律师旧院，多藏毗尼教迹，因栖惠正律师法席。自入京华，渐萌头角，受京城三学大德，益广见闻。方事讲谈，遽钟堙厄，则会昌废教矣。时京城法侣颇甚徬徨，两街僧录灵宴、辩章，同推畅为首，上表论谏。遂著《历代帝王录》，奏而弗听。由是例从俗服，宁弛道情，龙蛇伏蛰而待时，玉石同焚而莫救。殆夫武皇厌代，宣宗在天，坏户重开，炎岗息炽。畅于大中中，凡遇诞辰，入内谈论，即赐紫袈裟，充内外临坛大德。懿宗钦其宿德，蕃锡屡臻。乃奏修《加忏悔一万五千佛名经》，又奏请《本生心地观经》一部八卷，皆入《藏》。畅时充追福院首领，又充总持寺都维那，寻署上座。畅讲律六十座，度法者数千人，撰《显正记》一十卷，科《六帖名义图》三卷、《三宝五运》三卷，虽祖述旧闻，标题新目，义出意表，文济时须。乾符中，懿宗简自上心，特赐师号曰法宝。二年三月二十一日示灭，俗龄七十九，僧腊五十九。弟子赐紫惠柔大德师遂宗绍，以其年四月二十五日窆于长安邑高阳乡小梁村。四年丁酉岁，尚书礼部侍郎崔沆与畅交分殊深，著《碑》述遗迹焉。

○后唐南岳般舟道场惟劲传

释惟劲，福州长溪人也。节操精苦，奉养栖约，破纳拥身，衣无缁纁，号头陀焉。初参雪峰，便探渊府。乾化中，入岳住报慈东藏，亦号三生藏，中见法藏禅师鉴灯，顿了如是广大法界重重帝网之门，因叹曰：“先达圣人，具此不思议智慧方便，非小智之所能。又岳道观中亦设此灯，往因废教时窃移入仙坛也。有游岳才人达士，留题颇多。劲乃叹曰：“卢橘夏熟，宁期殖在于神都；《舜韶》齐闻，不觉顿忘于肉味。嗟其无识，不究本端。盗王氏之青毡，以为旧物；认岭南之孔雀，以作家禽。后世安知？于今区别。”乃作五字颂，颂五章，览者知其理事相融，灯有所属，属在乎互相涉入，光影含容，显华严性海主伴交光，非道家之器用也。楚王马氏奏赐紫，署宝闻大师，梁开平中也。劲续《宝林传》，盖录贞元已后禅门祖祖相继

源脉者也。别著《南岳高僧传》，未知卷数，亦一代禅宗达士，文彩可观。后终于岳中也。

系曰：物涉疑似，难辄区分，劲公志鉴灯，若遗物重获归家也。后之人必不敢攘物归家也。故曰前事不忘，后世之元龟也。○周洛京福先寺道丕传

释道丕，长安贵胄里人也。唐之宗室，父从晏，襄宗沿堂五院之首。母许氏为求其息，常持《观音普门品》，忽梦神光烛身，因尔妊焉。及其诞生，挺然歧嶷，端雅其质，属藉诸亲异而爱之如天童子。年始周蓀，父将命汾晋，会军至于霍山，没王事。丕虽童稚聚戏，终鲜笑容。七岁，忽绝荤膻，每游精舍，怡然忘返。遂白母往保寿寺礼继能法师，尊为轨范。九岁，善梵音礼赞。是岁襄宗幸石门，随师往迎驾。十九岁，学通《金刚经》义，便行讲贯。又驾迁洛京，长安焚荡，遂背负其母，东征华阴。刘开道作乱，复荷母入华山，安止岩穴。时谷麦勇贵，每斗万钱。丕巡村乞食，自专胎息，唯供母食。母问还食未？丕对曰：“向外斋了。”恐伤母意，至孝如此。年二十岁，母曰：“汝父霍山亡没，战场之地，骨曝霜露。汝能收取归葬，不亦孝乎？”遂辞老亲往霍邑，立草庵，鸠工集聚白骨，昼夜诵经，咒之曰：“古人精诚所感，滴血认骨。我今志为孝子，岂无灵验者乎？傥群骨中有动转者，即我父之遗骸也。”如是一心注想，目未轻舍，数日间，果有枯骸从骨聚中跃出，竞骛丕前，摇曳良久。丕即擗踊抱持，如复生在，赍归华阴。是夜其母梦夫归舍，明辰骨至，其孝感声誉日高。至二十七岁，遇曜州牧娄继英，招丕住洛阳福先弥勒院，即晋道安翻经创浴之地也。天祐三年丙寅，济阴王赐紫衣。后唐庄宗署大师曰广智。丕于梁朝后主、后唐庄宗、明宗、凡内建香坛，应制谈论，多居元席。及晋迁都今东京，天福三年诏入梁苑，副录左街僧事，与传法阿闍梨昭信大师俱道儿童颜，号二菩萨。是故朝贵士庶，多请养生之术。丕精勤不懈，一佛一礼。《佛名经》，《法华》、《金刚》、《仁王》《上生》四经，逐一字礼。然其守杜多之行，分卫时至，二弟子随行。开运甲辰岁为左街僧录，虽临僧务，日课修持。相国李公涛、西枢密太傅王公朴、翰林丞旨陶公？等，无不倾心归重。至汉乾祐中，谢病乞西归。未允之际，属汉室凌夷，兵火连作，恣行剽掠。丕于廊庑之下，倚壁诵念，二日纷纭，一无见者。时京城见闻，益加钦尚。逃归洛邑，周太祖潜隐所重。广顺元年，敕召为左街僧录，不容陈让，还赴东京，居于僧任。世宗尹妖府政，嫌空门繁杂，欲奏沙汰，召丕同议。时间难交发，开喻其情，且曰：“僧之清尚，必不露于人前。僧或凶顽，而偏游于世上。必恐正施曦，草和兰？而芟；方事淘澄，金逐沙泥而荡。大王储明欲照，蓄智当行，为益皇帝邪？为损君亲邪？若益君乎，不令一物失所。若损亲也，是坏六和福田。况以天下初平，疮痍未合，乞待后时，搜扬未晚。故老子云：‘治大国如烹小鲜。’虑其动则糜烂矣。”世宗深然其言，且从停寝。及世宗登极，丕谓僧曰：“吾皇宿昔有志，汝当相警护持。”坚乞解归洛阳，又立礼《首楞严经》。二年，果敕并毁僧寺，并立僧帐，盖限之也。毁教不深，乃丕之力也。以显德二年乙卯六月八日微疾。十日，令弟子早营粥食云：“有首楞严菩萨”，众多相迎，令鸣椎，俄然而化，春秋六十七，僧腊四十七。缁素号哭，

诸寺具威仪送葬于龙门广化寺之左，立石塔焉。未终之前，寺钟无故嘶哑，表刹龙首忽焉陨坠。僧澄清梦寺佛殿梁折，极多异兆焉。

系曰：周武灭佛法。隋开皇辛亥岁，太府丞赵文昌入冥见邕受对，寄语文帝拔救。周世宗澄汰，毁私邑，勒立僧帐，故说大渐招其恶报。或有入冥见之，并赞成厥事者，同居负处，略同周武。未知是乎？

论曰：九重所以成深严，七札其能捍忧患。高墉峻垒，加校尉而守之；犀革兕皮，介将军而战者，君既安所，臣亦建功。犹释门之外侮忽来，得法将之中权斯敌。使其大道丧而重复，玄纲绝而又张。我有仲由，恶言不入。外御其侮，不可暂亡也。嗟乎，真教东传，累更年纪，受其艰否，屈指可寻！法系有为，四相以之迁贸；明虽无损，一轮以之蚀侵。桓楚无端效莽，得时而变法；德舆伊始欺孤，余力而责僧。赖远公之致书，因朝达之抗疏，只成暴政，空鲠人情。元魏怀邪，周邕尚辩，昙始乃呈其诡迹，道安盛奋其辞锋。是待秦坑，能逃汉律，始安二德，疑其住寿应真，出没其形，扶危拯溺者矣。秀也钟其厄运，愤此反常，上笺若攻垒之先登，为法偶犯颜而不死。复礼答权文学难词，蔚成解判。惠立斥吕奉御《图注》，免横窥窬。两面俱通，玄嶷造乎《甄正》，一场贾勇。法明定其《化胡》，答孔老于李华，名儒慑伏；挫是非于韦氏，辩势酋强。邕也掩徐，独记于天台；俨也令李，成书于《复性》。其或角史华之术因蹶刀梯；谏德宗之非，乃停沙汰。申答而惊李渤，作谣而占衡山。《破邪》之论可宗，《鉴灯》之颂归我。以前诸德超世卓然，式遏寇仇，阅墙御侮。言其薄者，则发愤忘食，殊弗防其反污。其如皋原纵火，兰艾之臭同焚；树木摧风，鸾鹄之巢共覆者，其惟会昌灭虐我法之谓乎？从汉至唐，凡经数厄，钟厄爰甚，莫甚武宗焉。初有道士赵归真者，授帝留年之术，宠遇无比。每一对扬，排毁释氏，宜尽除之。盖以归真曾于敬宗朝出入宫掖，势若探汤。及其祸缠，暴殄自然，事体如浆。京邑诸僧竞生谗谤。归真痛切心骨，何日忘之。还遇武皇，因缘狎昵，署为两街教授先生。时谏官抗疏，宰臣李德裕屡言。归真惧其动摇，奏迎罗浮邓元起、南岳刘玄靖入，帝谓神仙坐致。由是共为椅角，同毁释门，意报僧讥诮之仇耳。众轻覆车，群噪惊蛰，须弥危臬危瓦困其劫尽之风；有顶低摧，倚其宿舂之杵。诟云终否，当有复时。大中行废教之诛，会昌非后天之老。吁咄哉！归真奇秘之术，今古所无。何邪？能寄喜怒于天子之心，虽王晋、安期，俱弗如也。尔时玄畅法宝大师也，纳两街之请，操一割之刀，纂辑古今，搜扬经史，成其别录，上其表笺。逆龙鳞之手已伸，探虎穴之心且勇。膏肓之疾，圭刀之散何施？混浊之河，铢两之胶谩解。如皆畏震，所谓坐看畅公手拓不周山，不免共工之触折也。凡今缙伍，无纵毁讥。毁讥小人也，及罹祸毒，君子受之，亦犹城门火而池鱼死也。傥云周武不落于阿鼻，归真自登于仙籍，宣宗诛之，已塞责矣。是故比丘但自观身行，莫伺玄门，非干已事。又以空门染习如然，无斗四支而伤具体，各是圣人设教，无相夺伦。如此行时，名真护法也。老氏云：“六亲不和，则有孝子。”如无孝子之名，信六亲大和也。已上诸公，皆家中有竞，号啕谏乎？因得善父母之名欤！今我传家，止劝将来二教和同，弗望后生学其诤直，险在其中矣，为君不颯然

则临机可用，相事当行，必任弛张，勿为胶柱。然后知时名为大法师也。传又云乎，“相时而动，无累后人”，其斯之谓欤！

卷十八

◎感通篇第六之一（正传十五人附见三人）○后魏西凉府檀特师传

释檀特师者，一名慧丰，不知何许人也。身虽剃染，率略无检制，饮酒啖肉，语嘿无常。逆论来事，后必如言。居于武威，肆意狂逸。时宇文仲和为刺史，请之入州，历观厩库，乃云：“何意畜他官物邪？”仲和不谕其旨，怒之，不令在城。未几，仲和拒不受代，朝廷令独孤信擒之。仲和身死，资财没官。周文闻之，降书召之。檀特至歧州，会齐神武来寇玉壁，檀特曰：“狗岂能到龙门邪？”神武果不至龙门而还。侯景未叛东魏之前，忽捉一杖，杖头刻为猕猴形，令其面常向西，日夜弄旃。又索一角弓牵挽之。俄而侯景启降，寻复背叛归梁，皆可征验。至大统十七年春初，忽著一布帽。周文左右惊问之。檀特曰：“汝亦著，王亦著也。”至三月而魏文帝崩。复取一白绢帽戴之，左右复问之。檀特曰：“汝亦著，王亦著也。”未几丞相夫人薨。后复戴，问对同前，寻丞相第二子武邑公薨。其事验多如此也。俄而病卒，周文命葬之。

○后魏晋阳河秃师传

释河秃师者，不详何许人也。魏孝昌中，于晋阳市肆间行往，乍愚乍智，作沙门形。时人不测，止呼为河秃师。及齐神武诞第二子洋，文宣帝也，武明太后见家贫甚，与亲戚言及家计，正忧饥冻死耳。洋方生数月，尚未能言，錫言曰：“得活”，二字分明。太后左右大惊，而不敢言，谓为妖怪。时传秃师神异，射事多中，巧诱而至。太后意占其儿子早言为怪，乃遍见诸子，文襄魏永熙后旁以禄位历问之，至洋再三举手，指天而已，口无所言。若诸子，皆别无举措矣。后不测其终。

○陈新罗国玄光传

释玄光者，海东熊州人也。少而颖悟，顿厌俗尘，决求名师，专修梵行。迨夫成长，愿越沧溟，求中土禅法。于是观光陈国，利往衡山，见思大和尚，开物成化，神解相参。思师察其所由，密授《法华》、《安乐行门》。光利若神锥，无坚不犯，新犹劫贝，有染皆鲜。禀而奉行，勤而罔忒，俄证《法华》三昧，请求印可。思为证之：“汝之所证，真实不虚，善护念之，令法增长。汝还本土，施設善权，好负螟蛉，皆成蜾蠃。”光礼而垂泣，自尔返锡江南。属本国舟舰附载，离岸时，则彩云乱目，雅乐沸空，绛节霓旌，传呼而至。空中声云：“天帝召海东玄光禅师。”光拱手避让，唯见青衣前导，少选入宫城，且非人间官府。羽卫之设也，无非鳞介，参杂鬼神。或曰：“今日天帝降龙王宫，请师说亲证法门，吾曹水府，蒙师利益。”既登宝殿，次陟高台，如问而谈，略经七日。然后王躬送别，其船泛洋不进。光复登船，船人谓经半日而已。光归熊州翁山，卓锡结茅，乃成梵刹。同声相应，得法者蛰户爰开；乐小回心，慕膻者蚁连倏至。其如升堂受？者一人，入火光三昧

一人，入水光三昧二人，互得其二种法门。从发者彰三昧名耳。其诸门生，譬如众鸟附须弥山，皆同一色也。光末之灭，罔知攸往。南岳祖构影堂，内图二十八人，光居一焉。天台国清寺祖堂亦然。

系曰：夫约佛灭后，验入道之人，以教理行果四法明之，则无逃隐矣。去圣弥近者，修行成果位证也。去圣稍遥者，学教易见理亲也。其更绵邈者，学教不精，见理非谛。夫一念不生，前后际断，斯顿心成佛也。理佛具足，行布施行，曾未尝述行佛，具体而微。东夏自六祖已来，多谈禅理，少谈禅行焉。非南能不说行，且令见道如救头然之故。南岳思师切在兼修，乘戒俱急，是以学者验诸行果。其如入火光三昧者，《处胎经》中以禅定摄意入火界三昧，刹土洞然。愚夫谓是遭焚。若入水界三昧，愚夫见谓为水，投物于中。菩萨心如虚空不觉触烧者，此非二乘所能究尽也。斯乃急于行果焉。无令口说而身意不修，何由助道邪？

○隋江都宫法喜传

释法喜，南海人也，形容寝陋，短弱迂疏，可年四十许。岭表耆老咸言：“儿童时见识之，颜貌如今无异。”蛭蜒间相传云已三百岁矣。亦自言旧识庐山慧远法师，说晋宋朝事，历历如信宿前耳。平素时悄默，见人必语，语必含深意，吉凶之征，有如影响。人亦不欲与喜相见，惧直言灾恶忤逆意也。陈朝马静为广州刺史，方上任，喜直入州上厅事，画地作马头形，以示其子而去。静本扶风名族，雄勇多武略，不闲事体。及临州也，每出行部，从甲士数万，旌旗剑戟，若虹霓映乎霜雪，言以此可用威边徼。其奢僭过度，王者之不若，被人诬告谋反。静惧，即遣妻子百余人入朝，示无图变。陈王犹惑，遣临汝侯观其形势曰：“必有反状，便可行戮，实无逆谋，直往代之。”临汝利其财产，至州不验是非。静恃心无异，束手诣临汝，便叱左右擒而斩之。此画地之明效矣。喜之先见，皆同此类。炀帝闻之，追来扬州。未久，宫内树一堂新成，喜匆匆升堂观览，俄惊走下阶，唱言“几压杀”其日夜阑，大雨堂崩，毙者数人，其后又于宫内环走，言索羊头。帝闻恶之责以狂言，敕锁著一室。数日，三卫于市见喜坦率游行。还奏，敕所司覆验禁闭之处，门锁如故。守当者云：“喜见在室内。”于是开户，见袈裟覆一聚白骨，其锁贯项骨不脱。帝甚惊怪，敕遣长史王恒疾往验之，袈裟覆白骨，骨皆钩锁相连，铁锁磨其项骨。帝闻愕然称叹，尤增信重，敕令勿轻摇荡，曰：“圣者神变无方。”至暮，喜还在室，或言或笑，守门复奏。帝令脱锁，纵其所适。有于一日赴数家斋食，或时饮酒啖肉，都无拘忌。俄而有疾，常所卧床自撒荐席，椶簟而纯寝。令人于下铺炭甚炽，数日而终，半身焦烂。葬于香山寺侧。后四年，南海郡奏喜见还在郡。敕遣开棺，空无所有矣。

○隋蕞州钦师传

释钦师者，不知何许人也。大业中，至广平，形神乖谬，造次难知，发语不常，既

往爰中。见灵通寺树砖浮图五级，欲务高敞，工作？杂。钦望而笑，谓寺众曰：“造此奚为？”众曰：“功德佛事，须用壮观，法师何斯怪问耶？”笑曰：“造烽火楼也。”当时缙伍互相非之曰：“风狂辈言，何可取！至九年，塔尚未成，贼寇四起，州官警严，于浮图上置候望烽火，方信钦言不妄矣。在所耆旧亦不知钦从何而来。止宿之处，亦无踪迹。然则时时变身，在豕彘之牢，即随豚豨群队。童子马世达等数人睹钦始变之时，乃停留伺察，意更观其复人形也。后果忽复形，却于看人之后大叫曰：“你辈欲何所观耶？”群人惊愕，合掌拜之。其变无常，皆若此也。及天下丧乱，亦失钦声迹矣。

系曰：“魏隋之僧且多应现者何？通曰：“菩萨作用，随类化身，以神通为游戏耳。于游戏而利益世主焉。”或曰：“魏、齐、陈、隋与宣师耳目相接，胡不入《续传》耶？”通曰：“有所不知，盖阙如也。亦犹大宋文轨既同，土疆斯广，日有奇异，良难遍知。纵有某僧也，其柰史氏未编，传家无据，故亦阙如，弗及录者，留俟后贤者也。”

○唐泗州普光王寺僧伽传（木叉慧俨慧岸）

释僧伽者，葱岭北何国人也。自言俗姓何氏，亦犹僧会本康居国人，便命为康僧会也。然合有胡梵姓名，名既梵音，姓涉华语。详其何国，在碎叶国东北，是碎叶附庸耳。伽在木土，少而出家。为僧之后，誓志游方。始至西凉府，次历江淮，当龙朔初年也。登即隶名于山阳龙兴寺。自此始露神异。初将弟子慧俨同至临淮，就信义坊居人乞地，下标志之，言决于此处建立伽蓝。遂冗土获古碑，乃齐国香积寺也。得金像衣叶，刻普照王佛字居人叹异云：“天眼先见，吾曹安得不舍乎？”其碑像由贞元、长庆中两遭灾火，因亡踪矣。尝卧贺跋氏家，身忽长其床榻各三尺许，莫不惊怪。次现十一面观音形，其家举族欣庆，倍加信重，遂舍宅焉。其香积寺基，即今寺是也。由此奇异之踪，旋萌不止。中宗孝和帝景龙二年，遣使诏赴内道场，帝御法筵言谈，造膝占对休咎，契若合符。仍褒饰其寺曰普光王。四年庚戌，示疾，敕自内中往荐福寺安置。三月二日，俨然坐亡，神彩犹生，止瞑目耳。俗龄八十三，法腊罔知。在本国三十年，化唐土五十三载。帝惨悼黯然。于时秽气充塞，而形体宛如，多现灵迹。敕有司给绢三百匹，俾归葬淮上，令群官祖送，土庶填邠。五月五日，抵于今所。帝以仰慕不忘，因问万回师曰：“彼僧伽者何人也？”对曰：“观音菩萨化身也。经可不云乎？应以比丘身得度者，故现之沙门相也。”初伽化行江表，止嘉禾灵光寺。彼泽国也，民家渔梁鍔弋交午。伽苦敦喻，其诸杀业陷堕于人，宜疾别图生计。时有裂网折竿者多矣。伽闲而宴息，见神告曰：“天方亢阳，百姓苗死身胡藏？其懒龙耶！”伽曰：“为之奈何？”神曰：“若今夕但小指出窗隙外，其如人何？”伽依之，其夜霆击异常，质明视指，微有红线脉焉。伽曰：“吾与此壤无缘。”乃行抵晋陵，见国祥寺荒废，乃留衣于殿梁而去，后人闻异香芬馥。伽尝记之曰：“伊寺有人王重兴。”去三十年后，果有僧俗姓全，为檀那矣。通天万岁中于山阳众中悬知嫌鄙伽者，乃昌言曰：“吾有五十万钱奉助功德，

勿生横议。”伽于淮岸招呼一船曰：“汝有财施吾，可宽刑狱。汝所载者剽略得耳。”盗依言尽舍，佛殿由是立成。无几，盗败，拘于扬子县狱。伽乘云下，慰喻言无苦。不日，果赦文至，免死矣。昔在长安，驸马都尉武攸暨有疾，伽以澡罐水狗之而愈，声振天邑。后有疾者告之，或以柳枝拂者，或令洗石师子而瘳，或掷水瓶，或令谢过。验非虚设，功不唐捐。却彼身灾，则求马也；警其风厄，则索扇欵。或认盗夫之钱，或咋黑绳之颈，或寻罗汉之井，或悟裴氏之溺，或预知大雪，或救旱飞雨，神变无方，测非恒度。中宗敕恩度弟子三人，慧岸、慧俨、木叉各赐衣盂，令嗣香火。洎乎已灭，多历年所，尝现形往汉南市漆器。及商人李善信船至寺觅买斋器，僧忽见塔中，形像凝然，而指曰：“正唯此僧来求买矣。”远近嗟叹。又尝于洪井化易材木，结筏而至焉。大历中，州将勒寺知十驿，俾出财供乘传者。至十五年七月甲夜，现形于内殿，乞免邮亭之役。代宗敕中官马奉诚宣放，仍赍舍绢三百匹、杂彩千段、金澡罐、皇太子衣一袭，令写貌入内供养。又乾元中，州牧李（亡名）。有推步者云：“为土宿加临，灾当恶弱。”伽忽现形，抚李背曰：“吾来福至，汗出灾销。”后无他咎。尝于燕师求毡罽，称是泗州寺僧。燕使赍所求物到，认塔中形信矣。遂图貌而归，自燕鳞展转传写，无不遍焉。长庆元年夜半，于州牧苏公寢室前歌曰：“淮南淮北自此福焉。自东自西，无不熟矣。”其年独临淮境内有年耳。二年，寺塔皆焚，唯伽遗形俨若无损。咸通中，庞勋者本徐州戍卒，擅离桂管，沿路劫掠，而攻泗州，围逼其城。伽于塔顶现形，外寇皆睡，城中偶出击之，惊窜而陷，宿州以事奏闻，仍锡号证圣大师也。文德元年，外寇侵軼，州将婴城拒敌。伽现形于城西北隅。寇见，知坚垒难下，骇而宵遁。大顺中彭门帅时溥令张谏攻于北城，除剿戮外，有五百余人拘鞠场中，谏凭按恍惚间见僧衣紫，诲之曰：“此辈平人，何可杀耶？不如舍之。”言毕不见。谏遂纵之而逸。乾宁元年，太守台蒙梦伽云：“寒东南少备。”蒙不喻旨，以绵宽法服施之。十二月晦夜半，有兵士逾垒而入，蒙初不知。复梦一僧以锡杖置于心上，冷彻心骨，惊起。蒙令动鼓角，贼惊奔，获首领姓韩，至是方晓矣。由此多于塔顶现小僧状，倾州瞻望，然有吉凶表兆于时，乞风者分风，求子者得子，今闻有躬礼者。往往有全不见伽形相者，或见笑容者吉，不然则凶，其不可爱度者如此。洎乎周世宗有事于江南，先攻取泗上。伽寄梦于州民，言不宜轻敌。如是达于州牧，皆未之信。自尔家家梦同，告之，遂降，全一郡生民，赖伽之庇矣。天下凡造精庐，必立伽真相，谥曰大圣僧伽和尚。有所乞愿，多遂人心。李北海邕、胡著作浩各为碑颂德。今上御宇也，留心于此，其年三月有尼游五台山回，因见伽于塔顶，作婴孩相，遂登刹柱，舍身命供养。太平兴国七年，敕高品白承睿重盖其塔，务从高敞，加其累层。八年，遣使别送舍利宝货，同葬于下基焉。其日有僧怀德预构柴楼，自持蜡炬，焚身供养。炎燎之中，经声不绝。又将欲建浮图，有巨木三根，沿淮而下，至近浮桥且止，收为塔心柱焉。续敕殿头高品李庭训主之。先是此寺因■中金像刻其佛曰普照王，乃以为寺额。后避天后御名，以光字代之。近宣索《僧伽实录》，上览已，敕还其题额曰普照王寺矣。弟子木叉者，以西域言为名，华言解脱也。自幼从伽为剃{髟采}弟子，然则多显灵异。中和四年，刺史刘让，厥父中丞忽夜梦一紫衣僧云：“吾有弟子木叉葬寺之西，为日久矣，君能出之。”仍示其葬所。初梦都不介意，再梦如初

，中丞得梦中所示之处，欲施斫之，见有一姓占居，于是饶钱市焉。开穴可三尺许，乃获坐函，遂启之，于骨上有舍利放光。命焚之，收舍利八百余颗，表进上僖宗皇帝，敕以其焚之灰塑像，仍赐谥曰真相大师。于今侍立于左，若配飨焉。弟子慧俨，未详氏姓，生所恒随师僧伽，执侍瓶锡，从楚州发至淮阴，同劝东海裴司马，妻吝白金沙罗而堕水。抵盱眙，开罗汉井，宿贺跋玄济家。俨侍十一面观音菩萨旁。自尔诏僧伽上京师。中宗别敕度俨并慧岸、木叉三人，各别赐衣钵焉。

○唐嵩岳少林寺慧安传

释慧安，姓卫氏，荆州支江人也。其貌端雅，绀发青目，降神乃隋开皇初年也。安受性宽裕，不染俗尘，修学法门，无不该贯。文帝十七年，敕条括天下私度僧尼，勘安云，本无名姓，亡入山谷。大业中，开通济渠，追集夫丁，饥殍相望。安巡乞多钵食，救其病乏，存济者众。炀帝闻之，诏安，遂潜入太和山。至帝幸江都，海内扰攘，乃杖锡登衡岳寺，行头陀法。贞观中，至蕲州，礼忍大师。麟德元年游终南山，石壁而止。时所居原谷之间，早霜伤秬稼，安居处独无。四十里外皆苦青女之灾矣。天皇大帝闻而召焉，安不奉诏。永淳二年至滑台，草亭居止，中坐绳床，四方坦露。敕造寺以处之，号招提是也。如是却还家乡王泉寺，时神秀禅师新归寂，咸请住持。安弗从命。天后圣历二年四月，告门人学众曰：“各归闭户。”至三更，有神人至，扃卫森森，和铃鈇鈇，风雨偕至。其神旋绕其院数遭，安与之语，丁宁教诫，再拜而去。或问其故，曰：“吾为嵩山神受菩萨戒也。”天后尝问安甲子，对曰：“不记也。”曰：“何不记耶？”乃曰：“生死之身如循环乎？环无起尽，何用记为？而又此心流注，中盼无盼，见沤起灭者，亦妄想耳。从初识至动相灭时，亦只如此，何年月可记耶？”天后稽颡焉。闻安阙井，敕为凿焉。安曰：“此下有赤祥，慎其伤物。”将及泉，见虾璫金色，蠢然出沮洳间，合其悬记。帝倍加钦重。殆中宗神龙二年九月，敕令中官赐紫袈裟并绢，度弟子二七人。复诏安并静禅师入中禁受供施。三年，赐摩纳一副，便辞归少林寺。至景龙三年三月三日，囑门人曰：“吾死已，将尸向林间，待野火自焚之。勿违吾愿。”俄尔万回和尚来见，安猖狂执手，言论移刻，旁侍倾耳都不体会。至八日，闭户，偃身而寂。春秋一百三十许岁，起开皇二年，至景龙三年故也。火焚尸毕，收舍利八十粒，内五粒红紫色进内，余散施随力造塔。先天二年门人建浮图焉。

○唐虢州阆乡万回传

释万回，俗姓张氏，虢州阆乡人也。年尚弱龄，白痴不语，父母哀其浊气。为邻里儿童所侮，终无相竞之态。然口自呼“万回”因尔字焉。且不言寒暑，见贫贱不加其慢，富贵不足其恭，东西狂走，终日不息。或笑或哭，略无定容，口角恒滴涎沫，人皆异之。不好华侈，尤少言语，言必讖记，事过乃知。年始十岁，兄戍辽阳，一云安西，久无消息，母忧之甚，乃为设斋祈福。回俛白母曰：“兄安，极易知耳，奚用忧为？”因裹斋余，出门径去，际晚而归，执其兄书云：“平善。”问其所

由，默而无对，去来万里。后时兄归云：“此日与回言，适从家来，因授饼饵共啖而返。”举家惊喜。自尔人皆改观，声闻朝廷。中宗孝和皇帝诏见崇重。神龙二年，敕别度回一人而已。自高宗末，天后时常诏入内道场，赐锦绣衣裳，宫人供事。先为儿时，于阆乡兴国寺累瓦石为佛塔。入内之后，其塔遂放光明，因建大阁而覆之。然其施作，皆不可辄量，出言则必有其故。敕赐号为法云公，外人莫可得见。先是天后朝任酷吏行罗织事，官稍高隆者日别妻子。博陵崔玄炜位望俱极，其母卢氏贤而忧之曰：“汝可一日迎万回，此僧宝志之流，可以观其举止，知其祸福也。”乃召到家，母垂泣作礼，兼施中金匕箸一双。回忽下阶掷其匕箸向堂屋上，掉臂而去。一家谓为不祥。经数日，令升屋取之，匕箸下得书一卷，观之乃讖纬书也，遽令焚之。数日，有司忽来其家，大索图讖，不获得雪。时酷吏多令盗投蛊道物及伪造秘讖，用以诬人，还令诬告得实，屠戮藉没其家者多。崔氏非圣人掷匕箸，何由知其伪图讖也。中宗末，尝骂韦后为反悖逆，斫尔头去。寻而诛死。太平公主为造宅于怀远坊中，与主宅前后尔。又孝和亲送金城公主出降吐蕃，幸始平，回出迎驾。时崔日用、武平一、宋之问、沈？期、岑羲、魴稷皆肃揖，郑重问讯。诸公云：“各欲求圣人一言以定吉凶。”抚沈背曰：“汝真才子。”沈不胜其喜曰：“圣人与我受记，诸子不可更争。”又谓武曰：“与汝作名佛童，当无忧也。”目羲稷有不善之色，岑以马避之，目稷云：“此多是野狐，其言何足惧也？”乃顾曰：“汝亦不免。”及羲稷之诛，人益贵重。同时有僧伽，化迹不恒。中宗问回曰：“此何人也？”回曰：“观音之化身也。”贞观中，三藏奘师西归云：“天竺有石藏寺，奘入时见一空房，有胡床锡杖而已。因问此房大德，咸曰：‘此僧缘阙法事，罚在东方，国名震旦，地号阆乡，于兹万回矣。’”奘归求见，回便设礼问西域，宛如目瞩。奘将访其家，回谓母曰：“有客至，请备蔬食。”俄而奘至。神异之迹，多此类也。正谏大夫明崇俨者，道术之士，谓人曰：“万回神僧也。”玄宗潜龙时，与门人张炜等同谒。回见帝甚至褒黜，将漆杖呼且逐之，同往者皆被驱出。曳帝入，反扃其户，悉如常人，更无他，重抚背曰：“五十年天子自爱，已后即不知也。”张公等门外历历闻其言，故倾心翼戴焉。五十年后，盖指禄山之祸也。睿宗在邸时，或游行人间。回于聚落街衢中高声曰：“天子来。”或曰：“圣人来。”其处信宿间，帝必经过徘徊也。惠庄太子，乃睿宗第二子也，天后曾抱示回，曰：“此儿是西域大树精，养之宜兄弟也。”安乐公主，玄宗之季妹，附会韦后，热可炙手，道路惧焉。回望车骑，连唾之曰：“腥，腥，不可近也。”不旋踵而祸灭及之。帝愈知回非常人也，出二宫人日夕侍奉之，特敕于集贤院图形焉。暨回垂卒，而大呼遣求本乡河水，门人徒侣求觅无所。回曰：“堂前即是河水何不取耶？”众于阶下掘井，河水涌出，饮毕而终。回宅坊中井皆咸苦，唯此井甘美。后有假托，或称小万回，以惑市里，多至诛死焉。至于终后，右常侍徐彦伯为碑，立阆乡玉涧西路矣。

系曰：日行万里，非人必矣。为鬼神邪？为仙术邪？通曰：“观行知人，回无邪行，非鬼神也。无故作意，非仙术也。此得通耳。故《智度论》中此通有四：一身能飞行，如鸟无碍；二移远令近，不往而到；三彼没此出；四一念能至。”或曰：“

四中回具何等？”通曰：“俱有哉，故号如意通矣。《瑜伽论》神境同也。云或罗汉有大堪，能现三神变焉。”

○唐齐州灵岩寺道鉴传

释道鉴，姓冯氏，吴郡人。未知从来，而居历下灵岩山寺，踪迹神异，不测僧也。元和中，有冯生者，亦吴郡人也，以明经调选未捷，因侨寄长安。一日见老僧来，诣冯居，谓之曰：“汝吾姓也。”因相与往还，仅于岁余遂注拟作尉于东越。方务治装，鉴负锡来告去。冯问：“师去，安所诣乎？”鉴曰：“吾庐在齐州灵岩之西庑下，薄游神京，至今正十年矣。幸得与子游，今归旧所，故来相别。然吾子尉于越乡，道出灵岩寺下，当宜一访我也。”冯诺之曰：“谨受教矣。”数日，冯出关东之赴任，至灵岩寺门，立马望曰：“岂非鉴师所居寺乎？”即入访之。时一僧在庭，冯问“道鉴上人庐舍安在”？僧曰：“此寺无道鉴。”冯疑异，默而计曰：“鉴公纯直，岂欺我乎？”于是独游寺中，行至西庑下，忽见壁画一僧，与鉴师貌同。冯大惊嗟：“鉴师果异人欤？且能降神与我交。”久之，视其真相旁题云：“冯氏子，吴郡人也。年十岁学浮图法，以道行有闻，卒年七十八。冯阅其题，方悟云“汝吾姓也”，言非谬矣。一说苏州西去城二十许里，有灵岩山寺，西北庑下画沙门形，云是梁天监十五年作游方居士状，经过山寺，寓过宵宿，而于僧厨借笔砚，僧众皆不留意。诘旦，僧遍搜索而亡有客，见殿隅画一梵僧，面骨权奇，肤色皴黑，眉长且垂，眸子电转，皆盼青白，昂鼻方口，张唇露齿，擎拳倚右肩之上，身屈可长一丈五寸，衣粗纳袈裟，臂擐大珠，徒跣。众见惊慑，莫测其来。远近咸格，有焚香礼叹者，有请福攘灾者。或于晴夜，殿中析窾，闻有行道之声。由是鸟雀不敢污践檐楹之间矣。然则乡人谓之灵岩和尚，或云灵岩圣僧。尝见形谓一老姥曰：“贫道好食茱粽。”疑是圣者，翌日持簞入殿供养，迄今年别三月三日民竞送之，以蔣叶角黍米淪之，吴人谓之茱粽也。唐先天二年，陆鲁公疾，医工未验，公忧虑增剧。门遇一僧分卫，屈入，遂索水器含漱之，即时病间。鲁公喜，赠物颇丰，了不回视。遂问：“和尚居处何寺？”答曰：“贫道住苏州吴县西灵岩寺。郎君为官江表，望入寺相寻。”斯须已去。未久，调补尚书祠部郎，续迁桂州廉使。常念当年救病之僧，迂路姑苏，入灵岩寺觅焉。乃说其形貌，合寺僧云：“非此所有。”陆尽日徘徊不忍去，忽于殿中见圣者形，曰：“往年疗某者，此僧也。”寺僧说其由致，通感难知。陆舍钱数万，备香火之资，却留旬日，供养方去。又寺中净人每于像前占烛灯，添油助炷，意盗油涂发耳。居无何，其发焦卷而堕，傍人劝令礼忏，别买麻膏增炷，平复如初。又武宗将废佛教也，近寺有陆宣者，梦圣者云：“受弟子供施年深，今来相别，且归西天去也。”宣急命画工图写真貌。至会昌五年，毁拆寺宇，方知告别之意焉。距咸通七年蝗灾，尔时弥空亘野，食人絺縠，至于入人家食缯帛之物。百姓徬徨莫能为计。时民人吴延让等率耆艾数十百人诣像前焚香泣告，即日虫飞越境焉。乾符五年，寺众当诣阙乞钟归寺，差僧撰日登途。圣者先入右神策军本局，预陈嘱托。及正请钟僧到，见司吏，怪问：“数日前有僧来，云隶苏州灵岩山寺。”其僧曰：“某行无伴侣。”后右军胥因事游吴，见壁画云：

“此是七月中曾来司内计会钟僧也。”然吴中极彰灵异，且不测厥由。曾有梵僧来，礼画像云：“智积菩萨何缘在此？”叹嗟弥久，而自此号“智积应身”也。

系曰：同异之说，史氏多之，今详寺曰灵岩，僧画像，此为同也。州曰历下、姑苏，遇者曰陆与冯，此为异焉。斯盖见闻不齐，记录因别也。原夫圣人之应身也，或南或北，或汉或胡，或平常之形，或怪差之质，故令闻见必也有殊，复使传扬自然多说。譬犹千里之外，望日月以皆同，其时边旁云物状貌有异耳。既是不思议应现矣，则随缘赴感，肆是难同。可发例云：“所传闻异辞也。”

○唐武陵开元寺慧昭传

释慧昭，未详何许人。其为僧也，性僻而高，恒修禅定，貌颇衰羸，好言人之休戚，而皆必中。与人交言，且不驯狎。闭关自处，左右无侍童。每日乞食，里人有八十余者云：“昭居此六十余年，其容貌无异于少时昔日也。”但不知其甲子。元和中，有陈广者，由孝廉调为武陵官，而酷好浮图氏。一日因诣寺，尽访诸僧，昭见广，且悲且喜曰：“陈君何来之晚乎？”广愕然，自揣平生不识此僧，何言来晚？乃曰：“未尝与师游，何责迟暮？”昭曰：“此非仓卒可言，当为子一夕静话，方尽此意。”广甚惊异，后时诣昭宿，因请其事。昭曰：“我刘氏子，宋孝文帝之玄孙也。曾祖鄱阳王休业、祖士弘，并详于史氏。先人文学自负，为齐竟陵王子良所知。子良招集贤俊文学之士，而先人预焉。后仕齐梁之间，为会稽令。吾生于梁普通七年夏五月，年三十方仕于陈，至宣帝时为卑官，不为人知，徒与沈彦文为诗酒之交。后长沙王叔坚与始兴王叔陵皆多聚宾客，大为声势，各恃权宠，有不平心。吾与彦文俱在长沙之门下。及叔陵被诛，吾惧不免，因皆销声匿迹于林谷，拾橡栗而食，掬溪涧而饮。衣一短褐，虽寒暑不易，以待所忧之所定。无何，有一老沙门至吾所居曰：“子骨法甚奇，当无疾耳。”彦文再拜请其药，曰：‘子无刘君之寿，奈何？虽服吾药，亦无所补。’遂告别，将去，复谓我曰：‘尘俗以名利相胜，竟何有哉？唯释氏可以舍此矣。’恭纳其言，自是不知人事，凡十五年。又与彦文俱至建业，时陈氏已亡，宫阙尽毁。台城牢落，荆榛蔽路，景阳并塞，结绮基颓，文物衣冠，荡然而荆故老相遇，相携而泣，且曰：‘一人无良，已至于是，隋氏所灭，良可悲乎！’又闻后主及诸王皆入长安，乃率沈挈一囊乞食于路，以至关中。吾长沙王之故客也，恩遇甚厚，闻其迁往瓜州，则径往就谒。长沙王长于绮纨而早贵盛，虽流放之际，尚不事生业。时方与沈妃酣饮。吾与沈再拜于前，长沙悲恸，久之沥泣而起，乃谓吾曰：‘一日家国沦亡，骨肉播迁，岂非天乎？’吾自此且留晋昌，氏羌之塞。数年而长沙殂，又数年彦文亡，吾因剔{髟采}为僧，遁迹会稽山佛寺，凡二十年，时已百岁矣。虽容体枯瘠，而力不衰，尚日行百里。因与一僧同至长安，时唐高祖已有天下，建号武德。至六年，吾自此或居京洛，或游江左，至于三蜀五岭，无不住焉，殆今二百九十年矣。虽烈寒酷热，未尝有微恙。贞元末，于此寺梦一丈夫，衣冠甚盛，熟视乃长沙也。吾迎延坐，话旧伤感，如平生时。而谓吾曰：“后十年，我之六世孙广当官于此郡，师其念之。”乃问之曰：‘王今何为？’

’曰：‘冥官极尊。’既而又泣曰：‘师存而我之六世矣，悲夫！吾梦觉，因纪君之名于经笥中，至去岁凡十年，乃以君之名氏访于郡人，尚怪君之未至。昨因乞食里中，遇邑吏访之，果得焉。及君之来，又依然长沙之貌也。然自梦及今十一年矣！故讶君之晚也。’已而悲惋，泣下数行，因出经笥示之。广再拜，愿执屨锡为弟子。昭曰：“君且去，翌日当再来。”广受教而还，明日至其居，昭已遁去，莫知其适。时元和十一年也。至大和初，广为巴州掾，于山南道路逢昭，惊喜再拜曰：“愿弃官，请从师为物外之游。”昭亦许之，其夕偕舍于逆旅。至大将曙，广早起而省昭已去矣。广茫然若有所丧，神情沮败，自是尽不知所往也。然则昭自梁普通七年生，于时岁在丙午，下至唐元和十年乙未，凡二百九十年，则与昭言如合符契焉。

系曰：慧昭既三百年住世也，前不可测，后未可涯，与夫宾头罗罍尊者一贯，胡不念恩地之裔孙邪？通曰：“神仙隔一尘，犹未可与之游。且广是具缚凡夫，昭为度世上士，飞鸢与渊鱼，踪迹相远，此何怪欤？”

○唐岸禅师传

释岸禅师，并州人也，约净土为真归之地。行方等忏，服勤无缺。微有疾，作禅观不亏，见观音、势至二菩萨现于空中，持久不灭。岸召境内画人，无能画者，忽有二人云从西京来，欲往五台，自乐输工。画菩萨形相续事毕，赠鞋二襪，忽隐无踪。岸知西方缘熟，告诸弟子云：“吾今往生，谁可偕行？”有小童子稽颡曰：“愿随师去。”乃令往辞父母，父母谓为戏言，而令沐浴，著净衣，入道场念佛，须臾而终。岸责曰：“何得前行？”时岸索笔赞二菩萨曰：“观音助远接，势至辅遥迎，宝瓶冠上显，化佛顶前明。俱游十方刹，持华候九生。愿以慈悲手，提奖共西行。”述赞已，别诸弟子入道场，命门徒助吾念佛，端坐而终，春秋八十。时垂拱元年正月七日也。

○唐会稽永欣寺后僧会传

释后僧会者，本康居国人也，以吴赤乌年中谒大帝。初吴人未识僧形，止曰胡人入境。乃祈舍利已，令帝开悟。末主天纪四年，会尸解真身隐焉。至唐高宗永徽中见形于越，称是游方僧，而神气瑰异，眉高隆准，颐峭眸碧，而瘦露奇骨，真梵容也。见者悚然，罔知阶位。时寺纲飭诘其厥由，骂而驱逐。会行及门，乃语之曰：“吾康僧会也，苟能留吾真体，福尔伽蓝。”步之间，立而息绝。既而青目微瞑，精爽不销，举手如迎揖焉，足跨似欲行焉。众议偃其灵躯，？于窀穸，人力殫矣，略不倾移。虽色身坚牢，而强事胶漆，迁于胜地，别立崇堂。时越人竞以香华、灯明、繒彩、幡盖、果实、衣器，请祈心愿，多谐人意。初越之军旅，多寓永欣，其妇女生产，兵士羣血，触污僧蓝，人不堪其淹秽。会乃化形往谒闽廉使李若初，且曰：“君侯即领越之藩条，托为迁之军旅。”语罢，拂衣而去，寻失踪迹。李公喜而

骇，且记其言，后果赴是郡。及上事讫，便谒灵迹，认于时言者，则斯僧也。命撤军家，勒就营幕。又正妇夜临蓐席，且无脂烛，邻无隙光。俄有一僧秉烛自牖而入。其夫旦入永欣，认会貌，即是授火救产厄之僧。自尔民间多就求男女焉。属会昌毁永欣也，唯今大善独留，号开元矣，遂移会身入是寺中。大中之后，有昙休律师为会别创堂宇，广其供具。又尝就闾阎家求草屨，至今越人多以芒鞋油幡上献，感应筭蚤，各赴人家，不可周述。今号超化大师。从永徽至今，未尝阙其供施焉。沙门虚受为碑纪述焉。

系曰：蔡邕是张衡后身，智威本徐陵前事，验皆昭？，理且弗虚。至于圣人功用自在，此亡彼出，利见无方。僧会捐世既遐，唐来化越，立迹屹然，异中之异。苟非应物现形，如水中月，孰能预于是乎？

○唐京兆法海寺道英传

释道英，不知何许人也。戒德克全，名振天邑，住寺在布政坊。咸亨中见鬼物，寺主慧简尝曰：“晓见二人行不践地，入英院焉。”简怪而问之，英曰：“向者秦庄襄王使使传语‘饥虚甚久，以师大慈，欲望排食并从者三百人，勿辞劳也’。吾以报云‘后日晓具饌，可来专相候耳。’”简闻之，言以酒助之。及期果来，侍从甚严，坐食仓黄，谓英曰：“弟子不食八十年矣。”英问其故，答曰：“吾生来不无故误，其如灭东周，绝姬祀。或责以功德，吾平日未有佛法可以忤度，唯以赦宥矜恤？独塞之，终为未补。以福少罪多，受对未毕。今此一踰，更四十年方复得食。”因历指座上云：“此是白起、王翦，为杀害多，罪报未终。”又云：“此陈轸，以虚诈故。”英曰：“王何不从人索食而甘虚腹，此奚可忍乎？”王曰：“慈心人少，余人不相见。吾缘贵人，不可妄行崇祸，所以然也。”英指酒曰：“寺主简公将献。”深有所愧。垂去谓英曰：“甚感此行伤费饘饩，可知弟子有少物即送相偿。城东通化门外尖冢，以其锐上而高大，是吾栖神之所。世人不知，妄云吕不韦墓耳。”英曰：“往遭赤眉开发，何有物来？”曰：“贼取不得。”英曰：“贫道非发丘中郎，是出家人，无用物所，必勿将来。”言讫，长揖而去。英感下趣如此，罔知终毕。

○唐京兆法秀传

释法秀者，未详何许人也。居于京寺，游于咸镐之间，以劝率众缘，多成善务，至老未尝休懈。开元末，梦人云：“将手巾袈裟各五百条，可于回向寺中布施。”觉后问左右，并云无回向寺。及募人制造巾衣，又遍询老旧僧俗，莫有此伽蓝否。时有一僧，形质魁梧，人都不识，报云：“我知回向寺处。”问要何所须并人伴等，答曰：“但赍所施物，名香一斤，即可矣。”遂依言授物，与秀偕行。其僧径入终南山，约行二日，至极深峻，初无所睹。复进程，见碾石一具，惊曰：“此人迹不到，何有此物？”乃于其上焚所赍香，再三致礼哀诉，从午至夕。谷中雾气弥漫，

咫尺不辨，逡巡开霁，当半崖间有朱门粉壁，绿牖璇题。刹飞夭矫之幡，楼直觚棱之影。少选，见一寺，分明云际，三门而悬巨榜曰回向寺。秀与僧喜甚，攀陟遂到，时已黄昏，而闻钟磬唱萨之声。门者诘其所从，迟回引入，见一老僧，慰问再三，倡言曰：“唐皇帝万福否？”处分令别僧相随，历房散手巾袈裟，唯余一分。指一房空榻无人，有衣服坐席，似有所适者。既而却见老僧，若纲任之首曰：“其往外者当已来矣。”其僧与秀复欲至彼授手巾等一房，但空榻者，亦无人也。又具言之，老僧笑令坐，顾彼房内，取尺八来至，乃玉尺八也。老僧曰：“汝见彼胡僧否？”曰：“见已。”曰：“此是将来权代汝主者。京师当乱，人死无数。此胡名磨灭王。其一室是汝主房也。汝主在寺，以爱吹尺八，罚在人间，此常所吹者也。今限将满，即却来矣。”明日遣就斋，斋讫曰：“汝当回，可将此尺八并袈裟、手巾，与汝主自收也。”秀礼拜而还，童子送出，才数十步，云务四合，则不复见寺矣。乃持手巾、袈裟、玉尺八进上，玄宗召见，具述本末。帝大感悦，凝神久之，取笛吹之，宛是先所御者。后数年，果有禄山之祸，秀所见胡僧，即禄山也。秀感其所遇，精进倍切，不知所终。世传终南山圣寺又有回向也。

系曰：昔梁武遣送袈裟入海上山，法秀诣回向寺，燕师命使寻竹林圣寺，此三缘者名殊而事一，莫是互相改作，同截鹤续鳧否？通曰：“圣人之作，犹门内造车，门外合辙，虽千万里之远，事亦符合者。盖无异路，故如樵子观仙棋，烂柯非止王质。有多人遇棋，且姓名不同，为烂斧柯者不一。今送衣入圣寺多者，亦如此也。”

○唐滑州龙兴寺普明传

释普明，不知何许人也，或云西域之僧。每谈禅法，举擢玄微，莫可测其沈寥之高远欤！大历初年，受胙县人请居阿兰若，学者蚁聚。尘中往来，白衣礼而施之，日以千计。或一睹相，自然惩忿窒欲，食甚怀音，沿善革恶，以岁计无央数也。右仆射义成军节度使贾耽者，本谪仙也，优游道学，率略空门。才覲明也，若羊祜之识旧环，蔡顺之见慈母焉。降心延请住州寺，迎引倾郭，巷无居人。由是为人说法，虽老不疲。行疾如风，质貌轻壮。以贞元八年壬申闰十二月十日，囑付门徒，奄然坐灭。生年或云三百岁，以其年百岁者见之，容颜不易之故。依天竺法火化，收舍利二七粒，坚固圆明。群信于明所居禅庭。立塔一所，后迁座于塔下焉。明亡之后十年，王师西征，安静边塞，滑人有材勇者柴清，因覩猓狁，深入虏庭。巡逻者多，乃昼伏夜动，迷方失路，迂直不分。清见明在前导，若老马之先驱焉。及抵汉城，忽然不见。归州就塔作礼，遐迩传之。

卷十九

◎感通篇第六之二（正传二十一人附见八人）○唐嵩岳破灶堕传

释破灶堕者，不知何许人也。天后之世，参事嵩岳安禅师，号老安是欤？通彻禅法，逍遥弗羁，恒理求而不见其前，别涂取而莫趋其后。尝遇巫氏能与人醮灶祓禳，若汉武之世李少君，以祠灶可以致物同也。凡其解奏之时，往往见鬼物形兆，闾里迭畏，传于众多，杀少牢以祭之者交午。重其主灶，乃幡盖拥之，秘而罕睹焉，杨子所谓灵场之威宜夜矣乎？时堕诣之，始劝巫者，终为神说法已，告云：“我闻师教，决定生天。”乃现其形，礼辞且曰：“蒙师提耳，获益弥深，得生殊胜天。”言讫而隐，其灶即神祠也，随而瓦解，自然破落，非人力也。遐迩惊骇，此师素不称名，由此全取他名，号破灶堕也。

○唐嵩岳闲居寺元皂传

释元皂，姓李氏，伊阙人也。禀气英奇，宽裕闲雅。既缘宿习，乃誓出家，于永淳二年遂登满足，乃隶名闲居寺。以习毗尼，虽勤无懈，执律唯坚。后悟少林寺禅宗，大通心要，深入玄微，遂卜庐于岳中庞坞。谓其徒仁素曰：“吾始居寺东岭。吾灭，汝必塔吾骸于此。”皂安于岩阿。时有峨冠裤褶，部曲繁多，轻步舒徐，称谒大师。皂睹其貌伟，精爽不伦，谓之曰：“善来仁者，胡谓而至？”曰：“师宁识我邪？”皂曰：“吾观佛与众生等，吾一目之，岂分别识也？”对曰：“我此岳神也。吾能利害生死于人，师安得一目我哉？”皂曰：“汝能生死于人，吾本不生，汝焉能死？吾视身与空等，视吾与汝等，汝能坏空与汝乎？苟能坏空及坏汝，吾则不生不灭也。汝尚不能如是，又焉能生死吾邪？”岳神稽首再拜曰：“我亦聪明正直于余神，岂能知师有广大之智辩乎？愿授之正戒，令我度世，助其威福。”皂曰：“神既乞戒，即既戒也。所以者何？戒外无戒，又何戒哉？”神曰：“此理也我闻茫昧，止求师戒我身为门弟子。”皂辞不获，即为张座，焚香秉炉正机曰：“付汝五戒，汝能奉持，即向曰能。不能，即曰否。”神曰：“洗耳倾听，虚心纳教。”皂曰：“汝能不淫乎？”神曰：“亦娶也。”曰：“非谓此也，谓无罗欲也。”神曰：“能。”曰：“汝能不盗乎？”神曰：“何乏我也，焉有盗取哉？”曰：“非谓此也，谓飧而福淫，不供而祸善也。”神曰：“能。”曰：“汝能不杀乎？”神曰：“政柄在躬，焉曰不杀？”曰：“非谓此也，谓有滥误混疑也。”神曰：“能。”曰：“汝能不妄乎？”神曰：“我本正直，焉能有妄？”曰：“非谓此也，谓先后不合天心也。”神曰：“能。”曰：“汝能不遭酒败乎？”神曰：“力能。”皂曰：“如上是为佛戒也。”又言：“以有心奉持而无心拘执；以有心为物而无心想身。能如是，则先天地生不为精，后天地死不为老，终日变化而不为动，毕尽寂默而不为休。悟此，则虽娶非妻也，虽飧非取也，虽柄非权也，虽作非故也，虽醉非降也。若能无心于万物，则罗欲不为淫，福淫祸善不为盗，滥误混疑不为杀，先后违天不为妄，降荒颠倒不为醉，是谓无心也。无心则无戒，无戒则无心，无佛

无众生，无汝及无我，无我无汝，孰能戒哉？”神曰：“我神通亚佛。”皂曰：“汝神通十句，五能五不能。佛则十句，七能三不能。”神悚然避席，启跪颇恭曰：“可得闻乎？”曰：“汝能仁戾上帝，东天行而西七曜乎？”曰：“不能。”又曰：“汝能夺地癸融五岳而结四海乎？”曰：“不能。”皂曰：“是为五不能也。”又曰：“佛能空一切相，成万法智，而不能即灭定业。佛能知群有性，穷亿劫事，而不能化导无缘。佛能度无量有情，而不能尽众生界。是为三不能也。定业亦不牢久，无缘亦谓一期，众生界本无增减。亘无一人，能主有法。有法无主，是谓无法。无法无主，是谓无心。如我解佛亦无神通也，但能以无心通达一切法耳。作用冥现有情前也。若有心有作，作用必不普周焉。”岳神曰：“我诚浅昧，未闻空义，愿师授我戒，我当奉行，更何业因可拘尘界？我愿报慈德，效我所能。”皂曰：“吾观身无物，观无常法窟，块然更有何欲？”神曰：“师必命我为世间事，展我少小神功，使已发心、初发心、未发心、不信心、必信心五等人目我神踪，知有佛有神，有能有不能，有自然有非自然者。”皂曰：“无为是，无为是。”神曰：“佛亦使神护法，师宁隳叛佛邪？随意垂诲。”皂不得已而言曰：“东岩，寺之障也，莽然无树。北岫有之，而背非屏拥。汝能移北树于东岭乎？”神曰：“已闻命矣。”又陈曰：“我必昏夜风雷摆摇震运，愿师无骇。”即郑重作礼辞去。皂门送而且观之，见仪卫逶迤如王者之行仗。又复碧靄红霞，紫岚皓气，间错四散，幢盖环佩，戈戟森森，凌高浸空，杳渺隐没焉。其夕果有暴风吼雷，奔云霆雷隆栋壮宇岌岌将圯，定僧瞻动，宿鸟声狂，互相敲磕，物不安所。乃谓众僧曰：“无怖，无怖，神与我契矣。”诘旦和霁，则北岩松栝尽移东岭，森然行植焉。而皂谓其徒曰：“吾歿后无令外知，若为口实，人将妖我也。”以开元四年丙辰岁，嘱累门人，若委蜕焉。春秋七十三。遂营塔于岳之东岭，影堂存于本院。后十二年告成，县尉许筹追皂之德为记焉。

○唐庐江颺山天柱寺惠符传

释惠符，姓戚氏，越州诸暨人也。登其弱冠，勇气过人，角力驰逐，无能及者。然其任侠，且厌在家，忽投香严寺，矫迹柔心，淳淑顿变。纳法之后，练行孤标。每夜沿山据草座，安禅不动。复研寻经论，见潜县之霍山，昔汉武尝徙南岳之祭于此，极成胜境。其中天柱寺可以栖神，乃结庵居焉。无几，有巨蛇张口，毒火焱焱。符徐语之曰：“汝寻宿债，吾可噬也。不然，洗身定意，如运业通，来为受戒。”斯须，弭按蜿蜒而去，果化成人形，来求出家。符为之落发，披衣受讫，礼辞而退。后被告符私度，具以实对辩。符云：“若私度有愆，甘听其罪。”官吏知非常而纵之。符凡见疮疖脓流，皆咒之则差。至开元十八年，无疾而终。乃从火葬，见骨节相连之状焉。

○唐长安西明寺惠安传

释惠安，未详何许人也。神龙中游于京兆，抑多先见。时唐休规既立边功，贵盛无

比。安往造焉，曰：“相公，甚美必有甚恶。将有大祸，且不远数月，然可攘去。”休规素知安能厌胜，诺而拜之。安曰：“更无他术，但奉一计耳。岂非注拟官品，出乎陶冶中？请选一有才干者用为曹州。”因得张君，本京官，即日升之宫赞，相次作守定陶，委之求二犬，可高数尺而神俊者。张君到任，锐意精求，得二犬如其所求以献之。休规大悦，召安视之，曰：“极善。”后旬余，安却来曰：“事在今夕，愿相君严为警备。”遂留安宿。是夜休规坐于堂之前轩，命左右十数辈执弧操矢，立于榻之隅。休规与安共处一榻，至夜分。安笑之曰：“相君之祸免矣。可以就寝。”休规喜而谢之，遂撤左右俱寝。迨晓，安呼休规可起矣。问安曰：“二犬何所用乎？”遂寻其迹，至园中，见一人仆地而卒。视其颈有血焉，盖为物所啖者。又见二犬在大木下，仰视之，一人袒而匿身。休规惊且诘之，其人泣而指死者曰：“某与彼俱贼也，昨夕偕来，欲害相国，盖遇此二犬环而且吠。彼为所噬，既殒。某藏匿无地，天网所罗，为犬蹲守，今甘万死。”且命缚之，曰：“此罪固当死，然非某心也，乃受制于人耳。”乃释之，贼拜泣而去。休规拜谢安曰：“非吾师，不然死于二夫之手矣。”安曰：“此相国之福，岂所能为哉？”又休规表弟卢軫在荆门，有术士告之曰：“君将有灾，当求善禳厌者，或能免矣。”軫知安奇术清行，为时所重，致书于休规。安即与一书曰：“事在其中耳。”及书达江陵而軫已卒，其家开其书，徒一幅空纸焉，殊无一字。休规益重之。后数年遁去，罔知所之。

○唐西域安静传（徐果师）

释安静，本西域人也。开元十五年振锡东游，至定陶，直问“丁居士何在？”乡人报之曰：“终已三载，葬在郊外。”且曰：“是人也乃在家菩萨，专勤梵行，尝礼事嵩山普寂禅师，云已得甚深法。将终，合掌加趺而坐，俨然而绝。曹城诸寺院钟磬不击自鸣也。”静至坟所，躬自发之，时五色云气腾喷而上，遂取其骨，皆金色连环共锁，可五丈许，铿然响亮，擐杖头而行。别树塔重葬，众咸惊叹。少顷，静瞥然灭没焉。

系曰：有情遗骸，引因残果也。凡夫身中节不相至，十地菩萨骨节解盘龙相结。佛则全身舍利焉。今丁居士骨有钩锁形，则超凡夫，未阶十住，此乃八臂那罗延身骨节头相钩是欤？证居士力量及此矣。譬若出金之砂之谓浑，不可谓为砂也。含玉之石之谓璞，不可谓为石也矣。

次又成都府大云寺有徐果师者，混物韬光，人罕详测。或入三昧，不失律仪。或示狂痴，语事多中。先为卫光嵩是难测之士，坤维间往往有人谓之徐果师。徐，姓也；果，名也；师，通称也。此亦强练志公之伦类矣，不知其终云。

○唐福州钟山如一传

释如一，不知何许人也。开元末为僧，典床座。俄有僧遍身疮疥，衣服褴褛，巡绕寺中。僧众睹之，无不厌恶。唯一见而悯焉，延入常住别堂，安置度夏。夏末辞去，一问：“去何所？”答曰：“归庵中。”又问：“庵在何也？”“只在大乘寺东。”一曰：“某日前方自彼来，勿见庵处。”曰：“不信，但来相访。”“某两日后专来。”一遂往，果见前僧在岩口相猴，因携手入一精舍，楼阁森耸，殿堂交错，且非人间景物。三日遣一公下山，回首见悉是岩石，方知圣寺耳。一由是倍力修进，愿预圣流云。

○唐西域亡名传

释天竺亡名，未详何印度人也。其貌恶陋，缠乾陀色缦条衣，穿革屣，曳铁锡，化行于京辇。当韦南康皋之生也，才三日，其家召僧斋，此僧不速自来。其日僧必历寺连名请至，韦氏家僮患其长一人，甚怒之，以弊席坐于庭中。既而斋毕，韦氏令乳母负婴儿出，意请众僧祝愿焉。梵僧先从座起，摄衣升阶，视之曰：“别久无恙乎？”婴儿若有喜色相认之意。众皆异之。韦君曰：“此子才生三日，吾师何言别久也？”梵僧曰：“此非檀越所知也。”韦君固问之，梵僧曰：“此子乃诸葛亮之后身耳。武侯鼎国时为蜀丞相，君所知也。缘蜀人受其赐且久，今降生于世，将为蜀帅，必福坤维之人。吾往在剑门，与此子为善友，既知其生于君门，吾不远而来。此子作剑南节度二十年，官极贵，中书令、太尉。此外非我所知也。”父然之，因以武子为字，又单字武也。张镒出为凤翔陇州节度，奏皋权知陇州。及镒为李楚琳所杀，牛云光请皋为帅。朱？不得已用皋为凤翔帅。德宗置奉义军节以旌之，续加礼部尚书。兴元中，驾还京，征为左金吾卫将军。贞元元年，为成都尹，代张延赏。到任和南蛮并战功，封南康郡王。顺宗即位，进太尉。南康在任二十一年，末涂甚崇释氏，恒持数珠诵佛名。所养鸚鵡，教令念经。及死，焚之，有舍利焉。皋又归心南宗禅道，学心法于净众寺神会禅师。在蜀，富贵僭差，重赋敛，时议非之，然合梵僧悬记焉。

○唐京兆抱玉传

释抱玉者，行业高奇，人事罕接。每言来事，如目击焉。见释子大光而诲之曰：“汝诵经宜高揭法音，彻诸天倾听，必得神人辅翼。”后皆符其记？。京邑归信千计。每夕独处一室，阖扉撤烛。尝有僧于门隙间窥其所以，见玉口中出庆云，华彩可爱。后年可九十许而终。终时方大暑，而尸无萎败。宰臣第五琦与玉相善，及终，临丧颇哀。琦以香乳灌其口，随有祥光自口而出，晃然四照。琦愈奇之。琦乾元二年十月贬忠州刺史。宝应初入为太子宾客，至京尹，玉皆预言荣贵车感相半，皆如其言，刻意归信焉。

○唐虢州阆乡阿足师传

释阿足师者，莫详出处。形质痴浊，精神瞢然，时有所言，靡不先觉。虽居无定所，多寓阆乡。以其踵法云公之尘躅，憧憧往来，争路礼谒，檀施山积，曾无顾瞻。人有隐忧，身婴所苦，获其指南者，其验神速。时陕州有富家翁张臻者，产业且多，财货增溢。少子息，臻恒惧钱帛身后无嗣。后产男，既愚且蠢，手足拳挛，语言謇涩，唯嗜饮食，殆与平人有异，口如溪壑，终日无厌。年可十七，父母钟爱，纵其须索，迎医求药，不远千里。数十年后家业罄穷，或有谓其臻曰：“阿足师其实宝志之流，何不敷布腹心，求救其疾？”乃夫妻来抵阆乡，

叩头？泪，告其拯拔。阿足瞑目久之，谓臻曰：“汝冤未散，尚须数年，悯汝勤拳，为汝除去。”即令撰日于河上致斋，广召众多，同观度脱。仍领引其男赴于道常时众知阿足奇异，观者如堵。少选，指呼壮夫三数辈叱曳其子，令投诸河，随急流而逝。臻且哀且惊，莫测其由。阿足语臻曰：“为汝除灾讫。”良久，其子忽于流数十步外耸身水面，戟手骂其父母曰：“与尔冤仇宿世缘业，赖逢圣者遽此解纷。傥或不然，未期毕日。”挺身高呼，辞理分明，都无痴浊之状。须臾沉水，不知其他。阿足由兹传播，归信之人如就市焉。所行化导皆此类矣，盖大历、建中中也。殆德宗贞元十二年丙子，

敕谥为大圆禅师至今陕虢之间，犹崇重焉。○唐天台山封干师传（木沔贡师寒山子拾得）

释封干师者，本居天台山国清寺也。剪发齐眉，布裘拥质，身量可七尺余。人或借问，止对曰“随时”二字而已，更无他语。乐独春谷，役同城旦，应副斋炊。尝乘虎直入松门，众僧惊惧，口唱《唱道歌》。时众方皆崇重，及终后，于先天年中在京兆行化，非恒人之常调，士庶见之，无不倾礼。以其蹶万回师之后，微亦相类，风狂之相过之，言则多中。先是国清寺僧厨中有二苦行曰寒山子，曰拾得，多于僧厨执爨，爨讫，二人晤语，潜听者多不体解。亦甚颠狂，纠合相亲，盖同类相求耳。时间丘胤（名化太祖庙讳生字代之）出收丹丘，将议巾车，苦头疼羌甚，医工寡效。邂逅干造，云：“某自天台来谒使君。”且告之患。干曰：“君何虑乎？”便索净器，吮水喷之，斯须觉体中颇佳。闾丘异之，乃请干一言定此行之吉凶。曰：“到任记谒文殊。”闾丘曰：“此菩萨何在？”曰：“国清寺厨执爨洗器者是。”及入山寺，问曰：“此寺曾有封干禅师？”曰：“有。”“院在何所？寒山、拾得复是何人？”时僧道翹对曰：“封干旧院即经藏后，今阒无人，止有虎豹时来此哮吼耳。寒拾二人见在僧厨执砾。”闾丘入干房，唯见虎迹纵横。又问：“干在此有何行业？”曰：“唯事春谷，供僧粥食，夜则唱歌讽诵不辍”如是再三叹嗟。乃入厨。见二人烧柴木，有围炉之状。闾丘拜之，二人连声咄吒，后执闾丘手褰之若婴孺，呵呵不已。行曰：“封干饶舌。”自此二人相携手出松门，更不复入寺焉。干又尝入五台巡礼，逢一老翁，问曰：“莫是文殊否？”翁曰：“岂可有二文殊？”干礼之未起，恍然失之。

次有木沔贡师者，多游京邑市廛间，亦类封干，人莫轻测。封丰二字，出没不同。韦述吏官作封疆之封，闾丘序三贤作丰稔之丰，未知孰是。

寒山子者，世谓为贫子风狂之士，弗可怕度推之。隐天台始丰县西七十里，号为寒暗二岩，每于寒岩幽窟中居之，以为定止。时来国清寺。有拾得者，寺僧令知食堂，恒时收拾众僧残食菜滓，断巨竹为筒，投藏于内。若寒山子来，即负而去。或廊下徐行，或时叫噪凌人，或望空曼骂。寺僧不而可，以杖逼逐，翻身抚掌，呵呵徐退。然其布襦零落，面貌枯瘁，以桦皮为冠，曳大木屐。或发辞气，宛有所归，归于佛理。初闾丘入寺，访问寒山，沙门道翘对曰：“此人狂病，本居寒岩间，好吟词偈，言语不常，或成或否，终不可知。与寺行者拾得以为交友，相聚言说，不可详悉。”寺僧见太守拜之，惊曰：“大官何礼风狂夫耶？”二人连臂笑傲出寺，闾丘复往寒岩谒问，并送衣裳药物，而高声倡言曰：“贼我贼。”退便身缩入岩石穴缝中，复曰：“报汝诸人，各各努力。”其石穴缝泯然而合，杳无踪迹。乃令僧道翘寻其遗物，唯于林间缀叶书词颂并村墅人家屋壁所抄录，得三百余首，今编成一集，人多讽诵。后曹山寂禅师注解，谓之《对寒山子诗》，以其本无氏族，越民唯呼为寒山子。至有“庭际何所有，白云抱幽石”句，历然雅体。今岩下有石，亭亭而立，号幽石焉。

拾得者，封干禅师先是偶山行至赤城道侧，仍闻儿啼，遂寻之。见一子可数岁已来，初谓牧牛之竖。委问端倪，云无舍，孤弃于此。封干携至国清寺，付与典座僧。或人来认，必可还之。后沙门灵熠摄受之，令知食堂香灯。忽于一日，见其登座，与像对？而跏。复呼桥陈如曰“小果声闻”。傍若无人，执箸大笑，僧乃驱之。灵熠咨尊宿等，罢其堂任，且令厨内涤器，洗濯才毕，澄滤食滓，以筒盛之。寒山来，必负而去。又护伽蓝神庙，每日僧厨下食，为乌鸟所取狼籍。拾得以杖扑土偶三二下，骂曰：“汝食不能护，安护伽蓝乎？”是夕神附梦与阖寺僧曰：“拾得打我。”明日诸僧说梦符同，一寺纷然，始知非常人也。时牒申州县，郡符下云：“贤士隐遁，菩萨应身，宜用旌之。”号拾得为贤士。又于寺庄牧牛，歌咏呼天。当其寺僧布萨时，拾得驱牛至僧集堂前，倚门抚掌大笑曰：“悠悠者聚头。”时持律首座咄曰：“风人，何以喧碍说戒？”拾得曰：“我不放牛也，此群牛者多是此寺知僧事人也。拾得各呼亡僧法号，牛各应声而过，举众错愕，咸思改往修来，感菩萨垂迹度脱。时道翘纂录寒山文句于寺土地神庙壁，见拾得偈词，附《寒山集》中。

系曰：按封干先天中游遨京室，知闾丘、寒山、拾得俱睿宗朝人也。奈何宣师《高僧传》中。闾丘，武臣也，是唐初人。闾丘《序》记三人，不言年代，使人闷焉。复赐绯，乃文资也。夫如是，乃有二同姓名闾丘也。又大洸祐公于宪宗朝遇寒山子，指其泐潭，仍逢拾得于国清，知三人是唐季叶时犹存。夫封干也，天台没而京兆出；寒拾也，先天在而元和逢。为年寿弥长耶？为隐显不恒耶？《易象》有之，“小狐汔济”，其此之谓乎！

○唐成都净众寺无相传（智诜禅师）

释无相，本新罗国人也，是彼土王第三子，于本国正朔年月生，于郡南寺落发登戒。以开元十六年泛东溟至于中国，到京。玄宗召见，隶于禅定寺。后入蜀资中，谒智诜禅师。有处寂者，异人也，则天曾召入宫赐磨纳九条衣，事必悬知，且无差跌。相未至之前，寂曰：“外来之宾，明当见矣。汝曹宜洒扫以待。”间一日果至，寂公与号曰无相。中夜授与摩纳衣，如是入深溪谷岩下坐禅，有黑犍二，交角盘礴于座下，近身甚急，毛手入其袖，其冷如冰，扪摸至腹，相殊不倾动。每入定，多是五日为度。忽雪深，有二猛兽来，相自洗拭，裸卧其前，愿以身施其食。二兽从头至足，嗅匝而去。往往夜间坐床下，捫虎须毛。既而山居稍久，衣破发长，猎者疑是异兽，将射之，复止。后来入城市，昼在冢间，夜坐树下。真行杜多之行也。人渐见重，为构精舍于乱墓前。长史章仇兼琼来礼谒之。属明皇违难入蜀，迎相入内殿。供礼之时，成都县令杨翌疑其妖惑，乃帖追至，命徒二十余人曳之。徒近相身，一皆战栗，心神俱失。顷之大风卒起，沙石飞飏，直入厅事，飘帘卷幕。杨翌叩头拜伏，喘而不敢语。忤毕风止，奉送旧所。由是遂劝檀越造净众、大慈、菩提、宁国等寺，外邑兰若钟塔，不可悉数。先居净众本院，后号松溪是坎。相至成都也，忽有一力士称舍力伐柴，供僧厨用。相之弟本国新为王矣，惧其却回，其位危殆，将遣刺客来屠之，相已冥知矣。忽日供柴贤者来，谓之曰：“今夜有客。”曰：“灼然，”又曰：“莫伤佛子。”至夜，薪者持刀挟席坐禅座之侧，逡巡觉壁上似有物下，遂跃起，以刀一挥，巨胡身首兮于地矣。后门素有巨坑，乃曳去瘞之，复以土拌灭其迹而去。质明，相令召伐柴者谢之，已不见矣。尝指其浮图前柏曰：“此树与塔齐，寺当毁矣。”至会昌废毁，树正与塔等。又言寺前二小池，左羹右饭，斋施时少，则令淘浚之，果来供设。其神异多此类也。以至德元年建午月十九日无疾示灭，春秋七十七。临终，或问之曰：“何人可继住持乎？”乃索笔书百数字，皆隐不可知，谐而叶韵。记？八九十年，事验无差失。先是武宗废教，成都止留大慈一寺，净众例从除毁。其寺巨钟乃移入大慈矣。洎乎宣宗中兴释氏，其钟却还净众，以其钟大隔江，计功两日方到。明日方欲为斋，辰去迎取，巳时已至，推挽之势直若飞焉。咸怪神速，非人力之所致也。原其相之舍利分塑真形，尔日面皆流汗，上足李僧以巾旋拭，有染指者，其汗颇咸，乃知相之神力自曳钟也。变异如此，一何伟哉！后号东海大师塔焉。乾元三年，资州刺史韩禪撰碑，至开成中李商隐作《梓州四证堂碑》，推相为一证也。

○唐扬州西灵塔寺怀信传

释怀信者，居处广陵，别无奇迹。会昌三年癸亥岁，武宗为赵归真排毁释门，将欲堙灭教法。有淮南词客刘隐之薄游四明，旅泊之霄，梦中如泛海焉。回顾见塔一所，东度见是淮南西灵寺塔。其塔峻峙，制度校胡太后永宁塔少兮耳。其塔第三层，见信凭栏与隐之交谈，且曰：“送塔过东海，旬日而还。”数日，隐之归扬州，即往谒信。信曰：“记得海上相见时否？”隐之了然省悟。后数日，天火焚塔俱尽，

白雨倾澍，傍有草堂，一无所损。由是观之，东海人见永宁塔不谬矣。

系曰：塔焚皆云往东海，海岂纳煨烬耶？通曰：“五行为物亦七大性，可弗周遍法界乎？顺则相生，逆则相害。虽逆顺各时，与法界同其分齐，证知唯有识耳。且天仙鬼物与人相反，殊胜诸天则定果宫殿，神仙则附物变化，鬼神则歆其食气，质碍之流，火化则得受用也。凡塔刹严丽，多被鬼神取施。海若川侯，亦非人也，如陈重云殿天火焚，东海人时见殿影焉。又近马氏霸湖南，末年天册阁为天火焚，朗州守此夜闻空中呵喝言‘回避，天册阁来也’。云中腾沸，若千万人升荷重物然，累日，方潭州火矣。若怀信见刘隐之梦，信亦不可测之僧也。”

○唐陕府辛七师传

释辛七师者，不显出家之号，时姓氏行次呼之，既熟人耳，更无别召体焉，实陕人也。始为儿时，甚闻谨肃，不尝狎弄，少即老成。其父为陕郡守，观七师之作为，谓其母曰：“是子非常儿孺，善宜护养之。”年甫十岁，迺知佛法可以宗尚，凡经卷冥然兮其此华此梵，都不缘师教。及钟荼蓼，陟之痛愈深，虽亲属劝勉，益加柴毁。先是郡城南有瓦窑七所，一日哀号之际，发狂遁去，其家僮辈蹊迹寻之。见其入窑灶中端坐，身有奇光，灿若金色。家僮惊，就问无言，惧而徒步。次窥一窑，复见七师，同前相状。如是历遍七窑，一一见其端坐发光。是以陕服之人重之若神，遇之罗拜焉。

○唐京师大安国寺和和传

释和和者，莫详氏族本生。其为僧也狂而不乱，愚而有知，罔测其由。发言多中，时号为圣。安国寺中居住，出入无拘检。见本寺修营殿阁未就，有越国公主降荣阳郑万钧虽琴瑟相谐，而数年无子。和因至公主家，钧焚香洒扫以待之。主拜跪归向，钧祈告之曰：“某自叨选尚，愿得一子为嗣，唯师能致之乎？”和曰：“易耳。但遗我三千匹绢，主当诞二男。”钧勤重如听佛语，出绢如所求施之。和取付修寺殿阁功德主。乃曰：“主有娠矣，吾令二天人下为公主作儿。所忧者公主不能并妊二子乎？为孪乳包羞耳。吾俾其同年而前后诞之。”果如其言，岁初年末，各生之矣。长曰潜耀，次曰晦明，皆美丈夫，后博涉成事焉。京邑之间传杨沸渭，量其位地，不可轻议哉。

○唐扬州孝感寺广陵大师传

释广陵大师者，维杨人也，不言法名，淮海之间，竟呼广陵大师也。形质寝陋，性多杰黠，真率之状，与屠沽辈相类，止沙门形异耳。好嗜酒啖肉，常衣总袈，厚重可知，盛暑亦不脱，蚤虱聚其上。侨寓孝感寺，独一室，每夕阖扉而寝，率以为常。或狂悖性发，则屠犬彘，日聚恶少斗驱，或醉卧道傍，杨民以是恶之。贞元中，

有一少壮素以力闻，尝一日少壮与人赌博，大师大怒，以手击碎博局。少壮笑曰：“呆儿何敢进壮士耶？”大师且骂而唾其面，于是索少壮斗击，观者围匝千数。少壮为大师所困，进道而逃。自此人方知有神力焉。亦于稠人广众中自负其力，往往入闾阖盼剽夺人钱帛，市人皆畏其勇而莫敢拒。后有一耆年僧，召大师诫敕之曰：“汝胡不谨守戒法，奈何食酒肉，屠犬豕，强抄市人钱物，又与无赖子弟斗竞，不律仪甚，岂是僧人本事耶？一旦众所不容，执见官吏，按法治之，何处逃隐？且深累佛法。”大师怒色对之曰：“蝇蚋徒喋臙腥，尔安知鸿鹄之志乎？然则我道非尔所知也。且我清中混外者，岂同尔齷齪无大度乎？”耆年且不能屈。后一日自外来归，入室闭户，有于门隙覘之。见大师坐席放神光，自眉间晃朗，照物洞然。观者惊报，少顷寺僧奔至，瞻礼称叹，或有忏悔曾谤之者，或有弹指赞咏之者。明日群僧伺候大师出，焚香致礼。及开户，瞑目如入禅定，已长往矣。自此广陵人写貌供养，号之为大师焉。

○唐南岳山明瓚传

释明瓚者，未知氏族生缘。初游方诣嵩山，普寂盛行禅法，瓚往从焉。然则默证寂之心契，人罕推重。寻于衡岳闲居，众僧营作，我则晏如，纵被诋诃，殊无愧耻，时目之懒瓚也。一说伊僧差越等夷，或随众斋跏，或以瓦釜煮土而食，云是弥陀佛应身，未知何证验之？一云好食僧之残食，故残也（残上声呼）。或随逐之，则时出言语，皆契佛理，事迹难知。天宝初，至南岳寺执役，昼专一寺之上，夜止群牛之下，曾无倦也。如是经二十年。相国邺公李泌避崔李之害，隐南岳而潜察瓚所为，曰：“非常人也。”听其中宵梵呗，响彻山谷。李公情颇知音，能辩休戚，谓瓚曰：“经音凄怆而后喜悦，必谪堕之人时将去矣。”候中夜，李公潜往谒焉，望席门自赞而拜。瓚大诟，仰空而唾曰：“是将贼我。”李愈加郑重，唯拜而已。瓚正发牛粪火，出芋啖之，良久乃曰：“可以席地。”取所啖芋之半以授焉。李跪捧尽食而谢。谓李公曰：“慎勿多言，领取十年宰相。”李拜而退。居一月，刺史祭岳，修道路极严。忽中夜风雷，而一峰颓下，其缘山蹬道为大石所拦，乃以数牛縻绊而挽之，又以数百人鼓噪以推之，物力竭而石愈固，更无他术。瓚曰：“奚用如许繁为？我始去之。”众皆大笑，瓚遂履石而动，忽转盘而下，声若震雷。山路既开，众僧礼而踊跃，一郡呼为至圣，太守奉如神明。瓚悄然乃怀去意。寺外虎豹忽尔成群，日有杀伤，无由禁止。瓚曰：“授我一小华，为尔驱除。”众曰：“大石犹可推，虎豹当易制。”遂与之荆挺，皆蹶后以观之。出门见一虎衔之而去。瓚既去矣，虎亦绝踪矣。李邺公于天宝末，肃宗北巡，至灵武即位，遣使访召。会泌自嵩颖奔赴行在所。帝喜用之，俾掌枢务，权逾宰相，判广平王府司马事。肃宗曰：“卿为朕师友。今父子三人资卿道义。”寻为崔圆、李辅国害其能，泌惧，乞游衡岳，诏许之。绝粒数年，遂见瓚焉。后终居相位，一如瓚之悬记矣。敕谥大明禅师，塔存岳中云。

○唐简州慈云寺待驾传（怀一）

释待驾，？姓王氏，金水县人也。冲孺出家，作为诡异，其父立名侍驾，当天宝末也。练行精进，时号头？。及玄宗巡幸，果自诣府剃{髡采}为僧，至是“待驾得度”，其言信矣。驾去县邑二十里，开径芟茅，独居山顶，后成一寺。此山绝多灵迹，初名石城，迨明皇至剑门，山神见形迎驾，称姓李氏，敕赐与玄孙之称。后陟武担东台，远望祥云紫气，盘结空界，问左右曰：“此何处？”对曰：“名城山。”乃悟山神扈卫之意，遂改云顶为慈云寺也。驾后卒于此寺。又福州楞伽寺释怀一，景龙中锐意于爱同寺东造精舍，相度地形，无水济用，方拱手而去。忽山禽击斗于地，一异之，命工冗深尺余，甘泉沸涌。此后伏腊而无加耗。寺中每有休咎，必暂减耗，候以知之，风俗谓之灵泉焉。以永泰二年归寂，弟子超悟奏乞代宗题寺额。上首曰智恒，次行。越州刺史皇甫政为碑纪德，襄州节度使于谏书焉。

○唐福州爱同寺怀道传（智恒）

释怀道，迈德高情，慈忍济物，思乎达法，恒尔游方。凡遇通人，卑礼求益。及还乡之日，礼佛勤劬，收举坐具，获珠一颗，后置于文殊塑像额心安之。其珠圆莹，且异蚌胎。又冥然降舍利骨，寻兮于南涧塔中。洎至德二年，令弟子僧常持《法华经》，不舍昼夜。俄有白

莢袈裟一领降于塔中，不知其来。此盖道修练之心感于冥理也。后滑台守李邕著碑文并书。相次智恒继居法华院，即怀一弟子也。道行与师相埒。卒后礼部侍郎刘太真作碑颂，褚长文书。次有超悟、行弼，皆名望相齐，化于闽俗，无不重焉。

○唐漳州庄严寺惠忠传（圆寂）

释惠忠，俗姓王，润州上元人也。初在母孕，忽遇异僧，谓曰：“所生贵子，当为天人矣。”诞育已来，不食荤腥，有异常童。禀性敦厚。年二十三，以经业见度，即神龙元年也。遂配庄严寺，志节高简，为时辈所推。闻牛头山威禅师袭达磨踪，得佛法印，遂造山礼谒。威见忠，乃曰：“山主来矣。”因为说法，顿悟上乘。威既得人，如老氏之逢尹喜，乃命入室付法传灯，并委山门之事，遂出麀聚。忠即继踵兹峰，夙夜精励。常头陀山泽，饮泉藉草，一食延时，每用一铛，众味同煮。用毕悬于树杪。方复绳床晏坐，终日如杌，衣不易时，寒暑一纳，积四十年，遂彰灵应非一。州牧明贤，频诣山礼谒，再请至郡，施化道俗。天宝初年始出止庄严。忠以为梁朝旧寺，庄严最盛，今已岁古凋残，兴怀修葺。遂于殿东拟创法堂，先有古木，鹊巢其顶，工人将欲伐之。忠曰：“且止，待鹊移去，始当伐之。”因至树祝曰：“此地造堂，当速移去。”言毕，其鹊竞衔柴迁寓他树。合郭道俗观者如堵，莫不叹异。又立基未定，忽有二神人为上其处，因乃定焉。虽汲引无废，神旷不挠，四方之侣，相依日至。以大历三年山门石室前有忠挂衣藤，是岁盛夏忽然砧悴。灵芝仙菌，且不复生。至九月，忠演法高座，无故水出绕座而转。至四年六月十五日，集众布萨，至晚乃命侍者剃发浴躯。是夜瑞云覆刹，天乐闻空，十六朝怡然坐

化。时风雨震荡，树木摧折，和州延祚寺僧徒其夕咸见白虹直东西，贯于山中，鸟兽哀鸣，林壑岩间哭声数日方止。岳牧韦公损闻而哀愴，遣使赠赙，并令上元令刘君备威仪送归山。于时炎蒸，至七月七，天降两绝凉。八日神枢出，纤尘不飞。又有群鹤徘徊举上，送至山门。瘞后数日，坟内放光，照于山林。五年春，依外国法荼毗，获舍利不可胜计，圆细如珠，光彩莹彻。远近道俗有恨无所克获，咸于焚身处煨火尽中至求，凡百千人，皆得舍利。故知法身圆应，感物无穷，圣力潜通，光腾千古。门人起木塔。春秋八十七矣。身逾七尺，霜眉径寸，仪容殊伟，燕颌龙腮，神气孤拔，色如金聚，含光玉润，若梵僧。所居帐帟弗张，蚊蚋不犯。曾居兰若幽栖，松竹深邃，尝有虎鹿并各产子，驯绕人室，曾无惧色。开元二十七年，上元令长孙遂初脱略异闻，躬造山询验。及到山半，猛虎当路纒吼，遂乃惊怖，莫知所为。忠闻出林晓喻，虎因寝声，伏于林中。遂恐慑，合掌礼谢而回。忠又向吴郡，具戒院中有凌霄藤，盛夏萎悴，人拟伐之。威大师曰：“勿剪。惠忠还日，其藤更生。”人不之信，及秋，忠还，其藤重茂矣。又昔有供僧谷仓在庄，夜有强盗来窃之，虎乃吼唤逐之。盗弃负器而逃。其类夥多，良难骤述。忠著《见性序》及《行路难》，精旨妙密，盛行于世。又邺中释圆寂，氏族生地俱不可寻。初从嵩山见老安禅师，道契相符，莫测涯岸。以高宗咸亨二年生，计终岁已一百有奇年矣。襄州节度使严绶，倾心供养，亦号无生和尚焉。

○唐洛京天宫寺惠秀传

释惠秀，俗姓李氏，今东京陈留人也。出离尘垢，慕尚逍遥。初以戒律饰躬，后以禅定为务。于荆郢之地，参问祖师，既了安然，回依洛邑天宫寺也。属则天频幸神都，而秀道声闻于后听，屡诏入礼重，其于悬记未然事，合同符契。长安中往资圣寺，唱道化人，翕然归向。忽诫禅院弟子，令灭灯烛。有白秀曰：“长明灯可留。”亦令灭之。因说火灾难测，不可不备，云：“尝有寺家，不备火烛，佛殿被焚。又有一寺，钟楼遭？。又有一寺，经藏煨烬，殊可痛惜。”时众不喻其旨。至夜遗火佛殿，钟楼经藏三所悉成灰炭。方知秀预知垂警。又玄宗在潞邸时，曾与诸王俱诣问法，从容留施一笛。玄宗出去，秀召弟子曰：“谨掌此笛，后有要时，当献上也。”及受睿宗传禅，弟子达摩等方悟其言，取笛以进。帝悦先知，回赐丰厚。秀偶示微疾，告诫门人，奄然归寂。享年一百岁。燕国公张说素所归心，送瘞龙门山，道俗数千人奔会悲悼焉。

○唐成都郫县法定寺惟忠传

释惟忠，少孺为僧，励精自行，在乎群等，莫不宗焉。出家法定寺，本是后汉永平中佛法始流中国便有，置德净伽蓝，神光屡现。至宋释惠持自庐阜辞远公法兄，誓化岷蜀。属譙纵不道，令数辈操刃欲屠持。持乃弹指，其众惊奔僵仆。隋开皇四年改名法定焉。寺有弥勒圣像。唐武德中忽有枯查沿江而至，夜发光明，因雕作像首。贞观中窦轨为长史剑门，佛首光见引达于府。窦公令人迎取，数百人亦不能胜。

乃令祝之，任欲何往，遂言：“可就法定否？”乃一人能举。寔遂造佛身，长史高士廉盖殿以安之。后有僧泛爱树其浮图，而获一巨蟹，身足二尺余。是塔颇多灵异，人或将酒肉乘醉诣圣佛前，立见灾祸矣。忠于天宝中于寺，愈加精苦。无何，塔为霆震，拔其塔心柱出外，忽有小木承代之意，众咸怪之，罔测厥由。忠乃叩蝼于圣弥勒像，告诉天龙合加畏重，何辄震击，夺塔心柱邪？是知庶女叫而雷击景公台，诚有所感。一日迅雷烈风，还同前震。覆睹之，乃龙神送旧柱，安置如故。当其易柱，阴云四合，有四神人以身扶翼，立与塔齐。忠之感物也若此。会昌坼寺之前，舍利七粒出相轮上，白光满空，向西飞去蜀，皆所目睹。将倒之时，赤光见干半天焉。又此寺有大枣树，将毁寺之年，其树枯瘁。及大中再置，其枣重荣也。忠后终于寺。

系曰：教法兴替，得非数乎？数算已定，晷刻弗移。如其会昌之前，舍利预飞，枣树先瘁，是知当替数之强，兴数必弱，兴不胜其替矣。大中之兴，替不胜其兴矣。若不为四相之迁，非系兴替之数也。教法是有为之法，讵免迁流者乎，吁！

卷二十

◎感通篇第六之三（正传二十二人附见四人）○唐资州山北兰若处寂传

释处寂，俗姓周氏，蜀人也。师事宝修禅师，服勤寡欲，与物无竞。雅通玄奥，居山北，行杜多行。天后闻焉，诏入内，赐摩纳僧伽梨，辞乞归山。涉四十年，足不到聚落。坐一胡床，宴默不寐。常有虎蹲伏座下，如家畜类。资民所重，学其道者臻萃。由是颇形奇异，如无相大师自新罗国将来谒洗禅师，寂预诫众曰：“外来之宾明日当见矣。宜洒扫以待之。”明日，果有海东宾至也。开元初，新除太守王晔，本黄冠也，景云中曾立少功，刺于是郡，终于释子苞藏祸心。上任处分，令境内应是沙门追集。唯寂久不下山，或劝寂往参，免为厉阶。寂谓弟子曰：“汝虽出家，犹未识业，吾之未死，王晔其如吾何？”迨乎王公上官三日，缁徒毕至。或曰：“唯处寂箴视藩侯，弗来致贺。”晔微怒也，屈诸僧，升厅坐已，将启怒端，问寂违拒之由，愠色悖兴，僧皆股栗。晔俄然仆地，左右扶掖归宅，至厅事后屏树，如被掴颊之声，禺中气绝。自此人谓为妄欲加诸道人，一至于此。寂以开元二十二年正月示灭，享年八十七。资中至今崇仰焉。

○唐代州五台山华严寺无著传

释无著，永嘉人也，识度宽明，秉会贞飏。留神大道，约志游方，抵于京师云华寺，就澄观法师研习《华严》之教。凡诸经论，志极旁通，然于华藏海，终誓遨游。以大历二年入五台山，肆欲观圣人之境界。五月到华严寺挂锡，始于堂中啜茶。见老僧寝陋，据北床。问曰：“子从南方来，还赍数珠请看。”著乃躬度之。回视之间，失僧之所。于时神情恂恍，疑喜交生，曰：“昔僧明入此，睹石臼木杵，后得入圣寺获见圣贤。我愿止此，其为快乎！次由般若经楼见吉祥鸟羽毛？绚，双飞于顶上，望东北鼓翼而去。明日有白光两穗，入户悠扬，少顷而灭。同房僧法等见而惊怪，言曰：“此何祥也？愿期再现，断众生疑。”寻睹光如前。因往金刚窟，望中致礼，方坐假寐，闻叱牛三声云：“饮水。”一翁古貌形，服粗短褐，曳麻屨，巾裹甚异。著乃迎执其手，问“从何来？”翁曰：“山外求粮用来。”“居在何地？”云：“求粮用在台山。”翻质著云：“师何戾止？”答曰：“闻此有金刚窟，故来随喜。”翁曰：“师困耶？”答曰：“否。”曰：“既不困惫，何辄睡乎？”著曰：“凡夫昏沉，胡可怪哉？”曰：“师若昏沉，可去啜煮鞮乎？”翁指东北，见精舍相距数步余翁牵牛前行，著蹑躅而随。至寺门，唤均提三声，童子应唯开阖，年可十四五，垂发齐眉，衣褐襦。牵牛入寺，见其地尽是琉璃，堂舍廊庑皆耀金色。其间华靡，非人间之制度。翁踞白牙床，指锦墩揖著坐。童子捧二瓯茶，对饮毕。擎玳瑁器，满中酥酪，各赋一起。著咽之，如有所证，神府明豁，悟宿事焉。翁曰：“师出家来，何营何虑乎？”答曰：“有修无证，大小二乘，染指而已。”曰：“未知初出家时求何心？”著云：“求大乘菩提心。”曰：“师以初心修即得。”又问“齿腊几何？”“三十一矣”。翁云：“师之纯淑，年三十八则其福根霖殖

此地而荣茂欤？且徐徐下山，好寻道路，勿伤厥足。吾年老朽，从山外来，困极欲偃息也。著请寓一宵可乎？”曰：“不可。缘师有两伴相随，今夜不见师归，忧愁曷已？此乃师有执情在。”著曰：“瞿昙弟子有何执处？虽然有伴，不顾恋他。”又问：“持三衣否？”曰：“受戒已来持之。”曰：“此是封执处。”著曰：“亦有圣教在。若许住宿，心念舍之。脱有强缘，佛故听许。”曰：“若依小乘，无难不得舍衣。宜从急护。”翁拂襟投袂而作，著亦趋行。翁曰：“听吾宣偈；一念净心是菩提，胜造恒沙七宝塔。宝塔究尽碎为尘，一念净心成正觉。”著俯听凝神，谢曰：“蒙宣密偈，若饮醍醐。容入智门，敢忘指决。丈人可谓知言，铭刻心府。”翁唤均提可送师去。临行拊背曰：“好去。”著再折腰，与童子并肩齐步，至金刚窟前，问童子：“此何伽蓝，不悬题额？”童子指金刚窟反问著云：“伊何窟乎？”曰：“先代相传，名金刚窟。”童子曰：“金刚下有何字？”著惟忖少选曰：“金刚下有般若。”童子颔尔：“适入者般若寺也。”著携童子手，揖顾而别。童子瞠目视著，如欲吐辞。著曰：“送我，可以言代缟带与玉玦乎？”童子遂宣偈云：“面上无瞋供养具，口里无瞋吐妙香，心里无瞋是珍宝，无染无垢是真常。”偈终，恍惚之间，童子及圣寺俱灭，唯见山林土石。纍纍盈怀，歔歔不已，叹曰：“绪言余论，若笙鏞之未响，犹在乎耳。”谛观山翁立处，有白云冉冉涌起，去地寻常许，变成五色云霓，上有大圣乘师子而诸菩萨围绕。食顷，东方白云一段，渐遮菩萨面，群像与云偕灭。著倏见汾州菩提寺主僧修政等六人，相将还至窟前，作礼。忽闻山石振吼，声如霹雳，诸僧奔走。良久，寂无所睹。著遂陈遭遇，六人悔责不见圣容，咫尺绵邈，知罪障之屏翳欤！著遂隐此山而终。元和中门人文一追述焉。

○唐真定府普化传

释普化，不知何许人也。受性殊常，且多真率，作为简放，言语不拘。躬事盘山积禅师，密密指教，深入堂奥，诫令保任，而发狂悖。尝与临济玄公相见，乃对之以之驴鸣，旁侍无不哂笑。有时歌舞，或即悲号。人或接之，千变万态，略无恒度。一日，擎挟棺木巡街，？户告辞云：“普化明日死去。”时视之知不可訾。赵人相率随送出城东门，而扬言曰：“今日葬，不合青乌。”经二日出南门，人亦随送，又曰：“明日方吉。”如是西门北门，出而还返，人烦意担一旦坐于郊野，如入禅定焉。禅宗有著述者，以其发言先觉，排普化为散圣科目中，言非正员也矣。

○唐汉州栖贤寺大川传（法鰈）

释大川，不知何许人也，沉默自居，节操弥厉。戒无■穴，言不浪施。于汉州栖贤寺行四圣种法，克苦既增，川也其乐也泄泄。绵竹之人无夙少，率皆宗奉。及乎终也，卧于寺外，白衣具床榻，相率舁归寺中，务营丧礼。方当尸举，无何双鹿引前若驹导焉。始履门阙，寺额奋然陨地，远近惊叹。又此山灵异，不容粗鄙。有僧深藏者，不谨愿，多所违犯。神人掷于山下可七里许，唯伤足指。从此无不悛革守戒

者。大历初北山变成黄金色，上有楼阁，菩萨行道。斯须之间，万形千状。川素居此寺，与地俱灵，留影供养，如事灵祠焉。次闽城法炯者，未详何许人也，行头陀法，克苦克勤，激劝闽人，辞气刚直。闻海坛练门江内有巨钟，相传云昔有人往广州募铸，信鼓巨舰至此，忽值风涛沉溺。每月望日，其潮大至，水退，其？牢乃出，可容一人从中穿过，约其周围径一丈余。大历中陂欲出此钟，先于开元寺设犬会斋诵咒，令一小僧诣龙宫乞钟于人世，击扣以警晨昏。小僧见海神曰：“我惜以镇海。”别与小珠三颗为信，当尔时小僧有如梦觉，珠在手焉。

○唐西域难陀传

释难陀者，华言喜也，未详种姓何国人乎。其为人也，诡异不伦，恭慢无定。当建中年中，无何至于岷蜀，时张魏公延赏之任成都，喜自言我得如幻三昧，尝入水不濡，投火无灼，能变金石，化现无穷。初入蜀，与三少尼俱行，或大醉狂歌，或聚众说法，戍将深恶之，亟令擒捉。喜被捉随至，乃曰：“贫道寄迹僧门，别有药术。”因指三尼曰：“此皆妙于歌舞。”戍将乃重之，遂留连为置酒肉，夜宴，与之饮唱。乃假襦裤巾带，三尼各施粉黛，并皆列坐，含睇调笑，逸态绝世。饮欲半酣，喜谓尼曰：“可为押衙蹋舞乎？”因徐进对舞，曳练回雪，迅起摩趺，伎又绝伦。良久曲终而舞不已，喜乃咄曰：“妇女风邪？”喜忽起取戍将刀，众谓酒狂，坐者悉皆惊走。遂斫三尼头，皆踏于地，血及数丈。戍将大惊，呼左右缚喜。喜笑曰：“无草草也。”徐举三尼，乃箠竹杖也，血乃向来所饮之酒耳。喜又却坐饮宴，别使人断其头，钉两耳柱上，皆无血污。身即坐于席上，酒巡到即泻入断处，面色亦赤，而口能歌舞，手复击掌应节。及宴散，其身自起，就柱取头安之，辄无瘢痕。时时言人吉凶事，多是谜语，过后方悟。成都有人供养，数日，喜忽不欲住，乃闭关留之。喜即入壁缝中，及牵之渐入，唯余袈裟角，逡巡不见。来日见壁尽僧影，其状如日色，隔日渐落。经七日，空有墨迹。至八日，墨迹已灭。有人早见喜已在彭州界。后终不知所之。

系曰：难陀之状迹为邪正邪？而自言得如幻三昧，与无厌足王同此三昧者，即诸佛之大定也。唯如幻见如幻，不可以言论分境界矣。四神通有如幻通，能转变外事。故难陀警觉庸蜀之人，多尚鬼道神仙。非此三昧，不足以化难化之俗也。

○唐寿州紫金山玄宗传

释玄宗，姓吴氏，永嘉人也。少时出尘，气度宽裕，于本部永定山宝寿院依常静为师。照得戒已还，诸方游学，抵江陵谒朗禅师门，若真金之就冶焉。决了疑贰，复振锡他行。见紫金山悦可自心，留行禅观。此山先多虎暴，或噬行商，或伤樵子。避苛政者，哭妇堪哀。从宗卜居，哮阚绝迹，自迹入山者无憚矣。一日，禅徒拥集，见一老父趋及座前，拜跪勤悖宗问：“子何人邪？”答云：“我本虎也，在此山中，食啖众生。因大师化此，冥回我心，得脱业躯，已生天道，故来报谢。”折旋

之顷，了无所见。以大历二年嘱别门徒，溘然化矣。春秋八十六，二月入塔，立碑存焉。

○唐袁州阳岐山广敷传

释广敷，俗姓郑，南燕人也。少依京望大德思浩下，承乎法训。登戒毕，游嵩、少、两京，遇神会禅师，大明玄旨。至宜春阳岐山挂锡，是中峰峦积翠，洞穴涉幽，芝菌之苗，参于草卉。敷终日瞑目，木食度辰。时有峨冠羽帔，驭鹤骖鸾者，始则年往倏来，后则登庵造膝。其仙客所到，必轻云薄雾，随步而至。拥从者天丁力士令远去，对晤谈论移晷。其后道化既成，于贞元元年三月四日入灭，春秋九十一云。

系曰：神仙道异，谈论岂同乎？通曰：“昔小有真人能谈空理，方诸山神仙建浮图者信崇佛道，止不削染，号在家菩萨。又雪山诸仙善五明论求度者同也。然其相似道，必须甄简。若西域二十谛中五唯量五大，与释氏法名同。所计天殊，良难区别哉。”

○唐邓州乌牙山圆震传

释圆震姓陈，中山人也。少警寤而尚学，入庠序，研究《五经》。倏遇云游沙门寓宵，其父为州衙吏，酷有道心，留是僧供施。震礼奉其僧，听其谈道，颇觉入神。舍儒典，披释经，顿辞所爱，往白磁山，礼智幽为师受教。后遇荷泽禅师得法，隐南阳乌牙山。先是山中多巨蛇，泽穴有毒龙，乡人患之。及震居此，二物潜踪。曾有一人形服且异，致拜乃曰：“我在此已二百岁，今感无心之化，绝虑之修，吾曹冥感超升，可非师之力欤！”贞元六年终，享龄八十六，弟子奉全身入塔焉。

○唐池州九华山化城寺地藏传

释地藏，姓金氏，新罗国王之支属也。慈心而貌恶，颖悟天然。七尺成躯，顶耸奇，骨特高，才力可敌十夫。尝自诲曰：“《六籍》囊中，三清术内，唯第一义与方寸合。”于时落发涉海，舍舟而徒，振锡观方，邂逅至池阳，睹九子山焉。心甚乐之，乃径造其峰，得谷中之地，面阳而宽平。其土黑壤，其泉滑甘，岩栖涧汲，趣尔度日。藏尝为毒螫，端坐无念。俄有美妇人作礼馈药曰：“小儿无知，愿出泉以补过。”言讫不见，视坐左右间

豁然，时谓为九子山神为涌泉资用也。其山天宝中李白游此，号为九华焉。俗传山神，妇女也。其峰多冒云雾，罕曾露顶欤。藏素愿持四大部经，遂下山至南陵，有信士为缮写，得以归山。至德年初，有诸葛节率村父自麓登高，深极无人，云日鲜明，居唯藏孤然闭目石室。其房有折足鼎，鼎中白土和少米，烹而食之。群老惊叹

曰：“和尚如斯苦行，我曹山下列居之咎耳。”相与同构禅宇，不累载而成大伽蓝。建中初张公严典是邦，仰藏之高风，因移旧额奏置寺焉。本国闻之，率以渡海相寻，其徒且多，无以资岁。藏乃发石得土，其色青白，不礲如面，而供众食。其众请法以资神，不以食而养命。南方号为枯槁众，莫不宗仰。龙潭之侧有白？砮，取之无荆以贞元十九年夏，忽召众告别，罔知攸往。但闻山鸣石陨，扣钟嘶哑，加趺而灭。春秋九十九。其尸坐于函中，泊三稔开将入塔，颜貌如生，举舁之动骨节，若撼金锁焉。乃立小浮图于南台，是藏宴坐之地也。时征士右拾遗费冠卿序事存焉。大中中僧应物亦纪其德哉。

○唐婺州金华山神暄传

释神暄，俗姓留，建阳人也。幼而沈静，非问不言。客游婺女，入开元寺，志愿出家焉。无何，本郡太守入寺访其师，见暄神彩朗练。太守善相人也，顾之数四，且曰：“是子真出尘之器，异日承受深法，千众围绕，必超上果，非凡气也。”乃诵《七佛俱胝神咒》，昏晓不绝。纳戒毕，于金华山北洞，百家岩有石穴，暄居中止息，不构庵室，作露地头陀，复无床榻。然有神人吐紫色云气而高覆之。遐望冉冉，犹独柱观焉。其神人时来问道，拱手白暄曰：“赤松洞之东峰有林泉卓异，师可居之否？”暄随请往住，数年越多征瑞。贞元二年遇志贤禅师，问暄如此持诵，魔事必生。欲灭魔怨，须识身本。身本既真，无魔无佛，豁然开悟，理事俱成，神咒功倍。元和八年，范鯁中丞知仰，遣使赍乳香毡罽器皿施暄，并回施现前大众。次中书舍人王仲请于大云寺为众受菩萨戒。十二载，平昌孟简尚书自会稽甄请，不赴。八月，俄回旧山，人莫详测。倏云示灭，春秋七十六。弟子建塔焉。一云暄在金华山北，多寒少阳。神人问曰：“师须何物？”曰吾在山之阴，苦于凜冽。”神曰：“小事耳。”至夜闻暄阖之声，明旦见一小峰移矣。

○唐澧州开元寺道行传

释道行，姓杨，桂阳人也。自生已来，神府聪利，肌体冰雪如也。年甫十二，心誓慕道，于南岳般若道场受学，于钟陵求诀，自默证法，号自在三昧。由此布纳蒲鞋，用资残息而已。就澧阳西南，伐木为室，方丈而居，虎豹多伏于床榻之间。后有赍材植，为营堂宇，曾未浹旬，一皆周具。视之，寂无人焉，始知鬼神舍材输力也。太守苦召居州治开元寺，未久。元和十五年终，年六十九，焚舍利建塔焉。

○唐徐州安丰山怀空传

释怀空，姓梁氏，阆州人也。幼适本州耆阇山广福院削染。得戒之后，游方慕学，于大寂禅法洗然明畅。后至彭城安丰山挂锡宴默，不数载间，成大伽蓝。尝有一僧乘空而至，绕垣墙不息。或蹑莲花，或时履地，人咸瞻睹。数日之后，礼辞空，且曰：“我三五稔却来依附。”言讫不见。空以兴元元年灭度，春秋八十八。长庆元

年二月，方迁入塔云。

○唐洛京慧林寺圆观传

释圆观，不知何许人也。居于洛宅，率性疏简，或勤梵学，而好治生。获田园之利，时谓之空门猗顿也。此外施为绝异，且通音律，大历末，与李源为忘形之友。源父

愷居守，天宝末陷于贼中，遂将家业舍入洛城北慧林寺，即愷之别墅也；以为公用无尽财也。但日给一器，随僧众饮食而已。如此三年，源好服食，忽约观游蜀青城、峨眉等山洞求药。观欲游长安，由斜谷路。李欲自荆入峡，争此二途，半年未决。李曰：“吾已不事王侯，行不愿历两京道矣。”观曰：“行无固必，请从子命。”遂自荆上峡，行次南浦，泊舟，见数妇女眦达锦榼，负罍而汲。观俯首而泣曰：“某不欲经此者，恐见此妇人也。”李曰：“自上峡来，此徒不少，奚独泣为？”观曰：“其孕妇王氏者，是某托身之所也。已逾三载，尚未解襁，唯以吾未来故。今既见矣，命有所归，释氏所谓循环者也。请君用符咒遗其速生，且少留行舟，葬吾山谷。其家浴儿时，亦望君访临。若相顾一笑，是识认君也。后十二年当中秋月夜，专于钱塘天竺寺外，乃是与君相见之期也。”李追悔此之一行，致观到此，哀恸殆绝。召孕妇告以其事，妇人喜跃还。顷之，亲族毕集，以枯鱼浊酒馈于水滨。李往授符水。观具其沐浴，新其衣装。观其死矣，孕妇生焉。李三日往看新儿，襁抱就明，果致一笑。李泣具告王氏。王氏厚葬观。明日李回棹归慧林寺，询问弟子，方知已理命矣。李常念杭州之约。至期，到天竺山寺，其夜桂魄皎然，忽闻葛洪井畔有牧童歌《竹枝》者，乘牛扣角，双髻短衣，徐至寺前，乃观也。李趋拜曰：“观公健否？”曰：“李公真信士。我与君殊途，慎勿相近。君俗缘未尽，但且勤修不堕，即遂相见。”李无由序语，望之然。观又歌《竹枝》，杳裊前去，词切调高，莫知所谓。叹曰：“真得道之僧也！咫尺悬隔，圣凡路殊，谅有之乎？”初源忿父遇害贼庭，时方八岁，为群贼所虏，流浪南北，展转人家，凡六七年，归于近亲。代宗闻之，授河府掾。源遂绝酒肉，不婚娶，不役僮仆，常依慧林寺，寓一室，随僧斋食。先命冗其野以备终制，时时往眠其间。至于荣辱是非，一皆均等也。时相国李公德裕表荐之，遂授谏

议大夫。于时源已年八十余矣，抗表不起。二年而卒，长庆二年也。

系曰：圆观未死先寄胎者，闻必不信。何耶？违诸圣教也。尝闻闽尼多许族姓家妇女为儿，云便来也。及终，有以朱题髀，当日有家生子，身有赤文“便来”二字焉。此类亦多。庄子所谓“曲士不可与语道者，束于教也”。其或竺乾异计有教未来，佛或别会曾谈，见有我宗自许。若然者未可定执已行之教矣。其如观也果证高深，同《智论》中多种不思议也，心思言议，千里难追矣。

○唐江州庐山五老峰法藏传

释法藏，俗姓周氏，南康人也。稚龄爽俊，始研寻史籍，而于医方明得其工巧，同支法存之妙用焉。有门僧卧疾，几云不救，藏切脉处方，信宿平复。其僧多接谈玄，自尔萌出尘之意。年已长矣，恳辞亲，投本郡平田山宝积院从愿师下受教，纳戒。后游谒大寂禅师，言喻若石之投水。怏然北下庐山登五老峰，爱其灵异，独止寒林，采橡栗，搗溪涧，聊延形气，而止数年。有二仙乘云而来，终日谈论，或留宵宿，或经月不来，或继日而至。他人有见者，旁说不同。及乎学僧臻萃，全无踪迹。又一日告辞藏云：“且归山去，师当好祝”由是道且馨香，檀越共营一院。宝历中示灭，年八十二。其年三月四日入塔云。

系曰：藏隐五老峰时，二仙来终日谈论者，何？通曰：“昔刘向辑《列仙》云：‘若干人见于内典欤。’又裴、周、桐柏三真人弟子，各半学佛法，可非来问道乎？《诗》中草虫之应阜螽同也。”

○唐洛阳香山寺鉴空传

释鉴空，俗姓齐，吴郡人也。少小苦贫，虽勤于学而寡记持。壮岁为诗，不多靡丽。常困游吴楚间，已四五年矣。干谒侯伯，所润无几。钱或盈贯，则必病生，用罄方差。元和初游钱塘，属其荒俭，乃议求餐于天竺寺。至孤山寺西，钁甚不前，因临流雪涕，悲吟数声。俄有梵僧临流而坐，顾空笑曰：“法师秀才，旅游滋味足未？”空曰：“旅游滋味则已足矣。法师之呼，一何乖谬？”盖以空未为僧时名君房也。梵僧曰：“子不忆讲《法华经》于同德寺乎？”空曰：“生身已四十五岁矣，盘桓吴楚间，未尝涉京口，又何洛中之说？”僧曰：“子应为饥火所烧，不暇忆故事。”遂探囊出一枣，大如拳许，曰：“此吾国所产，食之者，上智知过去未来事，下智止于知前生事耳。”空饥极食枣，搗泉饮之。忽欠呻，枕石而寝，顷刻乃悟，忆讲经于同德寺如昨日焉。因增涕泣，问僧曰：“震和尚安在？”曰：“专精未至，再为蜀僧矣。今则断攀绿也。”“神上人安在？”曰：“前愿未满足。”“悟法师焉在？”曰：“岂不记香山石像前戏发大愿乎？若不证无上菩提，必愿为赳赳贵臣。昨闻已得大将军矣。当时云水五人，惟吾得解脱，独汝为冻馁之士也。”空泣曰：“某四十许年日唯一餐，三十余年拥一褐，浮俗之事决断根源。何期福不完乎，坐于饥冻！”僧曰：“由师子座上广说异端，使学空之人心生疑惑。戒珠曾缺，膾气微存，声浑响清，终不可致。质伧影曲，报应宜然。”空曰：“为之奈何？”僧曰：“今日之事，吾无计矣。他生之事，警于吾子焉。”乃探钵囊取一鉴，背面皆莹彻，谓空曰：“要知贵贱之分，修短之期，佛法兴替，吾道盛衰，宜一鉴焉。”空览照久之，谢曰：“报应之事，荣枯之理，谨知之矣。”僧收鉴入囊，遂挈而去，行十余步，旋失所在。空是夕投灵隐寺出家，受具足戒。后周游名山，愈高苦节。大和元年诣洛阳，于龙门天竺寺遇河东柳？，亲说厥由向？。？闻空之说，事皆不常，且甚奇之。空曰：“我生世七十有七，僧腊三十二，持钵乞食，尚九年在世

。吾舍世之日，佛法其衰乎？”诘之，默然无答。乃索？笔砚，题数行于《经藏》北垣而去。曰：“兴一沙衰恒河沙，兔而置，犬而齧，牛虎相交与角牙，宝檀终不灭其华。”

系曰：食梵僧之枣而知宿命者，与茹雪山之药解诸国言音同也。览鉴而知吉凶者，与窥圆澄涂麻掌同也。食枣临鉴，岂偶然耶？非常人之遇也。其空公题讖而答，塞柳？之问，验在会昌之毁教矣。时武宗勒僧尼反俗，计二十万七千余人，坼寺并兰若共四万七千有奇，故云“兴一沙衰恒河沙，兔在置，犬仍齧”，言残害之甚。乙丑毁法，丙寅灭代，佛法喻宝檀之树，终不绝其华花芬馥，故云也。苟非异人，何以藏往考来之若是乎？

○唐广州罗浮山道行传

释道行，姓梅氏，会稽人也。父为越州衙吏。行弱龄知书，比成造秀。有僧分卫，行接之谈道，颇精禅观，遂求出家。至四明山保寿院智幽所，禀训进修，拾薪汲水。后游南岳，闻江西大寂道化，往亲附焉。思养圣胎，见罗浮奇异，高三千丈，有七十石室，七十二长溪。仙人仙禽，玉树朱草，生于上，半入海中。行居于石室，默尔安禅。然或山精水怪，往往惊鸣，行视之箴如也。有老人容貌端正，衣冠华楚，再拜稽颡云：“我居此中仅二百载，今因师住，冥感匪躬，逍遥脱苦，归人趣受乐矣。”其感物多此类也。宝历九载疾终，春秋九十五。其年九月十八日入塔焉。

○唐潞州普满传

释普满者，未知何许人也。于汾晋间，所为率意，不拘僧体，或歌或哭，莫喻其旨。以言斥事，往必有征，故时人以强练万回待之。或入稽胡，激劝修善，至有罢弋猎者。建中初，于潞州佛舍中题诗数篇而亡去。所记者云：“此水连泾水，双朱血满川。青牛将赤虎，还号太平年。”题后，人莫能知。至朱？为泾源叛徒推拥，驾幸奉天。于时天下征兵，关辅贼据，围逼连战，人方解悟。此水者，？也。泾水者，泾州来兵始乱也。双朱，？与睽也。青牛者，兴元元年乙丑。乙木青也。丑，牛也。其年改元贞元，至二年丙寅，丙火赤也，寅虎也，至是贼始平，故曰还号太平年也。

○唐江陵府些些传（食油师）

释些些师，又名青者，盖是不与人交狎，口自言些些，故号之矣。德宗朝，于渚宫游，衣服零落，状极憨痴，而善歌《河满子》。纵肆所为，故无定检。尝遇醉伍伯，伯于涂中辱之，抑令唱歌。些便扬音揭调，词中皆诮伍伯从前阴私恶迹，人所未闻事。伍伯惭惶，旁听之者知是圣僧，拜跪悔过焉。贞元初，多入市肆，聚群小随

逐，楚人以兴笑本矣。后不测其终。次有僧憨狂，游行无度。每断中，唯食麻油几升。如见巨器盛施之，则喜。荆渚一家特召啜麻膏，是日又在湖南斋，分身应供，号食油师焉。

系曰：些之声为商为羽耶？通曰：“传家采录，其例有二：一则按文不音，二则口授知韵。今得些者，按文也。若楚词声余则苏个切也，若山东言少，则写邪切焉。此师荆楚间事也，其二音以听来教，此名同鸟兽之自呼也。

○唐吴郡义师传（证智荐福寺老僧）

释义师者，不知何许人也。状类风狂，语言倒乱。贞元初，巡吴苑乞丐，事多先觉，人以此疑之。市肆中百姓屋数间，义师辄操斧斫剂其檐，禁之不止。其人素知其神异，礼白之曰：“弟子藉此生活，无坏我屋。”回顾曰：“汝惜乎？”投斧而去。其夜市火连焚而燎，唯所截檐屋数间存焉。好止废寺中，无冬夏常积聚坏幡盖、木佛像，悉代薪炭。又于煨火烧炙鲤鱼，而多跳跃，灰坌弥漫。抚掌大笑，不具匕箸而食。面垢不盥，璟之辄阴雨，吴人以为占候。及将死也，饮灰汁数十斛，乃念佛而坐，士庶观之，满七日而死。时盛暑，色不变，支不摧。百姓舁出郊外焚之。又京兆安国寺僧事迹不常，熟地而烧木佛。所言人事，必无虚发。此亦不测之僧也。复次京师永寿寺释证智，不详生族。贞元中于京寺多发神异，而众罔知。或画在张洎兰若治田，夜归寺中。其兰若在汉阴金州，相距京甸七百里焉。时号智禅师，比之长足安、法云公也，皆能致远于瞬息间，道家谓之缩地脉而能陟遐矣。若于色尘作神变，虽远而近也。次荐福寺老僧，专务诵持，罕有盼缺，言未兆事，来如目击。大和初，相国韦公处厚好重空门，逐月别召名德僧食。老僧见韦新登庸，曰：“大奇，相公得如此好灭度处。”人皆不喻，后因奏对于文宗御前，疾作，僵仆殿阶，及扶舁出殿门，气已绝矣。方验老僧言，死在内殿中，故云好灭度处。即开成中也。后不知其终。

○唐唐州云秀山神鉴传

释神鉴，姓韩氏，浚阳人也。稚岁淳静，而不杂群童。父为齐安掾，且归心释氏，尝于廨署陈像设，命僧徒赞呗扬音，法乐俱作。鉴则喜色盈颜，随僧不舍，求愿出家。父母无计阻之，潜投东林寺贞素律师下修学。后讲通《大涅槃经》义，乃南格豫章，参大寂禅师。续于怀安西北山居焉。是山先是猛兽旁午，率多作害。从鉴居之，虎灾弭息，远近称之。忽有戴平?男子，望法座致礼勤重，倏尔无踪。七日后有冠裳宛异者，于方丈前升空宣言曰：“此大师者，真法宝也。开人天眼目，故来报之。”其徒闻见，知鉴道高。会昌四年入灭，八月十五日藏之于塔。凡得道之人，地神报空神，展转至于有顶，于斯见矣。

○唐天台山国清寺清观传（物外）

释清观，字明中，临海人也，姓屈氏。初诞弥，手足指间有幕蹠属相著焉，佛经所谓网漫相也。迨为童孺，神俊挺然，乃有出尘之志。遂诣国清寺，投元璋律师执侍瓶钵，非父母不沮之，若迦楼罗鸟啄几万重围矣。年十八，纳形俱法，良由善根深殖，悟解天然，台岭教文，洞明三观，兼得深定，神异通感，皆莫我知。少览百家，弥通三教。仍善属文，长于诗笔。凡其邦伯轩，皆响风造谒，观则持重若严君焉。见则畏伏，只就凡杖以待贵士。或施财宝，皆回入常住，罄无私畜。或曰：“贵人所施皆充别施，何不已用耶？”对曰：“恨未能舍头目，况世财乎？”大中初，天下寺刹中兴，观入京请大钟归寺鸣击，并重悬鰐额，则集贤院学士柳公权书题也。柳复有《诗序》，送其东归。复请《藏经》归寺。大中癸酉，江表荐饥，殍踣相望，观遂并粮食施之。又山僧物外度荒，自入室禅定，谓弟子曰：“汝如不死，至禾黍熟时，当以磬引我出。”果如其言，明岁方从定起矣。一旦溪南人命观斋食，可去寺二十里余。其夜溪涧泛溢，无人可渡，谓观不来。顷克而至，且无淹湿，作用可知也，人皆异之。远近瞻礼，日别盈满，喧扰可厌，乃逃往翠屏山兰若独栖。续天台山众列请为僧正，乃佯狂隐晦。州牧杜雄遂奏昭宗宣赐紫衣，观闻之，若愁思不乐。后无疾而终焉。

○唐洪州黄砭山希运传

释希运，闽人也。年及就傅，乡校推其慧利。乃割爱投高安黄砭山寺出家。迨成长也，身量减王商裁一尺所，额间隆起，号为肉珠。然倜傥不羁，人莫轻测。而乃观方入天台，偶逢一僧偕行，言笑自若。运偷窥之，其目时闪烁，烂然射人。相比而行，截路巨溪，泛泛涌溢，如是捐笠倚杖而止。其僧督运渡去，乃强激发之曰：“师要渡自渡。”言讫，其僧褰衣蹶波，若履平陆，曾无沾湿，已到彼岸矣。回顾招手曰：“渡来。”运戟手诃曰：“咄，自了汉，早知必斫汝胫。”其僧叹曰：“真大乘法器，我所不及。纵能伤我，只取辱焉。”少顷不见。运恫恍自失。及薄游京阙，分卫及一家门，屏树之后闻一姥曰：“太无厌乎？”运曰：“主不諂宾，何无厌之有？”姥召入，施食讫。姥曰：“五障之身忝尝礼惠忠国师来。劝师可往寻百丈山禅师所，惜巍巍乎堂堂乎真大乘法器也。”运念受二过，记？攸同，乃还洪井见海禅师，开了心趣，声价弥高。徇命居黄砭精舍，升平相裴公休钦重躬谒，有诗赠焉。“曾传达士心中印，额有圆珠七尺身。挂锡十年栖蜀水，浮杯今日渡漳滨。一千龙象随高步，万里香花结胜因。愿欲事师为弟子，不知将法付何人。”1 则裴相得法，出运之门。以大中中终于所住寺，鰐谥断际禅师，塔名广业，《语录》而行于世。

卷二十一

◎感通篇第六之四（正传十八人附见三人）○唐五台山法华院神英传

释神英，罔知姓氏，沧州人也。宿缘悟道，？岁从师，讽诵精勤，日夜匪懈。年当应法受具，后乃仗锡萍游，寻访知识。早通玄话，兼擅论经，相次参神会禅师，谓英曰：“汝于五台山有缘，速宜往彼瞻礼文殊，兼访遗迹。”既承指授，以开元四年六月中旬到山瞻礼，于僧厨止泊。一日，食毕游于西林，忽见一院题曰法华。英遂入中，见多宝塔一座，炜晔繁华，如《法华经》说同也。其四门玉石功德，细妙光彩，神工罕测。后面有护国仁王楼，上有玉石文殊、普贤之像。前有三门一十三间，内门两畔，有行宫道场，是文殊普贤仪仗。三门外状台山十寺，杳然物外，观瞻浩荡，神情恍恂。英试出院，又见众僧且非恒所见者，而多诡异。疑预未决，遂出门东行，可三十步，忽闻闭户铿然，回目视之，了无一物。英乃悲泣曰：“此大圣警悟我邪！于此地必有缘矣。”遂于仿佛多宝塔处结庵而止。乃发愿曰：“我依化院建置一所住持。”日居月诸，信施如林，归依者众。遂召工匠，有高价者，誓不酬之。乃于易州千里取乎玉石，用造功德，细妙光莹，功侔所见。其壁乃王府友吴道子之迹，六法绝妙，为世所尚。此院前后工毕，因号法华耳。英说法住持，其齐整若剪裁焉。后无疾，召门人嘱付而终，春秋七十五。今坟塔存矣。

○唐五台山华严寺牛云传

释牛云，俗姓赵，雁门人也。童蒙之岁有似神不足，遣入乡校，终日不知一字。惟见僧尼，合掌有畏惮之貌。年甫十二，二亲送往五台华严寺善住阁院出家，礼净觉为师，每令负薪汲水。时众轻其朴钝，多以谑浪归之。年满受具，益难诵习。及年三十有六，乃言曰：“我闻台上恒有文殊现形。我今跣足而去，傥见文殊，惟求聪明，学诵经法耳。”时冒寒雪，情无退屈，至东台顶，见一老人然火而坐。云问曰：“如此雪寒，从何而来？”老人曰：“吾从川下来。”云曰：“从何道上，何无履迹？”曰：“吾雪前来。”老人却问云曰：“有何心愿，犯雪徒跣而至，岂不苦也？”云曰：“吾虽为僧，自恨昏钝，不能诵念经法。此来欲求见文殊，只乞聪明果报。”老人曰：“奇哉！”又曰：“此处不见文殊，更欲何之？”云曰：“欲上北台去。”老人曰：“吾意亦然。”曰：“请师先行。”云乃游遍台顶，告别老人，自西而去。薄暮，方到北台，又见老人然火而坐，颇为惊怪。问曰：“适于东台相别，为何先至？”老人曰：“师不知要路，所以来迟。”云虽承此语，心乃犹豫，只此老人莫应文殊也？云乃鸣足礼拜。老人曰：“吾俗人也，不应作礼。”唯贪设礼，情属不移，良久老人云：“休礼，候吾入定，观汝前身作何行业而昏钝也。”老人闭目，倏尔开颜语云曰：“汝前生为牛来，因载藏经，今得为僧而？钝耳。汝于龙堂边取一钁鬘来，与汝綷却心头淤肉，即明快也。”云遂得钁鬘度与。老人曰：“汝但闭目，候吾教开即开。”因闭目，次有似当心施钁鬘，身无痛苦，心乃豁然，似暗室立于明灯，巨夜悬于圆月也。云开目乃见老人现文殊像，语云曰：“汝自

后诵念经法，历耳无忘。又于华严寺涧东院大有因缘，无得退转。”云乃行悲行泣，接足而礼，未举头顷，不见菩萨矣。云后下山，四支无损。凡曰经典，目所一览，辄诵于口。明年夏五月，绕育王塔行道念经。至更初，乃见一道直光从北台顶连瑞塔基，久而不散，于光明中现宝阁一所，前有金牌，题云善祝云忆菩萨授记之言，依光中所现之阁而建置焉。道化施行，人咸贵重。于开元二十三年无疾而终，俗龄六十三，法腊四十四矣。云名亡上字，承文殊记识本迹为牛，故时号之焉。

○唐五台山清凉寺道义传

释道义，江东衢州人也。开元中至台山，于清凉寺粥院居止，典座普请运柴，负重登高，颇有难色。义将竹鞋一襪转贸人荷檐，因披三事纳衣。东北而行，可五里来，于楞伽山下，逢一老僧，其貌古陋，引一童子名字觉一。老僧前行，童子呼请义东边寺内啜茶去，乃相随入寺，遍礼诸院。见大阁三层，上下九间，总如金色，闪烁其目。老僧令遣义早还所止，山寒难祝唯诺辞出寺，行及百步，回顾唯是山林，乃知化寺也。却回长安大历元载，具此事由奏宝应元圣文武皇帝，蒙敕置金阁寺，宣十节度助缘。遂召盖造都料，一僧名纯陀，为度土木，造金阁一寺。陀元是西域那烂陀寺喜鹊院僧。寺成后，敕赐不空三藏焉。义不测其终。

○唐五台山竹林寺法照传

释法照，不知何许人也。大历二年，栖止衡州云峰寺，勤修不懈。于僧堂内粥钵中，忽睹五彩祥云，云内现山寺。寺之东北五十里已来有山，山下有涧，涧北有石门，入可五里有寺，金榜题云“大圣竹林寺”。虽目击分明，而心怀陨获。他日斋时，还于钵中五色云内现其五台诸寺，尽是金地，无有山林秽恶，纯是池台楼观众宝庄严，文殊一万圣众而处其中，又现诸佛净国。食毕方灭，心疑未决。归院问僧，还有曾游五台山已否？时有嘉延、昙晖二师言曾到，言与钵内所见一皆符合，然尚未得台山消息。暨四年夏，于衡州湖东寺内有高楼台，九旬起五会念佛道常六月二日未时，遥见祥云弥覆台寺，云中有诸楼阁，阁中有数梵僧，各长丈许，执锡行道。衡州举郭咸见弥陀佛与文殊、普贤一万菩萨俱在此会，其身高大。见之者皆深泣血设礼，至西方灭。照其日晚于道场外遇一老人，告照云：“师先发愿往金色世界，奉觐大圣，今何不去？”照怪而答曰：“时难路艰，何可往也？”老人言：“但亟去，道路固无留难。”言讫不见。照惊入道场，重发诚愿：“夏满约往前，任是火聚冰河，终无退衄。”至八月十三日，于南岳与同志数人惠然肯来，果无沮碍，则五年四月五日到五台县，遥见佛光寺南数道白光。六日到佛光寺，果如钵中所见，略无差脱。其夜四更，见一道光从北山下来射照，照忙入堂内，乃问众云：“此何祥也？吉凶焉在？”有僧答言：“此大圣不思议光，常答有缘。”照闻已，即具威仪，寻光至寺东北五十里盼果有山。山下有涧，涧北有一石门，见二青衣，可年八九岁，颜貌端正，立于门首，一称善财，二曰难陀。相见欢喜，问讯设礼，引照入门，向北行五里已来，见一金门楼。渐至门所，乃是一寺。寺前有大金榜，题曰

《大圣竹林寺》，一如钵中所见者。方圆可二十里，一百二十院，皆有宝塔庄严，其地纯是黄金，流渠花树，充满其中。照入寺至讲堂中，见文殊在西，普贤在东，各据师子之座，说法之音，历历可听。文殊左右菩萨万余，普贤亦无数菩萨围绕。照至二贤前，作礼问言：“末代凡夫，去圣时遥，知识转劣，垢障尤深。佛性无由显现，佛法浩瀚，未审修行于何法门，最为其要？唯愿大圣断我疑网。”文殊报言：“汝今念佛，今正是时。诸修行门，无过念佛，供养三宝，福慧双修，此之二门，最为径要。所以者何？我于过去劫中因观佛故，因念佛故，因供养故，今得一切种智。是故一切诸法般若波罗蜜甚深禅定，乃至诸佛，皆从念佛而生。故知念佛，诸法之王，汝当常念无上法王，令无休息。”照又问：“当云何念？”文殊言：“此世界西有阿弥陀佛，彼佛愿力不可思议，汝当继念，令无间断，命终之后，决定往生，永不退转。”说是语已，时二大圣各舒金手，摩照顶为授记别：“汝已念佛，故不久证无上正等菩提。若善男女等愿疾成佛者，无过念佛，则能速证无上菩提。”语已时二大圣互说伽陀。照闻已欢喜踊跃，疑网悉除。又更作礼，礼已合掌。文殊言：“汝可往诣诸菩萨院，次第巡礼。”授教已，次第瞻礼，遂至七宝果园，其果才熟，其大如碗，便取食之。食已，身意泰然，造大圣前，作礼辞退。还见二青衣，送至门外。礼已举头，遂失所在，倍增悲感。乃立石记，至今存焉。复至四月八日，于华严寺西楼下安止。泊十三日，照与五十余僧同往金刚窟，到无著见大圣处，虔心礼二十五佛名。照礼才十遍，忽见其处广博严净，琉璃宫殿，文殊、普贤一万菩萨及佛陀波利居在一处。照见已，惟自庆喜，随众归寺。其夜三更，于华严院西楼上忽见寺东山半有五圣灯，其大方尺余。照咒言“请分百灯归一畔”，便分如愿。重谓“分为千炬”，言讫便分千数，行行相对，遍于山半。又更独诣金刚窟所，愿见大圣，三更尽到，见梵僧称是佛陀波利，引之入圣寺，语在《觉救传》。至十二月初，遂于华严寺华严院入念佛道场，绝粒要期，誓生净土。至于七日初夜，正念佛时，又见一梵僧入乎道场，告云：“汝所见台山境界，何故不说？”言讫不见。照疑此僧，亦拟不说。翌日申时，正念诵次，又见一梵僧年可八十，乃言照曰：“师所见台山灵异，胡不流布？普示众生，令使见闻，发菩提心，获大利乐乎？”照曰：“实无心秘蔽圣道，恐生疑谤，故所以不说。”僧云：“大圣文殊见在此山，尚招人谤，况汝所见境界，但使众生见闻之者，发菩提心，作毒鼓缘耳。”照闻斯语，便随忆念录之。时江东释慧从以大历六年正月内与华严寺崇晖、明谦等三十余人随照至金刚窟所，亲示般若院，立石标记。于时徒众诚心瞻仰，悲喜未已，遂闻钟声，其音雅亮，节解分明。众皆闻之，惊异尤甚，验乎所见不虚，故书于屋壁，普使见闻，同发胜心，共期佛慧。自后照又依所见化竹林寺题额处，建寺一区，庄严精严，便号竹林焉。又大历十二年九月十三日，照与弟子八人于东台睹白光数四，次有异云叕。云开，见五色通身光，光内有圆光红色，文殊乘青毛师子，众皆明见，乃霏微下雪及五色圆光遍于山谷。其同见弟子，纯一、惟秀、归政智远、沙弥惟英、优婆塞张希俊等。照后笃巩其心，修练无旷，不知其终。绛州兵掾王士詹述《圣寺记》云。

系曰：佛成就三身，必居三土，显正依报庄严故。菩萨未沾国土名，但云住处。修

净佛国因，随生佛家，故《华严经》有《菩萨住处品》焉。经云：“唯佛一人居净土”，此下不僭上也。若《八字陀罗尼经》云“文殊大愿力，与佛同境界”。境界净则说法净，则三土义齐也。问：“诸经中佛住王舍城等可非住处邪？”通曰：“此义同名别，或可上得兼下也。又如兜率宫院是补处净域，宝陀落、清凉支提等山，皆是菩萨净识所变刹土也。若然者，净土与住处义同名异耳。如法照入竹林圣寺，见文殊净境也，诸于山岭见老人童子等，则秽土见圣人。”

○唐清凉山秘魔岩常遇传

释常遇，俗姓阴，范阳人也，出家于燕北安集寺。襟怀洒落，道貌清奇，晦迹林泉，避脱声利。大中四年，杖锡离燕，孤征朔雪，祁？千里，径涉五峰，诣华严寺菩萨堂，瞩文殊衍容，施右手中指，沃以香膏，？以星焰，光腾半日，怡颜宛然。次遍游圣境，终始两期，其所睹祥瑞，不可胜纪。后至西台，遇古圣迹曰秘魔岩，乃文殊降龙之处也。遇稽首之际，忽见轻云金光，烂烂骇目，渐分雉堞，方势如城，咸曰金色世界也。化事毕，复问其处，僧曰：“是地古德尝止，国赠金光照大师，名节孤峻，神异不测，载录图记，人具尔瞻。”遇悲喜交感，久而不已，始结茅兹地，涤虑澄神，入三摩谿多四十九日，鸟排花雨，人萃香云，扬袂抠衣，归依若市。乃创兴佛庙僧宇，十有七年不下山顶。日以九会杂花五部等法，玩味精课，不遗寸阴。觉圣力潜通，道出凡境，事或礼问，他见莫寻。士向庶归，克念如圣。洎懿皇运末，遇易旧规，或拊掌大絃，或击石异语，类不轻之海记，同楚客之佯狂。及祸发中原，寇盗交骋，夷撤宫壶，銮辂蒙尘，因省师言，其若合契矣。时属河东武皇遥向真德，就山致信。迨文德元年夏四月，命宪州刺史马师素传意邀请，遇曰：“浮世之宠辱，我何累哉？”坚拒远征，确乎不拔。以其年十月十八日，召门弟子曰：“尔可检护戒足，好住余生，吾与汝决矣。”言讫，俨然蝉蛻，俗岁七十二，僧夏五十一。门人太文等哀恻哽绝。龙纪初祀四月十八日阍维，获舍利罗凡数十粒。文公坚贮孝思，旌建灵塔，衔哀出入，投诣天府。武皇赙赠加等，文武崇烈，及岚宪等州牧守，例刻清俸，俾助良因，建乎坟塔。即以九月二十五日封窆基也。

○唐成都府永安传

释永安，眉州洪雅人也。身裁么麽，面色黧黑干，言音鄙恶，而识量宽舒，大抵不可货也。大中八年三月中，诣成都，云造谒府帅白公敏中，请奏寺额。以其足跋，肩輿而至，人皆未尝见其登圉而旋溺也。故时呼为无漏师，安置圣寿寺中且十日。白中令俾羌僧五六，昼夜互守之而伺察马。内外饮食，亦略同常人，而无解衣去二行之意，详其十辰之积，便旋何所？毕不可知。司徒白公奏额到日，便辞归眉郡。判官卢求见之，谓为小沙弥耳。人云“此师年已八十余矣”。

系曰：蜀人谓安公为无漏师者，非也。夫断烦恼不复随增，故永无种习，乃称之无漏。今以饮食之余，归于九孔，安公止二窍

不流耳。《瑜伽》云“无内逼恼分也”。然其位次忍住难知，啜茹如常，何缘不流二窍？

观夫《对法论》中有清静依止，住食示现依止。住食二种，则罗汉菩萨佛也。若然者，安公是示现依止住食，虽食不食，滓秽奚生？必也正名，以召其体哉。

○唐衢州灵石寺慧闻传

释慧闻，信安人也。多劝勉檀那以福业为最，常言未预圣位，于五道中流转，非福何凭？尝于隔江铸丈八金身像，州未听许，铜何从致？且曰：“待大施主。”居无何，有清溪县夫妻二人将嫁资鉴来舍，闻为誓咒之曰：“此鉴鼓铸若当佛心前，乃是夫妻发心之至也。”迨脱摹露像，果然鉴当佛心胸间矣。又尝往豫章劝化，获黄金数镒，俄遇贼劫掠。事急，遂投金水中曰：“虑损君子福田，请自捞漉。”舍闻，闻去，贼徒泳水求之，不得。及闻到州，金冥然已在其院中。若役人用匠，不避讥嫌。得物，见多自提，鱼贯彘肩，饲工人焉。又山路虎豹，闻或逢之，将杖叩其脑曰：“汝勿害人，吾造功德，何不入缘？”明日，虎衔野猪投闻前，弭尾而去。凡举事皆成，归信如流，率多奇异焉。

○唐朔方灵武下院无漏传

释无漏，姓金氏，新罗国王第三子也。本土以其地居嫡长，将立储副，而漏幼募延陵之让，故愿为释迦法王子耳。遂逃附海舰，达于华土。欲游五竺，礼佛八塔，既度沙漠，涉于阗已西，至葱岭之墟，入大伽蓝，其中比丘皆不测之僧也。问漏攸往之意，未有奇节而诣天竺。僧曰：“旧记无名，未可辄去，此有毒龙池，可往教化。如其有验，方利涉也。”漏依请登池岸，唯见一胡床，乃据而坐，至夜将艾，霆雷交作，其怪物吐气蓬勃，种种变现，眩曜无恒。漏瞑目不摇，譬如建木挺拔，岂微风可能倾动邪？持久乃有巨蛇骧首于膝上，漏悲悯之极，为受三归而去。复作老人形来致谢曰：“蒙师度脱，义无久居。吾三日后舍鳞介苦，依得生胜处。此去南有磐石，是弟子舍形之所，亦望闲预相寻遗骸可矣。”后见长伟而夭矫，僵于石上坎。寺僧咸默许之，又曰：“必须愿往天竺者，此有观音圣像，祷无虚应，可祈告之。得吉祥兆，可去勿疑。”漏乃立于像前，入于禅定，如是度四十九日，身婴虚肿，略无倾倚。旋有鼠儿犹弹丸许，咋左胫，溃黄色薄脓，可累斗而愈。漏限满获应，群僧语之曰：“观师化缘，合在唐土，心存化物，所利滋多。足倦游方，空加闻见，不可强化。师所知乎？”漏意其贤圣之言，必无唐发。如是却回，临行谓漏曰：“逢兰即祝”所还之路，山名贺兰，乃冯前记，遂入其中，得白草谷，结茅栖止。无何，安史兵乱，两京版荡，玄宗幸蜀，肃宗训兵灵武。帝屡梦有金色人，念宝胜佛于御前。翌日，以梦中事问左右，或对曰：“有沙门行迹不群，居于北山，兼恒诵此佛号。”肃宗乃宣征，不起，命朔方副元帅中书令郭子仪亲往谕之，漏乃爰来。帝视之曰：“真梦中人也。”迨乎羯虏荡平，翠华旋复，置之内寺供养，谅

乎猴轻金锁，鸟厌雕笼，累上表章，愿还旧隐。帝心眷重，答诏迟留，未遂归山，俄云示灭焉。一日，忽于内门右闑之上化成双足，形不及地者数尺。闾吏上奏，帝乘步辇亲临其所，得遗表，乞归葬旧隐山之下。即时依可，葬务官供。乃宣卸门扇，置之设奠，遣中使监护，卤簿送导。先是漏行化多由怀远县，因置廨署，谓之下院。丧至此，神座不可辄举，众议移入，构别堂宇安之，则上元三年也。至今真体端然，曾无变坏，所卧中禁户扇，乃当时之现瑞者，存焉。

○唐杭州灵隐寺宝达传

释宝达者，不知何许人也，遁是名山，高乎道望，号刹利法师。以持密咒为恒务。其院中有印沙床、照佛鉴。往者浙江也，惊涛巨浪，为害实深。其潮大至，则激射今湖上诸山焉。达哀其桑麻之地，悉变为江，遂诵咒止涛神之患。一夜，江涛中有伟人，玄冠朱衣，导从甚繁而至，谓达曰：“弟子是吴伍员复仇雪耻者，非他人也。师慈心为物，员已闻命矣。”言讫而灭。明日，寺僧怪问：“昨夜车马之喧为谁？”具言其事。其冥感神理，多此类也。自尔西岸沙涨弥年，还为百姓殖利，时所推称，翕然敷化。后罔知所终。

系曰：印沙床者何？通曰：“有道之士居山，必非宝器，疑其范筑江沙，巧成坐榻欤？”照佛鉴者何？通曰：“即鉴灯耳。以其陆鸿渐贞元中多游是山，述记记达师节俭而明心之调度也。”

○唐代州北台山隐峰传（亡名雉鸠和尚）

释隐峰，俗姓邓氏，建州邵武人也。稚岁憨狂，不？父母之命，出家纳法。后往观方，见池阳南泉禅师，令取澡罐，提举相应，为愿公所许焉，终认嗣马禅师耳。峰元和中言游五台山，路出淮西，属吴元济阻兵，违拒王命。官军与贼遇，交锋未决胜负。峰曰：“我去解其杀戮。”乃掷锡空中，飞身冉冉随去，介两军阵过，战士各观僧飞腾，不觉抽戈匣刃焉。既而游遍灵迹，忽于金刚窟前倒立而死，亭亭然其直如植。时议灵穴之前，当昇就？。屹定如山，并力不动，远近瞻睹，惊叹希奇。峰有妹为尼，入五台，嗔目咄之曰：“老兄畴昔为不循法律，死且荧惑于人。”时众已知妹虽骨肉，岂敢携贰，请从恒度，以手轻攘，僂然而仆。遂荼毗之，收舍利入塔，号邓隐峰。遗一颂云：“独弦琴子为君弹，松柏长青不怯寒。金矿相和性自别，任向君前试取看。”

系曰：僵尸累足，于事一同。立逝坐亡，为修三昧。此者头蝼厚载，履蹈青冥，逆恒理以难知，谅是人而不测。若斯倒置，振古一人。其妹尼之让也，若屈平为女之骂焉。如幻之功，善权大矣。或曰：“淮西之役，《唐书》胡弗载隐峰飞锡解阵邪？”通曰：“小说所传，或得其实。是故《春秋》一经，五家作传，可得同乎？”

又汉州开化寺释亡名，先因入寺，见瑞应交现，遂誓舍身，克苦为期。忽于殿中焚香次，俄睹地屋皆为琉璃色，有菩萨乘五色云下庭中曰：“汝极坚至，必当得道，吾来证汝。”亡名叩头礼拜，斯须不见。寺僧至云“学院内皆变琉璃色”。叹赧不已。其僧复勤节行焉。又邓州有僧亡名，年且衰朽，游行穰、邓州间，日食二雉鸠，僧俗共非之。老僧终无避回。尝饌羞之次，有贫士求阻，分其二足与之食。食讫，老僧盥漱，双鸠从口而出，一则能行，一则匍匐在地。贫士惊怪，亦吐其饭，其鸠二足复全。其僧实不食此禽。自尔众人崇重，号曰南阳雉鸠和尚也。有叹之曰：“昔青城山香阁梨饮酒啖肴，然后吐出，鸡羊肉皆化作本形，飞鸣而入坑穴中，同也。”

○唐兴元府梁山寺上座亡名传

释亡名者，不知何许人也，居褒城西数十里，号中梁山，数峰回负，翠碧凝空，处于厥中。行终诡异，言语不常，恒见者弗惊，乍亲者可怪。平常酷嗜酒而食肉，粗重公行，又纲任众事，且多折中，僧亦畏焉，号为上座。时群缁伍一皆仿习，唯此无惧。上座察知而兴叹曰：“未住净心地，何敢逆行？逆行非诸人境界。且世云金以火试，待吾一日一时试过。”开成中忽作大饼，招集徒众曰：“与汝曹游尸陀林去。”盖城外山野多坟

冢，人所弃尸于此，故云也。上座踞地舒饼裹腐烂死尸，向口便啖，俊快之状颇嘉，同游诸僧皆掩鼻唾地而走。上座大叫曰：“汝等能鉤此肉，方可鉤他肉也已。”自此缁徒警悟，化成精苦焉。远近归信。时右仆射柳仲郢任梁府，亲往礼重。终时云年可八九十。真影存于山寺。至今梁、益、三辅盼止呼为兴元上座云。奇踪异迹不少，未极详焉。

系曰：上座始则尔之教矣，后则民胥效矣。曾不知果证之人，逆化于物，终作佛事，用警未萌。故若归其实，乃《对法论》中诸大威德菩萨示现食力住故也。如有妄云得果，此例而行，则如何野干鸣拟学师子吼者乎？

○唐太原崇福寺文爽传

释文爽，不详姓氏、何许人也。早解尘纓，袂开爱网，从师问道，天然不睡。纵困惫之极，亦唯趺坐，此行长坐头陀也。后独栖丘陇间，霖雨浹旬，旁无童侍，有蛇入爽手中蟠屈。时有人召斋，彼怪至时不赴，主重来请，见蛇，惊惧失声，蛇乃徐徐而下。固命往食，爽辞过中不食。终夕，翌日有狼呀张其口，奋跃欲噬咋之状者三，爽悯其饥火所熬，复自念曰：“秽囊无吝施汝一阻，愿疾成坚固之身。汝受吾施，同归善会。”斯须，狼乃弭耳而退。及乎卒日，空中钟磬交响，迟久方息。门徒乡人聚送殓之。尔日有幡数十口蔽空前导，异香普熏，举众悲叹，如失恃怙焉。

○唐福州保福寺本净传

释本净者，未详何许人也。道气高抗，人睹肃然。响闽岭多禅宗知识，故历参之。闻长溪县霍童山多神仙洞府，乃经中所谓天冠菩萨领徒侣居此说《华严性海法》。采樵者多闻天乐异香，鸟兽之瑞。然山中不容凡恶，故多被斥逐。净入山结茅为室，有石穴谓之毒窟。净居于穴侧，其龙夭矫而出，变现无恒，遂呼召之而驯扰焉。又诸猛虎横路为害，采樵者不敢深入，净抚其头，诚约丁宁，弭耳而去。尝清宵，有九人冠帻裤褶称寄宿，尽纳诸庵内。明旦告辞，偕化为鹤，鸣唳空中而去。净罔知其终也。

○唐成都府法聚寺法江传（兴善寺异僧）

释法江者，江东人也，来游岷蜀，居于法聚寺。寺即随蜀王秀之造也。寺内有仁寿中文帝树舍利塔。江以慈悯为怀，多逆知其来，言无少误。尝在房中谓门人曰：“外有万余人，尽戴帽形且挛褊，从吾乞救。汝速出寺外求之。”不见人物，弟子怪师之言何其倒乱。徙倚之盼，有数十人荷檐竹器中螺子至，江曰：“此之是欤？”命取钱赎之，投于水中矣。又长安大兴善寺，本隋舍卫寺也，至唐先天中火灾，殿宇荡然，唯遗基耳。明庆中东明观道士李荣者，本巴西人也，好事薄徒，多与释子争竞优劣。荣来玄都观，因率黄冠指其灰烬而嘲之曰：“道善何曾善？言兴且不兴。如来烧赤尽，唯有一群僧。”僧中有愤其异宗讥诮者，急募劝重新缔构，复广于前。十二亩之地，化缘虽日盈千万，计未能成。僧众搔首踖蹢，未知何理克成。忽有一僧，衣服粗弊，形容憔悴，负一破囊入缘，言速了佛殿，步骤而去。启视之，则黄金也，校耒之一千两矣。时人奇之，由此檀施日繁，殿速成矣。

○唐彭州九陇茶笼山罗僧传

释罗僧者，蜀圣寺中得果位人也。尝寝疾于五台山，同会僧人俱不测也，而瞻视之，曾无怠慢。将及九旬而病愈，临诀之际曰：“深感所苦，而烦看视，今遂平复，由师之力。我住在剑外九陇郡之茶笼山尔。异日游方，无忘相访也。”暮岁而至蜀，历访群峰，遍讯老樵辈。且曰未尝闻兹山名。乃叹曰：“噫，病禅之妄也？”将回，遇山童曰：“某是彼岩之聚沙者。”即前导而去，俄睹殿塔俨空，房廊环肃，果值昔之卧病者，迎门叙故。日将暮矣，而谓之曰：“兹寺非得漏尽通不能至此。尔以我宿缘一谐遽止。言寄宵乎，斯为未可。尔其克勤修证，至此胡难？”乃命旧童送师归去。其僧回望，但见岩壁峭峻，杉桧莽苍而已。则开成中也。时悟达国师知玄著传之。次得僧可思，尤闲地理，命为玄作他日安莹兆之地，得景丹前峰，其山若雉堞状，虽高低起伏，而中砥平。俄有里人耆老曰：“古相传云茶笼山矣。”

○唐明州奉化县契此传

释契此者，不详氏族，或云四明人也。形裁褊仄，蹙安页蟠腹，言语无恒，寝卧随处。常以杖荷布囊入廛肆，见物则乞，至于醯酱鱼菹，才接入口，分少许入囊，号为长汀子布袋师也。曾于雪中卧，而身上无雪，人以此奇之。有偈云：“弥勒真弥勒，时人皆不识等句。人言慈氏垂迹也。又于大桥上立，或问：“和尚在此何为？”曰：“我在此觅人。”常就人乞啜，其店则物售。袋囊中皆百一供身具也。示人吉凶，必现相表兆。亢阳，即曳高齿木屐，市桥上竖膝而眠。水潦，则系湿草屨。人以此验知。以天复中终于奉川，乡邑共埋之。后有他州见此公，亦荷布袋行。江浙之间多图画其像焉。

○唐邺都开元寺智传

释智𨔵，不知何许人也。少而英伟，长勤梵学，凡诸经论，一听入神。其所讲宣也，音辩浏亮。每临台座，自谓超绝。所患者听众无几。虞其以水传器，器器不空，鏝我独无，乃辜佛意。遂负箱帙遍历名山，以询智者。末至衡岳寺，憩息月余。尝于寺闲斋，独自寻绎疏义，复自咎责曰：“所解义理，莫违圣意乎？”沈思兀然，偶举首见老僧振锡而入，曰：“师读何经论？穷何义理？”疑其名岳之内，车辙原中，罗汉混凡，曾何可测？乃自述本缘，因加悔责。又曰：“倪蒙贤达指南，请受甘心，铃口结舌，不复开演矣。”老僧笑曰：“师识至广，岂不知此义？大圣犹不能度无缘之人，况其初心乎？师只是与众生无缘耳。”曰：“岂终世若此乎？”老僧曰：“吾试为尔结缘。”遂问“今有几赀粮耶？”曰：“自北徂南，裂裳裹足，已经万里，所赀皆罄竭矣。见受时九条衣而已。”老僧曰：“只此可矣。必宜鬻之，以所易之直，皆作麩饼、油食之调。”如言作之，约数十人食，遂相与至穰野之中，散掇饼饵，焚香长跪咒曰：“今日食我施者，愿当来之世与我为法属，我当教之，得至菩提。”言讫，乌鸟乱下啄拾。地上蝼蚁蝇蚋莫征其数。老僧曰：“尔后二十年，方可归开法席。今且周游，未宜讲说也。”言讫而去。由是精进道力，不倦研磨，义味滋多，志在传授。至二十年，却归河北，盛化邺中，听众盈千数人，皆年二十已来，其老者无二三人焉。

系曰：中有末位，变定难移。今世所修，必招当果。今智依异僧之教，令二十年后待听徒，一如其言，如此则当生修当生果（当云），故弗诬矣。《诗》曰：“俟河之清，人寿几何？”将知永寿之人，河清屡见矣。

○唐凤翔府宁师传

释宁师者，歧阳人也，亡其名，时以姓呼之耳。往来无恒止，出处如常僧。昭宗即位初年，居山寺中，忽暴终，安卧体暖，忽忽如烂寝焉。僧徒环守，不敢殓。三日而苏，众惊奔问之。曰：“我为冥司追摄，初见一判官云：‘和尚寿在而无禄。’乃召吏，语之与检覆。吏曰：‘只有干荷叶三石。’因令注于簿。又命一人引之巡历观游去。乃入一门，见数殿各有榜。于是徒步至一殿，署云李克用。于牖盼窥

有一黑龙，眇一目，中立铁柱，连锁縈维之。次一殿署曰朱全忠，乃青鰲白额虎，锁系如初，而前有食豕人血狼籍之状。次署曰王建，黄金床上卧一白兔焉。次署曰李茂贞，具冠冕如王者，左右数侍女焉。次署曰杨行密，窗牖庳黑，不能细瞻。问使者曰：‘此诸怪状者何邪？’曰：‘将来王者也。’旁厢数殿，望之黯黯，使者不容。引去，还至本所判官厅事，谓使者曰：‘好送师回，但多转念功德经。’宁问曰：‘孰是功德经？’曰：‘《金刚般若》是欤！此经冥盼济拔，功力无比。’及乎苏醒，四顾久之，乃述前事。闻者骇然，遂闻于官。后岐帅怪宏迂而妄，都不之信。厥后茂贞果封秦王。李克用枉滥杀戮，号独眼龙也。朱氏革于唐命，残害安忍，传翼择肉，非虎而何？蜀王建属兔，阻兵自固。天祐丁卯，僭伪号以金饰床也。诸皆符合。宁自此每断中，唯荷叶汤而已。其诸食饌，逆口不距。秦陇之人往往请宁入冥，预言吉凶，更无蹉跌。或请斋，争办净池嫩荷，号为入冥和尚，终于歧下。

系曰：入冥之说与梦略同。穆王将化人欢宴，秦穆得上帝剪鹑，形在人间，神游上界，前言既发，后事必然。是知六候八征，谅非虚也。宁师入冥，与后唐马■见天符下以潞王为天子无异。宁所见殿中物象题榜，终符其述。谓之为梦想，梦想有征；谓之为神游，神游不谬。将知觉梦惟一，明昧有殊，如《摄论》云如梦等觉时，一切处唯有识也。有若古莽国多眠，五旬一觉，以梦为实，以觉为妄。若然者，觉之所为，为梦之先兆也，而取实于梦中真实也。梦觉反用，其犹一欤。宁师非妄者，果梁革唐命，二李、王、杨皆与天子抗衡。诸殿远望者，得非余割据群雄偏霸者乎？所食荷叶，与随僧法庆同。故《幽冥》等录中康何德次李山龙入冥而返，说事皆验焉。经云：“犹如睡梦人，知一切诸物，有身不移本处”是也。

卷二十二

◎感通篇第六之五（正传十三人附见五人）○后唐韶州灵树院如敏传

释如敏，闽人也。始见安禅师，遂盛化岭外，诚多异迹。其为人也，宽绰纯笃，无故寡言，深悯迷愚，率行激劝。刘氏偏霸番禺，每迎召敏入请问，多逆知其来，验同合契。广主奕世奉以周旋，时时礼见，有疑不决，直往询访。敏亦无嫌忌，启发口占，然皆准的，时谓之为乞愿，乃私署为知圣大师。初敏以一苦行为侍者，颇副心意，呼之曰所由也。一日，随登山脊盼，却之，潜令下山，回顾见敏入地焉。苦行隐草中覆其形，久伺之乃出，往迎之，问曰：“师焉往乎？”曰：“吾与山王有旧，邀命言话来。”如是时或亡者，乃穴地而出，严诫之曰：“所由无宜外说，泄吾闲务。”后终于住院，全身不散。丧塔官供，今号灵树禅师真身塔，是欤！

系曰：灵树如遇大安，必寿腊绵长，出人常限。疑此亦所闻异辞矣。○后唐天台山全宰传

释全宰，姓沈氏，钱塘人也。孩抱之间，不喜荤血，其母累睹善征，劝投径山法济大师削染。及修禅观，亭亭高竦，不杂风尘，慕十二头陀以饰其行，谚曰宰道者焉。迨乎诸方

参请，得石霜禅师印证，密加保任，入天台山暗岩以永其志也。伊岩与寒山子所隐对峙，皆魑魅木怪所丛萃其盼。宰之居也二十余年，恶鸟革音，山精让窟。其出入经行，鬼神执役，或扫其路，或侍其旁，或代汲泉，或供采果，时时人见，宰未尝言。后天成五年，径山禅侣往迎归镇国院居，终于出家本院焉。

○晋巴东怀？传

释怀？者，不知何许人。其为僧也，憨而且狂，乃逆知未兆之事，其应如神。乾宁中，无何至巴东。？且能草圣，笔法天然，或于寺观店肆壁书佛经道法，以至歌诗鄙俚之词，靡不集其笔端矣。与之语，阿唯而已。里人以神圣待之。刺史干公患其惑众，系狱诘之，乃以诗通状辞，意在闽川之西东，然章句靡丽，州将异而释之。又详其旨，疑在海中，得非杯渡之流乎？行旅经过，必维舟而谒焉，辩其上下峡之吉凶，贸易经求物之利钝。客子恳祈，唯书三五行，终不明言，其事微密验。时荆南大校周崇宾谒之，书遗曰：“付皇都勘。”尔后入贡，因王师南讨，遂紮南府，终就戮也。押牙孙道能谒之，书字曰“付竹林寺”。其年物故，营葬于古竹林寺基也。皇甫铉知州，乃画一人荷校，一女子在旁。寻为取民家女，遭讼，辄身入府矣。有穆昭嗣者，波斯种也，幼好药术，随父谒之，乃画道士乘云提一匏壶，书云“指挥使高某牒衙推”，穆生后以医术有效，南平王高从诲令其去道从儒，简授摄府衙推。属王师伐荆州，？乃为诗上南平王曰：“马头渐入扬州路，亲眷应须洗眼看

。”是年高氏输诚于淮海，遂解重围。其他异迹多此类也。尝一日题庭前芭蕉叶云：“今日还债业，州县无更勘穷。”往来多见，殊不介意。忽为人所害，身首异处，刺史为其茶毗焉。

○晋闽州光国院行遵传

释行遵，福州闽王王氏之仲子。后唐庄宗即位，入洛进方物，因留京郊同光未，会明宗将入，兵乱相仍，乃自剪饰，变服为僧，窜身巴蜀。逮晋开运中状貌若七十余，然壮力不衰。或询其年腊，则必杜默。于闽中寓光国禅院，院徒以律法住持，人不之知遵之能否。有李氏子家命斋，饮豨之次，錫起出门叫噪，若有所责。谓李曰：“今夜有火，自东南至于西北街，邻居咸令备之。”是夕果然煨烬无遗。众聚问其故，曰：“昨一妇女衣红秉炬而过，老僧恨追不及耳。”又于赵法曹家，指桃树下云：“有如许钱。”不言其数，赵乃召人发之，畚鍤方兴，适遇客至，为家僮所龃喧之际，尽化为青泥。人各争得百余，后圯墁之，门壁坏，往往而有焉。遵或经人冢墓，知其家吉凶。至于风角鸟兽，闻见之盼，预言灾福，后必契合，故州间远近，咸以预言用为口实。终于晋安玉山，缁徒为其茶毗焉。

○晋襄州亡名传

释亡名，不知何许人也。观方问道，不憚艰辛。胜境名山，必约巡访矣。天福中，至襄州禅院挂锡，与一僧循良守法，同九旬禁足。其人庠序言多诡激，称名曰法本，朝昏共处，心雅相于，若久要之法属焉。法本云：“出家习学，即在邕都西山竹林寺。寺前有石柱，他日有暇，必请相访。”其僧追念前约，因往寻问。泊至山下村中，投一兰若止宿，问彼僧曰：“此去竹林寺远近？”僧乃遥指孤峰之侧曰：“彼处是也。古老相传，昔圣贤所居之地，

今但有名存耳，故无精庐净舍立佛安僧之所也。”僧疑之，诘旦而往，既睹竹丛，丛中果有石柱，茫然不知其涯漫。僧忆法本临别之言，但扣其柱，即见其人。遂以小杖击柱数声，乃觉风云四起，咫尺莫窥，俄尔豁开，楼台对耸，身在三门之下。逡巡，法本自内而出，见之甚喜。问南中之旧事，说襄邓之土风，乃引度重门，升秘殿，领参尊宿，若纲任焉。顾问再三，法本曰：“早年襄阳同时禁足，曾期相访，故及山门也。”尊宿曰：“善。可饭从请出，在此无座。”言无凡僧之位次也。食毕，法本送至三门相别。既而天地昏暗，不知所向。顷之，宛在竹丛石柱之侧，余并莫睹。其僧出述其事，罔知伊僧其终焉。

系曰：入竹林僧，何人也？通曰：“遇仙之士，亦仙之士，圣寺之游，岂容凡秽？一则显圣寺之在人间，一则知圣僧之参缁伍。无轻僧宝，凡圣混然。此传新述于数人，振古已闻于几处。且如北齐武平中，释圆通曾瞻讲下僧病，其僧夏满病差，约来邕中鼓山竹林寺，事迹略同。此盖前后到圣寺也。

○汉洛阳告成县狂僧传（曹和尚）

释狂僧者，晋开运中遍于邑下乞石矿灰，日夜驱荷入大、小留二山中，谓行人乡叟曰：“要造宫阙。”然莫之测也，皆谓为“风狂，有何准据”？如是运至数千石，封闭甚固。其后乡人不意此僧绝乎踪迹。属乾祐初，汉祖既入今东京即位，不逾年而崩。当是时也，诏卜睿陵于大留山下，计虑者云：“砖瓦数百万，此山之内可陶而烧。其如矿灰乌可得乎？”俄有里胥曰：“此地元有僧积藏灰可数千石，准用应足。”按行使山陵毕，用无子遗，其僧也非狂，由此方证之矣。又镇州释曹和尚者，恒阳人也，不常居处，言语纠纷。败襦穿屨，垢面黯肤，号风狂散逸之伦也。齐赵人皆不测，而多重施。或召食，食毕默然而去，其状犹不醉而怒欤？府帅安重荣作镇数年，讽军吏州民例请朝廷立德政碑。碑石将树之日，其状屹然。曹和尚指之大笑曰：“立不得，立不得。”人皆相目失色，主者驱逐，曹犹口不绝声焉。至重荣潜萌不轨，秣马利兵，垂将作逆，朝廷讨灭，碑寻毁之。凡所指斥，犹响答声也。后不测所终。

○周伪蜀净众寺僧臧传（大慈寺亡名）

释僧臧者，俗名臧也，姓王氏，京兆人。少而察慧，辞气绝群。大中十一年，杜审权下对策成事秘书监冯涓即同年也。乾符中，巢寇充斥，随流避乱。至渚宫投中令成汭，汭攻淮海，不利，遂削发出家。属雷满据荊州，襄州赵凝攻破之。梁祖遣高季昌诛灭焉，江陵遂属高氏。臧避地夔峡间。后唐同光三年入蜀，寻访冯涓，已死矣。遂居净众寺，而髭发皓然，且面色红润，逍遥然，人不测其情伪。有华阳进士王处厚者，乙卯岁于伪蜀落第，则周显德二年也，入寺写忧于松竹间，见臧。臧曰：“得非王处厚乎？”处厚惊曰：“未尝相狎，何遽呼耶？”臧曰：“偶知耳。”遂说本唐文宗大和初生，止今一百三十余载矣。处厚曰：“某身迹奚若？”“子将来之事极于明年。而今而后，事可知矣。”意言蜀将亡也。嘱令勿泄。明日再寻，杳沉声迹。一日，复扣关自来云：“暂去礼峨眉，结夏于黑水方还。”臧于桹头拈文卷览之，则处厚府试赋稿，曰：“考乎真伪，非君烛下之文。何多诳乎？”遂探怀抽赋稿示之，“此岂非程试真本乎”？处厚惊竦不已，乃曰：“仆试后偶加润色，用补烛下仓卒之过也。师何从得是本也？”臧曰：“非但一赋，君平生所作之者，皆贮之矣。”明日访之，携处厚入寺之北隅，同谒故太尉幽公杜琮之祠坐于西庑下，俄有数吏服色龌杂，自堂宇间缀行而出，降阶再拜。臧曰：“新官在此，便可庭参。”处厚惶辩而作。臧曰：“此辈将为君之驱策，又何惧乎？宁知泰山举君为司命否？仍以夙负壮图，未酬前志，请候登第后施行。复检官禄簿，见来春一榜人数已定，君亦预其盼，斯乃阴注阳受也。策人世之名，食幽府之禄，

此阳注阴受也。”处厚震骇，不知所裁，但问“明年及第人姓名为谁耶”？臧索纸笔，立书一短封与之，诫之严密藏之，脱泄，祸不旋踵。须臾吏散。臧携手出庙，及暝而去。至春试罢，臧来处厚家，留一简云：“暂还弊庐，无复再面也。”后往

寺僧堂中问之，已他适矣。乃坼短封视之，但书四句云“周成同成，二王殊名。王居一焉，百日为程”。及乎榜出，验之有八士也。二王，处厚与王慎言也，王居一焉。恶其百日为程，处厚唯狎同年，置酒高会，极遂性之欢。由是荒乱不起，是夜暴亡。同年皆梦处厚蓝袍槐笏，驱殿而行。验其策名之荣，止一百二十日也。详其緘之生于文宗大和初也，成身在宣宗大中，王处厚遇之已一百三十余岁也。次伪王蜀城都大慈寺僧（亡名）恒讽诵《法华经》，令人乐闻。时至分卫，取足而已。身微所苦，有示方药。伊僧策杖入青城大面山采药。沿溪越险，忽然云雾四起，不知所适。有顷，见一翁，僧揖之，序寒暄，问“何以至此”！僧曰：“为采少药也。”翁曰：“庄舍不远，略迂神足，得否？”僧曰：“迷方失路，愿随居士。”少顷云散，见一宅宇阴森。既近，翁曰：“且先报庄主人矣。”僧入门睹事，皆非凡调。问曰：“还斋否？”曰：“未食。”焚香且觉非常郁悖，请念所业经。其僧朗声诵经，勉令诵彻部。所馈斋馔，皆大慈寺前食物。斋毕，青衣负竹器以香草荐之，乃施钱五贯，令师市胡饼之费。翁合掌送出。或问云：“此孙思邈先生也。到寺已经月余矣。其钱将入寺，则黄金货泉也。王氏闻之，收金钱，别给钱五百贯。其僧散施之，将知仙民恒在名山。次嘉州罗目县有诉孙山人赁驴不偿直，乞追摄。问小童云：“是孙思邈也。”县令惊怪，出钱代偿。其人居山下，及出县路，见孙公取钱二百以授之，曰：“吾元伺汝于此，何遽怪乎？”得金钱僧不知其终所。

○周杭州湖光院师简传

释师简，姓赵氏，丹丘人也。弗循戒范，放肆恬然，拥破纳衣，多诵词偈。好悬记杭越间灾福，初无信者，验犹合符。于一行景淳，山经地理，别得径门，常言昔秦山道辩相冢得术，余无取焉。喜为人迁山相冢，吉凶如其言。居无定所，多游族姓家，言腹饥，便求鸡肉餐。此外得美酒，啜数杯而去，初无言谢。然长于勒书，大字题牌，寺观门额，书成相之，吉凶随言，久近验之。始居杭西湖旁院，无疾而终。后有行客自长沙市中见，携手话旧。寄言与崇寿院主，“汝先负钱若干，今放汝我眠床刍荐下层，有纸裹肉脯屑，必应腐败，为弃之。”院僧依言，果然见之，因写貌供养。简曾言“尖头屋已后火化去”。及州南塔戊午岁被天火？之，应言不爽矣。

○大宋明州乾符寺王罗汉传

释王罗汉者，不测之僧也。酷嗜彘肉，出言若风狂，后亦多验云。尝曝衣，有盗者将欲褰之，低头佯睡。有物，人就之乞，终无吝色。及开宝初年六月内忽坐终，三日后漆布之，忽闻两颊间鸣咤声，皆云溃烂。夜寄梦与数人曰：“布漆我昏闷，如何开焉？”明日，召漆工剥起，肉色红白，有圆粒舍利堕落，收而供养。至今肉身存于本寺。时僧正赞宁作碑纪异。汉南国王钱氏私易名为密修神化尊者。

○大宋潭州延寿院宗合传（道因）

释宗合，闽越人也，游岳泛湘，以求知识焉。其为僧也，介立而寡欲，群居终日，唯笑而已。南楚之人且多信重。后居延寿院，故谏议大夫贾公縑判军府闻之，往谒见，言话不接。輿人议曰“得道之人，岂入恒量度中耶”？贾乃坚请往文殊院住持。尔日登座，聊举禅要而散。明日，告众曰：“有故暂出，诸贤不宜留难。”其装束若行脚状，渡彭蠡，至黄州驿前，屹然立终。遐迩奔竞观礼。时马铺使臣为营丧务，造塔于立终处，则开宝二年也，今

号真身院是欤。又澠池大安寺释道因，不知何许人也。游处澠池、鑠、涧之间，自言：“出家人守俭，则少干人。与畜类为同行，则无是非盈耳。”尝养一乌犬，出入起居，不相忘舍。每食以铁钵就火而炊，糜熟，与犬同食。或前或后，行止奇异，人莫能测。一旦僧亡，犬亦坐毙。今大安寺塑其像，而肉身两存，开宝中也。洛下崇信，香花满龛焉。

○大宋邛州大邑灵鹫山寺点点师传

释点点师者，不知何许人也。孟氏广政中，隐邛南大邑山寺，多游麀肆中。虽事削染，恒若风狂。或与人接，必指点而言，故目是称焉。有命斋食者，酒肉不间，率以为常，俚人亦不之厌也。日之夕矣，乃市黄白麻纸笔墨，蜚怀袖以归。行数里，沈酣而至瞑矣。所居之室，虽有外户，且无四壁。入后阖扉，人不得造。初邻僧小童，蹑足伺之，见秉烛箕踞，陈纸笔于前，诃责大书，莫晓其文字。往往咄嗟如决断处置。久之，明暗间熟视闪烁，若有人森列状如曹吏，则襦裳非世之服饰。观者怖惧而退。诘旦，微询其事，怒而弗答。居数载，印笮之人咸神异之，后不知其终。

系曰：点点师而能劾鬼，别无高令矜生物善，亦与古人判冥司事者同邪？通曰：“所作在心，如不从正道力中生，则与五斗米道同。如不从有心符禁中起，则感鬼神归信驱策之耳。故《善戒经》云：‘若须神通应感化度，为示神足。’《庄严论》中菩萨以神通变化而为戏喜。又或此是辟支行位人也，故论云：‘独觉依彼。’彼村落乞食，以身济度，不以语言，示现种种神通境界，为令诽谤者归向故。”

○大宋天台山智者禅院行满传

释行满者，万州南浦人也。羁贯成童，厥性明黠，笃辞所亲，求为佛子。受戒方毕，闻重湖间。禅道隆盛，石霜之门，济济多士，遂往求解。属诸禅师弃代，满往像章，观诸法席，既得安然。次闻天台灵圣之迹，由是结束游之，栖华顶峰下智者院，知众僧茶灶。见人怡怍，居几十载，未睹其愠色。卧一土床，空其下，烧粪扫而暖之。每日脱衣就床，则蚤虱蛰蛰焉暖之，及鉋饲得所，还著衣如故。或人潜扞其衣，蚤虱寂无踪矣。先是居房槛外有巨松，横枝之上寄生小树。每遇满出坐也，其寄生木必裊裊而侧，时谓此树作礼茶头也。或不信者，专伺满出，则纷纷然。满去

，则屹立亭亭，更无动摇虽随众食，量少分而止。四十年内，人未见其便溺。以开宝中预向人说“我当行矣”。令众僧念文殊名号相助，默焉坐化，春秋年可八十余。满多作偈颂以唱道焉。

○大宋魏府卯斋院法圆传（矿师李通玄）

释法圆，俗姓郝，真定元氏人也。宿殖之缘，出尘无滞。后唐长兴二年，投本府观音院勤勤诵习，师与落发，间岁受满足戒。后策杖负囊，巡礼诸方。至韶山挂锡，看大藏经焉。晋开运三载，却来本生地，寓天王院。越来年，契丹犯阙，戎王耶律德光回至常山乐城而死。永康王兀谷代为蕃国之主。时旋军自镇州？戎北返，留酋长麻襪耶律解里守于下京，即常山也。晋之臣寮兵士尽在斯矣。汉儿将帅谋逐丑虏，其计未决。两分街巷，汉人在蕃之中者，蕃人先发，无少长皆被屠戮之。天王院八僧殊死，圆预其数也。其时见杀者尤众。初圆引颈两受刃，如击木石然。圆呼曰：“猛乞一剑。”遂身首异处。至暮，圆如梦中忽睹晚照，亦微悟被戮，意之自谓死已。冥冥亦见日月，逡巡举一臂试扪其颈，乃觉如故。再三疑之，不敢摇动，虑其分落也。又谓血凝所缀，重扪之，绕颈有痕，缝如线许大，终身如此。时城中既逐出蕃部，稍定，傍人扶起，诘朝归院。院僧方将食粥，见圆，谓为鬼物，一皆奔散。迟久，审得其实，喜言再生，远迓观礼，且叹希奇。常山之人竞陈供施。圆自后复往诸方，居无定所。暨周显德中，寓太名府成安县卯斋院温寻藏教。以开宝六年，忽谓众曰：“人生虚幻，何能久长？物极则迁，生死涅槃，必无少别。”遂不数日而长逝。黑白之众，若丧所亲。及送就茶毗日，感舍利若黍粟之皂粒焉。春秋七十四，法腊五十一，时范鲁公质亲问圆厥由，深加郑重。再询履行，则大藏经已两过披读矣。又福州楞伽寺矿师者海坛戍卒之子。厥初母氏怀娠，冥然不喜荤。泊乎诞育，歧嶷异常，不啖鱼肉。年及八岁，甘嗜野菜，若锄种者，即言杀伤物命。每见家厨烹火单毛鳞，则手掬沙灰，投于爨镬，贵其不食。自言：“开元寺塔，隋朝中我造也。”多说未萌事，后皆契合。便请出家，因披法服，顶有香气，如？沉檀，号为圣僧。时侍御史皇甫政为留后，请入府署，因作肉包子百数，唯一是素者，盘器交错，悉陈于前，意验其凡圣耳。矿临筵，径拈素者啖之，余者手拂而作。时皇甫部曲一皆惊叹。每出街巷，众人围绕。自言“寿止十三，当定归灭”。至是果终。遂于寺前火化，倾城士女哭泣，依轮王法，树浮图焉。复次唐开元中太原东北有李通玄者言是唐之帝胄，不知何王院之子孙。轻乎轩冕，尚彼林泉，举动之间，不可量度。身長七尺余，形貌紫色，眉长过目，髭鬓如画，发绀而螺旋，唇红润，齿密致。戴桦皮冠，衣大布缝掖之制。腰不束带，足不蹻履，虽冬无皴之患，夏无垢汗之侵。放旷自得，靡所拘绊。而该博古今，洞精儒释，发于辞气，若铿巨钟。而倾心《华藏》，未始辍怀。每览诸家疏义繁衍，学者穷年无功进龋开元七年春，赍《新华严经》，曳筇自定襄而至并部孟县之西南同颖乡大贤村高山奴家，止于偏房中造论，演畅《华严》，不出户庭，几于三载。高与邻里怪而不测。每日食枣十颗，柏叶饼一枚，余无所须。其后移于南谷马家古佛堂侧，立小土屋，闲处宴息焉。高氏供枣饼亦至。尝赍其论并经往韩氏庄，即冠盖村也。中路遇一虎，玄见之

，抚其背，所负经论搭载去土龕中，其虎弭耳而去。其处无泉可汲用，会暴风雨，拔老松去，可百尺余成池，约深丈许，其味香甜，至今呼为长者泉。里人多因愆阳临之，祈雨或多应焉。又造论之时，室无脂烛。每夜秉翰于口，两角出白色光长尺余，炳然通照，以为恒矣。自到土龕，俄有二女子衣赀布，以白布为惨头，韶颜都雅，馈食一盂于龕前，玄食之而已。凡经五载，至于纸墨供送无亏，及论成亡矣。所造论四十卷，总括八十卷经之文义。次《决疑论》四卷，绌十会果因之玄要，列五十三位之法门。一日，乡人聚饮酒之次，玄来谓之曰：“汝等好住，吾今去矣。”乡人惊怪，谓为他适。乃曰：“吾终矣。”皆悲泣恋慕，送至土龕，曰：“去往常也。”乡人下坡，回顾其处，云雾昏暗，至子时俨然坐亡龕中，白色光从顶出，上彻太虚。即开元十八年暮春二十八日也，报龄九十六。达旦，数人登山，见其龕室内蛇虺填满，莫得而前。相与启告，蛇虺交散。耆少追感，结舆迎于大山之北，石为城而葬之。神福山逝多林兰若方山是也。葬日，有二斑鹿、双白鹤、杂类鸟兽，若悲恋之状焉。大历九年六月内，有僧广超到兰若收论二本，召书生就山缮写，将入汾川流行。其论由兹而盛。至大中中，闽越僧志宁将论注于经下，成一百二十卷。论有《会释》七卷，不入注文，亦写附于初也。宋乾德丁卯岁，闽僧惠研重更条理，立名曰《华严经合论》，行于世，人所贵重焉。

系曰：北齐内侍刘谦之随王子入台山焚身，谦之七日行道，感复丈夫相，冥悟《华严》义，乃造论六百卷，久亡。至李长者之化行晋土，神变无方，率由应以此身而为说法也。或曰：“李《论》中加乎十会，经且阙焉，依梵字生解可非迷名耶？何长者说法之有？”通曰：“十会理有，宜俟后到之经。所解南无，言离中虚也。此配法观心也，若知触物皆心，方了心性。故经云：‘知一切即心自性，则成就慧身不由他悟。’此乃心境如如，则平等无碍也。观李之判教该博，可不知华言义耶？尝闻幽州僧惠明鸠诸伪经并《华严论》同焚者，盖法门不相入耳。伪经可？李《论》难焚，伊非小圣境界也。亦犹杨墨之说，与儒相违。行方外者，复憎孔孟。水火相恶，未始有极。苟问通人，分曹并进，无相夺伦哉。”

论曰：丹成转数，服则登仙。慧炼功夫，验之果证。若或名未标于篆籍，力未合于经王，乌以轻举此身，出过凡世，徒只眩曜肉眼，惊忙猿心。所谓释氏之俦，高下异尔。亦乃譬同群象也，牙能抵触，鼻善卷舒，力却九牛，奔过驷马矣。别有阿耨池岸、香醉山阴象，则鼓双翼以飞腾，用七支而巧便，与夫海山之象，百倍绝伦，厥号蔼罗伐籊，象中龙也。谅知沙门有所感通，斯之谓欤！若夫能感所通，则修行力至，必有天神给侍是也。能通所感，则我施神变，现示于他是也。能所俱感通，则二乘极果无不感通也。昔梁慧皎为传，创立神异一科，此唯该摄究极位之圣贤也。或资次征祥，阶降奇特，当收不尽，固有缺然。及乎宣师不相沿袭，乃厘革为《感通》，盖取诸感而遂通，通则智性，修则感欤，果乃通也。核斯理长，无不包括，亦犹斑固增加九流，变书为志同也。复譬圣人重卦，不亦愈于始画者乎？然则前不仰观俯察，后何变通？此非宣师之能，据嘉祥变例而能矣。原夫室静生虚白，心静则神通。儒玄所能，我道奚若？引发静虑，自在现前，法不喧嚣，万缘都泯。智

门开处，六通由是生焉。动相灭时，五眼附兹照矣。目连运用，彰何第一之名？那律观瞻，有是半头之见。迷卢入其芥子，海水？于毫端。不思议时，凡夫之心口两丧；神通生处，诸佛之境界一如，复次，我教法中以信解修证为准的。至若译经传法，生信也。义解习禅，悟解也。明律护法，修行也。神异感通，果证也。孰言像末无行果乎？亦从多分说也。只如檀特刻杖，表侯景之西归；河秃指天，知文襄之南面。光师入安乐之行，弟子证三昧之门。泗上僧伽，十九类身之应现；万回尊者，五千余里之往来。诸方更有其异名，此刹弥观其奇迹。难拘定态，莫检恒形。从愿海而起身，元惟智积；自意生而分质，素是康僧。岸睹菩萨之迎生，英致秦襄之就食。留年不测，示迹无方。或扬化于数朝，或受龄于三百。或令灶祠而堕，或得御笛而回，圭戒岳神，安救唐相。或漉龙儿而至，或擎锁骨而征。入圣寺门，认诸葛亮。或神光出口，或怪物沈河。丰干识其文殊，无相免其任侠。梦送浮图而渡海，身分窑窟以安禅。或放毫相之光，或令公主之诞，或获珠之烁烁，或扰虎之眈眈。或记宰臣，或移巢鹊。寿过百岁，身隐五台。或讖草书，或求听众。或隐形而留影，或见母而便生。或题异辞，或语羆兽。记韦公之灭度，惊张渚之夜归。不濡其服而渡溪，不泄其秽而恒食。或倒立而死，或直吐其鸠。或身首异处而还连，或半年坐亡而复起。若以法轮启迪，多作沙门之形；设如异迹化成，或作老叟之貌（寒山拾得）。疮痍可恶，疥癩堪嫌。或逆棘于恒流，或讖寿张于下类。伊皆难测，孰曰易知？将逆取顺之由，反权合道之意耳。或曰：“感通之说近怪乎？”对曰：“怪则怪矣，在人伦之外也。苟近人情之怪，乃反常背道之徒欤！此之怪也，非心所测，非口所宣，能至其涯畔矣。令神仙鬼物皆怪者也。仙则修练成怪，鬼则自然为怪，佛法中之怪则异于是。何耶？动经生劫，依正法而修致，自然显无漏果位中之运用也。知此怪正怪也。在人情则谓之怪，在诸圣则谓之通。感而遂通，故目篇也。故《智论》云：‘以禅定力，服智慧药。’得其力已，遂化众生，复置世界于一毛，凝海水为五味，故曰缘法察境，唯寂乃照。始验佛门龙象，间代一生，出而摄诸，不惭愧也矣。”

卷二十三

◎遗身篇第七（正传二十二人附见二人）○唐汾州僧藏传

释僧藏者，西河人也。弱龄拔俗，气茂神清，允迪循良，恪居下位。迨沾戒善，密护根尘。见仁祠必礼之，逢硕德则尽礼。苟遇僧俗施拜，乃俯偻而走，如回避令长焉。若当众务也，则同净人，屈己犹臧获焉。见他人故衣，则潜加浣濯，别事纽缝。至于炎暑，乃脱衣入草莽间，从蚊蚋虻蛭啖啮，蚤芥血流，忍而汗洽。而恒念弥陀佛号，虽巧历者不能定算数矣。确志冥心，未尝少缺。及预知报尽，谓瞻病者曰：“山僧多幸，得诸天人次第来迎。”藏又言：“吾瞑目闻往净土，聚诸上善人散花，方回此耳。正当舍寿。”合掌念佛，安然而终矣。

○唐汉东山光寺正寿传（詠禅师）

释正寿者，不知何许人也。风仪峻整，节概高强，肩锡曳囊，宗师皆谒。然以因缘相扣，附丽有归，于南塔詠禅师门，决开疑网，密修资益。后寿杜默于随部山寺，人皆不识。时譙王重福者，中宗次子也，神龙初韦庶人潜云“与张易之兄弟构成重润之罪”，迁均州，刺史密加防守，不听视事。韦后临朝，添兵士捍卫。及韦氏被诛，睿宗即位，转集州刺史。未行，然忽忽不乐，而归心于詠禅师，为其造生藏塔，举高七十尺，极为宏壮。于时詠师疾已危笃，譙王使问师“后孰继高躅？”詠曰：“贫道有正寿在。”王问诸僧：“谁为正寿？”或曰：“和尚有弟子在山，光迹韬晦。”王遣使召到，寿白詠师曰：“喜王为檀越，其塔已成，某欲为先试，得否？”詠曰：“善，为吾试。”是时寿摄衣合掌入塔，敛容瞑目，结加趺坐，便即灭度，全身不散，时号为试塔和尚。譙王闻已，叹嗟终日曰：“弟子犹尔，乃别议改图，为詠禅师营构焉。”

系曰：先人有夺人之心，寿公先其詠矣，夫直往者必能径来也。业累弗羈，樊笼弗罩，脱羈开罩，生死自由。既然自由，已跻果位矣。俗谛观之，寿公出蓝之青也矣。而能秉心矫迹，出其师之前，一日千里，其是之谓乎！

○唐五台山善住阁院无染传

释无染者，不委氏族何许人也。从中条山受业，讲《四分律》、《涅槃经》《因明》、《百法论》，善者从之。恒念：“《华严经》至说诸菩萨住处东北方金色世界，文殊菩萨与一万圣众从昔已来止住其中而演说法，或现老人，或为童子。近闻佛陀波利自西国来，不倦流沙，无辞雪岭，而寻圣迹。高宗朝至台山思量岭，后告扣礼，乃见老人，即文殊也。利虽云面接，未决心疑，令知往西国取经，诣金刚窟，入文殊境界，于今不回。古德既尔，吾岂无缘乎？”染乃从彼发迹，遍访名公。或遇禅宗，穷乎理性。或经法席，探彼玄微。以贞元七年到台山善住阁院。时有僧智

君页为台山十寺都检校，守僧长之初也。遂挂锡栖心，誓不出山。每念文殊化境，非凡者之可胜，岂宜懈怠？冬即采薪供众，夏即跣足登游，春秋不移，二十余祀。前后七十余遍，游历诸台，睹化现金桥、宝塔、钟磬、圆光，莫穷其际。且曰：“松柏之鼠，不知堂密中有美枌乎？”言更有愈于诸瑞，吾得少，未为足也。最后于中台东忽见一寺，额号福生，内有梵僧，数可万计。染从头礼拜，递互慰劳，见文殊亦僧也，语染曰：“汝于此有缘，当须荷众，勿得唐捐，有愿无行而已。”言讫化寺众僧，寂无所睹。染叹而言曰：“睹兹灵异，岂可徒然！比危脆身，有何久固？”乃遵言广兴供施，每设一百万僧，乃然一指，以为记验焉。渐及五百万数，遐迩委输，若海水之入归塘焉。及千万供毕，十指然荆迨开成中白大众曰：“吾于此山薄有因缘，七十二遍游诸圣迹，人所不到，吾皆至止。又不出兹山，已报深愿，幸莫大焉！奈何衰老，今春秋七十四，夏腊五十五，及存余喘，欲于中台顶上焚一炷香告辞十方如来，一万菩萨。或息我以死，谁甘相代？况诸人等，并是菩萨门人，龙王眷属，蒔栽善种，得住此山，夙夜精勤，羈勤三业，龙华三会，共结要期。此时下山，勿有留难。”合掌曰“珍重”而去。众初不喻其意，皆言早回。染乃但携瓶锡，惟？名香，遂命季氏赵华将蜡布两端、粗麻一束、香汁一斗，于中台顶从旦至暮，礼拜焚香，略无暂憩，都不饮食，念佛虔诚，声无间断。已至深更，赵氏怪其所以，陟彼崔嵬，见染不移旧止，转更精专。染谓赵曰：“吾有密愿，汝与吾助缘，不得相阻。为取蜡布、麻、油、将来缠裹吾身，于夜半子时，要然身供养诸佛。吾若得道，相度汝也。”赵氏谏之，苦劝不止。将布缠身，披麻灌油，从顶而炼，言曰：“将吾灰骨当须飘散，无使显异。”赵氏一从其命，略无移改，从顶而炼，至足方仆矣。

赵氏叹曰：“昔闻药王然身，今见上人，奇哉！痛哉！后门人收真骨，于梵仙山南起塔，至今在矣。○唐成都府福感寺定兰传

释定兰，姓杨氏，成都人也。本闾閻间凶恶屠沽类，天与厥性，悔往前非，誓预六和，化行三蜀。当尔时也，咸归信焉。造伽蓝一，号圣寿坎。其缘未发，乃藏于佣保中耳。而父母早亡，无资可以追往，每遇讳辰，兰悲哭咽绝。辄裸露入青城山，纵蚊蚋

虻蝇啖咋肤体，且云“舍内财也，用答劬劳”。蜀中有黑白蟆，形如栗，被人口及肉，而少见者。次则刺血写经，后则炼臂，至于拔耳剜目，鉋饲鸷鸟猛兽。既而行步非辅导而触物颠蹶。后有异人，掌擎物若珠颗然，内空眦中，斯须瞻瞩如故。冥告曰：“南天王还师眼珠矣。”远近惊骇。常谓人曰：“吾闻《善戒经》中名为无上施，吾愿勤行，速要上果矣。”大中三年，宣宗诏入内供养，仰其感应之故，以优礼奉之。弟子有缘，恒执事左右。六年二月中，又愿焚然肩膊。帝累劝勉，年耆且务久长修练。兰不奉诏，遂焚焉而绝。有缘表请易名建塔，敕谥觉性也，塔号悟真也。蜀都止呼定兰塔院，于今香火不绝云。

○唐福州黄砥山建福寺鸿休传（景先）

释鸿休，不知何许人也。神宇标挺，玄机斡运，居闽黄药山寺，丛萃羸客。示教之外，侃然怡乐。恒言：“宿债须偿，偿尽则何忧何惧？物我俱逍遥矣。”人皆不喻其旨。及广明之际，巢寇充斥。休出寺外，脱纳衣于松下磐石之上，言曰：“誓不污清静之地。”而安详引领待刃，刃下无血，贼翻惊异，罗拜忏悔焉。门弟子景先阉维其尸，收舍利七颗，囊而宝之。有笃信者以菽粒如数易之，追之靡及，遂往筮焉，占之曰：“死生贵贱，罔分吾卦。在靡在之，失宁失矣。孰知其然也？”泊获，置之于塔，分之七粒，緘于琉璃器中，莹然光色。时僧清豁著文作颂纪德焉。

○唐鄂州岩头山全豁传

释全豁，俗姓柯氏，泉州人也。少而挺秀，器度宏远而疏略。礼清源谊公为师。往长安造西明寺，照公与受满足法。即于左街保寿寺听寻经律，决择纲宗，垂成讲导，振锡南指诣。武陵德山。药病相应，更无疑滞。后居所邻洞庭，地曰卧龙，乃筑室而投憩焉。徒侣影随。又居唐年山，山有石岩砢嶭，立院号岩头坎。凡所施用，皆削繁总，兀然而坐，任众围绕，曰：“汝何不思惟？家中有多少事，实于逆顺之境证得超越之相者。”豁值光启已来，中原多事，诸侯角立，狂贼来剽略，众皆回避，豁惟晏如。贼责弗供馈，忿怒俾挥刃之，曾无惧色。当光启丁未岁夏四月八日。门人权葬，葬后收焚之，获舍利七七粒。僖宗赐谥曰清严，塔号出尘。葬事，檀越田咏兄弟率财营构，南岳释玄泰撰碑颂德，提唱斗峻，时号岩头法道，难其领会焉。

系曰：休豁二师，何临难无苟免乎？通曰：“凡夫之难，是菩萨之易。经生累舍，此乌怪哉？昔安世高累累偿债，去若拂尘。业累才轻，苦依身尽，换坚固之体耳。神仙或从刃殒者，谓之剑解，况其正修证果之人，观待道理，不以不令终为耻也。”

○唐吴郡嘉兴法空王寺元慧传

释元慧，俗姓陆氏，晋平原内史机之裔孙也。父丹，文林郎云骑尉温州纠曹，慧即仲子也。髫龄颖悟，长而温润，畏作枯龟，思为瘦雁。以开成二年辞亲，于法空王寺依清进为弟子。会昌元年，往恒阳纳戒法，方习毗尼。入礼五台，仍观众瑞。二年，归宁嘉禾居建兴寺，立志持三白法，讽诵《五部曼籋罗》，于臂上？香炷。五年，例遭澄汰，权隐白衣。大中初，还入法门。至七年，重建法空王寺。又然香于臂，供养报恩山佛牙。次往天台山，度石桥，利有攸往，略无忧虞焉。咸通中，随送佛中指骨舍利，往凤翔重真寺。炼左拇指，口诵《法华经》其指不逾月复生如故。乾宁三年，偶云乖？。九月二十八日，归寂于尊胜院，报龄七十八，僧腊五十八。弟子端肃等奉神座葬之吴会之间，谓为三白和尚焉。其礼拜诵持，不胜其计，如

别录也。

系曰：炼大拇指，火尽次飞，如何于焦炭之末，骨肉随生不久如故？此与火中莲花，同种而异态耳。何谓三白？通曰：“事理二种。一白饭、白水、白盐，事也。二身不遍触，口诵真经，意不妄缘。此三明白，非黑业也。故享此名欤。”

○唐京兆菩提寺束草师传

释束草师者，无何而至京兆平康坊内菩提寺。其为人也，形不足而神俊，吟啸自得，罕接时人，且不言名姓。常负束藁，坐卧于两廊下，不乐住房舍，或云此头陀行也。经数年，寺内纲任劝其住房。或有诮其狼藉曰：“尔厌我邪？世不堪恋，何可长也？”其夕遂以束藁焚身，至明唯灰烬耳，且无遗骸，略尽污涂之臭，又无延燎惊咤之声。计其少藁，不能焚此全躯。既无子遗，然其起三昧火而自焚也。众皆称叹，民多观礼焉。京邑信士遂塑其灰为僧形，置于佛殿偏傍，世号束草师，祷祈多应焉。

系曰：《处胎经》中菩萨禅定摄意，入火界三昧，愚惑众生谓为菩萨遭劫火烧，是也。比丘实未及此，无象此以惑人。如能用少刍秸能焚巨骸，则可信矣。故《书》曰：“民无胥谗，寿张为幻。”吁哉！

○唐南岳兰若行明传

释行明，俗姓鲁，吴郡长洲人也。幼从师于本部，后游方问道，然其耿介轩昂，啸傲自放。初历五台、峨嵋、礼金色银色二世界菩萨，皆随心应现。由此登天台，陟罗浮，入衡岳，游梓潼。属唐季湘之左右割裂争寻，常而未息，靡有宁岁。于是栖祝融峰下，有终焉之志。止七宝台，与玄泰布纳为交契。其性之好恶，泰亦罔抗其轻重焉。尝谓道友曰：“吾不愿随僧崖焚之于木楼，不欲作屈原葬之于鱼腹。终誓投躯，学萨？太子超多劫而成圣果，可不务乎？”屡屡言之，都不之信。忽于林薄间，委身羆虎前，争竞食之，须臾肉荆时泰公收其残骼焚之，而获舍利。乃撷花酌水，为文祭之。辞中明其勇猛，能捐内财，破慳法，成檀度，未舍、已舍、当舍三轮顿空，取大果若俯拾芥焉。

系曰：佛教比丘施众生食，二世顺益，感果非轻。若其明公，成大檀度，远慳贪也。成大勇猛，得无畏也。成三轮空，无为功德也，成难舍心，净佛土也。一掷其躯，其利博哉！譬犹善赏者费少而劝多，其是之谓乎？

○晋太原永和三学院息尘传

释息尘，姓杨氏，并州人也。父迁贸有无，营利而已。其母氏尝梦人服装伟丽，称

寄宵宿，便觉娠妊。生而有异，童稚不群。每闻钟呗之音，凝神侧耳。年方十二，因梦金人瑰奇之状，引之入精庐。明旦告白二亲，恳求出家。未允之前，泣而不食。父母悯其天然，情何厌塞，遂曲顺之。即投草堂院，从师诵《净名经菩萨戒》，达宵不寐。将周一祀，舍本讽通。年当十七，便听习《维摩》讲席，粗知大义。及乎弱冠，乃圆上品，执持律范，曾无缺然。年二十三，文义幹通，于崇福寺宗感法师胜集传授。复学《因明》、《唯识》，不亏敷演，学徒颖脱者数。人崇福寺辩才大师从式最为高足。于天祐二年，李氏奄有河东，武皇帝请居大安寺净土院，四事供养。专览藏教，修练上生业，设无遮大斋，前后五会。尘尝以身饲狼虎，入山谷中，其兽近嗅而奔走。又于林薄裸体，以啖蚊虻。乃游仙岩岳寺，养道栖神。复看大藏经匝，设斋，然一指，伸其报庆。彼寺有圣观音菩萨像，长烛七灯，香花供献。后被诸生就请下山，城内传扬《大论》，四序无辍逐月设沐浴，临河就沼，投饲水族。以已啖？，旋赎羽毛，沈潜高明，以遂生性。或施牢狱人食，或赈惠贫乏，或捐幡盖于净明、金藏二塔。后唐长兴二年，众请于大安国寺后建三学院一所，供持四方听众。时又讲《华严》新经，传授于崇福寺继晖法师。由是三年不出院门，一字一礼《华严经》一遍，字字礼《大佛名经》共一百二十卷。复练一指，前后计然五指。时晋高祖潜跃晋阳，最多钦重。洎乎龙飞，尘每入洛京朝觐，必延内殿从容，锡赉颇丰。帝赐紫服并壹咨号，固让方俞。尘闻凤翔府法门寺有佛中指骨节真身，乃辞帝往歧阳瞻礼，睹其希奇，叉然一指。尘之双手唯存二指。耳续于天柱寺，就楚伦法师学《俱舍论》。方经数日，微有疾生，至七月二十七日辰时枕肱而逝，俗年六十三，腊四十四。平常唯衣大布，不蓄盈长。六时礼佛，未曾少缺。陇坻之间闻其示灭，黑日二众具威仪送焚之，得舍利数百粒。弟子以灵骨归于太原，晋祖敕葬于晋水之西山，小塔至今存焉。

系曰：尘师捐舍，讵能愈其精进乎？脱落浮荣，岂能胜其义解乎？若然者，不可以一名名矣。厥犹瞻亶花焉，色黄而美，则真金谢其色；香芬而远，则牛头愧其香。多名生乎一体者，其尘公欤！

○晋天台山平田寺道育传

释道育，新罗国人也，本国姓氏未所详练。自唐景福壬子岁来游于天台，迟回而挂锡于平田寺众堂中。慈爱接物，然终不舍岛夷言音。恒持一钵受食，食讫，略经行而常坐，胁不著席。日中洒扫殿廊，料理常住，得残羹之食，虽色恶气变，收贮于器，斋时自食。与僧供

菹浴煎茶，遇薪木中蠹蠹，乃置之远地，护生偏切。所服皆大布纳，其重难荷。每至夏首秋末，日籀，乃裸露胸背，云饲蚊蚋虻蛭杂色虫螫啮，至于血流于地。如是行之四十余载，未尝少废。凡对晤宾客，止云伊伊二字，殊不通华语。然其会认人意，且无差脱。顶发垂白，眉亦神焉。身出紺赤色舍利，有如珠颗，人或求之，随意皆获。至晋天福三年戊戌岁十月十日，终于僧堂中，揣其年八十余耳。寺僧

升上山后焚之，灰中得舍利不可胜数。或有得巨骨者。后唐清泰二年，曾游石梁，回与育同宿堂内。时春煦，亦烧梢桮柴以自熏灼，口中唠唠，通夜不辍或云凡供养罗汉大斋日，育则不食。人或见迎罗汉时问：“何不去殿内受供？”口云“伊伊去”。或云“饲虫”。时见群虎嗅之，盘匝而去矣。

○晋江州庐山香积庵景超传

释景超不知何许人也。素持戒范，若护浮囊。性惟天直，言不面从。及乎游方役足，选胜栖身，至于庐峰，便有息行之意。惟诵《法华》，鞠为恒务。九江之人且多景仰。尝礼《华严经》一字拜之，计已二遍，乃烧一指，为灯供养，庆礼经周矣。次礼《法华经》，同前。身肤内隐隐出舍利，磊落圆莹。或有求者，坐席行地，拾之无算。天福中卒于庵中。今坟塔在乎庐阜，游者致礼，嗟叹而已。

系曰：言遗身者必委弃全躯，如萨？王子是欤。今以指为灯，以肱擎炷，何预斯例，莫过幸否？通曰：“练指断肱，是遗身之加行也。况复像末，尤成难事。其犹守少分之廉隅入《循吏传》同也。”

○晋凤翔府法门寺志通传

释志通，俗姓张氏，右扶风著姓家之子也。早知遗世，克务净门，选礼名师，登于上品，诸方讲肆，遍略留心。后唐之季，兵革相寻，自此驾已东巡，薄游洛下，遇日口罗三藏，行瑜伽教法，通礼事之。乃欲陟天台、罗浮，遂辞。三藏曰：“吾比求翻译，属中原多事。子议南征奈何路梗何？”通曰：“泛天堑其如我何？”三藏曰：“苟去吴会间，可付之梵夹，或缘会传译。”通曰：“已闻命矣。”以天福四年己亥岁，天王锡命于吴越，遂附海舰达浙中。时文穆王钱氏奉朝廷之故，具威仪乐部，迎通入府庭供养，于真身塔寺安置，施赆丰腆。通请往天台山。由是登赤城，陟华顶，既而于智者道场挂锡。因览《西方净土灵瑞传》，变行回心，愿生彼土，生常不背西坐。山中有招手石者，昔智綽梦其石上有僧临海上举手相招召之状。綽入天台见其僧名定光，耳轮耸上过顶，亦不测之神僧也。及相见，乃问綽曰：“还记得相招致否？”綽曰：“唯。”此石峻峙，顾下无地。通登此投身，愿速生净土。奋躯而堕一大树中，枝软干柔，若有人扶接焉，殊无少损。乃再叩？投之，落于岩下蒙茸草上，微有少伤，迟久苏矣。众僧谓为豺虎所啖，及见其犹然，舁就本道常初通去不白众，遂分人各路寻觅，至螺溪，民村有巫者言事多验，或就问焉。神曰：“伊僧在西南方，现有金铠神扶卫不死，我到彼神气尽矣，固难近也。”皆符协神言。后往越州法华山，默修净业，将欲化去，所止房地生白色物。如传粉焉。未几，坐禅床而终，迁座阁维，有五色烟覆于顶上，法华川中咸闻异香焉。

系曰：昔薄拘罗有五不死，今通公二不死。昔法充投千仞香炉峰而不亡，通且同矣。得非天龙负翼不损一毛乎？而能延彼连持色心未断者何？俾其增修净土业耳。

○晋朔方灵武永福寺道舟传

释道舟，姓管氏，朔方回乐人也。髫年聪雅，庠序有仪，虽诵《诗》、《书》，乐闻释典，决志出家于龙兴寺孔雀王院。爰得戒珠，渐圆心月，吟哦呗赞，嘹亮可听。乃率信士造永兴寺，功成不宰。辞灵帅韩公洙，入贺兰山白草谷，立要持念，感枯泉重涌，有灵蛇游泳于中。遂陟法台谈讲也，道俗蜂屯，檀施山积。赞唱音响，可遏行云，犷悍之人，若鸱鸢之革韵。乃刺血画大悲千手眼立像。属其亢阳，则绝食瞑目。要期雨之通济，方议充肠。中和二年，闻关辅扰攘，乃于城南念定院塔下，断左肱焚之，供养大悲像。愿倒冒干戈，中原塞上，早见弭兵。言毕，迅雷风烈洪澍焉。又尝截龙耳为民祈雨，复断食七日请雪，皆如其愿。至于番落，无不祇畏。以天福六年辛丑岁二月六日，其夜未央，结加趺坐，留累门人方毕而绝。享龄七十有八，遗骸不散，如入禅定，遂加漆綯焉。建隆中，郭忠恕者博览群籍小学，尤长篆隶，为能多事，凌轹因过，投于北裔，询舟前烈，著碑颂焉。

○汉洛京广爱寺洪真传

释洪真，姓淳于氏，滑州酸枣人也。幼悟尘劳，决求出离，介然之性，云鹤相高。师授《法华经》，随文生解，铠甲精进，伏其恚忿。或沾檀施，回面舍旃，诵《法华经》约一万部，诣朝门表乞焚全躯，供养佛塔。帝命弗俞。时政出多门，或谮云惑众，或言不利国家，下敕严阻。真叹曰：“善根殖浅，魔障尤强，莫余敢止。”遂退广爱寺，罄舍衣盂，作非时施愿毕。当年无疾坐灭，经数日，颜貌如生。迁就茶毗，唯舌根不坏，益更鲜红。时众观之，叹希有事！春秋五十二。伊洛之间重之如在。

○周钱塘报恩寺惠明传

释惠明，俗姓蒋，钱塘人也。研核三学，渐入精微。后登闽越，殆至临川，礼文益禅师，深符正理，悟先所宗不免生灭情见。后回浙，隐天台白沙，立草寮，有雪峰长庆之风，到者皆崩角摧锋，谓明为魔说。汉乾祐中自山出，时翠岩参公率诸禅伯于僧主思宪院，定其臧否。明之口给，无能挫棘。寻汉南国王钱氏造大报恩寺，请以住持，假号圆通普照禅师。然行玄沙正眼，非明曷能致此？显德中卒，时酷暑，俾欲葬之。有弟子永安曰：“知师唯我也。”请焚之，得舍利五色，一皆圆净。初明炼指为灯，于天台供养。后相继烧三指，而勤持课，胁疏妊席，时说法焉。性且刚直，言多忤物，是其所短也。

○周晋州慈云寺普静传

释普静，姓茹氏，晋州洪洞人也。少出家于木郡惠澄法师，暗诵诸经，明持秘咒，思升白品，愿剪青螺。既下方坛，而循律检，往礼凤翔法门寺真身。乃于睢阳听涉

赴龙兴寺讲训，徒侣若鱣鲟之宗蛟龙焉。又允琴台请转梵轮，安而能迁。复于陈、蔡、曹、亳、宿、泗，各随缘奖导。回于今东京扬化，善者从之。晋天福癸卯岁，心之怀土，还复故乡。遂断食发愿，愿舍千身，速登正觉。至周显德二年，遇请真身入寺，遂陈状于州牧杨君，愿焚躯供养。杨君允其意，乃往广胜寺，倾州民人或献之香果，或引以幡花，或泣泪相随，或呗声前导。至四月八日，真身塔前广发大愿曰：“愿焚千身，今千中之一也。”徐入柴庵，自分火炬。时则烟飞惨色，香霭愁云，举众叹嗟，群黎悲泣。享寿六十有九，弟子等收合余烬供养焉。

○大宋衡阳大圣寺守贤传

释守贤，姓丘氏，泉州永春人也。少而聪达，渊壹咨沉厚，誓投吉祥院从师披剪焉。后游学栖云门禅师道场，明了心诀，趋彼衡阳，众推说法，纳衣练若之人，若百川之会于朝夕池矣。贤不衣缁纁，布衣皮裤而已。度伏腊必无更易，胁不著席，唯坐藤床，瞑目通宵。除有问者，随其启发，雍容自持。乾德中，告众曰：“吾有债愿未酬，心终不了。”明日，入南昊山，投身饲虎。弟子辈去寻，见双胫皮裤缠且存耳。收阖维之，得舍利无数。报龄七十四。今小浮图藏遗体焉。

○大宋天台山般若寺师蕴传

释师蕴，金华人也。厥性真率，不好封植，遇事属情，有多讦直。梁龙德中，与德韶禅师结侣遐征，游访名师胜境，至于北代清凉山，冥心巡礼。后登苍梧野，陟祝融峰。然韶师或随或否。回于浙，来还栖息韶师法会。其为人也，稠人广众，往往滑稽，有好戏噱者则狎之，胶漆如也。故高达之者，置之于度外矣。唯韶师默而识之，谓人曰：“蕴公痴狂，吾不测其边际焉。”因有疾，求僧作忏悔文，诵经及密咒各论几百藏为度，方知其密持之不懈。尝谓道友曰：“吾生无益于人，欲投宴坐峰，不然石梁下，所愿早预贤圣之俦也。”其道友多沮其计。以开宝六年七月内。无疾坐终，如入禅定。时炎蒸，停尸二七日，身无莠侧，窍无气秽。及迁神座，就寺之东隅阁维，煨烬中收舍利外，舌根不坏。灰寒拾之，如红芙蕖色，柔软可怜。或曰：“伊僧别无奇异，此物偶存。”乃重燔？其舌，随同火色，迟久还如莲叶。遂议结小塔于寺中緘藏。后有不信者重烧锻，凡数十过矣。蕴生不言姓氏年齿，人以貌取之，则年八十余矣。

○大宋杭州真身宝塔寺绍岩传

释绍岩，俗姓刘，雍州人也。母张氏始娠，梦寤甚奇。及生也，神姿瑰伟。至长也，器度宏深。七岁苦求出家于高安禅师，十八进具于怀晖律师，凡百经书，览同温习。自是游诸方圣迹，泊入吴会，栖息天台、四明山，与德韶禅师共决疑滞于临川益公，遂于钱塘湖水心寺挂锡。恒讽持《法华经》无昼夜，俄感陆地庭间生莲华。举城人瞻瞩。岩亟命攀而蹂之。以建隆二年辛酉，经愿云满，誓同药王焚身以供养

。时汉南国王钱氏笃重归心，苦留乃止。寻潜遁，投身曹娥江，用饲鱼腹。会有渔者拯之，云有神人扶足，求溺弗可，衣敷水面，而惊涛迅激，岩如坐宝台。然水火二缘俱为未济，恒快惋其怀。乃于越法华山安置。续召于梳塔寺，造上方净院以居之。开宝四年七月有疾，不求药石，作偈累篇示门徒，曰：“吾诵经二万部，决以安养为期。”加趺坐亡，享龄七十三，法腊五十五。丧事官供，茶毗于龙井山，获舍利无算。遗骨若玉莹然。遂收合作石函，置于影堂。大宁军节度使赠太师孙承祐为碑纪述焉。

○大宋天台山文辇传

释文辇，永嘉郡平阳人也。邂逅求师，受业于金华，纳具足律仪毕，翘勤笃励，三乘之学，一皆染渐。因往缙云明昭禅师法会，不事繁云，扬鼻之间，决了无滞。未遇天台山德韶禅翁，唱宗一大师之道。辇复谛受无疑，不为异缘牵转。故三十载随韶师，听其进否，尝谓人曰：“悟入之缘，犹螻屈之于叶也，食黄则身黄，食苍则身苍，其屈伸之状无变。吾初见明昭乃若是，今学玄沙又如是，此所谓殊涂而同归。今更取佛言为定量之。”乃览《大藏经》三周遍，自是已来，逍遥无滞。以太平兴国三年，忽自操其斧，言伐其檀，巧结玲珑，重攒若题凑焉。号曰浮图，中开户，入内趺坐。自持火炬，誓之曰：“以此残喘焚之，供养十方佛诸圣贤。”言讫，发焰亘空，其烟五色，旋转氤氲，犹闻诵经之声，须臾始绝。观者号哭，灰寒，收舍利不知颗数。春秋八十四，初辇尝谓善建寺僧说：“吾死已，无占伽蓝可食之地，弗如自焚供养。望诸贤此时聚柴下念佛，助我往生，只此相烦耳。”今善建寺中累石为小塔焉。

系曰：小乘教以自杀犯重戒，前诸方便罪，是以无敢操炬就燎者。然自杀二例，一畏杀，须结兰吉。二愿往生，强猛之心，命终身往，兰吉可能作碍邪？复次，大心一发，百年暗室，一登能破，何罪之有？是故行人无以小道而拘大根者乎？

○大宋临淮普照王寺怀德传

释怀德，本江南人也。髫年离俗，谨愿饰身，诵通《法华经》，得度。自尔虽登讲肆，终以诵持为专务。晚游泗上，礼僧伽塔像。属今上遣高品李神福赍幡花上供，并感应舍利至，葬于新塔下基深窟中。德遂誓焚躯供养。先罄舍衣囊，供身之物斋僧一中。然后自衣纸服，身缠油蜡，礼辞僧众，手持双烛，登柴中，发火诵经。观者莫不挥涕，德至火炽赳高，其身聊侧，犹微闻诵经之声。一城之人无不悲悼者。淘汰舍利甚多，乃太平兴国八年四月八日也。使臣回奏，上为之动容焉。

论曰：界系之牢，不无我所。浮生之命，连在色身。皆自贵而轻他，悉已多而彼少，而增靳固，但长慳贪。若骊龙之吝珠，犹牝牛之爱尾。孔惜翠羽，麝护香脐也。其如儒氏彝伦，孔门徽典，以己私之肌体，曰父母之发肤，不敢毁伤，恒知保慎。

复有好自标遇，三年不见于门生；且事尊严，一坐不垂于堂庑。及乎心游方外，教脱域中，或大善之克成，非小愆之能绊。许友以死，杀身成仁，渐契不拘，将邻直道。至有黜礼乐，薄忠信，去健美，饮淳和，乃有洗耳辞荣，抱石沉水。与儒则一倍相反，于释则分寸相邻。佛乃为物捐躯，利生损命。与其不拔胫毛为利也，伏腊殊时；与其惜父母之亲体也，参辰各见。如此乃验教之深浅，行之是非。譬犹出泉货而既多，入息利而不少。我世尊因地也初唯减口，次则脱身，车服越共弊之心，象马过借人之乘。辍食菜之地，判受封之城，用若拂尘，舍犹脱屣。复次，啖肤待饫，剜目副求，或指然一灯，或身均百啻，救羸虚之虎，化长伟之鱼。因超劫归弥勒之前，先成佛享释迦之位。皆从旋习，始外财而终内财；及熟善根，变难舍而成易舍。夫辍外财，外财难舍，难舍，凡夫也。捐内财，内财易弃；易弃，菩萨也。须知三世诸佛，同赞此门，是真实修，是第一施。岂不见僧崖菩萨安详陟于柴楼，大志道人慷慨焚其腕骨？人皆难色，彼有易容。盖累世之曾为，致今生之又舍，舍而复舍，估七宝以非珍；空而又空，以三轮之绝轨。乘兹度岸，是曰真归。得金刚坚固之身，留玉粒馱都之应。今之录也，藏则当乎炎暑，裸钁蚊虻；寿则试其浮图，坐中圆寂。定兰感天王而还眼，鸿休拒大盗以偿冤。明饲兽而破慳，超然灯而炳指。加其舌根不坏，身溺不沈，入薪塔而自焚，露赤躯而受咋，以前诸德也。念业异熟，为所依趣。知身是幻，幻体何凭？悟质如沤，沤形暂起。幻从心造，假伪相寻。沤散水澄，浮沈互有。是故大圣几生所计，小乘润生尽期。贵息苦依，思除我倒。非谓视同糠粃，观若尘埃。譬之寄习学于茅庐，附穹弧于土埭，为选登云之路，为求出塞之功。然后赐宅一区，门罗八戟，方云贵士，始利封侯。以其乳哺之囊，转得那罗之器，亦复如是。或曰：“用斯声教，化我中华，得非韩吏部所患非杨即墨，而况加其佛乎？攻乎异端，斯害孔炽。”对曰：“正谈仁义，则道德相悬。正说苦空，则忠信可保还借韩之譬。况坐井窥天，非天之咎。孔门大旨，‘未能知生，焉能知死’？庄子曰：‘劳我以生，息我以死。’若观鼓盆而歌，似知不死焉。二教曾不言人死神明不灭，随其善恶业缘受报，故有好丑。若由业因也，是用将粗易细，以弱商强，售菟陆之脆形，博花鬘之珍服，既熏当种而起现行，生胜已生，报强前报。剜肉眼而招佛眼，割凡躯而贸金躯，尼拘之子至微，荫车之形不少。是为真语，非谓食言。菩萨利他，适足以学。”或曰：“夫行然炼，善人则不疑。其有不善之人，惯尝刳割，谓疼痛为诙谐；堪受凌迟，谓炙炮为戏剧。或斲人而偶作，或诳世而强为。此则栽何善根，自求辛螫耳。”对曰：“虽则顽民喜忍，恶少耐伤。且经念以然烧，或浅诚而钁饲，冥招善报，已种良因。以浮泛心，得浮泛报。昔有女子戏披袈裟，婆罗门醉著法服，其缘会遇，道果终成也。”或曰：“义净传译，重累再三，令勿然练。伊人亲游西域，备熟方宜，至乎教乘，罔不详究。不许毁伤，何邪？”对曰：“此专缚阿笈摩之教，安能沮坏摩诃衍法耶？设或略舍内财，决定当圆檀度，故《庄严论》云：‘若能施自身命，则为希有，成菩萨檀度也。’将知四轮出世，十善行时，有道则尧下足淳民，奉孝则曾家生令子。我圣上践阼之四载，两浙进阿育王盛释迦佛舍利塔，初于滋福殿供养，后迎入内道场，屡现奇瑞。八年二月望，诏于开宝寺树木浮图，仅登千尺，先藏是塔于深？中，此日放神光，亘烛天壤。时黑白众中有炼顶指者，有然香炷者，宣赐物有差。苟非大权菩

萨、大福天王，安能激劝下民而捐身宝者乎？直令此地螺髻见而珍宝成，还觉其时鹫峰净而土田变。范云缀史，纪数色之征祥；王劭编文书几州之葬塔。隋分舍利，唐瘞真身。比乎我朝，田陇与铁围争其疆畔耳。此篇所载，成传开宗，令能忍难忍之人，既亡若在，使舍身受身之者，虽死犹生。图五芝于草木之前，列四瑞于鳞毛之表。《诗》曰：‘仪形文王，万邦作式’者也。”

卷二十四

◎读诵篇第八之一（正传二十一人附见三人）○隋行坚传

释行坚者，未知何许人也，常修禅观，节操惟严，偶事东游，路出泰山，日之夕矣，入岳庙，谋之度宵。令曰：“此无别舍，唯神廊庑下可以。然而来寄宿者，必罹暴死之殃。吾师筹之。”坚曰：“无苦。”不得已从之，为藉藁于庑下。坚端坐诵经，可一更，闻屋中环佩之声。须臾，神出，衣冠甚伟，部从焜煌。向坚合掌，坚曰：“闻宿此者多死，岂檀越害之耶？”神曰：“遇死者特至，闻弟子声而自死焉，非杀之也。愿师无虑。”坚固延坐谈说，如食顷间，因问之曰：“世传泰山治鬼，宁有之邪？”神曰：“弟子薄福有之，岂欲见先亡乎？”坚曰：“有两同学僧已死，愿得见之。”神问其名，曰：“一人已生人间，一人在狱受对，不可唤来，师就可见也。”坚闻甚悦，因起，出不远，而至一处，见狱火光焰甚炽。使者引坚入墙院中，遥见一人在火中号呼，不能言语，形变不可复识，而血肉焦臭，令人伤心。坚不忍历观，愍然求出。俄而在庙庑下，复与神坐如故。问曰：“欲救同学，有得理邪？”神曰：“可，能为写《法华经》，必应得免。”既而将曙，神辞僧入堂。旦而庙令视坚不死，怪异之。坚去，急报前愿，经写装毕，赍而就庙宿。神出如初，欢喜礼拜，慰问来意，以事告之。神曰：“弟子知己。师为写经，始书题目，彼已脱免，今生人间也。然此处不洁，不宜安经，愿师还送入寺中。”言讫，天晓，辞决而去，则大业年中也。坚居处不恒，莫知终毕。

○隋天台山法智传

释法智者，不详何许人也。髫年离俗，应法升坛，松直凌空，玉坚绝污，凡百讲肆，靡不留神。晚岁以径直之门，莫如念佛，每谓人曰：“我闻经言犯一吉罗，历一中劫，入于地狱，可信。又闻经说一称阿弥陀佛，灭八十亿劫生死重罪，则未之信。”人难云：“何故生大邪见？俱是佛言，急须念佛，久则三昧现前。”乃于国清寺兜率台上昼夜精勤念佛。忽预辞道俗云：“生西方去，令亲识为吾设斋终日。”于中夜无疾而化，时有金色光明来迎，照数百里。江上船中，谓言天晓，迟久方明。始知智之往生矣。

○唐京兆禅定寺慧悟传

释慧悟，未详氏族。隐太白山中，持诵《华严经》，服饵松术。忽于一时见一居士来云：“相请。”居士腾身入空，令悟于衣襟中坐，掇以飞行。至一道场，见五百异僧翔空而至，悟奄就未行。居士语曰：“师受持《华严》是佛境界，何得于小圣下坐？”遂却引于半千人之上。斋讫，居士曰：“本所斋意在师一人，虽有五百罗汉来食，皆临时相请耳。”斋讫，遂送还本处，有如梦觉。即高宗永徽年中也。

○唐京兆大慈恩寺明慧传

释明慧，不知何许人也。简默恭己，约志蠲明，耐乎寒馁，誓求大乘。精进之铠介躬，睡眠之魔退迹，是以初中后夜念诵经行。时玄奘三藏在京兆北坊部玉华宫翻《大般若经》毕，麟德元年示灭。其夜子时，慧旋绕佛堂，忽见北方有白虹四道从北亘南，横跨东并，直势贯慈恩塔院，历历分明。慧心怪焉，即自念曰：“昔如来灭度，白虹十二道从西贯于太微，于是有双林之灭。今有此相，将非五华法师有无常事邪？”申旦向众述其所见，众咸怪之。至九日，凶问至京，正符所见。慧弥增笃励，老而无懈，未知终所。

○周太原府崇福寺慧警传

释慧警，姓张氏，祁人也。少而聪悟，襁褓能言，二亲鞠爱，邻党号为奇童。属新译《大云经》，经中有悬记女主之文，天后感斯圣？，酷重此经。警方三岁，有教其诵通，其含嚼纤郁，调致天然也。遂彻九重，乃诏讽之。帝大悦，抚其顶，敕授紫袈裟一副，后因出家。气貌刚介，学处坚固，充本寺上座。拯顿颓纲，人皆畏惮。或于街陌见二众失仪，片招讥丑，必议惩诫，断无宽理。后修禅法，虚室生白。终时已八十余龄矣。九子母院有遗影，并赐紫衣存焉。

○唐太原府崇福寺崇政传

释崇政，侯姓，本府人也。幼龄敏达，固愿出家，诵经通一千余纸。耆宿叹赏，谓之为经藏焉。神气沈约，仪容整丽，秀眉广目，挺志高奇。虽通群籍，所精者《俱舍论》，相国王公缙躬请政宣讲。于时谈丛发秀，美曲流音，属听无厌，虽移辰历晷，谓如食顷焉。其剖判尤长，无得形似矣。代宗皇帝下诏征为章信寺大德，称疾不赴。终于本院，春秋五十八云。

○唐太原府崇福寺思睿传

释思睿，姓王氏，太原人也。夙通禅理，复贯律宗，慈悲仁让，忤无愠容。睿素婴羸瘵，乃立志法筵，专祈药上，恪勤不懈。寻见感征，忽心力勇锐，辨犹瓶注。因诵《十轮经》，日彻数纸，翌日倍之，后又倍之，自尔智刃不可当矣。开元中杖锡嵩少问道。时义福禅师禅林密緻，造难其人，一言相入，若石投水，既饮甘露，五载而还。趺坐居定，日不解膝，远迹击问。求其玄理，如堵墙焉。春秋六十六，卒于所住院。

系曰：诵经不贵多，要在神解。慧警三岁通《大云经》，差为奇浚崇政终通千纸，得力在乎不奉诏赴章信新寺。睿公讽彻《十轮》，后咨禅道，故经偈云：“虽诵千章，不如一句”者，如渡溪杖策，到岸必舍焉。

○唐上都青龙寺法朗传

释法朗，姑苏人也。禀质温润，约心坚确，诵《观音明咒》，神效屡彰。京阙观光，人皆知重。龙朔二年，城阳公主有疾沈笃，尚药供治，无所不至。公主乃高宗大帝同母妹也，友爱殊厚，降杜如晦子荷。荷死再行薛薛。既疾绵困，有告言朗能持秘咒，理病多瘳。及召朗至，设坛持诵，信宿而安，赏赉丰渥。其钱帛珍宝，朗回为对面施。公主奏请改寺额曰观音寺，以居之。此寺本隋灵感寺，开皇三年置。文帝移都，多掘城中陵园

冢墓，徙葬郊野，而置此寺。至唐武德四年废，至此更题额。朗寻终于此寺焉。○唐河东僧銜传（后芳圆果）

释僧銜，并州人也。本学该通，解行相副。年九十六，遇道绰禅师著《安乐集讲观经》，始回心念佛。恐寿将终，日夜礼佛一千拜，念弥陀佛八百万遍。于五年间，一心无担大渐，告弟子曰：“阿弥陀佛来授我香衣，观音、势至行列在前，化佛遍满虚空。从此西去，纯是净土。”言讫而终。时有后芳法师、圆果法师于蓝田县悟真寺一夏结契，念阿弥陀佛共折一杨枝于观音手中，誓曰：“若得生佛土者，愿七日不萎。”至期鲜翠也。又梦在大池内东面有大宝帐，乃飞入其中，见僧云“但专念佛，并生此也”。又见观音垂脚而坐。后芳奉足顶戴，见一池莲花，弥陀佛从西而来。芳问佛曰：“阎浮众生依经念佛，得生此否？”佛言：“勿疑，定生我国也。”且见极乐世界平坦如鉴，娑婆世界纯是山川。音乐宝帐，直西而去。有一僧名法藏，御一大车来迎。芳见自身坐百宝莲花，成等正觉，释迦牟尼佛与文殊赞《法华经》。复见三道宝阶向西直往，第一道阶上并是白衣，第二阶有道俗相参第，三阶唯有僧也，云皆是念佛人往生矣。芳、果二师躬云已见云。

○唐荆州白马寺玄奘传

释玄奘，江陵人也。通大小乘学，尤明《法华》正典，别是命家。自五十载中，日诵七遍，尝因净室焚香，感天人来倾听。斋讲之时，征祥合沓。与道俊同被召，在京二载。景龙三年二月八日，孝和帝于林光殿解斋，时诸学士同观盛集。奘等告乞还乡，诏赐御诗，诸学士大僚奉和。中书令李峤诗云：“三乘归净域，万骑饯通庄。就日离亭近，弥天别路长。荆南旋杖钵，渭北限津梁。何日纡真果，重来入帝乡？”中书舍人李？云：“初日承归旨，秋风起赠言。汉珠留道味，江璧返真源。地出南关远，天回北斗尊，宁知一柱观，却启四禅门。”更有诸公诗送，此不殚录。奘归乡，终本寺焉。

○唐成都府灵池县兰若洪正传（守贤）

释洪正，俗姓常氏，未详何许人也。居于岷蜀间兰若，往因有疾，所苦沉绵，从复

平宁。发誓恒诵《金刚般若经》，日以二十过为准。精持靡旷，时邻僧守贤夜坐，见二鬼使手操文牒，私相谓曰：“取摄僧洪正。”一使曰：“为其默念《般若》，傍有大奇荷护，无计近得。又患责限迟延，今别得计。见有直府东门者姓常，又与僧同名，复曾为僧来，共你摄去，以塞违殿也。”守贤闻之惊异，且志其事。明日，密问门子，常洪正已死。守贤先持《弥陀经》，后改业焉。洪正后不测其终。

系曰：宁有同名异实者，可互死耶？业不可移，此可移也。与其俗巫画肖已形，言可以代衰厄，同也。通曰：“琰摩王或是菩萨，以同名，善者则舍，不善者摄之。此或是罪霜倏晷，正增年寿，故得舍旃。又其恶器方满，复当终期，故斯取也。苟以互实而取者，行教化焉，舍斯之外，非常理所能知也已 1

○唐沙门志玄传

释志玄者，河朔人也。攻五天禁咒，身衣少麻布耳。行历州邑，不居城市寺宇，唯宿郊野林保玄有意寻访名迹，至绛州，夜泊墓林中。其夜月色如昼，见一狐从林下将髑髅置之于首，摇之落者不顾，不落者戴之。更取芳草堕叶，遮蔽其身，逡巡成一娇饶女子，浑身服素练，立于道左。微闻东北上有鞍马行声，女子哀泣，悲不自胜。少选，乘马郎遇之，下马问之曰：“娘子野外深更号哭，何至于此耶？”女子掩泪，给之曰：“贱妾家在易水，前年为父母娉与此土张氏为妇，不幸夫婿去载夭亡，家事沦薄，无所依给。二亲堂上，岂知妾如此孤苦乎！有一于此，痛割心腑，不觉哀而恸矣。妾思归宁，其可得乎？郎君何怪问之？”乘马郎曰：“将谓娘子哀怨别事，若愿还乡，某是易定军行，为戛使回还易水，娘子可乘其粗乘。”女子乃收泪感谢，方欲攀踏次。玄从墓林出曰：“君子，此女子非人也，狐化也。”彼曰：“僧家岂以此相诬？莫别欲图之乎？”玄曰：“君不信，可小祝吾当与君变女子本形。”玄乃振锡，诵胡语数声，其女子还为狐走，而髑髅草蔽其身。乘马郎叩头悔过：“非师之救，几随妖死。”玄凡救物行慈，皆此类也。

○唐凤翔府开元寺元皎传

释元皎，灵武人也。有志操，与众不群，以持明为己务。天宝末，玄宗幸蜀，肃皇于灵武训兵，计克复京师，为物议攸同，请帝即位，改元至德。及二年，返辕指扶风，帝素凭释氏，择清尚僧首途，若祓除然。北土西河所推，皎应其选，召入受敕旨，随驾仗内赴京。寻敕令皎向前发，至于凤翔，于开元寺置御药师道常更择三七僧，六时行道，然灯歌呗，赞念持经，无敢言疲，精洁可量也。忽于法会内生一丛李树，有四十九茎，具事奏闻，宣内使验实。帝大惊喜曰：“此大瑞应。”四月十八日，检校御药师道场念诵僧元皎等表贺，答敕曰：“瑞李繁滋，国之兴兆。生在伽蓝之内，足知觉树之荣。感此殊祥，与师同庆。”皎之持诵，功能通感，率多此类。加署内供奉焉。

○唐京师千福寺楚金传

释楚金，程氏之子，本广平郡，今为京兆之钰菴人也。母高氏夜梦诸佛，因而妊焉。生实法王之子也。行素颜玉，神和气清。七岁讽《法华》，十八通其义。三十，构塔曰多宝。四十，入帝梦于九重，玄宗睹法名下见金字，诘朝使问，罔不有孚。于时声腾京辇，遂募人构塔，累级而成，有同反掌。尝于翠微悟真，扪萝灵趾，乃曰：“此吾栖遁之所。”遂奏两寺各建一塔，咸以多宝为名。此外吟咏妙经六千余遍。宝树之下，仿佛见于分身；灵山之中，依？覩于三变。心无所得，舌流甘露。瑞鸟金碧，栖于手中；天乐清泠，奏于空际。凡诸休应，皆不有之。乃曰法象王之法驾，回人主之宸眷，承明三入，扬法六宫，后妃长跪于御筵，天花分散而不著。明皇题额，肃宗赐幡，岂荣冠于一时，亦庶几于佛在也！以乾元二年七月七日子时，右胁示灭焉。薪尽火灭，雪颜如在，昭乎上生于安养之国矣。春秋六十二，法腊三十七。天子悯焉，中使吊焉。敕骠骑大将军朱光晖监护，即以其法葬于城西龙首原法华兰若，塔之。初金髻年写《法华经》，不衣缣繒，寒加艾纳而已。弟子慧空、法岸、浩然皆随象王之子也。紫阁峰草堂寺《飞锡》碑文，吴通微书。至贞元十三年四月十三日左街功德使开府？国公窦文场奏千福寺先师楚金是臣和尚，于天宝初为国建多宝塔，置法华道场，经今六十余祀。僧等六时礼念，经声不断，以历四朝，未蒙旌德。”敕谥大圆禅师矣。

○唐台州涌泉寺怀玉传

释怀玉，姓高，丹丘人也。执持律法，名节峭然。一食长坐，蚤虱恣生，唯一布衣，行忏悔之法课。其一日念弥陀佛五万，口诵《弥陀经》三十万卷。至天宝元年六月九日，俄见西方圣像数若恒沙，有一人擎白银台，从窗而入。玉云：“我合得金台。”银台却出，玉倍虔志。后空声报云：“头上已有光晕矣。请加趺结弥陀佛樱”时佛光充室，五手约人退曰：“莫触此光明。”至十三日丑时，再有白毫光现，圣众满空。玉云：“若闻异香，我报将荆”弟子慧命问：“师今住何刹？”玉以偈云：“清静皎洁无尘垢，莲花化生为父母。我修道来经十劫，出示阎浮厌众苦。一生苦行超十劫，永离娑婆归净土。”玉说偈已，香气盈空，海众遍满，见阿弥陀佛、观音、势至身紫金色，共御金刚台来迎。玉含笑而终，肉身现在。后有赞云：“我师一念登初地，佛国笙歌两度来。唯有门前古槐树，枝低只为挂银台。”一云是台州刺史段怀然诗也。

○唐兖州泰岳大行传

释大行，齐州人也。后入泰山，结草为衣，采木而食。行《法华》三昧，感普贤现身。行自叹曰：“命且无常，必归磨灭，未知来世何处受生”遂入《藏》内信手探经，乃获西方圣教，遂专心思念阿弥陀佛。三七日间，于半夜时，忽睹琉璃地，心眼洞明，见十方佛犹如明鉴中像。后时诏行入内宫，寝于御殿，敕赐号常精进菩萨

，受开国公。乃示微疾，右胁而终。葬后开棺，见仪貌如生，异香芬郁焉。

○唐洛阳广爱寺亡名传

释亡名，荥阳人也。居止洛中广爱寺，以精习毗尼，慎防戒法，避其讥丑，罕有缺然。上元中东归宁省，路及荥阳，道宿于逆旅。方解囊脱屣，欲漉水盥尘。次有僧至，颇见貌刚而率略，与律师并房安置。其后到僧谓主人曰：“贫道远来，疲顿馁乏。主人有美酒酤满罍，梁肉买半肩，物至酬直，无至迟也。”主人遽依请办，僧饮啖之，都无子遗。其律师呵之曰：“身披法服，对俗士恣行饮啖，不知惭。”其僧不答，初夜索水盥漱，端身趺坐，缓发梵音，诵《华严经》，初举题目，次言“如是我闻”已下。其僧口角两发金色光，闻者垂泣，见者叹赧。律师亦生羡慕，窃自念言“彼酒肉僧，乃能诵斯大经”！比至三更，犹闻诵经，声声不绝，四繡欲满，口中光明转更增炽，遍于庭宇，透于窗隙，照明两房。律师初不知是光，而云“彼客何不息灯，损主人油炷”？律师因起如厕，方窥见金色光明自僧之口两角而出。诵至五繡已上，其光渐收，却入僧口。夜将五更，诵终六繡，僧乃却卧。须臾天明，律师涕泣而来，五体投地，求哀忏过，轻谤贤圣之罪。律师喜遇异人，后加勤苦，卒成高名，莫知终地。

○唐成都府雄俊传

释雄俊，俗姓周，成都人也。善讲说，无戒行，所受檀信，非法而用，且多狡诈，唯事疏狂。又经反初服，入军垒，而因逃难，还入缁行。大历中，暴亡入冥。见王者诃责毕，引入狱去，俊抗声大呼曰：“雄俊觉入地狱，三世诸佛即成妄语矣。曾读《观经》，下品下生者造五逆罪，临终十念，尚得往生。俊虽造罪，不犯五逆；若论念佛，莫知其数。佛语若有可信，暴死却合得回。”与雄俊传语云“若见城中道俗告之，我已得往生西方”。言毕承宝台直西而去。

系曰：一念忆识自身称佛名不少，垂入狱而还返者，以强善心而转弱恶故。是故行人须知口诵，莫如心持往生，浅力当如是学也。俊语流出民间，必死者重苏传此语也。

○唐吉州龙兴寺三刀法师传

释三刀法师者，本姓曹，庐陵人也。天然之性，嗜于蔬食。羁贯成童，志愿出家。于时自江以西，从安史之乱。南方不宁，多事土扶，故强兼弱，兵革未休。大历七年十一月，广州吕大夫被翻城，奉洪州路嗣恭牒吉州刺史刘宁征兵三千人，同收番禺。法师旧名伯连，其为人也强渥而貌恶，且心循良，恒持诵《金刚经》，以筒盛经，佩之于身，誓不婚娶。然不扬此善于他，惟密行愈至。无何，被括为军。呈阅之时，又选充行营小将，非其所好，遂亡命焉。时征兵颇急，牒诸处要害捕逐，于

本州洋口擒送。刘宁令于朱木桥处死，三下刃俱折。刘怪问之，遂言素志舍家，恒持经法，如斯怯懦，恐衄军威，是以亡耳。问“经何在”？曰：“被获时遗坠。”遂令搜取，果数百步外得之，竹筒有刃痕而几绝。刘拱手称叹久之，乃纵其为僧。奏闻，鰌下本道号三刀法师，配本郡龙兴寺。后加精进，卒于住所。

○唐湖州法华寺大光传

释大光，俗姓唐氏，生于邑之安吉也。母梅氏寄孕而梦协灵祥，在娠乃恶荤臭焉。既诞能言，不为戏弄。未龀之岁，思求佛乘。愿念《法华》三月通贯，经声一发，顽鄙革心。及遂出家，而寻登戒，西游京邑，朝见肃宗。帝召对禁中，拱而叹曰：“昔梦吴僧，口持大乘，五光随发，音容宛若，适朕愿兮。”因赐名大光。属帝降诞节，斋于定国寺，因赐墨诏，许天下名寺意往者住持。令中官赵温送于千福寺住持经道常其诵经作吴音，辽辽通于圣听，帝甚异其事，令中官而宣谕焉。后居蓝田精舍，先期而寺僧梦天童来降，曰：“大光经声通于有顶。”光一日宴坐，自见神手从天而下抚其心，乃忆先达抱五大师尝志斯言，令高其法音，当有神之辅翼。又别夕梦神僧乳见于心，命光口吮，自尔功力显畅，形神不劳。又寻山探幽，偶坠穷谷，龙泉莫测，沦溺其间，心灵了然，都无惑乱。因思本经《多宝塔》，为诚愿持此支品十万遍，恍然奋身脱泉，若有神捧焉。后诏住资圣寺，此寺赵国公长孙无忌宅，龙朔二年为文德皇后追福造。长安七年，遭火荡尽，唯于灰中，得数部经，不损一字。以事奏闻，百姓舍施，数日之间已盈巨万，遂再造其寺。光览此经，倍加精进。后以偏感有亲在吴，未答慈力，表乞归省养，诏旨未允。遂生有妄之疾，荣蹇强力，将投于渊。驴伏不前，群鸟拂顶，心既晓觉，疾亦随瘳。乃以经顶荷行道，忽有诏许还。既止乌程，构营宝塔，日持《花偈》成报往愿焉。永泰元年，浙西廉使韦元甫表请光为六郡别敕道场持念之首。大历癸丑岁，颜鲁公真卿领郡。相国李绅父为乌程宰，绅末期岁，乳病恭作而不啼，不鉴者七辰。召光至，命乳母洗涤焚香，乃朗讽经《分别功德品》。遂超席而坐，拱手开眸，光授饮杯水，令强乳哺之，疾乃徐愈。光笑而谓曰：“汝何愿返之遄速乎？”因以光名易绅小字。贞元中，绅重游较上，泊舟之次，光早迟伫于溪侧，而笑言戏抚之，若稚孺焉。后绅刺于吴兴，饮醉于馆，光引宿于道常夜分将醒，白光满室，朗然若昼，往覩光公宴坐，梵音方作。光起面门如开，毫相经音向息，光色随敛。绅归京相辞，光曰：“汝得径山之言，吾则无以为谕。行矣自爱，去留有时。他日位处庙堂，以教法为外护乎？”永贞元年十二月黑月既夕，示灭于持经道场，兽号鸟坠，山木惊振。异香芬馥。信宿不消。刺史颜防深悼之。光一纳四十岁无浣濯，而戒香郁然。一饭七十载，征验绝多。故相李公绅素于空门寡信，颇规僧过，而敦重光公，自著碑题云“墨诏持经大德神异碑铭，布衣杨夔书”云。

○唐荆州天崇寺智灯传

释智灯，不知何许人也。矜庄已行，严厉时中，守护戒科，恒持《金刚般若》，勤

不知倦。贞元中，遇疾而死。弟子启手犹热，不即入木。经七日还苏，云：“初见冥中若王者，以念经故，合掌降阶，因问讯曰：‘更容上人十年在世，勉出生死。’因问：‘人间众僧中后食薏苡人为药食，还是已否？’曰：‘此大违本教。’灯报云：‘律中有正非正开遮之条如何？’王曰：‘此乃后人加之，非佛意也。’远近闻之，渚宫僧至，有中后无有饮水者。

系曰：小乘尚开食五净物，薏苡非五谷正食也。疑其冥官因机垂诫，嫌于时比丘太慢戒法，故此严警开制。实诸佛常法也，非后人之加酿焉。

卷二十五

◎读诵篇第八之一（正传二十一人附见五人）○唐并州石壁寺明度传

释明度，未知何许人也。经论涉学，三业恪勤。诵《金刚般若》资为净分，慈济为心。迨贞观末，有鸽巢于屋楹，乳养二雏。度每以余粥就窠哺之，复咒之曰：“乘我经力，羽翼速成。”忽早学飞，堕地偕殒，度乃瘞之。旬余，梦二小儿曰：“儿等本受卵生小类，蒙上人为养育，诵持回向，今转生人道，距此寺东十里间某家是也。”度默志之，至十月满，往访此家，男妇果孳生二子，入视之，数日遂呼曰：“鸽儿”，一时回头应诺。岁余能言，皆得成长。度未知终所。

○唐梓州慧义寺清虚传

释清虚，姓唐氏，梓州人也。立性刚决，桀黠难防，忽回心长诵《金刚般若》。三业偕齐，无有懈担尝于山林持讽，有七鹿驯扰，若倾听焉，声息而去。又邻居失火，连蔓灰烬，唯虚之屋，飙焰飞过，略无焦灼。长安二年，独游蓝田悟真寺上方北院，旧无井泉，人力不及，远取于涧，挈瓶荷瓮，运致极劳。时华严大师法藏闻虚持经灵验，乃请祈泉。即入弥勒阁内焚香，经声达旦者三，忽心中似见三玉女在阁西北山腹，以刀子剜地，随便有水。虚熟记其处，遂趋起掘之，果获甘泉，用之不竭。四年，从少林寺坐夏。山顶有一佛室，甚宽敞，人无敢到者，云鬼神居宅焉。尝有律师恃其戒行，夜往念律，见一巨人以矛刺之，狼狈下山，逡巡气绝。又持《火头金刚咒》僧，时所宗重，众谓之曰：“君咒力无双，能宿彼否？”曰：“斯焉足惧？”于是赍香火入坐持咒。俄而神出，以手揽足，投之涧下，七日不语，精神昏倒。虚闻之曰：“下趣鬼物敢尔？”即往彼如常诵经，夜闻堂东有声甚厉。即念《十一面观音咒》，又闻堂中似有两牛斗，佛像皆振。咒既亡效，还持本经一契，帖然相次，影响皆绝。自此居者无患，神遂移去。神龙二年，准诏入内祈雨。绝二七日雪降，中宗以为未济时望，令就寺更祈请。即于佛殿内精祷，并炼一指。才及一宵，雨周千里，指复如旧。才遇大水，寺屋皆垫溺，其院无苦，若无涝没。凡诸异验，皆如此也。

○唐睦州乌龙山净土道场少康传

释少康，俗姓周，缙云仙都山人也。母罗氏因梦游鼎湖峰，得玉女手捧青莲授曰：“此花吉祥，寄于汝所，后生贵子，切当保惜。”及生康之日，青光满室，香似芙蕖。迨襁褓之年，眼碧唇朱，齿得佛之一相，恒端坐含笑。时乡中善相人也，目之，“此子将相之才，不语，吾弗知也”。年甫七岁，抱入灵山寺中，佛生日礼圣容，母问康曰：“识否？”忽发言云：“释迦牟尼佛。”闻皆怪之，盖生来不言语也。由是父母舍其出家。年十有五，所诵之经已终五部。于越州嘉祥寺受戒，便就伊寺学毗尼。五夏之后，往上元龙兴寺，听《华严经》、《瑜伽论》。贞元初，至于洛京

白马寺殿，见物放光，遂探取为何经法，乃《善导行西方化导文》也。康见欢喜，咒之曰：“我若与净土有缘，惟此轴文斯光再现1所誓才终，果重闪烁中有化佛菩萨无算。遂之长安善导影堂内乞愿见善导。真像化为佛身，谓康曰：“汝依吾施設，利乐众生，同生安养。”康如有所证，南至江陵果愿寺，遇一法师，谓康曰：“汝欲化人，径往新定，缘在于彼。”言讫不见，止有香光望西而去。泊到睦郡，入城乞食，得钱诱掖小儿，能念阿弥陀佛一声，即付一钱。后经月余，孩孺蚁慕，念佛多者即给钱。如是一年，凡男女见康，则云“阿弥陀佛”。遂于乌龙山，建净土道场，筑坛三级，聚人午夜行道，唱赞二十四契，称扬净邦，每遇斋日云集，所化三千许人。登座，令男女弟子望康面门，即高声唱阿弥陀佛。佛从口出，连诵十声，十佛若连珠状，告曰：“汝见佛身，即得往生。”以贞元二十一年十月示众嘱累，止劝急修净土。言毕加趺，身放光明而逝。天色斗变，狂风四起，百鸟悲鸣。乌龙山也一时变白。今坟塔存于州东台子岩，岁久唯余方石。石傍之土，相传疗疾，州民凡婴众病，悉焚香取土，随服多差。石之四隅若车辙焉。汉乾祐三年，天台山德韶禅师重建其塔，至今高敞，时号后善导焉。

系曰：康所述偈赞，皆附会郑卫之声，变体而作，非哀非乐，不怨不怒，得处中曲韵。譬犹善医以饴蜜涂逆口之药，诱婴儿之入口耳。苟非大权入假，何能运此方便，度无极者乎？唱佛佛形从口而出，善导同此作佛事，故非小缘哉。

○唐江州开元寺法正传（会宗）

释法正，不知何许人也。宽旷其怀，慎修厥行。司辰于三业，御史于六根，以其日讽《金刚般若》三七过，执持恭恪，罔或云懈。长庆初，得疾暴终。云倏至幽冥，引见王者，问曰：“师生平艺何福田？获何善果？”正以诵经为对。王乃揖上殿令登绣座，请诵七通。王已下侍卫靡不合掌，阶下栲掠擗击论訖，寂若无声。念毕后，遣一人引正令还人间，王降阶揖送云：“上人更得三十年在世，勿废诵持。”随吏行数里，至一巨坑，俾正俯窥，为吏推堕，若陨空焉，飒然苏起。初正死唯面不寒，起述其事，变心迁善者不一。正后年暨八十余，卒于住寺。次荆州功安县释会宗，俗姓蔡。初泛尔为僧，别无他伎。忽经中蛊病，乃骨立，因苦发心，志诵《金刚般若经》以待荆尔至五十过，梦有人令开口，喉中引出发十余茎，其夜又有梦吐鐏长一寸。月余，因此遂愈，当长庆初也。荆山僧行睹见其事。宗不测终所。

○唐京兆大兴善寺守素传

释守素者，立性高迈，与群不同。居京兴善寺恒以诵持为急务。其院幽僻，庭有青桐四株，皆素之手植。元和中，卿相多游此院。青桐至夏中无何发汗，颇污人衣，如车果脂焉，而不可膺。时相国郑公^乡因尝与丞郎数人避暑，且恶其滴沥，谓素曰：“弟子为师伐此树，各殖一松，可乎？”及暮，素戏咒之曰：“我种汝二十余年，汝以汗之淋丽，为人所恶，同恶木之不可休其下也。来岁若然，我必薪之。”自

尔绝踪矣。素誓不出院，诵《法华经》三万七千部。夜恒有貉子驯扰，来听经。斋时则乌鹊就掌取食也。僧以食诱，群羽皆惊噪而逝。长庆初，有僧玄幽题此院云：“三万《莲经》三十春，半生不踏院门尘。”当时以为佳句也。素之终代，罔得详焉。

系曰：刺漆树者恒患其少滴，爰故难求。斩魏树者患其多辛，恶之易得。嗟尔青桐发汗，世所罕闻。及乎素公诋呵，明年绝迹。岂有出家弟子不如其无情树木乎？既不能为漆与物隔其污，为魏与食加其味乎？苟认师友之弹呵，取今完净，《传》曰：“过则勿惮改。”本教则悔罪清静，如本无异，思之。

○唐幽州华严和尚传

释华严和尚，不知名氏。居在幽州城北，恒持《华严经》以为净业，时号之，全取经题呼召耳。其所诵时，一城皆闻之，如在庭庑之下。万岁通天年中，韩国公张仁愿之为幽州都督也，夜闻经声，品次历历然。及尔晨兴，谓夫人曰：“昨宵城北道人讽诵，若在衙署前也，还闻已否？”夫人曰：“是何地远可得闻乎？”张君曰：“如其不信，可各遣小竖走马往覆之。”果无差谬。张君请召入城，及相见，谓张君曰：“有愿胡不报乎？”答曰：“现造袈裟五百，缘布施罗汉去。”华严曰：“勿去余处，但送往州西马鞍山竹林寺内施僧。”及遣使赍香衣物登佛龕山，已去，觅竹林寺且无踪迹。如是深入，陟高山，见一翁问之，曰：“但随吾来。”俛睹云开寺现，景物非凡世所有。入寺散袈裟毕，而少二人。彼老宿曰：“可赍还二分，一与张仁愿，一与华严和尚。”自此方知华严和尚是竹林圣寺中来，使留一宿，出已经年。行化既久，及终坐亡，肉身不萎败。范阳之人多往乞愿。时有征应塔，近因兵革而废矣。

系曰：一口宣诵，何能入远近人人耳耶？通曰：“近则若愿持经，善法力故。远则一音演说，随类闻解。其人是圣寺员位，断可知矣。”○唐河中府柏梯山文照传

释文照，不知何许人也。本敦朴迟讷之人耳，然见佛像则悦怿。一旦诣柏梯寺，礼昙延法师画影出家，专念诸经，罔知诠显。常愤受性昏浊，忽若假寐，见昙延法师身长一丈，目光四射，谓照曰：“尔所欲者，吾安能致之？吾有《聪明经》一卷，求之于彼，必谨而持，取感应若俯拾地芥耳。”即袖中出以授之，则《金刚般若》也。登即执读，七过而便惊寤，经犹在目。然后念通无滞，如久习焉。其喉舌间曲折浮沈，寻变入节，非常调也。自此聪敏日新，辩给在口，时谓为观音附丽于厥躬也。且曰：“我师是周隋国师。”凡所纂集《义疏》，必乘梦寐而神授我，无愧为资矣。

○唐陕府法照传

释法照，不知何许人也。立行多轻率，游方不恒。长庆元年，入逆旅避雨，逡巡转甚泥淖，过中时乞食不得。乃咄遣童子买彘肉煮，夹胡饼数枚，粗食略尽，且无耻愧，旁若无人。客皆诟骂，少年有欲驱者。照殊不答。至夜，念《金刚经》，本无脂烛，一室尽明，异香充满。凡二十一客皆来礼拜谢过，各施衣物。照踞坐若无所睹。后不知终所。

○唐蕲州广济县清著禅院慧普传

释慧普，姓宋，本郡蕲水人也。性地疏朗，敏利桀然，既奉尸罗，冰雪任操。元和十二年，乐广济山秀地灵，愿栖于此。始谋诵《大涅槃经》，历稔弥年，卒通四十二卷。闻者恍然曰：“四英大经，若为温习，非揣量而可庶几乎！或疑其妄言彻部，有乱次举品题以试验之，且无涩滞，少辽缓之，无不弭伏。普亦不戒意，躬刀耕火种，趣足而已。卉服布裘，度其伏腊，日夜经声不绝。如是涉三十载，邑人学者，莫不推重，增修院宇。以大中三年冬，无疾，集众告违，加趺坐终，俨若凝思。弟子以香泥缠饰，迁于山椒塔中，号涅槃焉。于今香火不绝。

○唐今东京客僧传

亡名，长庆中自远而至，状辄粗暴。见寺中净人，咄曰：“与吾将钱沽酒。”寺僧见之，怒其勿遮戒检，辱我僧坊，其何以堪。遂夺其瓶，击寺外柏树，瓶则铿然已碎，其酒凝滞不流，著树如绿玉焉。摇之不散，嗅之无臭，寺僧惊怪，顾客“何为”？客曰：“某常持《金刚般若》，须预饮此物一杯，则讽吟浏亮，率以为常，非此不可。上人勿怪。”寺僧迟回之际，愀然其容，将器就树盛之，其酒尽落器中，略无子遗。观者如堵，奄然流啜，斯须器窳而酣畅。不知其僧往复何所。

○唐上都大温国寺灵幽传

释灵幽，不知何许人也。僻静淳直，诵习惟勤。偶疾暴终，杳归冥府。引之见王，问“修何业”？答曰：“贫道素持《金刚般若》，已有年矣。”王合掌屡称善哉，俾令讽诵。幽吮唇播舌，章段分明。念毕，王曰：“未尽善矣。何耶？勘少一节文。何贯花之线断乎？师寿命虽尽，且放还人间十年，要劝一切人受持斯典。如其真本，即在濠州钟离寺石碑上。”如是已经七日而稣。幽遂奏奉敕令写此经真本，添其句读，在无法可说是名说法之后是也。

系曰：《春秋》夏五，不敢轻加。佛教宜然，无妄酿矣。通曰：“灵幽获钟离寺石经，符合无苦。如道明所添糅，使人疑豫，必招诈伪，率易改张，称有冥告，诚之哉。”

○唐荊州法性寺惟恭传（灵岵）

释惟恭，不详何许人也。少孺出俗于法性寺，好尚逼下，多狎非法之友。虽乖僧行，犹勤持诵《金刚般若》，罕离唇齿。酒徒博侣，交集门庭，虚诳云为，曾无廉耻。后遇病且死。同寺有灵岵，其迹相类，号为一寺二害也。岵偶出，去寺一里所，逢六七人少年甚都，衣服鲜洁，各执乐器如龟兹部，问灵岵曰：“惟恭上人何在？”岵即语其处，疑其寺行香乐佛也。及晓，回入寺，闻钟声，云“恭卒”。所见者乃天乐耳。盖承经力，必生净刹，亦以其迹勉灵岵也。岵感悟折节，缁门崇重，终成高迈焉。

○唐明州德润寺遂端传

释遂端，姓张，不知何从而来德润寺求师。其为人也，质直清粹，不妄交游。师授《法华经》，诵犹宿构，人皆骇叹。至乎老齿，勤而无懈。十二时间恒讽不辍，咸通二年，忽结跏趺坐而化，须臾口中出青色莲花七茎。远近奔走，皆至观礼。邑人同心造龕，窆于东山之下。二十余年，坟莹屡屡光发，后开视之，形质如生。众迎还寺，漆綯饰之，今号真身院存焉。伊寺者，吴太子太傅都乡侯阚泽书堂，后舍为伽蓝，其题额取泽字也。

系曰：端终口出优昙钵华，是乎？闻诸轮王出世海中道上方生是花，今像末岂有是邪？通曰：“为感其人而应，则不可以时拘也。譬犹麟非中国之物，感明王而至同也。”

○唐越州诸暨保寿院神智传

释神智，婺州义乌人也，俗姓力。力氏之先，黄帝臣牧之后。汉有鲁郡相力归，因官居兖，遂为鲁人也。祖考皆田畯，而以朴素相沿。智少有贞操，恳乐舍家，就云门寺惟孝为师。年十二，一食断中，持《大悲心咒》，应法登戒，峻励恪勤。俄属会昌灭法，智形服虽殊，誓重为僧，磨不磷而涅不淄，于时见矣。大中初年，复道。巡游暨阳，考于禅室，且曰：“营廷之鱼，潜于蓺泽，宜哉。此处吾之蓺泽也。”恒咒水杯以救百疾，饮之多差。百姓相率，日给无算，号大悲和尚焉。大中中，入京兆，时升平相国裴公休预梦智来，迨乎相见欣然。相国女郎鬼神所被，智持咒，七日平复。遂奏请院额曰大中圣寿，仍赐左神策军钟一口、天后绣，《藏经》五千卷。裴君为书殿额。智以光启丙午岁十二月，终于东白山，春秋六十八，法腊四十八。迁座归暨阳南山入塔焉。

○梁扬州禅智寺从审传

释从审，不详氏族，幼入江都禅智寺，舍家诵经数万余言。其寺即隋炀帝之故宫也。咸通五年，受具戒于燕台奉福寺律席经筵，遍知尝染，后并三衣成五纳。诸名山胜

概，无不游览。未归淮甸，推为僧首。五六年间，一皆严肃。然恒诵《净名经》，未愆日计。以贞明二年三月十八日构疾，迨十九日禺中微息而终，颜貌如常。茶毗，获舍利三十粒，坚明通锻无耗。叠石为坟，筠源沙门灵护述坟铭云。

○梁温州大云寺鸿楚传

释鸿楚，字方外，姓唐氏，永嘉人也。生而符彩，且异群儿。及甫髫龄，器度宏旷。楚之外昆弟皆出俗越之龙宫伽蓝，遂祈二亲，亦愿随往。网疏鱼脱，笼揭鹤飞，杜若殖于兰洲，新缁染于绛色，互相切直，诵习弥通，年二十三，方升上品无作。及回本郡，时州将朱褒知其名节，钦揖愈勤。唐大顺中以城南有废大云寺荒翳，表闻昭宗，欲重缔构。帝俞其请。于是百工俱作，楚躬主之。施利程功，不愆于素，而讲经礼像，无相夺伦。武肃王钱氏，乾化初年于杭州龙兴寺开度戒坛，召楚足临坛员数，因奏荐梁太祖，赐紫衣并号，固让弗听，终不披著。自言凉德，何称法门命数之服？时诗人郑说南游，访鸿静法师，邂逅与楚会。体知高行，杼诗赠楚云：“架上紫衣闲不著，案头金字坐长看。”楚宽慈，人未尝见其愠色。神气清爽，厥颐丰下，且皤其腹。目不邪视，顾必回身。世俗之言，不轻掉舌。所讲《法华经》，计五十许座。一日，楚之讲堂中忽生莲华，重跗复叶，香气芬馥。以长兴三年壬辰六月五日，无疾而化。俗龄七十五，法腊五十二。道俗孺慕。其年迁塔于慈云右冈焉。

楚讲贯外，深夜行道诵经。将逝夕，灯光忽暗，经声绝微，告门人曰：“劳尔给使，吾将往矣。”其所卧之榻中先有白蛇，其大若肱，恒同卧处。长诫童侍，无妄惊扰。生常撰《上生经钞》，刺血写《法华经》一部，至今永嘉人谓为僧宝中异宝焉。

○后唐温州小松山鸿莒传

释鸿莒，姓唐氏，永嘉人也。早出家于越州龙宫寺。始则诵《法华经》全部。得度，裹足往趋长安学律，因读《化度寺碑》。时有举人旁听，见莒目瞻多行，异之，知能背碑，请莒诵之。儒生覆其文，了无一误。又相将去崇圣寺，亦然，而多强记，辈流所推。言归故乡，请受二众依止。其细行也，生来未尝叱其狸犬，岂况诸余乎？然昼夜行道诵经，有鬼神扶卫，或为然烛，或代添香，皆鬼物也。天成三年戊子，水涝之后，报之以大旱，民荐饥馑。有强盗入其室，莒待之若宾客，躬作粥饭，饲之曰：“徐徐去，山深无人。汝曹为天灾所困耳。”盗者拜受而去。弟子中欲袭其不备，莒曰：“非我弟子，我舍此永入深山矣。”诸子罢轻袭之意。长兴癸巳岁中，恬然无疾，加趺俨然长逝。至三更，手敲龕门者三，弟子哭泣启开，云：“吾告汝等，与吾换新衣裳，缘佛土诸上善人嫌吾服章不净。”易毕便终，七日顶暖。时院中有巨犬三，能猛噬。迁塔日随人驯狎。时山中鹿飞鸟相参，犬无攀猛，兽不惊奔。葬后，有虎绕坟号叫。其感物之情如是。有弟鸿楚，并高行，为时所重。

○后唐凤翔府道贤传

释道贤，不知何许人也。持讽《孔雀王经》以为日计，末则受《瑜伽灌顶法》，持明之功愈多征应。尝夜梦佛携贤行，步步蹈履浓云，若乘刚焉。每行不知几百里，而指之曰：“此摩竭陀国，此占波国，南印度、西印度、迦湿弥罗等国。”且行且记，喜跃不胜。及寤觉，冥解五天梵音，悉昙语言。时西域僧到歧下，葱岭北诸胡僧往往伪称五印人，贤以一接语言，先斥之曰：“汝是某国人。”北戎南梵，无敢诒之。陇坻道俗，皆禀承密藏，号阿闍梨也。迨长兴末，明宗晏驾，立从厚为帝，凤翔清泰不恭其命。遣王思同帅师伐之，清泰乃婴城自守。清泰问贤曰：“危甚矣，如何？”对曰：“召窦八郎，可逆知胜负也。”清泰出乘城抚众，其窦八介甲持戈来马前，作迎斗之状。跳跃已，解甲投戈而走。贤曰：“此外敌必降之象也。”果如斯说。清泰乃拥兵而东，召贤俱行，入洛即帝位欵。改元曰清泰。贤奏曰：“年号不佳，何邪？水清石见。”至二年，敕移并州晋高祖为天平军，乃阻兵自固，潜连契丹，长驱入洛，清泰自焚，果“石见”之应矣。晋兵未至，贤先终于洛，今两京传大教者，皆法孙之曾玄矣。窦八郎者，歧人也，家且富焉。自荷器鬻水，言语不常，唯散发披衣狂走，与李顺兴相类。或遇牛驴车，必抚掌而笑。迨死，焚之，火聚中尽化金色胡蝶而飞去。或手掬衣扇行之，归家供养焉。

○汉江州庐山若虚传（亡名）

释若虚，隐于庐山，数年持经，不出石室。江南国主李氏钦尚其道，累征，终不降就。唯言“老僧无能，宁销王者归心？若更相呼，窜入深山矣”。或衣物则避让，香则受之。以乾祐中盛夏坐终，身不沮坏，今湓城人供养影相焉。又潭州释亡名，恒诵《法华经》，口无他语。长沙文昭王马氏特加礼重，召入天策府湘西院供养。然其语事，诡异堪惊。一旦召知佛殿僧，令急褰掠佛像，各就两厢。僧皆谓为狂发，相目而笑。举止极甚总切。须臾，自入正殿内据佛座而坐，奄然而化。举州道俗，争礼焚香，汉乾祐中也。

○周会稽郡大善寺行？传

释行？，姓陈氏，湖州长城人也。考曰良，母陶氏，钟爱之心与诸子异。然其敏利，又于群童桀然而出。父母多途，碍其出家之志，终弗能禁。唐天祐二年依光远师求于剃染。年十有二，诵《法华经》，月奇五辰而毕轴。次《维摩经》荆如道安朝请经而暮纳本焉，寻于余杭龙兴寺受满足戒，遂往金华双林寺智新传南山《律钞》弭节服膺，流辈推揖。常食时至，以不啻之米与菜茹投小鼎中，参煮而食。此外断无重味。义解之心，理斲破木，都无难色。尝谓人曰：“所好甚者，不见他物之可好。吾之好也，乐且无荒也。”后唐天成中，寓于越，乐若耶山水，披览大藏教，

服少麻之衣。募道俗置看经道场于寺之西北隅。构楼阁堂宇，蔚成别院，供四方僧，曾无匮乏。以显德三年壬子秋七月示疾，终于此院，报龄六十二，法腊四十四。性刚正，无面谀，无背憎，足不趋豪贵之门，囊不畜盈余之物，房无闭户，口无杂言。亦览群书，旁探经论，慨其郭《音义》疏略，慧琳《音义》不传，遂述《大藏经音疏》五百许卷，今行于江浙左右僧坊。然其短者，不宜称《疏》。若言《疏》，可以疏通一《藏经》，便过慈恩百本几倍矣。其耿介持律，古之高迈也矣。

○大宋东京开宝寺守真传（沙弥弥伽道荫）

释守真，永兴万年人也。俗姓纪，汉诈帝信之鸿绪。乃祖乃父，素履贞吉，弈叶孝行，充塞闾里，故乡人美其孝焉。遂目之曰纪丁兰也，真即其后矣。洎黄寇干纪，僖宗蒙尘，车驾避锋而西幸，咸镐失守而没贼，因而徙家居于蜀矣。及冠也，偶游圣寿寺见修进律师行出物表，语越常度，乃解带卸冠，北面而事之。七支既备，先谒从朗师，学《起信论》；次依性光师，传《法界观》；后礼演秘阁梨，授瑜伽教，并得心要，咸尽指归。自明达诸法，宣畅妙典，四十年间略无怠矣。而赐号曰昭信焉。讲《起信》及《法界观》共七十余遍，皆以灯传灯，用器投器。嗣乎法者二十许人，开灌顶道场五遍，约度僧尼士庶三千余人，开水陆道场二十遍。常五更轮，结文殊五髻教法，至夜二更轮，西方无量寿教法，称阿弥陀尊号，修念佛三昧，期生净域。一日，谓弟子缘遇曰：“如来不云出息不保入息。吾之寿也幸矣，汝之年也耄矣，今欲顺俗从世，预设二塔，其可得乎？”缘遇稽首而对曰：“广度长老舍院之右地请建塔者有年矣，今大师属其意，长老致其美，因缘冥契，安可而止。”于是鳩工而营之，自十月琢磨，至十一月彻绩。以开宝四年秋八月九日命众念佛，佛声既久，令止，奄然而归寂，俗寿七十八，僧腊五十三。其月二十一日焚葬于北永泰门外智度院侧。其获舍利光润，各将供养之。次沙弥弥伽者，于阗国人也，专诵《化严经》曾无间息。圣历年中，天帝释请迎伽上天诵持，乃曰：“每被阿修罗见扰，故屈师来，请为诵宣《华严经》，以禳彼敌。”遂升座，朗讽是经。时修罗军众闻经乃现威神，一时而化去。又沙弥道荫常念《金刚经》，宝历初，因他出夜归，虎暴中路，忽遇哮吼跳踯于前。荫知不免，乃闭目而坐，唯默念是经，心期救护，虎遂伏草守之。达曙，村人来往，乃视虎，其蹲处涎流于地焉。荫后持诵益加，高行矣。

论曰：入道之要，三慧为门。若取闻持，勿过读诵者矣。何耶？始惟据本，本立则道生。次则舍詮，詮留则月失，比为指天边之桂影，而还认马上之鞭鞘。如此滞拘，去道弥远。然则机有新发，迹或乍移，须令广览多闻。复次，背文高唱，在乎品位，先号法师。故经云：“受持读诵，解说书写，如法修行”是也。原夫经传震旦，夹译汉庭，北则竺兰始直声而宣剖，南惟僧会扬曲韵以讽通。兰乃月氏之生，会则康居之族。两家左右，二见否臧，无为冰上之狐，免问候傍之路。通曰：“西竺僧持部类行事不同，或执亲从佛闻，更难厘革。或称我宗自许，多决？流。或直调

而质乎？或歌声而巧矣。致令传授各竞师资，此是彼非，我真他谬，终年矛盾，未有罢期。故有若美一期之呗，诵三契之伽他，感车马而不行，动人天之共听，此曲折声之效也。若乃《盘特》少句，《薄拘》短章，止忧忘以鼓唇，胡暇巧而扬舌？犹登中圣，或致感征，此直置声之验也。今以一言蔽之，但有感动龙神能生物善者，为读诵之正音也。”或曰：“常闻光音天之语言，则是梵音未委，那为梵音邪？请状貌以示之。”通曰：“诸《陀罗尼》，则梵语也。呗之声，则梵音也。”或曰：“如天下言音令人乐闻者，与襄阳人为较，准彼汉音也。音附语言，谓之汉音汉语。则知语与音别，所言呗者是梵音，如此方歌讴之调欤？且梵音急疾，而言则表诠也。分晓舒徐引曳，则呗也。”或曰：“此只合是西域僧传授，何以陈思王与齐太宰检经示沙门耶？”通曰：“此二王先已熟天竺曲韵，故闻山响及经偈，乃有传授之说也。今之歌赞，附丽淫哇之曲，茱萸之音，加酿瑰辞，包藏密咒，敷为梵奏，此实新声也。如今启夹，或曰开题，只知逐句随行，那辨真经伪造？岂分支品，未鉴别生，能显既知，所诠须体。当闻舍筏，适足归宗。达其阿字之门，图其法身之体，此读诵之至也。其有难通帚字，多游族家，急令口诵于一经，且为身参于不众。赖能暗诵，免呼粥饭之僧；如偶澄清，缓裹归家之幞。”或曰：“国朝度戒，何责经乎？岂不闻羯磨之辞，止云年满，衣钵具足，不言念经。为增上缘耶？”通曰：“此灭法无知之徒言耳。上根感戒，果证相随，何以经纸数考试耶？脱舍下根之诵持，入法止闕茸白丁矣。南山大师云：‘才登解发，便须通览。’又后周初，多度僧尼，敕灵藏铨品行业，若讲若诵，卷部众多，随有文义，莫不周鉴，时共测量。通经了意，最为第一。此乃精选诵经通义，为入道之阶渐也。不见此文，深为痛惜。梁《传》目此为经师，宣师不沿而革，号为读诵。今采诸师从唐至宋，取其多善，宗归乎高。则有感神宿庙，度苦因经。法智往生，感金光之照野；明慧行道，占虹气之贯天。或受请居罗汉之前，或持明救城阳之疾，得御诗之钱送，见势至之来迎。使者摄而不能，妖狐媚而自变。猗欤元皎，致李树之丛生；焯尔楚金，感帝王之入梦。圆光在顶，三昧现前。遇诵《华严》，放金光于口角，后游地狱，乘宝座于西方。三刀断势，伤于竹筒；千福经声，入于帝耳。证返不踰于薏苡，康声无断于连珠。或添龄于三十许年，或戢蛊于数十茎发。或经音遍于燕垒，或本足在于钟离，或乐象龟兹，或口开菡萏，或鬼神避咒，或陆地生莲。或梦华胥而悉解梵音，或坐佛座而便归圆寂。如斯土德，若此法师，殖璧随方，贯花有次。身为金鼓，击之成忏悔之音；口若玉箫，吹之出神仙之曲。因依相授，徒倚独宣，可谓皮裹《法华》，足行经藏。俾法者之不断，善付三乘；皆成佛之无余，还宣八辩者也。《诗》曰：‘伐柯伐柯，其则不远。’望吾曹无忘取则于此焉。

卷二十六

◎兴福篇第九之一（正传十四人附见二人）○周京师法成传

释法成，本姓王，名守慎，官至监察御史。属天后猜贰，信酷吏罗织，乃避法官，乞出家为僧。苦节勤于化导，声发响随，行高质直。长安中，于京兆西市疏凿大坎，号曰海池焉，支分永安渠以注之，以为放生之所。池上佛屋经楼，皆成所造。穿池之际，获古石，铭云“百年为市，而后为池”。自隋朝置都立市，至于时正一百年矣。仪凤二年，望气者云：“此坊有异气。”敕掘之，得石函，函内贮佛舍利万余粒，光色粲烂而坚刚。敕于此处造光宅寺，仍散舍利于京寺及诸州府各四十九粒。武后于此始置七宝台，遂改寺额，成公居之。行其激劝，多以崇福为己任焉。

○唐五台山昭果寺业方传

释业方者，即解脱禅师之法孙也。身長七尺五寸，古貌轩昂，垂手过膝，眉长数寸，目有重瞳。人望凜然，礼诵无倦，绍脱高躅，动合无形，不舍利物，而再修梵宫。时太原府有士女造立文殊像一躯，将送入山，到池河侧，洪波泛涨。方乃隔岸焚香启告，河为流减，过文殊毕，水还弥溢。后终，建塔在寺西北一里，肉身见存，而多神异焉。

○唐上都青龙寺光仪传

释光仪，姓李氏，本唐宗室也。父琅王耶王与越王起兵欲复本朝，中兴帝道，不克，天后族诛之，而无噍类。仪方在襁褓中，乳母负之而逃。后数年，则天窃闻琅琊有子在民间，购之逾急。乳母将至扶风界中，鬻女工以自给。仪年八岁，状貌不群，神悟超拔。乳母疑遭貌取而败，且极忧疑。乃造布襦，置钱于腰腹间，于桑林之下，告之令去。“敕搜不慢，吾虑俱死，无益于事。汝聪颖，必可自立。或一旦富贵，无忘老姥。”言讫对泣。仪恸不自胜，乳母从此而逝矣。仪茫然行至逆旅，与群儿戏。有郡守夫人往夫所住处，方息，俱此见仪群聚，且貌俊爽，因而怜之。召谓之曰：“郎君家何在，而独行至此？”仪给之曰：“庄邻于此，有时闲戏耳。”夫人食之，又给之钱，乃解衣而内其钱。日暮寻径而去，拟投村墅。遇一老僧，呼曰：“尔小子，汝今一身，家已破灭，将奚所适？”仪惊愕伫立，老僧又曰：“出家闲旷，且无忧畏，小子欲之乎？”仪曰：“素所愿也。”老僧因携其手至大树阴，令礼十方佛，归依常住佛法僧已，因削其{髻采}。又出袈裟以披服之，小大称其体。其执持收掩，犹如几夏比丘。老僧喜曰：“此习性使然，善持僧行。”遂指东北曰：“去此数里有伽蓝，汝直诣彼，谒寺主云，我使汝为其弟子也。”言毕，老僧錫然亡矣，方知圣僧也。仪如言趣彼，寺主骇其言，因留之，经十年许，仪已洞明经律，善其禅观。而属中宗即位，唐室复兴，敕求琅王耶王后，仪方向寺僧言之。时众大骇，因出诣扶风李使君，即仪之诸父也。见之悲喜，乃舍之于家，方以状

闻，固请不可。使君有女，年齿相侔，一见仪而心悦，愿致情曲。仪恐慑而避焉。他日会使君夫人出其女，靓妆丽服，从者越多，来而逼之。仪固拒百端，终不屑就，给之曰：“身不洁，请沐浴待命。”女许诺，方令具汤沐，女出，因闭关。女还排户，既不得入，自牖窥之，方持削发刀，顾而言曰：“有于此根，故为欲逼，今若除此，何逼之为？”女惧止之，不可，遂断其势，投之于地。仪亦闷绝，户既不开。俄而使君、夫人俱到，女实情具告，遂破户视之，渐苏。命医工舁归蚕室，以火烧地，苦酒沃之，坐之于上，以膏传之。月余疮愈。使君奏仪是琅簫王子。有敕命驿置至京，引见慰问，优赉丰洽，诏袭父爵。仪恳让，誓愿为僧，确乎不拔。中宗敕令领徒，任置兰若，自恣化方。仪性好终南山，因居法兴寺。于诸谷口造庵寮兰若，凡数十处，率由道声驰远，谈说动人。或山行十里间，缁素侍者常数千百人，迎候瞻待，甚于权要卿相焉。仪恒居寂定，或言将来事，以决吉凶，必无差忒，人益归之。开元二十三年六月二十三日，先嘱累弟子：“当谨护身口，勿事喧哗。祖师意无别事，静则真法现前。此外提唱，皆不获已。”言极激切。因北首而卧枕肱，右胁著席而亡，此大涅槃之表兆也。遗言令葬于少陵原南，乃凿原成室而封之。柩之发也，异香芬馥，状貌如生。祖车出城，白鹤数百鸣唳空中，彩云依约，覆车数十里。道俗号篋，多持孝服。所葬之地，遂建天宝寺，弟子皆留而守之。

○唐镇州大悲寺自觉传

释自觉，博陵望都人也。稚齿厌于俗态，俄白亲老言：“儿乐从佛求度世去。”二亲惊愕，咄咤俾去，然无惭怍。再拜请命，乃强礼本部开元寺知钦。钦观其志气弗群，立字曰自觉。训之曰：“汝闻名思义。”答曰：“佛种从缘起，唯听明诲矣。”既而诵经及格蒙度。至德二年年满，镇州受具足法。即往灵寿县禅法寺习律经论，勤瘁九年，皆造微也。便言“当入太行山，于一磐石上结茅庵三亩，小？为兰若，不亦快乎”。大历元年九月晦，往平山县界，得重林山院，果应所求，遁迹自娱。至二年五月，天其旱赞，觉则跣足经行，冬则右肩偏袒。其林薄山谷，虎狼狃迹重复。唯拾果采蔬，卯时一食。时恒阳节度使张君患炎旱，闻觉精苦，躬入山请其祈雨。张语之曰：“某无政术，致累百姓三年亢阳，借苦引咎自责，良无补矣。或云龙王多依师听法，忘其施雨。愿师垂救旱之誓，有如白水。如念苍生，请辍禅定，略入军府。”觉乃虔恪启告龙神，未移晷刻，天辄大雨，二辰告足。张帅归向勤重，若孝子之事父母焉。觉始入法已来，学诸佛因中誓愿，其数亦四十九也。其一愿身长随大悲菩萨，次愿造铸大悲像寺。及乎发言响应，檀施臻萃，用赤金鼓铸成，举高四十九尺，梵相端严，眼臂全具。迨更年稔，寺亦随成，今城西山大寺是欤。遂于坛前诵念至三更，见神光二道作中金色，于晃朗中见弥陀佛、观音、势至左右翼从，佛垂金臂呼自觉声，渐下云来，摩其顶曰：“守愿勿悛，无宜懈怠，利物为先。汝去吾随，任从汝意。”言毕云收，香无泉迹。觉以愿心酬毕，返山林之间，择送终之处。贞元十一年二月望夜，有神人现半身，若毗沙门状，谓曰：“师今岁灭度矣。”举手谢神人曰：“往来定分，吾闻命矣。”其年六月十四日，奄归寂灭。门人欲奉神龛归山寺，州府人苦留，终于大悲寺南迁塔焉。则十三年四月八日

也。其大悲为恒阳奇事，感应潜通，至周显德初，敕铸九府圆法，天下铜像，一例除毁。时州人相率出钱赎此像，不允，登即炉橐熔冶。真定之人莫不悲悼，时炭炽飞烟，无之，从顶至胸，旋收铜汁，斯须计料，匠氏暴卒，自此罢工。迨宋太祖神德皇帝追铸令全，代忤前事焉。

○唐今东京相国寺慧云传

释慧云，姓姚氏，湖湘人也。性识精明，气貌疏朗。高宗麟德元年，正十岁矣，邈然有出尘之志。二亲多厌沮之，其心匪席，不可卷也。父哀其所愿，从往南岳初祖禅师稟承慈训，而能黠慧，好味经教，沈默如也。至于弱冠，于岳寺受具足法。自专护戒，且善毗尼，寻罢讲科，专营福事。发言响答，化俗风从。立事绝私，士庶钦揖。乃出重湖而游荆郢，江南振锡，浙汭携囊，务在劝人令舍慳玻随处盖造，缉修寺宇二十余所，皆功成不宰。天后久视元年，江北行化，因缘未会。长安元年，来观梁苑，夜宿繁台，企望随河北岸，有异气属天。质明，入城寻睹，乃歙州司马宅。西北园中池沼，云徙步临岸，见澜漪中有天宫影，参差楼阁，合沓珠璣，门牖彩绘，而九重仪像逶迤而千状，直谓兜率之宫院矣。云睹兹异事，喜贯心膺，吾闻《智严经》说，琉璃地上现宫殿之影，此不思议之境界也。今决拟建梵宫，答其征瑞。乃挂锡于安业寺。神龙二年丙午，往濮州属县报成寺，发愿为国摹写弥勒像，举高一丈八尺，募人出赤金。于时施者委输，逡巡若丘阜矣。遂振陆径，程巧工，一铸克成，相好奇特。殆景龙四年庚戌六月，属温王让位，奉睿宗叔父也。景云元年，云于寺东廊南隅造别殿安圣容。始云治材，方议版筑，檀越众议纷纭，未成建树。至二年辛亥，于福慧寺经坊北贸新安典午郑景宅。方事兴工，掘得古碑，则北齐天保六年乙亥岁置建国寺，乃高欢嗣子文宣帝也。睹之者皆惊叹，同舍利弗悲蚁垤焉。采访使君称异再三，遂治此记，改福慧为建国寺迎取安业圣容及殿材至寺。太极元年五月十三日改元延和，是岁刑部尚书王志？为采访使，至浚郊宣敕，应凡寺院无名额者，并令毁撤，所有铜铁佛像收入近寺。云移所铸像，及造殿宇门廊，犹亏彩绩。遇新敕，乃辍工。云于弥勒像前，泣泪焚香，重礼重告曰：“若与此有缘，当现奇瑞，策悟群心。”少顷，像首上放金色光，照耀天地，满城士庶皆叹希有。是时生谤毁者随丧两目，又有舌肿一尺许者。远近传闻，争来瞻礼，舍施如山。乃全胜概，像坐垂趺，人观稽顙。涉恶报者，云望像为其悔过，斯须失明者重视，舌卷者能言，皆愿为寺之奴，持钟扫地也。采访使王志？、贺兰务同录祥瑞奏闻。睿宗潜符梦想，有敕改建国之榜为相国，盖取诸帝由相王龙飞故也。仍敕佛授记寺大德明傒同共检校功德，勿令州府烦扰。中书舍人贾曾、侍郎崔沼、给事中卢逸、中书侍郎平章事岑羲皆捐俸禄，共构因缘。或启发心之元，或施外护之力。先天中行传神于潞郑玄宗即位，至八月十五日，上皇御书寺额，奉诏令大德真谛并弟子二人、品官一人，赍敕赐幡花及寺额至，迎受悬挂。云道化梁园，身荣福树，百龄有限，四相交迁，终于寺之别院。葬今京之东郊，寺庄塔亭存焉。时号造寺祖师。云去世后，天宝四载造大阁，号排云。肃宗至德年中造东塔，号普满者，至代宗大历十年毕工。或云造塔僧能分身行化，难测品阶。文殊、维摩，是王府友吴道子装

塑。又开元十四年，玄宗东封回，敕车政道往于闐国摹写天王样，就寺壁画焉。僧智俨募众画西庑北壁，三乘入道位次，皆称奇绝。今之殿宇，皆大顺年火灾之后盖造，大宋太祖重修。翰林待诏高益笔迹壁画，时推笔墨之妙矣。

○唐杭州华严寺玄览传（慧昶守如）

释玄览，姓褚氏，其先河南人也。食菜于钱塘，因是家焉。览诞膺明德，生而悬解，深达实相，以崇善本。自初念至于舍家，师承慧昶。昶师德无不满，众用皆足，年高行尊，久为师范，及见览无一息之间违仁，告门人曰：“无上之道，清静为本。有能一念用其心，吾未见学不足者。江表无真僧久矣，或以此子为法鼓耶？俾遐迩闻之。”其预为达匠之所甄异也如此。其本邑有故华严寺，览以包桑之地近于玄礼师之先茔，属隋室不竞，法宇弛颓，名将壑迁，迹亦时废。属于唐初，慕信人重建。文明岁，有敕许还旧额，广轮制度，兼移基址。背山临水，往返形胜。览初以具戒依天竺，次以僧录住一闲居，后以耆德统华严三寺。次第同致于道，道无不在，因教有迁也。览尝以悯物慈济为己任，遂议寺前平湖之通川为放生池。时大守袁从礼因兹劝勉，深入慈门，以禁六里。司马杨敏言感梦，又广至十里。是以蓼髻掉尾，噉喙浮沈，不虞其害，得遂生性焉。览又以经像为最则，殿前画四像，慈氏为首。铸金铜像三百五十座，弥陀为首。写经二千余轴，金字《涅槃经》为首。如是功德，以顺现报。故王考宗追赠和州刺史右散骑常侍封舒国公无量，则览之元昆也。量修学之日，临平湖龙见，无不往观，舒公晏然不离书案，气度如此。明皇初年，舒公侍讲，帝嘉尚之。归觐太夫人，年已期颐。昆季皆以华皓，晨昏之地说法而已。览以开元二十二年示疾，终于临平所造寺。春秋八十四。僧明了、大觉、普贤、神满、怀逊，皆参预法流，奉法器藏于缅甸洞之下基。工部侍郎徐安贞撰碑颂德焉。又闽中爱同寺释守如，多事劝诱，越上之民归若麀聚焉。崇树精庐，以为济众，急在利他。开元十年于寺营浴室，患地势斗高，清泉在下，桔槔无用，汲引步遥，终以为劳。思虑不迨，无由改作。忽一宵下流顿涸，距造浴室所二十余步，清泉迸出，时谓神功冥作，移此泉耳。七闽之民罔不归信，终于温室之偏房矣。

○唐东阳清泰寺玄朗传

释玄朗，字慧明，姓传氏。其先浦阳郡江夏太守拯公之后。曹魏世，避地于江左，则梁大士翕之六代孙，遂为乌伤人也。母葛氏初妊，梦乘羊车飞空蹶虚而觉身重。自兹已后，羣血恶闻。殆乎产蓐，亦如初寐，觉后心轻体安。婴儿不啼，颯尔而笑。九岁出家，师授其经，日过七纸。如意元年闰五月十九日，敕度配清泰寺。弱冠，远寻光州岸律师，受满足戒。旋学律范。又博览经论，搜求异同，尤切《涅槃》。赏恨古人虽有章疏，判断未为平允。往在会稽妙喜寺与印宗禅师商榷秘要，虽互相述许，大旨未周。闻天台一宗可以清众滞，可以趣一理，因诣东阳天宫寺慧威法师。威禀承括州智威，时传威是徐陵后身，灌顶师之高足也，朗亲附之，不患贫苦。达《法华》、《净名》、《大论》、《止观》、《禅门》等，凡一宗之教迹，研

核至精。后依恭禅师重修观法，博达儒书，兼闲道宗，无不该览。虽通诸见，独以止观以为入道之程，作安心之域。虽众圣继想，而以观音悲智为事行良津，游心十乘，谛冥三观，四悉利物，六即体遍。虽致心物表，身？人寰，精捐旧庐，志栖林壑。唯十八种十二头陀，隐左溪岩，因以为号。独坐一室，三十余秋，麻紵为衣，粝蔬充食，有愿生兜率宫，必资福事。乃构殿壁，绩观音、宾头卢像。乃焚香敛念，便感五色神光，道俗俱瞻，叹未曾有。此后或猿鼯来而捧钵，或飞鸟息以听经。时有盲狗来至山门，长嗥宛转于地，朗悯之，焚香精诚，为狗忏悔，不逾旬日，双目豁明。至开元十六年，刺史王上客屈朗出山，暂居城下。朗辞疾，仍归本居。厥后悔人匪倦，讲不待众。一郁多罗四十余年，一尼师坛终身不易。食无重味，居必偏厦。非因寻经典，不燃一烛。非因覲圣容，不行一步。其细行修心，盖徇律法之制，遂得远域沙门、邻境耆耄拥室填门，若冬阳夏阴，弗召而自至也。其寺宇凋弊，乃指授僧灵稟建。其殿宇形像，累二砖塔。绩事不用牛胶，悉调香汁。天台之教鼎盛，何莫由斯也？一日，顾谓门人曰：“吾众事云毕，年旦暮焉。”以天宝十三年九月十九日薄疾而终，春秋八十有二，僧夏六十一。置塔于岩所，生常撰《法华经科文》二卷。付法弟子衢州龙丘寺道宾、净安寺慧从、越州法华寺法源、神邕、常州福业寺守真、苏州报恩寺道遵、明州大宝寺道原、婺州开元寺清辩。韶年募道，志意求师，不逾三年，思过半矣。行其道者，号左溪焉。第其传法，号五祖矣。禹山沙门神迴著乎真赞矣。

系曰：观其唐世已上，求戒者得自选名德为师。近代官度，以引次排之，立司存主之，不由己也。朗之求戒，不其是乎？如是师资相练，恩义所生。脱临事请为，则喻同野马也。

○唐湖州佛川寺慧明传

释慧明，俗姓陈氏，汉太丘长实之后。世居颖川，永嘉南渡，祖为司徒掾。曾祖仲文有佐命于陈，封丹阳公。祖为双溪谷熟二县令。考为兰陵长，乃为兰陵人也。明母氏初感之日，如持佛戒，足恶履于荤园，口不尝于鲜器。神梦仿佛，如闻法音，既而诞焉。年渐及？，方祈舍俗，父母偕听。至受具时，即开元七年也。习学《律藏》，尝谓人曰：“昔者繁刑首作，伯成子遁焉。吾虽不舍律仪，而恶乎诤论纷纷。若心印心之法至矣哉！乃西诣方岩，顿开心地。天宝中有愿于清凉山。淮汴阻兵，明即旋策。与禅客遇，同游宛陵，于上石门置兰若三所，有大酺来扰，如抚？焉。时荐饥，群盗欲至，必号呼先告，往往有征焉。先是此乡好弋猎，明化之，皆焚？网器仗矣。至天宝五年，爰止乎鱼陂道常有■公者，白土史宗之流，迹迹行轍，世莫之识，始相见曰：“南祖传教菩萨，来何晚耶？”他日同登鱼陂峰顶，见东南有山苍琅独秀，谓■公曰：“吾与此山宿有缘矣。”天宝八年，有制度人。州将韦南金举高行，黑白状请，隶名州中宁化道场，明固辞。改隶佛川，即畴昔鱼陂所望之峰，梁吴均故宅之所，《地志》云：“青山南掘得古佛二躯，莫知年代。获像之地，灵泉涌起，因名佛川焉。”泉侧有吴王古祠，风俗淫祀，滥以牺牲。于是明夜

泊庙间，雷雨荐至，林摧瓦飞。顷之，雨收月在，见一丈夫容卫甚盛。明曰：“居士，生为贤人，死为明神，奈何使苍生每被血食，岂知此事殃尔业耶？”神曰：“非弟子本意，人自为之。”礼忏再三，因与受菩萨戒。神欣然曰：“师欲移寺，弟子愿舍此处，永奉禅宫。”后果移寺于祠侧，获铜盘之底，篆文有“慧明”二字焉。建中元年正月示疾，其日庭水春染，山雨昼冥，猛虎绕垣，悲啸而去。十二日，奄然长往，春秋八十四，僧腊五十一。二月十二日建塔于寺西山焉。传法弟子慧解、慧敏、如知三人也，若鶩子采菽之伦也。菩萨戒弟子，刺史卢幼平、颜真卿、独孤问俗、杜位、裴清，深于禅味。俾昼公为塔铭焉。

○唐湖州大云寺子瑀传

释子瑀字真瑛，姓沈氏，吴兴德清人也。其先亡国于沈，因以为氏，春秋沈子之后也。瑀生而聪慧，不以师授。年未总角，辞亲出家，以如意年中大赦度人，坏衣削{髡采}，煤灸世事，于洛京大福先寺受戒。勤勤祈请，假寐三日之夕，见有神人俨然在目，倏往忽来，或同或异，得非至诚乎？于是烛如来灯，佩菩萨樱证圣中归于大云道场，坚执律柄，僧纲矜举，不亦宜哉！瑀素履纯懿，无咎无誉。使天下之士有外道焉，有阐提焉，心如飘风，言若泉涌，挠我圣教，挤我妙门，瑀示以从容，诱以方便，莫不稽首挫色而闻命焉。常礼一万五千佛名兼《慈悲忏》，日夜一匝，或二日三日一匝。夜有圣僧九人降于礼忏之所，相与行道，弹指而去。或夜无灯烛，心口是念，圆光照室，如坐月中。如此则往往有之，瑀慨德清偏邑未有塔寺，遂锐怀营构。一唱齐和，乃成精宇。前后写经三藏，凡一万六千卷。天宝初，临安足法师死，经三宿，将入地狱，冥中见瑀引至王所，谓王曰：“此人能讲《涅槃经》，王宜宥之。”王曰：“唯闻岩仑师能讲，不闻此师名，何也？”如是再三，王不能屈，因赦之。曾是乡人施牛（音桃）者，天然不孕，因而出乳，其通感如是。以十一年秋禅坐而终。十二年春，将启灵龕，欲焚之，容色不变，如生，虽少林孕髭，蕲春育发，何独嘉也？大理评事摄监察御史姚淡、主客郎中姚涑、刺史杨慧才偕归信焉。

○唐明州慈溪香山寺惟实传

释惟实，姓汤氏，富阳人。其为人也，杜多其行，禅观其心，淡然静居，长坐不寐。初母氏抑其愿心，不容披削。既而笼开鸟逝，岸穴泉飞，学善财之遍参，同迦叶之练行。天宝中往明州若山，夜闻冥告曰：“达蓬圣迹名山，宜矣。”翌日且登其山，岩洞窈窕，石壁削成，秀异之多，实维灵境。有大佛足迹，询其山叟，则曰“彼开元年中始现斯瑞。”遂愿栖此，有终焉之志。时属海寇袁晁蜂蚁屯聚，分以剽劫，杀戮无辜。至于香山，众皆奔窜。实据榻瞑目，先以大石掩洞门。贼可三二百数，复舁巨石阔二丈余，镇其穴口。实起暗鸣，以掌举之，群盗罗拜以谢之而去。邑民重之，遂立精舍，弗再岁而成。大历八年也。太守裴微奏请署香山题额焉，诏度僧七人隶名矣。以贞元二年冬示疾，终于寺，则加趺而化也。春秋六十二，法腊

三十一矣。

○唐朔方灵武龙兴寺增忍传

释增忍，俗姓史氏，沛国陈留人也。典谒之年，登其乡校。百氏简策，寓目入神。艺文且工，乃随计吏，数举不捷。会昌初，薄游塞垣，访古贺兰山中，得净地者白草谷内，发菩提心，顿挂儒冠，直归释氏。乃？草结茆为舍，倍切精进。羌胡之族，竞臻供献酥酪。至五载，节使李彦佐嘉其名节，于龙兴寺建别院，号白草焉，盖取其始修道之本地也。忍刺血写诸经。大中七年，李公虑其枯悴，躬往敦谕曰：“师何独善一身，行小乘行？胡不延惜生性，任持教法，所利博哉！忍执情胶固，遂著《三教毁伤论》以见志，帅览而益加崇重。九年，因读《大悲经》，究寻四十二臂至无畏手，疑而结坛，浹旬祷请，自空中现其正印，双拳历历可观。遂命画工绘写此臂焉。或有讥谤者，忍再精懃虔告，画工濯笔铜碗中，忽感宝性花一朵，枝趺叶，一皆鲜明，睹者惊叹。至咸通十二年七月十日示灭于白草院，春秋五十九。以十月十七日藏神于水馆之南，建塔焉。初忍刺血写经，总二百八十三卷。画庐舍那阁三十五尺，门一丈六尺。起样画大悲功德三轴，自著《大悲论》六卷，并藏诸篋笥焉。后节使唐恒夫仰其遗迹，奏乞旌劝，敕谥大师曰广慧，塔曰念定。弟子无辙，亦致远之高足，赍血书经二卷、瑞花碗一枚，诣阙奏呈，宣赐紫衣。天复中终。及梁乾化初，中书令西平王韩公逊录遗迹奏闻，太祖敕致谥曰法空，别赐紫方袍，塞垣荣之。后唐同光中，从事薛昭纪为碑焉。

○唐京兆荷恩寺文瓚传

释文瓚，姓张氏，晋阳人也。天姿整恪，幼事师于并州崇福寺。学该群籍，控带三乘。至若金版银绳之策，龙韬象秘之文，罔不饥耘情田，波涛口海，宣畅皇化，对扬天休，一皆悦服。诏为翻译，并河南佛授记寺兼京兆安国、荷恩、崇福等寺大德。好修福事，设无遮一百会，凡圣混淆，一皆等施。纵风云连起，及至斋日，必晴明晏然，感动人

瘳，福无唐设。春秋六十馀，卒于本院。境内苦雾如泣，数日不解焉。○唐太原府崇福寺怀玉传

释怀玉，姓许，并州人也。少而警利，日览千言。早露锋芒，迥拔侪类。及其长也，戒节逾峻。梵场龟鉴，志在修葺，无间彼此，夏墟寺宇，经有阙而必补，像有凋而遍修，三任纪纲，特有崇建。仍校雠大藏经二十余本，祁寒盛暑，不废晨暮。增饰净土院，兴事任力，转加殊丽。代宗嘉之，委为灌顶道场主，真言秘诀有所在矣。春秋六十三，卒于本院云。

○唐晋州大梵寺代病师传

释代病者，台州天台人也，姓陈氏。以其尝发大愿，尽一报代众生之病，致本名不显矣。诞育之辰，祥光充室，邻里异焉。七岁丧父，哀毁几于灭性。白母求出家，母才艰阻，遂断一指，亲党敦劝，偏亲乃送于国清寺。因戒法登满，誓志观方。初止今东京，次于河阳，为民救旱，按经绩八龙王，立道常启祝毕，投诸河。举众咸睹画像沉跃不定，斯须云起肤寸，雷雨大作，千里告足。自此归心者众。先是三城间多暴风雹，动伤苗稼雉堞，号为毒龙为之也。代病为诵密语，后经岁序，都亡是患。盟津民立堂宇若生祠焉。大历元年，登太行，游霍山，乃深入幽邃，结茆而居。有盗其盂食，俄见二虎据路，会逢代病，盗叩头陈悔。慰谕毕，因摩挲虎头，如是累伏猛兽。其盗本樵子，愿依附为苦行焉。其中山神庙，晋绛之间传其箬蚤。代病入庙，劝其受归戒，绝烹牲牢。其神石像屡屡随劝颌首，顾其神妇，略无俞答之状。遂剃神之发，毁撤神妇。乡人怪之，闻白州邑。太守怒之曰：“此唐高祖初起至此，久困阴雨，其神见形示路，以迎义师。厥后砉石为像，荐飧无亏。此之髡师无状敢尔。”俾系闭于嘉泉寺，扃键且严。至二十日启关，寂然禅定，倾城咸往观礼，或声磬，舒徐而起。太宗急召之不来，以至约令断头。代病斩一指以付使者。太守感之，躬就迎请，移置大梵寺，别营砖浮图以藏其指节矣。由是檀信骈肩蹑踵。有蜚毒于酒者，贿贫女往施之。代病已知。贫女给之曰：“妾家酝觉美，酌施和尚求福。况以佛不逆众生愿。”代病曰：“汝亦是佛。”然贫女惧反饮，具以情告。代病执杯啜之，俄尔酒气及两胫足，地为之僨裂，闻者惊怪，以酒供养，自兹始也。汾隰西河人有疾，止给与净水，饮之必瘳。凡属荐饥，必募粮设食。后于赵城救斯荒歉，作施食道场，前后八会，遐迩赖之，道感多类。以贞元十九年秋七月八日，奄然加趺示灭。四众初谓如嘉泉寺之禅定欬，香花供养，至于隔岁。肌肉渐坚，方知永逝，遂漆布绩画之。武宗废塔像，无巨细皆毁除，或议之移入陶灶中。既而生瑞草一本，其状亭亭若盖，盘错紫纁，庇其风雨而有余也。宣宗即位，佛事中兴，纲簾比丘造小亭，移真形蜚于此。先于嘉泉寺断指节，已过百龄，筋肉甲爪光润，且如金色。或属兵革，城陷指亡。后有赍出逃难，事息归还。亦阴福其逋亡者，至今平阳人崇信焉。

卷二十七

◎兴福篇第九之二（正传二十一人附见三人）○唐京师光宅寺僧竭传

释僧竭者，不知何许人也，生在佛家，化行神甸。护珠言戒，止水澄心。每嗟靳固之夫，不自檀那之度，乃于建中中造曼殊堂，拟摹五台之圣相。议筑台至于水际，竭惧伤生命，俾立三日道场，咒其多足至无足，当移窞相避，勿成某梵行之难。将知至诚所感，征验弗虚，掘土及泉，了无蠢动焉。常以复素为漉袋，遇汲有虫，投诸井坎，时号护生井，恒盈不涸。又观其飞蛾蠛蠓，错认火明为可飞之路，故犯之，乃铸铜蟾为息烟调。天下传其制度。其曼殊院尝转经，每敕赐香。此寺本七宝台寺，内有天后所造之台，竭居于中焉。

○唐成都福感寺定光传

释定光者，不知何许人也。爰从入法，厥性弗拘，粝食断中，粗糲卒岁。方于庸蜀化导有缘，事或多魔，教钟中否。俄遭武宗毁废，例反儒宗。及乎佛日重晖，僧伦咸序，光同缔构寺宇，因铸大钟，计赤金万余斤。尔日鼓砮灰飞，投炉火炽，有祥烟两道自浮图相轮最高处出，冉冉射上，若虹譙焉。万人引望，五色腾凌，相感如然，信鼓斯应。其塔是阿育王藏舍利之所。大和初南蛮蒙苻颠剽掠入益城，分蛮卒舍于寺内廊庑，皆烹炙熏灼，僧皆奔迸。时塔顶出四道浓烟，分穗直上空虚，至夜。蛮讙睹此奇异，乃禁止污秽。此塔先在西北四十余步，天宝末长史章仇兼琼赴在至剑门，见一人长一丈余，持戟当路。兼琼惊问，对曰：“某是大石寺护塔神，故来奉迎，且有少事咨祈大夫也。缘大石寺塔在西南，未为极善，今请移东北四十二步。伏望便掘石此下，以镇舍利。”兼琼曰：“此易耳。”遂隐厥形，到府数日，乃令量其地处，先掘，果得巨石，其深无际。促石匠数十人鑿凿之，至夜，辄填满。遣人潜伺之，见有白彘数十以喙推石末塞之，随以舌舐，其坚如铁铜矣。章仇止令勿凿，遂移塔于今所，即金花旧寺基也。光钟亦移入新寺焉。

○唐吴郡嘉禾贞侯传

释贞侯，俗姓武氏，云中人也。神宇高邈，以禅默为务。曳锡蹢步，南访灵迹，及至故鄣，有昆山寺者，林泉秀茂，则宋支昙谛尝考室于此，味道崇化二十余载，基

跖存焉。至元嘉中创成大伽蓝。属武宗废教，其寺屏除。侯至止于兹，与范阳卢君袭同兴弘觉法师第二生名迹，寺成，进士姚扶有诗。侯后游今秀州长水，见灵光寺，邑民欲树巨殿。时卢令移邑字民，欣然相遇，侯悉先知。或云“得他心宿命之明焉。”遂请侯首唱，而恶偃室之器，寓殿基后，编苫为浅室而居。四方檀信，弗召自臻。又与僧令恭君道等累岁方成今殿。其最高广，海内罕比。事毕，挈弊囊，振

旧锡归北，莫知其终。

○唐苏州支硎山道遵传

释道遵，字宗达，姓张氏，吴兴人也。夙负殊操，洁士称之，荣曜不足关于心，声尘未尝触其性。至年二十，诣天竺义威律师受具戒，事报恩寺兴大师。首宗毗尼传教也。后学天台一心三观法门，欲广写《法华经》，置道场，辟经院。一之日发其心，二之日规其趾，作不逾序，厥功成焉，居支硎之福地。大历元年，州将韦元甫、兵部尚书刘晏、侍御史王圆、开州刺史陆向、殿中侍御史陆迅、大理评事张象，竞诱真心，共获殊胜，乃相与飞表奏闻。诏书特署为法华道场，自江以东总一十七所，皆因遵之首置也。举精行大德二七人，常持此经，以报主恩。铸卢舍那及毗卢遮那像，及多宝塔，修净土当生业，造弥陀佛，复写天台教。益乎道场，置常住庄二区。平时讲《法华玄义》、《天台止观》、《四分钞文》，临坛度人，授心扬律，徒盈石室之筹。天宝中，于灵岩道场，行《法华》三昧，忽睹大明上烛于天，我身正念俨在光中。异日问荆溪然师曰：“智慧光明从心流出，非精志之所致耶？”又于本寺入法华道场，睹此身在空中坐，先证者知是涤垢之相。其年春秋七十一，僧夏四十六，以兴元元年七月二十九日告终于支硎山寺。僧益公、翰公一夜同梦大殿崩，果遵入灭。门人灵翰、法盛、道欣、犹子灵源追慕不已，树塔旌德焉。

○唐京兆大兴善寺含光传

释含光，不知何许人也。幼觉嚣尘，驰求简静。开元中见不空三藏颇高时望，乃依附焉。及不空却回西域，光亦影随，匪惮艰危，思寻圣迹。去时泛舶海中，遇巨鱼望舟，有吞噬之意。两遭黑风，天吴异物之怪，既从恬静，俄？师子国。属尊贤阿钭梨建大悲胎藏坛，许光并慧同受五部灌顶法。天宝六载回京，不空译经，乃当参议华梵，属师卒。后代宗重，光如见不空，敕委往五台山修功德。时天台宗学湛然解了禅观，深得智者膏腴，尝与江淮僧四十余人入清凉境界。湛然与光相见，问西域传法之事。光云：“有一国僧体解空宗，问及智者教法。梵僧云：‘曾闻此教定邪正，晓偏圆，明止观，功推第一。’再三嘱光或因缘重至，为明唐为梵附来，某愿受持。屡屡握手叮嘱。详其南印土多行龙树宗见，故有此愿流布也。”光不知其终。

系曰：未闻中华演述佛教，倒传西域，有诸乎？通曰：“昔梁武世，吐谷浑夸吕可汗使来求佛像及经论十四条，帝与所撰《涅槃》、《波若》、《金光明》等经疏一百三卷付之。原其使者必通华言，既达音字，到后以彼土言译华成胡，方令通会。彼亦有僧，必展转传译，从青海西达葱岭北诸国，不久均行五竺，更无疑矣。故车师有《毛诗》、《论语》、《孝经》，置学官弟子，以相教授。虽习读之，皆为胡语是也。又唐西域求《易》、《道经》，诏僧道译唐为梵。二教争菩提为道，纷籥不已，中辍设能翻传到彼，见此方玄赜之典籍，岂不美欤！又夫西域者，佛法之根

？11也。东夏者，传来之枝叶也。世所知者，知枝叶不知根？。而不知枝叶殖土，亦根生？11长矣，尼拘律陀树是也。盖东人之敏利，何以知耶？秦人好略，验其言少而解多也。西域之人淳朴，何以知乎？天竺好繁，证其言重而后悟也。由是观之，西域之人利在乎念性，东人利在乎解性也。如无相空教，出乎龙树，智者演之，令西域之仰慕。如中道教生乎弥勒，慈恩解之，疑西域之罕及。将知以前二宗，殖于智者、慈恩之土中，枝叶也。入土别生根？，明矣。善哉接者，见而不识，闻而可爱也。又如合浦之珠，北土之人得之，结步摇而饰冠佩。南海之人见而不识，闻而可爱也。蚕妇之丝，巧匠之家得之，绣衣裳而成黼黻。？抽之姬，见而不识，闻而可爱也。懿乎智者、慈恩，西域之师焉得不宗仰乎1

○唐剡沃洲山禅院寂然传

释寂然，姓白氏，不知何许人也。名节素奇，踵四圣种，故号头陀焉。大和二年，振锡观方，访天台胜境。到剡沃洲山者，在天姥岑之阴，对天台华顶、赤城，北望四明，金庭石鼓山介焉西北北。有支遁岭、养马坡、放鹤岑次焉。晋宋已来，兹山洞开。初有罗汉白道猷言西域来，戾止是山。次竺法潜、支道林居焉。高人胜士，接踵而栖此中。至于戴逵、王羲之、郗超、孙绰、许询游憩其间矣。见是中景异，闻名士多居，如归故乡，恋而不能舍去。既行道化，盛集禅徒。浙东廉使元相国稹闻之，始为卜筑。次陆中丞临越知之，助其完葺。三年郁成大院，五年而佛事兴。然每为往来禅侣谈说心要，后终于山院。大和七年，时白乐天在河南保姚为记，刘宾客禹锡书之。

○唐天台山福田寺普岸传（全亮唯约）

释普岸，姓蔡氏，汉东人也。冲弱之龄，迥然聪敏，骨目奇秀，天生不嗜荤膻，长有出尘之意。其父严毅，训授经籍，渐通其义，秉翰伸辞，宛然华藻。因入僧舍，暂执经卷，乃叹曰：“佛法玄微，非造次可及1决志辞亲。时怀海禅师居百丈山，毳纳之人骈肩累足，时号大丛林焉。岸叩其关，海摄受之。日随普请施役，夜独执烛诵经，曾不憊劳，遂谐剃染。及升戒品，便习禅那，壁坐忘疲，观心恒务。？亶附风而香远，戏猫逢兽而吼高，学者成围，请于安陆寿山院坐道场矣。如是环拱可四百余众，执器听瞿沙之说，投筹待？多之度。大利群机，得道者众。大和年中，谓众曰：“吾山水之游未厌，诸人勿相留滞。天台赤城，道猷曾止息焉。华顶石梁，智者昔降魔矣。将游之也。”自襄阳迢迢而来，从沃洲、天姥入天台乏西门，得平川谷中，峰名大舍，号平田是也。观其山四舍郁翠，东西山石门，而有三井龙潭。东入石桥圣寺，乃是绿身道猷尊者结茅居此。未几，见羆虎乳子，瞪目而视岸。岸以杖按其头曰：“贫道闻此山是神仙窟宅，罗汉隐居，今欲寄此安禅，檀越勿相惊挠。”经宿，领子而去。以大和七年癸丑十月二十七日营构丈室，携一童，侍给薪水耳。八年春，禅侣辐凑，众力义成此院，号平田焉。开成中，宛是大道常会昌三年七月，告众入灭，春秋七十四度。弟子全亮，俗姓陈氏。悟师之道，得凤之毛

，一人唯约，在上元入灭，肉身不朽。岸迁塔于是山前，此寺置五百罗汉殿，永嘉全亿长史尽半千形像，每一迎请，必于石桥宿夜，焚香具幢盖，螺钹引导入于殿，香风送至。幡幢之势前靡，而入门即止。其石梁圣寺在石桥之里，梵呗方作，香霭始飘。先有金色鸟飞翔，后林树石畔见梵僧，或行或坐，或招手之状，或卧空之形，11？息之间，千变万化。汉南国王钱氏频年施供养，祥瑞极繁。今上太平兴国三年，于滋福殿宣问两浙都僧正赞宁石桥长广量度，一皆实奏，帝叹嗟久之。至八年因福田寺道者自询誓断腕然炼，乞重造此寺，乃宣内殿头高品卫绍钦、张承贵革故规制，若化出天宫焉。今岸师影堂在寺之右。

○唐京师奉慈寺惟则传

释惟则者，拔俗志高，栖神物表，凡施善务，举则波随。常言：“像是生善之强缘，不得不多立。初之观也，如对严君。次则其心不乱，中则观门自成。末则如如焉，荡荡焉，三昧安得不现前乎？是以我曹劝化迷俗，得不以此是为先容欤？”由是若雕若塑，形像森然。恒事进修，天邑之间，偏加激励。属宪宗太皇太后郭氏元和中为母齐国大长公主追福，造奉慈精舍，搜择名德，则乃预选入居。未久之间，闻四明赞_山有阿育王塔，东晋刘萨诃求现，往专礼焉。乃匠意将七宝为末，用胶范成摹写脱，酷似。自甬东躬自负归奉慈寺供养，京邑人皆倾瞻归信焉。

○唐长安禅定寺明准传

释明准者，不详氏族，生缘本天台灵墟道场，出俗游方。至京邑，观古之神僧智苑于范阳北山刊石写经灌铁，以俟慈氏下生，免水火之虞。又东洛长寿寺写《华严》，圣善寺写《法华》，嵩山岳寺写《楞伽》，悉刊贞珉，皆图不朽。准遂于贞元戊寅岁春正月，见寺僧鑿山攻石，石悉顽恶，知匠氏不虔，山灵秘。时准疏告阴灵，请裨善务。俄于定中见若干幅贮无量石，冥冥之间，如有宰割，皆中刻字。时连率博陵崔公激劝幕府参佐各书一品，从《序》至《劝发》，凡二十八。圜廊挺立，不期毕工。准之化人，皆此类也。元和元年八月中也。后不详终所。

○唐洪州宝历寺幽玄传

释幽玄，俗姓刘，幽州人也。夙怀出俗之愿，年及弱冠，方遂前心，投并州贤禅师而了玄契。元和二年，振锡江左，至会稽大云寺，见三学僧寤定食轮，资缘都阙。玄言发响应，檀越供贍。未几，移居湖心龟山妙喜古寺。九年，属平昌孟简镇于越，枉驾问道，遂构成大院。十二载，复登南岳，栖止绝顶。十三年，豫章太守商祐笃重其道，命住东明寺，即东晋安帝世之所造，僧数繁凑。宝历中，为奏改为世福，兼置戒坛，续敕改为度僧寺。其间形像，皆玄之化导。大和元年，沈传中丞又加信向。玄于院南别造佛阁五层，功就，谓弟子曰：“福事无尽，生涯有期。物有阙然，后人庀具。吾终后，可将尸漆布安阁下。”言讫而化，门人特旁立塔焉。

○唐五台山智顗传

释智顗者，中山人也。自幼辞亲，来五台山善住阁院，礼贤林为师，诵经合格，得度。神情爽拔，气调高峙，于世资财，少欲知足。粝食充腹，粗衣御寒，余有寸帛，未尝不济诸贫病也。游方参玩，预诸讲席。传《法华》、《维摩》二部，穷源尽理。后桂锡高峰，息心却扫。距元和中，众辟为五台山都检校守僧长。顗与时迁徙，固辞不允，遂登此职。后遇岁当饥谨，寺宇萧条，有华严寺是大圣栖真之所，巡游者颇众，供施稀疏。院宇伦巡，例称不迨，众请为华严寺都供养主。时德不孤，有法照、无著、澄观之出世也。当观师制《华严经疏》，海众云集，请顗为讲主，日供千僧。十有余祀，食无告乏。皆云“有无尽藏之米面也”。岁久颇见丰盈。有邻院僧义圆，亦当代之硕德也，谓顗久知常住，私有谤言，非平等心，是贪饕者也。夜有神人报圆曰：“僧长是千佛之一数也，汝发轻言。若不悔过，当堕恶道。”圆乃诘朝鸣足忏悔，有兹验也。及钟武宗澄汰，顗遁乎山谷，不舍文殊之化境。未逾岁载，宣宗即位，敕五台诸寺度僧五十人，宣供衣帔，山门再辟。顗为十寺僧长兼山门都修造供养主。大中七年，与寰海游台，四众建无遮精妙供养。一月日，乃谓大众曰：“吾欲暂憩微骸，息心敛迹。佐助众务，吾无能为也，付诸俊哲，继吾遗躅。”乃净室安坐而灭，春秋七十七，夏腊五十八云。

系曰：僧中职任也，如网之纲，如屋之梁焉。肇自姚秦立正，魏世推都，北齐则十统分员，唐世则僧录命职。异乎常所闻者，五台山自贞元中智君贡始封僧长矣。亦犹鱼盐蜃蛤，祈望守之也。

○唐会稽吕后山文质传

释文质，俗姓祝氏，尚丘之远孙，衢州须江人也。叔氏为僧号唯宽，学通多本经论。宽被诏入长安，止大兴善寺，重诏入内道场，兼请受菩萨戒。质随宽入内。年十五，诵《法华》、《华严》、《维摩》等经。二十三，受具。七日诵周戒本，二夏便讲《四分律》二十七，讲通《俱舍》。四十年中，精晓诸大经论，后约束大悲、禹迹二禅师，参问心要。既博达矣，归诸暨法乐寺领徒。时有虎来听法，质摩其顶而去。后往永嘉，钟会昌之搜简，乃隐乐成县大芙蓉山，胎息而已。大中重兴，太守韦君累请不来，强置于榻，舁出州开元寺居。檀施骈列，回造大佛殿，并讲堂房廊形像，并写藏教，无不备焉。越州廉使沈貳卿命住吕后山院，本宁贲禅师旧化之地也。质唯居草庵而止。咸通二年十月十四日，告众言别。十五日，端坐而化，春秋八十四，僧腊六十二。窆于云谷，建塔，越州刺史段式为《行录》焉。

○唐明州国宁寺宗亮传

释宗亮，姓冯氏奉化人也。家傍月山而居，后称月僧焉。亮开成中剃落纳法，方事毗尼，循于四仪，且无遗行。而云我生不辰，属会昌之难，便隐家山深岩洞穴。大

中再造，国宁寺征选清高者隶名，亮预住持。建州太守李频为寺碑云：“于清心行不污者，得二十八人，以补其员，广住持也。律僧宗亮、禅僧全祐而已。国宁经藏，载加缮写，躬求正本，选纸墨，鸠聚？施，建造三门藏院诸功德廊宇，皆亮之力焉。晚年专事禅寂，不出寺门。处士方干赠诗云：“秋水一泓常见底，涧松千尺不生枝，空门学佛知多少，剃尽心花只有师。”终于本寺，春秋八十。亮恒与沙门贯霜、栖梧、不吟数十人，皆秉执清奇，好迭为文会，结林下之交。撰《岳林寺碑》、《诗集》三百许首，赞颂并行于代。而于福敬二田，锐心弥厚焉。亮为江东生罗隐追慕，乐安孙邰最加肯重，著《四明郡才名志序》，诸儒俊士外，独云：“释宗亮多为玄士先达癡仰焉。”

○唐越州开元寺昙休传

释昙休，字德敷，姓李氏。器度宏廓，志行修敕。纳法已来，未容少缺。习通渐教，颇至精微。《四分律》、相部、疏宗，蔚成渊府。初机请学，皆到甚深。休于讲训之余，飭绳寺任。伊寺者，梁所创，年涉四百，虽观阁岿然，且桷倾弛。休革故有方，缔构无隙，特加壮丽，轮焉奂焉。又护国经楼迨诸栋宇，悉见鼎新，次以寺之门楼也，则长安四年故昙一律师之经始也，既而颓废，仍重整覆，一同创制。复慊永徽中康僧会法师应身堂座卑庳，乃募人厘变旧规。咸通年中也。休之一言，檀信响应。后终于住寺，今之大善伽蓝是也。

○唐雅州开元寺智广传

释智广，姓崔氏，不知何许人也。德瓶素完，道根惟固，化行洪雅，特显奇踪。凡百病者造之，则以片竹为杖，指其痛端，或一扑之，无不立愈。至有？者则起，跛者则奔，其他小疾，何足言哉。乾宁初，王氏始定成都，雅郡守罗（亡名）罢任，携广来谒。蜀主王氏素知奇术，唯呼为圣师焉。先是咸通中南蛮王及坦绰来围成都，府几陷。时天王现沙门形，高五丈许，眼射流光，蛮兵即退。故蜀人于城北宝历寺立五丈僧相。后为牛尚书预毁。次兵火相仍，唯惧毗沙明之颓圯耳。王氏乃语广曰：“师之异术，道德动人，乘此可料理天王否？往吴尚书行鲁曾梦令修吾像，方事经营，除书忽到。请法力成之。”广唯其命，徙就天王阁下，居一隅，小榻而已。翌日，病者填噎其门，日收所施二十万至三十万钱。又发言劝人出材木，浹旬皆运至，堆，令三纲掌管焉。初广在雅郡本寺羯帝神堂内，居其半室，低门苦蓐，不许女人到门。唯有一竹筐子。每齐，受？二十文，必投筐内，满则置之佛殿。声钟集众，自他平等盂之。常日俗家请斋，亦体广意，止施二十文，净饭菜豉汁，此外不许一物，11？多不取，食毕而去，亦无辞告。其后益加神验，或遇病者，一搥一叱皆起。或令烧纸缙，掇散饮食。或遇甚痛恼者，捩纸蘸水，贴之亦差。光化元年修天王阁，向毕，乃循江渎池，咒食饲鱼。经夜，其鱼二尺已上万亿许，皆浮水面而殒。聊蹑流水，救十千鱼生忉利同也。

○唐鄜州宝台寺法藏传

释法藏，不详氏族，厥性方正，好行惠物。尝于葦川化众造寺，佛殿僧坊一皆严丽，雕刻华为，鄜羸命为壮观。藏偶病笃暴终。至一精庐，七宝庄严，非世所有。门外有僧，梵貌且奇特，倡言曰：“法藏汝造伽蓝，不无善报，奈何于三宝物有互用之愆，何从洗雪？”藏首露之，僧曰：“汝但缮写《金刚般若经》，恒业受持，岂不罪销！亦可延乎寿命。”言讫而苏。自躬抄度其经，午夜口诵。藏终时年一百一十岁云。雕阴人至今信重焉。

○唐五台山海云传（守节）

释海云，未详氏族乡里。来游圣迹，始于南台侧，选峭绝峰峦幽僻林谷而特居之。其刻苦

玩道，俭而难遵。从其游者，寡而无众。迨其入灭，门人守节，淘洒舍利起塔焉。昔传云是普贤菩萨应身也。门人守节即高力士之子也，从师墨俭，有进无退。云示之曰：“上都有卧伦禅师者，虽云隐晦，而实阐扬六祖印持，一时难测。化导之方，若尸鸠之七子均养也。汝急去从之。”及见伦，扣击未几，告云：“汝师海云入灭已。”节稟听斯言，荼蓼情苦，遂奔赴，如其言矣。乃继武接迹，盛化相承。迨将示灭，愁云郁结，鬼神悲号，有塔存焉。

系曰：海云是普贤应身，非耶？通曰：“菩萨下化，弗拘定相，应以比丘，即现说法。”若然，何乱文殊境，使主伴不分乎？通曰：“若如所问，凡夫分矣，圣人岂以我所求乎？”

○唐五台山佛光寺法兴传

释法兴，洛京人也。七岁出家，不参流俗。执巾提盥，罔惮勤苦。讽念《法华》，年周部帙。又诵《净名经》，匪逾九旬。戒律辄仪，有持无犯。来寻圣迹，乐止林泉，隶名佛光寺。节操孤颖，所沾利物，身不主持，付属门人。即修功德，建三层七间弥勒大阁，高九十五尺。尊像七十二位。圣贤、八大龙王，罄从严饰。台山海众异舌同辞，请充山门都焉。盖从其统摄，规范准绳，和畅无争故也。大和二年春正月，闻空有声云：“入灭时至，兜率天众今来迎导。”于是洗浴焚香，端坐入灭。建塔于寺西北一里所。

○唐五台山行严传

释行严，荥阳人也。家袭簪组，业嗣典坟。严稟庭诰以周旋，约成器能而济用，内要随计，俄发宿缘。因闻《妙庄严王经品》，白父母求出尘劳。堂亲抑禁，略无却

退。既而削饰去华，年充纳戒，诸方问道，绰有余能。闻五台山文殊应现，凡圣交踪，乃登游而隶名斯地。自尔一成慕学，三教偕明，谈论天人之际，听者茫昧，不知区域之内外耶！王公大人靡不回向。大和中，多行激劝，俾营福焉。自设大供，日计千人。闻见之流，皆鸣指赞叹曰：“行合解通，世之希宝也。助道之法，当如是修。”以大中三年右胁而灭，建塔寺西一里云。

○唐五台山佛光寺愿诚传

释愿诚，姓宋氏。望本西河，家袭素风，浚流远？，不扬胃绪，祖考不书。母阴氏夜梦庭树对发千花，余花寻谢，独结一果。乃觉有孕。母启愿心，得娠男子足矣。十月临蓐，果如其望，立字曰愿诚。后志存小字，不训法名者，遵慈母之意也。诚少慕空门，虽为官学生，已有息尘之志。迨栖金地，礼行严为师。严即儒宗圭璋，释氏师子也。一旦谓诚曰：“汝神情朗秀，宜于山中，精勤效节，可不务乎！大和三年落发，五年具戒。先诵诸经，悉皆精练，行人属耳，道望日拔。无何，会昌中随例停留，唯诚志不动。遥及大中再崇释氏，选定僧员，诚独为首矣。遂乃重寻佛光寺，已从荒顿，发心次第新成。美声洋洋，闻于帝听，飙驰圣旨，云降紫衣。后李氏奄有井门，遐奉文殊，躬游圣地。睹其令范，抚手愜怀，表闻唐天子，相继乃赐大师号圆相也，就加山门都检校。光启三载，羞饌命僧舍衣投施。钟声引众，悉至斋堂，右胁曲肱，寂然长往。建塔树碑寺之西北一里也。

○后唐五台山王子寺诚慧传

释诚慧，元礼之宗盟祖？，蔚州灵丘之故邑，父母深信，注意清凉。因瞻大圣之容，乃乞兴邦之子。既而有孕，遂诞贤童。才当？年，器？天假，自诣台山，永为佛子。时真容殿释法顺睹其作哲，化以苦空，劝舍俗衣，令披法服。暨登具足，尤习毗尼。自后孤游？谷，多处林泉。有王子寺僧湛崇等请居兹寺。慧主任之余暇，内外典教靡舍斯须。供赡精严，非不勤恪，恒转《华严经》，数盈百部。每至卷终，恳发愿曰：“以我捧经之手，救彼苦恼之人。”而属武皇与梁太祖日寻干戈，中原未定。武皇中流矢，创痛楚难任，思忆慧师，翹想焚香，痛苦乃息。遥飞雁帛，远达鸡园，命下重峦，迎归丹阙。武皇躬拜，感谢慈悲，便号国师矣。后乞归本寺，金峰显耀，玉树相依，九州之珍宝皆来，百寺之楼台普建。庄宗即位，诏赐紫衣，次宣师号。慧坚不受。帝复宣厥后，再朝天阙，更极显荣。受恩一月，却返五台。同光三年乙酉岁十二月，嘱累门人廷皂曰：“吾今化缘将毕，为吾进遗表，达于宸听。宜各努力，理无相代。”言讫入丈室，右胁而终也。俗龄五十，僧腊三十。帝闻惻怆，遣高品监护丧筵，仍敕赐祭。三朝火烬，五色骨存，收取舍利而起塔焉。谥曰法雨，塔曰慈云也。

卷二十八

◎兴福篇第九之三（正传十五人附见一人）○后唐洛阳中滩浴院智晖传

释智晖，姓高氏，咸秦人也。权舆总角，萌离俗之心，不狎童游，动循天分。錫遇圭峰温禅师，气貌瑰伟，虚心体道，?其门者，淑匿旌别矣。谓晖曰：“子实材器多能之士也。”请祈摄受，二十登戒。风骨耸拔，好尚且奇。山中阒然，曾无他事，唯钩索藏教，禅律亘通，日诵百千言，义味随嚼。闻佛许一时外学，颇精吟咏，得《骚雅》之体。翰墨工外，小笔尤嘉，粉壁兴酣，云山在掌。恒言“吾慕僧珍道，芬之六法，恨不与同时。对壁连图，各成物象之生动也”。然真放达之士哉。或振锡而游，纵观山水；或蹑屩而至，历览市朝。意住则留，兴尽而去。或东林入社，或南岳经行，悟宗旨于曹溪，宁劳一宿；访神仙于阮洞，拟到三清。事以志求，时无虚度。此外采药于山谷，救病于旅僧，惟切利他，以无别务。洎梁乾化四年，自江表来于帝京，顾诸梵宫，无所不备，唯温室洗雪尘垢事有阙焉。居于洛洲，凿户为室，界南北岸，葺数亩之宫，示以标榜，召其乐福业者占之。未期渐构，欲闰皆周，浴具僧坊，免焉有序。由是洛城缁伍，道观上流，至者如归，来者无阻。每以合朔后五日，一开洗涤，曾无盼然。一岁则七十有余会矣。一浴则远近都集三二千僧矣。晖躬执役，未尝言倦。又以木舄承足，少麻缝衣，彼迦叶波相去几何哉！其或供僧向暇，吟咏余闲，则命笔墨也，缅想嘉陵碧浪，太华莲峰，凝神邈然，得趣乃作，五溪烟景，四壁寒林，移在目前，暑天凛冽矣。加复运思奇巧，造轮汲水，神速无比。复构应真浴室，西庑中十六形像并观自在堂弥年完备。时杨侍郎凝式致政佯狂，号杨疯子者，而笃重晖，为作碑颂德。莫测所终。

○晋五台山真容院光嗣传

释光嗣，姓李氏，太原文水人也。冲幼孤静，罕杂童稚。信尚台山，乃为真容院浩威之高足也。纳戒后，器宇穹隆，?系包桑，出求禅法，历于年稔。内外之学优长，口海崩腾，良难抗敌。由是决意越重湖，登闽岭，盛谈文殊世界，闻者竦动。忠懿王王氏大施香茗，遣使送山寺焉。癸酉岁，至两浙，谒武肃王钱氏厚礼迟之，施文殊圣众供物香茶并钵盂一万。副应吴越诸州牧宰，皆刈俸入缘。仍泛海至沧州，运物入山。时降龙大师者率领弹压，缁伍畏焉，为其分散诸寺兰若，众寡均等。时徒侣坚请嗣主院，宣补僧官辖诸台寺院，命曰都纲，师号超化，居于僧上，若鯤凤之领鳞羽焉。十五年间，兴建梵宇，斋饲僧尼，不胜纪极。以天福元年遘疾，至九月五日迁灭。门人起塔，藏其灵骨舍利，至今存焉。

○晋今东京相国寺遵海传（彦求）

释遵海，姓李氏，谯郡人也。祖世不仕，母张氏梦神人授己宝珠，乃有娠焉。生且奇异，乳哺之时，善认人之喜愠。弥长，见寺观，必任步迟回，顾眄不舍。年甫十

一，礼亳州开元寺崇让律主为师范矣。诵《法华经》，二周毕部，由是勤于学问。殆登弱冠，受于戒律，持彼律仪，确乎转石。寻师西洛，问道梁园，初于智潜法师传《法华经》，讲精义入神，雌黄满口。梁开平二年戊辰岁，止相国寺药师院，首讲所业。至后唐长兴二年辛卯岁，门徒相续请其训导，已周一十九遍，升其堂者二十余人。洎天福二年，有五台山继颺大师精达《华严大经》，躬入东京，进晋祖降圣节功德。海仰颺师辩浪经江，下风附，乃允讲宣。海善下百川，蔚成藏海矣。梁宋之间以颺罢唱，请海敷扬，茆匝虚堂，缁素云萃，募四众镌石壁《华严经》一部于讲殿三面焉。嗟其油素，易罹炎上之灾；刻此贞珉，宁患白镕之食。工未告终，所施已足。又召僧俗人各念一卷，得二百四十人，成三部，四季建经会，近二十年，更无盼旷。复别施鬼神水陆法食，皆劝励庄严菩提心行矣。朝廷崇重，旌表其功，赐号真行大师。开运二年乙巳岁正月十六日示疾，策杖教诫门弟子讫，右胁而卧，口诵佛名，斯须长逝矣。享寿七十一，法腊五十一。门生奉遗旨葬于随河之北，寺庄东原也。

次有杭州龙华寺释彦求，姓叶氏，缙云人也。梁贞明中纳戒，造景霄律席，迴见毗尼秘，方将传讲，俄悟沓婆罗汉，反求坚固法。乃游闽岭，得长庆禅师心决。回浙，受丹丘人请，居六通院，其道望惟馨，与夫申椒菌桂争其芬烈矣。汉南国王钱氏钦其高行，命住功臣院。未归州治龙华寺，聚徒开演。求好营众事，务必身先，唯以利人为急，受施必归。常住房无关键，笥无扃锁，不容尼众礼谒，不苟声势。常属度戒，四远人聚，日供累千僧食，未尝告匮。言前后计饭巨万人焉。宋建隆中终于住寺云。

○晋曹州扈通院智朗传

释智朗，姓黄氏，单州城武人也。母刘氏梦数桑门圆坐为刘说法，历然在耳，遂妊娠焉。及生暨长，婉有僧之习气，淳靖简洁。苦辞亲出家，往曹州扈通院，事行满师，供给惟谨。洎乎剔染，成大比丘，学《四分律》、《净名经》，俱登阃阈。且曰“出俗之者何滞方守林，不能脱羈解绊乎？于广博知见无所堪能”。乃携瓶钵，南极衡阳，登岳栖般若寺，行胎息术，而览藏经事讫，入闽岭，曾无伴侣，形影相吊。逢猛兽者数四，皆欲呀口垂噬，又蹶步徐去矣。见洞山、雪峰二祖师决了禅训，有请问者，随答如飞，盖了达无羣矣。后旋本院，信向如归。而四事供僧，罔闻盼隙，四十余龄，役已无倦。以晋末丁未岁十一月二十三日迁灭。于时白衣饮痛，缁流茹伤，兽失猛以哀嗥，鸟停飞而宛转。或曰：“爱河苦海谁拯溺邪？”春秋七十七，法腊五十三。火葬，收舍利，起塔于院。朗为释子，衣物誓不经女人之手浣濯，不役徒弟。檀施之物像宝未省互用，盖以初律后禅，陶冶神用之故也。大名府少尹李铉为碑焉。

○汉东京天寿禅院师会传

释师会，俗姓巨，汉荆州刺史武之后，祖徙家北燕，遂为麟门人也。考讳知古，母赵氏。会童孩出俗，礼麟州温泉院道丕为师匠焉。业成，年满，受具于金台宝刹寺坛。梁开平中萍梗任飘于河朔，杯盂随步于江淮，乃抵汉南遇观音院岩俊，班荆话道，抵掌论心。且曰：“子还闻投子山有大同禅师已否？”曰：“闻而未见。”曰：“宜亟往焉。”及参大同，跬步之间，举扬之外，洗焉明白，其安坦然。乾化二年，来梁苑，谢俊公曰：“始者攸攸歧路，茫茫生死，紫实昧朱，狂斯滥哲。苟不奉师友指归，几一生空度。今以秽莠，请与薰同器而藏，可乎？”俊公与会肯德，留入法席。四年秋，有宝积坊罗汉院志修坚请会代居所住焉，苦盖五间而已。乃感檀越尚书左丞吴蔼、兵部侍郎张袞，若袁粲之谒宝亮，徐湛之礼惠通，共发奉章，赐额曰天寿焉。四海之僧，翕然而至。历三十五载，供僧二百余万，用其财宝，无少混淆，耿介可知也。天福七年，晋高祖以会行成于内，声闻于外，敕赐紫衣。开运元年，赐号曰法相。紫衣则藏以受持，师号则蔑其称谓。且曰：“我本不求名，名来自求我。知其白而守其黑，和其光而同其尘，世幻逡巡，时不我与。”三年七月二十六日累诸门人，帖然而灭，春秋六十七，夏腊四十八。阖维，收舍利数百粒，起塔于东郊汴阳乡也。刑部侍郎边归谠为《碑》颂德云。

○周宋州广寿院智江传

释智江，俗姓单，幽州三河南管人也。本富族游侠之子，虽乘竹马，？回火宅之门；乍玩沙堆，好作浮图之制。略闻竺干之教，必淡虑凝情，若潇湘之逢故人也。唐乾宁四载，始年十五，诣盘山感化寺遂成息慈，息慈业备。天复三祀，往五台山梨园寺纳木义法。目此担簦请业，择木依师，《净名》、《上生》二典精练，涣然冰释，心未属厌。梁龙德元年于商丘开元寺讲名数一支，所谓精义入神，散则繁衍，因著《瑞应钞》八卷，达者传之。生徒影附，缮写夥多。后唐同光元年，在微子之墟住院，缔构堂宇，轮奂可观。复塑慈氏、释迦二尊、十六罗汉像，咸加绩彩，克肖圣仪。善务方办，俄遘沉痾，以周显德五年孟秋顺终，享龄七十四。当属纆时，满院天人杂沓，若迎导之状，畴昔誓生睹史之昭应也。吏部员外郎李铉著塔铭云。

系曰：前人立义，皆按教文，岂得好恶随情，是非任见？已行前辙，不覆后车，胡不谨而循之？通曰：“夫创著述者有四焉：一前说极非，于文茫昧；一僻见谬解，领悟自乖；一乐繁嫌略；一好直怪迂。有一于此，无不著述也。江公《瑞应钞》未经披览，闻诸道路言亦济时须。苟不济用而变革古德义章，则何异以旧防无所用而坏之者，必有水败也。”

○周五台山真容院光屿传

释光屿，俗姓韩氏，应州金城邑人也。幼读儒书，有佐国牧民之志。频有神人梦中警策曰：“汝于佛法有大因缘。”遂投真容院附法威，侍其瓶锡，谨弟子之职。受

具后，诵《净名经》，彻简，每至依于义不依语。告喻本师而求听习，威寻许诺，遂诣太原三学院，涉乎寒燠，研？孜孜，屡改槐檀，乃讲《维摩》《上生》二座，忽谓同志曰：“余忆昔年每念依于义。迺栖学院，今讲二经，穷理见性，知果验因，得不依教起行，免背四依之行乎？”俄辞晋水，却返故山，戴《华严经》，绕菩萨殿，六时右旋礼佛。时晋高祖握图之三载也。名闻丹禁，遂赐紫衣。明年，授号通悟焉。山门僧官与大众坚命临坛，告辞不允。僧官谓曰：“师行解兼人，独善其已，良璞不剖，必见泣血。”辞不获已，度人三二载，坚求脱免。属少王嗣位，院乏主守，大众僉举：非屿而谁？辞曰：“此山四海客游之所，奈何不出院门有年岁矣，令知供养，有何所须？”虽免不从。自后供施委输。十八年中，供百万余僧。一夕云雾俱发，霰雪交零，屿之盖经白练一条可三四尺，忽尔不见。翌日深更，遗练俄还旧所也，盖阴神之送至欤？显德七年庚申岁十月示疾，谓诸子曰：“犹龙者厌乎大患，叹凤者悲于逝川，诸行无常，是生灭法。”言讫如蝉蜕焉。俗寿六十六，僧腊四十六。茶毗于东峰下，收诸灵骨，瘞于塔幢，舍利随缘供养焉。

○大宋东京观音禅院岩俊传

释岩俊，姓廉氏，邢台人也。诞育之来，蔚繁神异，挺身去缚，誓入空门。从捧戒珠，终身圆莹。乃持杯锡，言遍参寻，陟彼衡庐，登乎岷蜀。尝至凤林，錫逢深谷，见一区之晃耀，原七宝之纵横。时同侣相顾曰：“奇哉！可俯拾乎？”俊曰：“古人锄园触黄金，若瓦砾耳。苟欲怀之，自速祸也。傒吾野营覆顶，须此供四方僧。”言讫舍去，造谒舒州投子山主，问之曰：“客来昨宿何处？”俊曰：“在不动道常”曰：“既言不动，曷由至此？”对曰：“至此岂是动邪？”曰：“元来宿不著处。”然山主默认许之。迨思还赵，路出陈留，抵今东京。属乎梁少保陇西公资，即河阳节度使赠中书令芝之昆也，虽居贵仕，酷信空门，接俊谈玄，若刘遗民之奉贾远也。相与议舍第宅俾建仁祠。俊弗让违，以安形性。既考禅室而行祖风，慕道穷玄，堂宇盈塞。周高祖世宗二帝潜隐地，与俊布衣之交，每登方丈，必施跪礼。及其即位，延迟优渥，至乎朝达，见必稽顙，高谈虚论，若至宝山焉。以乾德丙寅三月示身有疾，弥留，弟子求医奉药，瞋目噤唇不食，垂诫门人后已，当怡颜俨肃，合掌诀众而灭。享龄八十五，坐夏六十五。初俊被朝恩，赐紫袈裟也，受而不服；锡净戒师号也，有而不称。属其策杖清羸，周祖敕侍者辈勿令大师一中食，俾其日吴更进？阍尼矣。俊诺而难遵。慈柔被物，暨乎自狭而广，实三院一门也。二堂东西，恒不减数百众。五十年盼，计供僧万百千数。京城禅林，居其甲矣。以其年四月八日归葬于东郊丰台村，白塔存焉。于日神都寺院各率幡幢，吹贝鸣铙，相继二三里。道俗送殡者万数。知制诰王著为碑昭懋厥德云。

○大宋西京宝坛院从彦传

释从彦，姓米氏，燕人也。始自识环，寻知跪橘，颀昂挺质，豁达为性。禁。年距十五，父母听许出家于并部慧觉禅院也。受戒后，经江鼓鼙，论海化鲲，流辈畏之，

咸知宗奉。乃怀心于祖教，望攻王于他山。由是北别冰天，南观桂海，不虞恶瘴，唯慕丛林，欣遇龙牙山禅师为决所疑，蔚成达者。后唐清泰丙申岁还游嵩少，洛中始安，人情辑睦，彦营构禅坊，延聚缁侣而供养之。历晋、汉、周三朝，皆加恩命，乃曰：“宠辱若惊，吾无惊久矣。然俗谛门中，感世主以绋绣缘饰朽木者哉。”以开宝二年八月三日示疾而终。四年辛未，改权从久，瘞于层塔焉。

○大宋东京普净院常觉传

释常觉，姓李氏、陈留人也。肇为鞠子，气调绝奇，入乡校中讽读经籍，群童咸出其下。洎登弱冠，往庐山游二林，陟五老，乃礼归宗寺禅师，充苦行焉。梁乾化二年，蒙去饰披缁矣。明年，于东林甘露戒坛纳解脱木义。厥后修身践言，虽三藏俱留于意表，而以心学为究尽之务。复入五台山，礼妙吉灵迹。迨后唐天成三载，始于东京丽景门之右树小禅坊，敕额为普净焉。而逐月三八日设闍京僧裕其或香汤汲注，樵蒸失供，觉必令撤小屋，抽榱桷而助爨焉。有公王仰重，表荐紫衣，坚拒弗受，汲汲以利行济物为己任耳。开宝四年十二月三日遘疾，轻安无挠。十一日告众，右肋而化。享年七十六，僧腊五十六。荼毗收舍利，五色磊落无算。尝居京邑，屡登斯院，览北海陶尚书偈为湘东张仲荀《序诗赠觉》而云：“起后唐天成至汉乾祐，每黑白月三取八日，浴京大众，累岁费钱可一百三十六万，数计缗千万矣。虽檀施共成，实觉公化导之力也。嘻！大火之下，陈留古封，周秦已来，战伐之国，人物众而土风尚利，舟车会而货殖惟错。昔梁惠王贤诸侯也，尝谓孟轲曰：‘何以利吾国？’是知礼让之化，不胜于好利之心，明矣。且梁去鲁千里而近，道犹不同，矧十万八千里乎？梁王、孟子，同世之人也，心或有异，况瞿昙上人乎？彼孟氏属斯文未丧，不能扬素王之道，今上人当去圣逾远，卒能行法王之教，苟非三业内净，六尘外清，以至公之行化于人，孰以至公之心受于化也！”陶重叙曰：“自灵山覆篲，法海烟流，玉毫晦而微言绝，金杖折而异端作。惟上人也色空等观，物我都亡。麻麦一斋，自同禅悦；炎凉一纳，仅蔽枯形。前后王臣欲上章乞以大师为号，请以紫染方袍者，皆确而拒之。”云云。张仲荀赠觉钵盂拄杖草屨，各用五言为章，刊于小碣。其为名流硕学旌别有如此者。

○大宋杭州报恩寺永安传

释永安，姓翁氏，温州永嘉人也。少岁淳厚，黄中通理。遇同郡征大师凤鸣越峤，玉莹蓝田，获落文心，沉潜学奥，以其出乐安孙孺拾遗之门也，而有慕上之心，往拜而乞度。然征性高岸而寡合，而安事之也曲从若环，盖哀其幼知择师耳。天成中，随侍出杭，俄有从十二头？之意，潜逃欲登闽岭，参问禅宗。属封强荆棘，却回结庵于天台。后遇韶禅师法集，顿遣群疑，重来礼征。咄之曰：“弃背孝养，尔自速辜，遗行于斯，还有裨补前咎计否？”安跪对曰：“从来无事，请用塞责。”征肯颌之。汉南国王钱氏召居报恩寺，署号禅师焉。乃以《华严》李《论》为会要，因将合经，募人雕板，印而施行。每有檀施，罕闻储畜，回舍二田矣。以开宝甲戌

岁终而焚之，其舌存焉。累投火锻，色虽同乎炽炭，寒则柔弱，今藏普贤道场中。春秋六十四，法腊四十四云。

○大宋钱塘永明寺延寿传

释延寿，姓王，本钱塘人也。两浙有国时为吏，督纳军须，其性纯直，口无二言，诵彻《法华经》，声不辍响。属翠岩参公盛化，寿舍妻孥，削染登戒。尝于台岭天柱峰九旬习定，有鸟类尺晏鸟，巢栖于衣榻中。乃得韶禅师决择所见，迁遁于雪窦山，除海人外，瀑布前坐讽禅嘿。衣无缁纁，布襦卒岁。食无重味，野蔬断中。汉南国王钱氏最所钦尚，请寿行方等忏，赎物类放生。泛爱慈柔，或非理相干，颜貌不动。诵《法华》计一万三千许部。多励信人营造塔像。自无贮畜，雅好诗道，著《万善同归》、《宗鉴》等录数千万言。高丽国王览其《录》，遣使遗金线织成袈裟、紫水精数珠、金澡罐等。以开宝八年乙亥终于住寺，春秋七十二，法腊三十七。葬于大慈山，树亭志焉。

○大宋西京天宫寺义庄传

释义庄，姓张氏，滑台人也。当免怀之日，及就传之秋，神彩克明，尘机顿去。乃于本府开元寺归善财之列，从升戒德。因乐游方，始于洛邑采听《法华》，见识过人，阐扬训物，众请居九曜院焉。匪亏法食，用济往来。慈以利生，始末无间。建隆初左散骑常侍申公奏赐紫衣，禀学僧尼三十余员。庄性敦勤，进讲外兢兢五十年间，二时礼忏，至老不替。于太平兴国戊寅年八月奄终，俗寿七十八，僧腊五十九。明年二月，迁塔于龙门菩提寺西焉。

○大宋西京广爱寺普胜传

释普胜，姓张氏，深州陆泽人也。幼岁情爱褊薄，俄决志趋五台山华严寺，师事超化大师。或问之曰：“子胡以越山逾域而求出家？彼饶阳者，岂无仁祠哲匠乎？”胜对曰：“附神骥可以日千里矣。某知妙吉净刹感征胶戾，令我小凡速成果证，可不是乎？”众聆斯说，曰：“任气小儿，有此高识，我曹俱弗如也。”胜曰：“某非衽金革死而不厌之徒也，愿入慈门而思利物耳。”迨乎受具，南临潞府讲通《上生经》矣。闻崇法大师传《唯识论》，盛化洛都，往从学焉。凡百章疏，经目便识之。不几稔间，习通精贍。胜所传者《中山贞辩钞》，讲多误失所然，昌言曰：“繁略不均，解判非当。”乃删多补少为四卷，行于世。太祖神德皇帝赐紫衣师，号曰宣教也。以太平兴国四年秋七月四日示疾，终于净土院，享寿六十三，坐四十三夏。门人等收舍利葬于龙门山宝应寺西阜，建塔旌表之。

○大宋东京开宝寺师律传

释师律，范阳人也，姓贾氏，大丞相魏国公耽之后，《唐书》有传。律弱龀端谨，不与群童斗伎。裁十五岁，于悯中寺落发，礼贞涉为师。严肃垂勖，所履不出边幅之外。涉默异之曰：“不可屈身下位而抑其名节乎？成比丘已，可去游方。”律奉训南逝，得其禅要。回锡故乡。时梁世迨大周朝，其间帝王重臣，率皆宗仰。居于夷门山，旧封禅也，营构乎殿宇圣仪，丰厨秘藏，供僧饶美。约勒后生，别院翕如，罔违彝宪。朝廷以紫衣徽号，用旌厥德，律视之蔑如也。一日谓弟子庶几曰：“吾无愿不报，厥龄欲颓，汝宜知之。勿俗情而悲悼也。”乾德二祀正月二十三日而终，春秋八十一，法腊六十二。太平兴国五年三月，改葬于北部浚仪之原，进士贾守廉为塔铭焉。

论曰：佛出于世，经译于时，大要在乎果因，所推归乎罪福。罪也者，下三涂之阶陞也。福也者，上诸圣之阶陞也。阶陞是同，上下有异耳。此命章曰兴福者，乃欲利他焉。如秤低昂，如室明暗，则知二事必不同时。又类薰蕕不同器而藏，尧桀不同国而治也。凡夫气分，唯说罪多。圣者品流，但闻福厚。顺性故易造，逆意故难修。修有多门，行有众路。大约望檀波罗蜜多令度无极也。始则人天福行，施食与浆，桥梁义井。次则轮王行中下品善。上品十善者，则梵天福行也。一造偷婆，二补修故寺，三请佛转法轮。次则二乘净福行，同三品善，止自利功强耳。次究尽位福行，乃成二严庄严相好。从三轮无碍，见万法体空，获利殊多，尽未来际。夫如是福之广矣大矣，乃知圣者为福则易尔。何耶？纯净之故也。凡夫则反是，易薰染之故也。是以佛亦为穿针之福，知福不宜厌焉。目连然燎，迦叶蹋泥，无尽意贡瓔珞宝珠，沓婆罗分僧卧具。伊皆大人有作，圣者权方，欲其因罪不厌除，福不厌齟齬以教传岭外，法布中原，年所弥深，行持渐薄，内众修福，就彼持门，先哲息愆，行其忏法矣。夫修理忏也，淡虑观心，心无所生，生无所祝当尔之时，顺违无相，则罪灭福生之地也。若行事忏也，心凭胜境，境引心增，念念相资，绵绵不断，礼则五轮投地，悔则七聚首心，或期瑞而证知，乃见罪灭之相也。昔者齐太宰作净住法，梁武帝忏六根门，澄照略成《住法图》，真观广作《慈悲忏》。至乎会昌年内，玄畅大师请修加一万五千《佛名经》，是以两京礼经，则口唱低头，旋磬一声，谓之小礼。自淮以南，民间唯礼《梁武忏》，以为佛事。或数僧呗，歌赞相高，谓之禳忏法也。其有江表行水忏法者，悔其滥费过度之愆，此人伪造，非真法也。又有剽古人逐字礼《华严》、《法华经》，以为礼无漏法藏也。由此有四众之徒，于字上安南无，字下安佛，诚叨滥也。有倡言曰：“但务生善，唯期灭罪，何判为非邪？”通曰：“翻译之后，传行已来，若天上之恒星，如人形之定相。或别占一座，便曰客星。或新起肉隆，乃为胼赘者耳。君不见《春秋》夏五邪，郑杜诸家岂不能添月字乎？盖畏圣人之言，成不刊之典，不敢加字矣。夫子曰：‘吾犹及史之阙文。’将知佛教还可加减否？如慧严重译《泥丸经》，加之品目，忽梦神人怒责，声色颇厉曰：‘《涅槃尊经》，何敢辄尔轻加斟酌！是知兴福不如避罪，斯言允矣。今则不勤课励，靡事增修，因搜颖脱之数员，贵显孟安之三宝，就今有作，何代无人？或京兆开乎海池，或终南建乎兰若，铸大悲之铜像，造相国之伽蓝。或代病利人，或护生掘土，铸钟感瑞，立刹参云，刻像繁多，修台浩博，披榛平田之梵

宇，脱样阿育之浮图，刊石为经，鸠财立藏。或治病于井络，或化人于廊羸。如斯人也，入殊邦之乡导，合二姓之良媒。日月伏根，照洞庭之幽暗；乾坤玄凿，开混沌之窍端。所行博哉，续运长矣！公羊子有之曰：‘是上之行乎下也。’《诗》云：‘尔之教矣，民胥效矣。’愿吾徒望上而学之。”

卷二十九

◎杂科声德篇第十之一（正传二十六人附见六人）○南宋钱塘灵隐寺智一传

释智一者，不详何许人也。居灵隐寺之半峰，精守戒范，而善长啸。啸终，乃牵曳其声，杳入云际，如吹箳叶，若揭游丝，徐举徐扬，载哀载咽，飏飏凄切，听者悲凉，谓之哀松之梵。颇生物善，或在像前赞咏流靡。于灵山洞边，养一白猿，有时蓦山逾涧，久而不还。一乃吮吻张喉作梵呼之，则猿至矣。时人谓之白猿梵召。一公为猿父，犹狙公也。其后涧边群狙聚焉。每至众僧斋讫，敛生饭送猿台所，后令山童呼三二声，则群猿竞至。洎乎唐武宗废教，伊寺毁除焉，鞠为茂草之墟，饭猿于台事皆堙灭。一师不详所终。

○元魏洛阳慧凝传

释慧凝，未知何许人也，栖止洛邑而无异艺，正修练心戒耳。尝得疾暴终，七日而苏，起说冥间报应及见区分，更无毫发之差。所睹者五沙门，一是宝明寺智圣，以坐禅苦行得升天堂。次一是般若寺道品，以诵《涅槃经》四十卷，同前智圣。次是融觉寺昙谟最称讲《涅槃》、《华严经》，领徒千数。琰摩王曰：“讲经者心怀彼我，以骄耽物，比丘中第一粗行。今唯试坐禅诵经。”最曰：“贫道立身已来，唯好讲导，不能禅诵。”王曰：“付司。”即有青衣数辈，拥送最向西北门，屋舍皆黑，似非好处。次是禅林寺道恒，唱云：“教导劝诱四辈檀越，造一切经、人中像十躯。”王曰：“沙门之体必须摄心守道，志在禅诵，不干世事，不务喧繁。虽造经像，止欲得他财物。既得财物，贪心即起。既长贪行，三毒炽然，具足烦恼。”与最同入黑门。第五是灵觉寺宝明，自称未出家时，尝作陇西太守，造灵觉寺。即弃官入道，虽不禅诵，礼拜不阙。王曰：“卿作刺史之日，曲理枉法，劫夺民财，假作此寺。非卿之力，何劳说此？”亦付青衣送入黑门矣。凝由此省悟，最先见王，属吏检寻名籍误追摄耳。时胡太后闻之，遣黄门侍郎徐纥依凝之说，散访验寺额并僧名有无，奏报云：“城东有宝明寺，城内有般若寺，城西有融觉、禅林、灵觉三寺，并智圣、道品、昙谟最、道弘、宝明等，皆实有之。”太后称叹久之，诏请坐禅诵经者一百僧，常在内殿供养焉。续有诏不听比丘持经像在街路乞索。如私有财物造经像者任意。凝入白鹿山隐居修道，自此京邑城下比丘多修禅观，诵持大部经法焉。

系曰：昙谟最坐讲法而人我，因入黑门中。若禅诵者，人我随增，知亦不免。最与道士姜斌争论，护法之功可补前过。无谓传法之人皆堕负处。胡后偏见不亡，吁哉！

○唐成都府法聚寺员相传

释员相，蜀人也。七岁出家，博综内外，善属文，时号奇童。内修律范，人无间然。龙朔元年，有疾而终于此寺。将启手足，房内长虹若练而飞上天，寺塔铃索无风自鸣。其大门屋壁画剥落，每夜有鼓角声，经百余日方息。从此鸟雀不栖其屋。咸亨四年，甘露降于讲堂前棕榈树焉。相终，弟子收文集三十余卷。寺中石像碑，相作辞，龚灵旷同撰，是欤。

○唐越州妙喜寺僧达传

释僧达，姓王氏，会稽人也。稚齿英奇，不参戏弄，于龟山妙喜道场出俗。其寺南梁初建。后乐游方，见黄梅忍禅师，若枯苗得雨，随顺修禅，罔有休懈。遇印宗禅师，重磨心鉴。光州见道岸律师，更励律仪。四众依归，如水宗海。开元七年示疾而终，春秋八十二云。

○唐京兆神鼎传

释神鼎者，不详何许人也。狂狷而纯直，发垂眉际。每持一斗巡长安市中乞丐。得食，就而食之。人或施粗帛巾布，锦绮罗縠，并缀联衣上而著，且无选择。尝入寺中，见利贞法师讲于座前，倾听少时，而问贞曰：“万物定已否？”贞曰：“定。”鼎曰：“阇梨若言定，何因高岸为谷，深谷为陵，有死即生，有生即死？万物相纠，六道轮回，何得定邪？”贞曰：“万物不定。”鼎曰：“若不定，何不指天为地，呼地为天，召星为月，命月为星？何得不定邪？”贞无以应之。时众惊其辩发如流。贞公奥学，被挫其锋，颇形惭色。张文成见之，叹嗟谓之曰：“观法师迅辩，即是菩萨行位人也。”鼎曰：“菩萨得之不喜，失之不怨，撻之不怒，辱之不嗔。鼎今乞得即喜，不得即怨，撻之即怒，辱之即嗔，由此观之，去菩萨远矣。”时众错愕，合掌而散焉。

系曰：答人之问，迟巧不如拙速。今传家隔几百年，辄伸酬对。通曰：“谷变陵迁，生来死往，万类相纠，五道轮回，正是不迁之法，可非定耶？经云世间相常住是也。又言天地星月，各据其伦，终归磨灭。可非不定耶？经云劫火洞然，大千俱坏是也。今不坏世间相而谈实相，可非定不定耶？虽定不定，俱解脱相欤？又言有喜怒非菩萨者，菩萨虽喜怒非喜怒，非菩萨而谁也？今聊雪利贞之郁悒欤？”

○唐京兆泓师传

释泓师者，齐安人也。神龙中来游京辇，简傲自持，而罕言语。语则瑰怪，颇善地理之学，占择莹兆，郭景淳、一行之亚焉。而出入于郾公韦安石之门。与韦既密，一日谓之曰：“贫道于凤栖原见一段地，约二十亩，有龙起伏之形势，有藏此者必累世居台鼎。”韦曰：“老夫有别墅在城南，候闲隙陪国师访地，问其价几何。同游林泉，又资高兴。”异日，韦寻前约，方命驾次，韦公夫人曰：“令公为天子大

臣，国师通阴阳术数，奈何潜游郭外而营生藏？非所宜也。”遂止。韦曰：“舍弟滔有中殇男未葬，便示此地。”泓曰：“如贤弟得此地，不得他将相，止列卿而已。”滔买葬中殇，后为太常卿礼仪使而卒。泓每行视山原，即为图状，尝自洛东言于张说曰：“缺门道左有好山冈，丞相可用之。”说曰：“已位极人臣，吉孰过此？”泓曰：“无人胜此。”遂咨源监察乾曜，曰：“先人有遗旨矣。”后曜请假东洛迁奉而回，已经年矣。泓再经缺门，其地已成莹兆，问居人，曰：“源氏之松柏也。”泓曰：“冥数合归源氏，坐可待其变化。”不数年，曜果登庸焉。泓曾诫燕公曰：“宅勿于西北隅取土。”后成坑，三二处为穴，泓惊谓燕公曰：“祸事！令公富贵一身耳。更二十年，祸及贤郎耳。”及均、昶受禄山伪官，肃宗复京，以减死论，太上皇苦执令处斩。皆符泓言。然中、睿朝皆崇重泓，号国师。占相之言，未尝差谬。

○唐洛阳罔极寺慧日传（真法师）

释慧日，俗姓辛氏，东莱人也。中宗朝得度，及登具足，后遇义净三藏，造一乘之极，躬诣竺乾，心恒羡慕。日遂誓游西域。始者泛舶渡海，自经三载，东南海中诸国，昆仑、佛誓、师子洲等，经过略遍，乃达天竺，礼谒圣迹。寻求梵本，访善知识，一十三年。咨禀法训，思欲利人，振锡还乡，独影孤征。雪岭胡乡，又涉四载。既经多苦，深厌阎浮，何国何方，有乐无苦？何法何行，能速见佛？遍问天竺三藏学者，所说皆赞净土，复合金口；其于速疾，是一生路；尽此报身，必得往生极乐世界，亲得奉事阿弥陀佛。闻已顶受，渐至北印度健驮罗国。王城东北有一大山，山有观音像，有志诚祈请，多得现身。日遂七日叩头，又断食，毕命为期，至七日夜且未央，观音空中现紫金色相，长一丈余，坐宝莲华，垂右手，摩日顶曰：“汝欲传法，自利利他，西方净土极乐世界弥陀佛国，劝令念佛诵经，回愿往生，到彼国已，见佛及我得大利益。汝自当知净土法门，胜过诸行。”说已忽灭。日断食既困，闻此强壮。及登岭东归，计行七十余国，总一十八年，开元七年方达长安。进帝佛真容、梵夹等，开悟帝心，赐号曰慈鴈三藏。生常勤修净土之业，著《往生净土集》，行于世。其道与善导、少康异时同化也。又以僧徒多迷五辛中“兴渠”。“兴渠”人多说不同，或云芸苔胡葵，或云阿魏，唯《净土集》中别行书出云：“五辛，此土唯有四，一蒜，二蓴，三葱，四薤，阙于兴渠。”梵语稍讹，正云形具，余国不见。回至于阆，方得见也。根粗如细蔓，菁根而白，其臭如蒜，彼国人种取根食也。于时冬天到彼，不见枝叶。苔葵非五辛，所食无罪。”日亲见为验欤？以天宝七年卒于住寺，报龄六十九。葬于白鹿原，成小塔焉。余姚休光寺释真法师，金华人也，俗姓王氏。真？11辞家，童蒙悟道，发大精进，坚持戒地。一门之中，数人缁服，真学习师古，义成先圣，八部经理，宛在掌中，三乘法源，尽于度内。天宝六年，太守秦公、长史狄公知其行高，遂以名荐，主休光寺焉。二公常相谓曰：“真公通深妙法，玄无上义，问一得三。言发响应。昔利涉辩博，僧会智周，与之齐驱，未可同日。”以其八年终于寺，本县令王？述德刊铭，洪元？书焉。

○唐越州大禹寺神迴传

释神迴，未详何许人也。幼入法流，齐庄自任节高行峭，不恶而严。晚年慕称心寺大义律师，同习三观于天台宗，得旨于左溪禅师，即宝应年中也。加以辞笔宏赡，华藻纷纭，为《朗师真影赞》、《法华经文句序》，冠绝于时，为世所贵。不详厥终焉。

○唐京兆镇国寺纯陀传

释纯陀者，本西域人也，梵名无由翻就华言也。从游京邑，人所钦重。上元中便云东渡，人见之，颜容若童稚之色，言已年六百岁矣。或谓为八十岁人也。言谈气壮，举动不衰。代宗皇帝闻之，诏入，礼遇极丰，俾求留年之道。陀曰：“心神好静，今为尘境汨之，何从冥寂乎？若离简静外，欲望留年，如登木朵芙蕖，其可得乎？陛下欲长年，由简洁安神。神安则寿永，寡欲则身安。术斯已往，贫道所不知也。”帝由是笃重之，以永泰三年预知必逝，遣弟子赍衣钵进上，帝赐弟子紫衣。陀终于镇国寺焉。

○唐天台山国清寺道邃传

释道邃，不知何许人也。幽识远晤，执志有恒，悬解真宗，不由邪术。未传隋智者教道，素得玄微，荆溪之门，杳难窥望。大历中湛然师委付《止观辅行记》，得以敷扬，若神骥之可以致远也。于时同门元浩迥知畏服，不能争长矣。贞元二十一年，日本国沙门最澄者，亦东夷卉服中刚决明敏僧也。泛溟渤，达江东，慕天台之法，求綽师之禅决。属邃讲训，委曲指教，澄得旨矣。乃尽缮写一行教法东归。虑其或问从何而闻，得谁所印？俾防疑误，乃造邦伯作援证焉。时台州刺史陆淳判云：“最澄闍梨，形虽异域，性实同源，特稟生知，触类玄解。远传天台教旨，又遇龙象邃公，总万行于一心，了殊涂于三观，亲承秘密，理绝名言。犹虑他方学徒未能信受，所请印记，安可不任为凭云。”澄泛海到国，赍教法指一山为天台，号一寺为国清，风行电照，斯教大行。倭僧遥尊邃为祖师。后终于住寺焉。

○唐怀安郡西隐山进平传

释进平，姓吴氏，京兆人也。早出家于永安山明福院，风表端雅。诸经大论，皆所研寻。销文炼注，令人乐闻。末思禅观，于洛下遇荷泽会师了悟，且曰：“甚矣，不自外知者，所知难乎哉！”后至唐州遂居西隐山。刺史郑文简请入城，阐扬宗旨。示灭年八十一，大历十四年三月入塔。

○唐宁州南山二圣院道隐传

释道隐，姓王氏，彭原人也。风宇高峙，情性宏淡。少脱尘劳，誓从冲漠。既循师范，因愿游方，得荷泽师顿明心要。迨旋乡上，道声洋洋，慕其法者，若登华阴之市也。匪召员臻，檀施丰？，郁成精舍焉。以大历十三年三月晦嘱累四部，从于中夜趺坐而终，春秋七十二，法腊三十五。弟子辩真建塔藏焉。今师资二座全身不朽矣。议者以为得道真正，其器亦然，譬犹炼册之鼎，药成鼎亦化金矣。在《华严》有诸菩萨成就如虚空忍，得无来身，以无去故。得不生身，以不灭故。得不聚身，以无散坏故。其隐师之谓欤！

○唐温州陶山道晤传

释道晤者，不知何许人也。高趣放荡，识量难赅。末住永嘉陶山侧精舍，则隐居修《真诰》之所也。大历中，代宗为陶真君树此精舍，晤于此进修靡怠，人亦倾仰。一夕加趺而卒，身肉无沮，如入三昧，议不焚葬。后五年，忽举右手，状若传香。州官民庶异之，以事奏，敕赐紫袈裟，谥曰实相大师。至今塔中，州民祈祷，幡花填委焉。

系曰：凡诸入灭举其指者，盖示其得四沙门果之数也。昔求那跋摩举三指而灭，言已证二果欤？其次法京垂灭，屈三指。慧景反握二指，捋之还屈。今晤之伸指，岂不同诸？

○唐京兆欢喜传（无侧）

释欢喜，不知何许人也。性无羁束，慈忍宽和，人未尝见其愠色，故号之焉。观国之光，至于京辇，贵达下民延之，少见违拒。言语不常，事迹难测。德宗皇帝闻而重之。兴元十二年敕永泰寺置戒坛度僧，时喜与保唐禅宗，别敕令受戒，缁伍荣之。至其年六月十九日，卒于本寺焉。有会稽云门寺释无侧者，外国人，未知葱岭南北生也。若胡若梵，乌可分诸？建中中越磧东游，得意则止，度其冬夏。后栖越溪云门寺修道。然善体人意，号利智梵僧焉。相传则是康宝月道人后身也，必尝以事征验而知。与名德相遇，谈话终夕。吴兴皎然题侧房壁云：“越山千万云门绝，西僧貌古还名月。清朝扫石行道归，林下眠禅看松雪。”其高邈之状在昼辞焉。

○唐湖州杼山皎然传（福琳）

释皎然，字昼姓谢氏，长城人，康乐侯十世孙也。幼负异才，性与道合，初脱羁绊，渐加削染。登戒于灵隐戒坛守直律师边，听毗尼道，特所留心。于篇什中，吟咏情性，所谓造其微矣。文章隽丽，当时号为释门伟器哉。后博访名山，法席罕不登听者。然其兼攻并进，子史经书，各臻其极。凡所游历，京师则公相敦重，诸郡则邦伯所钦，莫非始以诗句牵劝，令入佛智，行化之意，本在乎兹。及中年，谒诸禅祖，了心地法门，与武丘山元浩、会稽灵澈为道交，故时谚曰：“较之昼，能清秀

。”贞元初，居于东溪草堂，欲屏息诗道，非禅者之意，而自诲之曰：“借使有宣尼之博识，胥臣之多闻，终朝目前矜道侈义，适足以扰我真性。岂若孤松片云，禅座相对，无言而道合，至静而性同哉？吾将入杼峰，与松云为偶。”所著《诗式》及诸文笔，并寝而不纪。因顾笔砚曰：“我疲尔役，尔困我愚，数十年间了无所得。况汝是外物，何累于人哉？住既无心，去亦无我，将放汝各归本性，使物自物，不关于予，岂不乐乎？”遂命弟子黜焉。至五年五月，会前御史中丞李洪自河北负谴，再移为湖守，初相见未交一言，恍若神合。素知公精于佛理，因请益焉。先问宗源，次及心印，公笑而后答。他日言及《诗式》，具陈以宿昔之志。公曰：“不然。”固命门人检出草本，一览而叹曰：“早年曾见沈约《品藻》、慧休《翰林》、庾信《诗箴》，三子所论殊不及此，奈何学小乘褊见，以宿志为辞邪？”遂举邑中辞人吴季德，梁常侍均之后，其文有家风，予器而重之。昼以陆鸿渐为莫逆之交，相国于公谏、颜鲁公真卿命裨赞《韵海》二十余卷。好为《五杂俎篇》，用意奇险，实不忝江南谢之远裔矣。昼清静其志，高迈其心，浮名薄利，所不能啖。唯事林峦，与道者游，故终身无堕色。又兴冥斋，盖循绕面然，故事施鬼神食也。昼旧居州兴国寺，起意自捐衣囊施之。尝有军吏沈钊，本德清人也，夕从州出，乘马到骆驼桥，月色皎如。见数人盛饰衣冠，钊怪问之，“如何到此”？曰：“项王祠东兴国寺然公修冥斋，在兹伺耳。”钊翌日往覆，果是鬼物矣。又长城赴胥钱沛行役，泊舟吕山南，见数十百人，得非提食器负束帛，怡然语笑而过。问其故，云：“赴然师斋来。”时颜鲁公为刺郡，早事交游而加崇重焉。以贞元年终山寺。有集十卷，于谏序集。贞元八年正月敕写其文集入于秘阁，天下荣之。观其文也，？？而不厌，合律乎清壮，亦一代伟才焉。昼生常与韦应物、卢幼平、吴季德、李萼、皇甫曾、梁肃、崔子向、薛逢、吕渭、杨逵，或簪组，或布衣，与之交结，必高吟乐道。道其同者，则然始定交哉。故著《儒释交游传》及《内典类聚》共四十卷、《号呶子》十卷，时贵流布。元和四年，太守范传正、会稽释灵澈同过旧院，就影堂伤悼弥久，遗题曰：“道安已返无何乡，慧远来过旧草堂。余亦当时及门者，共吟佳句一焚香。”其遗德，后贤所慕者相继有焉。又唐黄州大石山释福琳，姓元氏，荆州人也。父为襄阳判司，素崇释氏。琳幼好佛门，恒循检操，早知割爱，就玄静寺谦著师下剃染。登满足法已，躬礼荷泽祖师，乃契真心。后至黄陂，剪茅营舍，终成大院，安集四方禅侣。琳终时年八十二，兴元二年四月入塔。

○唐安陆定安山怀空传

释怀空，俗姓商氏，河阳人也。膏粱之子，幼且矜庄。乃辞所亲，就本州大都山广福院出家。大明禅师默识空之器局不常，教诵群经。纳法之后，观方京都。属北秀禅师阐化，造而决疑。后往安陆定安山，倏遇一叟，劝空镇压此川，我沾大利。乃结茅而止，前叟即土地神耳。寻因村民逐虎入山，见空欢喜而白之曰：“此中多虎暴，村落不安，愿和尚示以息灾之法。”空曰：“虎亦众生也，若屠杀于彼，彼必来报。迭相偿报，何时断期乎？老僧为诸君计者，善可禳去。”乡人曰：“愚下无知，唯教所在。”空曰：“汝归舍，同心陈置道场，施设大会。”空预法筵。至日

之夕矣，有一虎于庵前瞑目伏地。空曰：“咄哉恶类，一报未灭，更增宿殃，噬人伦也。天不见诛，死当堕狱。吾悯汝哉！虎被责已，忽迟回而逝。明日斋散上山，其虎在庵前，领其七子，将斋余掷之，各食讫。为其忏悔，七虎相次俱亡。百姓胥悦，且曰：“从师居此，俗无疵疠，仍季谷熟。”致拜而退。时张辽大夫为州牧，遣府吏慕容兴往请入州，空谢病不起。部领工匠，为建禅宫。毕，示疾而终，享年八十三。贞元三年三月十六日火葬，收舍利入塔焉。

○唐澧州慧演传

释慧演，姓苗氏，襄阳人也。父为东平纠曹。演幼入开元寺，闻经欢喜，求于辩章法师所度脱。章日讲《涅槃经》，演常随听入神。既通深义，复能讲谈。一日结侣同游华下，思登毛女峰，观仙掌，路出洛中，乃参荷泽祖师，通达大观。因入南岳，遂住澧阳，江南得道者多矣。贞元十二年终，享龄七十九云。

○唐荆州国昌寺行觉传（皓玉）

释行觉，姓刘氏，巨鹿人也。稚岁英敏，立不易方，负志出家，亲难沮劝。早投本部永泰伽蓝，受业纳戒。后于洛都遇会禅师开悟玄理，秉心矫迹。游方见江陵古寺，殿宇摧堕，阒而无人。觉卸囊挂锡。明日，见樵夫惊怪，言“此是国昌寺，废已三周”。将知人事相因，道从缘会，学者至矣，乡人来矣，郁成一寺。时节使崔尚书请召入城，谢而不赴。檀施继臻，乃兴盛化。贞元十五年告终，年九十二。荆楚之人营塔焉。又南岳山释皓玉者，赵氏之子，上党人也。出尘于法清寺，后于荷泽会下，大明心印，入岳中兰若养道。衡阳太守王展员外倾重。终时年八十有余，兴元中入塔云。

○唐鄂州开元寺玄晏传

释玄晏，江夏人也，姓李氏。祖善而博识多学，注《文选》，行讲集于梁宋之间。考邕，北海太守，《唐书》有传。晏稚昧之龄，决志离俗，至德初年，诵经高第，依僧崇真剃落，配住开元寺。大历三年，从大阇梨真悟受具足法，便寻律范，目不视靡曼，足不履邪径，于四仪中，无终食之间违教。仪形峭拔，眉目秀朗，如孤鸿野鹤，独立迥泽，望风瞻想，自有远致。性多分剂，苟与恶比丘共住，遑遑然如以？罗炭浴身也。不出户牖，焚香扫地，端坐终日。人不堪其忧，而晏居之，以为三禅之乐不敌也。晏少习毗尼，长学《金刚》，解空破相，臻极玄奥。而闻《律藏》有一时外学之说，或赋诗一章，运思标拔，孤游境外。彭城刘长卿名重五言，大嗟赏之。由是风云草木，每有赋咏，辄为工文者之所吟讽也。晏房舍在寺之北隅，颇为湫陋，凡当时名士共营草堂，有若陈郡袁滋、赵郡李则、卢来卿、于文炫、祭直偕檀舍同缔构也。鄂岳连师何公旌其行业，请居晋安，不移其志。建中伊始，符载与杨衡、李演约晏为尘外之侣焉。以贞元十六年九月十四日示灭，春秋五十八，僧

腊三十四。迁塔于黄鹤山南原也。

○唐南岳澄心传

释澄心，姓朱氏，东海人也。厥父任济源令。天宝中，安史之乱遇害。心稚齿随母氏至河内，贫极，母即从人。心不乐随嫁。心之志气不群，乃投应福寺智明法师求教勖，披削登戒。后云游鸟宿，务急参玄于秀师高足门下，了其法要。乃观诸方名迹，遂止衡岳。请益之僧，摩肩骈足。时太守吴宪忠请心入州治，谢而不行。再命栖于龙兴寺，来问道者，丈室恒满。贞元十八年壬午十一月示灭，春秋七十六，以其月二十七日入塔云。

○唐杭州天竺寺道齐传（法如）

释道齐，俗姓赵氏，钱塘人也。幼而察慧，器度浩然，入于庠序，经籍淹通。偶立当衢，见僧分卫，行讽《净名经》，冥然喜之。且召入家设食，问僧“为居何寺”？答曰：“定水伽蓝。”因请父母出家，母曰：“吾生汝时，梦手擎日月，尝占是梦，云贵子，有五等之分。脱或舍家，吾无望矣。”由是往定水从师。年十七，进具，习毗尼法。复投灵隐寺，学《华严经》义。自尔于天竺寺修习禅定，行杜多行。其山有石窟，齐于中坐，忽巨蟒矫首？呀为吞噬之状，愀然不动。时有虎豹近于石室，群鹿时时褻扰。又山椒乏水，以锡杖？地，其泉迸流，实供其用。贞元二十一年，四方学者劝请讲《华严经》，时雪飘飞，忽生花二本，状若芙蕖，熠飏光发，观者嗟叹，见所未见。齐道誉惟馨，其节俭恶衣恶食，人所不胜。后终于山寺焉。又唐太行山释法如，俗姓韩，慈州人也。少为商估，心从平准，至今东京相国寺，发心依洪思法师出家。隶业偕通，遂往嵩少间，游于洛邑，遇神会祖师授其心诀。后登太行山，见马头峰下可以栖神，结茅而止。有褚墩戍将王文信率众建精庐焉。刺史李亚卿中丞命入城，不赴。示寂，报龄八十九。元和六年三月迁塔云。

○唐金陵庄严寺慧涉传

释慧涉，俗姓谢氏，会稽人也。即东晋太傅安之后。是知杰气英灵，盼代而出。津梁拔俗，异世岂无？涉为人清素，戒节孤峻，好寂为乐，不栖名闻。以大历之初，于金陵庄严寺遇牛头山忠禅师，一言知归，遂命入室，授其法要。服膺道化，待之弥载，不憚其劳。泊忠捐世，踵武兹岭，无游人境。一衣方丈，操节弥高。自是以来，问道者众，四维方域，无不沾洽，五十年中，翕然归德。以长庆二年终于山院，春秋八十有二。门弟子惟晏等奉全师礼，建塔于寺之西北，勒铭纪德。若考师之艺文，则草堂庐岳，各美于当代矣。

○唐京兆千福寺云邃传（清源）

释云邃，不知何许人也。通综经论，解将行兼。仍贯群书，号为该博。好远泛爱，人无盼然。累朝诏入内道场，顺宗已来，掌领译务。宪宗初，勾当右街诸寺观释道二教事，别敕充西明、千福两寺上座。风猷淹雅，纲任肃然。昔贤以道生比郭林宗，邃公有焉。次润州栖霞寺释清源，姓冯，南徐延陵人也。稚年贞素，长亦弗群，俗态不拘，法流爰入。造涉公为弟子焉。学赡经律，人罕畴匹。栖于摄山，积其龄稔。长庆初，工部尚书李相国德裕镇于浙西，洗心道域，延居京口，谕禀禅要，雅契夙心。及赞皇去郡，返锡栖霞，终于住寺。

○唐京师保寿寺法真传

释法真，不知何许人也。器识悠深，学问宏博，研穷梵典，旁赅儒书。讲导之余，吟咏情性。公卿贵士，无不宗奉。泊长庆中，帝颇锐怀佛事，真屡膺召命，内殿祇奉。四年，赴禁中道场，睿武昭愍皇帝御于法席，顾问三宝功能，真得应对，而辩给圆转，援据粲然。帝悦，因请云：“久废坛度僧，未全法者皆老朽。”盖两河间兵革未偃之故。寻诏两街佛寺各置僧尼受戒坛场，自三月十日始至四月十日停，仍令两街功德使各选择有戒行僧谓之大德者，考试僧尼等经，僧能暗诵一百五十纸，尼一百纸，即令与度。真频奉敕修功德，故遂奏请。真之德望，实唱导之元，罔知终所。

○唐吕后山道场宁贲传

释宁贲，姓李氏，陇西人也。家于亳州蒙城，幼奉释尊，而不言乎簪组之绪，无得称其代讳焉。贲所吐论，皆以觉了，不取诸相。心通定慧，而尽虚空，无以边中可测，无以文字求我。因往洪州，寻道一祖师，见而奇之，语而异之，大乘法器得其人矣。遂乃具戒，作入室弟子。师资数岁，道议殊伦。欲往天台，至越吕后山岑寥曰：“即是诸佛住处，何必天台也？”贲菩提直干，挺秀七尺。村豪里宿睹其异状，归依瞻仰，老幼争先。同味醍醐，疾病皆愈。是时多有行路留戾，欲暴僧徒，贲乃引之而前，威之而退，惊骇仪貌，礼足归依。调御山林，魔邪慑伏。不下岩岭近万余辰，德远道高，僧徒弥众。先时居处隘陋，兼无殿堂。众议经营，任人资福，远村穷墅亦竞助缘。土石木工，程材售巧，约山横栋，临涧飞檐，斤师斧子，鸟立猿，揆景促力，星再回天，殿堂成矣，佛像列矣。精耀俯仰，照山蛇云，人天不殊，别开佛土。大和二年六月七日，远闻道场之内有鼓錡丝竹之声，是夜二更，恬然化灭。生形七十五，炎腊四十一。是月权殡于杉园，礼也。斋祭殊品，哀号震山，惨树色于禅枝，咽水声于石穴。物尚知感，人情可量。大和五年九月茶毗，建塔于道场巽山，禀先意也。

○唐阆州长乐寺法融传

释法融，姓严氏，阆中人也。稚齿好朴素，恶华楚之服。父训令秉笔，便画佛形像

。至于聚戏，抔沙为塔，所作无非佛事。年甫十三，见释子，扼其衣坐执经卷，苦求出家。依长乐寺慧休法师为弟子，经诵偕通，乃沾戒善。遂讲南山《律钞》。后游云水，见嵩岳普寂禅道风行，密付心樱往弋阳福宁寺，放荡闲居，学道者至。以大和九年示疾而终，春秋八十九。其年正月十日，门人奉神座入塔焉。

卷三十

◎杂科声德篇第十之二（正传十九人附见六人）○唐上都大安国寺好直传

释好直，俗姓丁氏，会稽诸暨人也。幼不喜俗事，酒肉荤茹，天然不食。因投杭坞山藏师落发。元和初受具于杭之天竺寺。凡百经律论疏钞，嗜其腴润。一旦芒屨策杖，诣洪州禅门，洞达心要，虚往实归。却于本郡大庆寺，求益者提训，凡二十余载，为江左名僧。见儒士能青眼，故名辈多与之游，往往戏为诗句，辞皆错愕。凡从事廉问护戎于越，入境籍声实而造其户，不独能诱，亦善与人交者。大和中游五台，路出京邑，一夕而去。前护戎郗志荣、宋常春二内侍尤味其道，孜孜远招。开成初再至京国，二贵人同力唱和，牵輶留，致安国寺大方丈以居之。王畿龙象，莫不钦重。无何召入为供奉大德，非所好也，1111？俗受之。然归欤之叹，未尝少弃。四年十月二十五日嘱累弟子讫，奄然而寂，春秋五十六，夏三十二。郗宋二家率财权瘞于浚水，东人皆悲之，门人鉴诸后归葬于崇山之南，华严寺起塔。会是四年，起居舍人韦绚为碑纪代焉。

○唐天台山禅林寺广修传（高闲）

释广修，俗姓留氏，东阳下昆人也。淑质贞亮，早预邃师之门，研穷教迹，学者云拥。日诵《法华》、《维摩》、《金光明》、《梵网》、《四分戒本》。六时行道弗休，弥年更笃。每一岁行忏法七七日，则第四随自意三昧也。开成三年，日本国僧圆载来躬请法，台州刺史韦珩请讲《止观》于郡斋。以会昌三年癸亥岁二月十六日终于禅林本寺，俗寿七十三，法腊五十二。迁神于金地道场，法付门人物外焉。咸通七年，门人良汶发坟火葬，淘收舍利一千余粒，重塔藏焉。又湖州开元寺释高闲，本乌程人也。髫年卓蹠，范露异才。受法已还，有邻坚志，苦学劳形，未尝少惰。后入长安，于荐福、西明等寺隶习经律，克精讲贯。宣宗重兴佛法，召入对御前草圣，遂赐紫衣，仍预临洗忏戒坛，号十望大德。性情节会，矗然难屈。老思归乡，终于本寺。弟子鉴宗，敕署无上大师，亦得闲之笔法。闲常好将较川白紵书真草之踪，与人为学法焉。

○唐高丽国元表传（全清）

释元表，本三韩人也。天宝中来游华土，仍往西域，瞻礼圣迹，遇心王菩萨指示支提山灵府，遂负《华严经》八十卷，寻访霍童，礼天冠菩萨，至支提石室而宅焉。先是此山不容人居，居之必多霆震猛兽毒虫，不然鬼魅惑乱于人。曾有未得道僧辄居一宿，为山神驱斥，明旦止见身投山下数里盼。表赍经栖泊，涧饮木食，后不知出处之踪矣。于时属会昌搜毁，表将经以花榈木函盛，深藏石室中。殆宣宗大中元年丙寅，保福慧评禅师素闻往事，躬率信士迎出甘露都尉院，其纸墨如新缮写，今贮在福州僧寺焉。又会稽释全清，越人也。耨耔戒地，芬然杜若。于《密藏》禁咒

法也，能劾鬼神。时有市侩王家之妇患邪气，言语狂倒，或啼或笑，如是数岁。召清治之，乃缚草人长尺余，衣以五彩，置之坛，咒禁之。良久，妇言乞命，遂志之曰：“顷岁春日于禹祠前相附耳。如师不见杀，即放之远去。”清乃取一甌以鞭驱乌灵入其中，而呦呦有声，絨器口以六乙泥朱书符印之，瘞于桑林之下，戒家人无动之，妇人病差。经五载后，值刘汉宏与董昌隔江相持，越城陷，人谓此为窖藏，掘打甌破，见一鸦闯然飞出，立于桑杪而作人语曰：“今得见日光矣。”时清公已卒也。

○唐镇州龙兴寺头陀传

释头陀，本下郢磨家之子，然其器度温润，若长者之规。厥父课令其守磨，夜深悯驴牛之困惫，自己代之。放其畜啮草饮水歇卧者。父母知之，为其罢业。儿亦乞出家，遂落发受具。持无嗔怒，唯收拾粪扫物为衣，可重数斤。卧具三十年未尝更易。苦节之行，无有伦比，真定之民重之。而不受人供施，号抖擞上人焉。

系曰：粪扫衣者，四圣种之一也。凡修练者必愿成此行，奈何少堪任之！其胜之者，勇猛堪能之人也。○唐南岳山全繡传

释全繡，本余杭人也，入径山礼法济大师求剃染。禀质强渥，且耐饥寒。诸所参寻，略得周遍，乃隐衡岳中立华庵。木食涧饮，结软草为衣，伏腊不易。有赠繡诗云：“窠居过后更何人？传得如来法印真。昨日祝融峰下见，草衣便是雪山身。”此太常孙渥旧相南迁有作，事详《南岳高僧传》云。

系曰：草衣在南岳炎方，壮年即可，未知衰老徙居幽朔耐否？如能，则上上根胜士也。○唐越州明心院慧沐传

释慧沐，俗姓祝氏，即世暨阳人也，代为著姓。沐幼冲之岁，家法严明，训授儒经，郁成造秀。将随计吏，谒觉智寺契真禅师，即谥大观者是也，因以微讽。沐由兹开悟。明年剃度，乃诣洪井，礼观音禅师，顿了心契。咸通七载，还归故乡，邑宰韦公乃率信心者，造栖真院，四方禅客无远不届。廉使裴延鲁召沐，因营鉴水坊精舍成，还以坊为题榜，既而居之，安而能迁。允明州橡齐肇请，住玉笥峰，未久而卒。寿八十八，腊四十五，则乾宁五年七月三日也。

○唐幽州南瓦窑亡名传（祝融峰禅者）

释亡名，履行尤峻，独居燕城南窑灶间。天祐中，幽蓟不稔，道殍相望。因分卫回，闻车辙中呱呱之声，悯而收归，乃饥民所弃女子也。以求牛乳哺之。当七八岁，引于城中求色帛以衣之。及笄年也，容色艳丽，殆非凡俗，或讥呵者，僧终无渝志。适遇燕师刘仁恭从禽逐兔，直入僧居窑内。一卒见女子侍僧之侧，遂白师，刘往

亲见，问其故，皆以实对。刘曰：“弟子欲收之，可乎？”僧曰：“诺。”早验无吝意，自扶上马。归府，元真处子也，刘益哀之，不令伍于下位。仍重其僧，谓为果位中人也。别造精舍以处之，刘旬两往谒焉。其僧疾没，门人入讣，女方独坐，闻之哀恸而死焉。刘为僧营塔标志矣。又祝融峰禅者（亡名），为人抗直，不事威仪，每一举扬，善标宗要，道俗归之若市。尝饮酒遇毒，当时吐下，透落腐衣裂石，体中无恼。每有一蛇一虎为卫护状。迨终阖维，留骨一片，大如琵琶槽。僧众构火重焚，焚时色同火质，火尽灰寒，色白如雪，岂非得全身分坚固设利罗乎！至今岳中传其言句，立其浮图，号祝融峰道者焉。

○唐洪州开元寺栖隐传（宝安）

释栖隐，字巨微，姓徐氏。少而端厉，神解天然。佩褱之岁，酷好出尘，父母不可坏其意。削{髟采}之后，纳法已还，其盼服勤于学，深入毗尼壶奥焉。又于风雅之情，非雕刻而得，成自天姿。广明中，避巢寇，入庐山折桂峰，实嘉遁也。然多于花朝月夕，晚照高秋，练句成联，合篇为集，往往酋健浏亮，散在人口。身拥零破麻纳，不识者谓之山叟野人，殊无能者。得归宗禅旨，与同举扬，且无吝法。平常与贯休、处默、修睦为诗道之游，沈颜、曹松、张凝、陈昌符皆处士也，为唱褒之友。隐为群士响臻，淡然若水。后寇盗稍平，入荆楚，登祝融，踪迹啸傲。光化三年，游番禺，受知于太尉徐彦若。同光二年，于洪井钜鹿魏仲甫邂逅，以文道相善。后唐天成中卒。诗弟子应之携隐之诗计百许首，投仲甫为集序，今所行者号《桂峰集》是也。次嘉禾灵光寺释宝安，俗姓夏，姑苏常熟人也。风神爽拔，性行淑均。壮年家务所婴，誓思脱屣。及进具之后，专习定门，洞达真诀，而不衣丝缕，惟专分卫，寝则刍谿。安昔游五台，嗟南人之不识，遂率道俗同模筑五台之制于灵光寺，今且存焉。事毕，无疾而终。受生一百有十八岁，法腊七十八。由身不坏，门徒布漆之，别院供养。至会昌毁寺，遂焚之。

○唐河东悬瓮寺金和尚传

释金和尚者，姓王氏，西河平遥人也，所生之地猪坑村。幼而魁岸，为人鲁质。所作诡异，与平人不类。于嵩岩山出家。其后身裁一丈，腰阔一围，言事多奇差，终后如在。乡人供祭之，乞愿，皆遂人意。西河至稽胡皆郑重焉。

○梁四明山无作传

释无作，字不用，姓司马氏，姑苏人也。父陈宛丘县尉。母戴氏始妊时，梦异沙门称姓徐，住持流水寺，欲寄此安居，言讫加趺而坐。其父同夜梦于盘中书一字，甚称心，自言可以进上天子。至明，终说所梦，母曰：“意其腹中必沙门也。”矢之曰：“如生儿，放于流水寺出家。”及生，果歧嶷可爱，且恶荤膻之气。年迨四岁，母自教诵习，利金易砺，记忆无遗。厥父欲其应童子举业，渐见风范和润，且恒

有出尘之意。俄尔父偷窥姚氏之女且美容仪，酷欲取之。母切忌之，因曰：“或舍是子出家，宽汝所龆”父乃许之，送入流水寺中。才及月余，姚氏仇离时谓此女是善知识，为作之出家增上缘矣。年二十，受具足法。相次讲通《删补律钞》、《法华》、《上生》等经、《百法论》。一性五性宗教，励精寻究。孔老书篇，无不猎涉。后参其玄学于雪峰存禅师，深入堂奥。至庐陵三顾山，檀越造云亭院，豫章创南平院，请作住持，皆拂衣而去。前进士唐稟作《藏经碑》，述作公避请之由。居洪井十载，且未识洪师钟氏之面。乃游会稽四明，因有终焉之志。吴越武肃王钱氏仰重，召略出四明，因便归山，盖谢病也。有诗杼意呈王，王亦不留。诗云：“云鹤性孤单，争堪名利关？衔恩虽入国，辞病却归山。”时奉化乐安孙癭退居啸傲，不交缁伍，唯接作，交谈终日。进士杨？亦慕为林下之游。以梁开平中卒于四明，春秋五十六。初作善草隶，笔迹酋健，人多摹写成法。述诸色礼忏文数十本，注道安《六时礼佛文》一卷，并诗歌，并行于代。作不入尼寺，不谒公门，不修名刺，不趋时利，自号逍遥子焉。

○梁成都府东禅院贯休传（处默昙域）

释贯休，字德隐，俗姓姜氏，金华兰溪登高人也。七岁，父母雅爱之，投本县和安寺圆贞禅师出家为章侍。日诵《法华经》一千字耳。所暂闻不忘于心。与处默同削染，邻院而居，每隔篱论诗，互吟寻偶对，僧有见之，皆惊异焉。受具之后，诗名耸动于时，乃往豫章，传《法华经》、《起信论》，皆精奥义，讲训且勤。本郡太守王詠弥相笃重。次太守蒋瑰开洗忏戒坛，命休为监坛焉。乾宁初，赍志谒吴越武肃王钱氏，因献诗五章，章八句，甚惬旨，遗赠亦丰。王立去伪功，朝廷旌为功臣。乃别树堂立碑，记同力平越将校姓名，遂刊休诗于碑阴，见重如此。休善小笔，得六法。长于水墨，形似之状可观。受众安桥强氏药肆请，出罗汉一堂，云：“每画一尊，必祈梦得应真貌，方成之。与常体不同。自此游黟歙，与唐安寺兰闍梨道合。”后思登南岳，北谒荆师成汭，初甚礼焉，于龙兴寺安置。时内翰吴融谪官相遇，往来论道论诗。融为休作集序，则乾宁三年也。寻被诬谮于荆师，黜休于功安。郁悒中题砚子曰：“入匡始身安。”弟子劝师入蜀，时王氏将图僭伪，邀四方贤士，得休甚喜，盛被礼遇，赐赆隆洽，署号禅月大师。蜀主常呼为“得得来和尚”。时韦蔼举其美号。所长者歌吟，讽刺微隐，存于教化。体调不下二李、白、贺也。至梁乾化二年终于所居，春秋八十一。蜀主惨怛，一皆官葬。塔号白运。于城都北门外升迁为浮图，乃伪蜀乾德中，即梁乾化三年癸酉岁也。休能草圣。出弟子昙域，癸酉年集师文集，首安吴内翰《序》，域为《后序》。韦庄尝赠诗曰：“岂是为穷常见隔，只应嫌酒不相过。”又广成先生杜光庭相善，比乡人也。休书迹，好事者传号曰姜体是也。尝睹休真相，肥而矬，蜀宰相王锺作赞。昙域戒学精微，篆文雄健，重集许慎《说文》，见行于蜀。有诗集，亚师之体也。

○梁庐山双溪院国道者传

释国道者，未知何许人也。器凝淳粹，行敦高迈，块然独处，翩翩在形器之上矣。参学攸广，欲歇孤征，爱庐山秀异，誓隐沦以求其志。考筑草舍，濯园殖蔬，任山中居人？龠或问其故，答曰：“贫道无心而种，无心而舍也。”验此见知，实达道之上流矣。修睦僧正恒倾意奉重，诗赠国公云：“入门空寂寂，真个出家儿。有行鬼不见，无心人谓痴。”后终于院，葬于双溪山原，有小浮图焉。今以“国”字呼之，为名邪姓邪？未得详焉。

○梁泉州智宣传

释智宣，泉州人也。壮岁慕法，学义净之为人也。轻生誓死，欲游西域，礼佛八塔，并求此方未流经法。以唐季结侣渡流沙，所至国土，怀古寻师，好奇？异，聚梵夹，求舍利。开平元年五月中达今东京，进辟支佛骨并梵书多罗叶夹经律。宣壮岁而往，还已衰耄矣。梁太祖新革唐命，闻宣回，大悦，宣赐分物，请译将归夹叶。于时干戈，不遑此务也。

○梁江陵府龙兴寺齐已传

释齐已，姓胡，益阳人也。秉节高亮，气貌劣陋。幼而捐俗于大洑山寺，聪敏逸伦，纳圆品法，习学律仪。而性耽吟咏，气调清淡。有禅客自德山来，述其理趣，已不觉神游寥廓之常乃躬往礼讯，既发解悟，都亡朕迹矣。如是药山、鹿门、护国，凡百禅林，孰不参请。视其名利，悉若浮云矣。于石霜法会，请知僧务，梁革唐命，天下纷纭于时高季昌稟梁帝之命，攻逐雷满出渚宫，已便为荆州留后，寻正受节度。迨乎均帝失御，河东庄宗自魏府入洛，高氏遂割据一方，搜聚四远名节之士，得齐之义丰、南岳之已，以为筑金之始验也。龙德元年辛巳中礼已于龙兴寺净院安置，给其月俸，命作僧正，非所好也。其如闲辰静夜，多事篇章，乃作《渚宫莫问篇》十五章，以见意，且徇高之命耳。已颈有瘤赘，时号诗囊。栖约自安，破纳拥身，少麻缠膝。爱乐山水，懒谒王侯，至有“未曾将一字，容易谒诸侯”句为狎。华山隐士郑谷诗相酬唱。卒有《白莲集》行于世，自号衡岳沙门焉。

○后唐灵州广福寺无迹传

释无迹，姓史氏，朔方人也。当宣宗御宇，佛法中兴。大中九年，年正十三，决志舍家，投白草院法空大师为弟子，操执密缙，拂攘嚣尘。咸通三年，用宾于京室，得戒度于西明寺矣。凡于百艺，悉愿游焉。慕定林威能画，戴安道能琴，我则讲贯之余，兼而综习。先是唐恒夫尝作镇朔方，后于辇下相遇，以家僧之礼待焉。盖知言行相高，复能唱导闻。恒夫白两街功德使，请隶西明寺。旋属懿宗皇帝于凤翔法门寺迎真身，右宣副使张思广奏迹充乎赞导，悦恠上心，宣赉稠厚。光启中传《授佛顶炽盛光降诸星宿吉祥道场法》，归本府。府帅韩公闻其堪消分野之灾，乃于鞠场结坛修饰，而多感应。景福中，太尉韩公创修广福寺，奏迹住持。皆以律范绳之

，塞垣盼求戒者必请为力生焉。梁乾化丙子岁，中书令韩公洙奏署师号曰鸿远欤。后唐同光三年乙酉岁四月一日，坐终于文室。筋骨如生，风神若在，蕃汉之人观礼称叹曰：“昔至德中当府龙兴寺有高士辩才坐亡，遂漆布之。乾宁元年府帅举奏，敕谥曰能觉。今迹师可不异时而同事哉！中令韩公命工布漆焉。庄宗朝军府从事薛昭纪为碑颂德云。

○后唐明州国宁寺扑光传

释光，字登封，姓吴氏，永嘉人也，唐史官左庶子兢之裔孙也。幼舍家于陶山寺剃度。居必介然，不与恒人交杂。好自标遇，慢易缁流。多作古调诗，苦僻寡味，得句时有得色。长于草隶，闻陆希声谪宦于豫章，光往谒之。陆恬静而傲气，居于舟中，凡多回投刺，且不之许接。一日设方计于谒，与语数四，苦祈其草法，而授其五指拨镫诀。光书体当见酋健，转腕回笔，非常所知。乃西上，昭宗诏对御榻前书，赐紫方袍。后谒华帅韩建，荐号曰广利。自华下归故乡，谒武肃王钱氏，以客礼延之。而性畔岸，弗惬王情，乃归甬东终焉。有文集，知音者所贵。出笔法弟子从瑰、温州僧正智琮，皆得墨诀。有朝贤赠歌诗，吴内翰融、罗江东隐等五十家，仅成一集。时四明太守仰谗素重光高蹈，躬为丧主，理命令葬。后三年，淮西域焚之，发棺俨若生相，髭发爪皆长。茶毗收舍利，起小塔焉，则后唐长兴中也。

○晋宣州自新传

释自新，姓孙氏，临淄人也。濯戒寻师，曾无懈废，闻膺禅师化被钟陵，往参问焉。从云居长往，回锡尝隐广德山中。属两浙文穆王钱氏率吏士躬征苑陵，入山寺，群僧皆窜，唯新晏如。问曰：“何不避乎？”对曰：“东西俱是贼，令老僧去何处逃避？”王惊其讦直，回戈遣归，见武肃王问之，言无所屈。加之高行，造应瑞院居之，假号曰广现大师。初新尝入宣城山采药，穿洞深去，始则暗昧，寻见日分明，行仅数里，洞侧有别窍，溪水泛泛然。隈一大松，枝下有草庵，一僧雪眉拥纳坐禅。旁有一磬火器，新击磬，遂开目惊曰：“嘻！师何缘至此？”乃陈行止，揖坐，取石敲火煎茗，香味可爱。日将夕矣，僧让庵令新宿，顾其僧上松巅大巢内，闻念《法华经》，声甚清亮。逡巡，又咄骂云：“此群畜生毛类，何苦生人恐怖？速归林薄，不宜辄出。”叱去，新窥之，乃虎豹弭耳而去，明日谓其僧曰：“愿在此侍巾屨。”僧曰：“自居此地，百见草枯，四绝人烟，非师栖息处。”又问：“莫饥否？”相引溪畔，有稻百余穗，收谷，手擲三椀黄粱。挑野蔬和煮，与食。后遣回去。送至洞口曰：“相遇非偶然也。所食茶与菜糜，师平生不乏食矣。”遂遵路回本院已，月余日命同好再往寻之，失洞踪迹。后在浙中，充宝塔寺主，以天福中卒于住寺，年八十余。今影在冷水湾前，小院存焉。

○汉杭州耳相院行脩传

释行脩，俗姓陈，泉州人也。少投北岩院出家，小心受课，诵念克勤。十三削发，往长乐府戒坛受上品律仪。年始十八，参雪峰山存禅师，随众请问，未知诤旨。辞存师，言入浙去。存曰：“与汝理定容仪，令彼土人睹相发心。”遂指其耳曰：“轮郭幸长，垂珙犹短，吾为汝伸之。”双手平曳，登即及肩，如是者三，自此长垂，见者举目。后唐天成二年丁亥岁入浙中，倾城瞻望，檀施纷纷。遂构室于西关高峰，为其宴息，后郁成大院。脩别无举唱，默默而坐。人问，唯笑而止。士女牵其耳交结于颐下，杭人号长耳和尚。以乾祐三年庚戌岁十一月示疾，动用如平时，以三月中夜坐终。檀越弟子以漆布，今亦存焉。后寄梦睦州刺史陈荣曰：“吾坐下未完。”检之，元不漆布，重加工焉。

○大宋宜阳柏阁山宗渊传

释宗渊，姓宫氏，高密人也。幼通经籍，察惠若神，忽愿出家于东莱北禅院。后参学江表岳中祖师胜友，资神润已，往造实归。僻好吟诗，于荆楚间尝师学于齐己之体，自言缘情在品物流形之外。览天下山川，且曰“步仞之丘，巨兽无以隐其躯”。爱宜阳柏阁山居之，以求其志。其孤洁耿介，凡俗不可造次而见。日别持《观音支品》，盖曾有善相人言渊促龄，勉令受持《普门品》也。至太平兴国五年十月，预言终期，令水土作座，如鹿顶形。连促木工，明日斋时要用，至是果坐终焉。乡人无远近皆来焚香设拜，当年迁小塔于宝云寺之山原，年八十三。有《洛西集》。著挽辞五十首，一云：“举世应无百岁人，百年终作冢中尘。余今八十有三也，自作哀歌送此身。”纸衣一袭葬焉。后开发，神色宛然，弟子淡然、奉明葬之于岩穴之中矣。

论曰：太极是生两仪，两仪生万物，纁因缊而出，鼓动而萌。由庶类以蚩蚩，稟自然而历历。自然者道，道惟本心，心无不通，通物之理之谓道也。道其不一，蕃息流形，若宽天倪。物亦惟一。乾一也，坤一也，殆乎因动成变，以变求占，则生象不一欤？至如鸟兽交气，草木构精，或用其牡而疏其雄，或同乎根而异乎实。鰕飞似鸟，橘移成枳，交驩为伦，羽嘉生凤，若此之伦，物类糅错之所致也。杂之时大矣哉！事有重？13，物有纷纶，乃彰杂名，非一名而统荆故曰义虽博，则知可以一名举也。昔梁《传》中立篇第十曰《唱导》也，盖取诸经中“此诸菩萨皆唱导之首”之义也。唱者，固必有和乎？导者，固必有达者。终南释氏观览此题，得在乎歌赞表宣，失在乎兼才别德也。譬若别均天分，重赋全才，虎双翼而飞，鹰四足而击也。于是建立《杂篇》，包藏众德，何止声表？无所不容。或曰：“《续传》改作名题，自何稽古？”通曰：“象班孟坚加九流中杂流也。如其立教，如其为人，匪独阴阳，不专刑律，或兼名墨，或涉纵横，则可目之为杂家流也。《汉书》有变，拾太史公之遗；澄照建题，正梁慧皎之僻。”或曰：“胡不闻杨子云疾其杂乎？”通曰：“彼恶夫淮南、太史公不宗孔而无纯德耳。此则应杂而杂，断无杂咎欤！今作传者，若游夏焉，观其起隐终哀，何敢措一辞也。”或曰：“何忽变《唱导》成《声德》耶？”通曰：“声之用大矣哉！良以诸佛刹土，偏用一尘以为警悟。唯忍土

最尚音声，行为佛事及观音说圆通，世尊称赞者，为被闻熏。故若毗目仙人，香积世界，乐不乐爰居之耳，圆不入方凿之穿。是以影胜大王止前驱之象马，钵囊释子动合会之人天。返魂者随呗声而到家，光洁者闻呗声而欢喜。乃可谓宫商佛法，金石天音，哀而不伤，乐而不佚，引之入慈悲之域，劝之离系缚之常脱或执受不精，器能无取，乃不可谓为声德也。于今搜有邻之德，聚兼讲之才，三人之师，于斯见矣，四战之国，孰敢攻乎？得非备五彩而服章，含八风而成乐，则有登天竺而作猿梵，动塔铃而贯虹电，副天请而都讲随，占地理而宰臣应，观音摩其发顶，弥勒诉其雷神。始化倭民，坐亡举指，见慈颜而不怒，作《诗式》以安禅。巨蟒不惊，山魔慑伏，临神鉴而悬知澄汰，礼天冠而誓隐灵踪。破瓮飞鸟，劳身代畜。衡山衣草，禹寺明心，养童女以身全，遇毒流而命在。德符禅月，躯涉磧沙。或辩之利通，或声之流靡，猗嗟硕德，于烁群公！若诸根之互能，同五事之俱举，故强名为杂也。？接縋檀之树，数倍馨香；鹰蛾鸟育金翅之巢，千重猛鹫。咨尔同道，听乎直言。为僧不应于十科，事佛徒消于百载。如能以高为本，以德为枝，以修为花萼，以证为子实，然后婆娑挺盖，郁密成阴，周覆三千大千，号之曰大菩提树也欤 1

后序

前代诸家，或云《僧传》、《僧史》、《记录》，乃题号不一，亦声迹有殊。至梁沙门慧皎云《高僧传》，盖取高而不名者也。则开其德业，文为十科，见于传内。厥后有唐《续高僧传》，仿仰梁之大体而以成之。洎乎皇朝《大宋高僧传》之作也，清风载扬，盛业不坠。赞宁自至道二年奉睿恩掌洛京教门事，事兰心旷之日，遂得法照等行状，撰已易前来之阙如。寻因治定其本，虽大义无相乖，有不可者以修之，先者所谓加我数年，于《僧传》则可矣已。斯幸复治之，岂敢以桑榆之年为辞耶？时方彻简，咸平初承诏入职东京右街僧录，寻迁左街。乃一日顾其本，未及缮写，命弟子辈緘诸篋笥，俾将来君子，知我者以《僧传》，罪我者亦以《僧传》，故于卷后而书之云耳。

卷一

◎译经篇第一之一（正传三人附见一人）○唐京兆大荐福寺义净传

释义净字文明，姓张氏，范阳人也。髫髻之时，辞亲落发，遍询名匠，广探群籍，内外闲习，今古博通。年十有五，便萌其志，欲游西域，仰法显之雅操，慕玄奘之高风。加以勤无弃时，手不释卷，弱冠登具，愈坚贞志。咸亨二年，年三十有七，方遂发足。初至番禺，得同志数十人，及将登舶，余皆退罢。净奋励孤行，备历艰险。所至之境，皆洞言音。凡遇酋长，俱加礼重。鹫峰、鸡足，咸遂周游；鹿苑、瘴林，并谐瞻瞩。诸有圣迹，毕得追寻。经二十五年，历三十余国，以天后证圣元年乙未仲夏，还至河洛，得梵本经律论近四百部，合五十万颂，金刚座真容一铺，舍利三百粒。天后亲迎于上东门外，诸寺缁伍具幡盖歌乐前导，敕于佛授记寺安置焉。初与于阗三藏实叉难陀翻《华严经》。久视之后，乃自专译。起庚子岁至长安癸卯，于福先寺及雍京西明寺译《金光明最胜王》《能断金刚般若》、《弥勒成佛》、《一字咒王》、《庄严王陀罗尼》、《长爪梵志》等经，《根本一切有部毗奈耶》、《尼陀那目得迦》、《百一羯磨摄》等，《掌中》《取因假设》、《六门教授》等论，及《龙树劝诫颂》，凡二十部。北印度沙门阿你真那证梵文义，沙门波仑、复礼、慧表、智积等笔受证文，沙门法宝、法藏、德感、胜庄、神英、仁亮、大仪、慈训等证义，成均太学助教许观监护，缮写进呈。天后制《圣教序》，令标经首。暨和帝神龙元年乙巳，于东洛内道场译《孔雀王经》，又于大福先寺出《胜光天子》、《香王菩萨咒》、《一切庄严王经》四部，沙门盘度读梵文，沙门玄伞笔受，沙门大仪证文，沙门胜庄、利贞证义，兵部侍郎崔湜、给事中卢粲润文正字，秘书监驸马都尉杨慎交监护。帝深崇释典，特抽睿思，制《大唐龙兴三藏圣教序》。又御洛阳西门，宣示群官新翻之经。二年，净随驾归雍京，置翻经院于大荐福寺，居之。三年，诏入内与同翻经沙门九旬坐夏。帝以昔居房部，幽厄无归，祈念药师，遂蒙降祉，荷兹往泽，重阐鸿猷。因命法徒更重传译于大佛光殿，二卷成文，曰《药师琉璃光佛本愿功德经》。帝御法筵，手自笔受。睿宗永隆元年庚戌，于大荐福寺出《浴像功德经》、《毗奈耶杂事二众戒经》、《唯识宝生》、《所》、《缘释》等二十部，吐火罗沙门达磨末磨、中印度沙门拔弩证梵义，罽宾沙门达磨难陀证梵文，居士东印度首领伊舍罗证梵本，沙门慧积、居士中印度李释迦度颇多读梵本，沙门文纲、慧沼、利贞、胜庄、爱同、思恒证义，玄散智积笔受，居士东印度瞿昙金刚、迦湿弥罗国王子阿顺证译，修文馆大学士李峤、兵部尚书韦嗣立、中书侍郎赵彦昭、吏部侍郎卢藏用、兵部侍郎张说、中书舍人李义二十余人次文润色，左仆射韦巨源、右仆射苏瑰监护，秘书大监嗣虢王邕同监护。景云二年辛亥，复于大荐福寺译《称赞如来功德神咒》等经，太常卿薛崇嗣监护。自天后久视迄睿宗景云，都翻出五十六部，二百三十卷。又别撰《大唐西域求法高僧传》、《南海寄归传内法传》。别说《罪要行法》、《受用三法》、《水要法》、《护命放生轨仪》，凡五部，九卷。又出《说一切有部跋率堵》，即诸律中犍度跋渠之类，盖梵音有楚夏耳，约七十八卷。净虽遍翻三藏，而偏攻律部，译缀之暇，曲授学徒。凡

所行事皆尚急护。漉囊涤秽，特异常伦。学侶传行，遍于京洛，美哉，亦遗法之盛事也。先天二年卒，春秋七十九，法腊五十九，葬事官供所出。《跋窣堵》唯存真本，未暇覆疏，而逼泥曰，然其传度经律，与奘师抗衡。比其著述，净多文。性传密咒，最尽其妙，二三合声，尔时方晓矣。今塔在洛京龙门北之高冈焉。

系曰：译之言易也，谓以所有易所无也。譬诸枳橘焉。由易土而殖，橘化为枳。枳橘之呼虽殊，而辛芳干叶无异。又如西域尼拘律陀树，即东夏之杨柳，名虽不同，树体是一。自汉至今皇宋，翻译之人多矣。晋魏之际，唯西竺人来，止称尼拘耳。此方参译之士，因西僧指杨柳，始体言意。其后东僧往彼，识尼拘是东夏之柳。两土方言，一时洞了焉。唯西唯东，二类之人未为尽善。东僧往西，学尽梵书，解尽佛意，始可称善传译者。宋齐已还，不无去彼回者，若入境观风必闻其政者，奘师、净师为得其实。此二师者两全通达，其犹见玺文知是天子之书，可信也。《周礼》象胥氏通夷狄之言，净之才智，可谓释门之象胥也欤！

○唐洛阳广福寺金刚智传

释跋日罗菩提，华言金刚智。南印度摩赖耶国人也。华言光明，其国境近观音宫殿补陀落伽山。父婆罗门善《五明论》，为建支王师。智生数岁，日诵万言，目览心传，终身无忘。年十六，开悟佛理，不乐习尼犍子诸论，乃削染出家，盖宿殖之力也。后随师往中印度那烂陀寺，学修多罗、阿毗达磨等。洎登戒法，遍听十八部律。又诣西印度学小乘诸论及《瑜伽三密陀罗尼门》。十余年全通《三藏》。次复游师子国，登楞伽山，东行佛誓。裸人等二十余国。闻脂那佛法崇盛，泛舶而来，以多难故，累岁方至。开元己未岁，达于广府，敕迎就慈恩寺，寻徙荐福寺。所住之刹，必建大曼籥罗灌顶道场，度于四众。大智、大慧二禅师、不空三藏皆行弟子之礼焉。后随驾洛阳，其年自正月不雨迨于五月，岳渎灵祠，祷之无应。乃诏智结坛祈请。于是用不空钩、依菩萨法，在所住处起坛，深四肘，躬绘七俱胝菩萨像，立期以开光，明日定降雨焉。帝使一行禅师谨密候之。至第七日，炎气烛烛，天无浮翳。午后，方开眉眼，即时西北风生，飞瓦拔树，崩云泄雨，远近惊骇。而结坛之地，穿穴其屋，洪注道常质明，京城士庶皆云：“智获一龙，穿屋飞去。”求观其处，日千万人，斯乃坛法之神验也。于时帝留心玄牝，未重空门，所司希旨，奏外国蕃僧遣令归国，行有日矣。侍者闻智，智曰：“吾是梵僧，且非蕃胡，不干明敕，吾终不去。”数日，忽乘传将之雁门，奉辞，帝大惊，下手诏留祝初，帝之第二十五公主甚钟其爱，久疾不救，移卧于咸宜外馆，闭目不语，已经旬朔。有敕令智授之戒法，此乃料其必终，故有是命。智诣彼，择取宫中七岁二女子，以绯绁缠其面目，卧于地，使牛仙童写敕一纸，焚于他所，智以密语咒之。二女冥然诵得，不遗一字。智入三摩地，以不思議力令二女持敕诣琰摩王。食顷间，王令公主亡保母刘氏护送公主魂随二女至，于是公主起坐，开目言语如常。帝闻之，不俟仗卫，驰骑往于外馆。公主奏曰：“冥数难移，今王遣回，略覲圣颜而已。”可半日间，然后长逝。自尔帝方加归仰焉。武贵妃宠异六宫，荐施宝玩，智劝贵妃急造金刚寿命

菩萨像，又劝河东郡王于毗卢遮那塔中绘像；谓门人曰：“此二人者寿非久矣。”经数月，皆如其言，凡先觉多此类也。智理无不通，事无不验，经论戒律秘咒余书，随问剖陈，如钟？1111受。有登其门者，智一觐其面，永不忘焉。至于语默起居，凝然不改，喜怒逆顺，无有异容，瞻礼者莫知津涯，自然率服矣。自开元七年，始届番禺，渐来神甸，广敷《密藏》，建曼籥罗，依法制成，皆感灵瑞。沙门一行钦尚斯教，数就谘询，智一一指授，曾无遗隐。一行自立坛灌顶，遵受斯法，既知利物，请译流通。十一年，奉敕于资圣寺翻出《瑜伽念诵法》二卷、《七俱胝陀罗尼》二卷，东印度婆罗门大首领直中书伊舍罗译语，嵩岳沙门温古笔受。十八年，于大荐福寺又出《曼殊室利五字心陀罗尼》、《观自在瑜伽法要》各一卷，沙门智藏译语，一行笔受，删缀成文。复观旧随求本中有阙章句，加之满足。智所译总持印契，凡至皆验，秘密流行，为其最也。两京稟学，济度殊多，在家出家，传之相继。二十年壬申八月既望，于洛阳广福寺命门人曰：“白月圆时，吾当去矣。”遂礼毗卢遮那佛，旋绕七匝，退归本院，焚香发愿，顶戴梵夹并新译教法，付嘱讫，寂然而化。寿七十一，腊五十一。其年十一月七日葬于龙门南伊川之右，建塔旌表。传教弟子不空奏举，敕谥国师之号。灌顶弟子中书侍郎杜鸿渐，素所归奉，述碑纪德焉。

系曰：五部曼籥罗法，摄取鬼物，必附丽童男处女，去疾除妖也绝易。近世之人，用是图身口之利，乃寡征验，率为时所慢。吁，正法饑薄，一至于此！

○唐京兆大兴善寺不空传（慧朗）

释不空，梵名阿月佉跋折罗，华言不空金刚，止行二字，略也。本北天竺婆罗门族，幼失所天，随叔父观光东国。年十五，师事金刚智三藏，初导以梵本《悉曇章》及《声明论》，浹旬已通彻矣。师大异之，与受菩萨戒，引入金刚界大曼荼罗，验以掷花，知后大兴教法。洎登具戒，善解一切有部，谙异国书语。师之翻经，常令共译。凡学《声明论》，一纪之功，六月而毕。诵《文殊普贤行愿》，一年之限，再夕而终。其敏利皆此类也。欲求学《新瑜伽五部三密法》，涉于三载，师未教诏。空拟回天竺，师梦京城诸寺佛菩萨像皆东行，寐寤乃知空是真法器，遂允所求。授与《五部灌顶护摩阿闍梨法》及《毗卢遮那经》、《苏悉地轨则》等，尽传付之。厥后师往洛阳，随侍之际，遇其示灭，即开元二十年矣。影堂既成，追谥已毕，曾奉遗旨，令往五天并师子国，遂议遐征。初至南海郡，采访使刘巨邻恳请灌顶，乃于法性寺相次度人百千万众。空自对本尊祈请旬日，感文殊现身。及将登舟，采访使召诫番禺界蕃客大首领伊习宾等曰：“今三藏往南天竺师子国，宜约束船主，好将三藏并弟子含光，慧等三七人、国信等达彼，无令疏失。”二十九年十二月，附昆仑舶，离南海至诃陵国界，遇大黑风。众商惶怖，各作本国法禳之，无验，皆膜拜求哀，乞加敕护，慧等亦恸哭。空曰：“吾今有法，汝等勿忧。”遂右手执五股菩提心杵，左手持《般若佛母经》夹，作法诵《大随求》一遍，即时风偃海澄。又遇大鲸出水，喷浪若山，甚于前患。众商甘心委命，空同前作法，令慧诵《娑竭

龙王经》，逡巡，众难俱息。既达师子国，王遣使迎之。将入城，步骑羽卫，骈罗衢路。王见空，礼足请住宫中，七日供养。日以黄金斛满盛香水，王为空躬自洗浴，次太子、后妃、辅佐，如王之礼焉。空始见普贤阿闍梨，遂奉献金宝锦绣之属，请开《十八会金刚顶瑜伽法门毗卢遮那大悲胎藏建立坛法》，并许含光，慧釐等同受五部灌顶。空自尔学无常师，广求《密藏》及诸经论五百余部，本三昧耶诸尊密印仪形色像坛法羯帜，文义性相，无不尽源。一日，王作调象戏，人皆登高望之，无敢近者。空口诵手印，作于慈定，当衢而立，狂象数头顿皆踢跌，举国奇之。次游五印度境，屡彰瑞应。至天宝五载还京，进师子国王尸罗迷伽表及金宝瓔珞、《般若》梵夹、杂珠白等，奉敕权止鸿胪。续诏入内立坛，为帝灌顶。后移居净影寺。是岁终夏愆阳，诏令祈雨。制曰：“时不得暍，雨不得暴。”空奏立孔雀王坛，未尽三日，雨已浹洽。帝大悦，自持宝箱赐紫袈裟一副，亲为披擐，仍赐绢二百匹。后因一日大风卒起，诏空禳止，请银瓶一枚作法加持，须臾戢静。忽因池鹅误触瓶倾，其风又作，急暴过前，敕令再止，随止随效。帝乃赐号曰智藏焉。天宝八载，许回本国，乘驿骑五匹，至南海郡，有敕再留。十二载，敕令赴河陇节度使哥舒翰所请。十三载，至武威，住开元寺，节度使洎宾从皆愿受灌顶，士庶数千人咸登道场，弟子含光等亦受五部法。别为功德使开府李元琮受法，并授金刚界大曼荼罗。是日道场地震，空曰：“群心之至也。”十五载，诏还京，住大兴善寺。至德初，銮驾在灵武凤翔，空常密奉表起居，肃宗亦密遣使者求秘密法。洎收京反正之日，事如所料。乾元中，帝请入内，建道场护摩法，为帝受转轮王位七宝灌顶。上元末，帝不豫，空以《大随求真言》祓除，至七过，翼日乃瘳，帝愈加殊礼焉。空表请入山，李辅国宣敕令于终南山智炬寺修功德。念诵之夕，感大乐萨？1111舒毫发光，以相证验，位邻悉地，空曰：“众生未度，吾安自度耶？”肃宗厌代，代宗即位，恩渥弥厚。译《密严》、《仁王》二经毕，帝为序焉。颁行之日，庆云俄现，举朝表贺。永泰元年十一月一日，制授特进试鸿胪卿，加号大广智三藏。大历三年，于兴善寺立道场，敕赐锦绣褥十二领、绣罗幡三十二首，又赐道场僧二七日斋粮。敕近侍大臣诸禁军使并入灌顶。四年冬，空奏天下食堂中置文殊菩萨为上座，制许之，此盖嫌？陈如是小乘教中始度故也。五年夏，有诏请空往五台山修功德，于时彗星出焉。法事告终，星亦随没。秋，空至自五台，帝以师子骢并御鞍辔遣中使出城迎入，赐沿道供帐。六年十月二日，帝诞节，进所译之经表云：“爰自幼年，承事先师三藏十有四载，稟受瑜伽法门。复游五印度求所未授者，并诸经论，计五百余部，天宝五载却至上都。上皇诏入内立灌顶道场，所赍梵经尽诈翻度。肃宗于内立护摩及灌顶法。累奉二圣令鸠聚先代外国梵文，或绦索脱落者修，未译者译。陛下恭遵遗旨，再使翻传，利济群品。起于天宝迄今大历六年，凡一百二十余卷，七十七部，并目录及笔受等僧俗名字，兼略出念诵仪轨，写毕，遇诞节，谨具进上。”敕付中外，并编入《一切经目录》中。李宪诚宣敕赐空锦彩绢八百匹，同翻经十大德各赐三十匹。沙门潜真表谢。僧俗弟子赐物有差。又以京师春夏不雨，诏空祈请，如三日内雨，是和尚法力；三日已往而霈然者，非法力也。空受敕立坛，至第二日大雨云足。帝赐紫罗衣并杂彩百匹，弟子衣七副，设千僧斋，以报功也。空进表请造文殊阁，敕允奏。贵妃、韩王、华阳公主同成之，舍内库钱约三千万计。

复翻《孽路茶王经》，宣赐相继，旁午道路。至九年，自春抵夏，宣扬妙法，诫勸门人。每语及《普贤愿行出生无边法门经》，劝令诵持，再三叹息。其先受法者，偏令属意观菩提心本尊大印，直诤阿字了法不生证大觉身，若指诸掌，重重嘱累。一夜，命弟子赵迁：“持笔砚来，吾略出《涅槃荼毗仪轨》以贻后代，使准此送终。”迁稽首三请“幸乞慈悲久祝不然，众生何所依乎”？空笑而已。俄而示疾，上表告辞。敕使劳问，赐医药，加开府仪同三司，封肃国公，食邑三千户，固让不俞。空甚不悦，且曰：“圣众俨如舒手相慰，白月圆满，吾当逝矣。奈何临终更窃名位？”乃以五股金刚铃杵先师所传者，并银盘子、菩提子、水精数珠留别，附中使李宪诚进。六月十五日，香水澡沐，东首倚卧，北面瞻望阙庭，以大印身定中而寂，享年七十，僧腊五十。弟子慧朗次绍灌顶之位。余知法者数人。帝闻，辍视朝三日，赐绢布杂物，钱四十万，造塔钱二百余万。敕功德使李元琮知护丧事。空未终前，诸僧梦千仞宝台摧，文殊新阁颓，金刚杵飞上天。又兴善寺后池无故而涸，林竹生实，庭花变萎。七月六日荼毗，帝诏高品刘仙鹤就寺置祭，赠司空，谥曰大辩广正智三藏。火灭，收舍利数百粒。八十粒进内。其顶骨不然，中有舍利一颗，半隐半现，敕于本院别起塔焉。空之行化利物居多，于总持门最彰殊胜，测其忍位莫定高卑。始者玄宗尤推重焉，尝因岁旱，敕空祈雨。空曰：“过某日可祷之，或强得之，其暴可怪。”敕请本师金刚智设坛，果风雨不止，坊市有漂溺者，树木有拔仆者。遽诏空止之。空于寺庭中捏泥媪五六，溜水作梵言骂之，有顷开霁矣。

玄宗召术士罗公远与空换法，同在便殿，空时时反手搔背。罗曰：“借尊师如意。”时殿上有花石，空挥如意击碎于其前，罗再三取如意不得，帝欲起，空曰：“三郎勿起，此影耳。”乃举手示罗，如意复完然在手。又北邙山有巨蛇，樵采者往往见之，矫首若丘陵，夜常承吸露气。见空，人语曰：“弟子恶报，和尚如何见度？每欲翻河水陷洛阳城以快所怀也。”空为其受归戒，说因果，且曰：“汝以瞋心故受，今那复恚恨乎？吾力何及？当思吾言，此身必舍矣。”后樵子见蛇死涧下，臭闻数里。空凡应诏祈雨，无他轨则，但设一绣座，手簸旋数寸木神子，念咒掷之。当其自立于座上已，伺其吻角牙出目瞬，则雨至矣。又天宝中，西蕃、大石、康三国帅兵围西凉府，诏空入，帝御于道常空秉香炉，诵《仁王密语》二七遍，帝见神兵可五百员在于殿庭，惊问空。空曰：“毗沙门天王子领兵救安西，请急设食发遣。”四月二十日果奏云：“二月十一日城东北三十许里，云雾间见神兵长伟，鼓角喧鸣，山地崩震，蕃部惊溃。彼营垒中有鼠金色，咋弓弩弦皆绝。城北门楼有光明天王怒视，蕃帅大奔。”帝览奏谢空，因敕诸道城楼置天王像，此其始也。空既终，三朝所赐墨制一皆进纳。生荣死哀，西域传法僧至此，今古少类矣。嗣其法位，慧朗师也。御史大夫严郢为《碑》，徐浩书之，树于本院焉。系曰：传教令轮者，东夏以金刚智为始祖，不空为二祖，慧朗为三祖，已下宗承所损益可知也。自后歧分？别。咸曰：“传瑜伽大教，多则多矣，而少验者何？”亦犹羽嘉生应龙，应龙生凤皇，凤皇已降，生庶鸟矣。欲无变革，其可得乎！

卷二

◎译经篇第一之二（正传十五人附见八人）○唐洛京圣善寺善无畏传（达摩掬多）

释善无畏本中印度人也，释迦如来季父甘露饭王之后，梵名戍婆揭罗僧诃，华言净师子，义翻为善无畏；一云输波迦罗，此名无畏，亦义翻也。其先自中天竺，因国难分王乌荼。父曰佛手王，以畏生有神姿，宿赍德艺，故历试焉。十岁统戎，十三嗣位，得军民之情。昆弟嫉能，称兵构乱，阇墙斯甚。薄伐临戎，流矢及身，掉轮伤顶。天伦既败，军法宜诛，大义灭亲，忍而曲赦。乃？泪白母，及告群臣曰：“向者亲征，恩已断矣。今欲让国，全其义焉。”

因致位于兄，固求入道。母哀许之，密与传国宝珠，犹诸侯之分器也。南至海滨，遇殊胜招提，得法华三昧。聚沙为塔，仅一万所。黑蛇伤指而无退息。复寄身商船，往游诸国，密修禅诵，口放白光。无风三日，舟行万里。属商人遇盗，危于并命。畏恤其徒侣，默讽真言，七俱胝尊全现身相，群盗果为他寇所歼。寇乃露罪归依，指踪夷险。寻越穷荒，又逾毒水，才至中天竺境，即遇其王。王之夫人，乃畏之女兄也，因问舍位之由，称叹不足。是日携手同归，慈云布阴，一境丕变。畏风仪爽俊，聪睿超群，解究五乘，道该三学，总持禅观，妙达其源。艺术伎能，悉闻精练。初诣那烂陀寺，此云施无厌也，像法之泉源，众圣之会府。畏乃舍传国宝珠莹于大像之额，昼如月魄，夜若曦轮焉。寺有达摩掬多者，掌定门之秘钥，佩如来之密印，颜如四十许，其实八百岁也，玄奘三藏昔曾见之。畏投身接足，奉为本师。一日侍食之次，旁有一僧，震旦人也，畏视其钵中见油餌尚温，粟饭犹暖，愕而叹曰：“东国去此十万余里，是彼朝熟而返也？”掬多曰：“汝能不言，真可学焉。”后乃授畏《总持瑜伽三密教》也，龙神围绕，森在目前，其诸印契，一时顿受。即日灌顶，为人天师，称曰三藏。夫三藏之义者，则内为戒、定、慧，外为经、律、论，以陀罗尼总摄之也。陀罗尼者，是菩提速疾之轮，解脱吉祥之海，三世诸佛生于此门，慧照所传，一灯而已。根殊性异，灯亦无边。由是有百亿释迦微尘三昧，菩萨以纲总摄于诸定，顿升阶位，邻于大觉，此其旨也。于时畏周行大荒，遍礼圣迹，不惮艰险。凡所履处，皆三返焉。又入鸡足山，为迦叶剃头，受观音摩顶。尝结夏于灵鹫，有猛兽前导，深入山穴。穴明如昼，见牟尼像，左右侍者如生焉。时中印度大旱，请畏求雨。俄见观音在日轮中，手执军持注水于地。时众欣感，得未曾有。复锻金如贝叶，写《大般若经》。

熔中金为？睹波，等佛身量焉。母以畏游方日久，谓为已歿，旦夕泣泪而丧其明，泊附信问安，朗然如故。五天之境，自佛灭后，外道峥嵘九十六宗，各专其见。畏皆随所执破滞析疑，解邪缚于心门，舍迷津于觉路。法云大小而均泽，定水方圆而任器，仆异学之旗鼓，建心王之胜幢，使彼以念制狂，即身观佛。掬多曰：“善男子，汝与震旦有缘，今可行矣。”畏乃顶辞而去。至迦湿弥罗国。薄暮次河，而无

桥梁，畏浮空以济。一日，受请于长者家，俄有罗汉降曰：“我小乘之人，大德是登地菩萨。”乃让席推尊，畏施之以名衣，升空而去。畏复至乌苌国，有白鼠驯绕，日献金钱。讲《毗卢》于突厥之庭，安禅定于可敦之树，法为金字，列在空中。时突厥宫人以手按乳，乳为三道飞注畏口。畏乃合掌端容曰：“我前生之母也。”又途中遭寇，举刃三斫而肢体无伤，挥剑者唯闻铜声而已。前登雪山大池，畏不？，掬多自空而至曰：“菩萨身同世间，不舍生死。汝久离相，宁有病耶？”言讫冲天，畏洗然而愈。路出吐蕃，与商旅同次，胡人贪货，率众合围，畏密运心印，而蕃豪请罪。至大唐西境，夜有神人曰：“此东非弟子界也，文殊师利实护神州。”礼足而灭，此亦犹迦毗罗神送连眉也。畏以驼负经，至西州，涉于河，龙陷驼足，没于泉下，畏亦入泉。三日止住龙宫，宣扬法化，开悟甚众。及牵驼出岸，经无沾湿焉。初畏途过北印度境，而声誉已达中国，睿宗乃诏若那及将军史献出玉门塞表以候来仪。开元初，玄宗梦与真僧相见，姿状非常，躬御丹青，写之殿壁。及畏至此，与梦合符，帝悦有缘，饰内道场，尊为教主，自宁、薛王已降皆跪席捧器焉。宾大士于天宫，接梵筵于帝座，礼国师以广成之道，致人主于如来之乘，巍巍法门，于斯为盛。时有术士握鬼神之契，参变化之功，承诏御前，角其神异。畏恬然不动，而术者手足无所施矣。开元四年丙辰，赍梵夹始届长安，敕于兴福寺南院安置。续宣住西明寺，问劳重叠，锡赍异常。至五年丁巳，奉诏于菩提院翻译。畏奏请名僧同参华梵，开题，先译《虚空藏求闻持法》一卷，沙门悉达译语，无著笔受缀文，缮写进内。帝深加赏叹，有敕畏所将到梵本并令进上。昔有沙门无行西游天竺，学毕言归，方及北印，不幸而卒。其所获夹叶悉在京都华严寺中，畏与一行禅师于彼选得数本，并《总持妙门》先所未译。十二年，随驾入洛，复奉诏于福先寺译《大毗卢遮那经》。其经具足梵文有十万颂；畏所出者，撮其要耳，曰《大毗卢遮那成佛神变加持经》七卷，沙门宝月译语，一行笔受，删缀辞理，文质相半，妙谐深趣，上符佛意，下契根缘，利益要门，斯文为最。又出《苏婆呼童子经》三卷、《苏悉地揭罗经》三卷，二经具足咒毗柰耶也，即秘密禁戒焉。若未曾入曼荼罗者，不合辄读诵，犹未受具人盗听戒律也。所出《虚空藏菩萨能满诸愿最胜心陀罗尼求闻持法》一卷，即《金刚顶梵本经成就一切义图略》译少分耳。畏性爱恬简，静虑怡神，时开禅观，奖劝初学。奉仪形者莲华敷于眼界，稟言说者甘露润于心田，超然觉明，日有人矣。法侣请谒，唯尊奉长老宝思惟三藏而已，此外皆行门人之礼焉。一行禅师者，帝王宗重，时贤所归，定慧之余，阴阳之妙，有所未决，亦咨稟而后行。畏尝于本院铸铜为塔，手成模范，妙出人天。寺众以销冶至广，庭除深隘，虑风至火盛，灾延宝坊。畏笑曰：“无苦，自当知也。”鼓铸之日，果大雪蔽空，灵塔出炉，瑞花飘席，众皆称叹焉。又属暑天亢旱，帝遣中官高力士疾召畏祈雨。畏曰：“今旱，数当然也，若苦召龙致雨，必暴，适足所损，不可为也。”帝强之曰：“人苦暑病矣，虽风雷亦足快意。”辞不获已，有司为陈请雨具，

幡幢螺钹备焉，畏笑曰：“斯不足以致雨。”急撤之。乃盛一钵水，以小刀搅之，梵言数百

咒之。须臾有物如龙，其大如指，赤色矫首，瞰水面，复潜于钵底。畏且搅且咒，顷之，有白气自钵而兴，径上数尺，稍稍引去。畏谓力士曰：“亟去，雨至矣。”力士驰去，回顾见白气疾旋，自讲堂而西，若一匹素翻空而上。既而昏霾，大风震电，力士才及天津桥，风雨随马而骤，街中大树多拔焉。力士入奏而衣尽沾湿矣。帝稽首迎畏，再三致谢。又邙山有巨蛇，畏见之，叹曰：“欲决潞洛阳城耶？”以天竺语咒数百声，不日蛇死。乃安禄山陷洛阳之兆也。一说畏曾寓西明道宣律师房，示为粗相，宣颇嫌鄙之。至中夜，宣扞虱投于地，畏连呼“律师扑死佛子”。宣方知是大菩萨，诸吉旦摄衣作礼焉。若观此说，宣灭至开元中仅五十载矣，如畏出没无常，非人之所测也。二十年，求还西域，优诏不许。二十三年乙亥十月七日，右胁累足，奄然而化，享龄九十九，僧腊八十。法侣凄凉，皇心震悼，赠鸿胪卿。遣鸿胪丞李现具威仪，宾律师护丧事。二十八年十月三日，葬于龙门西山广化寺之庭焉。定慧所熏，全身不坏。会葬之日，涕泗倾都，山川变色，僧俗弟子宝畏禅师、明畏禅师、荥阳郑氏、琅邪王氏痛其安仰，如丧考妣焉。乾元之初，唐风再振，二禅师刻偈，诸信士营龕，弟子舍于旁，有同孔墓之恋。今观畏之遗形，渐加缩小，黑皮隐隐，骨其露焉。累朝旱涝，皆就祈请，征验随生，且多檀施。锦绣巾？，覆之如偃息耳。每一出龕，置于低榻，香汁浴之，洛中豪右争施禅？净巾澡豆，以资浴事。

今上禳祷，多遣使臣往加供施，必称心愿焉。○唐洛京智慧传

释智慧者，梵名般刺若也，姓？答摩氏，北天竺迦毕试国人，颖悟天资。七岁发心，违侍二亲，归依三宝。时从大德调伏军教诵《四阿含》，满十万颂，《阿毗达磨》三万颂。及年应法，随师往别国，纳具足戒，诵《萨婆多》近四万颂，《俱舍》二万八千颂，又诵《大婆沙》，兼通其义。七年于彼专习小乘、后诣中天竺那烂陀寺，禀学大乘《唯识》、《瑜伽》、《中边》等论、《金刚般若经》、因明声明医明王律论等，并依承智护、进友、智友三大论师。复游双林，经八塔，往来瞻礼十有八年。闻南北竺颇尚持明，遂往谘禀。彼有灌顶师名达摩耶舍见慧勤重可教，授《瑜伽法入曼荼罗三密护身五部印契经》，于一年诵彻三千五百余颂。常闻支那大国，文殊在中，锡指东方，誓传佛教。乃泛海东迈，垂至广州，风飘却返，抵执师子国之东。又集资粮，重修巨舶，遍历南海诸国。二十二年。再近番禺，风涛遽作，舶破人没，唯慧存焉。夜至五更，其风方止，所赍经论，莫知所之。及登海？，其夹策已在岸矣，于白沙内大竹

筒中得之，宛为鬼物扶持而到。乃叹曰：“此大乘理趣等经，想脂那人根熟矣1遂东北行，半月达广州，即德宗建中初也。属帝违难，奉天贞元二年始届京辇。见乡亲神策军正将罗好心，即慧舅氏之子也，悲喜相慰。将至家中，延留供养。八年，上表举慧翻传，有敕令京城诸寺大德名业殊众者同译，得锺宾三藏般若开释梵本，翰林待诏光宅寺沙门利言度语，西明寺沙门圆照笔受，资圣寺道液、西明寺良秀、庄严寺应真、醴泉寺超悟、道岸、空、并充证义。六月八日，欲创经题，敕右街功

德使王希迁与右神策军大将军王孟涉、骠骑大将军马有邻等送梵经出内。缙伍威仪乐部相间，士女观望，车骑交骈，迎入西明寺翻译。即日赐钱一千贯、茶三十串、香一大合，充其供施。开名题曰《大乘理趣六波罗蜜多经》，成十卷。又《华严长者问佛那罗延力经》、《般若心经》各一卷，皆贞元八年所译也。是岁十月缮写毕。二十八日设彩车，大备威仪，引入光顺门，进帝览，忻然，慰劳勤至。敕于神策军赐斋食，慧绢五百匹、冬服一副，余人赐各有差。慧表谢，答诏褒美。同日请译经，奉天定难功臣开府仪同三司检校太子詹事罗好心上表云：“臣表弟沙门般刺若先进《大乘理趣六波罗蜜》梵本经，伏奉今年四月十九日敕令王希迁精选有道行僧于西明寺翻译。今经帙已终，同诣光顺门进上。”答诏云：“卿之表弟早悟大乘，远自西方，来游上国，宣六根之奥义，演双树之微言。念以精诚所宜钦重，是令翻译，俾用流行。卿夙慕忠勤，职司禁卫，省览表疏，具见乃怀，所谢知。”好心以朱？围逼之际，颇有战功，预其中兵，为帝宠重。慧得好心启导，译务有光，帝制《经序》焉。慧后终于洛阳，葬龙门之西冈，塔今存矣。

○唐玉华寺玄觉传

释玄觉高昌国人也，西土种姓未得闻焉。学慕大乘，从玄奘三藏研核经论，亦于玉华宫参预翻译。及《大般若经》向就，同请翻《宝积经》，奘辞脍然。觉因梦一浮图庄严高大，忽然摧倒，遂惊起告奘。奘曰：“非汝身事，此吾灭之征耳。”觉暗悲安仿，劝诸法侣竞求医药。觉后莫测终焉。

○唐益州多宝寺道因传（嵩公宝暹）

释道因，姓侯氏，濮阳人也。稟祐居醇，含章纵哲，覃？之岁，粹采多奇，髻髻之辰，殊姿特茂。孝爱之节，慈顺之风，率志于斯，因心以极。年甫七岁，丁于内艰，啗粒绝浆，殆乎灭性。成人之德，见称州里。免丧之后，思酬罔极，出家之志，人莫我移。便诣灵岩寺求师诵习，曾不浹旬，通《涅槃经》二帙，举众惊骇，谓为神童。落发已来，砥砺其行，揣摩义章，即讲《涅槃》，宿齿名流，咸所叹服。及升上品，旋学律仪，又于彭城嵩法师所传《摄大乘》。嵩公懿德玄猷，兰薰月映，门徒学侣，鱼贯鳧趋，讲室谈筵，为之器隘。遂依科戒而为节文，年少沙门且令习律，晓《四分》者，方许入听。因夏腊虽幼，业行攸高，独于众中，迴见推揖，每敷《摄论》，即令覆讲。后隐泰岳，凡经四秋。将诣洛中，属昏季陵夷，法网严峻，僧无徒侣，弗许游方。于是杖锡出山，子焉超迈，恐罹刑宪，静念观音。少选之间，有僧錫至，皓然白首，请与偕行。迨至铜街，暨于金地，俯仰之际，莫知所在。咸谓善逝之力，有感斯见。未几，因避难三蜀，居于多宝寺。好事者素闻道誉，乃命开筵《摄论》、《维摩》，听者千数。时有宝暹法师，东海人也，殖艺该洽，尤善大乘，昔在隋朝，英尘久播，学徒来请，接武磨肩。暹公傲尔其间，仰之弥峻，每至因之论席，肃然改容，沈吟久之，方用酬遣。因抗音驰辩，雷惊波注，尽妙穷微，藏牙折角。益州总管邓国公窦璡、行台左仆射赞国公窦轨、长史申国公高士

廉、范阳公卢承庆，及前后首僚，西南岳牧，并国华朝秀，重望崇班，共籍芳声，俱申虔仰。乃于彭门山寺习道安居。此寺往经废毁，院宇凋弊，因慨然构怀，专事营缉，未移再稔，蔚成净常又以九部微言，三界式仰，缅惟法尽，将翳龙宫。遂于寺之比岩，刻书经典，穷多罗之秘帙，尽毗尼之正文。纵尧世之洪水襄陵，任赵简之北山燎狩，必无他虑，与劫齐休。既而清猷远畅，峻业遐昭，遂简宸衷，乃纡天纆，追赴京邑，止大慈恩寺，与玄奘法师翻译校定梵本，兼充证义。奘师偏奖赏之，每有难文，同加参酌，新翻弗坠，因有力焉。慧日寺主楷法师者，聪爽温瞻，声蔼鸿都，首建法筵，请开奥义。帝城缙俗，具来谘禀，欣焉相顾，得所未闻。因研几史籍，尤好老庄，咀其菁华，含其腴润，包四始于风律，综五声于文绪，故所讲训，内外该通。其专业者，《涅槃华严》、《大品》、《维摩》、《法华》、《楞伽》等经，《十地》、《地持》《毗昙》、《智度》、《摄大乘》、《对法》、《佛地》等论，及《四分》等律。其《摄论》、《维摩》仍著章疏。已而能事毕矣，示疾终于长安慧日寺，则显庆三年三月十一日也，春秋七十二。越明年正月，旋神座于益部，二月八日窆于彭门光化寺石经之侧。道俗送葬，数有数千。弟子玄疑等嗣其香火。至龙朔中，中台司藩大夫李俨制《碑》，欧阳通书焉。

○唐波凌国智贤传（会宁）

释若那跋陀罗，华言智贤，南海波凌（亦曰诃凌）国人也，善三藏学。麟德年中，有成都沙门会宁欲往天竺，观礼圣迹，泛舶西游，路经波凌，遂与智贤同译《涅槃》后分二卷。此于《阿笈摩经》内译出，说世尊焚棺、收舍利罗等事，与《大涅槃》颇不相涉。译毕寄经达交州，宁方之西域。至仪凤年初，交州都督梁难敌遣使同会宁弟子运期奉表进经，入京。三年戊寅，大慈恩寺沙门灵会于东宫启请施行。运期奉侍其师，因心莫比，师令赍经行化，故无暇影随往西域也。

○唐洛京白马寺觉救传

释佛陀多罗，华言觉救，北天竺罽宾人也。赍多罗夹，誓化脂那，止洛阳白马寺，译出《大方广圆觉了义经》。此经近译不委何年，且隆道为怀，务甄诈妄，但真诤不谬，岂假具知年月耶？救之行迹，莫究其终。大和中，圭峰密公著疏判解，经本一卷，后分二卷成部，续又为《钞》，演畅幽邃。今东京、太原、三蜀盛行讲演焉。

○唐五台山佛陀波利传（顺贞）

释佛陀波利，华言觉护，北印度罽宾国人。忘身徇道，遍观灵迹，闻文殊师利在清凉山，远涉流沙，躬来礼谒，以天皇仪凤元年丙子，杖锡五台，虔诚礼拜，悲泣雨泪，冀睹圣容。倏焉见一老翁从山而出，作婆罗门语，谓波利曰：“师何所求耶？”波利答曰：“闻文殊大士隐迹此山，从印度来，欲求瞻礼。”翁曰：“师从彼国

将《佛顶尊胜陀罗尼经》来否？此土众生多造诸罪，出家之辈亦多所犯。《佛顶神咒》除罪秘方，若不赍经，徒来何益？纵见文殊，亦何能识？师可还西国，取彼经来，流传此土，即是遍奉众圣，广利群生，拯接幽冥，报诸佛恩也。师取经来至，弟子当示文殊居处。”波利闻已，不胜喜跃，裁抑悲泪，向山更礼。举头之顷不见老人。波利惊愕，倍增虔悖遂返本国取得经回，既达帝城，便求进见。有司具奏，天皇赏其精诚，崇斯秘典，下诏鸿胪寺典客令杜行縉与日照三藏于内共译。译讫，𦘔绢三十匹，经留在内。波利垂泣奏曰：“委弃身命，志在利人。请帝流行，是所望也。”帝愍其专切，遂留所译之经，还其梵本。波利得经，弥复忻喜，乃向西明寺访得善梵语僧顺贞，奏乞重翻。帝俞其请，波利遂与顺贞对诸大德翻出，名曰《佛顶尊胜陀罗尼经》，与前杜令所译者，咒韵经文少有同异。波利所愿既毕，却持梵本入于五台，莫知所之。或云波利隐金刚窟，今永兴龙首冈有波利藏舍利之所焉。

大历中南岳云峰寺沙门法照入五台山礼金刚窟，夜之未央，责扑地。忽见一僧长七尺许，梵音朗畅，称是佛陀波利。问曰：“阿师如此自苦，得无劳乎？有何愿乐？”照对曰：“愿见文殊。”曰：“若志力坚强，真实无妄，汝可脱履于板上，咫尺圣颜，令子得见。”照遂瞑目，俄已入窟。见一院题额云金刚般若寺，字体曾健，光色闪烁。其院皆是异宝庄严，名目不暇。楼观复沓，殿宇连延，罽毘密，铃铎交鸣，可二百所。间有秘藏，中藏《金刚般若》并一切经法，人物魁伟，殆非常所睹也。文殊大圣处位尊严，拥从旁午，宣言慰劳，分茶赋食。波利引之出去。照苦乞在寺，波利不许。临别勉之，努力修进，再来可祝照还至板上蹑履，回眸之际，波利隐焉。

系曰：道家尸解，说有多端。或隐真形而存假质，矧以登地大士、漏尽罗汉？或此在他亡，或分身易态，皆以之为游戏耳，以之为利物焉。其佛陀波利出没无恒，变化何极，出金刚窟接法照师，盖与之有缘，闯然而现。故杜多迦叶久隐诸峰，晋法显往游灵鹫，见于山下焉。

○唐尊法传

释尊法，西印度人也，梵云伽梵达磨，华云尊法。远逾沙磧，来抵中华，有传译之心，坚化导之愿。天皇永徽之岁，翻出《千手千眼观世音菩萨广大圆满无碍大悲心陀罗尼经》一卷。经题但云西天竺伽梵达磨译，不标年代。推其本末，疑是永徽、显庆中也。又准《千臂经序》云：“智通同此三藏译也。”法后不知其终。

○唐西京慧日寺无极高传（阿难律木叉师迦叶师）

释无极高，中印度人，梵云阿地瞿多华云无极高也。出家氏族未凭书之。高学穷满字，行洁圆珠，精练五明，妙通三藏。永徽三年壬子岁正月，自西印度赍梵夹来届

长安，敕令慈门寺安置。沙门大乘琮等十六人、英公李世反、鄂公尉迟德等十二人，同请高于慧日寺浮图院建陀罗尼普集会坛，所须供办。法成之日，屡现灵异，京中道俗咸叹希逢。沙门玄楷等固请翻其法本。以四年癸丑至于五年，于慧日寺从《金刚大道场经》中撮要而译，集成一部，名《陀罗尼集经》一十二卷，玄楷笔受。于时有中印度大菩提寺阿难律木叉师、迦叶师等，于经行寺译《功德天法》，编在《集经》第十卷内，故不别出焉。

○唐广州制止寺极量传

释极量，中印度人也，梵名般刺蜜帝，此言极量。怀道观方，随缘济物，展转游化，渐达支那（印度俗呼广府为支那，名帝京为摩诃止那也），乃于广州制止道场驻锡。众知博达。祈请颇多，量以利乐为心，因敷秘蹟。神龙元年乙巳五月二十三日，于《灌顶部》中诵出一品，名《大佛顶如来密因修证了义诸菩萨万行首楞严经》，译成一部十卷。乌菟国沙门弥伽释迦（释迦稍讹，正云钵？，此曰云峰）译语，菩萨戒弟子前正议大夫同中书门下平章事清河房融笔受，循州罗浮山南楼寺沙门怀迪证译。量翻传事毕，会本国王怒其擅出经本，遣人追摄，泛舶西归。后因南使入京，经遂流布，有惟憲法师、资中礼公各著《疏》解之。

○唐洛京大遍空寺实叉难陀传

释实叉难陀，一云施乞叉难陀，华言学喜，葱岭北于遁人也。智度恢旷，风格不群，善大小乘，旁通异学。天后明扬佛日，崇重大乘，以《华严》旧经，处会未备，远闻于阗有斯梵本，发使求访，并请译人。叉与经夹同臻帝阙，以证圣元年乙未于东都大内大遍空寺翻译。天后亲临法座，焕发《序》文，自运仙毫，首题名品。南印度沙门菩提流志、沙门义净同宣梵本，后付沙门复礼、法藏等于佛授记寺译成八十卷。圣历二年功毕。至久视庚子，驾幸颍川三阳宫，诏叉译《大乘入楞伽经》，天后复制序焉。又于京师清禅寺及东都佛授记寺译《文殊授记》等经，前后总出一十九部，沙门波仑、玄轨等笔受，沙门复礼等缀文，沙门法宝、恒景等证义，太子中舍贾膺福监护。长安四年，又以母氏衰老，思归慰覲，表书再上，方俞，敕御史霍嗣光送至于阗。暨和帝龙兴，有敕再征。景龙二年，达于京辇，帝屈万乘之尊，亲迎于开远门外。倾都缁侣，备幡幢导引。仍饰青象，令乘之入城，敕于大荐福寺安置。未遑翻译，遘疾弥留，以景云元年十月十二日，右胁累足而终，春秋五十九岁。有诏听依外国法葬。十一月十二日于开远门外古然灯台焚之，薪尽火灭，其舌犹存。十二月二十三日，门人悲智、敕使哥舒道元送其余骸及斯灵舌还归于阗，起塔供养。后人复于茶毗之所，起七层塔，土俗号为华严三藏塔焉。

○周西京广福寺日照传

释地婆诃罗，华言日照，中印度人也。洞明八藏，博晓五明，戒行高奇，学业勤悴，

而咒术尤工。以天皇时来游此国，仪凤四年五月，表请翻度所赍经夹，仍准玄奘例，于一大寺别院安置，并大德三五人同译。至天后垂拱末，于两京东西太原寺（西太原寺后改西崇福寺，东太原寺后改大福先寺）及西京广福寺，译《大乘显识经》、《大乘五蕴论》等凡一十八部，沙门战陀般若提婆译语，沙门慧智证梵语。敕诸名德助其法化，沙门道成、薄尘、嘉尚、圆测、灵辩、明恂、怀度证义，沙门思玄、复礼缀文笔受，天后亲敷睿藻，制序冠首焉。照尝与觉护同翻《佛顶》，深体唐言，善传佛意。每进新经，锡赉丰厚。后终于翻经小房，享年七十五。天后敕葬于洛阳龙门香山，塔见存焉。

○周洛京魏国东寺天智传

释提云般若，或云提云陀若那，华言天智，于阗国人也。学通大小，解兼真俗，

咒术禅门，无不谙晓。永昌元年，来届于此，谒天后于洛阳，敕令就魏国东寺（后改大周东寺）翻译。即以其年己丑至天授二年辛卯，出《华严经法界无差别论》等六部七卷，沙门处一笔受，沙门复礼缀文，沙门德感、慧俨、法明、恒景等证义。智终年卒地，莫得而闻。

○周洛京佛授记寺慧智传（明仁全）

释慧智，其父印度人，婆罗门种，因使游此方，而生于智。少而精勤，有出俗之志，天皇时从长年婆罗门僧，奉敕度为弟子。本既梵人，善闲天竺书语；生于唐国，复练此土言音。三藏地婆诃罗、提云若那、宝思惟等所有翻译，皆召智为证，兼令度语。后至长寿二年癸巳，智于东都佛授记寺自译《观世音颂》一卷。不详所终。有沙门明？者，不知何许人，出家隶业，悉在佛授记寺。尤善毗尼，兼闲经论。天册万岁元年，敕令刊定经目？所专纂录，编次持疑，更与翻经大德二十余人同共参正，号曰《大周经录》焉。智升云：“虽云刊定，繁秽尤多。徒见流行，实难凭准。”盖此录支经别品，杂沓不伦，致为升公之所黜矣。

○周洛京寂友传

释弥陀山，华言寂友，睹货逻国人也。自幼出家，游诸印度，遍学经论，《楞伽》、《俱舍》，最为穷核。志传像法，不吝乡邦，杖锡孤征，来臻诸夏，因与实叉难陀共译《大乘入楞伽经》。又天授中，与沙门法藏等译《无垢净光陀罗尼经》一卷。其经，佛为劫比罗战荼婆罗门说，延其寿命。译毕进内，寻辞帝归乡，天后以厚礼饯之。

卷三

◎译经篇第一之三（正传十四人附见三人）○唐京师总持寺智通传

释智通，姓赵氏，本陕州安邑人也。隋大业中出家受具，后隶名总持寺。律行精明，经论该博。自幼挺秀，即有游方之志，因往洛京翻经馆学梵书并语，晓然明解。属贞观中有北天竺僧赍到《千臂千眼经》梵本，太宗敕搜天下僧中学解者充翻经馆缀文、笔受、证义等。通应其选，与梵僧对译，成二卷。天皇永徽四年，复于本寺出《千臂陀罗尼观世音菩萨咒》一卷、《观自在菩萨随心咒》一卷、《清净观世音菩萨陀罗尼》一卷，共四部五卷。通善其梵字，复究华言，敌对相翻，时皆推伏。又云“行瑜伽秘密教，大有感通”。后不知所终。

○唐京师奉恩寺智严传

释智严，姓尉迟氏，本于阗国质子也，名乐。受性聪利，隶鸿胪寺，授左领军卫大将军上柱国，封金满郡公，而深患尘劳，唯思脱屣。神龙二年五月，奏乞以所居宅为寺，敕允，题

榜曰奉恩是也。相次乞舍官入道，十一月二十四日墨制听许。景龙元年十一月五日，孝和帝诞节剃染。寻奉敕于此寺翻经，多证梵文，诸经成部，严有力焉。严重译出《生无边法门陀罗尼经》。后于石磬谷行头陀法，又充终南山至相寺上座，体道用和，率从清谨。不知其终。

○唐洛京天竺寺宝思惟传

释阿你真那，华言宝思惟，北印度迦湿蜜罗国人，刹帝利种。幼而舍家，禅诵为业。进具之后，专精律品，而慧解超群，学兼真俗，乾文咒术，尤攻其妙。加以化导为心，无恋乡国。以天后长寿二年，居于洛都，敕于天宫寺安置。即以其年创译至中宗神龙景午于佛授记、天宫、福先等寺，出《不空■索陀罗尼经》等七部。睿宗大极元年四月，太子洗马张齐贤等缮写进内。其年六月，敕令礼部尚书晋国公薛稷、右常侍高平侯徐彦伯等详定入目施行。那自神龙之后，不务翻译，唯精勤礼诵，修诸福业。每于晨朝磨香为水，涂浴佛像，后方饮食。从始泊终，此为恒业。衣钵之外，随得随施。后于龙门山请置一寺，制度皆依西域，因名天竺焉。门徒学侶同居此寺，精诚所感，灵应实繁。寿百有余岁，以开元九年终于寺，构塔旌表焉。

○唐洛京长寿寺菩提流志传

释菩提流志，南天竺国人也，净行婆罗门种，姓迦叶氏。年十二，就外道出家，事波罗奢罗，学《声明》、《僧？》等论。历数、咒术、阴阳、讖纬、靡不该通。年

逾耳顺，方乃回心，知外法之乖违，悟释门之渊默，隐居山谷，积习头陀。初依耶舍瞿沙三藏学诸经论，其后游历五天，遍亲讲肆。高宗大帝闻其远誉，挹彼高风，永淳二年，遣使迎接。天后复加郑重，令住东洛福先寺译《佛境界》《宝雨》、《华严》等经，凡十一部。中宗神龙二年，又住京兆崇福寺，译《大宝积经》。属孝和厌代，睿宗登极，敕于北苑白莲池、甘露亭，续其译事，翻度云毕，御序冠诸。其经旧新凡四十九会，总一百二十卷。先天二年四月八日进内，此译场中沙门思忠、天竺大首领伊舍罗等译梵文，天竺沙门波若屈多、沙门达摩证梵义，沙门履方、宗一、慧觉笔受，沙门深亮、胜庄、尘外、无著、怀迪证义，沙门承礼、云观、神灏、道本次文。次有润文官卢粲、学士徐坚、中书舍人苏高、给事中崔璩、中书门下三品陆象先、尚书郭元振、中书令张说、侍中魏知古，儒释二家，构成全美。《宝积》用贤既广，流志运功最多，所嫌者古今共译《一切陀罗尼》末句云“莎祇诃”，皆不窃考清浊，遂使命章有异。或云“萨婆诃”，或云“？幡诃”等，九呼不伦，楷定梵音，悉无本旨。此非梵僧传诵不的，自是执笔之误，故劝莎（桑巴反）祇（无可反）诃（呼个反）为正矣。志开元十二年，随驾居洛京长寿寺。十五年十一月四日，嘱诫弟子五日斋时，令侍人散去，右胁安卧，奄然而卒，春秋一百五十六。帝闻轸悼，敕试鸿胪卿，谥曰《开元一切遍知》三藏。遣内侍杜怀信监护丧事，出内库物，务令优赡。用卤簿羽仪，幡幢花盖，阗塞衢路。十二月一日，迁窆于洛南龙门西北原，起塔，勒石志之。系曰：西域丧礼，其太简乎？或有国王酋长，倾心致重者，勿过舁之火葬。若东夏僧用卤簿导丧车，罕闻之矣。呜呼！道尊德贵，不言而邀，此不其盛欤！

○唐罗浮山石楼寺怀迪传（般若力善部末摩）

释怀迪，循州人也。先入法于南楼寺，其山半在海涯，半连陆岸，乃仙圣游居之灵府也。迪久探经论，多所该通，七略九流，粗加寻究。以海隅之地，津济之前，数有梵僧寓止于此，迪学其书语，自兹通利。菩提流志初译《宝积》，召迪至京证义，事毕南归。后于广府遇一梵僧，赍多罗叶经一夹，请共翻传，勒成十卷，名《大佛顶万行首楞严经》是也。迪笔受经旨，缉缀文理，后因南使附经入京，即开元中也。又乾元元年有铨宾三藏般若力、中天竺婆罗门三藏善部末摩、个失密三藏舍那并慕化入朝，诏以力为太常少卿，末摩为鸿胪少卿，并员外置，放还本土。或云：“各赍经至，属燕赵阻兵，不遑宣译，故以官品荣之。”

○唐京兆慈恩寺寂默传

释牟尼室利，华言寂默。其为人也，神宇高爽，量度真率。德宗贞元九年，发那烂陀寺，拥锡东来。自言从北印度往此寺出家，受戒学法焉。十六年，至长安兴善寺。十九年，徙崇福醴泉寺。复于慈恩寺请行翻译事，乃将奘师梵本，出《守护国界主陀罗尼经》十卷，又进《六尘兽图》。帝悦，檀施极多。元和元年六月十九日，卒于慈恩寺。初默说中天竺摩伽陀国那烂陀寺周围四十八里，九寺一门，是九天王

所造。默在寺日，住者万余，以大法师处量纲任，西域伽蓝无如其高广矣。案《守护国界主经》是般若译，牟尼证梵本，翰林待诏光宅寺智真译语，圆照笔受，鉴虚润文，澄观证义焉。

○唐丘慈国莲华寺莲华精进传

释勿提提羼鱼，华言莲华精进，本屈支城人也，即龟兹国，亦云丘慈，正曰屈支。时唐使车奉朝到彼土，城西门外有莲华寺，进居此中，号三藏绊刍。奉朝至诚祈请，开译梵夹，传归东夏。进允之，遂译出《十力经》，可用东纸三幅成一卷，是佛在舍卫国说。安西境内有前践山，山下有伽蓝，其水滴溜成音可爱，彼人每岁一时采缀其声以成曲调，故《耶婆瑟鸡》，开元中用为羯鼓曲名，乐工最难其杖撩之术。进寺近其滴水也。其经是沙门悟空同《十地回向轮经》共十一卷，赍进。贞元中请编入《藏》，值圆照续录，故述其由。

○唐北庭龙兴寺戒法传

释尸罗达摩，华言戒法也，本于阗人。学业该通，善知华梵，居于是国，为大法师。唐贞元中，悟空回至北庭，其本道节度使杨袭古与龙兴寺僧请法为译主，翻《十地经》。法躬读梵文并译语，沙门大震笔受，法超润文，善信证义，悟空证梵文。又译《回向轮经》，翻传才毕，缮写欲终，遇北庭宣慰中使段明秀事讫回，与北庭奏事官牛昕、安西奏事官程锷等相随入朝，为沙河不通，取回鹘路，其梵夹留北庭龙兴寺藏。赍所译唐本至京，即贞元五载也。法译事方终，却回豁丹，豁丹一云于遁，此皆岭北人之呼召耳，若五印度语云瞿萨怛那，华言乳国，亦云地乳也。

○唐莲华传

释莲华，本中印度人也。以兴元元年杖锡谒德宗，乞钟一口归天竺声击。敕广州节度使李复修鼓铸毕，令送于南天竺金果寺。华乃将此钟于宝军国毗卢遮那塔所安置。后以《华严》后分梵夹附舶来，为信者般若三藏于崇福寺翻成四十卷焉。一云：梵夹本是南天竺乌荼国王书献脂那天子，书云：“手自书写《华严经》百千偈中所说善财童子五十五圣者，善知识入不思议解脱境界普贤行愿品，谨奉进上，愿于龙华会中奉觐云”，即贞元十一年也。至十二年六月，诏于崇福寺翻译，铨宾沙门般若宣梵文，洛京天宫寺广济译语，西明寺圆照笔受，智柔、智通缀文，成都府正觉寺道恒、鉴虚润文，千福寺大通证义，澄观、灵邃详定，神策军护军中尉霍仙鸣、左街功德使窦文场写进，十四年二月解座。

○唐大圣千福寺飞锡传

释飞锡，未知何许人也。神气高邈，识量过人。初学律仪，后于天台法门一心三观

，与沙门楚金栖心研习。天宝初游于京阙，多止终南紫阁峰草堂寺。属不空当途传译，慎选英髦，锡预其数，频登笔受、润文之任。代宗永泰元年四月十五日，奉诏于大明宫内道场同义学沙门良贲等十六人参译《仁王护国般若经》并《密严经》。先得多罗叶时，并是偈颂，今所译者多作散文。不空与锡等及翰林学士柳抗重更详定，锡充证义正员，辞笔不愧斯职也。

系曰：锡外研儒墨，其笔仍长，时多请其论撰，如《忠国师》、《楚金》等碑，与晋陵德宣、吴兴昼公同猎广原，不知鹿死何人之手。然宣锡二公亦有不羁之失，缘饰过其实。如昼公合建中之体，？事得其伦。唯虚与实，不可同日也。

○唐京师大安国寺子邻传

释子邻，姓范氏，兖州乾封大范村人也。父峻朝，不喜三宝，或见桑门，必加咄唾，有问其故，即欲驱焉。邻生已数岁，小字邻儿，见著袈裟者，则生慕羨之意。开元初，东都广爱寺庆修律师游于岱宗，经范氏之舍。邻一见之，喜贯颜色，拜求出家。问曰：“父母云何？”对曰：“不令堂亲知，知则遭捶挞矣。师但先去，某乃影随。”律师行五里间，邻已至矣。及洛寺，受教之易，若甘之受和焉。染削已，或名志邻。至十一年，忽思二亲，辞归宁觐。其父丧明，母终已三载矣。因诣岳庙，求知母之幽趣，即敷坐具，诵《法华经》，誓见天齐王为期。其夜，岳神果召邻问：“何故恳苦如是？”邻曰：“母王氏亡来已经除服，敢问大王：母今胡在？”王顾簿吏，对曰：“王氏见系狱受苦。”邻曰：“我母何罪？”王曰：“生和尚时，食鸡卵，又取白傅头疮，坐是之故，职汝之由。”邻悲号委顿，求王请免。曰：“縶縻有分，放释无门。然则为法师计，请往？山礼阿育王塔，或可原也。”邻诘朝遵途，到句章山寺，叩头哀诉，五轮著地，礼毕投策，至四万数，俄闻有呼邻声，若蔡顺之解，望空见云气中母谢曰：“承汝之力，得生忉利天矣，故来报汝。”倏然不见。邻后求解经论，至于关辅间，外学兼通，美声籍甚。以名僧之选，恒入肃宗内殿应奉，高其舌端，精于捷对，御前口占，叙述皇道，时辈靡及。敕赐紫方袍，充供奉僧。代宗即位，更崇释氏。永泰中，不空重译《仁王护国》、《密严》等经，邻与千福寺法崇、西明寺慧静、保寿寺圆寂分职证义，并良贲润文。邻莫测其终。先所礼塔，今抵山育王寺后峰之翠微茅庵基及井存焉。井实方池，其水碧色，绿苔泛泛然，辞人游者，诗咏绝多矣。

○唐醴泉寺般若传

释般若，罽宾国人也。貌质魁梧，执戒严整，在京师，充义学沙门。宪宗敦崇佛门，深思翻译，奈何有事于蜀部，刘辟阻命，王承宗未平，朝廷多故。至元和五年庚寅，诏工部侍郎归登、孟简、刘伯刍、萧？等就醴泉寺译出经八卷，号《本生心地观》

此之梵夹乃高宗朝师子国所进者，写毕进上。帝览有敕，“朕愿为序”。寻颁下其文，冠于经首，三藏赐帛，证义诸沙门锡赉有差。先于贞元中译《华严经》后分四十卷，此盖乌荼国王所进者，于时而赐紫衣。后大中中，法宝大师玄畅奏请入藏焉。

○唐上都章敬寺悟空传

释悟空，京兆云阳人，姓车氏，后魏拓跋之远裔也。天假聪敏，志尚典坟，孝悌之声，蔼于乡里。属玄宗德被遐方，罽宾国愿附大唐，遣大首领萨婆达奚与三藏舍利越摩于天宝九载来朝阙庭，请使巡按。明年，敕中使张韬光，将国信行官庄吏四十余人西迈。时空未出俗名，奉朝授左卫泾州四门府别将，令随使臣自安西路去。至十二载至健陀罗国，罽宾东都城也，其王礼接唐使。使回，空笃疾，留健陀罗。病中发愿，瘞当出家。遂投舍利越摩落发，号达摩驮都，华言法界，当肃宗至德二年也。泊年二十九，于迦湿弥罗国受具足戒，文殊矢涅地为亲教师，邬不羼提为羯磨阿遮利，耶驮里巍地为教授，于蒙鞞寺讽声闻戒，习根本律仪。然北天竺国皆萨婆多学也。后巡历数年，遍瞻八塔，为忆君亲，因咨本师舍利越摩再三方允。摩手授梵本《十地》、《回向轮》、《十力》三经，共一夹，并佛牙舍利。以赠别空行从北路，至睹货罗国，五十七蕃中有一城，号骨咄国，城东有小海。空行次南岸，地辄摇动，云阴雨暴，霆击雹飞。乃奔就一大树间，时有众商咸投其下。商主告众曰：“谁赍佛舍利异物殊珍耶？不尔，龙神何斯忿怒？有则投于海中，无令众人惶怖。如藏匿者，自贻伊咎。”空为利东夏之故，潜乞龙神宥过。自卯达申，雨雹方霁。回及龟兹，居莲华寺，遇三藏法师勿提提羼鱼，善于传译。空因将《十力经》夹请翻之。寻抵北庭，大使复命。空出梵夹，于阗三藏戒法为译主，空证梵文并度语，翻成《十地回向轮经》。事讫，随中使段明秀以贞元五年己巳达京师，敕于跃龙门使院安置。进上佛牙、舍利、经本，宣付左神策军缮写，功德使窦文场写毕进呈，敕署空壮武将军、试太常卿。乃归章敬寺。次返云阳问二亲，坟树已臧矣。凡所往来，经四十年，于时已六十余。所翻经三本，共十一卷。翻经大德圆照《续开元录》皆编入《藏》，复记空之行状焉。

○唐京师满月传（智慧轮）

释满月者，西域人也。爰来震旦，务在翻传瑜伽法门，一皆贯练。既多神效，众所推钦。开成中，进梵夹，遇伪甘露事去未旋踵，朝廷无复纪纲，不暇翻译。时悟达国师知玄好学声明，礼月为师，情相款密，指教梵字并音字之缘界，《悉曇》八转，深得幽趣。玄曰：“异哉，吾体两方之言，愿参象胥之未，可乎？”因请翻诸禁咒，乃与菩提祇日罗金刚悉地等重译出《陀罗尼集》四卷，又《佛为毗戍陀天子说尊胜经》一卷，详核三复，曲尽佛意。此土先已有《陀罗尼集》十二卷，新翻四卷，未闻入《藏》。月等俱不测其终。次有般若斫迦三藏者，华言智慧轮，亦西域人。大中中，行大曼籊罗法，已受灌顶为阿闍梨，善达方言，深通密语，著《佛法根

本》。宗乎大毗卢遮那，为诸佛所依，法之根本者，陀罗尼是也。至于出生无边法门，学者修戒定慧以总持助成，速疾之要，无以超越。又述《示教指归》，共一千余言，皆大教之铃键也，出弟子绍明，咸通年中刻石记传焉。

论曰：无漏海中，震潮音而可怪；总持言下，书梵字而不常。未闻者闻，闻光音天之余响；未解者解，解最上法之所诠。圣贤饮之为醇醪，凡劣啜之成糟粕。若夫有缘则遇，无道则违。秦狱既械其利防，此无缘也；汉庭肇迎其白马，斯有感焉。听彼异呼，览其横字，情可求而呼相乱，字虽殊而意且同。是故《周礼》有象胥氏通六蛮语，狄鞮主七戎，寄司九夷，译知八狄。今四方之官，唯译官显著者何也？疑汉已来多事北方，故译名烂熟矣。又如周秦轩使者，奏籍通别国方言，令君王不出户庭坐知绝遐异俗之语也。若然者，象胥知其远也，方言知其近也。大约不过察异俗、达远情者矣。懿乎东汉，始译《四十二章经》，复加之为翻也。翻也者，如翻锦绮，背面俱花，但其花有左右不同耳。由是翻译二名行焉。初则梵客华僧，听言揣意，方圆共凿，金石难和，碗配世间，摆名三昧，咫尺千里，覲面难通。次则彼晓汉谈，我知梵说，十得八九，时有差违，至若怒目看世尊、彼岸度无极矣。后则猛、显亲往，奘、空两通，器请师子之膏，鹅得水中之乳，内竖对文王之间，杨雄得绝代之文，印印皆同，声声不别，斯谓之大备矣。逃观道安也，论五失三不易。彦琮也籍其八备，明则也撰翻经仪式，玄奘也立五种不翻，此皆类《左氏》之诸凡，同史家之变例。今立新意，成六例焉。谓译字译音为一例，胡语梵言为一例，重译直译为一例，粗言细语为一例，华言雅俗为一例，直语密语为一例也。初则四句，一译字不译音，即陀罗尼是。二译音不译字，如佛胸前夔字是。三音字俱译，即诸经律中纯华言是。四音字俱不译，如经题上二字是。第二胡语梵言者，一在五天竺，纯梵语。二雪山之北是胡。山之南名婆罗门国，与胡绝，书语不同，从羯霜那国字源本二十余言，转而相生，其流漫广，其书竖读同震旦欤？至吐货罗，言音渐异，字本二十五言，其书横读。度葱岭南，迦毕试国言字同吐货罗，已上杂类为胡也。若印度言字，梵天所制，本四十七言，演而遂广，号《青藏》焉。有十二章，教授童蒙，大成《五明论》，大抵与胡不同。五印度境弥亘既遥，安无少异乎？又以此方始从东汉传译，至于隋朝，皆指西天以为胡国，且失梵天之苗裔，遂言胡地之经书。彦琮法师独明斯致，唯征造录，痛责弥天，符佛地而合《阿含》，得之在我；用胡名而迷梵种，失则诛谁？唐有宣公，亦同鼓唱。自此若闻弹舌，或睹黑容，印定呼为梵僧，雷同认为梵语。琮师可谓忙于执斧捕前白露之蝉，曾在回光照后黄衣之雀。既云西土有梵有胡，何不南北区分，是非料简？致有三失。一改胡为梵，不析胡开，胡还成梵，失也。二不善胡梵二音，致令胡得为梵，失也。三不知有重译，失也。当初尽呼为胡，亦犹隋朝已来总呼为梵，所谓过犹不及也。如据宗本而谈，以梵为主；若从枝末而说，称胡可存。何耶？自五天至岭北，累累而译也，乃疑琮公留此以待今日，亦不敢让焉。三亦胡亦梵，如天竺经律传到龟兹，龟兹不解天竺语，呼天竺为印特伽国者，因而译之。若易解者犹存梵语。如此胡梵俱有者是。四二非句，纯华言是也。第三重译直译者，一直译，如五印夹牒直来东夏译者是。二重译，如经传岭北楼兰、焉耆，不解天竺言，且译为胡语，如梵云邬波陀耶

，疏勒云鹘社，于阗云和尚。又天王，梵云拘均罗，胡云毗沙门是。三亦直亦重，如三藏直赍夹牒而来，路由胡国，或带胡言。如觉明口诵《昙无德律》中有和尚等字者是。四二非句，即赍经三藏虽兼胡语，到此不翻译者是。第四粗言细语者，声明中一苏漫多，谓泛尔平语言辞也，二彦底多，谓典正言辞也。佛说法多依苏漫多，意住于义，不依于文，又被一切故。若彦底多非诸类所能解故。亦名全声者，则言音分明典正，此细语也。半声者，则言音不分明而讹僻，此粗语也。一是粗非细，如五印度时俗之言是。二唯细非粗，如法护、宝云、奘师、义净，洞解声明音律，用中天细语典言而译者是。三亦粗亦细，如梵本中语涉粗细者是。或注云此音讹僻，即粗言也，四二非句阙。第五华言雅俗者，亦云音有楚夏同也。且此方言语，雅即经籍之文，俗乃街巷之说，略同西域。细即典正，粗即讹僻也。一是雅非俗，如经中用书籍言是。二是俗非雅，如经中乞头博颊等语是。二亦雅亦俗，非学士润文，信僧执笔，其间浑金璞玉交杂相投者是。四二非句阙。第六直语密语者，二种作句，涉俗为直，涉真为密，如婆留师是。一是直非密，谓婆留师翻为恶口住，以恶口人人不亲近故。二是密非直，婆留师翻为菩萨所知彼岸也，既通达三无性理，亦不为众生所亲近故。三两亦句，即同善恶真俗，皆不可亲近故。四二非句，谓除前相故。又阿毗持呵娑（目数数得定），郁婆提（目生起拔根弃背）、婆罗（目真实离散乱）此诸名在经论中，例显直密语义也。更有胡梵文字，四句易解。凡诸类例括彼经论，解者不见其全牛，行人但随其老马矣。或曰：“翻梵夹须用此方文籍者，莫招滥涉儒雅之过乎？”通曰：“言不关典，非子史之言，用其翻对，岂可以委巷之谈而糅于中耶？故道安云：‘乃欲以千载上之微言，传所合百王下之末俗’，斯为不易矣。”或曰：“汉魏之际，盛行斯意，致使陈寿《国志》述临儿国云：‘浮屠所载，与中国《老子经》而相出入。盖老子西出关，过西域之天竺，教胡为浮屠。’”“此为见译家用道德二篇中语，便认云与《老子经》互相出入也。设有华人能梵语，与西僧言说，两相允会，可便谓此人为天竺人耶？盍穷其始末乎？是知若用外书，须招此谤。如童寿译《法华》，可谓折中，有天然西域之语趣矣。今观房融润文于《楞严》，僧肇征引而造论，宜当此诮焉。苟参鄙俚之辞，曷异屠沽之谱？然则糅书勿如无书，与其典也，宁俗。傥深溺俗，厥过不轻；折中适时，自存法语，斯谓得译经之旨矣。故佛说法多依苏漫多也。又传译之兴，奉行之意，不明本起，何示将来？今究其宣扬，略陈梗概。夫教者不伦，有三畴类；一显教者，诸乘经律论也（不同瑜伽论中显了教，是多分大乘藏教）；二密教者，《瑜伽灌顶五部护摩三密曼籊罗法》也；（瑜伽隐密教，是多分声闻藏教）；三心教者，直指人心，见性成佛，禅法也。次一法轮者，即显教也，以摩腾为始祖焉。次二教令轮者，即密教也，以金刚智为始祖焉。次三心轮者（义加此轮），即禅法也，以菩提达磨为始祖焉。是故传法轮者以法音传法音；传教令轮者，以秘密传秘密；传心轮者，以心传心，此之三教、三轮、三祖，自西而东，化凡而圣，流十五代（汉、魏、晋、宋、齐、梁、陈、隋、唐、朱梁、后唐、石晋、刘汉、郭周、今大宋），法门之贻厥孙谋，万二千年，真教之克昌厥后。”或曰：“译场经馆，设官分职，不得闻乎？”曰：“此务所司，先宗译主，即赍叶书之三藏明练显密二教者充之。次则笔受者。必言通华梵，学综有空，相问委知，然后下笔。西晋伪秦已来立此员者

，即沙门道含、玄曠、姚嵩、聂承远、父子。至于帝王，即姚兴、梁武、天后、中宗，或躬执翰，又谓为缀文也。次则度语者，正云译语也。传度转令生解，亦名传语，如翻《显识论》，沙门战陀译语是也。次则证梵本者，求其量果，密能证知，能诠不差，所显无谬矣。如居士伊舍罗证译《毗奈耶》梵本是也。至有立证梵义一员，乃明西义得失，贵令华语下不失梵义也。复立证禅义一员，沙门大通充之。次则润文一位，员数不恒，令通内外学者充之。良以笔受在其油素，文言岂无俚俗，傥不失于佛意，何妨刊而正之。故义净译场，则李峤、韦嗣立、卢藏用等二十余人次文润色也。次则证义，盖证已译之文所诠之义也。如译《婆沙论》，慧嵩、道朗等三百人考正文义，唐复礼累场充任焉。次则梵呗，法筵肇后，梵呗前兴，用作先容，令生物善，唐永泰中方闻此位也。次则校勘，讎对已译之文，隋则彦琮覆疏文义，盖重慎之至也。次则监护大使，后周平高公侯寿为总监检校，唐则房梁公为奖师监护，相次许观、杨慎交、杜行縵等充之。或用僧员，则隋以明穆、昙迁等十人监掌翻译事，诠定宗旨。其处则秦逍遥园、梁寿光殿、瞻云馆、魏汝南王宅。又隋炀帝置翻经馆，其中僧有学士之名。唐于广福等寺，或宫园不定。又置正字字学，玄应曾当是职，后或置或否。朝廷罢译事，自唐宪宗元和五年至于周朝，相望可一百五十许岁，此道寂然。迨我皇帝临大宝之五载，有河中府传显密教沙门法进请西域三藏法天译经于蒲津，州府官表进，上览大悦，各赐紫衣，因敕造译经院于太平兴国寺之西偏。续敕搜购天下梵夹，有梵僧法护、施护同参其务，左街僧录智照大师慧温证义。又诏沧州三藏道圆证梵字，慎选两街义解沙门志显缀文，令遵、法定、清沼笔受，守岌、道真、知逊、法云、慧超、慧达、可瑰、善祐、可支证义，伦次缀文，使臣刘素、高品王文寿监护，礼部郎中张洎、光禄卿汤悦次文润色，进《校量寿命经》、《善恶报应经》、《善见变化》、《金曜童子》、《甘露鼓》等经，有命授三藏天息灾、法天、施护师号，外试鸿胪少卿、赐厩马等。笔受证义诸沙门各赐紫衣并帛有差。

御制新译经序，冠于经首。观其佛日重光，法轮发轳，赤玉箱而启秘，青莲朵以开芳，圣感如然，前代孰堪比也。又以宣译之者乐略乐繁，隋之已前，经题简少；义净已降，经目偏长。古则随取强名，后则繁尽我意。又旧翻秘咒，少注合呼。唐译明言，多详音反，受持有验，斯胜古踪。净师大译诸经，偏精《律部》，自高文彩，最有可观。金刚智也秘藏祖师，阿目？也多经译匠，师资相接，感应互彰。无畏言辞且多朴实。觉救加佛顶之句，人无间然。日照出显识之文，刃有余地。思惟《■索》，学喜《华严》，密语断章，大人境界。流志《宝积》，菩提曼荼，华胥之理致融明，灌顶之风标秘邃，迪公勤其笔受，般若终乎译常其余诸公，皆翻夹牒，欲知状貌，聊举喻言。其犹人也，人皆人也，奈何姿制形仪，各从所肖，肖其父焉。若如此，大则同而小有异耳。良由译经是佛法之本，本立则道生。其道所生，唯生释子，是以此篇冠首。故曰先王将海，必先有事于河者，示不忘本也。”

卷四

◎义解篇第二之一（正传二十人附见七人）○唐京兆大慈恩寺窥基传

释窥基，字洪道，姓尉迟氏，京兆长安人也。尉迟之先与后魏同起，号尉迟部，如中华之诸侯国，入华则以部为姓也。魏平东将军说六代孙孟都生罗迦，为隋代州西镇将，乃基祖焉。考讳宗，唐左金吾将军松州都督江由县开国公。其鄂国公德则诸父也，《唐书》有传。基母裴氏梦掌月轮吞之，寤而有孕。及乎盈月诞弥，与群儿弗类，数方诵习，神晤精爽。奘师始因陌上见其眉秀目朗，举措疏略，曰：“将家之种，不谬也哉。脱或因缘相扣，度为弟子，则吾法有寄矣。”复念在印度时计回程次，就尼闍子边占得卦甚吉，“师但东归，哲资生矣”。遂造北门将军，微讽之出家。父曰：“伊类粗悍，那胜教诏？”奘曰：“此之器度，非将军不生，非某不识。”父虽然诺，基亦强拒。激勉再三，拜以从命，奋然抗声曰：“听我三事，方誓出家。不断情欲，荤血、过中食也。”奘先以欲勾牵，后令入佛智，佯而肯焉。行驾累载前之所欲，故关辅语曰“三车和尚”。即贞观二十二年也。一基自序云：“九岁丁艰，渐疏浮俗。”若然者，三车之说，乃厚诬也。至年十七，遂预缁林。及乎入法，奉敕为奘师弟子，始住广福寺。寻奉别敕选聪慧颖脱者入大慈恩寺，躬事奘师，学五竺语，解纷开结，统综条然。闻见者无不叹伏。凡百识度跋渠，一览无差，宁劳再亿。年二十五，应诏译经，讲通大小乘教三十余本。创意留心，勤勤著述，盖切问而近思，其则不远矣。造《疏》计可百本。奘所译《唯识论》，初与窾、尚、光四人同受，润色、执笔、检文、纂义，数朝之后，基求退焉。奘问之，对曰：“夕梦金容，晨趋白马，虽得法门之糟粕，然失玄源之醇粹，某不愿立功于参？。若意成一本，受责则有所归。”奘遂许之。以理遣三贤，独委于基，此乃量材授任也。时随受撰录所闻，讲周疏毕。无何，西明寺测法师亦俊朗之器，于《唯识论》讲场得计于闾者，赂之以金，潜隐厥形，听寻联缀，亦疏通论旨。犹数座方毕，测于西明寺鸣椎集僧，称讲此论。基闻之，惭居其后，不胜怅快。奘勉之曰：“测公虽造《疏》，未达因明。”遂为讲陈那之论，基大善三支，纵横立破，述义命章，前无与比。又云，请奘师唯为己讲《瑜伽论》，还被测公同前盗听，先讲。奘曰：“五性宗法，唯汝流通，他人则否。”后躬游五台山，登太行，至西河古佛宇中宿，梦身在半山，岩下有无量人唱苦声，冥昧之间，初不忍闻。徙步陟彼层峰，皆琉璃色，尽见诸国土。仰望一城，城中有声曰：“住住，咄，基公未合到此。”斯须，二天童自城出，问曰：“汝见山下罪苦众生否？”答曰：“我闻声而不见形。”童子遂投与剑一镡曰：“剖腹当见矣。”基自剖之，腹开，有光两道晖映山下，见无数人受其极苦。时童子入城，持纸二轴及笔投之，捧得而去。及旦，惊异未已。过信夜，寺中有光久而不灭，寻视之，数轴发光者，探之，得《弥勒上生经》。乃忆前梦，必慈氏令我造《疏》通畅厥理耳。遂援毫次，笔锋有舍利二七粒而陨，如吴含桃许大，红色可爱。次零然而下者，状如黄粱粟粒。一云，行至太原传法，三车自随，前乘经论箱帙，中乘自御，后乘家妓女仆食馔。于路间遇一老父，问乘何人。对曰：“家属。”父曰：“知法甚精，携家属偕，恐不称教。基闻之，

顿悔前非，赧然独往。老父则文殊菩萨也。此亦厄语矣。随奘在玉华宫参译之际，三车何处安置乎？基随处化徒，获益者众。东行博陵，有请讲《法华经》，遂造《大疏》焉。及归本寺，恒与翻译旧人往还。屡谒宣律师。宣每有诸天王使者执事，或冥告杂务。尔日基去方来，宣怪其迟暮，对曰：“适者大乘菩萨在此，善神翼从者多，我曹神通为他所制故尔。”以永淳元年壬午示疾，至十一月十三日长往于慈恩寺翻经院，春秋五十一，法腊无闻。葬于樊村北渠，纡三藏奘师莹陇焉。弟子哀恸，余外执紼会葬，黑白之众盈于山谷。基生常勇进，造弥勒像，对其像日诵《菩萨戒》一遍，愿生兜率，求其志也。乃发通身光瑞，烂然可观。复于五台造玉石文殊菩萨像，写金字《般若经》毕，亦发神光焉。弟子相继取基为折中，视之如奘在焉。大和四年庚戌七月癸酉，迁塔于平原，大安国寺沙门令俭检校塔亭，徙棺，见基齿有四十根不断玉如众弹指言是佛之一相焉。凡今天下佛寺图形，号曰百本疏主真，高宗大帝制赞。一云玄宗。然基魁梧堂堂，有桓赳之气，而慈济之心，诲人不倦，自天然也。其符彩则项负玉枕，面部宏伟，交手十指若印契焉。名讳上字多出没不同者，为以《慈恩传》中云，奘师龙朔三年于玉华宫译《大般若经》终笔，其年十一月二十二日令大乘基奉表奏闻，请御制序。至十二月七日通事舍人冯义宣由，此云灵基，《开元录》为“窥基”，或言“乘基”，非也。彼曰大乘基，盖慧立、彦惊不全斥，故云大乘基，如言不听泰耳，犹谨遣大乘光奉表同也。今海内呼慈恩法师焉。

系曰：性相义门，至唐方见大备也。奘师为《瑜伽》、《唯识》开创之祖，基乃守文述作之宗。唯祖与宗，百世不除之祀也。盖功德被物，广矣大矣。奘苟无基，则何祖张其学乎？开天下人眼目乎？二师立功与言，俱不朽也。然则基也，鄂公犹子，奘师门生，所谓将家来为法将，千载一人而已。故《书》有之，厥父菑，厥子乃肯播，矧能肯获”，其百本疏主之谓欤！

○唐京师西明寺道世传

释道世，字玄暉，姓韩氏，厥先伊阙人也。祖代因官为京兆人焉。生且渥润，渐而聪敏，俄厌众沙，思参救蚁。二亲钟爱，遏绝其请，久而遂心。时年十二，于青龙寺出家，从执德瓶，止临欣鉴，律宗研核，书籍钻寻，特慕上乘融明实性。于时籍甚，三辅钦归。显庆年中，大帝以玄奘师所翻经论，未几诏入内，及慈恩寺大德更代行道，不替于时，世亦预其眩及为皇太子造西明寺，爰以英博召入斯寺，时道宣律师当涂行律，世且旁敷，同驱五部之车，共导三乘之轨，人莫我及，道望芬然。复因讲贯之余，仍览甚深之藏。以为古今绵代，制作多人，虽雅趣佳辞，无足于传记。由是摭文囿之菁华，嗅大义之瞻亘，以类编录，号《法苑珠林》，总一百篇，勒成十帙。始从劫量，终乎杂记，部类之前，各序别论。令学览之人，就门随部，检括所知，如提纲焉，如举领焉。世之用心周乎十稔，至总章元年毕轴，兰台郎李俨为之都序，此文行于天下。又著《善恶业报》及《信福论》共二十三卷，《大小乘禅门观》及《大乘观》共十一卷，《受戒仪式》《礼佛仪式》共六卷，《四分律

讨要》五卷、《四分律尼钞》五卷、《金刚经集注》三卷，十部都一百五十三卷。世颇多著述，未测其终。名避太宗庙讳，多行字耳，故时称玄懔焉。

○唐京兆大慈恩寺普光传

释普光，未知何许人也。明敏为性，爰择其木，请事三藏奘师。勤恪之心，同列靡及。至于智解，可譬循环，闻少证多，奘师默许。未参传译，头角特高，左右三藏之美，光有功焉。初，奘嫌古翻《俱舍》，义多缺然，躬得梵本，再译真文，乃密授光，多是记忆西印萨婆多师口义。光因著《疏》解判。一云其《疏》至圆晖略之为十卷，如汉之有沱欽？又尝随奘往玉华宫译《大般若经》，厥功出乎裨赞也，时号大乘光。观夫奘自贞观十九年创译，讫麟德元年，终于玉华宫，凡二十载，总出大小乘经律论七十五部一千三百三十五卷，十分七八是光笔受，或谓嘉光、普光也。若验从辩机同参译务，即普光是也。

○唐京兆大慈恩寺法宝传（胜庄）

释法宝，亦三藏奘师学法之神足也。性灵敏利，最所先焉。奘初译《婆沙论》毕，宝有疑情，以非想见惑，请益之。奘别以十六字入乎论中，以遮难辞。宝白奘曰：“此二句四句为梵本有无？”奘曰：“吾以义意酌情作耳。”宝曰：“师岂宜以凡语增加圣言量乎？”奘曰：“斯言不行，我知之矣。”自此■？颉颃于奘之门，至乎六离合释义，俱舍宗以宝为定量矣。光师往往同迦湿弥罗余师礼记衍字也。时光、宝二法师若什门之融睿焉。后越精义学，令问孔胶。长安三年，于福先寺、京西明寺预义净译场，宝与法藏胜庄等证义，于时颇露头角，莫之与京欤。

○唐京师西明寺圆测传（薄尘灵辩）

释圆测者，未详氏族也。自幼明敏，慧解纵横。三藏奘师为慈恩基师讲新翻《唯识论》，测略守门者隐听，归则缉缀义章。将欲罢讲，测于西明寺鸣钟召众，称讲《唯识》。基嫌其有夺人之心，遂让测讲训。奘讲《瑜伽》，还同前盗听受之，而亦不后基也。迨高宗之末，天后之初，应义解之选，入译经馆，众皆推挹。及翻《大乘显识》等经，测充证义，与薄尘、灵辩、嘉尚攸方其驾。所著《唯识疏钞》，详解经论，天下分行焉。

○唐京师安国寺元康传

释元康，不详姓氏。贞观中游学京邑，有彭亨之誉。形拥肿而短，然其性情酋勇，闻少解多，群辈推许。先居山野，恒务持诵《观音》，求加慧解，遂感鹿一首角分八歧，厥形绝异。康见之，抚而驯伏，遂豢养之，乘而致远曾无倦色。以《三论》之文荷之于背，又以小轴系之于尾，曳入上都，意为戏弄：说有之徒不达空性，我

与轻轴碾之，令悟真理。又衣大布，曳纳播，戴竹笠，笠宽丈有二尺。装饰诡异，人皆骇观。既入京城，见一法师盛集讲经化导。康造其筵，近其座，便就所讲义申问，往返数百言，人咸惊康之辩给如此。复戏法师曰：“甘桃不结实，苦李压低枝。”讲者曰：“轮王千个子，巷伯勿孙儿。”盖讥康之无生徒也。康曰：“丹之藏者赤，漆之藏者黑，随汝之赤者非纁熏绛焉，入汝之黑者非铅墨焉。”举众皆云：“辞理涣然，可非垂迹之大士也？”帝闻之，喜曰：“何代无其人！”诏入安国寺讲此《三论》。遂造疏，解中观之理。别撰《玄枢》两卷，总明《中》、《百门》之宗旨焉。后不测其终。系曰：康师曳纳播者何？通曰：“梵言立播，华言裹腹衣，亦云抱腹，形制如偏袒，一幅才穿得手，肩袖不宽。著在左边，右边施带，多贮绵絮。然是御寒之服，热国则否，用此亦圣开。流于东土，则变成色帛，而削幅缀于左右袖上，垂之制曳然，旌表我通赡经论。一本则曳一支，多则多曳。未知稽古自何人始乎？今单言播，略立字耳，全非御寒之意，翻为我慢之衣。既失元端，而多滥作，别形圣教以俟后贤，此外无施异制以乱大伦。《诗》曰：服之不称，身之灾也，吁！”

○唐简州福聚寺靖迈传

释靖迈，梓潼人也。少孺褻持，长高志操，特于经论研核造微。气性沉厚，不妄交结，游必择方，抵于京辅。贞观中，属玄奘西回，敕奉为太穆太后于京造广福寺，就彼翻译。所须吏力，悉与玄龄商量，务令优给。遂召证义大德谙练大小乘经论为时所尊尚者，得一十一人，迈预其精选，即居慈恩寺也。同普光寺栖玄、广福寺明？、会昌寺辩机、终南山丰德寺道宣同执笔缀文，翻译《本事经》七卷。迈后与神窻笔受于玉华宫及慈恩寺翻经院，皆推适变，故得经心矣。后著《译经图纪》四卷，铨序古今经目、译人名位、单译、重翻、疑伪等科，一皆条理，见编于《藏》。开元中，智升又续其题目焉。

○唐新罗国顺规传

释顺规者，浪郡人也，本土之氏族，东夷之家系，故难详练。其重译学声教，盖出天然。况乎因明之学，奘师精研，付授华僧，尚未多达，规之克通，非其宿殖之力，自何而至于是欤？传得奘师真唯识量，乃立决定相违不定量。于乾封年中因使臣入贡附至。于时奘师长往向及二年。其量云：“真故极成色，定离眼识，自许初三摄，眼所不摄故，犹如眼根。”良以三藏隐密周防，非大智不明。规为宗云：“不离于眼识，自许初三摄，眼所不摄故，犹如眼识也。”如此善成他义。时大乘基览此作，便见规所不知。虽然，终仰边僧识见如此，故叹之曰：“新罗顺规法师者，声振唐蕃，学包大小，业崇迦叶，唯执行于杜多，心务薄拘，恒驰声于少欲。”既而蕴艺西夏，传照东夷，名道日新，缙素钦揖。虽彼龙象不少，海外时称独步，于此量作决定相，违基师念。远国之人有兹利慧，搪突奘师，暗中机发，善成三藏之义，惜哉！规在本国稍多著述，亦有传来中原者，其所宗，法相大乘了义教也。见

《华严经》中始从发心便成佛已。乃生谤毁不信。或云：“当启手足，命弟子辈扶掖下地，地则徐裂，规身俄坠。”时言生身陷地狱焉。于今有坑，广袤丈余，实坎？然，号“顺规捺落迦也。”

系曰：曲士不可以语道者，束其教也。是故好白者以黑为污，好黑者以白为污焉。规怒心尤重，猛利业增如射箭，顷堕在地狱，列高僧品次，起秽以自臭邪通曰：“难信之法易速谤诮，谤诮岂唯一人乎？俾令众所知识者直陷三涂，乃知顺规真显教菩萨也。况乎赵盾为法受恶，菩萨乃为法亡身。斯何足怪？君不见尼蓼外道一一谤佛，而独使提婆生陷，后于法华会上受记作佛，静言思之。”

○唐京兆大慈恩寺嘉尚传

释嘉尚，未知何许人也。慧性天资，瑰奇气质，篇聚坚守，性相克攻，勤在进修，务于翻译。远栖心于奘三藏门，见宗庙之富，窥室家之好。久稽考《瑜伽师地》、《佛地论旨》、《成唯识论》，深得义趣。随奘于玉华宫译《大般若经》，充证义缀文，多能杰出。及三藏有疾，命尚具录所翻经论合七十五部，总一千三百三十五卷。又录俱胝画像一千帧，造十俱胝像，写经放生燃灯，令尚宣读。奘合掌欢喜曰：“吾心中愿也，汝代导之，得没而无悔焉。”奘卒，著述疏钞出杂集，义门夥多。天后朝同薄尘、灵辩等预译场证义，功绩愈繁。尚初侍奘师在玉华宫翻经，至初会《严净佛土品》，说诸佛菩萨以神通愿力盛大千界上妙珍宝诸妙香花及意乐所生五尘妙境供养庄严说法处，与寺主慧德夜睹玉华寺内广博严净，伎乐盈满。又闻三堂讲法。明日白奘，欢喜符合。尚不知所终。

○唐淄州慧沼传（大愿尘外）

释慧沼，不知何许人也。少而警慧，始预青衿，依于庠序，诵习该通。入法修身，不违戒范，乃被时谚沼阁梨焉。次攻坚于经论，善达翻传。自奘三藏到京，恒窥壶奥。后亲大乘基师，更加精博。及菩提流志于崇福寺译《大宝积经》，沼预其选，充证义，新罗、胜庄法师执笔，沙门大愿、尘外皆一时英秀，当代象龙。于时武平一充使，卢藏用、陆景初总预斯常中书侍郎崔湜因行香至翻经院，叹曰：“清流尽在此矣，岂应见隔？”因奏请乞同润色新经。初，沼证义于义净译场，多所刊正，讹言舛义，悉从指定，无敢逾制。后著诸《疏》义，号淄州沼也。

○唐京兆大慈恩寺彦惊传

释彦惊，未知何许人也。贞观之末，观光上京，求法于三藏法师之门。然其才不迨光、宝，偏长缀习学耳。于玄儒之业，颇见精微。辞笔之能，殊超流辈。有魏国西寺沙门慧立性气■？，以护法为己任，著《传》五卷，专记三藏自贞观中一行盛化及西域所历夷险等，号《慈恩传》，盖取寺题也。及削藁云毕，虑遗诸美，遂藏于

地穴。至疾亟，命门徒掘土出之而卒。其本数年流散他所，搜购乃获。弟子等命惊排次之，序引之，或文未允，或事稍亏，重更申明，曰《笺述》是也，乃象郑司农笺毛之诂训也。或有调之曰：“子与隋彦琮相去几何？”对曰：“赐也何敢望回，虽长卿慕蔺，心宗慕于玉宗，故有以也。《诗》曰：‘言念君子，温其如玉’，自许亦颜之士也。”或人许焉。惊不知终所。

○唐新罗国义湘传

释义湘，俗姓朴，鸡林府人也。生且英奇，长而出离，逍遥入道，性分天然。年临弱冠，闻唐土教宗鼎盛，与元晓法师同志西游，行至本国海门唐州界，计求巨舰，将越沧波。倏于中涂遭其苦雨，遂依道旁土龕间隐身，所以避飘湿焉。迨乎明旦相视，乃古坟骸骨旁也。天犹墨霖，地且泥涂，尺寸难前，逗留不进。又寄埏埴之中，夜之未央，俄有鬼物为怪。晓公叹曰：“前之寓宿，谓土龕而且安；此夜留宵，托鬼乡而多祟。则知心生故种种法生，心灭故龕坟不二。又三界唯心，万法唯识。心外无法，胡用别求？我不入唐。”却携囊返国，湘乃只影孤征，誓死无退。以总章二年附商船达登州岸，分卫到一信士家，见湘容色挺拔，留连门下既久，有少女丽服靓妆，名曰善妙，巧媚诲之，湘之心石不可转也。女调不见答，顿发道心于前，矢大愿言：“生生世世归命和尚，习学大乘，成就大事，弟子必为檀越供给资缘。”湘乃径趋长安终南山智俨三藏所，综习《华严经》。时康藏国师为同学也。所谓知微知章，有伦有要。德瓶云满，藏海嬉游，乃议回程，传法开诱。复至文登旧檀越家，谢其数稔供施，便慕商船，逡巡解缆。其女善妙预为湘办集法服并诸什器，可盈篋笥，运临海岸。湘船已远，其女咒之曰：“我本实心供养法师，愿是衣篋跳入前船言讫，投篋于骇浪。有顷，疾风吹之若鸿毛耳，遥望径跳入船矣。其女复誓之：“我愿是身化为大龙，扶翼舳舻，到国传法。”于是攘袂投身于海，将知愿力难屈，至诚感神，果然伸形夭矫或跃，蜿蜒其舟底，宁达于彼岸。湘入国之后，遍历山川，于驹丽、百济风马牛不相及地，曰：“此中地灵山秀，真转法轮之所。”无何，权宗异部聚徒可半千众矣。湘默作是念，大《华严》教，非福善之地不可兴焉。时善妙龙恒随作护，潜知此念，乃现大神变于虚空中，化成巨石，纵广一里，盖于伽蓝之顶，作将堕不堕之状。群僧惊骇，罔知攸趣，四面奔散。湘遂入寺中，敷阐斯经，冬阳夏阴，不召自至者多矣。国王钦重，以田庄奴仆施之。湘言于王曰：“我法平等，高下共均，贵贱同揆。《涅槃经》八不净财，何庄田之有？何奴仆之为？贫道以法界为家，以孟耕待稔，法身慧命籍此而生矣。”湘讲树开花，谈丛结果，登堂睹奥者则智通、表训、梵体、道身等数人，皆啄巨絜飞出迦留罗鸟焉。湘贵如说行，讲宣之外，精勤修练，庄严刹海，靡憚暄凉。又常行义净洗秽法，不用巾帨，立期干燥而止。持三法衣，瓶钵之余，曾无他物。凡弟子请益，不敢造次，伺其怡寂而后启发，湘乃随疑解滞，必无滓核。自是已来，云游不定，称可我心，卓锡而居。学侣蜂屯，或执笔书绅，怀铅札叶，抄如结集，录似载言，如是义门随弟子为目，如云《道身章》是也。或以处为名，如云《锥穴问答》等数章。《疏》皆明《华严》性海毗卢遮那无边契经义例也。湘终于本国，塔亦存焉，号海

东华严初祖也。

○唐京兆大慈恩寺义忠传

释义忠，姓尹氏，潞府襄垣人也。年始九岁，宿殖之性，志愿出家，得淄州沼阁梨为师，若凤巢中之生宛鸟雏也。少秉奇操，慧解不伦。沼授与《大涅槃经》，时十三岁矣。相次诵彻四十卷，众皆惊骇，号空门奇童也。二十登戒，学《四分律》，义理淹通。旁习《十二门论》二本，即当讲演。沼师知是千里之骏，学恐失时，闻长安基师新造疏章，门生填委，声振天下。乃师资相将，同就基之讲肆，未极五年，又通二经五论，则《法华》、《无垢称》及《百法》、《因明》、《俱舍》《成唯识》、《唯识道》等也。由兹开奖，弟子繁多，讲树别茂于枝条，义门旁开于关窍，乃著《成唯识》、《论纂要》、《成唯识论钞》三十卷、《法华经钞》二十卷、《无垢称经钞》二十卷。《百法论疏》最为要当，移解二无我归后，是以掩慈恩之繁，于今盛行勿过忠本。所谓列群玉，贯众花，玉装琼树之林，花缀蜀机之锦。辈流首伏，声彩悠扬。况基师正照于太阳，忠也旁銜于龙烛，四方美誉，千里归心者，不可胜算矣。传持靡怠，仅五十余年，计讲诸教七十许遍。至年七十二，忽起怀土之心，归于昭义，示同初夏诵戒行道。每一坐时，面向西北，仰视兜率天宫，冥心内院，愿舍寿时得见天主，永离凡浊，终得转依。一日，晨兴澡洗讫，整肃容仪，望空礼拜，如有哀告之状。少顷，结加趺坐，嘱付流通教法之意毕，忽异香满室，彩云垂空。忠合掌仰视曰：“秽弱比丘，何烦大圣躬来引接？”言尽而化。乡人道俗建塔供养，全身不坏，至今河东乡里高冈存焉。

○唐新罗国黄龙寺元晓传（大安）

释元晓，姓薛氏，东海湘州人也。卅{彭采}之年，惠然入法，随师稟业，游处无恒。勇击义围，雄横文阵，屹屹然，桓桓然，进无前却，盖三学之淹通，彼土谓为万人之敌，精义入神，为若此也。尝与湘法师入唐，慕奘三藏慈恩之门，厥缘既差，息心游往。无何，发言狂悖，示迹乖疏，同居士入酒肆倡家，若志公持金刀铁锡，或制疏以讲杂华，或抚琴以乐祠宇，或闾阎寓宿，或山水坐禅，任意随机，都无定检。时国王置百座仁王经大会，遍搜硕德，本州以名望举进之。诸德恶其为人，潜王不纳。居无何，王之夫人脑婴痈肿，医工绝验，王及王子臣属祷请山川灵祠，无所不至。有巫覡言曰：“苟遣人往他国求药，是疾方瘳。”王乃发使泛海入唐，募其医术。溟涨之中，忽见一翁由波涛跃出登舟，邀使人入海，睹宫殿严丽，见龙王。王名钤海谓使者曰：“汝国夫人是青帝第三女也，我宫中先有《金刚三昧经》，乃二觉圆通示菩萨行也。今托仗夫人之病，为增上缘，欲附此经出彼国流布耳。”于是将三十来纸重沓散经付授使人。复曰：“此经渡海中，恐罹魔事。”王令持刀裂使人膈肠，而内于中，用蜡纸缠滕，以药傅之，其膈如故。龙王言“可令大安圣者铨次缀缝，请元晓法师造疏讲释之，夫人疾愈无疑。假使雪山阿伽陀药力亦不过是。”龙王送出海面，遂登舟归国。时王闻而欢喜，乃先召大安圣者粘次焉。大安

者，不测之人也，形服特异，恒在市廛，击铜钵唱言“大安大安”之声，故号之也。王命安，安云“但将经来”不愿入王宫阙。安得经，排来成八品，皆合佛意。安曰：“速将付元晓讲，余人则否。”晓受斯经，正在本生湘州也，谓使人曰：“此经以本始二觉为宗，为我备角乘，将案几，在两角之间置其笔砚。”始终于牛车造《疏》，成五卷。王请日于黄龙寺敷演，时有薄徒窃盗新《疏》，以事白王，延于三日，重录成三卷，号为《略疏》。洎乎王臣道俗云拥法堂，晓乃宣吐有仪，解纷可则，称杨弹指，声沸于空。晓复昌言曰：“昔日采百椽时，虽不预会。今朝横一椽处，唯我独能。”时诸名德俯颜惭色，伏膺忏悔焉。初晓示迹无恒，化人不定，或掷盘而救众，或匍水而扑焚，或数处现形，或六方告灭，亦杯渡、志公之伦欤？其于解性，览无不明矣。《疏》有广略二本，俱行本土。略本流入中华，后有翻经三藏改之为论焉。

系曰：海龙之宫自何而有经本耶？通曰：经云龙王宫殿中有七宝塔，诸佛所说诸深义，别有七宝篋满中盛之，谓《十二因缘》、《总持三昧》等。良以此经合行世间，复显大安、晓公神异，乃使夫人之疾为起教之大端者也。

○周京兆崇福寺神楷传（明恂）

释神楷，姓郭氏太原人也，即汉末林宗之后。世袭冠裳，后随父宦于秦，为京兆人也。昆弟六人，楷居其季。幼而聪敏，立志弗群，不乐浮荣，誓求剪落，礼明恂法师为弟子，即大乘恂也，洎乎年满受具，于经论义理，大小该通，耳闻口诵，譬鲜之易染。遂讲《摄大乘》、《俱舍》等论，颖悟辈流罕有齐驾。后因讲《净名经》，见古师判处，喟然叹曰：“美则美矣，未尽善也。”乃于安陆白赵山撰《疏》，一云在越州剡石城寺述作素有巧性，于剡溪南岩之下，映水塑貌。今有池，已涸矣，岩下石隙缝间幽暗，然中有木棺者，云是楷殡于此。游人下窥，历历皆睹。又言楷因慈恩、西明等寺度公王出家，及翻经论，敕诸道高行才学僧并赴京师，遂应诏而入，配居崇业寺。至天后朝，方行其《疏》。后卒于此寺，弟子迁塔于南逍遥园焉，实大乘基之法门犹子也。

系曰：楷师遗迹，何京兆、剡溪二处？孰是？令人疑惑，若两家之俱见犇训焉。此乃古人名显于四方，因子孙南北迁徙，追念先宗，遂有侨置焉。如晋氏渡江，衣冠之家多立祖先之遗迹同也。若然者，剡则是楷曾游历之地也。

○周京兆广福寺会隐传

释会隐，不详何许人也。精明之气，绰有盈余，处于等夷，若鸡群之见鹤也。天皇帝朝慎选高学名德，隐膺斯眩麟德二年敕北门西龙门修书所，同与西明寺玄则等十人于一切经中略出精义玄文三十卷，号《禅林要钞》，书成奏呈，敕藏秘阁。隐亦尝预翻译，玄则颇闻著述，高宗朝斯为龙象之最焉。

○周虎丘山寺僧瑗传

释僧瑗，字辩空，姓郁氏，高平昌邑人也。姬水疏源，狼亭袭庆，鲁相继昌侯之业，历载弥光；少传纂尚书之风，清尘不昧。瑗夙殖奇颖，早擅嘉祥，母赵氏娠孕之日，侧侍圣贤浮空游乐。及年六岁，随母入舍利塔，见圣僧像，欣然跳跃，状若旧交，因启母出家。母以其尚幼，抑而未许。至年十三，方遂其志，依虎丘寺慧严法师为弟子。谦揖之操，出自生知；辩慧之能，业称上首。以龙朔二年奉敕剃剪，冥符所应，还隶此山。暨严公长往，乃依慧谔禅师受具足戒，听常乐寺聪法师《三论》，甚深无相，疑滞豁除，方便解脱，怡然独悟。因智从心证，遂诣江宁融禅师求学心法。摄念坐禅，众魔斯伏；勤行精进，猛兽恒驯。是以名称普闻，声光八绝，旗亭趋利，削迹无践。冬夏不易，常披一纳。或滴水以充于夕渴；或数粒将济于朝饥；或风雪凛凛，礼诵无替于六时；或炎暑纷々，经行不亏于少暄。称扬叹美，容色湛如；毁辱诃骂，欢喜而受。每荫以长松，属思鸿远。清泉独坐，映定水以雕文，虚室高栖，蔼禅枝而荡虑。撰《武丘名僧苑》一卷、《注郁子》两卷、《文集》三卷，盖道俗之仪表，人物之师范焉。永昌元年十二月二十日见身有疾，谓弟子曰：“吾闻尸所到处，便为秽恶，出就别方，乃称离罪尔。”门弟子等迎止于通波亭北静志庄，忽闻异香从空而下。瑗遗训勤切，正观叮咛，灭后可依外国法。言讫合掌而终，春秋五十有一。缁素奔恸，咸悲眼灭。弟子僧义玄及雉山县尉檀信等同遵师旨，如法阖维，收其舍利，于寺建塔，勒铭于所。

○唐会稽山妙喜寺印宗传

释印宗姓印氏，吴郡人也。母刘氏始娠，邻家咸见一沙门端雅，徐步入印舍，白刘曰：“愿为子焉。”母梦同此，再三陈让，不克。父梦有馈繖檀香木，童子跪授付刘。刘顿厌荤膻，俗间食味膈在唇吻之外。及生而长，从师诵通经典，末最精讲者《涅槃经》。咸亨元年在京都，盛扬道化。上元中，敕入大爱敬寺居，辞不赴，请于蕲春东山忍大师谘受禅法。复于番禺遇慧能禅师。问答之间，深诣玄理。还乡地，刺史王胄礼重殊伦，请置戒坛，命宗度人，可数千百。续敕召入内，乃造慈氏大像。所著《心要集》，起梁至唐，天下诸达者语言总录焉。又奉敕江东诸寺院天柱、报恩各置戒坛度人。又纂百家诸儒士三教文意表明佛法者，重结集之。手笔逾高，著述流布。至先天二年二月二十一日示终，嘱循轮王法葬之，年八十七。会稽王师乾立《塔铭》焉。

○唐太原府崇福寺宗哲传

释宗哲，西河平遥人也。稚岁而有奇相，聪颖天资，既寻师范，砥节饰躬。属玄奘三藏新翻诸经论，哲就其门，请益无替，凡几周星，备穷诸典，若指于掌，于奘门下号为得意哲，犹隋慧布之题目焉。后因讲唱，厥义日新，时谓之为“法江”。哲曰：“为吾谢此品藻焉，殊不知法海在乎太原矣。”所指者盖浮丘为沧溟也。哲悯

学者不达其意而师，悖哉，乃著义例，寰海之内莫不企羡。其如说佛位三事喻中，沼法师言三点三目，强分上下，胜劣配属，太成巧诬。哲云三事俱得。然无名师品量。退而省之，哲其得矣。号之“得意”岂虚也乎！沼师所以成余师之说也。

○唐洛京佛授记寺德感传

释德感，姓侯氏，太原人也。仪容瑰丽，学业精赡，众典服勤，于《瑜伽论》特振声彩。天皇大帝征为翻经大德。又与胜庄、大仪等同参义净译场，对扬受赐，言谢浏亮。帝悦，寻授封昌平县开国公，累井田至三千户。帝为赞曰：“河汾之宝，山岳之英，早祛俗累，夙解尘纓。缁门仰德，紺宇驰声。式亚龙树，爰齐马鸣。”为时君之所贵，为若此也。御制风行，缁伍荣之。后充河南佛授记寺都维那，晚升寺任，中外肃然。终年六十余，著《义门》行于世。如其七方便人回心渐顿悟义，与湛法师为雠敌耳，故交绥而退焉。

○唐太原崇福寺浮丘传

释浮丘，姓张氏太原人也。挺然奇表，慧悟绝伦。于《瑜伽论》差成精博，旁综群书，言分雅俗，四方学者争造其门。然讷于宣剖，敏于通解，深藏若虚，庸庸品类多所不知。于时哲公露其头角，博闻强识之者惧其抵触，岂况诸余乎？哲惟神伏丘之义学，故谓为“法海”焉。享年七十余，终于所居，然未闻其有所著述矣。

卷五

◎义解篇第二之二（正传十四人附见五人）○周洛京佛授记寺法藏传（大仪）

释法藏字贤首，姓康，康居人也。风度奇正，利智绝伦，薄游长安，弥露锋颖，寻应名僧义学之眩属奘师译经，始预其间，后因笔受、证义、润文，见识不同而出译常至天后朝，传译首登其数。实叉难陀赍《华严》梵夹至，同义净、复礼译出新经。又于义净译场，与胜庄、大仪证义。昔者从焯杜顺传《华严》法界观，与弟子智俨讲授此晋译之本，智俨付藏，藏为则天讲新《华严经》，至《天帝网义十重玄门》、《海印三昧门》、《六相和合义门》、《普眼境界门》，此诸义章皆是《华严》总别义网，帝于此茫然未决。藏乃指镇殿金师子为喻，因撰义门，径捷易解，号《金师子章》，列十门总别之相，帝遂开悟其旨。又为学不了者设巧便，取鉴十面，八方安排，上下各一，相去一丈馀，面面对，中安一佛像，燃一炬以照之，互影交光。学者因晓刹海涉入无尽之义。藏之善巧化诱，皆此类也。其如宣翻之寄，亦未能舍，盖帝王归信缁伍所凭之故。洎诸梵僧罢译，帝于圣历二年己亥十月八日，诏藏于佛授记寺讲大经，至《华藏世界品》，讲堂及寺中地皆震动，都维那僧恒景具表闻奏。敕云：“昨请敷演微言，阐扬秘蹟。初译之日，梦甘露以呈祥；开讲之辰，感地动以标异。斯乃如来降迹，用符九会之文；岂朕庸虚，敢当六种之震。披览来状，欣惕于怀”云。其为帝王所重，实称非虚，所以华严一宗付授澄观，推藏为第三祖也。著《般若心经疏》，为时所贵，天下流行。复号康藏国师是欤！

○唐荊州玉泉寺恒景传

释恒景，姓文氏，当阳人也。贞观二十二年敕度，听习三藏，一闻能诵，如说而行。初就文纲律师隶业毗尼，后入覆舟山玉泉寺，追智者禅师习《止观门》。于寺之南十里别立精舍，号龙兴是也。自天后、中宗朝，三被诏入内供养为受戒师。以景龙三年奏乞归山，敕允其请。诏中书、门下及学士于林光宫观内道场设斋。先时追召天下高僧兼义行者二十余人，常于内殿修福，至是散斋，仍送景并道峻玄奘各还故乡。帝亲赋诗，学士应和，即中书令李峤、中书舍人李？¹¹等数人。时景等捧诗振锡而行，天下荣之。景撰《顺了义论》二卷，《摄正法论》七卷，《佛性论》二卷。学其宗者，如渴之受浆。至先天元年九月二十五日卒于所住寺，春秋七十九。弟子奉葬于寺之西原也。

系曰：江陵玄奘与三藏法师形影相接，相去几何。然其名同实异，亦犹蔺相如得强秦之所畏，马相如令杨雄之追慕。然则各有所长短，亦可见也。○唐中岳嵩阳寺一行传

释一行，俗姓张，巨鹿人也，本名遂，则唐初佐命郟国公公谨之支孙也。？岁不群，聪黠明利，有老成之风。读书不再览，已暗诵矣。因遇普寂禅师大行禅要，归心

者众，乃悟世幻，礼寂为师，出家剃染。所诵经法，无不精讽。寂师尝设大会，远近沙门如期必至，计逾千众。时有征士卢鸿，隐居于别峰，遁高学富，朝廷累降蒲轮，终辞不起。大会主事先请鸿为导文，序赞邑社。是日鸿自袖出其文，置之机案。钟梵既作，鸿谓寂公曰：“某为数千百言，况其字僻文古，请求朗俊者宣之，当须面指钁而授之。”寂公呼行，伸纸览而微笑，复置机案。鸿怪其轻脱。及僧聚于堂中，行乃攘袂而进，抗音典裁，一无遗误。鸿愕视久之，降叹不能已，复谓寂公曰：“非君所能教导也，当纵其游学。”自是三学名师，罕不咨度。因往当阳，值僧真，纂成《律藏序》，深达毗尼。然有阴阳讖纬之书，一皆详究，寻访算术，不下数千里，知名者往询焉。未至天台山国清寺见一院，古松数十步，门枕流溪，淡然岑寂。行立于门屏，闻院中布算，其声赅赅然。僧谓侍者曰：“今日当有弟子自远求吾算法，计合到门，必无人导达耶？”即除一算子。又谓侍者曰：“门前水合却西流，弟子当至。”行承其言而入，稽首请法，尽授其决马，门前水复东流矣。自此声振遐迩，公卿籍甚。玄宗闻之，诏入，谓行曰：“师有何能？”对曰：“略能记览，他无所长。”帝遂命中官取宫籍以示之，行周览方毕，覆其本，记念精熟，如素所习。唱数幅后，帝不觉降榻稽首曰：“师实圣人也。”嗟叹良久。寻乃诏对无恒，占其灾福，若指于掌，言多补益。时邢和璞者，道术人，莫窥其际，尝谓尹？曰：“一行和尚真圣人也。汉落下惲造历云：‘八百岁当差一日，则有圣人定之。’今年期毕矣。属《大衍历》出，正其差谬，则落下闳之言可信。非圣人孰能预于斯矣！”又于金刚三藏学《陀罗尼秘臚》，登前佛坛，受法王宝，复同无畏三藏译《毗卢遮那佛经》，开后佛国，其传《密藏》，必抵渊府也。睿宗、玄宗并请入内集贤院，寻诏住兴唐寺，所翻之经，遂著《疏》七卷，又《摄调伏藏》六十卷、《释氏系录》一卷、《开元大衍历》五十二卷。其历编入《唐书历律志》，以为不刊之典。又造游仪，黄赤二道以铁成规，于院制作。次有王媪者，行邻里之老嫗，昔多贍行之贫，及行显遇，常思报之。一日拜谒云：“儿子杀人，即就诛矣。况师帝王雅重，乞奏减死，以供母之残龄！”如是泣涕者数四，行曰：“国家刑宪，岂有论请而得免耶？”命侍僧给与若干钱物，任去别图。媪戟手曼骂曰：“我居邻周给迭互，绷褌间抱乳汝。长成，何忘此惠耶！”行心慈爱，终久不乐。于是运算毕，召净人戒之曰：“汝曹挈布囊于某坊闲静地，午时坐伺，得生类投囊，速归。”明日，果有猪彘引窰七个，净人分头驱逐，猪母走矣，得窰而归。行已备巨瓮，逐一入之，闭盖，以六乙泥封口，诵胡语数契而止。投明，中官下诏入问云：“司天监奏昨夜北斗七座星全不见，何耶？”对曰：“昔后魏曾失荧惑星，至今帝车不见。此则天将大儆于陛下也。夫匹夫匹妇不得其所，犹陨霜天旱，盛德所感，乃能退之。感之切者其在葬枯骨乎！释门以慈心降一切魔，微僧曲见，莫若大赦天下。”玄宗依之。其夜占奏北斗一星见，七夜复初，其术不可测也。又开元中尝旱甚，帝令祈雨，曰：“当得一器上有龙状者，方可致雨。”敕令中官同于内库中遍视之，皆言弗类。数日后指一古鉴，鼻盘龙，喜曰：“此真龙也。”乃将入坛场，一日而雨。其异术通感为若此也。玄宗在大明宫，从容密问社稷吉凶并祚运终毕事，行对以他语。帝询之不已，遂曰：“陛下当有万里之行。”又曰：“社稷毕得终吉。”帝大悦。复遗帝一金合子，形若弹丸，内贮物，撼必有声，发之不得，云：“有急则开。”

”帝幸蜀，仓黄都忘斯事，及到成都，忽忆后之，则药分中当归也。帝曰：“伊药产于此，师知朕违难至蜀当归也。”复见万里桥，曰：“一行之言，信其神矣。”命中官焚香祝之，乃告谢也。及昭宗初封吉王，至太子德王，唐为梁灭，终行之言“社稷毕得终吉”也。开元十五年九月于华严寺疾笃，将舆病入辞，小间而止。玄宗此夜梦瞰禅居，见绳床纸隔开扇，晓而验问，一如所睹。乃诏京城名德致大道场，为行祈福，危疾微愈。其宠爱如是。十月八日随驾幸新丰，身无诸患，口无一言，忽然浴香水换衣，趺坐正念，怡然示灭。一云：辞告玄宗后，自驾前东来嵩山谒礼本师，即寂也。时河南尹裴宽正谒寂，寂云：“有少事，未暇与大尹款话。且请踟蹰休息也。”宽乃屏从人，止于旁室，伺寂何为。见洁净正堂，焚香默坐，如有所待。斯须，叩门连声云：“天师一行和尚至（僧号天师，始见于此，言天子师也）。”行入，颇谄切之状，礼寂之足，附耳密语，其貌愈恭。寂但颔秋曰：“无不可者。”语讫又礼，礼语者三，寂唯言“是是，无不可者”。行语讫，降阶入南室，自关其户。寂乃徐召侍者曰：“速声钟，一行已灭度。”左右疾走视之，瞑目而坐，手掩伺息，已绝。四众弟子悲号沸渭，撼动山谷，乃停柩于罔极寺。自终及葬，凡经三七日，爪甲不变，髭发更长，形色怡悦，时众惊异。帝览奏悲怆曰：“禅师舍朕，深用哀慕。丧事官供，诏葬于铜人原，谥曰大慧禅师。御撰《塔铭》天下释子荣之。”

○唐京兆西崇福寺智升传

释智升，未详何许人也。义理悬通，二乘俱学，然于毗尼，尤善其宗。此外文性愈高，博达今古，每嫌裴道真、道安，至于明？、宣律师各著《大藏目录》，记其翻传年代人物者，谓之《晋录》魏汉等《录》，乃于开元十八年岁次庚午，撰《开元释教录》二十卷，最为精要。何耶？诸师于同本异出、旧目新名，多惑其文，真伪相乱。或一经为两本，或支品作别翻，一一裁量，少无过者。如其旧录江泌女子诵出经，黜而不留，可谓藻鉴。杜塞妖伪之源，有兹独断。后之圆照《贞元录》也，文体意宗，相糅不知几百数里哉。麟德中道宣出《内典录》十卷，靖迈出《图纪》四卷，升各续一卷。经法之谱，无出升之右矣。

○唐中大云寺圆晖传（怀远崇讷）

释圆晖，未详何许人也。关辅之间，声名籍甚，精研性相，善达诸宗。幼于《俱舍》一门，最为锐意。时礼部侍郎贾曾归心释氏，好乐斯文，多命晖谈此宗相，然其难者则非想见惑，繁者则得非得章。爰请晖师略伸梗概，究其光师《疏义》繁极难寻。又圣善寺怀远律师愿心相合，因节略古《疏》，颂则再牒，而《释论》乃有引而具注，甚为径捷，学者易知。后有崇讷著《金华钞》十卷以解焉。光、宝二师之后，晖公间出，两河间、二京道、江表、燕、齐、楚、蜀盛行晖《疏》焉。

○唐京兆华严寺玄逸传

释玄逸，姓窦氏，即玄宗神武皇帝从外父也。繁柯壹咨叶，莫我与京，昆友侄弟，多升朝列，或以靡丽自持，或以官荣相抗。逸乃风神秀朗，萧洒拔俗，悟色空之迹，到真寂之场，糠粃膏粱，么么轩冕。既而形厕缙伍，学追上流，秘藏香龕，披阅通理。一日，喟然兴叹曰：“去圣日远，编简倒错，或止存夏五，或滥在鲁鱼，加以笔紮偷行，校讎丧句。若蓂度失其夹叶，犹《礼记》脱错后先，日见乖讹，迷而不复，有一于此，彝伦攸蓐¹遂据古今所撰目录，及勘诸经，披文已浩于几案，积卷仍溢于堂宇。字舛者详义而纶之，品差者赅理而纲之。星霜累迁，功业克著。非夫心断金石、志坚冰檠者，曷登此哉！既综结其科目，谅条而不紊也，都为三十卷，号《释教广品历章》焉。考其大小乘经律论，并东西土贤圣集，共一千八十部，以蒲州、共城二邑纸书，校知多少，缚定品次，俾后世无闷焉。其章颇成伦要，备预不虞，古之善制。有乐陵尹灵琛为序。逸后不知所终。

○唐长安青龙寺道𩇑传

释道𩇑，俗姓长孙，长安高陵人也。父容，殿中侍御史。母马氏梦五色云覆顶，因有娠焉。母常听讲读大乘经，晓夜不辍，意行太任之胎教也。逮乎诞弥，异香芬馥；成于童稚，神气俊秀，学问详明。应进士科，一举擢第，名喧日下，才调清奇，荣耀亲里。后有梵僧扣门分卫，饭讫，愿寓宵宿。𩇑接之谈话，言皆诣理，梵僧称叹。明晓辞诀，方出门，闪然不见。𩇑由此无调选之心矣，乞愿出家。将知良珠度寸，虽有百仞之水，不能掩其云也，何君亲而能阻入道之猛利心焉？乃礼京招福寺慎言律师为师，请益无替。及登戒法，旋学律科，又隶经论，如是内外偕通矣。时有兴善寺复礼法师善属文，谓𩇑曰：“籍汝少俊，可为余造《西方赞》一本。”遂褰纸援毫，略不停缀，斯须已就，其辞典丽。清净佛国，境物庄严，临文若现前矣。礼师读讫，顾左右诸德曰：“奇才秀句，吾辈莫能测也。”自后伏膺窗案，昼夜精励，辩给难褒，善于立破。礼师仰其风规，尝于稠人广众中宣言曰：“𩇑之论端，势若泉。”浦从此闻天，供奉朝廷。玄宗幸雒，敕与良秀、法修随驾。御史李？同请𩇑于天宫寺讲《净业障经》，其《疏》亦𩇑之著述也。时一行禅师国之师匠，过虑将来佛法谁堪磅礴？谁可阐扬？奏召天下英髦学兼内外者集于洛京福先寺，大建论常𩇑为众推许，乃首登座，于《瑜伽》、《唯识》、《因明》、《百法》等论，竖立大义六科，敌论诸师茫然屈伏。一行惊异曰：“大法梁栋，伊人应焉。余心有凭，死亦足矣。”及乎大驾西还，敕令扈从。乃有小疾，上表，帝降中使赐药并方，诏曰：“法师将息，朕此药并方甚好，服食必差。所患痊愈，早来西京。”其顾遇也若此。仍属此际一行迁神，敕令东宫已下京官九品已上并送至铜人原蓝田设斋，推𩇑表白，法事方毕。宰相张燕公说执𩇑手曰：“释门俊彦，宇内罕匹。幸附口录向所导文一本，置于篋筒。”由是其文流行天下也。开元十八年，于花萼楼对御定二教优劣，𩇑雄论奋发，河倾海注。道士尹谦对答失次，理屈辞殫，论宗乖舛。帝再三叹美，诏赐绢伍伯匹，用充法施。别集《对御论衡》一本，盛传于代。后撰《大乘法宝五门名教》并《信法仪》各一卷、《唯识疏》六卷、《法华经疏》六卷、《御注金刚经疏》六卷。初，玄宗注经，至“若有人先世罪业应堕恶道，乃至

罪业则为消灭”，虽提免翰，颇见狐疑，虑貽谬解之愆，或作余师之义。遂诏氾决择经之功力，剖判是非。奏曰：“佛力经力，十圣三贤，亦不可测。陛下曩于般若会中，闻熏不一，更沈注想，自发现行。”帝于是豁然若忆畴昔，下笔不休，终无滞碍也。续宣氾造《疏》矣。四海向风，学徒鳞萃，于青龙寺执新《疏》，听者数盈千计，至于西明、崇福二寺。讲堂悉用香泥，筑目水际至于土面，庄严之盛，京中甲焉。开元二十八年，有疾将终，遣门弟子赍遗表云：“某末品轻生，虚均雨露，得陪缁伍，许自精修。虽常袒右肩，无施举袂之役，而执锡舒步，得蠲负载之劳。属以时畅玄功，德扬真化，不谓勤劬慕学，造次养生。今月十六日苦肠忽加，汤药无救。泉门自掩，安沐尧风；夜台一归，宁逢舜日。有定瘞于苍陇，无再谒于丹墀”云。时帝览恻怛，遣中使内给事贾文瑰将绢五十匹，就院吊赠，宣口敕奉问。氾弟子等适闻法师迁神寂灭，痛惜良深，未审拟于何处安厝。赐到绢帛等，圣恩追悼，生荣死哀，光于僧伍。俗寿七十三，僧腊五十三。以其年秋八月十二日葬于终南山阴逍遥园侧，白塔存焉。

○唐京师安国寺良贲传

释良贲，姓郭氏，河中虞乡人也。世袭冠裳，法门之流，不标祖祢，故阙如也。贲识鉴渊旷，风表峻越，外通坟典，内善经论，义解之性，人罕加焉。永泰中，不空盛行传译，实难其人，贲预其翻度。代宗请为菩萨戒师。因新出《仁王护国经》敕令撰《疏》解判，曲尽经意，以所住寺为《疏》目，曰青龙也。原夫是经已当三译，一晋太始三年法护译一卷，名《仁王般若》；次秦罗什出，名《仁王护国般若波罗蜜》；次梁承圣三年真谛于洪州宝因寺译，名《仁王般若》，并《疏》六卷。然则晋本初翻，方言尚隔。梁朝所译，隐而不行。伪秦之经，传流宇内。奈何止言波罗蜜而阙多字？则是亏其到义。是以肃宗皇帝斋心沐德，请不空重译。及肃皇晏驾，代宗成先圣之愿言，诏兴译务，敕军容使鱼朝恩监护于南桃园，起乎告朔，终乎望日，帝御承明殿灌顶道场躬执旧经，对译新本，而复为序冠于经首，仍敕贲造《疏》通经。贲上表曰：“学孤先哲，有玷清流，叨接翻传，谬膺笔受。幸扬天阙，亲奉德音，令于大明宫南桃园修《疏》赞演，宸光曲照，不容避席。穷玄珠于贝叶，但益惭惶；捧白壁于丹墀，宁胜报劬。仰酬皇泽，俯课忠勤，既竭愚诚，庶昭玄造。”贲勤勤笔削，三卷克成，奏乞流行。复上笺疏：“今年二月二十一日恩命令在内园修撰《经疏》，微僧寡学，惧不称旨。洗心涤虑，扣寂求音，发明起自于天言，加被仰凭于佛力，咸约经论，演畅真宗，亦犹集群玉于昆山，纳大川于溟海。火生于木，与两曜而俱明；识转于如，体一相而等照。成道者法也，载法者经也，释经者疏也，广度群有同于大通，是菩提心如陛下意。所撰经疏，缮写毕功，文过万言，部有三卷。施行窃惭于愚见，裁成冀答于圣恩。并《念诵仪轨》一卷，《承明殿讲密严经对御记》一卷同进上，轻尘玄览，祇畏无任。”答诏云：“法师智炬高明，辞峰迥秀，亲凭梵夹，宣阐微言，幽赜真宗，演成章疏。开如来之秘藏，示群有之迷津，贯玉联珠，钩深致远。再三披阅，颇谓精详。传之招提，永为法宝也。”皇命褒扬，释门翕盛。又属章信寺初成，执《疏》伏膺者常数百众，虽纸贵如

玉，无以加焉。其在安国寺讲筵，官供不匮。数年之内，归学如林。大历七年正月，不空奏请入《目录》，敕依。贯于六年徙居集州，教授传经，不遑宁处，至十二年三月十日，无疾枕肱，终于符阳，春秋六十一，夏腊二十九。宕渠嘉川之人，哀悼法梁摧折，阁维收灰中舍利百余粒。遗表中进《念诵仪对御记》二卷，以其先进者遂留在内中之故，令门弟子赍之重进。后于上都城东置坟塔焉，即大历十三年也。赍累朝供奉应制，辞辩富赡，学问高深。末涂沦蹶，同利涉之徙移，若神会之流外，吁哉！

○唐越州礼宗传

释礼宗，俗姓宋，会稽人也。道气酋壮，志求玄微，愿遂出尘，史除鞅绊。闻长寿寺和尚通达禅观，往叩其关，学习之心，未尝少懈。师诲之曰：“汝之出尘，有大利益，可谓良玉度尺，虽有十仞之土，不能迷其光矣。”乃奋藻摅华，注《涅槃经》，怀铅握槊，周于二载。挫锐解纷，怡然理顺，遂成夹注八十卷焉。及郑卿尚书典郡，闻其盛名，致疏往请，确然拒而不赴。景龙二年，有御史大夫冯思忽尔暴终，入一处，有二童子持簿领冯庭对判官厅，按覆罪愆，令望彼巨树枝柯可覆数亩。判官身旁旧识者张思义，招手呼冯曰：“吾是汝舅，曾为洛阳仓吏，被长官越格诬杀，兼假贷太平寺中钱及油面，于今未脱。汝所坐者，不合于天后宫中乱越，致此暴卒。可发愿造《涅槃经》，铸钟。”登即关奏，判放却还人世。临行，张语冯曰：“在阎浮一日造功德，得福无量，胡忍一生不修功德耶？此《涅槃经》者，礼宗大师注解，从天台传授，每有善神守护。”时张差押冯往诸司考校轻重生处，嘱之曰：“汝去洛城道光坊内十字街第三宅是吾家。家有池亭竹树，为问妻儿安否？”冯起寻经本，未获，而又死，经三日，立限归写经铸钟功毕。冯在世得四十八年终。宗亡，春秋九十七焉。

○唐钱塘天竺寺法洗传

释法洗，姓孙氏。母初梦吞明珠，遂黜鱼恶羣。诞弥厥月，生有异表。十五辞亲从师，依年受具。行学一集，蔚为教宗，卷伊吕立功之致，陋黄绮肆志之适。遗形理性，与山木为群。故地恩贞大师嘱之以《华严经》、《菩萨戒》、《起信论》，心以静铄，智与经冥。一夕梦乘大踰直截沧溟，横山当前，峻与天极。不觉孤帆鸢戾，怀襄上济，峰竦竦而忽焉，云溶溶而在下。既寤，形若委衣，流汗轻醒。自此句义不思而得，一部全文常现心境，事事无碍之旨如贯花焉。天宝六年，于苏州常乐寺绩卢舍那像，化示群品。大历二年，于常州龙兴寺讲，才登法座，忽有异光如曳红缕，渐明渐大，萦旋杳空。久修行者会中先睹。前后讲大经十遍，撰《义记》十二卷。大历十三年十一月七日，沙门慧觉梦巨塔陷地二级。无何，洗示疾而终，春秋六十一，慧命四十二。受法弟子太初付以香炉谈柄。寻阳正觉、会稽神秀，亦犹儒氏之有游夏焉。洗初讲天竺寺，盛阐《华严》。时越僧澄观就席决疑，深得幽趣。及终，吴兴皎然为《碑》，邗城肃公为《颂》，合扬其美哉。

○唐京师兴善寺潜真传（道超）

释潜真，字义璋，姓王氏太原华族，后徙为夏州朔方崇道乡人也。考珍，真即仲子也。年在学数，业尚典坟。幼好佛书，抑从天性，甫及弱冠，投迹空门。开元二十六年隶名于本城灵觉寺，明年纳具戒。自此听习律乘，涉游论海，凡曰讲筵，无不探赜。属代宗朝新译《文殊师利菩萨佛刹庄严经》，敕真造《疏》，奏云：“此经凡有三译；一西晋太熙中法护翻，名《佛土严净经》，文势多古，语简理幽；二天后久视中实叉难陀于清禅寺翻，名《文殊受记经》三即今大历六年所译也。伏唯宝应元圣文武皇帝陛下，天垂帝策，人归宝图，德厚乾坤，明侔日月，仁恕滋物，夷狄仰德，而输诚慈惠，利生正教，承风而演化。顷者鄜坊节度使兼御史中丞杜冕奏为国请诸大乘经，明诏下于墺园，梵旨开于贝叶因请三藏不空译此经等数十部。续有敕下，天下梵宇各置文殊菩萨像，以旌圣功也。又诏以文殊菩萨为上座，皆三藏所请。三藏学究瑜伽，解穷法印，身口意业，秘密修持，戒定慧学，显通宣畅，唐梵文字，声韵具知。传译此经，善符圣旨，文质相兼，璨然可观。潜真识智愚昧，学艺庸浅，幸陪清众，谬在翻传，虚空藏经，课虚润色，猥蒙驱策，述《疏》赞扬，虽文义荒芜，已传京邑。今之所作，盖有由焉。有金阁寺大德道超禅师，学尽法源，行契心本，亲睹灵境，密承圣慈，故久在清凉，属兴净业，仍于现处建窠塔波。寻覲法缘，来诣京国。以此经为大事，以大圣为本师，显扬圣德，无过此者。乃稽首三藏，誓传大圣法门，不以潜真庸虚，转祈和尚，邀令述作。和尚不念前之鄙陋，又令赞释此经。窃恐难契真詮，敢不尽其愚讷。”即大历八年十一月，《疏》成奏过。真学通内外，性相融明，考覆幽玄，研精教理，探赜今古，比较亲疏，分别异同，归于一义，辩犹泉涌，思入虚凝，直笔而书记于绝，唱结成三卷，以作准绳，现在未来，永无疑网矣。又述《菩提心义》、《发菩提心戒》各一卷，《三聚净戒》及《十善法戒》共一卷。兼禀承不空秘教，入曼籊罗登灌顶坛受成佛樱显密二教，皆闻博瞻。关内河东，代历四朝，阐扬妙旨，弟子繁多。加复纲纪兴善、保寿二处伽蓝，惩劝僧尼，真有力也。以贞元四年戊辰五月十四日遗诫门人，以疾而卧。二十一日，右肋累足，口诵弥陀佛号，终于兴善寺本院。春秋七十一，僧夏四十九云。

○唐代州五台山清凉寺澄观传

释澄观，姓夏侯氏，越州山阴人也。年甫十一，依宝林寺（今应天山）霈禅师出家，诵《法华经》。十四，遇恩得度，便隶此寺。观俊朗高逸，弗可以细务拘。遂遍寻名山，旁求秘藏，梯航既具，壶奥必臻。乾元中，依润州栖霞寺醴律师，学《相部律》。本州依昙一，隶《南山律》，诣金陵玄璧法师，传关河《三论》。《三论》之盛于江表，观之力也。大历中，就瓦棺寺传《起信》、《涅槃》。又于淮南法藏，受海东《起信疏》义。却复天竺诃法师门，温习《华严大经》。七年，往剡溪，从成都慧量法师，覆寻《三论》。十年，就苏州，从湛然法师习天台《止观》、《法华》、《维摩》等经疏。解从上智，性自天然，所学之文，如昨抛舍，鲍静记

井，蔡邕后身，信可知矣。又谒牛头山忠师、径山钦师、洛阳无名师，咨决南宗禅法。复见慧云禅师，了北宗玄理。观自谓己曰：“五地圣人，身证真如，栖心佛境，于后得智中起世俗念，学世间技艺。况吾学地，能忘是心？”遂翻习经、传、子、史、小学、《苍》、《雅》天竺《悉昙》诸部异执，《四围》、五明、秘咒、仪轨，至于篇颂笔语书踪，一皆博综。多能之性，自天纵之。大历十一年，誓游五台，一一巡礼，祥瑞愈繁。仍往峨嵋，求见普贤，登险陟高，备观圣像。却还五台，居大华严寺，专行《方等》忏法。时寺主贤林，请讲大经，并演诸论。因慨《华严》旧疏，文繁义约，脍然长想。“况文殊主智，普贤主理，二圣合为《毗卢遮那》，万行兼通，即《大华严》之义也。吾既游普贤之境界，泊妙吉之乡原，不疏《毗卢》，有辜二圣矣。”观将撰《疏》，俄于寤寐之间，见一金人当阳挺立，以手迎抱之，无何咀嚼都荆觉即汗流，自喜吞纳光明遍照之征也。起兴元元年正月，贞元三年十二月毕功，成二十轴，乃饭千僧以落成也。后常思付授，忽夜梦身化为龙，矫首于南台，蟠尾于山北，籀攫碧落，鳞鬣耀日。须臾，蜿蜒化为千数小龙，腾跃青冥，分散而去。盖取象乎教法支分流布也。四年春正月，寺主贤林请讲新《疏》。七年，河东节度使李公自良复请于崇福寺讲。德宗降中使李辅光宣诏入都，与闕宾三藏般若译乌荼国王所进《华严》后分四十卷。观苦辞，请明年入，敕允。及具行，至蒲津，中令梁公留安居，遂于中条山栖岩寺祝寺有禅客，拳眉剪发，字曰痴人，披短褐，操长策，狂歌杂语，凡所指？，皆多应验。观未至之前，狂僧驱众僧洒扫曰：“不久菩萨来此。”复次壁画散脂大将及山麋之怪，往往不息。观既止此寺，二事俱静。五月，内中使霍仙鸣传宣催入。观至，帝颇敦重，延入译场刊正。又诏令造《疏》。遂于终南草堂寺编成十卷，进呈，敕令两街各讲一遍为《疏》。时堂前池生五枝合欢莲华，一华皆有三节，人咸叹伏。寻译《守护国界主经》，观缀文润色。顺宗在春宫，尝垂教令述《了义》一卷、《心要》一卷并《食肉得罪因缘》。泊至长安，频加礼接。朝臣归向，则齐相国抗、韦太常渠牟，皆结交最深。故相武元衡、郑絪、李吉甫、权德舆、李逢吉、中书舍人钱徽、兵部侍郎归登、襄阳节度使严绶、越州观察使孟简、洪州韦丹，咸慕高风，或从戒训。以元和年卒，春秋七十余。弟子传法者一百许人，余堪讲者千数。观尝于新创云花寺般若阁下画《华藏世界图相》，又著《随疏演义》四十卷，允齐相请述《华严经纲要》一卷、《法界玄鉴》一卷、《三圣圆融观》一卷、《华严》、《法华》、《楞伽》、《中观论》等。别行《小钞疏》共三十卷。设无遮大会十二中，其诸塑绩形像，缮写经典，不可殫述。门人清河记观平时《行状》云：“观恒发十愿：一长止方丈但三衣钵，不畜长；二当代名利，弃之如遗；三目不视女人，四身影不落俗家；五未舍执受，长诵《法华经》；六长读大乘经典，普施含灵；七长讲《华严大经》；八一生昼夜不卧；九不邀名惑众伐善；十不退大慈悲普救法界。”观逮尽形期，恒依愿而修行也。

○唐京师西明寺良秀传（谈筵）

释良秀，姓郭氏，蒲津人也。年及佩髻，挺然离俗，乃往中条山柏梯寺披削，诵通

经业，受具律仪。誓以传讲为己事，勤苦忘疲，《三藏》俱寻，九流外贍。于时籍甚，孰不钦崇。贞元四年，奉诏与罽宾国般若三藏同译《大乘理趣六波罗蜜经》十卷。至五年二月四日解座，写本进过。寻奉德宗敕令秀造《疏》，上表云：“去年十一月二十八日右街功德使王希迁奉宣，令良秀等修撰新翻《大乘理趣六波罗蜜经疏》者。伏闻至道同源，圣人一贯，大雄示相，演妙音于独园，宝位分身，霈湛恩于双阙。开佛日于圣日，降丝纶于法轮，所以杨化慈航，致人寿域。不然，岂得握真符而契合，应休运以感通？况以此经，如来之密印，群生之度门，得白马之宝函，启青龙之秘藏，是第一义理去筌蹄，于最后乘说无分别。加以天文焕发，睿思昭回。真如契心，已阐微于释氏；般若制序，谅纘文于太宗。慈云溥润于大根，湛露垂滋于贝叶。良秀等材惟末学，性异生知，谬寄讨论，伏增殒越。上承严旨，徒侧管以窥天；虔奉本师，惧升堂而鼓瑟。所修撰《疏》一部，谨附王希迁随表奉进，伏乞圣慈，许令同修《疏》沙门谈筵于当寺赞演及流布中外。所冀落落真言，示丹青于新学；明明像教，流粉泽于将来。”帝览奏，敕内给事毛瑛琦宣慰良秀、谈筵、道恒等：“宜共赐绢九十匹，至可领龠比修《疏义》，甚大勤劳也。秋热，兼问师等各平安好在。”秀之辞笔义端，时少伦匹。终没罔知时代焉。

○唐京师西明寺慧琳传

释慧琳，姓裴氏，疏勒国人也。始事不空三藏，为室洒，内持密藏，外究儒流，印度声明，支那诂训，靡不精奥。尝谓翻梵成华，华皆典故，典故则西乾细语也。遂引用《字林》、《字统》、《声类》、《三苍》、《切韵》、《玉篇》诸经杂史，参合佛意，详察是非，撰成《大藏音义》一百卷。起贞元四年迄元和五载，方得绝笔，贮其本于西明藏中。京邑之间，一皆宗仰。琳以元和十五年庚子卒于所住，春秋八十四矣。殆大中五年，有奏请入《藏》流行。近以海中高丽国，虽三韩夷族，偏尚释门，周显德中，遣使赍金入浙中求慧琳《经音义》，时无此本，故有阙如。

卷六

◎义解篇第二之三（正传十四人附见六人）○唐京师崇福寺惟憲传（慧震弘礼）

释惟憲，俗姓连氏，齐大夫称之后，本冯翊人，官居上党，为潞人也。九岁割爱，冠年纳戒。母氏昆弟归于法门，故憲从其受教，澜漪内湛，葳蕤外发。嗜学服勤，必无倦色。乃辞渭阳，寻师隶业，或经筵首席，或论集前驱，或参问禅宗，或附丽律匠。其志渊旷，欲皆吞纳之。年临不惑，尚住神都，因受旧相房公融宅请。未饭之前，宅中出经函云：“相公在南海知南铨，预其翻经，躬亲笔受《首楞严经》一部，留家供养。今筵中正有十僧，每人可开题一卷。”憲坐居第四，舒经见富楼那问生起义，觉其文婉，其理玄，发愿撰《疏》，疏通经义。及归院，矢誓写文殊菩萨像，别诵名号，计一十年，厥志坚强，遂有冥感，忽梦妙吉祥乘俊猊自憲之口入。由兹下笔，若大觉之被善现谈《般若》焉。起大历元年丙午也。及将彻简，于卧寐中见由口而出，在乎华严宗中文殊智也。勒成三卷，自谓从浅智中衍出矣。于今盛行。一说《楞严经》初是荆州度门寺神秀禅师在内时得本，后因馆陶沙门慧震于度门寺传出，憲遇之，著《疏》解之。后有弘礼法师者，蜀人也，作《义章》，开释此经，号《资中疏》。其中亦引震法师义例，似有今古之说，此岷蜀行之，近亦流江表焉。

○唐京师千福寺怀感传

释怀感，不知何许人也。秉持强悍，精苦从师，义不入神，未以为得。四方同好就雾市焉，唯不信念佛。少时径生安养，疑冰未泮，遂谒善导，用决犹豫。导曰：“子传教度人，为信后讲，为渺茫无诣？”感曰：“诸佛诚言，不信不讲。”导曰：“若如所见，令念佛往生。岂是魔说耶？子若信之，至心念施，当有证验。”乃入道场三七日，不睹灵瑞。感自恨罪障深，欲绝食毕命。导不许，遂令精虔，三年念佛。后忽感灵瑞，见金色玉毫，便证念佛三昧。悲恨宿垢业重，妄构众愆，忏悔发露，乃述《决疑论》七卷（即《群疑论》是也）。临终，果有化佛来迎，合掌面西而往矣。

○唐吴兴法海传

释法海，字文允，姓张氏，丹阳人。少出家于鹤林寺。白驹匪食其场苗，金翅俄翔其海面，曲从师教，周览群经，大壑纳川，邓林聚羽。是以圆入一性，学阶空王，擅当代独悟之名，剖先贤不决之义，一时外学《六籍》该通。尝谓人曰：“佛法一门，极唯心地，余皆椎轮也。”天宝中，预扬州法慎律师讲肆，同昙一、灵一等推为颜、冉焉。复与杼山昼公为忘形之交，林下之游。黑白二徒，多从求益焉。

○唐洛京佛授记寺慧苑传

释慧苑，京兆人也。少而秀异，蔚有茂才，厌彼尘寰，投于净域，礼华严法藏为师。陶神练性，未几深达法义，号上首门人也。有勤无惰，内外该通，华严一宗，尤成精博。苑依《宝性论》立四种教，为有四类不识如来藏，如生盲人，则凡夫、声闻、辟支、初心菩萨也。一迷真异执教，当凡夫；二真一分半教，当二乘；三真一分满教，当初心菩萨；四真具满教，当识如来藏者也。诸师处判，或依或违，然其纲领教乘一家之说。次以新译之经未有音释，披读之者取决无从。遂博览经书，恢张诂训，撰成二卷，俾初学之流不远求师，览无滞句，旋晓字源。然禀从贤首之门，不负庭训之美也。

○唐处州法华寺智威传（慧威）

释智威，姓蒋氏，缙云人也。颖脱尘蒙，心游物表，少事师于轩辕氏炼丹山。闻天台宗教盛，遂负笈往沃洲石城寺，亲灌顶禅师求请心要。既而得一融道，体二居宗，定慧方均，寂照相半，虽云自了，急在利他。天与多能，富有辞藻，著《桃岩寺碑》，与《头陀寺碑》气度相表。后以法眼付授慧威焉。时传威是徐陵后身，其利智雄才，断可知矣。又释慧威，姓留氏东阳人也。簪角之年，露其旧习，挟开爱网，径入空门，不滞一方，仍参三益。闻缙云大威禅师盛行禅法，裹足造焉。刻志忘劳，睹威墙奥。一日千里，罔不推称，至有成业，时谓小威。然其乐静居山，罕交人事。指教门人，不少杰出者，左溪玄朗矣。威常修止观，匪弃光阴，说与行而并驰，语将嘿而齐贯，落落然汪汪然，人无得名焉。

○唐台州国清寺湛然传

释湛然，俗姓戚氏，世居晋陵之荆溪，则常州人也。昔佛灭度后十有三世，至龙树，始用文字广第一义谛。嗣其学者号法性宗。元魏、高齐间有释慧文默而识之，授南岳思大师，由是有三观之学。洎智者大师蔚然兴于天台，而其道益大。以教言之，则然乃龙树之裔孙也，智者之五世孙也，左溪朗公之法子也。家本儒墨，我独有迈俗之志，童？邈焉异于常伦。年二十余，受经于左溪，与之言，大骇。异日谓然曰：“汝何梦乎？”然曰：畴昔夜梦披僧服，掖二轮，游大河之中。”左溪曰：“嘻，汝当以止观二法度群生于生死渊乎？”乃授以本师所传止观。然德宇凝精，神锋爽拔，其密识深行，冲气慧用，方寸之间，合于天倪。至是始以处士传道，学者悦随，如群流之趣于大川也。天宝初年，解逢掖而登僧籍。遂往越州昙一律师法集，广寻持犯开制之律范焉。复于吴郡开元寺敷行止观。无何，朗师捐代，挈《密藏》独运于东南，谓门人曰：“道之难行也，我知之矣。古先至人静以观其本，动以应乎物，二俱不住，乃蹈于大方。今之人或荡于空，或胶于有，自病病他，道用不振。将欲取正，舍予谁归？”于是大启上法，旁罗万行，尽摄诸相，入于无间。即文字以达观，导语默以还源。乃祖述所传章句凡十数万言。心度诸禅，身不逾矩，三学俱炽，群疑日溃，求珠问影之类，稍见罔象之功行。止观之盛，始然之力也。天宝末，大历初诏书连征，辞疾不就。当大兵大饥之际，揭历法流，学徒愈繁，瞻

望堂室，以为依怙。然慈以接之，谨以守之，大布而衣，一床而居，以身诲人，耆艾不息。建中三年二月五日，示疾佛陇道场，顾语学徒曰：“道无方，性无体，生欬死欬，其旨一贯。吾归骨此山，报尽今夕，要与汝辈谈道而诀。夫一念无相谓之空，无法不备谓之假，不一不异谓之中，在凡为三因，在圣为三德。炷则初后同相，涉海则浅深异流，自利利人，在此而已。尔其志之！言讫隐几，泊如而化，春秋七十二，法腊三十四，门人号咽，奉全身起塔，纡于智者大师莹兆西南隅焉。入室弟子吴门元浩，可谓迓其人近其室矣。然平日辑纂教法，明决前疑，开发后滞，则有《法华释签》、《法华疏记》各十卷、《止观辅行传弘诀》十卷、《法华三昧补助仪》一卷、《方等忏补阙仪》二卷、《略维摩疏》十卷、《维摩疏记》三卷、《重治定涅槃疏》十五卷、《金铉论》一卷，及《止观义例》、《止观大意》、《止观文句》、《十妙不二门》等盛行于世。详其然师，始天宝，终建中，以自证之心，说未闻之法，经不云乎，“云何于少时大作佛事”，然师有焉。其朝达得其道者唯梁肃学士，故拈鸿笔成绝妙之辞。彼题目云：“尝试论之，圣人不兴，其间必有命世者出焉。自智者以法传灌顶，顶再世至于左溪，明道若昧，待公而发。乘此宝乘，焕然中兴。盖受业身通者三十有九僧，搢绅先生高位崇名屈体承教者又数十人。师严道尊，遐迩归仁，向非命世而生，则何以臻此！观夫梁学士之论，议偕齐，非此人何以动鸿儒，非此笔何以铭哲匠？盖洞入门室见宗庙之富，故以是研论矣。吁，吾徒往往有不知然之道！《诗》云：“维鹊有巢，维鸠居之。”梁公深入佛之理窟之谓欤！有会稽法华山神邕作真赞，至大宋开宝中吴越国王钱氏追重而誄之，号圆通尊者焉，可不是欤！

○唐苏州开元寺元浩传

释元浩，姓秦氏，字广成，吴门人也。绮岁依晋陵灵山寺慧日禅师出家，具满律戒，配本州龙兴寺，寻为荆溪湛然禅师嘱累弟子。初受《法华》止观，已得醍醐，唯以裂大网，感大果、成大行、归大处以为大愿。宴居三昧，常随佛后，希夷自得，人莫能知，其秘密深远如海印三昧，不言出处，常行佛事，与夫难行苦行、更相祖述、默传心要，为论为记、灵芝瑞草以为功德传于后世者，不同日而语矣。浩注解《大涅槃经》，为文首《序》，德美圆实，志愿显现，盖录其所证之意而见于文，曰：“余闻先觉之大宝曰常，在宥布和之盛典曰教，率土知化之归宗曰行，交感人心之至极曰证。然则以道御时，以法性合其运，当应物之际，与显晦同其光，恢张至化而自他昭著者，实播于鸿名。钦恭闻思，协和至极，四德克彰者，实存乎妙体。格变群家，历观诸行，至典克修，庶绩有成者，实赖乎宗本。信以授人，大明宗极，敷畅厥旨，庶几有补于将来者，实存乎妙用。博综群言以立诚训，风行十方率用归顺者，实存乎妙教矣。”此浩之法要，如王辅嗣之法《系辞》，司马迁之《自叙》，管仲能言《轻重》，孟子之传《春秋》，虽儒释不同，其义一也。以元和十二年十一月十一日示疾，右胁累足，入于涅槃，非二乘境界，真如来定也。明年十一月十三日阇维，起塔于苏州西北虎丘东山南原也。浩耽学味道，不涉余事，常随然师听其言说，曾无倦色。分析义理，流川注，必默记而暗诵，一言不失。数年

之后，人始知之。然师曰：“回也如愚。”罕为人说，多辞以不能，及被梁田二君苦劝请之，始著《涅槃经解述》。浩与上都云华寺华严澄观法师，若孔门之游夏焉。其儒流受业，翰林学士梁公肃、苏州刺史田公敦。缁流受业者，智恒、子瑜、道儒、仲仪、仲良五人，持经讲论，传之无穷。大比丘尼识微、道巽、志真、悟极，此四人者高洁之伦，深练禅观。初浩为二官所请注经，预梦甚为奇特。又庭阶生花，非人间恒所见者。祥鸟飞驯，五彩绝异。刺史崔恭撰《塔碑》，立于虎丘山罗汉石坛之左。后有行满、道暹、明旷皆著述，广天台之道欤。

○唐越州暨阳杭乌山智藏传

释智藏，姓皮氏，西印度种族，祖父从华，世居官宦，后侨寓庐陵。藏少入精舍，睹像设之繁，乃陋俗求真，而于三学各所留心，唯《律藏》也最为精敏。大历三年，游豫章，因隶名天宫寺，众恳命临坛秉度，时仰■？11，号为律虎。每登法座，提唱毗尼，堂盈席满，听受无厌。辨名理，析微言，连环可解也。贞元中，遇大寂禅师，笃明心要。及游会稽，于杭乌山顶筑小室安禅。乃著《华严经妙义》。宣吐11？？，学者归焉。至元和十四年二月，无疾而终，报龄七十九。焚收舍利圆净者，建塔于院北峰焉。杭乌山者，越俗言讹，合言杭岛，谓浙江所渡古用杭筏，到岸藏杭，故云岛也。

○唐梓州慧义寺神清传（义将）

释神清，字灵庾，俗姓章氏，绵州昌明人也。生于大安山下，昆季相次三人出俗，皆有名望，清居乎仲。处胎之际，母顿恶荤膻。及为儿，虽随戏弄，遇像礼足，逢僧稽颡。年十三，受学于绵州开元寺辩智法师。于时敕条严峻，出家者限念经千纸，方许落发。清即诵《法华》、《维摩》、《楞伽》、《佛顶》等经，有同再理。时故相乔琳为绵郡太守，惊其幼俊，躬而降礼请削染焉，则大历中也。至年十七，听习粗通，即讲《法华》一经。岁满，慧义寺依如律师受具戒。夏习尸罗，依学《新疏》。寻达大宗，乃诣上都。后以优文赡学，入内应奉。暮年钟其荼蓼，归慧义寺，讲导著述，略无闲日。以元和年中终于本寺峰顶，迁神于白门兰若，即？城北郭外也。清平昔好为著述，喜作编联，盖巨富其才，亦凿深于学。三教俱晓，该玄鉴极，彝伦咸叙，万人之敌也。受业弟子黑白四方，计一千余人。前后撰成《法华玄笺》十卷，《释氏年志》三十卷。《新律疏要诀》十卷（亦谓《清钞》）《二众初学仪》一卷，《有宗七十五法疏》一卷（亦名《法源记》，此盖解小乘所计五位色心心所不相应无为等法，体性业用，一皆详括，故云法源也），《识心论》、《澄观论》、《俱舍义钞》数卷，《北山参玄语录》十卷，都计百余轴，并行于代。就中语录博该三教，最为南北鸿儒名僧高士之所披玩焉。寺居？城之北，长平山阴，故云北山，统三教玄旨，实而为录，故云《参玄》也。观清之述作，少分明二权一实之经旨，大分明小乘律论之深奥焉。清貌古且奇，髭白而光莹。相国崔龟从时从事东川，序真赞云：“与奘三藏道颜同，摄物异，时一体耳。”门人数多，其出伦者

义将也。独明《俱舍》，兼善《起信》，海内学人望风而至。开成中北山俱舍宗不泯者，清之余素乎。东川涌潭僧正颜公著碑，本寺讲律临坛光肇，别附《语录》，略记清言行矣。

○唐京师大安国寺端甫传

释端甫，俗姓赵氏，天水人也。世为秦著姓焉。初，母张夫人梦梵僧谓曰：“当生贵子。”即出囊中舍利使吞之。及诞，所梦僧白昼入其室，摩其顶曰：“必当大兴法教。”言讫而灭。既成人，高颡深目，大颐方口，长六尺五寸，其音如钟。夫将欲荷如来之菩提，凿生灵之耳目，固必有殊祥奇表欤？始十岁，依崇福寺道悟禅师为沙弥。十七正度为比丘，隶安国寺。受具于西明寺照律师，学毗尼于崇福寺升律师，传《唯识》于安国寺素法师，通《涅槃经》于福林寺毗法师。甫又梦梵僧以舍利满琉璃器，使吞之，且曰：“《三藏》大教，尽贮汝腹矣。”自是经律论无敌于当时，囊括川注，逢源会委，滔滔然莫能济其畔岸矣。夫将欲伐株机于情田，雨甘露于法种者，固必有勇智宏辩欤？无何，谒文殊于清凉，众圣皆现；演大经于太原，倾都毕会。德宗皇帝闻其名，征之，一见大悦，常出入禁中，与儒道议论，赐紫方袍。岁时锡施，异于他等。复诏侍皇太子于东朝。顺宗皇帝深仰其风，亲之若昆弟，相与卧起，恩礼特优。宪宗皇帝数幸其寺，待之若宾友。常承顾问，注纳偏厚。而甫符彩超迈，辞理响捷，迎合上旨，皆契真乘，虽造次应对，未尝不以阐扬为务。繇是天子益知佛为大圣人，其教有大不思議事。当是时朝廷方削平区夏，缚吴幹蜀，潜蔡荡郢，而天子端拱无事。诏甫率缁属迎真骨于灵山，开法场于秘殿，为人请福，亲奉香灯。既而刑不残，兵不黠，赤子无愁声，沧海无惊浪，盖参用真宗以毗大政之明效也。夫将欲显大不思議之道，辅大有为之君，固必有冥符玄契欤？掌内殿法仪，录左街僧事，以标表净众者凡一十年。讲《涅槃》、《唯识》经论，处当仁传授宗主，以开诱道俗者，凡一百六十座。运三密于瑜伽，契无生于悉地，日持诸部十余万遍，指净土为息肩之地，严金经为报法之恩。前后供施数十百万，悉以崇饰殿宇，穷极雕绘。而方丈单床，静虑自得。贵臣盛族皆所依慕，豪侠工贾莫不瞻向，荐金宝以致诚，仰端严而礼足，日有千数，不可殫书。而甫即众生以观佛，离四相以修善，心下如地，坦无丘陵，王公舆台皆以诚接。议者以为成就常不轻行者，唯甫而已矣。夫将欲驾横海之大航，拯迷涂于彼岸者，固必有奇功妙道欤？以开成元年六月一日，西向右胁而灭，当暑而尊容若生，终夕而异香犹郁。其年七月六日，迁于长乐之南原。遗命荼毗，得舍利三百余粒，方炽而神光月皎，既烬而灵骨珠圆。赐谥曰大达，塔曰玄秘。俗寿六十七，僧腊可数。门弟子僧尼约千余辈，或讲论玄言，或纪纲大寺，修禅秉律，分作人师，五十其徒，皆为达者。会昌中相国裴公休为《碑》颂德焉。

○唐圭峰草堂寺宗密传（圆禅师照禅师）

释宗密，姓何氏，果州西充人也。家本豪盛，少通儒书，欲干世以活生灵，负俊才

而随计吏。元和二年，偶谒遂州圆禅师，圆未与语，密欣然而慕之，乃从其削染受教。此年进具于拯律师。寻谒荆南张，张曰：“汝传教人也，当宣导于帝都。”复见洛阳照禅师，照曰：“菩萨人也，谁能识之？”末见上都华严观，观曰：“毗卢华藏，能随我游者其唯汝乎？”初在蜀，因斋次受经，得《圆觉》十二章，深达义趣，誓传是经。在汉上因病僧付《华严》句义，未尝隶习，即尔之。由是乃著《圆觉》、《华严》及《涅槃》、《金刚》、《起信》、《唯识》、《盂兰盆法界观》、《行愿经》等《疏钞》及《法义》、《类例》、《礼忏》、《修证》、《图传》《纂略》。又集诸宗禅言，为《禅藏》，总而序之，并酬答书偈议论等。又《四分律疏》五卷、《钞悬谈》二卷，凡二百许卷，《图》六面。皆本一心而贯诸法，显真体而融事理，超群有于对待，冥物我而独运矣。密累入内殿，问其法要。大和二年庆成节，征赐紫方袍为大德。寻请归山。会昌元年正月六日坐灭于兴福塔院，俨若平日，容貌益悦。七日，迁于函，其自证之力可知矣。其月二十二日，道俗等奉全身于圭峰，二月十三日荼毗，得舍利数十粒，明白而润大。后门人泣而求诸煨中，必得而归，悉敛藏于石室，其无缘之慈可知矣。俗龄六十二，僧腊三十四。遗诫令舁尸施鸟兽，焚其骨而散之，勿塔，勿得悲慕，以乱禅观。每清明上山，必讲道七日而后去。其余住持仪则当合律科，违者非吾弟子。初，密道既芬馨，名惟弱赫，内众慕膻既如彼，朝贵答响又如此。当长庆元和已来，中官立功执政者孔炽，内外猜疑，人主危殆。时宰臣李训酷重于密，及开成中伪甘露发，中官率禁兵五百人出邠，所遇者一皆屠戮。时王涯、贾餗、舒元舆方在中书会食，闻难作，奔入终南投密。唯李训欲求剪发，匿之，从者止之，训改图趋凤翔。时仇士良知之，遣人捕密入左军，面数其不告之罪，将害之。密怡然曰：“贫道识训年深，亦知其反叛，然本师教法，遇苦即救，不爱身命，死固甘心。”中尉鱼恒志嘉之，奏释其罪。朝士闻之，扼腕出涕焉。或曰：“密师为禅耶，律耶，经论耶？”则对曰：“夫密者四战之国也，人无得而名焉，都可谓大智圆明白证利他大菩萨也。是故裴休论撰云：‘议者以师不守禅行，而广讲经论。游名邑大都，以兴建为务。乃为多闻之所役乎，岂声利之所未忘乎？嘻，议者焉知大道之所趣哉！夫一心者万法之总也，分而为戒定慧，开而为六度，散而为万行。万行未尝非一心，一心未尝违万行。禅者六度之一耳，何能总诸法哉？且如来以法眼付迦叶，不以法行。故自心而证者为法，随愿而起者为行，未必常同也。然则一心者万法之所生，而不属于万法。得之者则于法自在矣，见之者则于教无碍矣。本非法不可以法说，本非教不可以教传，岂可以轨迹而寻哉？自迦叶至富那奢凡十祖皆罗汉，所度亦罗汉。马鸣、龙树、提婆、天亲始开摩诃衍，著论释经，摧灭外道，为菩萨唱首。而尊者闍夜独以戒力为威神，尊者摩罗独以苦行为道迹。其他诸祖，或广行法教，或专心禅寂，或蝉蜕而去，或火化而灭，或攀树以示终，或受害而偿债，是乃法必同而行不必同也。且循辙迹者非善行，守规墨者非善巧，不迅疾无以为大牛，不超过无以为大士。故师之道也，以知见为妙门，寂净为正味，慈忍为甲盾，慧断为剑矛。破内魔之高垒，陷外贼之坚阵，镇抚邪杂，解释縲笼。遇穷子则叱而使归其家，见贫女则呵而使照其室。穷子不归，贫女不富，吾师耻之。二乘不兴四分不振，吾师耻之。忠孝不并化，荷檐不胜任，吾师耻之。避名滞相，匿我增慢，吾师耻之。故遑遑于济拔，汲汲于开

诱，不以一行自高，不以一德自耸。人有依归者，不俟请则往矣；有求益者，不俟愤则启矣。虽童幼不简于应接，虽骜罔不怠于叩励。其以阐教度生，助国家之化也如此。故亲师之法者，贫则施，暴则敛，刚则随，戾则顺，昏则开，堕则奋，自荣者谦，自坚者化，徇私者公，溺情者义。凡士俗有舍其家与妻子同入其法、分寺而居者，有变活业、绝血食、持戒法，起家为近住者，有出而修政理以救疾苦为道者，有退而奉父母以丰供养为行者。其余憧憧而来，欣欣而去，扬袂而至，实腹而归，所在甚众，不可以纪。真如来付嘱之菩萨，众生不请之良友。其四依之人乎？其十地之人乎？吾不识其境界庭宇之广狭深浅矣。议者又焉知大道之所趣哉？’其为识达大人之所知心为若此也。密知心者多矣，无如升平相国之深者，盖同气相求耳。”宣宗再阐真乘，万善咸秩，追谥曰定慧禅师，塔号青莲。标服执弟子礼四众数千百人矣。

系曰：“河东相国之论撰，所谓极其笔矣。然非夫人之为极笔，于他人岂极其笔乎？观夫影响相随，未始有异也。影待形起，响随声来。有宗蜜公，公则有裴相国。非相国曷能知密公，相续如环，未尝告尽，其二公之道如然。则知谛观法，王法则密公之行甚圆；应以宰官身，则裴相之言可度。今禅宗有不达而讥密不宜讲诸教典者，则吾对曰：达磨可不云乎，吾法合了义教。而寡学少知自既不能，且与烦惑相应可不嫉之乎？或有诮密不宜接公卿而屡谒君王者，则吾对曰：教法委在王臣，苟与王臣不接，还能兴显宗教以不？佛言力轮，王臣是欤？今之人情，见近王臣者则非之。曾不知近王臣人之心苟合利名，则谢君之诮也。或止为宗教亲近，岂不为大乎？宁免小嫌，嫌之者亦嫉之耳。若了如是义，无可无不可，吁哉！

○唐京师西明寺乘恩传

释乘恩，不知何许人也。肇从志学，知遍寻师，凡厕黉堂，必穷义路。常训门人曰：“好学近乎智，力行近乎仁。仁智稍成，是殊名同实，趋菩萨地，若下阪之走丸耳。”思乐人为学，不忘讲导。及天宝末，关中版荡，因避地姑臧。旅泊之间，嗟彼密迹羌虏之封，极尚经论之学。恩化其内众，勉其成功，深染华风，悉登义府。自是重撰《百法论疏》并《钞》，行于西土。其《疏》祖慈恩而宗潞府，大抵同而少闻异，终后弟子传布。迨咸通四年三月中，西凉僧法信精研此道，禀本道节度使张义朝表进恩之著述，敕令两街三学大德等详定，实堪行用，敕依，其僧赐紫衣，充本道大德焉。

○唐彭州丹景山知玄传

释知玄，字后觉，姓陈氏，眉州洪雅人也。曾祖图南，任梓州射洪县令。祖宪，考邈，皆名场不捷。母魏氏梦月入于怀，因而载诞，虽乳哺未能言，见佛像僧形，必含喜色。五岁，祖令咏花，不数步成云：“花开满树红，花落万枝空，唯余一朵在，明日定随风。”祖吟叹不怩曰：“吾育此孙，望其登甲科，雪二代之耻。今见孺

子志矣，非貽厥也已，必从空门，乖始望也。”七岁，果遇法泰法师在宁夷寺讲《涅槃经》。寺与居邻，玄日就讲集所，一聆法语，若睹前因。是夕梦其寺殿，佛手摩其顶。寤后祖父，乞为勤策，亲党观其必不可抑夺，故听之。年十一，遂其削发。乃随师诣唐兴邑四安寺，授大经四十二卷，远公《义疏》、空师《圆旨》，共一百二十五万言。皆囊括深奥矣。方年十三，指钁缁徒，露老成之气。时丞相杜公元颖作镇西蜀，闻玄名，命外座。讲谈于大慈寺普贤阁下。黑白众日计万许人，注听倾心，骇叹无已。自此蜀人弗？其名，号陈菩萨耳。传云，玄前身名知铉，汉州三学山讲《十地经》，感地变琉璃焉。玄于净众寺辩贞律师所受具戒，才听毗尼，续通《俱舍》，则长十山固律师之付授焉。复从本师下三峡，历荆襄，抵于神京资圣寺。此寺四海三学之人会要之地，玄敷演经论，僧俗仰观，户外之屦日其多矣。文宗皇帝闻之，宣入顾问，甚愜皇情。后学《唯识论》于安国信法师，又研习外典，经籍百家之言，无不该综。玄每恨乡音不堪讲贯，乃于象耳山诵《大悲咒》，梦神僧截舌换之。明日，俄变秦语矣。有杨茂孝者，鸿儒也，就玄寻究内典，直欲效谢康乐注《涅槃经》，多执卷质疑，随为剖判。致书云：“方今海内龙象，非师而谁？”次扬刑部汝士、高左丞元裕、长安扬鲁士咸造门拟结莲社。尝一日玄宴坐，见茂孝披紫服、戴碧冠，三礼毕，乘空而去。玄令人侦问，茂孝其夕诫其子曰：“吾常欲落发披缁，汲瓶挈屨，侍玄公，所累者簪冕也。吾盖棺时，殓以紫袈裟、碧芙蓉冠。”至是方验先见矣。武宗御宇，初尚钦释氏，后纳蛊惑者议，望祀蓬莱山，筑高台以祈羽化。虽谏官抗疏，宰臣屡言，终不回上意。因德阳节，缁黄会麟德殿，独诏玄与道门敌言，神仙为可学不可学耶？帝义手付老氏中理大国若烹小鲜义，共黄冠往复。玄陈帝王理道，教化根本，言神仙之术，乃山林间匹夫独擅高尚之事业，而又必资宿因，非王者所宜。辞河下倾，辩海横注，凡数千言。闻者为之股栗，大忤上旨，左右莫不色沮。左护军仇士良、内枢密杨钦义惜其才辩，恐将有？逐之命，乃密讽贡《祝尧诗》。玄立成五篇，末章云：“生天本自生天业，未必求仙便得仙，鹤背倾危龙背滑，君王且住一千年。”帝览诗微解。帝虽不纳忠谏，而嘉其识见口给也。玄即归巴岷旧山，例施巾栉，而存戒检愈更甄明。方扁舟入湖湘间，时杨给事汉公廉问桂岭，延止开元佛寺。属宣宗龙飞，杨公自内枢统左禁军，以册定功高，请复兴天竺教，奏乞访玄声迹。玄复挂坏衣，归上国宝应寺。属寿昌节讲赞，赐紫袈裟，署为三教首座。帝以旧藩邸造法乾寺，诏玄居寺之玉虚亭。大中三年诞节，诏谏议李贻孙、给事杨汉公，缁黄鼎列论义，大悦帝情。因奏天下废寺基各敕重建，大兴梵刹，玄有力焉。命画工图形于禁中，其优重如是。与相国裴公休友善，同激扬中兴教法事。八年，上章乞归故山，大行利济，受益者多。广明二年春，僖宗违难西蜀，后遣郭遵泰赍玺书，肩輿诏赴行在。帝接谈论，颇解上心。左军容田令孜与诸达官，问道勤重。帝欲旌其美，令诸学士撰玄师号，皆未愜旨。乃挥御翰云：“朕以开示悟入《法华》之宗旨也。悟者，觉也，明也，悟达大道，悟佛知见。”又云：“悟者一刹那，不悟河沙劫，所以悟者真乘了然成佛之义。今赐悟达国师为号。虽曰强名，用表朕意。”玄陈让不遂，乃乞归九陇旧庐。于正月二十一日卧内，见所曾游历圣境名迹，皆见在前。二月七日，闻空声曰：“必生净土。”乃讯之云：“孰之语耶？”空又应曰：“佛也。”七月中，闻户外有格斗之

声，逡巡一菩萨降于庭前，事摩灭矣，渐迫仅玄身，丁宁赞喻：“勿以此若为累也。”言讫而没。又于一夕，有一珠自玄左足下流去，苦楚万端，谛视其珠中明明有“晁错”二字。乃知玄是袁盎也，曾因七国反，盎奏斩错，以谢吴楚诸王，故为婴挠耳。召弟子慈灯附口上遗表，嘱令弃尸，半饲鱼腹，半啖鸟兽。吾久与西方净土有期如斯。誨诱讫，右胁面西而逝，享年七十三，僧腊五十四。玄咸通中曾游泽州，追问小远法师，同年亦同终日月焉。玄坚守禁戒，少欲，过中不食蔬果，服唯布褐，卧则刍秆。而六时行道，夜卧一更，余则禅坐。等视众生，无贵贱少长，待之如一。素结情好深者裴相国休。初，裴镇荆门，玄游五台山，路出渚宫，赠遗初无所齟齬裴知其俭约，密遣人沿路以供之，若苏秦遣舍人阴资奉张仪也。尝经骆谷真符县雍氏家枕潭，潭中有大鱼，如龙四足，而齿牙纤利，其家日饲以食，已四世矣。或欲网钓之意，则辄云雾晦冥焉。玄扣船抚其顶，瞪目而鼓跃，即为受归依。未几，乃寄梦雍氏曰：“我谢汝累世护念，今受归依，已生天而永诀矣。”次为导江玉垒山神李冰庙、益昌北郭龙门神，偕受戒法，罢其血食。有李商隐者，一代文宗，时无伦辈，常从事河东柳公梓潼幕，久慕玄之道学，后以弟子礼事玄，时居永崇里，玄居兴善寺。义山苦眼疾，虑婴昏瞽，遥望禅宫，冥祷乞愿。玄明旦寄《天眼偈》三章，读终疾愈。迨乎义山卧病，语僧录僧彻曰：“某志愿削染为玄弟子，临终寄书偈诀别”云。玄生常著《如来藏经会释疏》二卷，命僧彻撰《法鉴》以照像，若《十翼》焉。《大无量寿经疏》二卷，僧彻著《法灯》，类章指焉。《胜鬘经疏》四卷，僧彻著《法苑》以错综，犹纬书焉。又《般若心经》、《金刚经》各有《疏义》。此外秦蜀之间，作释氏杂文外篇箴论碑志歌诗，录成二十余卷，礼忏文六卷，通计三十万言。后迁塔于茶笼山附圣寺矣。中和二年，弟子左街僧录净光大师僧彻述《传》，法孙右街僧录觉辉，辉弟子伪蜀祐圣国师重孙光业僧录，绵绵爪颺，皆名公也。凤翔府写玄真，李义山执佛侍立焉。

系曰：玄公何云袁盎，又为知铉二人后身耶？通曰：人寿百年，自汉至唐，玄几经出没乎骸山泪海，断可知矣。然则玄公多才行道，近古罕闻，法嗣蕃昌，他莫与议也。

○唐京兆大安国寺僧彻传

释僧彻，不知何许人也。敏利天资，高迈逸类，稚岁聪颖，而慕悟达国师，若颜回之肖仲尼也。既而时亲函丈，颇见幽微，随侍翼从，未尝少厌。窥其门墙，其殆庶几乎。悟达凡有新义别章，咸嘱付彻畅衍之。为《如来藏经疏》著《法鉴》

四卷，《大无量寿经疏》著《法灯》二卷，《胜鬘师子吼经疏》著《法苑》十卷。观乎悟达为《疏》，若左丘明之传也。彻述三《法钞》，犹杜、服之《集解》欤？初居法乾内寺，师资角立，声彩风行，凡百官寮无不奉仰率由。彻内外兼学，辞笔特高，唱予和汝，同气相求。寻充左右街应制，每属诞辰，升麟德殿法座讲谈，敕赐紫袈裟。懿宗皇帝留心释氏，颇异前朝。遇八斋日，必内中饭僧数盈万计。帝因

法集，躬为赞呗，彻则升台朗咏。宠锡繁博，敕造緇檀木讲座以赐之。又敕两街四寺行方等忏法，戒坛度僧各三七日。别宣僧尼大德二十人入咸泰殿置坛度内。福寿寺尼缮写《大藏经》，每藏计五千四百六十一卷，雕造真檀像一千躯，皆委彻检校焉。以十一月十四日延庆节，麟德殿召京城僧道赴内讲论，尔日彻述皇猷，辞辩浏亮，帝深称许。而又恢张佛理，旁慑黄冠，可谓折冲异论者，当时号为“法将”。帝悦，敕赐号曰净光大师，咸通十一年也。续录两街僧事。初彻经江论海，勇

于揭厉，于青龙寺讲贯既循悟达国师义意，寄呈所见，蒙回八十四字云：“观君《法苑》思冲虚，解我真乘刃有余。若使龙光时可待，应怜僧肇论成初。五车外典知难敌，九趣多才恐不如。萧寺讲轩横淡荡，帝乡云树正扶疏。几生曾得闍逾意，今日堪将贝叶书。一振微言冠千古，何人执卷问吾庐？”览兹奖饰，悲喜盈襟。以广明中，巢冠犯阙，僖宗幸蜀。其夕彻内宿，明日仓黄与杜光庭先生扈从入于岷峨，再见悟达，痛序艰难。彻极多著述，碑颂歌诗。不知所终。内翰侍郎乐朋龟为真赞，凤翔、嘉州皆写其真相。弟子秦蜀之间愈多传法者。

卷七

◎义解篇第二之四（正传二十三十附见四人）○唐五台山华严寺志远传（元堪）

释志远，俗姓宋氏，家于汝南。其父早丧，孤侍孀亲，承颜之礼，匪遑晨夕。母常念《法华经》，精通五卷。远识度明敏，孤标卓然。年二十八，辞亲从师，归依荷泽宗风，晤解幽旨，经营僧事，联绵六秋。凡诸取给，未尝混互。自尔辞师寻礼，复经八年，虽博瞻两宗，情犹系滞。闻天台一枝，该通妙理，定慧双融，解进于行。十乘境观，起自一家。修性三德，清凉盛演。因命同辈追游五峰，栖遁林泉，履历前躅，晓六凡四圣之理，了开示悟入之门，百界千如，苞罗性相。即遮即照，破立同时。依正圆融，凡圣平等，豁开心目，物我双亡。仅四十年，阐扬独步。远业精道邈，志苦神和，卧不解衣，食非别请。时岁不稔，樵炊屡乖，每掬水漱流，将期永日。体有疮疥，手不涂摩，戒检遵修，警慎心口。常以四种三昧炼磨身心。至于鍼札题尺，颇闲辞翰虫篆之美。每有缁素负才学者，异其辩说，或傍搜僻隐，欲为挫锐，伺之瑕玷，求其胜负。进虽傲然踞席，退乃踏？容，来高我山，去随四悉。洎会昌四年，春秋七十七，僧腊四十八，忽绝食数朝，而说法罔憚。以二月十七日诫门人曰：“吾自生修进，不欺心口，今获二种果报，卧安觉安而无痛恼。”又曰：“天台宗《疏》务在宣传，《法华疏》十卷，本迹二门，三周记别开近显远。《玄文》十卷，五义判释。《止观》十卷，境观双修，不定顿渐，八教粗妙，遮照平等，行解圆明，一多相即一藏文句，莹玉扞从金，将践圣阶，降兹罕及。礼忏方等，必假精诚，志之永怀，副吾之意也。”于时龙象云萃，栴比座隅，咸赞希奇，同称佛号。慈海之际，奄至迁灵，风惨云愁，山昏水咽，林峦色变，徙属凄伤。阍维日，诸子奔驰，罔知所诣。虽学者如林，达其法者唯元堪，即扶风马氏之裔也。气度冲邃，道风素高，盖远倾其解脱之瓶，注以醍醐之器，可谓一灯之后复燃一灯。及武宗澄汰之际，禀师先旨，哀恻累夕，以其章疏文句，秘之屋壁。及宣宗再阐释门，重葺旧居，取其教部，置之影堂，六时经行俨若。前制《法华妙经》积岁传唱，《摩诃止观》久而敷扬。嗣继之心已极师资之礼也。

○唐越州应天山寺希圆传

释希圆，姓张氏，姑苏人也。宗亲豪富，而独舍家，从登戒法，便游讲肆。不滞一方，勤修三学，良深岁稔，尤至博通，时推俊迈，因命讲训。光启中，属徐约军乱，孙儒略地，吴苑？扰。圆由通玄寺附商船，避地于甬东。其估客偕越人也，笃重于圆，召居会稽宝林山寺。形虽么麽，性且强干，与时寡合，多事宴默。或问之，则曰：“吾逍遥乎无形之场，同师子游戏耳。”景福中，于山寺演畅经论，同声相应，求法者至。乃著《玄中钞》数卷，皆当义妙辞也。恒劝人急修上生之业，且曰：“非知之难，行之为难。汝曹勉旃。”圆六时礼忏，未尝少缺。居小房，即琅簫山顶。是山也，传云从琅簫台飞来，此处先是屠坊，故皆镇于其下。山之冢有井，有鳊裸焉，水有盈缩，应大江之潮候，甚多灵怪。一云此处禹锁浙江蛟蜃之属，其

名曰蛆。蛆有双耳，其色苍黄，或缘竹木，必风雨至矣。今或出石窍，入僧居沟渠中，见人不惊，握则跳梁如怒状，唯偏入圆房。圆手执宛转屑就，乃为之受归戒，令勿作风雹之妖。暨圆终，而多暴风雨也。圆之修习，愿见弥勒。一日讲次，屹然坐终于法座，时众闻异香？臂，天乐铮鏦，或绝或连，七日后已，此真上生之证欤！则乾宁二年四月也。还山之日，僧众置祭于寺门。无何，有人茜袍象笏拜跪怆然。恻怛之间，杳无踪迹，众莫能测焉。茶毗，收舍利七百余粒，被四明人赍往新罗国矣。

○唐绛州龙兴寺木塔院玄约传

释玄约，姓张氏，正平人也。志韵刚洁，幼萌出尘之心，既谐夙志，入州龙兴伽蓝，日诵千言，更无再受。落发之后，满足律仪，检察已心，循其戒范，精持止作，未尝穿穴。自兹名节顿高，流辈窥仰。数稔之间，律论俱赡，遍求知识，探赜玄文。戾止长安崇圣寺，以戒德之选而预临坛，讲《律》并《俱舍》共四十余遍，渊静其性，研核靡亏。著《俱舍论金华钞》二十卷，为时所贵。而二讲登席，可三百余人，皆北面受业焉。传禀门生一百许辈，汾沁之间奔走学者，迨乎老矣。终本院小房，俗寿七十六，法腊五十六。学法弟子道俗收焚坑舍利数百粒，构砖浮图于郡城之西焉。

○梁滑州明福寺彦晖传

释彦晖，姓孙氏，今东京阳武县人也。佩纛之岁，闻父读《金刚般若》，瞪目凝听，澹然欢喜。又属家内斋僧，磬梵俱作，于帘幕之下合掌欣然。登年十五，随师学法，往太原、京兆、洛阳听采忘劳。年满，于嵩山少室寺受大戒，隶习毗尼，颇通深趣。次寻经论，皆讨玄源。且曰：“为善不同，同归乎治。治则戒、定、慧也。入圣机械，此三治性之极致也。”届洛都，先达无不推伏。至乎四部悉仰柔明，临鉴则戚少欣多，执瓶则荷轻持重。三衣之外，百一之资，量足而供，更无余长。所行慈忍，匪事规求。不畜门徒，惟劳自己，勤勤化导，默默进修。是故南燕之人号为佛子。初寄明福寺，讲《百法论》也，四海英髦，风趋波委，恒溢百余，且多俊迈，精研论席，钻仰经宗。其闻硕学兼才，故有分为上下十恶。十恶者，若八伯之号焉。上十恶则洞闲性相，高建法幢，宗因喻三，立破无滞。下十恶则学包内外，吟咏风骚，击论谈经，声清口捷，赞扬梵呗，表白导宣。盖因题目之分，乃极才能之际，云恶则倒背之言，乃是极善也。其门弟子为若此也。晖《因明》、《百法》二论各讲百许遍，出弟子一百五十余人，著钞曰《滑台》，盛行于世。以乾化元年秋八月三日，气力撝然而奄化矣。春秋七十二，法腊五十二。滑人追慕其德，二众三百余人奉神枢归葬于阳武县侧，营小塔焉。

○梁东京相国寺归屿传

释归屿，姓湄氏，寿春人也。父元旭知子敏利，授以《诗》、《书》，诵览记忆，弥见过群从诸子。而窃愿出尘，父母允其频请，乃礼本郡开元寺道宗律师为力生焉。未及周星，念通《法华》、《仁王》二经。登于弱冠，而全戒足，矜持三行，靡旷四仪，习听新章，寻通讲授。后闻洛京、三辅经论盛行，结侣求师，仅于十载，疏通性相，精大小乘，名数一支，《因明》一学，《俱舍》、《唯识》《维摩》、《上生》，皆深藏若虚也。复往南燕就晖公，重覆所学，研朱益丹，犹慨义章未为尽善。乃之今东京相国寺，遂糅《新钞》，讲训克勤，门生领悟。时朱梁后主与屿？角同学庠序，狎密情浓，隔面年深。即位半载，下诏访之。屿虽知故旧，终岁不言。事不可逃，应召方入。帝见悲喜交集，宣赉丰厚。时属嘉庆节，曾下敕止绝天下荐僧道恩命，其年独赐屿紫衣，仍号演法大师。两街威仪迎导，至寺，兼敕东塔御容院为长讲院。时闽帅，以圣节进《金刚经》一藏，绢三百匹，尽赐屿焉，法侣荣之。然睹旧钞有所不安，未极其理，遂搜抉精义于三载，著成二十卷，号曰《会要草字》，写毕进呈。帝览赏叹，敕令入《藏》，屿苦辞乃止。如是十五年中，唱导无怠，学徒继荣、瞻公相继传持。至后唐清泰三年十月十日，谓门人供演曰：“余气力肫然，无常将至，汝好住修进。”焚香合掌，初夜长逝，春秋七十五，僧腊五十五。即以其月十八日迁塔于京东郊寺庄东冈焉。

○后唐洛阳长水令譔传

释令譔，姓杨氏，陕府阌乡人也。幼而履操，回求出俗，得本邑之师，授《净名经》。年既应法，乃纳戒津，大小乘教兼而学之。于名数法门，染成淳粹。《弥陀》、《中观》，幹及膏腴，声光振发，莫之与京。因游洛南长水，遇归心檀信构伽蓝，就中讲贯。一论一经，三十载中宣化，计各五十余遍。日别诵《维摩》《上生》，以为恒课。执行持心而绝瑕卯，远近宗承，若望梅者得饮焉。以清泰二年乙未岁终于邑寺，春秋七十一，法腊五十一。其年迁于山麓，？西域法火葬，获舍利，学人檀越共建塔焉。

○后唐定州开元寺贞辩传

释贞辩，中山人也。少知出尘，长誓修学，刻苦之性，人不堪其忧。一志听寻，暇则刺血书经，又针血画立观自在像，慈氏像等。尝因行道困息，有二天女来相挠恼，辩誓之曰：“我心匪石，吾以神咒被汝。”彼众不容去。自此道胜，魔亦无踪。辩负笈抵太原城听习，时中山王氏与后唐李氏封境相接，虞其觐间者，并州城内不容外僧。辩由此驱出，遂于野外，古冢间宿。会武皇帝畋游冢在围场中，辩固不知。方将入城赴讲，见旌旗骑卒，缩身还入穴中。武皇疑，令擒见，问其故，遂验冢中，敷草座，案砚疏钞罗布，遂命入府供养。时曹太后深加仰重，辩诉于太后曰：“止以学法为怀，久在王宫不乐，如桎械耳。”武皇纵其自由，乃成其业。洎王处直平，乃归中山讲训，补故伽蓝，无不谐愿。有妇人陈氏布发掩地，请辩蹈之。撰《上生经钞》，为学者所贵，时号辩《钞》者是。后终于此寺焉。

○后唐会稽郡大善寺虚受传

释虚受，嘉禾御儿人也。纳戒后，于上都习学，内外博通，传讲数本大经论，不憚宣导。咸通中，累应奉圣节充左街鉴义，辈流孰不弭伏。及广明中，京阙盗据，逃难迢迢，抵越大善寺，同好者命讲《涅槃》、《维摩》二经，即天祐年中也。因愤谦雅等师《释》、崇福《疏》，繁略不中，其犹以水济水，终无必济焉，遂撰《义评钞》十四卷。同光中方毕轴。又因讲《俱舍论疏》，有贾曾侍郎《序》，次僧圆晖《序》，皆著《钞》解之，其文富赡，昔尝染指知焉。受于《涅槃》，辩而非略，仍多驳议小远之《疏》，免为青蝇之玷。余则《法华》、《百法》、《唯识》，各有别行《义章》。受性且狷急，与人不同，畜弟子无一可中，尝自执爨爨斋食，柴生火灭，复吹又遽，怒发，汲水沃之，终日不食而讲焉。及晚年眼昏甚，登师子座，戴竹笠而讲，贵目不闪烁尔。或讥其慢众，受亦不介意。属武肃王钱氏按部至越，遂出谒见，王素向风，乃加优礼，言劳再三。暨乾化中，于会稽开元寺度戒，命之充监坛选练，吴会间行此职者，自受始也。王表于朝廷，荐其紫衣。庄宗制赐，行人赍至营丘。时受讲当《上生经疏序》，至“若洪钟而虚受”，受舍麈柄言曰：“某得名无典实，今后更为虚受，小子识之。”乃状闻王，王曰：“此僧必无恩命分，何名虚受乎？”至同光乙酉岁，受终，迨海舰赍诰牒来，稽其终日，正到青社，果符武肃之言。有《文集》数卷、《述义章》三十余卷，行之于代。

○后唐杭州龙兴寺可周传

释可周，俗姓傅，晋陵人也。出家于本部建元寺。循良厥性，切问于勤。友生勉之曰：“非其地树之不生，今豫章经谓之江，论谓之海，胡不往请业乎？”周感其开导，挈囊达彼，遇云表法师盛集，穷《法华》慈恩《大疏》，日就月将，幹运深趣。昭宗初，自江西回台越之间，命其启发。梁乾化二年，受杭州龙兴寺召开演，黑白众恒有半千。两浙武肃王钱氏命于天宝堂夜为冥司讲经，鬼神现形扈卫，往往人睹焉。尝有祭铜官祠神，巫氏久请不下，后附巫曰：“吾随从大神去西关天宝堂听法方回。”武肃王闻而郑重，赉周中金如意并钵、紫衣一副，加号精志通明焉。以天成元年，终于观音院本房。初，周乾宁四年戾止台州松山寺讲《疏》，阙《钞》，遂依《疏》节成五卷，曰《评经钞》，《音训》五帖，解宣律师《法华序钞》一卷，行于浙之左右。弟子相继不绝。

○后唐东京相国寺贞诲传

释贞诲，姓包氏，吴郡常熟人也。年始十三，出家于本州龙兴寺。其性沈静，分阴是竞。方逾一稔，诵彻《法华经》，如是恒业日周二部。年十九，于扬州择名师受具足法。自尔西之伊洛，北抵晋郊，凡有讲筵，下风求益，核其经论，穷其性相，辈流之间，罕齐驰骛。至于非朋弱友，弃背如也。唐天祐元年，至今东京相国寺寓舍，讲导《法华经》十许遍，人未归重，则知奇货之售亦有时焉。及梁氏都于是京

，人物委输。贞明二年，会宋州帅孔公仰海风规，知其道行，便陈师友之礼，舍俸财，置长讲法华经堂于西塔院。从此翕然盛集。海旁读《大藏》教文，二时行道，精进罔疲。凡世伎术百家之言，黜于议论之外，诫门徒曰：“异端之说，汨乱真心，无记不熏，何须习俗？吾止愿为师子吼，不作野干鸣也。”但专香烛涂扫，以内院为息肩之地。至后唐清泰二年二月十日，召弟子五十余人，自具香汤澡浴，令唱《上生》礼佛，罄舍衣资，为非时僧得施半斋僧乞，至十一日，望空合掌云：“劳其众圣排空相迎。”满百徒侣，尔日皆闻天乐之音，顷刻而卒，俗寿七十三，僧夏五十四腊。于寺讲贯三十余年，经讲计三十七座，览藏经二遍，修弥勒内院业。以其年二月十八日葬浚郊东寺庄之原，幡幢威仪，缙白弟子约千余人会送焉。

○后唐洛京长寿寺可止传

释可止，姓马氏，范阳大房山高丘人也。年甫十二，迥有出俗之心，依悯忠寺法贞律师。年十五，为息慈，辞师往真定习学经论。时大华严寺有仁楚法师讲《因明论》，止执卷服膺三遍，精义入神，众推俊迈。有老宿维摩和尚者，释门之奇士也，问楚师曰：“门人秀拔，孰者为先？”曰：“有幽州沙弥者温故知新，厉精弗懈。”于是求见，遂质问胜军比量，随难应变，辞不可屈。维摩曰：“后生可畏，契经所谓虽小不可欺也。”遂率力请止开讲恒阳，缙素无不钦羨焉。迨十九岁，抵五台山求戒，于受前方便，感文殊灵光烛身。已而归宁父母及师，于寺敷演。二十三往并部，习《法华经》、《百法论》。景福年中，至河池，有请讲《因明》。后于长安大庄严寺化徒数载。乾宁三年，进诗，昭宗赐紫袈裟，应制内殿。本道刘仁恭者，据有北门，控扼蕃汉，闻止之名，移书召归故乡。其父与师相次物故，母犹在堂，止持盂乞食，以供甘旨。行诵《青龙疏》三载，文彻忽有巨蟒见于房，矫首顾视，似有所告。时同院僧居晓，博物释子也，且曰：“蛇则目睛不瞬，今其动乎？得非龙也？”止焚香祝之曰：“贫道念《青龙疏》，营斋养母，苟实龙神軫念，希值一檀越。”居数日，燕师冢子曰：“制胜司徒召申供养。”时庄宗遣兵出飞狐以围之，历乎年载，百谷勇贵，止顿释忧惧，末几燕陷，刘氏父子俘归晋阳。止避乱中山，节度使王处直素钦名誉，请于开元寺安置，逐月供俸。止著《顿渐教义钞》一卷，见行于代。天成三年戊子，王师问罪，定州陷焉。招讨使王晏休得瀛王冯道书，令寻止。既见，以车马送至洛京，河南尹秦王从荣优礼待之，奏署大师，号文智焉。于长寿净土院住持。应顺元年甲午正月二十二日，忽微疾作，召弟子“助吾往生”，念弥陀佛，奄然而化。俗年七十五，僧腊五十六。闰正月二日荼毗，收遗骨。至清泰二年四月八日，建塔于龙门山广化寺之东南隅。止风神峭拔，戒节孤高，百家子史，经目无遗。该博之外，尤所长者，近体声律诗也。有《赠樊川长老诗》，流传人口。在定州日，中山与太原互相疑贰，诸侯兼并，王令方欲继好息民，因命僧斋于庆云寺。会有献曰鹄者，王曰：“燕人诗客试为咏题。”止即席而成，后句云：“不知谁会喃喃语，必向王前报太平。”王欣然。诗人李洞者风骨僻异，慕贾阼仙之模式，景福中在河池相遇，赠止三篇。时宰相孙公渥、赵公凤、马公裔孙、窦学士梦徵、符侍郎蒙、李侍郎详，皆唱予和汝，坝谑韵谐。止顷在长安讲罢，

游终南山逍遥园，是姚秦什法师译经之地，年代浸深，鞠为茂草。且曰：“吾为释子，忍不兴乎？”奏昭宗乞重修，帝允，仍旧赐草堂寺额。后请樊川净休禅伯聚徒谈玄矣。及在洛也，讲外长诵《金刚经》，不知纪极。昔多居终南山、崆峒山，故有《三山集》，诗三百五十篇，盛行于时。弟子修文、修智、修行，微见师之道焉。

○汉太原崇福寺巨岷传

释巨岷，姓任氏，西河人也。父游于艺而贲丘园。母王氏戒受八关，心归三宝，从妊岷也，更好善缘，复求福利，而生令子。及生，年甫七岁，志气敦笃，暂见佛像，注仰欣然。父母知有宿因，或携入寺，意欲忘归。至本郡净心院，见宣远论师，志恋其房，泣求摄受。二亲知不能阻其愿，咸皆可之。年十岁，诵终《法华》、《维摩》二经，日持十卷，更无间隔，如执琉璃之器。其舒徐恣制，若老成焉。迨圆满足，便习尸罗，克通开制之科，恒照欣戚之鉴。自尔大乘理趣，经论精穷，得其师门，则并部永和三学也。俾夜作昼，窗案是临，不暇诸他。除研习义章，修六事二因也，于《大般涅槃经》兼《因明论》，末年逾切。又传输金论，尽屏余缘，各讲十遍，仍求辅亮，博览群书，得义最精，又扬具美。寻禀纶言，住城内天王院，与弟子俱供亿不亏，传持无替。乾祐元年，汉祖以龙潜晋土之日，便仰岷名，特降庭臣赐紫衣，号圆智大师。续有诏宣住崇福寺讲堂院，仍充管内僧正。经年而变法于晋，检策僧徒，如风偃草。至乾祐二年十一月五日，无疾而终。于时四众含悲，一城恋德。俗龄九十三，法腊五十四。乃遵西域荼毗礼，多投香水，或执幡花，黑白之众盈郊，黯之云蔽日，未容火灭，皆捧宝瓶，待盛梁粟之形，同见熏修之体。时得舍利者，随自因缘，或多或少。别得遗骨，具表奏闻。汉主敕葬于西山天龙寺，凡事官供，起石塔。敕谥号曰达识焉。

○汉棣州开元寺恒超传

释恒超，姓冯氏，范阳人也。祖父不仕，世修儒道，而家富巨万。超生而聪慧，居童稚群，不贪戏弄。年十五，早通六籍，尤善《风骚》，辞调新奇，播流人口。忽一日因阅佛经，洗然开悟。乃叹曰：“人生富贵，喻等幻泡，唯有真乘，可登运载。”遂投驻跸寺出俗。未周三祀，方议进修，昼夜不疲，而属师亡，亦遵释氏丧仪，守礼无担孝悌之名，燕人所美。梁乾化三年，往五台山受木义戒，由是陟遐自迹，切问近思。俄征《伐木》之章，且狎成人之友，结契远求名匠，阻两河间兵未罢，路不通。南则梁祖，北则庄宗，抗衡于轻重之前，逐鹿在存亡之际。当是时也，超止于本州魏、博、并、汾之间，学大小乘经律论，计七本，讲通思于雍、洛、梁、宋名师，杳然隔绝。虽然，巡历非远，宏畅殊精，瓶满见知，翼飞名字。是故并部息尘中山贞辩，夫二人者，言行俱臻，证修有位，一见超，叹曰：“义龙之头角悉完备矣，待飞奋而为霖雨焉。1 其为硕德题目，多此类也。龙德二年，挂锡于无棣，超曰：“此则全齐旧壤，邹鲁善邻。”遂止开元伽蓝东北隅，置院讲诸经论，二

十余年，宣导各三十余遍。节操高迈，举措舒徐，缙素见之，无不怯惧。声无叱咤，语不夸奢，自然而然，且非威势凌置之所得也。前后州牧，往来使臣，向誉钦风，修名执刺，相礼重者，止令童子辞以讲贯，罕曾接对。初有所嫌，终伏其高，齐鲁之间，造秀不远数百里，造其门以诘难。诸公一睹超容，傍听议论，参乎子史，证以教宗。或问《因明》，超答以诗一首，辞新理妙，皆悉叹降。时郡守李君素重高风，欲飞章举赐紫衣。超闻惊愕，遂命笔为诗云：“虚著褐衣老，浮杯道不成。誓传经论死，不染利名生。？树遮山色，怜窗向月明。他时随范蠡，一棹五湖清。”李君复令人劝勉，愿结因缘。超确乎不拔，且曰：“而其复尔，则吾在卢龙塞外矣。”郡将闻而止。又相国瀛王冯道闻其名，知是乡关宗人，先遗其书，序以归向之意。超曰：“贫道闲人，早舍父母，志修行。本期弥勒知名，不谓浪传于宰衡之耳也。于吾何益？”门人敦喻，不得已而答书，具陈出家之人岂得以虚名薄利而留心乎？瀛王益加郑重，表闻汉祖，遂就赐紫衣。自此忽忽不乐，以乾祐二年仲春三日微疾，数辰而终于本院。院众咸闻天乐沸空，乃升兜率之明证也。春秋七十三，僧腊三十五。门人洞微与学徒百余人持心丧，倾城士庶僧尼会送城外，具荼毗礼，收舍利二百余颗分施之。外緘五十颗，于本院起塔以葬之。瀛王未知，别奏赐师号曰德正，乃刊敕文于石塔焉。

○汉洛京法林院僧照传

释僧照，姓张氏，范阳人也。年十四出家，投悯忠寺，聪晤绝俦，神仪伟秀。初受经偈，日诵数千百言，目所览者过于宿习。吐论知见，有老成之风。遂度为沙弥。受具已来，历于再闰，暗诵经典，已逾六大部矣，即《最胜王》、《大悲》《维摩》、《法华》等经。旁加听寻经论，十数年间，深文伏义，蓝出青矣。天祐中，游方南下，爰届中山，元戎王处直请住法华寺。相次易帅请之，太传陇西公连表荐赐紫方袍，加至真大师。次则扶风马公请为僧正，非所好也。及抵洛阳，有命开《法华经》讲，止法林院。况乎都阙浩穰，象龙辐凑，及照之唱导，翕如于下风伏膺矣。以乾祐元年三月二十六日，示灭于讲院，春秋七十，僧腊五十。四众号慕，侍中李公倾易定，曾为外护，复守洛宅，饰终丧礼，悉以资奉。粤四月三日迁神于城南，行荼毗法，收舍利，红润可数百粒。济阳丁公为保姚之鐸职，为树塔于广化之寺南岗。照平昔讲凡七十余座，勤勤为法。门生颇多。宰臣马公孙最所钦重，前后赠诗仅数十首，洛中为美谈矣。

○汉洛阳天宫寺从隐传（梦江）

释从隐，姓刘氏，洛阳三乡人也。？年敏慧，誓欲出尘，二亲既听，乃投本邑竹阁院，依师诵习，陶练灵府。寻于嵩阳受戒毕，就长水听采，才历数年，克通《百法》、《中观》、《弥陀》三经论焉。而諲师年老，深许隐之博达性相。后于洛布金院赴请敷演。至后唐清泰中，諲付讲座，日为众三登法席。夏中长暑，览《藏经》一帙，精进苦节，人无与伦。乾祐二年正月，示疾而终，俗寿五十三，僧腊三十二。

。乃依天竺法火化，收合真体，圆净堪爱，门人树塔，至今存焉。次有长水县县泉院释梦江者，姓杨氏，本邑人也。神彩洒落，超拔凡态，遂愿出家，恒诵《仁王》、《般若》。进具后讲《百法论》。清泰中龙门广化寺请为众开演，遇帝幸其寺宣问，妙辩天逸，悦可上心，时于御前赐紫袈裟，确乎不受。训导二十余年，讲罢行道礼佛，日唯一食。慈忍于物，罕逢愠色。周显德三年疾终，缙素悲慕，为其建塔矣。

○汉杭州龙兴寺宗季传

释宗季者，俗姓俞，临安人也。稚齿瑰伟，心志刚直。尝天震邻家树，季随僵仆，有姊尼抱就膝，视之曰：“此非震死，且有生候。”至夜未央，苏而复作，遂劝令出家，事欣平寺僧。后往衢州，投巨信论师，学名数论，文义淹详，且难诘伏，锋芒如也。迨回杭，龙兴寺召讲。时僧正蕴让给慧纵横，两面之敌也。与闻丘方远先生、江东罗隐为莫逆之交也，见而申问，季作二百语褒之，让正赏叹，遂请开讲，四十余年，出弟子七八百人。汉乾祐戊申岁，疾终于本房。初，季讲次遇一异人，作胡语，问西域未来之经论，一众惊然。季眇二目，曾夜行感神光引之，常览古师之述作曰：“可俯而窥也。”遂撰《永新钞》，释《般若心经》，《晖理钞》解《上生经》，《弥勒成佛经疏钞》、《补猷钞阙》，诸别行义章，可数十卷，并行于世。季道行孤僻，性情方正，寡言语，气貌高迈，誓不趋俗舍。暨老恳请亦罕赴白衣家。居唯屡空，衍然自任，而孜孜手不释卷，乐道向终。至今此宗越多，弟子讲导不泯焉。

○周魏府观音院智？传

释智？，姓张氏，铜台永济人也。九岁，于邺都临清王舍城寺事师。暨受具戒，身器挺然八尺，面色玉如，行步若舒雁，言音如扣钟。人望之凜然，僉曰：“美丈夫也。”恒诵诸经，昼三夜三，礼佛无阙。本师知其法器，遣往滑台，抵明福寺，就晖师讲肆。期月，顿见诸法体用，喜不自任。时晖之门生■勇杰干者数十员，皆出？之下。？睢阳人请讲，未久，又今东京遇信士舍宅为万岁百法院。由此洛京、陈、许、徐、宿、维、青、琴台咸乐请其敷演，自鸠聚檀？，前后饭僧三十万。天雄军戴、张、郭三家同建观音院，命居之。？敏利之性天资，初终讲《百法论》，可百许遍。登法座，多不临文，悬述辩给。后三过览《大藏经》，以辅见知。其诵讽经咒也，尝闻户外阒然有弹指声者，感鬼神赞叹欤！魏帅陈君思让笃志归依，表荐紫衣师，号曰归政。殆临八十一，而意学欧王书体，仅入能妙。或问之，曰：“吾习来生字耳。”显德五年，年八十三，呼弟子奉晏等嘱累，令造木舆一所，敛送阇维。至其年十一月十一日奄终，奉木塔，举高三丈余。纵燎时有白鹤哀鸣，紫云旋覆。收拾舍利，建塔殓焉。

○大宋秀州灵光寺皓端传

释皓端，姓张氏，嘉禾人也。九岁，舍家入灵光精舍，师授经法，如温旧业焉。年登弱冠，受形俱无表。于四明阿育王寺遇希觉律师，盛扬南山律，端则一听旋有通明，义门无壅。寻投金华云法师学名数一支并《法华经》。后受吴兴缙伍所请讲论焉。两浙武肃王钱氏召于王府罗汉寺演训，复令于真身塔寺宣导。于时有台教师玄烛者，彼宗号为第十祖，端依附之，果了一心三观，遂撰《金光明经随文释》十卷。由是两宗法要，一径路通。忠献王钱氏借赐紫衣，别署大德，号崇法焉。后誓约不出寺门，慕远公之不渡虎溪也。高尚其事，仅二十余年，身无长衣，口无丰味，居不施关，坐唯一榻。以建隆二年三月十八日，坐灭于本房，容貌犹生。三日，焚之于城西，得舍利于煨烬之末。俗年七十二，僧腊五十二，凡著述传录记赞七十许卷，学得其门者止八十余人。端性耿介，言无苟且。一坐之间不谈世论，唯以佛法为己务，可谓傅翼之象王矣。秘书监钱昱尝典秀郡，躬睹端之标格，为著《行录》焉。

○大宋东京天清寺傅章传

释傅章，俗姓彭氏，开封东明人也。厥父譔，即邑甸之上农也，尘务之外，正见不回，恒读佛经，悬解诠旨。母邢氏尝梦入法宇，手探道器，因而娠焉。与父知怀非常之子，指腹誓令出俗。年甫十一，乃礼本邑《唯识》师秘公为师，一见异之。初授《净名》、《仁王》、《法华》三经，及削发去周罗，随秘公游五台，礼文殊应迹之地。其年受具。为息慈日，便于浚郊清朗法师座下听习《法华经》。后于睢阳道雅法师重温前业，寻学《唯识》于本师，颇揭厉于义津法水。又亲附副僧录通慧《因明》，且臻其极章。日诵三经兼二戒本，讲贯训徒，向二十载，未尝少辍广顺中，左街僧录广智大师荐闻于周高祖，赐紫方袍。大宋乾德二年，左街僧录道深荐于太祖神德皇帝，赐师号曰义明。俄示疾而终于本院，春秋五十五，法岁三十六。未绝之前，命笔作偈警世，而赠诸朋执矣。所度弟子一十五人，以其年十一月十六日上京之南原，用荼毗之法，薪尽火灭，得舌且不灰，众叹戒德。门人檀信共立塔焉，则开宝五年也。先是厥父恒务《法华经》，终后焚之，亦舌不坏。子父同验，实为罕有。相国寺清慧大师彝炳为《塔铭》焉。

○大宋并州崇福寺佛山院继伦传

释继伦，姓曹氏，晋阳人也。弱齿而壮，其志勇，其心决，求出家。本师授《法华经》，日念三纸，时惊宿习。慧察过人，登戒之后，至年二十一，学通《法华经》，义理幽赜，《唯识》、《因明》二论，一览能讲。由是著述，其钞至今河东盛行。三讲恒一百五十余徒，从其道训。又撰《法华钞》三卷。其为人也，慈忍成性，戒范坚强，人望之而心服。以刘氏据有并汾，酷重其道，署号法宝，录右街僧事，宽猛相参，无敢违拒。以伪汉己巳岁冬十月示疾，心析口述愿生知足天。终后顶热半日方冷，则开宝二年也。享年五十二。阍维毕，淘获舍利，远近分取供养焉。

○大宋齐州开元寺义楚传（修进省伦）

释义楚，俗姓裴氏，祖相州安阳人也。楚七岁来省历下，临坛大德修进因为出家师也。进乃楚之诸父也。季父省伦居香严院。进也诵《观音普门支经》向十万遍，立礼《法华经》，字字各拜，拜且彻部焉。伦则青丘主宰，禅居诵《大悲》《佛顶》俱一亿遍。楚执柯伐木，熏习相资，登此近圆，勤学不懈，敏慧夙成，《俱舍》一宗，造微臻极。遂传讲圆晖《疏》十许遍。后该览《大藏》三遍，乃慨儒家为佛教之文而多谬解，解既谬欤，事多误用。拟白乐天《六帖》，纂释氏义理、文章、庶事、群品，以类相从，建其门目，总括大纲，计五十部。随事别列四百四十门，始从法王利见部，终师子兽类部，其间物类，检括周旋，令供笔之时必无告乏矣。一十年中，孜孜罔倦，起晋开运二年至显德元年毕，进呈，世宗敕付史馆，赐紫衣，仍加号明教大师。以开宝中终于龙兴伽蓝。俗寿七十四，法腊五十四。楚始谋此作，随得便书，裒多益寡，日居月诸，郁成编录。忽因本院门古石上有六帖二字，天然分明。睹此灵符，乃知宿定，搜今斡古，笔不停缀。时枢密相国王公朴为楚作序，冠于编首，今行于寰海矣。初，楚著述心亦劳止，而双目丧明，医工莫疗。遂冥心忏过，虑删碎教文，裁量差脱，如是虔虔更无间息，再岁还明，人谓其征感焉。

○大宋杭州慈光院晤恩传

释晤恩，字修已，姑苏常熟人也。姓路，母张氏尝梦梵僧入其家而妊焉。及稚孺，见沙门相，必起迎迟。年十三，闻诵《弥陀经》，遂求出家。亲党饶爱，再三沮之，乃投破山兴福寺受训。后唐长兴中受满分戒，登往昆山慧聚寺，学南山律。晋天福初，从携李皓端师听习经论，悬解之性天然，时辈辄难抗敌。后微闻天台三观六即之说，冥符意解。汉开运中，造钱唐慈光院志因师，讲贯弥年，通达《法华》、《光明经》、《止观论》，咸洞玄微。寻施覆述，出弟子相次角立。雍熙三年八月朔日，恩于中夜睹白光自井而出，明灭不恒，谓门人曰：“吾报龄极于此矣。”乃绝粒禁言，一心念佛。次梦拥纳沙门执金炉焚香，三绕其室，自言“祖师灌顶来此相迎，汝当去矣。”梦觉，呼弟子至，犹闻异香。至二十五日为弟子说止观旨归及观心义。辰时，端坐面西而化，享年七十五，僧腊五十五。其夜院僧有兴、文偃等皆闻空中丝竹嘹亮而无沚鼓，且多铃铎，渐久渐远，依？西去。迨九月九日，依西域法焚，获舍利青白圆粒无？。恩平时谨重，一食不离衣钵，不畜财宝，卧必右胁，坐必加趺。弟子辈设堂居，亦同今之禅室。立制严峻，日别亲视明相，方许净人施粥，曾有晚饮薯蕷汤者，即时摒出龕堂。每一布萨，则漕洒不止，盖思其大集满洲之言耳。偏诲人以弥陀净业救生死事，受教得生感祥可见者，往往有之。凡与人言，不问贤不肖，悉示以一乘圆意。或怪不逗机者，乃曰：“与作毒鼓之缘耳。”不喜杂交游，不好言世俗事。虽大人豪族，未尝辄问名居，况迂趋其门乎？先是天台宗教，会昌毁废，文义残缺。谈妙之辞，没名不显。恩寻绎十妙之始终，研核五重之旨趣，讲《大玄义》、《文句》、《止观》二十余周，解行兼明，目足双运。

使《法华》大旨全美流于代者，恩之力也。又嫌昔人科节与荆溪记不相符顺，因著《玄义》、《文句》、《止观》、《金光明》、《金铉论科》，总三十五帖，见行于世。吁，河汉中有鱼溯流而上者何？潜泳有所取故。恩公不宽乘戒而出弟子十有七人，求解而行行耳。

○大宋天台山螺溪传教院义寂传

释义寂字常照，姓胡氏，温州永嘉人也。母妊娠公日不喜荤血，生乃首蒙紫帽而诞焉。幼启二亲，坚求去俗，旋入开元伽蓝。师授《法华经》，期月而彻，寺之耆老称叹希有。受具已，往会稽学南山《钞》。既通律义，乃造天台山研寻止观，其所易解犹河南一遍照也。先是智者教迹，远则安史兵残，近则会昌焚毁，零编断简，本折枝摧，传者何凭？端正其学，寂思鸠集也。适金华古《藏》中得《净名疏》而已。后款告韶禅师，嘱人泛舟于日本国购获仅足。由是博闻多识。微寂，此宗学者几握半珠为家宝欤？遂于佛陇道尝国清寺相继讲训，今许王钱氏在两浙日，累请开演，私署净光大师并紫方袍，辞让不却，受而不称。及兴螺溪道场，四方学侣雾拥云屯。太平兴国五年，朝廷条贯缙伍经业，寂从山入州治寺，寺东楼安置。楼近大山，夜梦刹柱陷没于地，意颇恶之。自徙于西偏僧房，其夜春雨甚，山崩楼圯。人咸谓寂先见同修报得之眼焉。因受黄岩邑人请，乘舟泛江放生，讲《流水长者品》。至海门灵石，是智者冬居道场也，劝人修寺塑像，入缘者繁沓。今上遣高品卫绍钦入山重建寿昌寺也，诸官同命受菩萨戒。雍熙初，永安县请于光明寺受戒。古殿像隳，腹中获《发愿辞》，即唐咸通六年沙门希皎施戒，劝七乡人装塑尊像，愿舍报为男子，童真出家，常布褐传法利乐众生云。观者皆意寂之前身也。四年，临海、缙云、永康、东阳诸邑请其施戒。九月，寂至自太末，十月，寝疾本院方丈。十一月四日，嘱诫门人：“不许哭泣祭奠。应缘俗礼者，非吾弟子也。”即窆于方丈，树小塔焉。享年六十九，法腊五十矣。四方传法弟子见星而舍者数百人。寂平素讲《法华经》并《玄义》，共二十许座，《光明》、《净名》、《梵网》等经、《止观》、《金铉》等论、《法界》、《还源》等观、《禅源论》、《永嘉集》各数遍，所著《止观义例》、《法华十妙不二门科节》数卷。自智者捐世，六代传法湛然师之后，二百余龄，寂受遗寄，最克负荷，其如炎蒸讲贯而无汗之沾洽，曾不久听而胜解佛乘。每一谈扬，则扞从金玉应，召羽商和，彼九旬说妙，相去几何？又尝寓四明育王寺，梦登国清寺上方，有宝庄严幢座，题曰文殊台，设询？阌隔，求入无由。俄睹观音菩萨从堂徐出，以手攘却行马，低迂相接。斯须，觉已与观音身混合不分，因而惊寤。自是之来，乐说无尽矣。或曰：“入普门智，乘利物悲，上合佛觉，证无上故。下合众生，凡同体故。开则群灵混成一法，得是心者，非观音而谁欤？”是以讲谈也，施戒也，自甌越之乡迨三天子障，民多稽戾，俗尚畋猎。受寂之训也，咸食樵革音，说法之功，所谓善建。由是堂室间可见者，曰澄或，曰宝翔，曰义通。及乎台之民庶，曾受戒法，迎真相来州治开元寺祭飨，皆缟素哀泣，天为之变惨，其慈摄之所感。知州郑公元龟为诗悲悼焉。

论曰：玄默垂文，圣人俯察。河雒之流有告，图书之法作程，禹受斯符，乃为经纬，本六十余字，训第表明，号《洪范》以开章，得彝伦而侦叙。帝王之法粲然可观，祖述之家翕尔宗此。我之佛道可弗然耶？教自西传，若龟马之文乍辩；声由此盛，如夏商之美惟扬。及其讲训相资，签笺互出，因分异辙，各竞颞门，施巧智之莫京，致慧心之悬合。宜乎得正信者必开正眼，见正道者必事正修，倒本前因，则以决择为主。原夫能诠之教喻图书也，所诠之理喻训第也，经容纬入，纬变经存，令表显之名言，从体义之相（去声）杂。《唯识》金推于护法，成即司南；《婆沙》奄有于余师，说同衍字。良以各迷己见，皆未极成，正不正之说恢张，玄又玄之谈崛起。大抵无名相法作名相说，非如色法影质易寻。名色交加，喜生迷竞。又以言存一意，义止一途，随情取舍之时，未为允当，随转理门之处，盖涉无文。加复教有弛张，意关详略，讨寻者非英明而莫悟，承领者非行位而那知？在人亡书，以教为折中。故论中以四种征理，理则难隐，一观待，二作用，三法尔，四证成。用斯道理，义岂惑乎？譬如甲氏背人而去，有二三子相问曰：“彼去者谁邪？”一云“乙也”。一云“丙也”。此俱未是。彼有识人云“甲也”。回面视之，是甲非乙。由其不识，遂有多名，识者一呼，应声而至。亲得自体，不涉异缘，故曰精义无二也。因义生解，解必虚通，除其执情，令生正解，断其迷执。执情断，故所执便遣。既能生解，则断障。二重断染，依他清浄，依他圆成，故得二胜果焉。不然者，认相似法，堕恶取空，曳曲木于稠林，泛胶舟于苦海，又不可胜道也。《瑜伽论》中契经体有二，一文二义。文是所依，义是能依。如是二种，总名一切所知境界也。夫以能化之教已翻，所诠之理难悟，苟非宿慧，安喻经心？宿慧当多世之熏，方能生起；经心乃大雄之意，岂易寻求？谚所谓老见事长，佛已三癯之扬历；多言或中，法从诸圣之同宣。岂得以夏虫共论其凌渤，井鱼互谈其渤遯？此诚不可也。必须近佛菩萨，善慧法师，四无碍居游戏之中，八辩音演自他之利。只如天亲大士将世尊之一言，中道圆宗成诸法之五位，如龙带涓滴而起为雨，望苗稼而施。又同《命包》作纬于《春秋》，《凿度》为资于《大易》，此皆善其通变，能其揣摩，以利根而教钝根，以正见而诱邪见，都称为摩诃般特伽也。西域蒲塞治家子以为裘，此方俊才鬻乳人而加水。成裘则易，以日见而留心；免水则难，以传来而隔手。昔以讲人论法，造疏寻宗，用成实法数之名，补大乘阙员之义。其有解法名目，随人见知，未融六释之端，何暇三隅之反？至若黎邪是报非报，化人有心无心，和合怖数之徒，闻熏灭不灭等百有余科，并《三藏》、《四含》之盘根，大小两宗之铃键，先贤之所不决，令哲之所共疑，但谓阙如，所知成障。及乎樊师西复，梵本东传，富《瑜伽》之宝林，开《唯识》之渊府，摩诃衍足杀三摩，明名数均著作之家，立破定是非之量。深山大泽，必生龙蛇，有大乘基为其高足。不缘宿习，多见生知，谓之义天，则明星有烂，谓之理窟，则善闭无关。堂堂合《周髀》之仪，轧轧应昆仑之轴。有经皆讲，无疏不成，权奇百本之名，控压四人之圣。复次光也宝也，测乎沼乎，章句之学颇长，释签之理何富！世茂《珠林》，迈编《图纪》，规附量度于鲸海，尚缀文荣于玉华，究《三论》极乎瑗康，穷《方等》归乎楷景。观公撰集《华严》，命章解相入之连环，且无难色；通绝行之断阁，故立易功。法藏从性海而游，智升自名流而出。伟欤一行，所作通神，实僧相之法王，乃人形之菩萨。

。忠、胤、琳、甫、贵、秀、诜、真，俱参译判经，尽开叶辟土。于烁宗密，美乎湛然，悟达全才，彻公令范，可以副人之求备哉！余诸上士，擅美殊方，落落英翹，互有长短。矧以佛之说经，申经者论；经由论显，论待疏通；疏总义章，义从师述。况以隔罗酆者见犹未尽，大遍知者知方得全。射侯之矢易疏，诊脉之求难中。若非亲证亲说，得自体之分明，载驱载驰，妄他求之溱暖，如摄异门分，羌别之相难知。故《智论》中吾灭度后，所有撰集者皆为《论》、《藏》摄也。俱作导师，指迷人之归路；悉衔明烛，照暗室之绩工。动戒足以行之，入定门而安矣。盖缠克断，智慧成功，咸从生死之河，尽度

涅槃之岸，此始可与言从闻且思，思至而修证大圆寂者。过此以往未知，执名滞义，问欲何为？故曰：“精义入神，以致用也。”既有所用，则舍筌蹄而直造佛地，此则深于其道者也。

卷八

◎习禅篇第三之一（正传十五人附见三人）○唐蕲州东山弘忍传

释弘忍，姓周氏，家寓淮左浔阳，一云黄梅人也。王父暨考，皆干名不利，责于丘园。其母始娠，移月而光照庭室，终夕若昼。其生也灼烁如初，异香袭人，举家欣骇。迨能言，辞气与邻儿弗类。既成童？，绝其游弄。厥父偏爱，因令诵书，无记应阻其宿熏，真心早萌其成现。一旦出门，徙倚间如有所待，时东山信禅师邂逅至焉。问之曰：“何姓名乎？”对问朗畅，区别有归，理逐言分，声随响答。信师熟视之，叹曰：“此非凡童也！具体占之，止阙七大人之相，不及佛矣。苟预法流，二十年后必大作佛事，胜任荷寄。”乃遣人随其归舍，具告所亲，喻之出家。父母忻然，乃曰：“禅师佛法大龙，光被远迩，缙门俊秀，归者如云。岂伊小呆，那堪击训，若垂虚受，固无留吝。”时年七岁也。至双峰，习乎僧业，不遑艰辛。夜则敛容而坐，恬澹自居。洎受形俱，戒检精厉。信每以顿渐之旨，日省月试之。忍闻言察理，触事忘情，哑正受尘渴方饮水如也。信知其可教，悉以其道授之。复命建浮图，功毕，密付法衣以为质要。将知斲雪山之肥膩，构作醍醐；踞海底之金刚，栖倾巨树。拥纳之侣麇至蝉联，商人不入于化城，贫女大开于宝藏，入其趣者号东山法门欤。以高宗上元二年十月二十三日告灭，报龄七十有四。是日氛雾冥暗，山石崩圯。门弟子神秀等奉瘞全身于东山之岗也。初，忍于咸亨初命二三禅子各言其志，神秀先出偈，惠能和焉。乃以法服付慧能，受衣化于韶阳。神秀传法荆门、洛下，南北之宗自兹始矣。又信禅师尝于九江遥望双峰，见紫云如盖，下有白气，横开六歧。信谓忍曰：“汝知之乎？”曰：“师之法旁出一枝，相踵六世。”信甚然之。及法融化金陵牛头山，貽厥孙谋，至于慧忠凡六人，号牛头六祖，此则四祖法又分枝矣。然融望忍则庶孽耳，安可匹嫡乎？开元中，太子文学闾丘均为《塔碑》焉。代宗敕谥大满禅师，塔曰法雨也。蕲春自唐季割属偏霸，暨开宝乙亥岁王师平江南之前，忍肉身堕泪如血珠焉。僧徒不测，乃李氏国亡之应也。今每岁孟冬，州人邻邑奔集作忌斋，犹成繁盛矣。其讳日将近，必雨雾阴惨，不然霰雪交霏，至日则晴朗焉。

○唐韶州今南华寺慧能传

释慧能，姓卢氏，南海新兴人也，其本世居范阳。厥考讳行？，武德中流于新州百姓，终于贬所。略述家系，避卢亭岛夷之不敏也。贞观十二年戊戌岁生能也，纯淑迂怀，惠性间出。虽蛮风諠俗，渍染不深，而诡行么形，驳杂难测。父既少失，母且寡居，家亦屡空，业无腴产。能负薪矣，日售荷担。偶闻麀肆间诵《金刚般若经》，能凝神属垣，迟迟不去，问曰：“谁边受学此经？”曰：“从蕲州黄梅冯茂山忍禅师劝持此法，云即得见性成佛也。”能闻是说。若渴夫之饮寒浆也，忙归，备所须留奉亲老。咸亨中，往韶阳，遇刘志略。略有姑无尽藏，恒读《涅槃经》。能听之，即为尼辨析中义。怪能不识文字，乃曰：“诸佛理论，若取文字，非佛意也

。”尼深叹服，号为行者。有劝于宝林古寺修道，自谓已曰：“本誓求师，而贪住寺取乎道也，何异却行归舍乎？”明日遂行，至乐昌县西石窟，依附智远禅师，侍座谈玄。远曰：“行者迨非凡常之见龙，吾不知，吾不知之甚矣！劝往蕲春五祖所印证去，‘吾终于下风请教也。’”未几造焉，忍师睹能气貌不扬，试之曰：“汝从何至？”对曰：“岭表来参礼，唯求作佛。”忍曰：“岭南人无佛性。”能曰：“人有南北，佛性无南北。”曰：“汝作何功德？”曰：“愿竭力抱石而舂，供众而已。”如是劳乎井臼，率净人而在先；了彼死生，与涅槃而平等。忍虽均养，心何辨知？俾秀唱予，致能知汝。偈辞在壁，见解分歧，揭厉不同，浅深斯别。忍密以法衣寄托曰：“古我先师转相付授，岂徒尔哉。呜呼！后世受吾衣者命若悬丝，小子识之。”能计回生地，隐于四会、怀集之间，渐露锋颖。就南海印宗法师《涅槃》盛集，论风幡之语，印宗辞屈而神伏，乃为其削椎髻于法性寺，智光律师边受满分戒，所登之坛即南宋朝求那跋摩三藏之所筑也。跋摩已登果位，悬记云：“后有肉身菩萨于斯受戒。”又梁末真谛三藏于坛之畔手植菩提树，谓众曰：“种此而后一百二十年，有开士于其下说无上乘，度无量众。”至是能爰宅于兹，果于树阴开东山法门，皆符前讖也。上元中，正演畅宗风，惨然不悦。大众问曰：“胡无情绪耶？”曰：“迁流不息，生灭无常，吾师今归寂矣！凶赴至而信。乃移住宝林寺焉。时刺史韦据命出大梵寺，苦辞，入双峰曹侯溪矣。大龙倏起，飞雨泽以均施；品物攸滋，逐根糗而受益。五纳之客拥塞于门，四部之宾围绕其座。时宣秘偈，或举契经，一切普熏，咸闻象藏；一时登富，悉握蛇珠；皆由径途，尽归圆极，所以天下言禅道者以曹溪为口实矣。泊乎九重下听，万里悬心，思布露而奉迎，欲归依而适愿。武太后、孝和皇帝咸降玺书，诏赴京阙，盖神秀禅师之奏举也。续遣中官薛简往诏，复谢病不起。子牟之心敢忘凤阙，远公之足不过虎溪，固以此辞，非邀君也。遂赐摩纳，袈裟一缘、钵一口、编珠织成经巾、绿质红晕花绵巾、绢五百匹，充供养云。又舍新兴旧宅为国恩寺焉。神龙三年，敕韶州可修能所居寺佛殿并方丈，务从严饰，赐改额曰法泉也。延和元年七月，命弟子于国恩寺建浮图一所，促令速就。以先天二年八月三日俄然示疾，异香满室，白虹属地，饭食讫，沐浴更衣，弹指不绝，气微目冥，全身永谢。尔时山石倾堕，川源息枯，鸟连韵以哀啼，猿断肠而叫咽。或唱言曰：“世间眼灭，吾畴依乎！春秋七十六矣，以其年十一月迁座于曹溪之原也。弟子神会若颜子之于孔门也，勤勤付嘱，语在《会传》。会于洛阳荷泽寺崇树能之真堂。兵部侍郎宋鼎为碑焉。会序宗脉，从如来下西域诸祖外，震且凡六祖，尽图绩其影。太尉房琯作《六叶图序》。又以能端形不散，如入禅定，后加漆布矣。复次蜀僧方辩塑小样真，肖同畴昔。能曾言：“吾灭后有善心男子必取吾元，汝曹勿怪。”或忆是言，加铁环缠颈焉。开元十一年，果有汝州人受新罗客购，潜施刃其元，欲函归海东供养。有闻击铁声而擒之。其塔下葆藏屈髻，布郁多罗僧，其色青黑碧缣复袷，非人间所有物也。屡经盗去，迷倒却行而还褫之。至德中，神会遣弟子进平送牙痒和一柄，朝达名公所重，有若宋之问谒能，著长篇。有若张燕公说寄香十斤并诗，附武平一至，诗云：“大师捐世去，空留法身在！愿寄无碍香，随心到南海。”武公因门人怀让铸巨钟，为撰《铭赞》，宋之问书。次广州节度宋规来礼其塔，问弟子令韬无生法忍义。宋公闻法欢喜，向塔乞示征祥。

须臾，微风渐起，异香？人，阴雨霏霏，只周一寺耳。稍多奇瑞，追繁不录。后肃宗下诏能弟子令韬，韬称疾不赴，遣明象赍传法衣钵进呈毕，给还。宪宗皇帝追谥曰大鉴，塔曰元和正真也。迨大唐季刘氏称制番禺，每遇上元烧灯，迎真身入城，为民祈福。大宋平南海后，韶州盗周思琼叛换，尽焚其寺，塔将延燎平时肉身，非数夫莫举，烟赳向逼，二僧对舁，轻如夹衲像焉。太平兴国三年，今上敕重建塔，改为南华寺矣。

系曰：五祖自何而识一介白衣，便付衣耶？通曰：“一言知心，更无疑罚况复记心轮间如指之掌。”忍师施一味法，何以在家受衣钵乎？秀师则否。通曰：“是法宁选缁白？得者则传。周封诸侯，乃分分器，同姓异姓别也。以祖师甄别精粗，以衣为信。譬如三力士射坚洛叉，一摩健那射则中而不破；二钵罗塞建提破而不度；三那罗延箭度而复穿余物也。非坚洛叉有强弱，但由射势力不同耳。南能可谓那罗延射而获赏焉。”信衣至能不传，莫同夏禹之家天下乎？通曰：“忍言受传衣者，命若悬丝，如是忍之意也。又会也禀祖法则有余，行化行则不足。故后致均部之流，方验能师之先觉，不传无私吝之咎矣。故曰知人则哲也，吁 1

○唐荆州当阳山度门寺神秀传

释神秀，俗姓李氏，今东京尉氏人也。少览经史，博综多闻。既而奋志出尘，剃染受法。后遇蕲州双峰东山寺五祖忍师，以坐禅为务，乃叹伏曰：“此真吾师也。”决心苦节，以樵汲自役而求其道。昔魏末有天竺沙门达磨者，得禅宗妙法，自释迦佛相传，授以衣钵为记，世相传付，航海而来。梁武帝问以有为之事，达磨贵传径门心要，机教相乖，若水投石。乃之魏，隐于嵩丘少林寺，寻卒。其年魏使宋云于葱岭见之。门徒发其冢，但有衣履而已。以法付慧可，可付粲，粲付道信，信付忍。忍与信俱住东山，故谓其法为东山法门。秀既事忍，忍默识之，深加器重，谓人曰：“吾度人多矣，至于悬解圆照，无先汝者。”忍于上元中卒，秀乃往江陵当阳山居焉。四海缁徒，向风而靡，道誉馨香，普蒙熏灼。则天太后闻之，召赴都，肩舆上殿，亲加跪礼。内道场丰其供施，时时问道。敕于昔住山置度门寺，以旌其德。时王公已下，京邑士庶竞至礼谒，望尘拜伏，日有万计。洎中宗孝和帝即位，尤加宠重。中书令张说尝问法，执弟子礼，退谓人曰：“禅师身長八尺脰眉秀目，威德巍巍，王霸之器也。”初，秀同学能禅师与之德行相埒，互得发扬无私于道也。尝奏天后请追能赴都，能恳而固辞。秀又自作尺牋，序帝意征之，终不能起，谓使者曰：“吾形不扬，北土之人见斯短陋，或不重法。又先师记吾以岭南有缘，且不可违也。”了不度大庾岭而终。天下散传其道，谓秀宗为北，能宗为南。南北二宗，名从此起。秀以神龙二年卒，士庶皆来送葬，诏赐谥曰大通禅师。又于相王旧邸造报恩寺，岐王范燕国公张说、征士卢鸿各为碑诔。服师丧者，名士达官不可胜纪。门人普寂、义福并为朝野所重，盖宗先师之道也。

系曰：夫甘苦相倾，气味殊致。甘不胜苦则纯苦乘时，苦不胜甘则纯甘用事，如是

则为药治病，偏重必离也。昔者达磨没而微言绝，五祖丧而大义乖，秀也拂拭以明心，能也俱非而唱道。及乎流化北方，尚修练之勤；从是分歧南服，兴顿门之说。由兹荷泽行于中土。以顿门隔修练之烦，未移磐石；将弦促象韦之音，空费躁心。致令各亲其亲，同党其党，故有卢奕之弹奏，神会之徙迁，伊盖施疗专其一味之咎也。遂见甘苦相倾之验矣。理病未效，乖竞先成。只宜为法重人，何至因人损法。二弟子濯击师足，洗垢未遑，折脛斯见，其是之喻欤。

○唐袁州蒙山慧明传

释慧明，姓陈氏，鄱阳人也，本陈宣帝之孙，国亡散为编管矣。明少出家于永昌寺，怀道颇切，扣双峰之法。高宗之世，依忍禅师法席，极意研寻，初无证悟，若丧家之犬焉。忽闻五祖密付衣钵与卢居士，率同意数十许人蹑迹急追，至大庾岭，明最先见，余辈未及。能祖见已，便掷袈裟，明曰：“我来为法，非望衣钵也。”时能祖便于岭首一向指订，明皆洞达，悲喜交至，问能曰：“某宜何往？”能记之曰：“遇蒙当居，逢袁可止。”明再拜而去，便更其名，以旧云道明也。下岭，给诸僧曰：“向陟崔嵬，远望杳无踪迹。”僧即退转。一说，居士掷衣钵于磐石曰：“此衣为信，岂可力争邪？任君拈去。”明遂手掀，如负钧石，而无举分，拱立舍旃，则咸亨四年也。以明未舍家曾署诸卫，故有“将军”之号矣。宜春太守秦琢奏谥号焉。

○唐洛京荷泽寺神会传

释神会，姓高，襄阳人也。年方幼学，厥性惇明，从师传授《五经》，克通幽赜。次寻《庄》、《老》，灵府廓然。览《后汉书》，知浮图之说。由是于释教留神，乃无仕进之意，辞亲投本府国昌寺颢元法师下出家。其讽诵群经，易同反掌。全大律仪，匪贪讲贯。闻岭表曹侯溪慧能禅师盛扬法道，学者骏奔，乃辍善财南方参问，裂裳裹足，以千里为跬步之间耳。及见，能问会曰：“从何所来？”答曰：“无所从来。”能曰：“汝不归去？”答曰：“一无所归。”能曰：“汝太茫茫。”答曰：“身缘在路。”能曰：“由自未到。”答曰：“今已得到，且无滞留。”居曹溪数载，后遍寻名迹。开元八年，敕配住南阳龙兴寺。续于洛阳大行禅法，声彩发挥。先是，两京之间皆宗神秀，若不■之鱼鲋附沼龙也。从见会明心六祖之风，荡其渐修之道矣。南北二宗时始判焉，致普寂之门盈而后虚。天宝中，御史卢弈阿比于寂，诬奏会聚徒疑萌不利。玄宗召赴京，时驾幸昭应汤池，得对言理允惬，敕移往均部。二年，敕徙荆州开元寺般若院住焉。十四年，范阳安禄山举兵内向，两京版荡，驾幸巴蜀。副元帅郭子仪率兵平殄，然于飞挽索然。用右仆射裴冕权计，大府各置戒坛度僧，僧税缗谓之香水钱，聚是以助军须。初洛都先陷，会越在草莽，时卢弈为贼所戮，群议乃请会主其坛度。于时寺宇宫观，鞠为灰烬，乃权创一院，悉资苦盖，而中筑方坛，所获财帛顿支军费。代宗、郭子仪收复两京，会之济用颇有力焉。肃宗皇帝诏入内供养，敕将作大匠并功齐力，为造禅宇于荷泽寺中是也。

会之敷演，显发能祖之宗风，使秀之门寂寞矣。上元元年，嘱别门人，避座望空，顶礼归方丈，其夜示灭。受生九十三岁矣，即建午月十三日也。迁塔于洛阳宝应寺，敕谥大师曰真宗，塔号般若焉。

系曰：“修其教不易其俗，齐其政不易其宜者。贵其渐也。会师自南徂北，行曹溪之法，洛中弥盛，如能不自异，外护已成，则可矣。况乎旁无力轮，人之多僻，欲无放逐，其可得乎？或曰：“其过不多，何遽是乎？”通曰：“犯时之忌，罪不在大。失其所适，过不在深。后之观此，急知时事欤？是以佛万劫学化行者，知化行难耳。无令固已而损法，慎之哉！”

○唐润州竹林寺昙璀传

释昙璀，俗姓顾氏，吴郡人也。肇国著姓，其来弥光。丞相有佐命之勋，尚书有挺济之誉。衣冠鼎胄，太岳峻岱峰之高；令问徽猷，江汉为南国之纪。星象降精，灵耀效祉，德备胎教，香符梦征。玄圭应上圣之祥，神宝蓄河汾之气。特受异准，生而不凡，襁褓之日而童蒙来求，佩褱之时而忘身殉道。和敏而纯素，温恭而克明，神器夙昭，清风渐扇。遂勉节出尘，栖心物表，金经秘藏，一日万言，不逾岁叙，而大经淹通。遂于晚年缅怀宗匠，始事牛头山融大师。融醇鹑瑰雄，东夏之达磨欤！梵幢宝柱，大海津梁，目以上根，乃诲之曰：“色声为无生之鸩毒，受想是至人之坑阱。致远多泥，子不务乎？”璀默而审之，直饬独上，咀甘露味，饮蒲萄浆，犹金翅不食异类，帝释无共鬼居。乃晦迹钟山，断其漏习，养金刚定，趣大能位，纳衣空林，多历年所。时淮南导首广陵觉禅师、江左名德建业如法师，咸杖锡方来，降心义体，握珠怀宝，虚往实归。则天皇母临朝，龚行佛事，高其道业，周勤诏书。时栖霞约法师，梵门之秀杰，躬以敦劝朝天，抗诏皇明，恐未然也。璀曰：“支伯辞帝舜之师，干木谢文侯之命，玄畅以善论而抗宋主，惠远不下山而傲齐后，彼何人哉！”由是遁北阜，逾东岗，考？云冥，后止于竹林之玃，葺宇籛缶而告老焉。既而绍列圣之鸿徽，继前贤之能事，翼亮皇梵，保宁天人。俄端然入定，七日而灭，春秋六十二。是岁天授三年二月六日也。翌日，依天竺法火化，遗骸收灰建塔，土庶含酸，悉皆号恸。门弟子僧感、僧君页等刻石纪事，奉全师礼。正议大夫使持节润州刺史汝南郡升向风遐想，悦而久之，褒德尚贤，赞成厥美焉。

○唐金陵延祚寺法持传

释法持，俗姓张氏，润州江宁人也。仪貌邕肃，肤体至润，幼而弃俗，长事明师，天机内发，识浪外澄。年十三，闻黄梅忍大师，特往礼谒，蒙示法要，领解幽玄。后归青山，重事方禅师，更明宗极，命其入室，传灯继明，绍迹山门，大宣道化。方既出山，凡是学众，咸悉从其咨禀心要，声价腾远，海内闻知。数年之中，四部依慕。时黄梅谢缘去世，谓弟子玄赜曰：“后传吾法者可有十人，金陵法持即其一也。”是知两处禅宗重代相袭。后以法眼付门人智威。长安二年九月五日，终于延

祚寺，遗嘱令露骸松下，饲诸禽兽，令得饮食血肉者发菩提心。其日空中有神幡数首从西而来，绕山数转，众人咸见。先居幽栖故院，竹林变白。报龄六十有八矣。

○唐越州云门寺道亮传

释道亮，姓朱氏，越州人也。厥考前刺会稽郡。亮年八岁出家，极通经业。受具后学河中《三论》，复讲《涅槃经》。寻入深谷，破衣覆形，蔬食资命，不交俗务，直守童真。神龙元年，孝和皇帝诏亮与法席宗师十人，入长乐大内坐夏安居。时帝命受菩萨戒。睿宗及妃后送异锦衾毡席。二年，诏于西园问道，朝廷钦贵。大都督李孝逸、工部尚书张锡、国子监周业、崔融、秘书监贺知章、睦州刺史康诜，同心慕仰，请问禅心，多结师资，或传香火。卒年八十二，门人慧远等建塔，万齐融为《铭》纪述。

○唐荆州碧涧寺道俊传

释道俊，江陵人也。住枝江碧涧精舍，修东山无生法门，即信、忍二祖号其所化之法也。勤洁苦行，迹不出寺，经四十余载。室迕人远，莫敢请谒者，唯事杜默。如是声闻于天，天后、中宗二朝崇重高行之僧，俊同恒景，应诏入内供养。至景龙中求还故乡，帝赐御制诗，并奘，景同归枝江，卒于本寺焉。

○唐温州龙兴寺玄觉传

释玄觉，字明道，俗姓戴氏，汉末祖侃公第五、燕公九代孙讳烈渡江，乃为永嘉人也。簪角出家，韶年剃发，心源本净，智印全文，测不可思，解甚深义。我与无我，恒常固知。空与不空，具足皆见。既离四病，亦服三衣。德水沐其身，所以清淨，良药治其眼，所以光明。兄宣法师者，亦名僧也，并犹子二人，并预缁伍。觉本住龙兴寺，一门归信，连影精勤，定根确乎不移，疑树忽焉自坏。都捐我相，不污客尘。睹其寺旁别有胜境，遂于岩下自构禅。庵沧海荡其胸，青山拱其背，蓬莱仙客，岁月往还；华盖烟云，晨昏交集。粤若功德成就，佛宝郁兴；神钟震来，妙屋化出。觉居其间也，丝不以衣，耕不以食，岂伊庄子大布为裳，自有阿难甘露作饭。觉以独学孤陋，三人有师，与东阳策禅师肩随，游方询道，谒韶阳能禅师而得旨焉。或曰：“觉振锡绕庵答对”，语在别录。至若神秀门庭，遐征问法，然终得心于曹溪耳。既决所疑，能留一宿，号曰一宿觉，犹半遍清也。以先天二年十月十七日于龙兴别院端坐入定，怡然不动。僧侣悲号，以其年十一月十三日殡于西山之阳，春秋四十九。初觉未亡前，禁足于西岩，望所住寺喟然叹曰：“人物骈阗，花舆翦蔚，何用之为！其门人吴兴兴师、新罗国宣师数人同闻，皆莫测之。寻而述之曰：‘昔有一禅师，将诸弟子游赏之次，远望一山，忽而唱曰：‘人物多矣。’弟子亦不测，后匪久此师舍寿，殡所望地也。’”西山去寺里有余程，送殡繁拥，人物沸

腾，其感动也若此。又未终前，有舒雁千余飞于寺西，侍人曰：“此将何来？”空中有声云：“为师墓所，故从海出也。”弟子惠操、惠特、等慈、玄寂，皆传师之法，为时所推。后李北海邕为守括州，遂列觉行录为《碑》，号神道焉。觉唱道著明，修证悟入，庆州刺史魏靖都绢缀之，号永嘉集是也。初觉与左溪朗公为道契，朗贻书招觉山栖，觉由是念朗之滞见于山，拘情于讲，回书激劝，其辞婉靡，其理明白。俾其山世一如，喧静互用，趣入之意，暗谕于是，达者赅之。终，敕谥号无相，塔曰净光焉。

○唐金陵天保寺智威传（本净）

释智威，俗姓陈氏，江宁人也。住近青山，地盘嘉气，善符宿瑞，维岳降神。爰在童年，器殊众识，至于戏弄，曾不染俗。性恶浮饰，人皆异焉。无何一朝，忽失其所，父母莫知攸往，乃遍历诸寺寻访之，威已依天保寺统法师。诵大乘经，早数百纸，聪敏超伦，众咸叹服。年二十，遇恩剃落，隶名于幽岩寺，因从持禅师谘请禅法，妙达深理，继踵前修。既获髻珠，淡然闲放，形容温润，面如满月，言辞清雅，慧德兰芳。望重一期，声闻远近，江左定学往往造焉。其中顿悟心源，即慧忠禅师，乃命嗣山门，盛传道化。威自出止延祚寺，说法利人，广施饶益。以开元十年二月十八日，终于住寺，遗嘱林中饲鸟兽，弟子玄挺等依言奉行。春秋七十七。威一时夜行头陀，将值天晓，有三虎遇之。威截路中过，了无怖色。虎随至山门，四顾而去。每有二兔一犬庭际游戏，各无间畏。盖大悲平等，物我一均，故其然也。次司空山释本净，姓张氏，东平人也。少入空门，高其节操。游方见曹溪六祖，决了疑滞，开元初于南岳司空山闲放自处，人不我知，蔽伪之故也。天宝中因扬庭光采药，邂逅相逢，论道终日，回奏，诏赴京，于白莲华亭安置。帝知佛法幽深，孰堪商擢，敕召太平寺远法师及两街三学硕德，发问锋起，若百矢之逐一兔焉。净举措容与，四面枝梧，譬墨翟之解九攻机械矣。既而辩若建瓴，褒抗之余，乃引了义教授证。复说伽陀，一无留滞。皇情怿悦，观者叹嗟。以上元二年五月五日归寂，寿龄九十五。敕谥大晓禅师，亦带所居为名，曰司空山禅师也。

○唐睦州龙兴寺慧朗传（瓢公）

释慧朗，新定遂安人也。年二十有二，于衢州北山遇南宗顿教之首，将请为师，乃逆相谓曰：“汝久积净业，吾非汝师，可往天台，当逢哲匠。”至剡溪石城寺见一禅翁，莫知其来，鹤发冰肤，目如流电，声含钟律，神合太虚。乃问朗曰：“子将何之？”答曰：“欲往天台，求佛大法。”因同行十数里，憩林树下，而指训之曰：“法常寂然，彼亦如也。何必适远，当化有缘，宜归本生，度无量众。”言毕，求之无方，豁然本心悟佛知见，林栖谷饮，凡经数载，乃却归故邑慧安寺。净名白衣，服非法服，纯陀工巧，心如佛心。骊珠尚潜，师子未吼，弱丧之终，涉川迷津。一日，秦望山林岭振动，俄有大龟呈质，咸相谓言“此何祥也”？寻有禅僧曰，自会稽云门而来，身長八尺四寸，高鼻大目，睛光射人，明《大品》、《思益》、

《维摩》等经，兼博通诸论。众曰：“神僧也，大龟应乎此也。”朗秘菩萨行，请之为师。征《维摩经》义，答曰：“如日照萤火海沃牛迹耳。”公深器之曰：“真净名也。”景龙中，乡人吴川县尉余少兴、宗党新昌县令余仁等十数家咸共宗事，递请降临。一夕，忽睹神光从项而出，旁烛山川，盈十数里，含情之类罔不归依。公加师资之礼，由兹反拜，请朗登座。乃先示法身遍同群有，次明遍化一切皆如。道俗欣然而各叹曰：“昔山之震动，龟之鰐祥，非公之应明矣。”至是四方学禅观者臻萃。开元四年，本州牧李思绚于龙山之阳建伽蓝，延以居之。方大设戒坛，广邀律德，有光州岸公、会稽超公而为上首。既而发希有心，受具足戒，珠圆月满，内外俱明，遍临坛为戒师，旋请益为学士，众情加重，道在益尊。七年，刺史韦利器深心归向。八年，歙州长史许思恭请往治所。朗升法座，无何熊伏于前，闻钟而来，众散而去。时皆惊惧，虞其搏攫。原其有听法之心耳，其驯猛兽也若此。十三年九月二十一日，告门人曰：“吾将去矣。吾三生此州，今一生矣。”言讫，俨然而寂，春秋六十四。禀遗命荼毗建塔。学者既多颖脱，则开元寺道钦、慧祐、道禅、龙兴寺、海、宁国寺、进玉、越州宝林寺有沛、远整杭州竹林寺一行等，并传朗之法，相继若瓜瓞然。至大历十二年，新定太守萧定述《碑》，司马刘长卿书，刺史李揆篆额，所谓俱是名公，盛夸全美有矣。

○唐郢州安国院巨方传（智封）

释巨方，姓曹氏，安陆人也。弱龄干节立身，从师稟业于州治明福院朗禅师，而听诵《法华》、《维摩》二经，功毕受具。讲述南宗论数席，即拂衣而起。禅会必参，后造北宗秀公所，锐精稽考，一见默许之。秀问曰：“白云散处如何？”曰：“不昧也。”又问：“到此间后如何？”曰：“正见一枝生五叶。”秀颌之。数载之间，入室侍对，庶几真道，罕有伦？。乃辞观方，至上党寒领而居。积稔之间，学徒数百，求请无阻。凡所提唱，真妄同源，迟速异剂，得心助道，在乎修治，大较如此。郢帅吴文涣侍中钦慕其风，遣使请归府建安国院。传法化徒，尚祖风者不离于席，顿悟多矣。郢帅问曰：“今日后如何？”答云：“地布金沙，人安宝刹。”吴帅信伏。因兹一府军民，咸加宗仰。吴氏家无少长，重若神明，檀施丰厚。方后于五台山道化，涉二十余载。入灭时告众曰：“吾齿尽于此矣。”言讫长逝，春秋八十一。以开元十五年九月三日，全身入塔云。次河中府安国院释智封，姓吴氏，怀安人也。中年学道，励操谨躬，行头陀之行，卯食之后，水浆不度齿焉。于本州清静寺恒法师下落发受具，综习《惟识论》。或人所诘，责之以滞于名相。愤发罢讲，游行登武当山，见秀师会疑冰解泮。思养圣胎，倏辞出蒲津安峰山，禁足十年，木食涧饮。属州牧卫文庠请归城内，建新安国院居之。因兹奔走毳衣，蔚然繁盛。使君问曰：“某今日后如何？”对曰：“日从蒙汜出，照树全无影。”使君初不喻旨，拱揖而退。少选开晓，充拙于怀。封来往中条山二十余年，俭薄不充。得其道者不可胜纪。入灭后，门人于州北三十步建塔焉。

○唐郢州大佛山香育传

释香育，姓李氏，济阴人也。父为兖府掾。育有道性，常研习《庄老》，根器奋发。俄于释典留神，决捐俗态。趋沧州安定寺智元律师所，乞求削染。满足戒后，精力律学，垂欲卒业。一旦辞师观游圣迹，陟天台，登南岳，或入岩阿，或栖树下，未至五台。后参预秀师盛化，夙心相契，击节希声。秀问之，育答密若隐书，一皆开释。秀默异之，在丛众间，多历年所，洞彻心源，则辞秀去。入富水大佛山，劲节安禅，卯前一食。州将韩闰笃钦其道，坚召出山，育称疾而已。因是黑白之众渴仰归依，韩使君辎车继运，供施交骈，树造法堂，严饰奇丽，时来问道。韩侯问：“佛法已后事如何？”答云：“如同太虚，委在有力。”韩侯钦尚，徒众常有千计，贤不肖驳杂而居，往往闻有不测之僧预其听受焉。一旦说法次，告众曰：“善哉是会，遭遇者艰。须决所疑，无遣虚度。”命水涤盥，端坐而化，春秋七十有三矣。

○唐兖州东岳降魔藏师传

释藏师，姓王氏，赵郡人也。父为亳州掾。稚齿寻师，居然慕法，而性好独处。譙多厉鬼，持魅于人。藏七岁，只影闲房，孤形迴野，尝无少畏。至年长，弥见挺拔，故号降魔藏欵。请列青衿于广福院明赞禅师，师意其法器，乃发缽之，应对辩给，答出问表。因留执事，服勤受法，俾诵《法华》，逾月彻部，登即剃落，受具习律焉。次讲南宗论，大机将发。俄投麈尾，九州灵迹罕不登升。后往遇北宗鼎盛，便誓依栖。秀问曰：“汝名降魔，我此无山精木怪，汝翻作魔邪？”曰：“有佛有魔。”秀云：“汝若是魔，必住不思议境界也。”曰：“是佛亦空，何不思议之有？”时众莫不异而钦之。先是秀师悬记之：“汝与少？之墟有缘。”寻入泰山数年，学者臻萃，供亿克周，为金舆谷朗公行化之亚也。一日，告门人曰：“吾今老朽，物极有归，正是其时。”言讫而终，春秋九十一矣。

卷九

◎习禅篇第三之二（正传十四人附见四人）○唐京兆慈恩寺义福传（行恩）

释义福，姓姜氏，潞州铜鞮人也。幼慕空门，黍累世务，初止蓝田化感寺，处方丈之室凡二十余年，未尝出房宇之外。后隶京师慈恩寺，道望高峙，倾动物心。开元十一年，从驾往东都，经蒲虢二州，刺史及官吏士女皆赍幡花迎之，所在途路充塞，拜礼纷纷，瞻望无厌。以二十年卒，有制谥号曰大智禅师，葬于伊阙之北，送葬者数万人。中书侍郎严？之躬行丧服，若弟子焉，又撰《碑》文。神秀禅门之杰，虽有禅行，得帝王重之无以加者，而未尝聚徒开法也。洎乎普寂始于都城传教二十余载，人皆仰之。初福往东洛，召其徒戒其终期，兵部侍郎张均太、尉房琯、礼部侍郎韦陟常所信重，是日皆预造焉。福乃升堂，为门人演说，且曰：“吾没日昊，当为此决别耳。”久之，张谓房曰：“某夙岁饵金丹，未尝临丧。”言讫，张遂潜去。福忽谓房曰：“与张公游有年矣。张公将有非常之咎，名节皆亏。向来若终此法会，足以免祸。惜哉！”乃提房手曰：“必为中兴名臣，其勉之！”言讫而终。后张均陷贼庭也，受其伪官，而房翼戴两朝，毕立大节，皆终福之言矣。又释行思，姓刘氏，庐陵人也。濡润厥躬，贞谅其性。出尘之后，纳戒已还，破觚求圆，斫雕为朴，厥志天然也。往韶阳见大鉴禅师，一言蔽断，犹击蒙焉。既了本心，地瘠迭告还，复吉州阐化，四方禅客繁拥其堂。开元二十八年十二月十三日入灭于本生地，敕谥大师，号曰洪济，塔曰归真。其塔会昌中例从堙毁，后法嗣者重崇树之。

○唐京师兴唐寺普寂传

释普寂，姓冯氏，蒲州河东人也。年才稚弱，率性轩昂，离俗升坛，循于经律。临文揣义，迥异恒流。初闻神秀在荆州玉泉寺，寂乃往师事，凡六年。神秀奇之，尽以其道授焉。久视中，则天召神秀至东都论道，因荐寂，乃度为僧。及秀之卒，天下好释氏者，咸师事之。中宗闻秀高年，特下制令普寂代本师统其法众。开元二十三年，敕普寂于都城居止。时王公大人竞来礼谒，寂严重少言，来者难见其和悦之容，远近尤以此重之。二十七年，终于上都与唐寺，年八十九。时都城士庶谒者皆制弟子之服。有制赐谥曰大慧禅师。及葬，河南尹裴宽及其妻子，并缞麻列于门徒之次。倾城哭送，闾里为之空焉。裴尹之重寂，职有由矣。寂之阐化，神异颇多，裴皆目击，又得心印，归向越深。时多讥诮，裴日夕造谒，执弟子礼曾无差脱。一日诣寂，寂悬知弟子一行之亡。及寂之终灭，裴之悲恻若丧所亲，纓衰至徒步出城，妻子同尔，搢绅之讥生于是矣。

系曰：人之情也有爱恶焉，爱之者不见可恶，恶之者不见可爱矣。夫万物纷纶，任其爱恶，折中之道，可爱而不可恶。爱之者君子也，恶之者小人也，爱之不以道，则君子之病矣。裴尹冠裳在御，职事在躬，不避密行，显掇时谤，宜哉。譬诸僧耽俗务，胡不舍袈裟而衣逢掖乎？若实得道，后终期脱屣，有何不可邪？宽不抽簪，

何悖礼于丘之门坎？宽若行方外之道，复何诛焉。达人大观，物无不可矣。

○唐南岳观音台怀让传

释怀让，俗姓杜，金州安康人也。始年十岁，雅好佛书，炳然殊姿，特有灵表，识者占是出家相，非染俗贵。人宝来瑞，国庆无疆，方之麟凤龟龙，无万数也。天地无全功，气序有盈虚，纲维缺坏，补塞不足，皆冥维密祐，惟应度者乃烛厥理，非庸庸所知也。弱冠诣荆南玉泉寺，事恒景律师，便剃发受具，叹曰：“夫出家者为无为法，天上人间无有胜者，经之所谓出四衢道露地而坐也。”时坦禅师乃劝让往嵩丘觐安公，安启发之，因入曹侯溪，觐能公。能公怡然，无馨无臭，洪波泛臻大壑之广乎？《韶》？《合奏大乐之和乎？让之深入寂定，住无动道场，为若此也。能公大事缘毕，让乃跻衡岳，止于观音台。时有僧玄至拘刑岳，举念愿让师救护。让早知而勉之，其僧脱难，云是救苦观音，得斯号也亦由此焉。化缘斯尽，传法弟子曰道峻，曰道一，皆外堂睹奥也。其后一公振法鼓于洪州，其门弟子曰惟宽、怀晖。道一大缘将訖，谓宽等曰：“吾师之道存乎妙者也，无待而常，不住而至，能事集矣。金口所生，从法而化，于我为子，及汝为孙，一灯所传，何有尽者？”让以仪凤二年生，至天宝三载八月十日终于衡岳，春秋六十八，僧腊四十八。一公建塔于别峰。元和中宽、晖至京师，扬其本宗，法门大启，传百千灯。京夏法宝鸿绪，于斯为盛。至八载，衡阳太守令狐权问让前迹，权舍衣财以充忌斋。自此每岁八月为观音忌焉。宝历中，敕谥大慧禅师，塔号最胜轮。元和年中常侍归登撰《碑》云。

○唐京师大安国寺楞伽院灵著传（法皀）

释灵著，姓刘氏，绵州巴西人也。年殆志学，方遂出家，登戒寻师，不下千里。年四十，精毗尼道，兼讲《涅槃》，一律一经，勤于付授。晚岁请问大照禅师，领悟宗风，守志弥笃。后诣长安，诞敷禅法，慕道求师者不减千计，若鱼龙之会渊泽也。以天宝五载四月十日申时，示灭于大安国寺《石楞伽经院》，享寿五十六，僧夏三十六。将终，寺中亟多变怪，盖法门梁栋之颓挠也。著加趺而坐，怡然而化。三七日后荼毗，起塔于龙首岗，邻佛陀波利藏舍利之所，帝女嫫之坟右，以其年十月十日迁入塔焉。弟子朗智、道■、如一追慕师德，香火不绝。内侍上柱国天水赵思侃命释子善运撰《碑》于塔所焉。有钱塘灵智寺释法玩，俗姓冯，本长乐人也，随祖宦于江东，遂为钱塘人也。父子通，字元达，世袭冠裳，传其素业。然精核百氏之余，执志慕净名之应质，谈论多召禅林之士，于家别室供礼，愿生令嗣。弥久，玩诞于家，歧嶷之性，天发端谨。才胜衣也，后父求出俗，固不阻留。披剃登具，探赜三乘，如指掌焉。而性终耿介，于此寺之深坞，实浙江之阳也，别构兰若，去伽蓝复远，终日安禅。时同志者造门请益，玩随事指南，多有所证。以天宝二载十二月十三日，天之将晓，告侍者，端坐奄从泥曰，春秋六十五，僧腊减二十年。于时山鸟哀鸣，云雾蒙惨，远近檀越悲泣者如堵。以其月十九日迁殡于寺侧山原。有弟

子俞法界及子怀福、犹子希秀等，旧所归心，结塔营事，皆出其家。塔因会昌中所毁，今存？焉。碑石漫没，吁哉！

○唐润州幽栖寺玄素传

释玄素，字道清，俗缘马氏，润州延陵人也。生有异度，幼而深仁，乳育安静。髻髻希尚，求归释门，父母从之，出依净域。以如意年中，始奉制度，隶名于江宁长寿寺。进具已后，戒光腾烛，定水澄涟，思入玄微，行逾人表。既解色空，常慕宗匠。晚年乃南入青山幽栖寺，因事威禅师，躬历弥载，撞钟大鸣。威海以胜法，得其不刊之旨。从是伏形苦节，交养恬和，败纳衲身，寒暑不易，贵贱怨亲，曾无喜愠，时目之为婴儿行菩萨。道业既高，人希瞻礼。开元年中，僧注密请至京口，郡牧韦铣屈居鹤林，四部归诚，充塞寺宇。素纳衣空床，未尝出户，王侯稽首，不为动遥顾世名利，犹如幻焉。忽于一日，有屠者来礼谒，自生感悟，忏悔先罪，求请素明中应供，乃欣然受之，降诣其舍。士庶惊骇，咸称“异哉”。素曰：“佛性是同，无生岂别？但可度者，吾其度之，何异之有？”天宝之初，吴越瞻仰如想下生。扬州僧希玄请至江北，窃而宵遁。黑月难济，江波淼然，持舟拟风。俄顷有白光一道，引棹直渡，通波获全。楚人相庆佛日再耀。倾州奔赴，会于津所。人物拒道，间无立位，解衣投施，积若山丘。略不干其怀抱，令悉充悲田之费。礼部尚书李愔为扬州牧，斋心虔虔，二时瞻近。未几而京口道俗思渴法音，仍移牒渡江，再请还郡。二处纷诤，莫决所从。李时谓人曰：“本期奉道，反成爱憎。”因任从所请，却归南郡，其感物慕德，罕有与伦。以天宝十一载十一月十一日中夜，无疾而化，春秋八十有五。哀感人伦，恸彻城市。以其月二十一日奉全身建塔于黄鹤山西所住之地。方伯邑宰，尽执丧师之礼，率众申哀，江湖震响。素往于寺内坐禅之所，高松偃覆如盖，及移他树，还互如前。又当舍寿之夕，房前双桐无故自枯。识者以为双林之变。但真乘妙理，绝相难思，嘉瑞灵祥，应感必有。《经》云“隋缘赴感”，即其事也。有门弟子法鉴及吴中法钦，此二大士重光道原，金具别传。受菩萨戒弟子吏部侍郎齐遒、广州都督梁卿、润州刺史徐峤、京兆韦昭理、给事中韩赏、御史中丞李舟、礼部崔令钦，并道流人望，咸款师资，亦尝问道于径山，犹乐正子春于夫子，洗心瞻仰，天汉弥高。水鉴明心，悟深者众矣。泊大和中，远慕遗风，高其令德，追谥大律禅师，大和大宝杭之塔。后人多以俗氏召之曰马祖，或以姓名兼称曰马素是也。

系曰：弥天以出家子咸姓释氏，悬合后到《阿含经》，可不务乎？素师以俗姓呼之，必有由矣。噫，繁盛法嗣，犹不能遏此讹称，则知素师名翼一飞，四海仰止，故登俗域。今警将来，宜正名也。

○唐均州武当山慧忠传

释慧忠，俗姓冉氏，越州诸暨人也。孰辨甲子？或谓期颐之年。肌肤冰雪，神宇峻

爽。少而好学，法受双峰，默默全真，心承一樱行无住相，历试名山，五岭、罗浚、四明、天目，白崖倚帝，紫阁摩穹，或松下安居于九旬，或嵌空息虑于三昧。既悬明月之戒，亦净琉璃之心，已度禅定之门，不起无生之见。疑若苏卢，八风莫能动；清如净鉴，万象何所隐？可止也我，则武当千峰狎于麋鹿；可行也我，则虎溪一径分卫人间。薄游吴楚，以至于顺阳川焉。卜居党子之林泉，四十余祀；深入法王之圣定，八万广门。道声洋溢，力量充矣！开元年中，刺史前中书侍郎开国公王琚、司马太常少卿赵颐贞，信潭以清，闻风而悦，税驾扣寂，杳然虚空。礼足散金银之华，不异弥伽长者；执手见微尘之佛，等毗目仙人。上奏玄宗，征居香刹，则龙兴寺也。由是罢相、节使、王公、大人，罔不膜拜顺风，从而问道。忠博达诂训，广穷经律，降魔制外，孰之与京？不可以威畏，不可以利动，噉日而食，对月澄心，清风飞霜，劲节凌竹，辞检理诣，折彼幔幢。论顿也不留联迹，语渐也返常合道。得之于心，伊兰作緇檀之树；失之于指，甘露乃蒺藜之园。妙不可传，花多果少，世有执砾水中，若获琉璃之宝；掬泡瓶内，谓得摩尼之珠。忠所以诃之止之，不能已矣。故有超毗卢之说，令其不著佛求；越法身之谈，俾夫无染正性。岂毗卢之可越而法身之可超哉？是以虚空之心合虚空之理，纤妄若云翳，宗通如日月。朝郎结驷而至，安禅不动，受其顶谒，俨如也。盖所谓昔人不迎七步，以福于于万乘之君，岂止百寮而已哉。肃宗皇帝载定区夏，闻其德高，以上元二年正月十六日敕内给事孙朝进鹓骑迎请，其手诏曰：“皇帝信问，朕闻调御上乘以安中土，利他大士共济群。生师以法鉴高悬，一音演说，藏开秘密，境入圆明，大悲不倦于津梁，至善必明于兼济。尊雄付嘱，实在朕躬。思与道安宣扬妙用，广滋福润，以及大千。传罔象之玄珠，拔沈迷之毒箭，良缘斯在，勿以为劳。仗锡而来，京师非远。斋心已久，副朕虚怀。春寒，师得平安好！遣书指不多及。”忠常以道无不在，华野莫殊，遂高步入宫，引登正殿。霜杖初下，日照龙衣，天香以焚，风飘羽盖。时忠骧首接武，神仪肃若。天子钦之，待以师礼。奏理人治国之要，畅唐尧、虞舜之风。帝闻竦然，膝之前席。九龙洒莲华之水，万乘饮醍醐之味。从是肩舁上殿，坐而论道，不拘彝典也。寻令骠骑朱光辉宣旨住千福寺。相国崔涣从而问津，理？于心，淡之朝野。识真之士，往往造焉。洎夫宝应临御，以孝理国，匪移前眷，划开万里之天，若见三江之月。又敕内侍袁守宏迎近阙下光宅寺安置，香饭云来，紫衣天降，虽使臣拥禅门而不进，御府列玉帛而盈庭，了之如泡，观之若梦，澹然闲任，自乐天倪。亦可罗浮不归，方名宴坐；双峰长往，始契无生者哉。成圣元胎，于是乎在，固所以万行齐发、千门不累于心矣。则兜率之鼓，无形乃声，修罗之琴，不抚而韵，香传天主，花两空王，见之于忠矣。常以思大师有言，“若欲得道，衡岳武当”，因奏武当山请置太一延昌寺，白崖山党子谷置香严长寿寺，各请《藏经》一本，度僧护持。二圣御影，镇彼武当。王言惟允，有司承式。猴江雁塔，虽未饰于中峰，茅栋柴扉，便以名于梵宇。睿札题额，鸾回鹄飞，山川光煌，黑白?跃，想金殿之可期，睹瑶台之非远。至大历八年，又奏度天下名山僧中取明经律禅法者，添满三七人。道门因之，羽服缁裳，罔不庆恱。数盈万计，用福九重也。忠往在南阳，陷于贼境，固请回避，皆不允之。临白刃而辞色无挠，据青云而安坐不屈。魁帅观具禅德淡若，风韵高逸，投剑罗拜，请师事焉。于时避寇遇寇者众矣。无何，群

盗又至，乃曰：“未可以踵前也。”遂杖锡发趾，沿江而去。有𪔐其先踪，坚住不避者，尽被诛戮。则知云物气象，有如先觉，存而不论，道何深也！金籍曰“般若无知而无不知”，斯之谓欤！内德既充，外应弥广，自藏珍宝，人莫之窥。於戏，论龙奋迅，而？多不知，忉利雨花，而明彻莫识。前贤？世，正眼随灭，不亦悲夫！忽疾将亟，国医罔效，自知去辰，众问后事，乃曰：“佛有明教，依而行之，则无累矣。吾何言哉？”粤十年十二月九日子时右胁累足，泊然长往。所司闻奏，皇情悯焉。中使临吊，赙赠甚厚。敕谥号曰大证禅师。有诏归葬于党子之香严寺，循其本也。威仪手力，所在支給，具饰终之礼，哀恻梵场也。敕常修功德使检校殿中监兴唐寺沙门大济，早接道论，豁如披云，虽非门人，哀逾法嗣。凡有敷奏，圣皆允焉。在家弟子开府孙知古并弟内常侍朝进、居士景超昆季等，僧弟子千福寺志诚、光宅寺智德、香严寺主道密等，凡数万人，痛石室之末筹，悲云峰之耸塔，晨钟徒击于高殿，夕梵空奏于前山，哲人云亡，畴将仿仰！译经沙门飞锡为《碑》纪德焉。

○唐太原甘泉寺志贤传

释志贤，姓江，建阳人也。夙心刚整，幼且成规，既遂出家，寻加戒品，沾尝渐教，守护诸根，抗节修心，不违律范。天宝元年，于本州佛迹岩承事道一禅师，曾无间然，汲水拾薪，惟务勤苦。游方见金华山赤松洞，是皇初平叱石羊之地，郁林峻岭，泉湖百步许。意乐幽奇，既栖巅顶，野老负香糠蔬茹以供之。时天大旱，贤望空击石，曼骂诸龙曰：“若业龙，无能为也。其菩萨龙王，胡不遵佛敕救百姓乎？”敲石才毕，霈然而作，嫠人咸悦。后游长安，名公硕德列请为大寺功德之师，贤悚然不顾。明日遂行，登五台，寻止太原甘泉寺，道俗请学禅理者继至。无疾而终，敕谥大远禅师，旌乎厥德矣。

○唐黄龙山惟忠传

释惟忠，姓童氏，成都府人也。幼从业于大光山道愿禅师，神骥伏枥，虽止也，发蹄则超忽千里焉。游嵩岳，见神会禅师，折疑沈默，处于大方。观览圣迹，见黄龙山郁翠而奇异，乃营茅舍。其穷溪极谷而多毒龙，喷气蒙蒙，山民犯者多如中瘴焉，医工寡效。忠初不知，独居禅寂，涧饮水食，其怪物皆卷而怀矣，山民无害。或闻空中声云：“得师居此，民之多幸，令我解脱也。”乡人因号是山为伏龙，言忠弭伏鳞虫之长，故此名焉。以建中三年入灭，报龄七十八。其年九月迁塔云。

○唐南岳石头山希迁传

释希迁，姓陈氏，端州高要人也。母方怀孕，不喜荤血。及生岐嶷，虽在孩提，不烦保母。既冠，然诺自许，未尝以气色忤人。其乡洞獠，民畏鬼神，多淫祀，率以牛酒，祚作圣望。迁辄往毁丛祠，夺牛而归，岁盈数千，乡老不能禁其理焉。闻大

鉴禅师南来，学心相踵。迁乃直往，大鉴絅然持其手，且戏之曰：“苟为我弟子，当肖。”迁莞尔而笑曰：“诺。”既而灵机一发，廓若初霁。自是上下罗浮，往来三峡间。开元十六年，罗浮受具戒，是年归就山，梦与大鉴同乘一龟，泳于深池。觉而占曰：“龟是灵智也，池是性海也。吾与师乘灵智游性海久矣，又何梦邪？”后闻庐陵清凉山思禅师为曹溪补处，又掇衣从之。当时思公之门，学者麇至。及迁之来，乃曰：“角虽多，一麟足矣。”天宝初，始造衡山南寺。寺之东有石状如台，乃结庵其上，杼载绝岳，众仰之，号曰石头和尚焉。初，岳中有固、瓚、让三禅师，皆曹溪门下，僉谓其徒曰：“彼石头真师子乳，必能使汝眼清凉。”由是门人归慕焉。或问解脱，曰：“谁能缚汝？”问净土，曰：“谁能垢汝？”其答对简速，皆此类也。广德二年，门人请下于梁端。自江西主大寂，湖南主石头，往来憧憧，不见二大士为无知矣。贞元六年庚午岁十二月二十五日顺化，春秋九十一，僧腊六十三。门人慧朗、振朗、波利、道悟、道铄、智舟相与建塔于东岭。塔成三十载，国子博士刘轲素明玄理，钦尚祖风，与道铄相遇，盛述先师之道，轲追仰前烈，为《碑》纪德，长庆中也。敕谥无际大师，塔曰见相焉。

○唐成都府净众寺神会传

释神会，俗姓石，本西域人也。祖父徙居，因家于岐，遂为凤翔人矣。会至性悬解，明智内发，大璞不耀，时未知之。年三十，方入蜀，谒无相大师，利根顿悟，冥契心契。无相叹曰：“吾道今在汝矣。尔后德充慧广，郁为禅宗。其大略寂照灭境，超证离念，即心是佛，不见有身。当其凝闭无象，则土木其质。及夫妙用默济，云行雨施，蚩蚩群黎，陶然知化，睹貌迁善，闻言革非。至于廓荡，昭洗执缚，上中下性随分令入。以贞元十年十一月十二日示疾，俨然加趺坐灭，春秋七十五，法腊三十六。沙门那提得师之道，传授将来。以十二年二月二十二日，门人弟子缁俗迁座于本院之北隅，孺慕师德，号哭之声，山林为之变色。初，会传法在坤维，四远禅徒臻萃于寺。时南康王韦公皋最归心于会，及卒，哀咽追仰，盖粗入会之门，得其禅要。为立碑，自撰文并书，禅宗荣之。

○唐杭州径山法钦传

释法钦，俗姓朱氏，吴郡昆山人也。门地儒雅，祖考皆达玄儒，而傲睨林藪不仕。钦托孕，母管氏，忽梦莲华生于庭际，因折一房系于衣裳，既而觉已，便恶荤膻。及迄诞弥岁，在于髻辘，则好为佛事。立性温柔，雅好高尚，服勤经史，便从乡举。年二十有八，装赴京师，路由丹徒，因遇鹤林素禅师，默识玄鉴，知有异操。乃谓之曰：“观子神府温粹，几乎生知。若能出家，必会如来知见。”钦闻，悟识本心，素乃躬为剃发，谓门人法鉴曰：“此子异日大兴吾教，与人为师。”寻登坛纳戒，炼行安禅，领径直之一言，越周旋之三学。自此辞素南征，素曰：“汝乘流而，行逢径即止。”后到临安，视东北之高峦，乃天目之分径，隅问樵子，言是径山。遂谋挂锡于此，见苦盖覆？网，屑近而宴居，介然而坐。时雨雪方霁，旁无烟

火，猎者至，将取其物，颇甚惊异叹嗟，皆焚网折弓而知止杀焉。下山募人营小室，请居之。近山居，前临海令吴贞舍别墅以资之。自兹盛化，参学者众。代宗睿武皇帝大历三年戊申岁二月，下诏曰：“朕闻江左有蕴道禅人，德性冰霜，净行林野，朕虚心瞻企，渴仰悬悬。有感必通，国亦大庆，愿和尚远降中天，尽朕归向。不违愿力，应物见形。今遣内侍黄凤宣旨，特到诏迎，速副朕心。春暄，师得安否！遣此不多及。”敕令“本州供送，凡到州县，开净院安置，官吏不许谒见。疲师心力。弟子不算多少，听其随侍。”帝见，郑重咨问法要，供施勤至。司徒杨绾笃情道枢，行出人表，一见钦于众，退而叹曰：“此实方外之高士也，难得而名焉！”帝累赐以缣纒，陈设御馔，皆拒而不受。止布衣蔬食，悉令弟子分卫，唯用陶器行。少欲知足，无以俦比。帝闻之更加仰重，谓南阳忠禅师曰：“欲锡钦一名。”手诏赐号国一焉。德宗贞元五年，遣使赍玺书宣劳，并庆赐丰厚。钦之在京及回浙，令仆公王节制州邑名贤执弟子礼者，相国崔涣、裴晋公度、第五琦、陈少游等。自淮而南妇人礼乞号，皆目之为功德山焉。六年，州牧王颜请出州治龙兴寺净院安置，婉避韩滉之废毁山房也。八年壬申十二月示疾，说法而长逝，报龄七十九，法腊五十。德宗赐谥曰大觉。所度弟子崇惠禅师，次大禄山颜禅师，参学范阳杏山悟禅师，次清阳广敷禅师。于时奉葬礼者，弟子实相、常觉等，以全身起塔于龙兴净院。初，钦在山，猛兽鸷鸟驯狎。有白兔二跪于杖屨之间。又尝养一鸡，不食生类，随之若影，不游他所。及其入长安，长鸣三日而绝。今鸡冢在山之椒。钦形貌魁岸，身裁七尺，骨法奇异，今塔中塑师之貌，凭机犹生焉。杭之钱氏为国，当天复壬戌中，叛徒许思作乱，兵士杂宣城之卒发此塔，谓其中有宝货。见二瓮上下合，藏肉形全在而发长覆面。兵士合瓮而去。刺史王颜撰碑述德，比部郎中崔元翰、湖州刺史崔玄亮、故相李吉甫、丘丹各有碑碣焉。

○唐寿春三峰山道树传

释道树，姓闻氏，唐州人也。少以辩智，沉静虚豁，耽嗜经籍，曾无少懈。其为人也，贞固足以干事，隐括足以矫时。偶遇僧敦喻，遂誓出尘，自慨年近不惑，求法淹迟。礼本部明月山大光院惠文为授业，登即剃染。二年受具，乃观方向道，天台、南岳，无所不游。后回东洛，遇秀宗裔，如芙蓉开，通达安静。至寿州三峰，结茅而居。常有野人，服色朴素，言谈异常，于言笑之外，化作佛形、仙形、菩萨、罗汉，或放神光，或呈声响，如是涉一十年，学侣睹之，不测端绪，后皆寂尔。树告众曰：“野人作多色伎俩，眩惑于人。只消老僧不见不闻，伊伎俩有穷，吾不见不闻无荆所谓作伪心劳而日拙，其自知之，卷著怀拙而去，追无泉迹矣。”树于宝历初年示疾而终，报龄九十二。明年正月迁塔焉。系曰：大钧播物，物类纷错，穷数达变，因形移易者谓之化，谓之幻。知幻化之不异生也，始穷幻化矣。吾与汝俱幻也。推之于实，则幻化或虚；置之于虚，则幻化时实。实虚理齐，不自我之先后欤？体道无心，物我均矣。故佛言“凡所见相，唯所见心”。又云“若见诸相非相，则见如来”，树师有焉。

○唐陕州回銮寺慧空传（元观）

释慧空，姓崔，江陵人也。家世儒雅，弈叶纓纓委，父任陕服灵宝县。空丁艰天属，坚请入空门，庸报乳哺重恩。乃投回銮寺恒超下，授受经业。三载诵通，及格蒙度，听习敏利。因入嵩少，遇寂师禅会，豁如开悟。乃回三峰，于仙掌间有道流绸缪论道，薄暮主散，非止一过。州帅元公颇知归向，召之，多以疾辞，或至，必登元席。代宗皇帝闻其有道，下诏俾居京师广福寺，朝廷公卿罔不倾信。后终于寺，春秋七十八。大历八年癸丑九月四日，全身坚固而迁塔焉。次南岳东台释元观，姓袁氏，长安人也。父为河中府掾。母兄为沙门，甚敦道化，见观幼龄聪慧，风标秀举，有成人之度，因劝其出家。乃投兴善寺，诵经通利。五年得度，乃于《律部俱舍》二本，涣然条理。后出游方，登诸禅会，明悟真性，如醒宿醒。遂趋衡山，于东台而止。其道弥昌，冥有所感。恒得神人密送供施，随其众寡，不闻有阙。忽一日，神现形再拜曰：“我是此山檀越，常送薄供者，我身是也。”观问：“汝何业所致？”曰：“我前身曾称知识，体悟匪全，妄受信施，坐此为神。偶师居此，我曹馈粮，粗副私愿。今二十年已足，得遂超度，故来决别也。”观化缘斯极，嘱累禅徒而终，春秋七十九。大和四年十月二日迁塔焉。

○唐洛京龙兴寺崇皂传（全植）

释崇皂，姓姜氏，郾城人也。门传儒素，相缀簪裾。自天宝已来，安史之乱，侵败王略，家族迁荡。父为商估趋利，遵涂于巩洛间。父亡于逆旅，皂慨责曰：“少遭不造，子遗哀哉！”遂议出家。至年十八，经业蔚通得度。俄有云水之兴，游南岳。栖息数龄起回，乐南徐茅山，乃依栖霞寺。皂已登径门，道声洋溢。会赞皇李公德裕廉问是邦，延诸慈和寺。一交雅谈，如游形器之外，曰：“吾有幽忧之疾，非是居侯藩聚落之人也。”明岁遂行，重？嵩少，居于岳寺。大和戊申岁，洛下亢阳，唯岳中雨信相继。或谓为皂之德动龙神之故也。开成元年，赞皇公摄冢宰，请皂于洛龙兴寺化徒。两京缙白往来问道，檀施交骈。其所谈法，宗秀之提唱，获益明心者多矣。忽告众决别，入方丈而灭，春秋八十六。白侍郎撰《塔铭》。会昌元年辛酉八月十日入塔云。次淮南都梁山释全植，姓芮，光州人也。少稟异操，自言学作佛度生去。忽投本州荣光禅院大智下求度。师颇严谨，约其诵经。受具后，至洛阳，参问禅法，彻了无疑辞。师观方至淮南都梁山，建立茅舍。太守卫文卿命于州治长寿寺化徒。卫侯问：“将来佛法隆替若何？”植曰：“真实之物无振，自古于今，往复轨躅。有为之法，四相迁流。法当堙厄。君侯翹足可见。”预言武宗毁教也。植终年九十三，门人建塔立碑。会昌四年甲子九月七日入浮图焉。

卷十

◎习禅篇第三之三（正传十六人附见八人）○唐洪州开元寺道一传（智藏）

释道一，姓马氏，汉州人也。华以喻性，不植于高原；浪以辩识，发明于溟海。生而凝重，虎视牛行。舌过鼻准，足文大字。根尘虽同于法体，相表特异于幻形，既云在凡之境，亦应随机之教。年方稚孺，厌视尘躅，脱落爱取，游步恬旷，削发于资州唐和尚，受具于渝州圆律师。示威仪之旨，晓开制之端，浣衣?金，观门都错大龙香象，羁绊则难。权变无方，机缘有待。闻衡岳有让禅师，即曹溪六祖之前后也，于是出岷峨玉垒之深阻，诣灵桂贞篁之幽寂。一见让公，泯然无际，顿门不俟于三请，作者是齐于七人。以为法离文字，犹传蠹露，圣无方所，亦寄清源，遂于临川栖、南康龚公二山，所游无滞，随摄而化。先是，此峰岫间魑魅丛居，人莫敢近，犯之者灾衅立生。当一宴息于是，有神衣紫玄冠致礼言：“舍此地为清净梵常”语终不见。自尔猛鸷毒螫，变心驯扰；沓贪背憎，即事廉让。郡守河东裴公家奉正信，躬勤谄稟。降英明简贵之重，穷智术慧解之能。每至海霞敛空，山月凝照，心与境寂，道随悟深。自明者在乎周物，博施者期乎济众。居无何，裴公移典庐江、寿春二牧，于其进修惟勤，率化不坠。大历中、圣恩溥洽，隶名于开元精舍。其时连率路公聆风景慕，以钟陵之坏，巨镇奥区，政有易柱之弦，人同湊轂，禅宗戾止，降祥则多，顺而无违，居仅十祀，日临扶桑，高山先照；云起肤寸，大雨均沾。建中中，有诏僧如所隶，将归旧壤。元戎鲍公密留不遣。至戊辰岁，举措如常，而请沐浴讫，俨然加趺归寂，享年八十，僧腊五十。先于建昌鄱山名石门，环以绝山献，呀为洞壑，平坦在中，幽偏自久。是谋薪火尘劫之会，非议冈阜地灵之吉。亚相观察使陇西李公藩寄严厉，素所钦承，于以率徒依归，缅怀助理。爰用营福，道在观化，情存饰终，辍诸侯之旌旗，资释子之幢盖。其时日变明晦，人萃遐迩，楫覆水而为陆，炬通宵而成画。山门子来，财施如积；邑里僧供，饭香普熏。自昔华严归真于嵩阳，善导瘞塔于秦岭，礼视斋斩，人倾国城，哀送之盛，今则三之。初于林中经行，座下开示，平等垂法，不标于四科，安恬告尽，刻期于二月，此明一终之先兆也。示疾云逝，俾葬远山，凡百攀援，愿留近郭。终遂穷僻，式遵理命，此又明一晦迹之素诚也。将归灵龕，爰溯浅濑，人力未济，舟行为迟。膏雨骤下于远空，穷溪遄变于深涉，此又明一通神之应感也。惟一知真在空，无我于有，是二俱离，假一为乘。示生死者人能作佛，辨邪正者魔亦似圣。现身不留于大士，负手俄萎于哲人。弟子智藏、镐英、崇泰等奉其丧纪，宪宗追谥曰大寂禅师，丹阳公包佶为《碑》纪述，权德舆为《塔铭》今海昏县影堂存焉。又唐虔州西堂释智藏，姓廖氏，虔化人也。生有奇表，亲党异其伟器。八岁从师，道趣高邈。随大寂移居龚公山，后谒径山国一禅师，与其谈论周旋，人皆改观。属元戎路嗣恭请大寂居府，藏乃回郡，得大寂付授纳袈裟。时亚相李公兼、国相齐公映、中郎裴公通皆倾心顺教。元和九年四月八日终，春秋八十，夏腊五十五。即迁于塔，谏议大夫韦绶追问藏言行，编入《图经》。太守李渤请旌表，至长庆元年谥大觉禅师云。

○唐宣州灵汤泉兰若志满传

释志满，姓康氏，洛阳人也。幼少之年，属其家命沙门陈佛会，满意乐不舍，遂投颍川龙兴寺出家。闻洛下神会禅师法席繁盛，得了心要。南游到黄山灵汤泉所，结茅茨而止。后采黄连，乡人见满喜跃，满问：“此何处耶？”乡人曰：“黄连山，属宣城也。愿师镇此，奈何虎豹多害？”满曰：“虎亦有佛性。”乃焚香祝厌之，由兹弭息，遂成大禅院。后示寂，春秋九十一。永贞元年入塔焉。

○唐沂州宝真院光瑶传（道坚）

释光瑶，姓周氏，北京人也。幼钟荼蓼，都不胜情，誓志出家。舍讲肆，入禅林，凡向宗师，悉从求益。未遭会禅师，金錡抉？，明视十方。后到沂水蒙山，结草成庵，怡然宴坐。？费之人翕然从化。时慎邑大夫知重首创禅宫，次兗州节使王僚尚书躬请入州行化，奏署额号宝真。学侶憧憧，多沾大利。元和三年示灭，享年九十二云。又唐襄州慈恩寺释道坚，姓王氏，丹阳人也。初发心于牛头山慧忠禅祖。大历元年，栖隐池州南泉山。后诣襄汉，泊慈恩寺。元和初载，相国燕公镇于汉南，深相钦重，问道周勤，施供繁沓。遂于凤林关外造寺请居。二年示灭，春秋七十三云。

○唐扬州华林寺灵坦传

释灵坦，姓武氏，太原文水人也，则天太后侄孙。父讳宣，洛阳县令。母夏侯氏，初妊坦也，梦神僧授与宝鉴，表里莹然，且曰：“吾以此寄汝，善保护之。”及诞，亲无所苦。年甫七岁，诵习毕通，应童子举。十三从宦，旋升太子通事舍人。如是悦学不休，三教之书弥增洞达。然而恒嗟朽宅，誓入空门，已备大乘之资粮，终到涅槃之境域。于时洛都盛化荷泽寺神会禅师也，方遮普寂之光，渐没秀师之道，坦往参焉。会施善诱，顿见其心，默而许之，容其执侍。父母不能回其意。飞扬莫系，始末研磨，得破疑滞。天宝初载，召坦曰：“吾有一句，是祖祖相传至曹溪，曹溪付吾，汝谛受之。吾当有留难，遂辞游方焉。”未几，果敕移会于弋阳。坦遂向庐州浮槎寺，览大藏经。后闻忠国师自南阳诏入，于大历五年礼觐之。八年，欲出关，忠奏曰：“此人是贫道同门，俱神会弟子。”敕赐号曰大悲，兼赍墨敕。行化至梁园，时相国田公神功供养。逦迤适维杨、六合，方叹大法凌夷，忽闻空中声云：“开心地。”即见菩萨如文殊像曰：“与汝印验。”令举项以掌按之，寻观有四指赤痕，其印迹恒现。又止润州江中金山，今泽心也。其山北面有一龙穴，常吐毒气如云，有近者多病或毙。坦居之，毒云灭迹。又于江阴定山结庵，俄闻有赞叹之声。视之，则白龟二，坦为受皈戒。又见二大白蛇，身长数丈，亦为受戒忏悔。如是却往吴兴林山造一兰若，有三丈夫衣金紫，趋步徐正，称叹道场唯善，村落之民多弃罟网。元和五年，相国李公之理广陵也，以峻法操下，刚决少恩，一见坦，郑重加礼，召居华林寺。寺内有大将军张辽墓，寺僧多为鬼物惑乱。坦居，愀然无

泉矣。又扬州人多患山妖木怪之所荧惑，坦皆遏御焉。人争归信。至十年，忽见二胡人称自龟兹国来，彼无至教，远请和尚敷演。十一年五月十三日，于荷泽忌斋，告众：“吾赴远请。七月示疾，九月将灭，斯预告也。”至季秋八日，果寂尔而终。迁塔于扬州西驯翟坊之南冈，越州掾郑詹建塔。报龄一百八岁，僧腊八十四焉。坦即曹溪之孙，荷泽之子也。

○唐唐州紫玉山道通传

释道通，姓何氏，庐江人。其为童也，持重寡辞，见佛形像，必对礼叹咏不舍。因父宦于泉州南安，便求舍？披缁。诵经合格，敕度之，当天宝初载也。时道一禅师肇化建阳佛迹岩聚徒，通往焉。一师于临川南康龚公山，亦影随而去。然誓游方吴越之间，台明山谷，靡不登陟。迨乎回锡江西泐潭山门，励心僧务，不憚勤苦。贞元二年往南岳，见石头禅师，犹采缕加朱蓝之色也。四年，大寂禅师垂欲归化，昌言曰：“夫玉石润山秀丽，益汝道业，遇可居之。通闻此言，且同隐讖，殊不详练。其年秋与伏牛山自在禅师同游京洛，回至唐州西有山，峰孤林密，四绝人烟，实有尘外之趣。乃问乡人，云此山是紫玉山，通方忆大寂之悬记，我合居是峰也。乃陟崔嵬，见山脊有石方正，其色紫玉莹然，叹曰：“号紫玉者，合其称也。先师之言，非虚记也。”挂锡解囊，参学之徒雾集。始则诛茅构舍，刺史李道古作意为建禅宫焉。元和八年，弟子金藏出参礼百丈山海禅师，回见通。通愀然作色：“汝其来矣，此山有主也。”曳杖径去，襄州道俗皆迎。至七月十五日，无疾而终，春秋八十三。一云故相国于谏最所归心，尚书李翱礼重焉。

○唐雍京章敬寺怀晖传

释怀晖，姓谢氏，泉州人也。宿殖根深，出尘志远，迨乎进具，乃尚云游。贞元初，礼洪州大寂禅师，顿明心要。时彭城刘济颇德晖，互相推证。后潜岨嵎山，次寓齐州灵岩寺。又移卜百家岩，泉石幽奇。苦于禅子请问繁杂，上中条山行禅法，为法者蹶迹而往，蒲津人皆化之。元和三年，宪宗诏入于章敬寺毗卢遮那院安置，则大历中敕应天下名僧大德三学通赡者并丛萃其中，属诞辰，多于此修斋度僧焉。晖既居上院，为人说禅要，朝寮名士日来参问。复诏入麟德殿赐斋，推居上坐。元和十年乙未冬示疾，十二月十一日灭度，春秋六十二。越明年二月，门人智朗、志会等奉全身葬于灞桥北原。敕谥大宣教禅师，立碑于寺门，岳阳司仓贾岛为文述德焉。

○唐京兆兴善寺惟宽传（宝修）

释惟宽，姓祝氏，衢州信安人也。祖曰安，考曰皎。生十三岁，见杀生者，尽然不忍食。退而出家，求剪发于僧昙，受尸罗于僧崇，学毗尼于僧如，证大乘法于止观，成最上乘于大寂道一。贞元六年，始行化于闽越间，岁余而回心改服者百数。七

年，伏猛虎于会稽，作滕家道常八年，与山神受归戒于鄱阳，作回向道常十三年，感非人于少林寺。二十一年，作有为功德于卫国寺。明年，施无为功德于天宫寺。元和四年，宪宗章武皇帝诏于安国寺。五年，问道于麟德殿。其年，复灵泉于不空三藏池。十二年二月晦，大说于传法堂讫，奄然而化。报龄六十三，僧夏三十九。归葬于灞陵西原，诏谥曰大彻禅师，塔号元和正真。初，宽说心要法三十年，度黑白众殆及百千万，应病授药，安可既乎？白乐天为宫赞时遇宽，四诣法堂，每来垂一问，宽答如流，白君以师事之。门弟子殆千余，得法者三十九，入室受遗寄者曰义崇、圆照焉。唐罗浮山释宝修，俗姓周，资州人也。从师于纯德寺，志求玄理，于蕲州忍大师法裔决了重疑。后爱罗浮山石室安止，檀越为造梵宇，蔚成大寺。一日，告门人曰：“因缘相逼。”愀然不乐，众咸莫测。顺宗皇帝深重佛宗，知修之名，诏入京与三藏击问，并答翻译之意，朗畅如流。乃留居辇下。三年，终于京寺云。

○唐天台山佛窟岩遗则传

释遗则，俗氏长孙，京兆长安人也。祖冽，鄂州司马；考利涉，隐居金陵。则弱不杂俗，恬恬终日而无所营。始从张怀瓘学草书，独尽笔妙。雅耽经史，尤乐佛书，以为得吾心。一朝捐家业，从牛头山慧忠，忠所谓牛头六祖也。始天竺达磨以释氏心要至，传其道者有曹溪能、嵩山秀。学能者谓之南宗学，学秀者谓之北宗学。而信祖又以其道传慧融，融得之居牛头山，弟子以传授。由是达磨心法有牛头学。则既传忠之道，精观久之，以为天地无物也，我无物也，虽无物未尝无物也。此则圣人如影，百姓如梦，孰为死生哉？至人以是能独照，能为万物主，吾知之矣。遂南游天台，至佛窟岩，盖薜荔，荐落叶而尸居，饮山流，饭木实而充虚，虎豹以为宾，麋鹿以为徒，兀然如枯。其后衿木者见之转相告，有慕其道者曰：“道者未有弟子。”相率为筑室，图佛安僧，蔚为精舍焉。故元和已来传则道者，又自以为佛窟学，佛窟之号自则始也。一坐四十年，大官名侯赍书问讯檀舍，则未尝有报谢，礼拜者未尝而作起。时岁在庚戌季夏十有二日，召弟子曰：“汝其勉之！至十五日夜遂坐歿。是夜山下人闻若山崩，旦望之，则彩云翔泊于岩上。父老皆泣曰：“师死矣！已而视之，果然。凡则二十岁为僧腊，五十有八而终。善属文，始授道于钟山，序集融祖师文三卷，为宝志《释题》二十四章，《南游传大士遗风序》又《无生等义》。凡所著述，辞理粲然。其他歌诗数十篇，皆行于世。则元居瀑布泉西佛窟本院，建龕塔。会昌中例毁之，其院为道门所有。后开元寺僧正法光于咸通乙酉岁遂徙碑于今所，河南尹韩？为《碑》文。

○唐婺州五泄山灵默传（志闲）

释灵默，俗姓宣毗陵人也。本成立之岁，悦学忘疲，约以射策登第，以荣亲里。承豫章马大师聚众敷演。造禅关，马师振容而示相，默密契玄机，便求披剃，若熟痛之待刺耳。受具之后，苦练行门，确乎不拔。贞元初，入天台山中，有隋智者兰若

一十二所，悬记之曰：“此地严妙，非杂器所栖，若能居此，与吾无异。”默因锥白砂道撒，经于二载。猛虎来驯，近林产子，意有所依。又住东道场，地僻人稀，山神一夜震雷暴雨，悬崖委坠。投明，大树倒欹，庵侧树枝交错，茅苫略无少损。遐迩闻旃，皆来观叹。后游东白山，俄然中毒，而不求医，闭关宴坐。未几，毒化流汗而滴，乃复常矣。行次浦阳，盛化，有阳灵戍将李望请默居五泄焉。元和初亢阳，田畷惶惶。默沿涧见青蛇夭矫，瞪目如视行人，不动。咄之曰：“百姓溪竭苗死，汝胡不施雨救民邪？”至夜果大雨，合境云足，民荷其赐。属平昌孟简中丞廉问浙东废管内兰若，学徒散逸，时暨阳令李胄状举灵山，许重造院。十三年三月二十三日，澡沐焚香，端坐绳床，嘱累时众，溘然而绝。寿龄七十二，法腊四十一。高僧志闲，道行峭拔，文辞婉丽，亦江左之英达，为默《行录》焉。

○唐荆州天皇寺道悟传（崇估）

释道悟，姓张氏，婺州东阳人也。受天粹气，为法王子，生而神俊，长而谨愿。年十四，金翅始毛，麒麟方角，启白尊老，将求出家，慈爱之旨，不见听许。辄损薄常膳，日唯一食，虽体腹羸馁，弥年益坚。父母不获已而许之。遂往明州大德剃落。年二十五，依杭州竹林寺大德具戒。以勇猛力，扶牢强心，于六度门，修诸梵行。常以为疗膏肓者资上妙药，开暗冥者求善知识。不假舟楫，其济渡乎？遂蹶然振策，投径山国一禅师。悟礼足始毕，密受宗要。于语言处，识衣中珠。身心豁然，真妄皆遣。断诸疑滞，无畏自在，直见佛性，中无缁磷。服勤五载，随亦印可，俾其法雨润诸丛林。悟蓄力向晦，入深阻，实冀一飞摩霄。乃转遁于余姚大梅山，是时大历十一年也。层崖绝壑，天籁萧瑟，夔无邻落。七日不食。至诚则通，物感乃灵，猱豸廷銚，更馈橡栗。异日野夫操斧，言伐其楚，偶所遭睹，骇动悚息，驰谕朋曹，谓为神奇。曾不旬朔，诣者成市。凭嵌倚峭，且构危栋，费粮供具，环绕方丈。猛虎眈眈，侣出族游，一来座侧，敛折肢体，其类驯扰可知也。夫语法者无阶渐，涉功者有浅深，木逾钻而见火，鉴勤磨而照胆，理必然矣。是以扫尘累，遁岩薮，服形体，遗昼夜，精严不息，趣无上道，其有旨哉！如是者三四年矣。将翔云表，虑羽毛之颓铄；欲归宝所，疑道涂之乖错。故重有谘访，会其真宗。建中初，诣钟陵马大师，二年秋，谒石头上士。於戏！自径山抵衡岳凡三遇哲匠矣。至此即造父习御，郢人运斤，两虚其心，相与吻合。白月映太阳齐照，洪河注大海一味，仲尼谓颜子亚圣，然灯与释迦授记，根果成熟，名称普闻，如须弥山特立大海。繇是近佛，恢张胜因，凡诸国土，缘会则答。始卜于澧阳，次居于赭口，终栖于当阳柴紫山，即五百罗汉翱翔地也。怪松蓊郁以含风，崖山献砢岩而造天，驾潋滟之紫霞，枕清泠之玉泉。鸾凤不集于蓬璠，至人必宅于势胜，诚如是也。洪钟待叩，童蒙求我，川流星聚，虚往实归。或接武于林樾，或并肩于庐舍，户外之屦，烂其室盈矣。荆州雄藩也，都人士女动亿万计，莫不擎跪稽首，向风作焉。崇业上首以状于连帅而邀之，不违愿力，聿来赴请。及于虚落，锡及于都城。白黑为之步骤，幡幢为之车曷，生难遭想，得未曾有。彼优波鞠多者，夫何足云！有天皇寺者，据郡之左，标异他刹，号为名蓝，困于人火，荡为煨烬。僧坊主灵鉴族而谋之，以为

满人攸居，必能福我。夫荷檐大事，蔑弃小瑕。乃中宵默往，肩舆而至。二寺夕有所失，朝有所得，诤论锋起，达于尊官。重于反复，毕安其处。江陵尹右仆射裴公，搢绅清重，拥旄统众，风望眄睐，当时准程，驱车盛礼，问法勤至。悟神气洒落，安详自处，徐以软语，为之献酬，必中精微，洞过肯綮。又常秉贞操，不修逢迎，一无卑贵，坐而揖对。裴公讶其峻拔，征其善趣，谓“抗俗之志当径挺如是邪”？悟以为“是法平等，不见主客，岂效世谛，与人居而局狭邪”？裴公理冥意会，投诚归命。既见仁者，我心则降，如热得濯，躁愤冰散。自是禅宗之盛，无如此者！元和丁亥岁有背痛疾，命弟子先期告终。以夏四月晦奄然入灭。春秋六十，僧腊三十五。以其年八月五日葬之郡东隅，灵龕建塔，从僧礼也。悟身长七尺，神韵孤杰，手文鱼跃，顶骨犀起。行在于瓔珞，志在于《华严》，度人说法，雄健猛利。其一旨云“垢净共住，水波同体，触境迷著，浩然忘归。三世平等，本来清静。一念不起，即见佛心。”其悟解超顿，为若此也。先是烟焰之末，殿宇不立，顾缙褐且亏瞻礼，密念结构，罔知权舆。禅宴之际，若值神物，自道祠舍滨江水焉。凡我疆畛，富于松梓，悉愿倾倒，施僧伽蓝。命工古见之，宛若符契。于是斩巨栋，干修楹，撑崖拄壑，云屯井构。时维秋杪，水用都涸，徒众敛手，块然无谋。会一夕雨至，万株并进，晨发江浒，暮抵寺门。剗剗之际，动无乏者。其余廊庑床案，靡非幽赞。事邻语怪，阙而不书。其感摄灵癯，皆此类也。比丘慧真、文贲等禅子幽闲，皆入室得悟之者，或继坐道场，或分枝化导。时太常协律符载著文颂德焉。世号天皇门风也。又唐澧州龙潭禅院释崇信，未详氏族。信在俗为渚宫胡饼师之子，弱龄宛异，神府宽然。昔天皇寺悟禅师隐耀藏光，人莫我测。信家居寺巷，恒日提饼笥馈悟公斋食。食毕，且留一饼曰：“吾惠汝，以荫子孙。”信一日自念曰：“饼是我持去，何以返遗我邪？莫别有旨乎？”遂拱手问焉。悟公曰：“是汝持来，复汝何咎。”信闻似有惊怪，因劝出家，便求摄受，曰：“尔昔崇福善，今信吾言。”故名之也。由是躬于井臼，供亿服勤。乃问悟云：“未蒙指示心要。”悟公云：“时时相示。”信踰稟斯言，如游子之还家，若贫人之得宝。直从荆渚乃诣澧阳龙潭栖止。因李翱尚书激扬，时乃出世。后德山鉴师出其门，宗风大盛矣。

○唐邺都圆寂传（掘多）

释圆寂，不知何许人也。恒以禅观为务，勤修匪懈，就嵩山老安禅师请决心疑，一皆明焕。寂化行相部，依附者多。久居天平山，稠禅师往迹无不遍寻。时大司空严绶倾心信重。享寿一百五十五岁，咸亨二年己巳岁生（按咸亨二年辛未，合云总韦二年己巳也）。世号无生和尚是欤。寂之高岸，恒不欲人致礼邀请，必有不可犯之色，时或非之。然则志意修则骄富贵，道义重则轻王公，非其傲诞，势使然也。释掘多者，印度人也。从逾沙磧，向慕神州，不问狄鞮，旋通华语，而尚禅定。径谒曹溪能师，机教相接犹弱丧还家焉。多游五台，路由定襄。历村见一禅者结庵独坐，问之曰：“子在此奚为？”曰：“吾观静。”多曰：“观者何人？静者何物？得非劳子之形，砾子之虑乎？”其僧茫昧，拱默而已，作礼数四，请垂启发。多曰：“子出谁门邪？”曰：“神秀大师。”多曰：“我西域异道实繁有徒，最下劣者

，不堕此见。兀然空坐，蓐烂身疲，初无深益。子莫起如是见，立如是论。”早往韶阳请决所疑。能曰：“子何不自观自静邪？不观相，不观如，子游历日用，自然安乐也。”一如多所言，略无少异。伊僧起开罗网。多后莫知攸往。

○唐袁州阳岐山甄叔传

释甄叔，不知何许人也。幼而聪敏，倜傥不羁。心目融明，具大人相。观生死轮上，见九地群迷，犹如蠃螟处在蚊睫。受胜妙欲，似嚼蜡无味。遂投簪削顶，具佛瑇帟，求正觉了义，扣大寂禅师，一造玄机，万虑都寂，乃曰：“群灵本源，假名为佛，体竭形消而不灭，金流朴散而常存。性海无风，惊波自涌。心虚绝兆，万象齐照。体斯理者，不言而遍历沙界，不用而功益玄化。如何背觉，反合尘劳，于阴界中，妄自囚系。”于是形同水月流浪人天哉。叔见宜春阳岐山群峰四合，叹曰：“坤元作镇，造我法城。”才发一言，千岩响答。松开月殿，星布云廊，青岚域中化出金界。始从宴坐，四十余年，满室金光，昼夜常照。于是化缘已毕，机感难留。元和庚子岁正月十三日，忽弃尘区，还归大定。门弟子如坦、良宝等心没悲海，哀声动山，如月隐天，群星失耀。大集众木，为香楼，用作荼毗，获舍利七百粒，于东峰下建窣堵波。上足任运者命志闲为《碑》纪述矣。

○唐新吴百丈山怀海传

释怀海，闽人也。少离朽宅，长游顿门，禀自天然，不由激劝。闻大寂始化南康，操心依附，虚往实归，果成宗匠。从擅信请居新吴界，有山峻极，可千尺许，号百丈坎。海既居之，禅客无远不至，堂室隘矣。且曰：“吾行大乘法，岂宜以诸部阿笈摩教为随行邪？”或曰：“《瑜伽论》、《璎珞经》，是大乘戒律，胡不依随乎？”海曰：“吾于大小乘中博约折中，设规务归于善焉。”乃创意不循律制，别立禅居。初自达磨传法至六祖已来，得道眼者号长老，同西域道高腊长者呼须菩提也。然多居律寺中，唯别院异耳。又令不论高下，尽入僧堂。堂中设长连床，施？架挂搭道具。卧必斜枕床唇，谓之带刀睡，为其坐禅既久，略偃亚而已。朝参夕聚，饮食随宜，示节俭也。行普请法，示上下均力也。长老居方丈，同维摩之一室也。不立佛殿，唯树法堂，表法超言象也。其诸制度，与毗尼师一倍相翻，天下禅宗如风偃草。禅门独行，由海之始也。以元和九年甲午岁正月十七日归寂，享年九十五矣。穆宗长庆元年，敕谥大智禅师，塔曰大宝胜轮焉。

系曰：自汉传法，居处不分禅律，是以通禅达法者，皆居一寺中，院有别耳。至乎百丈立制，出意用方便，亦头陀之流也。矫枉从端，乃简易之业也。所言自我作古。古，故也；故，事也。如立事克成，则云自此始也；不成，则云无自立辟。今海公作古，天下随之者，益多而损少之故也。谥海公为大智，不其然乎？语曰：“利不百，不变格。”将知变斯格，厥利多矣。《弥沙塞律》有诸，虽非佛制，诸方为清静者不得可行也。

○唐潭州翠微院恒月传（真亮）

释恒月，姓韩氏，上党人也。厥父为土监商，西江往还，俄遇剽略溺死。月虽幼弱，念父葬于鱼腹，母又再行，乃决志出家，求报恩育。受教于圣善寺慧初。得度已，造嵩山禅会，便启发心要。后访道寻师，靡惮夷险，抵望湖山翠微岩下古院挂锡。四方学者如蜂得王，翕然盛化。建中元年，示疾而终，春秋七十九。其年三月十二日迁塔焉。洛京广爱寺释真亮姓侯氏，景城人也。家训儒雅，辞彩粲然。洁素持会，与群少年有异。忽以樊笼为厌，且曰：“去情除谨，是所愿也。”遂于本州开元寺智休师下披染服。然其刈薪汲水，率先于人，习行头陀行。受具已，游嵩少，遇普寂奖训，顿开蒙昧。入龙门山，居而禅默，问津者交集，声望日拢属留守尚书王公铎保矧，闻而钦奉，召入广爱寺，别住居焉。示人禅观，匪倦教诏，得道者亦多矣。以贞元四年十一月三日，忽告门人以桑榆末照，诚难久留。嘱累而终，年八十八焉。

○唐襄州夹石山思公传（昙真）

释思公，姓李氏，恒阳人也。早出家于本府龙兴寺。得度后，游伊洛间，见普寂禅师，开畅禅法。寂始见提诱，寻彻钩深。至南雍，隐夹石山，赍然自处。属牛公观政汉南，闻其声绩，请入城，谢病不应其命。牛帅亦不夺其志，檀施相望。学众？，若縋檀之围绕焉。以兴元初年示疾归灭，春秋八十四焉。亳州安国院释昙真，姓陈，维青人也。少小随父往彭门，鬻枣于逆旅，而亡所怙。真叹恨无依，乃投徐大云寺为僧。其土是嵩法师之后，经论薮泽，真玩习该通。后游胜境，入嵩山学禅观。已至任城，邂逅李中丞讽赴职谯郡，接真谈道，抵掌盱衡，如披云雾。李恨相识之晚，请以同行。时聚风亭月观，谈道达旦。李后入为京尹，因从容称奏真道盛德至。德皇下诏征，而不奉诏。贞元七年四月示灭，门人建塔云。

○唐定州大像山定真院石藏传

释石藏，姓吕，汉东人也。年邻小学，露成人之度，跪告堂亲，愿为佛子。遂志入开元寺削染受戒，愿礼嵩山寂禅师，豁悟禅法。至中山大像峰间石室，孤坐冥寂，数夏安然。同好者望风而至，蔚成丛众。陶化博陵，人咸欣戴。会州帅李公卓翹仰之切，命入城住，贵亲玄论。谢云：“野性难拘，不闲礼法，恐玷威棱。”卓躬登山访问，款密交谈，深开昏昧。遂奏院题额曰定真焉。藏预白众诀别，明日坐亡，春秋八十二。贞元十六年正月入塔，立碑颂德云。

卷十一

◎习禅篇第三之四（正传二十一人附见四人）○唐洛京伏牛山自在传（一钵和尚南印）

释自在，俗姓李，吴兴人也，生有奇瑞。稍长，坐则加趺，亲党异之。辞所爱，投径山出家，于新定登戒。及诸方参学，从南康道一禅师法席，悬解真宗，逸踪流辈，道誉孔昭，行上优游。多隐山谷，四方禅侣丛萃其门。元和中，居洛下香山，与天然禅师为莫逆之交。所游必好古，思得前贤遗迹以快逸观。龙门山得后魏三藏翻经处；王屋山得稠禅师解虎斗处，此山饮甘泉，改为甘泉寺；嵩山得梵法师马跑泉。居无恋著，所著《三伤歌》，辞理俱美，警发迷蒙，有益于代。前蜀王氏伪乾德初，有小军使陈公娶高中令骈诸孙女，若人持不杀二十余年，后在蜀为男婚娶，礼须屠宰。高初不欲，亲戚言：“自己持戒，行礼酒筵将何以娱宾也？”依违之际，遂多庖割。俄未浹旬，得疾颇异，口但慌言，已而三宿还稣，述冥间之事。初被黑衣使者迫摄入歧府城隍庙，庙神峨冠大袖，与一金甲武士晤坐。使者领高见神，武士言语纷纭，让高破戒，仍扼腕骂曰：“吾护戒神将也。为汝二十年食寝不遑，岂期忽起杀心，顿亏戒检？命虽未尽，罪亦颇深，须送冥司惩其故犯。”城隍神问高曰：“汝更修何善追赎过尤乎？”高常诵持《上生经》，其数已多，于时懵然都无记忆，恐惧之间白曰：“诵得《三伤颂》、《一钵和尚歌》。”遂合掌向神厉声而念，神与武士耸耳擎拳立听，颜色渐怡。及卒章，神皆涕泪，乃谓高曰：“且归人间，宜切营善。”拜辞未毕，飒然起坐，备陈厥事。自此《三伤》、《一钵》之歌颂，人皆传写讽诵焉。一钵和尚者歌词叶理，激劝忧思之深，然文体涉里巷，岂加《三伤》之典雅乎？在遣弟子去江南，选山水之最者，“吾愿往中终老”。到江州都昌县有好林泉，回报。在行至叶县，道俗所留。往隋州开元寺示灭，年八十一，则长庆元年也。

系曰：稽诸《律藏》，出家者犯戒，则招二罪，一违制，二业道也。高氏在家素不受戒，无违制愆，俗容有业道罪，宁得有护戒神邪？况高氏既持不杀，则冥然感止持无作之善生焉。因鲜克有终，致遭幽责，告诸五众，常畏护戒之神。夫如是，明则有戒法，幽则有鬼神欤！

次成都府元和圣寿寺释南印，姓张氏。明寤之性，受益无？，得曹溪深旨，无以为证。见净众寺会师，所谓落机之锦，濯以增妍，御烛之龙，行而破暗。印自江陵入蜀，于蜀江之南鉢，？草结茆，众皆归仰，渐成佛宇，贞元初年也。高司空崇文平刘辟之后，改此寺为元和圣寿，初名宝应也。印化缘将毕，于长庆初示疾。入灭营塔葬于寺中。会昌中毁塔，大中复于江北宝应旧基上创此寺，还名圣寿。印弟子传嗣有义？，复兴禅法焉。

○唐汾州开元寺无业传

释无业，姓杜氏，商州上洛人也。其母李氏忽闻空中言曰：“寄居得否？”已而方娠。诞生之夕，异光满室。及至成童，不为戏弄，行必直视，坐即加趺。商于缁徒，见皆惊叹，此无上法器，速令出家，绍隆三宝。年至九岁，启白父母，依止本郡开元寺志本禅师，乃授与《金刚》、《法华》、《维摩》、《思益》、《华严》等经，五行俱下，一诵无遗。年十二，得从剃落。凡参讲肆，聊闻即解。同学有所未晓，随为剖析，皆造玄关。至年二十，受具足戒于襄州幽律师，其《四分律疏》，一夏隶习，便能敷演。兼为僧众讲《涅槃经》，法筵长开，冬夏无倦，可谓生肇不泯，琳远复兴。后闻洪州大寂禅门之上首，特往瞻礼。业身逾六尺，屹若山立，顾必凝睇，声作洪钟。大寂一见异之，笑而言曰：“巍巍佛堂，其中无佛。”业于是礼跪而言曰：“至如三乘文学，粗穷其旨。尝闻禅门即心是佛，实未能了。”大寂曰：“只未了底心即是，别物更无。不了时，即是迷。若了，即是悟。迷即众生，悟即是佛。道不离众生，岂别更有佛！亦犹手作拳，拳全手也。”业言下豁然开悟，涕泪悲泣，向大寂曰：“本谓佛道长远，勤苦旷劫，方始得成。今日始知法身实相本自具足，一切万法，从心所生，但有名字，无有实者。”大寂曰：“如是如是，一切法性不生不灭，一切诸法本自空寂。经云：‘诸法从本来，常自寂灭相。’又云：‘毕尽空寂舍。’又云：‘诸法空为座。’此即诸佛如来住此无所住处。若如是知，即住空寂舍，坐空法座，举足下足，不离道常言下便了，更无渐次，所谓不动足而登涅槃上者也。”业既传心印，寻诣曹溪礼祖塔，回游卢岳、天台及诸名山，遍寻圣迹。自荑抵雍，憩西明寺，僧众咸欲举请充两街大德，业默然，叹曰：“亲近国王大臣，非予志也。”于是至上党，节度使相国李抱真与马燧，有战功，又激发王武俊同破朱滔，功多势盛，然好闻贤善，虽千里外必持币致之。深重业名行，旦夕瞻礼，麾幢往来。常有倦色，谓门人曰：“吾本避上国浩穰名利，今此又烦接君侯，岂娱心哉！”言讫，逍遥绵上抱腹山。又往清凉山，于金阁寺读《大藏经》，星八周天，斯愿方毕。复振锡南下，至于西河，初止众香佛刹，州牧董叔缠请住开元精舍。业谓弟子曰：“吾自至此，不复有游方之意，岂吾缘在此邪？”于是撞钟告众，作狮子吼，雨大法雨，垂二十年。并汾之人悉皆向化。宪宗皇帝御宇十有四年，素向德音，乃下诏请入内，辞疾不行。明年再降纶旨，称疾如故。穆宗皇帝即位之年，圣情虔虔，思一瞻礼，乃命两街僧录灵准公远赍敕旨迎请。准至作礼，白之曰：“知师绝尘物表，糠粃世务。法委国王，请师熟虑！此回恩旨，不比常时，愿师必顺天心，不可更辞以疾。相时而动，无累后人。”业笑曰：“贫道何德，累烦圣主？行即行矣。道途有殊。”于是剃发澡浴，至中夜，告弟子慧？等曰：“汝等见闻觉知之性与太虚同寿，不生不灭。一切境界本自空寂，无一法可得迷者。不了即为境惑，一为境惑，流转不穷。汝等常知心性本自有之，非因造作，犹如金刚不可破坏。一切诸法如影如响，无有实者，故经云：‘唯有一事实，余二则非真。常了一切空，无一物当情。’是诸佛同用心处。汝等勤而行之。”言讫，加趺而坐，奄然归寂。呜呼，可谓于生死得自在也！俗龄六十二，僧腊四十二。道俗号慕，如丧考妣，乃备香花幢幡，迁全身就于城西练若，积香薪而行荼毗。乃有卿云自天，五色凝空，异香西来，郁馥氤氲，阖境士庶咸皆闻睹。及薪尽火灭，获舍利罗，璨若珠玉。弟子慧？、行勤、虔纵、义幽、元度、怕泰等泣血收之，殓以金棺。乃

命郢匠琢石为塔，以长庆三年十二月二十一日安葬于练若之庭。业迁化之岁，州牧杨潜得僧录准公具述其事，遂为碑颂。敕谥大达国师，塔号澄源焉。

○唐长沙东寺如会传

释如会，韶州始兴人也。大历八年，止国一禅师门下，后归大寂法集。时禅客仰慕，决求心要，僧堂之内，床榻为之陷折，时号“折床会”，犹言凿佛床也。后徇请居长沙东寺焉。自大寂去世，其法门鼎盛，时无可敌，谚谓东寺为“禅窟”，断可知矣。时相国崔公群慕会之风，来谒于门，答对浏亮，辞咸造理。自尔为师友之契。初群与皇甫议上宪宗尊号，因被构，出为湖南观察，闲豫，归心于会也。至穆宗长庆癸卯岁，终于寺，春秋八十。时井泉预祐，异香丰馥。迁塔于城南，廉使李翱尽毁近城坟塔，唯留会所瘞浮图，以笔题曰：“独留此塔，以别贤愚矣。”刘膳部轲著碑焉。敕谥传明大师，塔曰永际。亦呼所居为“夹山和尚”是欤。

○唐南阳丹霞山天然传

释天然，不知何许人也。少入法门，而性梗概，谒见石头禅师，默而识之，思召其自体得实者，为立名天然也。乃躬执爨，凡三年，始遂落饰。后于岳寺希律师受其戒法，造江西大寂会。寂以言诱之，应答雅正。大寂甚奇之。次居天台华顶三年，又礼国一大师。元和中，上龙门香山，与伏牛禅师为物外之交。后于慧林寺遇大寒，然乃焚木佛像以御之。人或讥之，曰：“吾荼毗舍利。”曰：“木头何有？”然曰：“若尔者，何责我乎？”元和三年，晨过天津桥，横卧，会留守郑公出，呵之不去。乃徐仰曰：“无事僧。”留守异之，乃奉束素衣两袭，月给米面。洛下翕然归信。至十五年春，言“吾思林泉”，乃卜南阳丹霞山结庵。以长庆四年六月告门人曰：“备沐浴，吾将欲行矣。”乃戴笠策杖入屨，垂一足，未及地而卒，春秋八十六。膳部员外郎刘轲撰碑纪德焉。敕谥智通禅师，塔号妙觉。

○唐常州芙蓉山太毓传

释太毓，姓范氏，金陵人也。年才一纪。志在出家，乃礼牛头山忠禅师而师事焉。于是勇猛精进，求其玄旨，法器外朗，神宇禁内融。虽明了一乘，而具足万行。往雍京安国寺，进受具戒，褒然出众。加复威仪整肃，妙相殊特，如大海之不可测，如虚空之不可量。巡礼道场，摄心净域，虽智能通达，不假因师，而印可证明，必从先觉。遂谒洪井大寂禅师，睹相而了达法身，刹那而顿成大道。于时天下佛法极盛，无过洪府，座下贤圣比肩，得道者其数颇众。毓与大彻禅师、大宣教禅师、大智禅师，皆昆仲也，既而南北观方，曾无告憚，俾广闻见，闲养圣胎耳。元和十三年，止于毗陵义兴芙蓉山，故得名于山焉。毓为缘作因，有应无著，故所居感化，所至悦随，道俗相望，动盈万数。自此江南之人悟禅理者多矣。时相国崔公群坐失守出分司，后为华州，由三峰出镇宣城。其地虽通，其人则遐。崔公深乐礼谒，致

命诚请，毓以感念而现，大悲为心，莫不果欲随缘，游方顺命。宝历元年至于宛陵禅定寺，所以随顺而扬教也。至明年，告归齐云山，九月合朔，色相不动而示灭千山之院，享年八十，僧腊五十八。是日也，天地如惨，草木如摧，鸟兽悲啼，云泉断咽。缁徒士庶，孺慕充穷。十月，栖神于院之庭，从其宜也。弟子志孚、契真、清幹等既吾师示灭而后学徒存。大和二年，相国韦处厚素尚玄风，道心惇笃，以事奏闻。天子爰降德音，褒以殊礼，追谥号塔名。越州刺史陆亘詵翰论撰焉。

○唐南岳西园兰若昙藏传（灵象超岸）

释昙藏，不知何许人也，得禅诀于大寂之门。后见石头希迁禅师，所谓再染谓之赤贞也。贞元二年，嘉遁于衡岳。栖止峰之绝顶。晚年苦于脚疾，移下西园结茅，参请者繁炽。大和元年终于岳中，享龄七十。先是藏养一犬，尤灵，尝夜经行息坐次，其犬衔藏之衣归房，乃于门阃旁伏守，而吠声不绝，频奋身作猛噬之势。诘且视之，东厨有大蟒蛇，身长数丈，蟠绕小舍，为之岌。呀张其口，齟齬其声，毒气漫然。侍者白藏亟去回辟，藏曰：“死而可逃，何远之有？彼以毒来，我以慈受。毒无自性，激发则强。慈苟无缘，冤亲一揆。无人无我，法性俱空。”言讫，其蟒蛇按首徐行，闪然不见。又尝一夜，有群盗，其犬亦衔藏衣。藏语盗曰：“诸君，山叟茅舍有中意物，任拈去，终无少吝之分。”盗感其言，散分下山矣。又荆州永泰寺释灵象，姓萧氏兰陵人也。其胄裔则后梁为周所灭，支属星分，象父居长沙为编户矣。生象，宛有出尘之誓，遇诸禅会，罕不登临，止泊维青，优游自得。长庆元年住百家岩寺。未几，徙步江陵，太守王潜请居永泰寺。太和三载六月二十三日，终于住寺，春秋七十五。建塔于州北，存焉。又释超岸，丹阳人也。先遇鹤林素禅师，处众拱默而已。天宝二载，至抚州兰若，得大寂开发。四方毳侣依之。

○唐鄂州大寂院无等传

释无等，姓李氏，今东京尉氏人也。负志卓犖，辞气贞正。少随父官于南康，频游梵刹，向僧瞻像，往即忘归。既作沙门，遇道一禅师在龚公山，学侣蚁慕。等求法于其间，挺然出类。元和七年游汉上。后至武昌，睹郡西黄鹤山奇秀，遂结茅分卫。由此巴、蜀、荆、襄尚玄理者，无远不至矣。大和元载，属相国牛公僧孺出镇三江，闻等道香，普熏遐迩，命驾枉问。风虎相须，为法重人。牛公虑其兰若不隶名藉，特为奏题曰“大寂”也。憧憧往来，堂无虚位。至四年十月示灭，年八十二。弟子誓通奉全身入塔焉。

○唐天目山千顷院明觉传

释明觉，俗姓猷，河内人也。祖为官岭南，后徙居为建阳人也。觉儒家之子，风流蕴藉，好问求知，曾无倦懈。宿怀道性，闻道一禅师于佛迹岭行禅法，往造焉，遂依投剃染。由此即愿观方衡岳、天台、四明，遍尝法味。复于径山留心请决数夏，

负薪，面黑干手胝。下山至杭州大云寺，禁足院门。续移止湖畔青山顶，结庵而止。属范阳卢中丞向风躬谒，召归州治大云寺住持。元和十五年避嫌远器，隐天目山。是山也特秀，基墟跨涉四郡。有上下龙潭，深不可测，怪物往往出于中。有白鹿，毛质诡异，土人谓为山神也。觉遁是中，檀信为禅宇。长庆三年春及冬至明年二月大旱，野火蔓延，欲烧院，僧惶辩，觉曰：“吾与此山有缘，火当速灭。”少选，雷雨骤作，其火都灭，远近惊叹。以大和五年七月十九日示疾而亡。

○唐杭州秦望山圆脩传

释圆修，姓潘氏，福州闽人也。生而歧嶷，长而俊迈。忽思拔俗，寻事名师，剔发变衣，年满，于嵩阳会善寺纳戒。既而仪表容与，日新厥德，研穷经论，俄约观方。遇百丈山海禅师，根教相符，遂明心要。持杯振锡，而抵于杭。见秦望山峻极之势，有长松枝繁结盖，遂栖止于松巅。时感鹊复巢于横枝，物我都忘，羽族驯狎。由兹不下，近四十秋。每一太守到任，则就瞻仰，号鸟窠禅师焉。泊元和初，邦伯裴常棣酷重其道，请下结庵者至于三四，或为参请去说法，裴侯命八属宰官同力造伽蓝，移废额曰招贤以居之。大和七年癸丑岁九月二十二日，端坐，怡然归寂，享年九十九，僧腊八十。杭之累政良守无不倾重，税驾树阴，请谈玄极，不觉更仆移辰矣。今塔在石甌山下，南岳僧唯贞为塔铭焉。近有盗发其塔，且多怪异，止收得铭志而已。

○唐池州南泉院普愿传

释普愿，俗姓王，郑州新郑人也。其宗嗣于江西大寂，大寂师南岳观音让，让则曹溪之冢子也，于愿为大父，其高曾可知也，则南泉之禅有自来矣。愿在孕，母不喜荤血。至德二年，跪请于父母乞出家，脱然有去羈鞅之色。乃投密县大隈山大慧禅师受业，苦节笃励，胼胝鞞？，不敢为身主，其师异之。大历十二年，愿春秋三十矣，诣嵩山会善寺调律师受具，习相部旧章，究毗尼篇聚之学。后游讲肆，上《楞伽》顶，入《华严》海会，挾《中百门》观之关键，领玄机于疏论之外。当其锋者，皆旗靡辙乱。大寂门下八百余人，每参听之后，寻绎师说，是非纷错。愿或自默而语，群论皆弭曰：“夫人不言乃言尔耳。”自后舍景匿耀，似不能言者，人以其无法说，或扣其关，亦坚拒不泄。时有密赜其机者，微露头角，乃知其非无法说，时未至矣。贞元十一年，挂锡池阳南泉山，堙谷刊木，以构禅宇，蓑笠饭牛，溷于牧童。斫山畚田，种食以饶。足不下南泉三十年矣。夫洪钟不为莛？发声，声之者，故有待矣。大和年初，宣使陆公亘、前池阳太守皆知其抗迹尘外，为四方法眼，与护军彭城刘公同迎请下山，北面申礼。不经再岁，毳衣之子奔走道途，不下数百人。大和甲寅岁十月二十一日示疾。十二月二十三日，有白虹贯于禅室后峰，占之者：得非南泉谢世乎？是日西峰巨石崩，声数十里。当昼，有乳虎绕禅林而号，众咸异之。二十五日东方明，告门人曰：“星翳灯幻亦久矣，勿谓吾有去来也。”言讫而谢，春秋八十七，僧腊五十八。契元、文畅等凡九百人，皆布衣墨巾，泣血于

山门。赴丧会葬者相继于路，哀号之声震于崖谷。乙卯岁，门人奉全身于灵塔，从其教也。膳部员外郎史馆修撰刘轲钦若前烈，追德颂美焉。

○唐澧阳云岩寺昙晟传

释昙晟，俗姓王氏，钟陵建昌人也。始生有自然胎衣右袒，犹缁服焉。遂请出家于石门，年满具法，参见百丈山海禅师。二十年为侍者，职同欢喜，法必我闻，身若中涓，心居散位。续受药山举发，全了无疑，化徒孔勤，受益者众。以大和三年己酉十月二十七日示灭。敕谥大师号无相，塔名净胜焉。

系曰：商那和修，华言胎衣也，以其生带衣而诞，似缁肉而非，幼为绷褓，长且称身；出家成法服，至入灭阇维，方为煨烬焉。晟师之有胎衣，止不及为婴儿已往之服耳，此近叔离尼、商那尊者也，思过半矣。何邪？晟师去圣悬远，和修佛灭百年将胎衣示有行果之徒也，今晟以胞袒络化其教理之世，不其难乎！故曰思遇半矣。

○唐荆州福寿寺甄公传

释甄公，姓鲁氏，江陵人也。少而警慧，七岁诵通《诗》、《雅》，遂应州举，三上中第，未释褐。与沙门议论玄理，乃愿披缁，投福寿寺辩初法师，以为模范。后于洛京昭成寺讲法数座，因礼嵩山禅师，通畅心决。方至丹阳茅山，寻挂锡于苏州楞伽山，四远参玄者骈肩叠足矣。时白乐天牧是郡，接其谈道，不觉披襟解带，心游无物之场，得甄之阃阒矣。遂坚请出流水寺，不乐安止，以山水为娱情之趣耳。大和三年，示疾云终，九十岁。以其年四月十七日入塔焉。

○唐赵州东院从谔传

释从谔，青州临淄人也。童稚之岁，孤介弗群，越二亲之羁绊，超然离俗。乃投本州龙兴伽蓝，从师剪落。寻往嵩山琉璃坛纳戒，师勉之听习，于经律但染指而已。闻池阳愿禅师道化翕如，谔执心定志，钻仰忘疲。南泉密付授之，灭迹匿端，坦然安乐。后于赵郡开物化迷，大行禅道。以真定帅王氏阻兵，封疆多梗，朝廷患之。王氏抗拒过制，而偏归心于谔。谔尝寄尘拂上王氏曰：“王若问何处得此拂子？答道老僧平生用不尽者物。”凡所举扬，天下传之，号赵州法道。《语录》大行，为世所贵也。

○唐京兆华严寺智藏传

释智藏，姓黄氏，豫章上高人也。父为洪州掾。藏随父入报国寺，见供奉皓月讲《涅槃经》，微体经意，乐入佛门。年甫十三，割恩爱，辞父母，于开元寺宗法师所

受学。后修禅法，证大寂、一公宗要矣。建中元年，入长安。卢元顥素奉其道，举奏入内供养，敕令住华严寺。辇毂之间，玄学者孔炽，就藏之门，若海水之归投琴之壑矣。大和九年终于住寺，三月十二日入塔焉。

○唐潭州道吾山圆智传

释圆智，俗姓张，豫章海昏人也。总？之年，顿求出离，礼涅槃和尚，躬执瓶屨。爰登戒地，誓叩禅门，见乎药山，示其心决。后居长沙道吾山，海众相从，犹蜂蚁之附王焉。以大和九年乙卯九月十一日长逝，享年六十七。阍维，得不灰之骨数片，脑盖一节，特异而清莹，其色如金，其响如铜。乃建塔于石霜山，敕谥修一大师。宝相之塔。得其道者则普会焉。智公初领悟药山宗旨，俨师诲之曰：“吾无宝玉大弓以为分器，今赏汝犊鼻一腰，虽云微末，而表亲褻欤？”南岳僧玄泰著碑颂。

○唐明州大梅山法常传

释法常，俗姓郑，襄阳人也。稚岁从师于荆之玉泉寺。凡百经书，一览必暗诵，更无遗忘。冠年，受具足品于龙兴寺。容貌清峻，性度刚敏，纳衣囊钵，毕志卯斋。贞元十二年，自天台之于四明余姚之南七十里，寓仙尉梅子真之旧隐焉。昔梅福初入山也，见多龙穴，神蛇每吐气成楼阁，云雨晦冥。边有石库，内贮仙药神仙经籍。常寄宿于房，乃梦神人语之曰：“君非凡夫，因话及石库中圣书悬记既往将来之事，受之者为地下主，不然为帝王之师传矣。”常谓之曰：“石库之书，非吾所好。昔僧稠不顾仙经，其卷自亡。吾以涅槃为乐，厥寿何止与天偕老邪？”神曰：“此地灵府，俗气之人辄难居此，立致变怪。”常曰：“吾寓迹于梅尉之乡，非久据焉。”因号梅山也。由是编苫伐木，作覆形之调，居仅四十年，验实非常之人也。开成年初院成，徒侣辐凑，请问决疑，可六七百纳徒矣。四年，常忽示疾。九月十九日，山林摇荡，鸟兽悲鸣，辞众而逝，报龄八十八，戒腊六十九。十月十九日焚于南涧，收舍利，五色璨然圆转焉。常先隐梅岭，有僧求拄杖见之，白盐官安禅师曰：“梅子熟矣，汝曹往寻，幸能疗渴也。”进士江积为碑云尔。

○唐扬州慧照寺崇演传

释崇演，姓段氏，东平人也。出家于本州龙兴寺慧超法师之门。游方问道，见嵩阳善寂禅师，示其心法。后居都梁山，当于淮浦，四面来商毳客影附焉。相国李公绅镇抚广陵，而性刚严，少所接与，偏轻释子。或允相见，必问难锋起，祇应不供者，多咄叱而出。绅遣衙吏章幼成传意召演入府，褒对诣理，谈论铿然。绅悯然，翻不测其畛域，特加归信，请居慧照寺化导。同声相应，仅于千众。开成二年，终于净院，春秋八十四。以十月二十三日全身入塔云。

○唐杭州盐官海昌院齐安传

释齐安，俗姓李，实唐帝系之英。先人播越，故生于海门郡焉，深避世荣，终秘氏族。安在胎，母梦日兆祥。既诞而神光下烛。数岁，有异僧款门召见，摩顶曰：“凤穴振仪，龙宫藏宝，绍终之业，其在斯乎！及臻？角，亟请出家，父母呵止。安曰：“禄利之养，止于亲尔。冥报之利，不其远邪？皂组之荣，止于家尔。济拔之益，不其广邪？”二亲感其言而顺从，遂依本郡云琮禅师。虽勤劳谦默，和光同尘，而萤月殊晖，鸡鹤异态。年满登具，乃诣南岳智严律师，外捡律仪，内照实相。后闻南康龚公山大寂禅师随化度人，慈缘幽感，裹足振锡，一日造焉。大寂欣其相依，论持不倦。及其蜕去，安尽力送终。元和末，安春秋已逾七十，而游越之萧山法乐寺，以其古制垣屋靡完，补坏扶倾，不克宴坐。时海昌有法昕者，缙林翘楚，于放生池铄废地肇葺禅居焉。昕谦而不自有，延请安主之，四海参学者麋至焉。道化之盛，翕然推伏。安不言寒暑，不下堂庑，无流眄，无倾听，如此者盖有年矣。而又挺身魁岸，相好庄严，眉毫绀垂，颅骨圆耸，望之者如仰嵩华而揖沧溟，曾无测其高深也。以会昌二年壬戌十二月二十二日泊然宴坐，俄尔示灭。先时竹柏尽死，至是精彩益振。爰有清响叩户，祥光满室，如环佩之锵鸣，若剑戟之交射。瑞相尤繁，事形别录。又安悬知宣宗皇帝隐曜缙行，将来法会，预诫知事曰：“当有异人至此，禁杂言，止横事，恐累佛法。”明日，行脚僧数人参礼，安默识帝，遂令维那高位安置，礼殊他等。安每接谈话，益知贵气，乃曰：“贫道谬为海众围绕，患斋不供。就上座边求一供疏。”帝为操翰摅辞，安览惊悚，知供养僧赍去，所获丰厚，殆与常度不同。乃语帝曰：“时至矣，无滞泥蟠。”嘱以佛法后事而去。帝本宪宗第四子，穆宗异母弟也，武宗怕憚忌之，沉之于宫厕，宦者仇公武潜施拯护，俾髡发为僧，纵之而逸。周游天下，险阻备尝。因缘出授江陵少尹，实恶其在朝耳。武宗崩，左神策军中尉杨公諷宰臣百官迎而立之，闻安已终，怆悼久之。敕谥大师曰悟空，乃以御诗追悼。后右貂卢简求为建塔焉。

○唐京师圣寿寺恒政传

释恒政，姓周氏，平原人也。未入法前，随入乡校，殊不嗜书籍。或见佛经，耽味不舍。后弃俗从师，就本州延和寺诠澄法师下受诵经法。既登戒已，问道于嵩少，决了无壅，遁迹三峰，放荡自在。无几，入太一山中，甫行风教，学人蚁慕。大和中，文宗皇帝酷嗜蜃蛤，沿海官吏先时递进，人亦劳止。一日，御馔中盈筯而进，有擘不张呀者，帝观其异，即焚香祝之。俄为菩萨形，梵相克全，仪容可爱，遂致于金粟檀香合，以玉绵绵覆之，赐兴善寺，令致礼之。始宣问群臣：“斯何瑞也？”相国李公德俗奏曰：“臣不足知，唯知圣德昭应。其诸佛理，闻终南山有恒政禅师，大明佛法，博闻强识。”诏入宣问，政曰：“贫道闻物无虚应，此乃启沃陛下之信心耳。故契经中应以此身得度者，即现此身而为说法也。”帝曰：“菩萨身已见，未闻说法。”政曰：“陛下睹此为常非常耶？信非信耶？”帝曰：“稀奇事朕深信焉。”政曰：“陛下已闻说法了。”皇情悦豫，得未曾有，敕天下寺院各立观

音像，以答殊休。其菩萨，至会昌毁佛舍，乃亡所在。因留政内道场中，累辞入山，宣住圣寿寺，至武宗即位，忽入终南。或问其故，曰：“吾避仇，乌可已乎哉？”后终山舍，年八十七。阖维，收舍利四十九粒，以会昌三年九月四日入塔。后有废教之敕，政之先见，若合符节焉。

系曰：蜃蛤中胡得菩萨像乎？通曰：“有所警发，时一现耳。近闻伪唐李氏国境荐饥，陂湖间多生蚌，百姓竞取而食，其年免殍什者十有七八。明年丰，民犹采之。无何，有获巨蚌可二尺余，提归擘磔，击淪曾无少损。其人咒垂放之，俄自开张，吐出佛像，长仅尺许，相好具全，若真珠色，号曰：‘珠佛’焉。献李氏，后遗与梵僧焉。此意所不及处现形者，盖经中化肉山鱼米以资饥谨。岁既丰登，胡不属厌，故现相止足之也。”

○唐大沕山灵祐传

释灵祐，俗姓赵，祖父俱福州长溪人也。祐？年戏于前庭，仰见瑞气祥云，徘徊盘郁，又如天乐清奏，真身降灵，衢巷谛观，耆艾莫测。俄有华巖之叟，状类鬬宾之人，谓家老曰：“此群灵众圣标异。此童，佛之真子也，必当重光佛法。”久之，弹指数四而去。祐以椎髻短褐，依本郡法华律师执劳，每倍于役。冠年剃发，三年具戒。时有钱塘上士义宾授其律科。及入天台，遇寒山子于途中，乃谓祐曰：“千山万水，遇潭即止。获无价宝，赈恤诸子。”祐顺途而念，危坐以思，旋造国清寺，遇异人拾得申系前意，信若合符。遂诣泐潭谒大智师，顿了祖意。元和末，随缘长沙，因过大沕山，遂欲栖止。山与郡郭十舍而遥，甞无人烟，比为兽窟。乃杂猿猱之间，橡栗充食，浹旬，有山民见之，群信共营梵宇。时襄阳连率李景让统摄湘潭，愿预良缘，乃奏请山门号同庆寺。后相国裴公相亲道合。祐为遭会昌之澄汰，又遇相国崔公慎由崇重加礼，以大中癸酉岁正月九日盥漱毕，敷座瞑目而归灭焉。享年八十三，僧腊五十九。迁葬于山之右梔子园也。四镇北庭行军泾原等州节度使、右散骑常侍卢简求为碑，李商隐题额焉。

○唐黄州九井山玄策传

释玄策，俗姓鲁，会稽人也。幼随父商估，赴天台山光明会，乃隋朝智綽禅师立教，年别九月，远近州邑黑白二众鸠聚。策睹殊异，遂于禅林寺智广师下出家。游方见江西大寂，顿开翳障。及遍参问，睹黄陂九井山奇秀，乃结茅为舍，学侣若蝉之走明也。或慰策曰：“师之耐寂漠如此乎？”策曰：“致道者忘心矣，吾乐甚哉。”以大中八年现疾而灭。续敕谥大师曰圆寂，塔名智觉焉。

卷十二

◎习禅篇第三之五（正传二十人附见四人）○唐杭州大慈山寰中传

释寰中，姓卢氏，河东蒲坂人也。禀灵特异，挺质殊伦，身支侖亭，顶骨圆峻，其声若钟响，其色犹脂凝。学通终古，辞实丰赡。年二十五，随计中甲科，然未塞其怀，复思再捷。无何，遭母之忧，遂庐于墓所。及服阕，径往北京童子寺出家。二稔未周，诸经皆览。明年，往嵩岳登戒，肄习律部。于兹博通，忽慕上乘，决往百丈山，深得玄旨。后隐南岳常乐寺，结茅于山椒。谏议大夫崔公深重其操，因别立方丈。虞渊景晞，一饭永日。然其乏水，羸瓶远求。俄尔深宵，有虎嗥啸庐侧，诘旦视之，果湓泉坼地而涌，足其汲用。后之杭，浙江之北有山号大慈。居未久，檀信爰臻。旋成巨院，四方僧侣参礼如云。属武宗废教，中衣短褐，或请居戴氏别墅焉。大中壬申岁，太守刘公首命剃染，重盛禅林。壬午岁二月十五日囑累，声毕而终。时渐溽暑，验其身一无变异，而顶门燠润。冬窆于塔所，享年八十三，法腊五十四。有说常乐寺山虎跑泉，当中公灭日，忽焉干涸。异哉！止资中之受用耳。至乾符丁酉岁，敕谥大师，号性空，塔名定慧也。缙云太守段成式为真赞焉。

○唐洛阳韶山寰普传

释寰普者，不知何许人也。禀形淳粹，克性谦冲。居于丑夷，下风请业汪汪然，其识度辄难拟议。具戒之后，经论温寻。然后杖锡南游澧阳，遇夹山而得心契，有参学举问，垂手携归，不使一机失其开诱。其所不荐，劝令披览经法，亦近秀寂之遗风耳。

○唐衡山昂头峰日照传

释日照，姓刘氏，歧下人也。家世豪盛，幼承庭训，博览经籍，复于庄老，而宿慧发挥，思从释子。即往长安大兴善寺昙光法师下，禀学纳戒，传受经法，靡所不精。因游嵩岳，问圆通之诀，欣然趣入。后游南岳，登昂头峰，直拔苍翠，便有终焉之志。庵居二十载，属会昌武宗毁教，照深入岩窟，饭栗饮流而延喘息。大中宣宗重兴佛法，率徒六十许人还就昂头山旧基，结苫盖，构舍宇。复居一十五年，学人波委。咸通中示灭，春秋一百八岁。至三年二月三日入塔，立碑存焉。天下谓其禅学为昂头照是欤。

○唐朗州德山院宣鉴传

释宣鉴，姓周氏，剑南人也。生恶荤膻，少多英敏，宿贲异操，恳愿出尘。大龙不屈于小庭，俊鹗必腾其层汉，既除美饰，当预僧流。从受近圆，即穷《律藏》，其诸性相，贯习偕通。闻重湖间禅道大兴，乃抗志云游，造龙潭信禅师，则石头宗师

之二叶也。始唯独居一室，鉴强供侍之。一夕龙潭持一枝火授鉴，鉴接而行数步，且曰：“久闻龙潭到来，龙之与潭，俱不见欤？”信曰：“子亲到矣。”机与教符，日亲丈室三十余年。后止澧阳。居无何，属武宗搜扬。洎大中还复法仪。咸通初，武陵太守薛延望坚请，始居德山，其道芬馨，四海禅徒辐凑。伏腊，堂中常有半千人矣。其于训授，天险海深，难窥边际。雪峰参见，鉴深肯重。以咸通六年乙酉岁十二月三日，忽告诸徒曰：“扪空追响，劳汝神邪？梦觉觉非，复有何事？”言讫安坐而化，春秋八十四，僧腊六十五。身据床坐，卓然七日如生在焉。天下言激箭之禅道者，有德山门风焉。今襄、邓、汉东法孙极盛者是欤。

○唐明州栖心寺藏奘传

释藏奘，俗姓朱氏，苏州华亭人也。母方娠及诞，常闻异香。为儿时尝堕井，有神人接持而出。？岁出家，礼道旷禅师。及弱冠，诣嵩岳受具。母每思念涕泣，因一目不视，迨其归省，即日而明。母丧哀毁，庐墓间颇有征祥，孝感如是，由此显名。寻游方访道，复诣五泄山，遇灵默大师。一言辨析，旨趣符合。显晦之道，日月之所然也。会昌、大中，衰而复盛。惟奘居之，荧不能惑，焚不能热，溺不能濡者也。洎周洛再构长寿寺，敕度居焉。时内典焚毁，梵夹煨烬，手辑散落，实为《大藏》。寻南海杨公收典姑苏，请奘归于故林，以建精舍。大中十二年，鄞水檀越任景求舍宅为院，迎奘居之。剡寇求甫率徒二千，执兵昼入，奘瞑目宴坐，色且无挠。盗众皆悸慑，叩头谢过。寇平，州奏请改额为栖心寺，以旌奘之德焉。凡一动止，禅者必集，环堂拥榻，堵立云会。奘学识泉涌，指鉴歧分。诘难排纵之众，攻坚索隐之士，皆立褰苦雾，坐泮坚冰，一言入神，永破沈惑。以咸通七年秋八月三日现疾告终，享年七十七，僧腊五十七。预命香水剃发，谓弟子曰：“吾七日在矣。”及期而灭。门又号慕，乃权窆天童岩，已周三载。一日，异香凝空，远近郁烈。弟子相谓曰：“昔师嘱累，令三载后当焚我身。今异香若此。”乃发塔视之，俨若平生。以其年八月三日依西域法焚之，获舍利数千粒，其色红翠。十三年，弟子戒休赍舍利，述行状，诣阙请谥。奉敕丧谥，易名曰心鉴，塔曰寿相。奘在洛下长寿寺谓众曰：“昔四明天童山僧昙粹是吾前生也，有坟塔存焉。”相去辽远，人有疑者，及追验事实，皆如其言。初任生将迎奘，人或难之。对曰：“治宅之始，有异僧令大其门，二十年之后，当有圣者居之。”比奘至止，果二十年矣。又奘将离姑苏，为徒众留拥，乃以棕拂与之曰：“吾在此矣，汝何疑焉？”暨乎潜行，众方谕其深旨。又令寺之西北隅可为五百墩以镇之。或曰：“力何可致？”奘曰：“不然，作一墩殖五株柏，可也。”凡微言奥旨，皆此类也。刺史崔琪撰《塔碑》，金华县尉邵朗题额焉。

○唐真定府临济院义玄传

释义玄，俗姓邢，曹州南华人也。参学诸方，不憚艰苦。因见黄蘗山运禅师，鸣啄同时，了然通彻。乃北归乡土，俯徇赵人之请，住子城南临济焉。罢唱经论之徒，

皆亲堂室，示人心要，颇与德山相类。以咸通七年丙戌岁四月十日示灭。敕谥慧照大师，塔号澄虚。言教颇行于世，今恒阳号临济禅宗焉。

○唐洛京广爱寺从谏传（鉴宗）

释从谏，姓张氏，本南阳人也，徙居广陵，生于淮甸焉。为性倜傥，器宇崇峙，于闾里间，为时畏服。遇相工曰：“子身長八尺，眉目秀朗，他日必荷荣寄。”谏曰：“心不愿仕，于荣寄何有？”相工曰：“所寄荷不可测也。”越壮室之年，忽深信佛理，遂舍妻孥，求僧披剃焉。甫登戒地，颇护心珠，因悟禅那顿了玄理。方数十载，同好之者自远而来请问。谏一一指订，俾其开觉。寻游洛下广爱寺挂锡。时禅客鳞集，如孝子之事父母焉。洛中有请谏设食，必排位对宾头卢尊者，其为人之钦奉皆此类矣。属会昌四年诏废佛塔庙，令沙门复桑梓，亦例澄汰。乃乌帽麻衣，潜于皇甫氏之温泉别业。后冈上乔木骈郁，巨石砥平，谏于夏中常就此入定，或补毳毳事。忽遇颓云驶雨，霆电击石，烈风兼至，凡在此者惊奔恐懼。谏唯欣然，加趺而坐，若无所闻者。或问谏，曰：“恶畜生何尔？”大中初，宣皇诏兴释氏，谏还归洛邑旧居。其子一日自广陵来覲，适与谏遇于院门，威貌严庄，不复可识。乃问曰：“从谏大德所居？”谏指之东南可寻。其子既去，遂阖门不出，其割裂爱网又若此也。咸通七年丙戌岁夏五月，忽出诣檀越家辞别曰：“善建福业，贫道秋初当远行，故相闻耳。”至秋七月朔旦，旦盥手焚香，念慈氏如来已，右胁而卧，呼门人玄章，诫之曰：“人身难得而易失，急急，于物无心，无为流转，无生灭法，一切现存。今乃生也有涯，暂与尔别。”是日无疾而化，行年八十余矣。玄章等奉遗旨，送尸于建春门外尸陀林中，施诸鸟兽。三日复视之，肌貌如生，一无近者。遂以饼饵覆之，经宿有狐狼迹，唯啖所覆，身且俨如。乃议用外国法焚之，收合余烬，起白塔于道傍。人先归信，香火不绝焉。次有杭州径山院释鉴宗，湖州长城人也。姓钱氏，即礼部侍郎徽之孙。父晟有疾，宗割股肉馈啖之，给云“他畜之肉”。未几病间，孝誉闻于亲里，乃求出家。时州开元寺有上都临坛十望大德内供奉高闲，闲善草隶，尝对懿宗御前书，甚高华望，宗誓礼为师。后出学，涉通《净名》、《思益经》，遂常讲习。闲公亦示其笔法，渐得凤毛焉。倏往谒盐官悟空大师，随众参请，顿彻心源。却复故乡，劝人营福。咸通三年辛巳，巡历名山，遂止天目东峰径山焉。道俗归心，恢扬法教。出弟子尤者天童山咸启、敕赐紫衣背山行满、皆分枝化物，至七年丙戌闰三月五示灭。迁塔于大寂岩下，梁乾化五年，吴越国王尚父钱氏表请追谥大师曰无上，祖门传法号为径山第二祖。时吴兴沈？者自号白牙先生，述德为赞记焉。

○唐洪州洞山良价传

释良价，俗姓俞氏，会稽诸暨人也。少孺从师于五泄山寺。年至二十一，方往嵩山具戒焉。登即游方，见南泉禅师，深领玄契。续造云岩，疑滞顿寝。大中末，于斯丰山大行禅法。后盛化豫章高安洞山，今筠州也。价以咸通十年己丑三月朔旦，命

剃发披衣，令鸣钟，奄然而往。时弟子辈悲号，价忽开目而起曰：“夫出家之人心不依物，是真修行。劳生息死，于悲何有？沦丧于情，太粗著乎？”召主事僧令营斋：“斋毕，吾其逝矣！”然众心恋慕，从延其日，至于七辰，食具方备。价亦随斋，谓众曰：“此斋名愚痴也。”盖责其无般若欤？及僧唱随意，曰：“僧家勿事大率。临行之际，喧动如斯。”至八日浴讫，端坐而绝，春秋六十三，法腊四十二。敕谥禅师曰悟本，塔号慧觉矣。

系曰：其却留累日，古亦有之。如价之来去自由者，近世一人而已。○唐苏州藏讷传

释藏讷，俗姓程，衢州信安人也。幼岁神气朗畅，貌质魁然。元和中告亲求出家，志不可却，直造长沙岳麓，投灵智律师请事剃染，智师察其强愿不群，乃摄度之。既披法服，寻于武陵开元寺智总律师受具足尸罗，当长庆三年也。因听律范，旋穷篇聚，语同业曰：“教门繁广，然有总门。总门之急，勿过舍筏。”遂遍参禅宗，遇马素门下高足住龙牙山，知讷法器，异日告之曰：“蕴界不真，佛生非我。子之正本，当何所名？复从谁得？”讷一言领会，千辙同归。龙牙曰：“我法眼不蒙掩矣。”既遂所求，大得安静，却回柯山，盖避会昌之搜杨也。至大中六年，郡牧崔公寿重之，于州龙兴寺别构禅室，延居之。数年，北至嘉禾，信士归依，请留住至德伽蓝。又往姑苏，时崔公钧作守此郡，闻讷名久，请居南禅院。咸通八年，浙西廉使周公宝命住招隐寺。其年秋，却返嘉禾，信士吕京舍别墅造今永安院。时乾符中群寇纷纭，禅侣分散。讷曰：“盗终不至此。”及期，寇从别道行，果无所损，其先见如此。五年十月十二日，满院阴云，雉鸣鸟噪，安坐而化，弟子号哭，却苏，至六年三月中辰前别众后终，享年八十二，僧腊五十六。时澹交为讷作真赞。至乾宁中，僧神赞进状，乞追谥号塔名。士吴重裕书碑。

○唐福州怡山院大安传

释大安，姓陈氏，闽城人也。幼年入道，顿拂尘蒙。元和十二年，敕建州浦城县乾元寺置兜率坛，始全戒足。时天雨桂子及地生朱草，刺史元锡手疏其瑞，上达冕旒。遂回御札，诏改凤栖寺号灵感坛焉。安因往洪井，路出上元，忽逢一老父曰：“子往南昌，必有所得。”及咨参律学，夜闻二僧谈论，遽了三乘之旨，乃以所习付之同人。之临川，见石巩山慧藏禅师。藏之提唱，必持弓弩以拟学人。安服拜未兴，唱曰：“看箭。”安神色不挠，答对不羗。石巩乃投弩曰：“几年射，始中半人也矣。”安游五台，入龙池沐浴，虽久浸涟漪，殊无奋暴雨雹之怪，观者惊悚。后止汾山，礼大圆禅师，复证前闻而为量果也。时豫章廉使赠太尉崔贞孝公，则魏公之季父，深契玄机，敦安之道，飞疏召之，厥誉愈昌。咸通十四年，诏宜号延圣大师，赐紫袈裟一副。中和二年示疾，所止法堂巨梁中折。三年癸卯十月二十二日，坐化于怡山丈室，春秋九十一，腊六十七。续诏赠圆智大师，塔号证真。安不尝唾地，不处温房，随化而衣，天雨而裕谥法弟子慧长入关，扬安之德，故有追谥也。

博陵司空相国仰慕前烈，遂著文颂德。诗人周朴笃重安，时入山致礼焉。

○唐长沙石霜山庆诸传（洪諲、令达）

释庆诸，俗姓陈，庐陵新淦玉笥乡人也。乃祖厥考，咸不为吏，清言放荡焉。诸始十三，礼绍銓禅翁为师，于洪井西山剃{髡采}。二十三，往嵩山受具戒，便就东洛学毗奈耶。既知听制，终谓渐宗，回抵南岳，入大洑山。次届云岩，遇道吾，垂问知意，方为二夏之僧。得石霜山，便议终焉之志。道吾躬至石霜山，日勤执侍，往还问答，语在别录。诸貌古气真，世无能识。时洞山新灭，俄为远方禅侣围绕，因入深山无人之境，结茅宴坐。时众追寻，倏有见者，皆号哭交请“出为吾曹。诸将安往”？由是晨夕被游学者扣击，可无希声以应之乎？如是二十年间，堂中老宿，长坐不卧，屹若樛机，天下谓之石霜枯木众是也。南方谓之丛林者，翻禅那为功德丛林也，为四方清则者无出其右。以光启四年戊申岁二月己亥示疾，终于山院，享龄八十二，僧腊五十九。越三月十五日葬于寺西北隅二百许步，门弟子等结坟塔作螺髻形。夏四月一日广化寺释子处讷追慕往德，恐遗美声，命南岳玄泰纂录言行。诸方弟子分行其道焉。敕谥普会大师，塔曰法相。次余杭径山院释洪諲，俗姓吴，吴兴人也。年才十九，于开元寺礼无上大师出家落饰，精加佛事，罔怠巾瓶。二十二，遣往嵩岳会善寺受满足律仪，俾诵《大比丘戒》，匝七日念终，遂习毗尼。寻传经讲，自谓为僧有逸群事业，而归礼本师，曰：“汝于十二时中，将何报答四恩三有？”諲闻斯诘，恍然失措。三日忘食，本师却招诱提耳，方明本事。如是往还云岩，次洑山，各为切磋，蔚成匠手。俄而会昌中例遭黜退，众人悲泣者，惋叹者，諲晏如也。曰：大丈夫钟此厄会，岂非命也？夫何作儿女之情乎？”时于长沙遇信士罗晏，召居家供施。盖諲执白衣比丘法，初无差失，涉于二载，若门宾焉。大中初，除灭法之律，乃复厥仪，还故乡西峰院。至咸通六年，上径山覲本师。明年，无上大师迁神，众请諲嗣其法位。始唯百许僧，后盈千数。于时四众共居，肃然无过。僖宗皇帝赐院额曰“乾符镇国”。中和三年，仍赐紫袈裟。景福二年，吴越国王尚父钱氏奏举登赐法济大师。光化四年九月二十八日，辞众而卒。较溪戚长史写貌，武肃王为真赞，传法弟子庐山栖贤寺寂公、临川义直、功臣院令达。达于两浙大行道化，卒谥归寂大师焉。初，諲有先见之明。武肃王家居石鉴山，及就戍应募为军，諲一见握手，屏左右而谓之曰：“好自爱。他日贵极，当与佛法为主。”后累立战功，为杭牧，故奏署諲师号，见必拜跪，檀施丰厚，异于常数。终时执丧礼，念微时之言矣。

○唐洪州云居山道膺传

释道膺，姓王氏，门玉田人也。生而特异，神彩朗然。处于童？，崆峒稟气。宿心拔俗，争离火宅之门；拭目寻师，遂摄锻金之子。师授经法，诵彻复求。年偶蹉跎二十五，方于范阳延寿寺受具足戒。乃令习声闻律仪，膺叹曰：“大丈夫可为桎梏所拘邪！由是拥线纳，振锡环，诣翠微山问道三载。宴居，忽睹二使者冠服颇异，

勉膺曰：“胡弗南方参知识邪？”未几，有僧自豫章至，盛称洞上禅师言要。膺感动神机，遂专造焉。如是洞上垂接，复能领会。曾问曰：“我闻思大禅师向倭国为王，虚耶？实耶？”对曰：“若是思师，佛亦不作，况国王乎？”自尔洞上印许。初住三峰，后就云居提唱。时唐之季，钟氏据有洪井，倾委信诚。每一延请入州，则预洁甘子堂以礼之。乃表于昭宗，赐紫袈裟一副并师号焉。都不留意。所化之徒，寒暑相交，不下一千余众。牛头香树围绕者皆是繖檀，金翅鸟王轩翔者不齐尺。四方馈供，千里风从，如荆南帅成綖遣赍檀施，动盈巨万。以天复元年辛酉秋示疾，至明年正月三日而化焉。豫章南平王钟氏供其丧葬。时诸道禅子各依乡土所尚者，随灵龕到处，列花树帐幔粉面之饌，谓之卓祭。一期凶礼之盛，勿过于时也，猗欤！膺出世度人，满足三十年，遗爱可知也。

○唐缙云连云院有缘传

释有缘，俗姓冯，东川梓潼人也。小学之年往成都福感寺，事定兰开士，即宣宗师矣。随侍出入，多在内中。一旦宣召，帝以笔书其衫背云：“此童子与朕有缘”，由兹召体矣。大中九年，遇白公敏中出镇益部，开戒坛，即于浮众寺具尸罗也。续于京辇听习经律五腊。后身披布褐，手执墨敕，海内游行。参见小马神照，凡同时丛林禅祖无不礼谒者。乃居除州花山，及南游至武夷山，时廉使李海为筑禅室。乾符三年，至缙云龙泉大赛山，立院。因奏祠部给额，号龙安。敕度七僧，住十八载。安而能迁，止连云院焉。太守卢约者，以谏諒之诚，请入州开元等别院，四事供施焉。天祐丁卯岁四月八日，示疾，至六月朔日终于廨署，报龄七十三，腊五十二。遗旨嘱制置扬习司空主丧务，于寺南园荼毗。火灭，散分舍利数百粒。后收四十九粒并遗骨一瓶，瘞于石塔。晋开运三年乙巳岁，文泰律师撰塔碑焉。

○唐福州雪峰广福院义存传

释义存，长庆二年壬寅生于泉州南安县曾氏。自王父而下，皆友僧亲佛，清净谨愿。存生而鼻逆羣血。乳抱中，或闻钟磬，或见僧像，其容必动以是别垂爱于膝下。九岁请出家，怒而未允。十二从家君游蒲田玉润寺，有律师庆玄，持行高洁，遽拜之曰：“我师也。”遂留为童侍焉。十七落发，来谒芙蓉山恒照大师，见而奇之，故止其所。至宣宗中兴释氏，其道也涅而不缁，其身也褒然而出。北游吴、楚、梁、宋、燕、秦，受具足戒于幽州宝刹寺讫，巡名山，扣诸禅宗，突兀飘，云翔鸟逝。爰及武陵，一面德山，止于珍重而出。其徒数百，咸莫测之。德山曰：“斯无阶也，吾得之矣。”咸通六年，归于芙蓉之故山。其年圆寂大师亦自洩山拥徒至于怡山，王真君上升之地，其徒孰（孰师已嗣德山）累累而疑关，存拒而久之。则有行实者，始以存同而议曰：“我之道巍巍乎，法門围绕之所，不可造次，其地宜若布金之形胜可矣。府之西二百里山焉，环控四邑，峭拔万仞，楚潒以支圆碧，培以群青。怪石古松，栖蛰龟鹤；灵湫邃壑，隐见龙雷。山之巔，先冬而雪，盛夏而寒。其树皆别垂藤萝，葺而以为之衣，交错而不呈其形。奇姿异景，不可殚状，虽霍

童、武夷，无以加之。实闽越之神秀，而古仙之未攸居，诚有待于我也。祈以偕行去。”秋七月，穿云蹑藓，陟险升幽，将及之。存曰：“真吾居也。”其夕山之神果效灵。翌日岩谷爽朗，烟霞飞动。云庵既立，月构旋拢，繇是几法轮于无为，树空门于有地，行实乃请名其山曰雪峰，以其冬雪夏寒，取鹫岭、猴江之义。斯则庚寅逮于乙未，存以山而道任，山以存而名出。天下之释子，不计华夏，趋之若召。乾符中，观察使京兆韦公、中和中司空颖川陈公，每渴醍醐而不克就饮，交使驰恳，存为之入府，从人愿也。其时内官有复命于京，语其道其济之拔俗悟空者，请蜕浮华而来脱屣。僖宗皇帝闻之，翰林学士访于闽人陈延效，得其实奏。于是乃锡真觉大师之号，仍以紫袈裟俾延效授焉。存受之如不受，衣之如不衣。居累夏，辛亥岁朔，遽然杖屨，其徒启而不答，云以随之，东浮于丹丘四明。明年，属王侍中之始据闽越，乃洗兵于法雨，致礼于禅林，馥存之道，常东望顶手。后二年自吴还闽，大加礼异。及闽王王氏誓众养民之外，雅隆其道，凡斋僧构刹，必请问焉。为之增宇、设像、铸钟以严其山，优施以充其众。时则迎而馆之于府之东西甲第。每将俨油幢聆法论，未尝不移时。仅乎一纪勤勤恳恳，熊罴之士，因之投迹檀那；渔猎之逸，其或弭心鳞羽。戊辰年春三月示疾，闽王走医，医至粒药以授，存曰：“吾非疾也，不可冈子之工。”卒不饵之。其后札偈以遗法子，函翰以别王庭。夏五月二日，鸟兽悲鸣，云木惨悴。其夜十有八刻时灭度，俗寿八十有七，僧腊五十有九。以其月十五日塔而藏之。尔日奔走，闽之僧尼士庶，巷无居人。闽王涟如出涕，且曰：“师其舍予，一何遽乎！遣子延稟躬祭奠之，复斋僧焉。存之行化四十余年，四方之僧争趋法席者不可胜算矣。冬夏不减一千五百。徒之环足，其趋也驰而愈离，辩而愈惑。其庶几者，一曰师备，拥徒于玄沙（今安国也）；次曰可休，拥徒于越州洞岩；次曰智孚，拥徒于信州鹅湖；其四曰惠棱，拥徒于泉州招庆；其五曰神晏，住福州之鼓山。分灯化物，皆膺圣奖，赐紫袈裟，而玄沙级宗一大师焉。

系曰：雪峰道也恢廓乎！骏奔四海学人。所出门生形色不类，何邪？玄沙乘《楞严》而入道，识见天殊，其犹谚曰“青成蓝，蓝谢青，师何常？在明经”。故有过师之说。一则雪峰自述，塔铭已尽其致也。一则玄沙安立三句，决择群见，极成洞过坎？今江表多尚斯学，此学虚通，无系了达，逍遥勿拘，知乘急也。雪峰化众，切乎杜嘿禅坐，知戒急也。其能各舍一缓，以成一全，则可乎？

○唐澧州苏溪元安传

释元安，俗姓淡，凤翔游麟人也。？年于歧阳怀恩寺从兄祐律师出家。惟经与论，无不穷核。乃问道翠微，次临济，各咀法味，若饫香积之孟也。斫雕复朴，逍遥自如。闻夹山道盛德至，造澧阳当稽问车曷，又增明净。后开乐普山，寻居苏溪，答酬请益，多偶句华美，为四海传焉。以昭宗光化元年戊午十二月迁灭，享寿六十五，法腊四十六矣。临终告众，颇多警策辞句云。

○唐明州雪窦院恒通传（招贤岑师）

释恒通，俗姓李，邢州平恩人也。家传士族，幼而知学。苏秦显达，犹怀二顷之田；元亮孤高，不羨五斗之禄。纵越阡陌，拖紫腰金，瞬息浮华，岂裨来业？父母终礼，年甫十三，潜入鹄山访道依师。既罢丘坟，唯披释典，精虔忏诵，恳侍巾瓶，不弭初终，蒙恩剃度。年二十，于本州开元寺具戒。后往京兆荐福寺听习经律。七八年间，寻穷藏教，乃曰：“摩腾入汉，译著斯文。圣胄来梁，复明何事？”因辞北阙，径诣南方，遇招贤岑大师。大师问曰：“何处人也？”曰：“邢州人也。”招贤曰：“我道不从彼来。”通曰：“和尚还住此无？”于是有滞皆伸，无疑不决。后指洞山、石霜，皆往参焉。招贤示灭，通以弟子礼事之。咸通末，游宣城，尚书崔寓素奉禅门，攀迎庄肃，睹通仪表拔俗，问答往还，崔甚悦服。于谢仙山奏置禅院，号瑞圣，请以居之。四方毳衲之徒，不邀自聚。博陵方议奏荐师号，坚让遂寝。中和末，文德初，群寇竞起。通领徒至四明。大顺二年，郡牧黄君晟请留居雪窦焉，蔚然盛化。天祐二年七月示疾，越九日躬入浴室，却坐绳床，集众焚香，勤勤付嘱，合掌而逝。春秋七十二，夏腊五十二。以其年八月七日迁石塔于院之西南二百余步。或曰：“通临终言：我庞勋也。”此非也。高僧无作为《行录》而无此说。若观年腊，庞勋岂正弱冠来逃难邪？

○唐袁州仰山慧寂传

释慧寂，俗姓叶，韶州湏昌人也。登年十五，恳请出家，父母都不听允。止十七，再求堂亲，犹豫未决。其夜有白色光二道从曹溪发来，直贯其舍。时父母乃悟是子至诚之所感也。寂乃断左无名指及小指，器藉跪致堂阶曰：“答谢劬劳1如此，父母知其不可留，舍之。依南华寺通禅师下削染，年及十八，尚为息慈。营持道具，行寻知识。先见耽源。数年，良有所得。后参大洩山禅师，提诱哀之。栖泊十四五载，而足跋，时号跋脚驱乌。凡于商擢，多示其相。时韦胄就寂请伽？，乃将纸画规圆相，圆围下注云：“思而知之，落第二头。云不思而知，落第三首。”乃封呈达。自尔有若干势以示学人，谓之仰山门风也。海众抠衣得道者，不可胜计，往往有神异之者，倏来忽去，人皆不测。后敕追谥大师，曰智通，塔号妙光矣。今传《仰山法示成图相》，行于代也。

○唐天台紫凝山慧恭传

释慧恭，俗姓罗氏，福州闽人也。家传儒素，不交非类。母妊之初，梦所居涌出浮图，上参于天。迨恭诞生，嶷然聪悟。年十七，举进士，名随计车。将到京阙，因游终南山奉日寺，目祖师遗像，释然世纲，遂求出家。操执僧事，备历艰辛。二十有二，适值新创安国寺受具足戒。寻乃游方，缘涉荒，而无难色。尝遇黑蛇伤指，不求医而毒螫自销。见魑魅占山，谕罪福而妖物遄息。至武陵德山，诣宣鉴禅师，领会风飞，由兹道合。因挂锡，施门人礼。鉴公顺世，后游玉山，至信州，刺史营西禅院而礼之，其徒数百人，居岁余，以郛郭喧繁，复入福州长溪马冠山。自马冠抵泉州富阳山，所至之所，檀施臻集，徒侣解钵，禅坊立就，其为士庶向奉如此。

景福三年，与门人游天台，州牧京兆杜雄留之而止。杜因创瑞龙院于紫凝山，祈恭兴扬法席，以悟沦迷。缁俗云驰，香花山积。天复三年癸亥十二月午时，命众声钟，顾瞻左右，促言云去。加趺瞑目，俨然而化，春秋八十四，僧夏六十二。闾阖顿之宗，居道德之最，歿无易名，塔无题榜，足见浮名为桎梏耳。门人上足师遂植松负土，力崇塔庙，所谓法空不坏因缘矣。因缘有之，孝行曷伤于道云。

○唐杭州龙泉院文喜传

释文喜，姓朱氏，嘉禾御儿人也。母氏方娠，梦吞桃三蒂，至诞弥不味荤膻。七岁，诣本邑常乐寺僧清国下出家，国即喜之渭阳也。勤诵经并忏文十卷，方遂削染。往越州开元寺学《法华经》，集天台《文句》，即时敷演，则救蚁分中便能讲训也。开成二年局赵郡，受近圆登习《四分律》。属会昌澄汰，变素服，内秘之心无改。遇大中初年例重忏度，于盐官齐丰寺讲说。后往礼大慈山性空禅师，诲之曰：“子何不学善财遍参乎？”咸通壬午岁至豫章观音院，见仰山，喜于言下了其心契。仰山令典常祝一日有异貌僧就求斋食，喜减已食馈之。仰山预知，故问曰：“此果位僧求食，汝供给周旋否？”答曰：“辍已分回施。”曰：“汝大得利益。”七年，旋浙右，止千顷山，筑室居之。十年，余杭刘严合、马徵请居龙泉古城院，凡十一年。乾符己亥岁，巢寇掠地至余杭，喜避地湖州余不亭，刺史杜孺休请住仁王院。光启三年，武肃王钱氏始牧杭郡，降疏请住龙泉廨署，今慈光院是也。大顺元年，威胜军节使董昌、武肃王同年发表荐论，两赐紫衣。乾宁四年奏师号，曰无著。光化三年示疾，十月二十七日加趺坐而终于州郭廨署，春秋八十，僧夏六十。终时方丈上发白色光，竹树变白。十一月二十二日，迁塔于灵隐山西坞。喜形貌古朴，骨强而瘦，戒德禅门真知识也。初，喜寓居较川。广明元年夏，有蝗飞翳天，下食田苗。喜自将拄杖悬挂袈裟，标于畎浍中。其虫将下，遂厉声叱之，悉翻飞而去。十顷之苗斯年独稔，其感通如此。或云此所传得马祖细衲内袈裟以为信宝矣。迁葬之后，大复二年壬戌八月中，宣城帅田君应杭将许思叛涣纵兵大掠。发喜塔，见肉身不坏，如入禅定，发爪俱长。武肃王奇之，遣裨将邵志祭后，重封瘞焉。

○唐明州伏龙山惟靖传

释惟靖，吴门人也。年三十许，形奇貌古，且类憨痴，入国宁寺，巡僧房唱曰：“要人出家请留下。”至经藏院，见二众阇梨大德慧政，便跪拜伸诚，愿容执侍。政公允纳，与剪饰。于天台受具，暂归谢政，便寻访名山。有知识处，必经寒煖。自尔勤于禅法，未尝发言，即居定光禅师废金地道常侵星赴禅林寺晨粥，而多虎豹，随到寺门，虎踞地若伺候。靖出，复随至金地。迟明，巨迹极多。靖恐人知，以锄灭虎迹。俄患背疽，困睡，有鸬鸟粪于疮所，非久全愈。又虞冰雪，备糠粒半斗，每日以铍合菜煮食，置糠于地窖中。遇期，用米常满不耗。靖乃筑之而云：“吾被此物知，非理也。”寻居伏龙山，山可瞰海，峰势？峣，昔僧鉴诸曾隐于是。诸即唐王相国之母弟也，能文习道，刺史多往谒之。靖续遁此山，刺史黄晟常请出州，

供施繁委。末于奉川北山置院示疾坐终，享龄七十余。窆于山下，莹塔存焉。

卷十三

◎习禅篇第三之六（正传十七人附见六人）○唐今东京封禅寺圆绍传

释圆绍，姓孙氏，其先富阳人也，祖官于南燕，因为滑台白马人焉。年及识环，天然俊迈。邻儿戏玩，我且恬然；群从追随，我惟闲静。年当十八，方遂志出家，师事明福寺正觉禅师。觉见而异之，训诸徒弟，独许绍耳，曰：“真空门之伟器也。”至年二十二，于相州义檀香灯律师边受具。登即寻师访道，效祖参玄，二翼之余，一盂之外，必无他物。唯誓禅宗立雪传衣，是其素望也。至于三湘、五岭、二蜀、两京，凡曰丛林，一皆参礼。既探至赜，顿了心机，乃挂锡于夷门，即仓垣水南寺、今为开宝也。大中十年，适遇唐相国裴公休罢调商鼎，来镇魏郊，同气相求，一言道合，即命居今东上方院也。绍将聚禅徒，患其迫窄，遂开上院之西，损上益下。时檀施臻萃，倏成巨院，拥纳之流，数盈二百，横跨夷门山之峻岭焉。绍即七祖荷泽神会禅师五叶法孙也。演其无念，示以真心，了达磨之密传，极南能之深趣。时参学之众，拥从且繁。遇元帅相国王晋公铎，以绍道行通感，神耀效灵，降甘露于玄穹，沍嘉瑞于青松，奏僖宗赐院额曰双林，师号曰法济。别敕令度侍者七人，其间法会兴盛，士庶归心，仅四十载，所化人可万计，僧尼弟子五百余人。以乾宁二年乙卯七月四日谓众曰：“急急自了去，本为逃生死。若不解玄旨，何时得脱？吾景逼崦嵫，此为最后之言也。”于方丈中寂然而化，俗寿八十五，法腊六十三。敕许于本院西南隅建塔焉。越五年二月二日重开塔，发长半寸，仪貌如生。乃以香花供养七日，远近瞻礼，称叹希奇。已而行荼毗，火中迥出五色神光，收舍利百余粒，四散随心淘选，近一千粒，温润玉洁，璨烂珠圆，验五分之熏成，匪一生之构集。四众虔仰，复迎入塔，即昭宗皇帝戊午岁也。睢阳相国袁象先理于浚郊。弟子惠霭等冀终法乳，列状乞举行谥礼，梁乾化三年癸酉，太祖敕易名曰定觉，塔曰灵化。至贞明四年九月，惠霭等欲旌表师德立碑，敕允，开封尹王公瓚之文也。

○唐蕲州黄岗山法普传（休静）

释法普，姓潘氏，庐江人也。貌古情宽，拥败纳观方。元和中，因见黄岗山色奇秀，

其峰砢磈，其林郁密，中有石坛，平坦而高峙。乃放囊挂锡，于中班荆。久之，寻附树架蓬茨，仅容身而已。未几，有人自小径而至，见普惊怪，问云：“何缘至此？”曰：“某本行山麓，见巔顶腾涨，紫气盘纡可爱，意此山有尤物，故来耳。”谛视普，迟回而去。山下行者闻而寻焉。禅学之徒，不数年遽盈百数。普却之曰：“老僧独居，无物利人，君等亦无所乏。”由是星居之庵多矣。弟子广严等携成大院，禅客翕如，传其法者无算。一日，集众辞云：“吾其终矣。汝曹善住珍惜，加趺坐胡床而卒。其身不坏散，后以香泥涂渍之。至乾符中，重立碑颂云。次洛京华严寺释休静，不知何许人也。属洞山禅道风行，静往造之，袂钁所疑，若雷复于本

位焉。北返于洛邑，开演。因赴内斋，诸名公皆执经讽读，唯静并其徒俱默坐。帝宣问：“胡不转经？”酬答响应，仍皆属对，悦可帝情。寻回平阳示灭。收舍利，四处树浮图。敕谥宝智大师，塔号无为也。

○梁邓州香严山智闲传（大同）

释智闲，青州人也。身裁七尺，博闻强记，有干略。亲党观其所以，谓之曰：“汝加力学，则他后成佐时之良器也。”俄尔，辞亲出俗。既而慕法心坚，至南方礼沔山大圆禅师盛会，咸推闲为俊敏。沔山一日召对茫然，将诸方《语要》一时煨烬，曰：“画饼弗可充饥也。”便望南阳忠国师遗迹而居。偶芟除草木，击瓦砾，失笑，冥有所证，抒颂唱之，由兹盛化。终后，敕谥袭灯大师，塔号延福焉。次舒州桐城投子山释大同，姓刘氏，舒州怀宁人也。幼性刚正，有老成气度。因投洛下保唐满禅师出俗，初习安般观，业垂成，遂求华严性海。复负锡谒翠微山法会，同伏牛元通激发请益，大明祖意。由是放荡周游，还归故土，隐投子山，结茅茨，栖泊以求其志。中和中，巢躡荡覆京畿，天下悖乱。有贼徒持刃问同曰：“住此何为？”对以佛法。魁渠闻而膜拜。脱身服装而施之下山。以梁乾化四年甲戌四月六日，加趺坐亡，春秋九十六，法腊四十六。凡居化此山三十余载云。

○梁抚州疏山光仁传（本仁居遁）

释光仁，不知何许人也。其形矬而么麽，幼则气概凌物，精爽殆与常不同。早参洞山，深入玄奥，其辩给又多于人也。尝问香严禅师，答微有偏负。曰：“某累茧重胝而至，得无劳乎？”唾地而去。后居临川疏山，毳客趋请，颇有言辞，著《四大等颂略》、《华严长者论》，行于世。终入龕中，已有白鹿至灵前屈膝而起，时众谓为作吊焉。次筠州白水院释本仁，不知何许人也。得心于洞山法席。仁罕谈道，而四方之人若影之附形，却之还至。乃徇丹阳人请，住无几时。天复中，至洪井高安白水院聚徒。垂欲入灭，先触处告违，乃集众焚香曰：“至香烟尽处，是某涅槃时。”如其言，端坐而化。次龙牙山释居遁，姓郭氏，临川南城人也。年殆十四，警世无常而守恬淡。白亲往求出家于庐陵满田寺。于嵩山受具戒，已思其择木，乃参翠微禅会，迷复未归，莫知投诣。闻洞上言玄格峻，而躬造之。遁少进问曰：“何谓祖意？”答曰：“若洞水逆流，即当为说。”而于言下体解玄微。隐众栖息，七八年间孜孜戢曜，时不我知，久则通矣。天策府楚王马氏素藉芳音，奉之若孝悌之门稟昆长矣。乃请居龙牙山妙济禅院，??徒侣常聚半千。爰奏举，诏赐紫袈裟并师号证空焉，则梁贞明初也。方岳之下，号为禅窟，窥其室得其门者亦相继矣。至龙德三年癸未岁八月遘疾弥留，九月十三日归寂。遁出世近四十余龄，语详别录。

○梁福州玄沙院师备传

释师备，俗姓谢，闽人也。少而憨黠，酷好垂钓，往往泛小艇南台江自娱。其舟若虚，同类不我测也。一日，忽发出尘意，投钓弃舟，上芙蓉山出家，咸通初年也。后于豫章开元寺具戒，还归故里，山门力役，无不率先。布纳添麻，芒鞋续草，减食而食，语默有常，人咸畏之，汪汪大度，虽研桑巧计不能量也。备同学法兄，则雪峰存师也，一再相逢，存多许与，故目之为备头陀焉。有日，谑之曰：“头陀何不遍参去？”备对曰：“达磨不来东土，二祖不往西天。存深器重之。先开荒雪峰，备多率力。王氏始有闽土，奏赐紫衣，号宗一大师。以开平二年戊辰十一月二十七日示疾而终，春秋七十四，僧腊四十四。闽越忠懿王王氏树塔。备三十年演化，禅侣七百许人，得其法者，众推桂琛为神足矣。至今浙之左右，山门盛传此宗，法嗣繁衍矣。其于建立透过大乘初门，江表学人无不乘风偃草欤？”

○梁河中府栖岩山存寿传

释存寿，不知何许人也。清标胜范，造次奚及。罢寻经论，勇冠辈流。往问津于石霜禅师，决了前疑，虚舟不系，乃为枯木，众之蓍窃矣。后还蒲坂，缁素归心。时冀王友谦受封屏翰，好奇？异，闻人一善，厚礼下之。王召入府斋，论道谈玄，不觉膝之前席，颇增奉仰，续为菩萨戒师，供施便蕃。度门人四百许员，尼众百数。寿平日罕言，言必利物。喜愠之色，人未尝见，望之若孤松凌雪焉。终时春秋九十三，加趺而坐，一月后髭发再生，重剃入塔。塔之亭，每有虎旋绕，风迹时繁。敕谥为真寂大师焉。

○梁台州瑞岩院师彦传

释师彦，姓许氏，闽越人也。早悟羈縻，忽求拔俗，循乎戒检，俄欲观方。见岩头禅师，领会无疑。初乐杜嘿，似不能言者。后为所知敦喻，允请住台州瑞岩山院。时道夔往参问，答对响捷，夔公神伏。后二众同居，彦之威德，凛若严霜。纠正僧尼，无容舛误，故江表言御众剪齐者，瑞岩为最。尝有三僧，胡形清峭，目睛转若流电焉，差肩并足致礼。彦问曰：“子从何来？”曰：“天竺来。”“何时发？”曰：“朝行适至。”彦曰：“得无劳乎？”曰：“为法忘劳。”乃谛视之，足皆不蹈地。彦令入堂，上位安置，明旦忽焉不见，云是辟支迦果人，然莫知阶级。时有不测人入法会，非止一过。彦参学时号为小彦长老。两浙武肃王钱氏累召，方肯来仪，终苦辞去。寺仓常满，尝有村媪来参礼，彦曰：“汝休拜跪，不如疾归家，救取数十百物命，大有利益。”媪匆忙到舍，儿妇提竹器拾田螺正归。媪接取，放诸水陂。又数家召斋，一一同日见彦来食至终阖维。有巨蛇缘树杪，投身火聚，当乎薪尽，舍利散飞。或风动草木上纷纷而坠。神异绝繁，具如别录。

○梁抚州曹山本寂传

释本寂，姓黄氏，泉州蒲田人也。其邑唐季多衣冠士子侨寓，儒风振起，号小稷下

焉。寂少染鲁风，率多强学，自尔淳粹独凝，道性天发。年惟十九，二亲始听出家。入福州云名山。年二十五，登于戒足，凡诸举措，若老练焉。咸通之初，禅宗兴盛，风起于大沛也。至如石头药山其名寝顿，会洞山悯物，高其石头，往来请益，学同洙泗。寂处众如愚，发言若讷。后被请住临川曹山，参问之者堂盈室满。其所酬对，激射匪停，特为衲客标准，故排五位以铨量区域，无不尽其分齐也。复注《对寒山子诗》，流行寓内，盖以寂素修举业之优也。文辞迢丽，号富有法才焉。寻示疾，终于山，春秋六十二，僧腊三十七。弟子奉龕窆而树塔。后南岳玄泰著塔铭云。

○后唐漳州罗汉院桂琛传

释桂琛，俗姓李氏，常山人也。甫作童儿，笃求远俗，斋茹一跂，调息终日。秉心惟颺，乡党所钦。二亲爱缚而莫辞，群从情缠而难脱。既冠继逾城之武，求师得解虎之俦，乃事本府万岁寺无相大师矣。初登戒地，例学毗尼，为众升台宣戒本毕，将知志大安拘之于小道乎？乃自诲曰：“持犯束身，非解脱也。依文作解，岂发圣乎？”于是誓访南宗，程仅万里。初谒云居，后诣雪峰玄沙两会，参讯勤惇良以嗣缘有在，得旨于宗一大师，明暗色空，廓然无惑。密行累载，处众韬藏。虽夜光所潜，而宝器终异，遂为故漳牧太原王公诚请于闽城西石山建莲宫而止。驻锡一纪有半，来往二百众。琛以秘重妙法，罔轻示徒，有密学恳求者，时为开演。后龙溪为军絃，勤州太保琅簪公志请于罗汉院为众宣法，诿让不获，遂开方便。不数载，南北参徒丧疑而往者，不可殫数。有角立者，抚州曹山文益、江州东禅休复，咸传琛旨，各为一方法眼，视其子则知其父矣。以天成三年戊子秋，复戒闽城旧止，遍玩近城梵宇。已俄示疾，数日安坐告终，春秋六十有二，僧腊四十。遗戒勿遵俗礼而棺而墓。于是茶毗于城西院之东冈，收其舍利，建塔于院之西，禀遗教也。则清泰二年十二月望日也。琛得法密付授耳。时神晏大师，王氏所重，以言事胁令舍玄沙嗣雪峰，确乎不拔，终为晏谗而凌置，惜哉！

○后唐福州长庆院慧棱传

释慧棱，杭州海盐人也，俗姓孙氏。初诞缠紫色胎衣。为童龀日，俊朗抗节，于吴苑通玄寺登戒。已闻南方有禅学，遂游闽岭，谒雪峰，提耳指订，顿明本性。乃述偈云：“昔时谩向途中学，今日看来火里冰。”如是亲依，不下峰顶，计三十许载。冥循定业，谨摄袈裟。泉州刺史王延彬召棱住昭庆院，禅子委输，唯虞后至。及于长乐府，居长庆院，二十余年，出世不减一千五百众。棱性地慈忍，不妄许人。能反三隅，方加印可。以长兴三年壬辰五月十七日长往，春秋七十九，僧腊六十。闽国王氏私谥之大师，号超觉。塔葬皆出官供。判官林文盛为碑纪德云。

○后唐杭州龙册寺道夔传

释道夔，俗姓陈，永嘉人也。？总之年，性殊常准，而恶腥血之气。亲党强啖以枯鱼，且虞呕哕。求出家于开元寺。具戒已，游闽入楚，言参问善知识，要决了生死根源。见临川曹山寂公，大有征诘，若昙询之间僧稠也。终顿息疑于雪峰，闽中谓之小夔布纳。时太原同名，年腊之高故。暨回浙，住越州鉴清院。时皮光业者，日休之子，辞学宏赡，探赜禅门，尝深击难焉。退而谓人曰：“夔公之道，崇论閎议，莫臻其极。”武肃王钱氏钦慕，命居天龙寺，私署顺德大师。次文穆王钱氏创龙册寺，请夔居之，吴越禅学自此而兴。以天福丁酉岁八月示灭，春秋七十。荼毗于大慈山坞，收拾舍利，起塔于龙姥山前。故僧主汇征撰《塔铭》。今舍利院，弟子主之，香火相缀焉。

○晋会稽清化院全付传

释全付，吴郡昆山人也。幼随父商于豫章，闻禅寂之说，乃有厌世之志。白求出家，父愠形于色。愠止，复白者三，父异其诚，率略许之。遂诣江夏，投清平大师。问曰：“尔来何求？”付曰：“志求法也。”清平师怜其幼而抱器，抚以纳之。夙兴夜寐，殊于群童。及长，为之落饰，寻登戒度。奉师弥谨，检身弥至，问法无？厌，见性不龌龊，清平颌而许之。一旦，谓人曰：“吾闻学无常师，吾非匏瓜，岂系于此而旷于彼乎？”遂辞师而抵宜春之仰山，礼南塔涌禅师。应对言语，深认仰山之势，顿了直下之心。仰山单辰然器重之。拳拳伏膺，栖神累载。后游于庐陵，安福县宰杨公建应国禅院，请付居之。禅徒子来，堂室芦满。杨宰罢任，其乡人复于鸽湖山建院，迎以居之。廉使上闻，锡名曰清化禅院，禅徒麇至，请问者墙进。皆不我屈，岂多让于前辈乎？有同里僧谓付曰：“父母之乡，胡可弃也？任缘徇世，愿师归欤。”遂别鸽湖而还故国。时吴越文穆王钱氏命升阶，赐之衣衾钵器，有加礼焉。丁酉岁，钱城戍将辟云峰山，建清化禅院，召以居之。次忠献王钱氏遣使锡以紫袈裟，付上章累让，再赐之，又让之，遂改以纳衣。付曰：“吾非荣其赐而饰让也，恐后人之仿吾而逞欲矣。”寻赐号曰纯一禅师，又固让之。付不以情忘情，故情真；不以道求道，故道直。所居院之殿宇堂室，人竞崇建之。铸钟千余斤。新额曰云峰清化禅院，云水之侣辐凑，眷眷不欲舍旃。开运四年丁未岁秋七月示疾，谓众曰：“生也法起，歿也法灭，起灭非言论所及也。”安然而逝，有大雨疾风，以震林木拔矣。享年六十六，腊四十有五。归窆于山之北坞，弟子应清等十余人奉师遗训，不坠其道焉。僧主汇征为塔铭。建隆二年立。

○晋永兴永安院善静传（灵照）

释善静，俗姓王氏，长安金城人也。父朗，唐威州刺史。母李氏因梦圣容照烂金色，遂尔娠焉。及生歧嶷。殆乎知学，博通群言，因掌书奏于神策军，中尉器重之。忽？浮幻，潜诣终南丰德寺，礼广度禅师，时年二十七也。泊乎削染受具，天复中南游乐普，见元安禅裔，乃融心要。北还化徒于故里，结庐于终南云居山，道俗归之如市。又起游峨嵋，礼普贤银色世界，回兴元，连帅王公礼重留之，后还故乡，

已黍离矣。留守王公营永安禅院以居之。以开运丙午岁冬鸣椎集僧嘱累，还方丈，东向，右胁而化，俗寿八十九，僧腊六十。黑白之众若丧严亲。明年正月八日，荼毗于城南，获舍利数千粒。汉乾祐三年庚戌八月八日，迁塔于长安义阳乡，石塔岿然。初，静率多先觉，往游道，避昭宗之蒙尘。又生平洗沐，舍利陨落，皆收秘，不许弟子示人。又尝禅寂次，窗外无何有白鹤驯狎于庭，若有听法之意。静令人驱斥之。凡此殊征，有而不有。晋昌军府主郭公归信焉，营构禅院，命以居之。翰林学士鱼崇谅为《塔铭》述德焉。次杭州龙华寺释灵照，本高丽国人也。重译而来，学其祖法，入乎闽越，得心于雪峰。苦志参陪，以节俭勤于众务，号照布纳焉。千众畏服，而言语似涉岛夷。性介特，以恬淡自持。初住齐云山，次居越州鉴清院。尝纚对副使皮光业，语不相投，被举摈徙龙兴焉。及湖州太守钱公造报慈院请住，禅徒翕然。吴会间僧舍三衣披五纳者，不可胜计。忠献王钱氏造龙华寺，迎取金华梁傅翕大士灵骨道具，置于此寺树塔，命照住持焉。终于此寺，迁塔大慈山之峰。

○周金陵清凉院文益传

释文益，姓鲁氏，余杭人也。年甫七龄，挺然出俗，削染于新定智通院，依全伟禅师伯。弱年，得形俱无作法于越州开元寺。于时谢俗累以拂衣，出樊笼而矫翼。属律匠希觉师盛化其徒于？山育王寺，甚得持犯之趣。又游文雅之场，觉师许命为我门之游夏也。寻则玄机一发，杂务俱捐。振锡南游，止长庆禅师法会。已决疑滞，更约伴西出湖湘，尔日暴雨不进，暂望西院寄度信宿，避溪涨之患耳。遂参宣法大师曾住漳浦罗汉，闽人止呼罗汉。罗汉素知益在长庆颖脱，锐意接之，唱导之。由玄沙与雪峰血脉殊异，益疑山顿摧，正路斯得，欣欣然挂囊栖止，变涂回轨，颺乎不拔。寻游方却抵临川，邦伯命居崇寿。四远之僧求益者，不减千计。江南国主李氏始祖知重，迎住报恩禅院，署号净慧。厥后微言欲绝，大梦谁醒？既传法而有归，亦同凡而示灭，以周显德五年戊午岁秋七月十七日有恙，国主纡于方丈问疾。闰月五日，剃发澡身，与众言别，加趺而尽，颜貌如生，俗年七十四，腊五十五。私谥曰大法眼，塔号无相。俾城下僧寺具威仪礼迎引，奉全身于江宁县丹阳乡，起塔焉。益好为文笔，特慕支汤之体，时作偈颂真赞，别形纂录。法嗣弟子天台德韶、慧明、漳州智依、钟山道钦、润州光逸、吉州文遂。江南后主为《碑》颂德，韩熙载撰塔铭云。

○周庐山佛手岩行因传（道潜）

释行因，不详姓氏，雁门人也。游方问道于江淮，见庐山北有岩，遥望如垂手焉，手下则深还可三五丈许。因独栖禅观于其中。伪唐主元宗闻之，三征召不起。岩中夜阑，有异鹿一卧千因之石屋之侧，又锦囊鸟一伏宿于石壁下，二物都无惊怖。因不度弟子，有邻庵僧为之供侍。一日小疾，谓侍僧曰：“卷上帘，我去去。”帘方就钩，下床三数步间立，屹然而化，春秋七十许。元宗命画工写真，而阎维收遗骨

，白塔在岩背焉。初因传禅法于襄阳鹿门山，寻为元宗坚请，于栖贤寺开堂唱道，不及期月，潜归岩窟。初岩如五指，中指上有松一株，因终之日，此亦枯瘁。因有经藉之学，有问则指钁先儒得失章句，是非谈论，不滞于方隅，开喻必含于教化，实得道之良士也。

系曰：凡夫舍报，尸必一同也。佛则右胁，果位坐亡，首支地者现通，身立中者彰异。其惟欲行步而化者，除后僧会外，则因公有焉。

次钱塘慧日永明寺释道潜，俗姓武，蒲津人也。生而强壮，容姿端雅。成立则身長七尺许，胸前黑子七点，若斗之纲魁焉。投中条山栖岩大通禅院，礼真寂禅师，为亲教也。戒检严明，讷言敏行。师亡之后，誓入雁门五台山，以精恪之故，躬睹文殊圣容。后诸方无定游处。未到临川，见崇寿益禅师，顿明心决。次栖衢州古寺，览阅《藏经》。尝宴坐中，见文殊现形，不觉起而作礼。及诣杭，礼阿育王塔，跪而顶戴，肠下如雨。问掌塔僧曰：“舍利人不目击，还实有否？”僧曰：“按传记云，藏在内角中，望若悬钟焉。”潜疑未已，遂苦到跪礼，更无间然。俄见舍利红色在悬钟之外，蠢?而行。潜悲喜交集。又光文大师汇征迥然肯重，自为檀越，请于山斋行三七日《普贤忏》，忽见遍吉御象在塔寺三门亭下，其象鼻直枕行忏所。汉南国王钱氏命入王府受菩萨戒，造大伽蓝，号慧日永明，请以居之。假号曰慈化定慧禅师，别给月俸以施之，加优礼也。建隆二年辛酉九月十八日示疾而终。入棺之际，有白光昼发，孛孛莹然，时众皆睹。至十月内于龙井山茶毗，所收舍利夥多。有屠者自惟恶业，展襟就火聚乞求，斯须获七颗。屠家持于印氏塔中。至开宝庚午岁，天台韶禅师建石塔，殓其真骨，癸酉岁塔顶放白光焉。

○大宋庐山圆通院缘德传

释缘德，俗姓黄，钱塘人也。父超修学儒术，而长于绩画，传周窻佛粉本，受笔法于吴兴李沼长史。德幼有出家之志，心性孤僻而寡合，遂往天台受具，习禅法于天龙寺道奩禅师。寻往江西问道，自云居住庐阜，孤节高岸，实不见有所欲。江南国主李氏召入内道场，安置，虑其不群，别构罗汉院处之。苦求入山，请住庐山新院，乃列威仪导引焉。德且装衣荷檐而入，然后升座，对答参问焉。其国主赐赆，未尝以表笺报谢。有国老宋齐丘者，礼以师道。以开宝中卒于山院。德一生服用，熟韦裤袜而已。行杜多法，供亿诸禅侣，厨无匱乏。或谓德有黄白术焉。

○大宋天台山德韶传

释德韶者，姓陈氏，缙云人也。幼出家于本郡，登戒后，同光中寻访名山，参见知识，屈指不胜其数。初发心于投子山和尚，后见临川法眼禅师，重了心要，遂承嗣焉。始入天台山，建寺院道常无几，韶大兴玄沙法道，归依者众。汉南国王钱氏尝理丹丘，韶有先见之明，谓曰：“他日为国王，当兴佛法。”其言信矣，遣使入山

旁午，后署大禅师号，每有言时，无不符合。苏州节使钱仁奉有疾，遣人赍香往乞愿焉。乃题疏云：“令公八十一。”仁奉得之甚喜曰：“我寿八十一也。”其年八月十一日卒焉。凡多此类。韶末终之前也，华顶石崩，振惊百里，山如野烧蔓延，果应韶终。焚舍利繁多，营塔，命都僧正赞宁为塔碑焉。享年八十二，法腊六十四即开宝五年壬申岁六月二十八日也。《语录》大行。出弟子传法百许人，其又兴智者道场数十所，功成不宰，心地坦夷。术数尤精，利人为上。至今江浙间谓为“大和尚”焉。

论曰：梵语禅那，华言念修也。以其触情念而无念，终日修而无修。又云正定也，正受也。正则廓然置而定矣。正受简邪思惟，增遍计故。所以奢摩他以寂静故，三摩提以观如幼故，若禅那者，俱离静幼故，始云菩萨不住此岸，不住彼岸，而度众生令登彼岸也。若然者，诸圣住处既如彼，诸圣度生复若何？稽夫法演汉庭，极证之名未著；风行庐阜，禅那之学始萌。佛陀什，秦宾而来，般若多，晋朝而至，时远公也，密传坐法，深鞫玄机，渐染施行，依违祖述。吴之僧会亦示有缘，俱未分明，肆多隐秘。及乎慧文大士，肇寻龙树之宗；思大禅翁，继传三观之妙。天台智者引而伸之，化导陈隋，名题止观。粤有中天达磨，哀我群生，知梵夹之虽传，为名相之所溺，认指忘月，得鱼执筌，但矜诵念以为功，不信已躬之是佛。是以倡言曰：“吾直指人心，见性成佛，不立文字也。”此乃乘方便波罗蜜，径直而度，免无量之迂回焉。嗟乎！经有曲指曲，指则渐修也。见性成佛者，顿悟自心本来清淨，元无烦恼，无漏智性，本自具足。此心即佛，毕了无异。如此修证，是最上乘禅也。不立文字者，经云“不著文字，不离文字”。非无文字，能如是修，不见修相也。又达磨立法，要唯二种，谓理也、行也。然则直而不迂，不速而疾，云不立文字，乃反权合道也。尔时梁武不知，魏人未重，向少林而面壁，唯慧可以神交。亦犹《白雪》虽歌，巴童寡和。后则临洺牧圉，子孙终号于强秦；避狄歧郃，文武乃成其王道。可生璨，璨生信。信下分二枝，一忍二融。融，牛头也。忍生秀与能。能传信衣，若诸侯付子孙之分器也，厥后此宗越盛焉。荫车百辆，尼拘树而展转垂枝；施雨万方，阿耨龙而连筵布润。当是时也，应其悬记，属于此人，后来得道无央数是欤！重之曰：夫禅之为物也，其大矣哉！诸佛得之升等妙，雌龙得之破障缠。率由速疾之门无过此。故今之像末，斗诤复生，师足既伤，资争未已。如闻此心是佛，便言三十二相何无？或闻一路涅槃，则曰八万法门何在？曾不知经中发菩提心，此见佛性也。云何修菩萨行，此行布修行也。因信不及，无明所迷，溺丧忘归，何由复业！或举经以示之，则对曰：“此性宗法。”或谓之曰：“莫是魔说，还可焚毁否？”且置而勿论。又欲弃之，又欲存之，不其惑乎？昔者于闐诸部谓《道行经》为婆罗门书，乌荼小乘谤大乘学作空花外道。西乾尚尔，此何惊乎？良以六代宗师，一期举唱，但破百年之暗，靡营一室之隙。殊不知禅有理焉，禅有行焉。脱或戒乘俱急，目足更资，行不废而理逾明，法无偏而功兼济。然后始可与言禅已矣。其如玄学多斥讲家，目为数宝之人，终困屡空之室。那不见经是佛言，禅是佛意，诸佛心口，定不相违。施設逗根，用有时处。况以经江高国纪之名，论海总朝宗之会。毗尼一学，轨范千途。授形俱筑释子之甚，唱随行净沙门之业，拟捐三事

，何驾一乘？终包不足之羞，岂到转依之地？通人不谄，竖子何知？佛事门中不舍一法，吠声贻责，迁怒伤人，因击鼠以破盆，为争抻而噬主，自他俱有，彼我须均，纵横尽而成一秦，气剂和而成一味者也。今从贞观及于宋朝，于山选山，露须弥而出海；于羽求羽，放金翅以腾空。令其钻仰之俦，慕此坚高之道矣。吾徒通达，无相夺伦，譬若文武是一人之艺，不能兼者，互相非斥耳。若相推重，佛法增明，酬君王度已之恩，答我佛为师之训。慎之哉！慎之哉！

卷十四

◎明律篇第四之一（正传二十人附见五人）○唐京兆西明寺道宣传（大慈）

释道宣，姓钱氏，丹徒人也，一云长城人。其先出自广陵太守让之后，洎太史令乐之撰《天文集占》一百卷。考讳申府君，陈吏部尚书，皆高矩令猷，周仁全行，盛德百代，君子万年。母娠而梦月贯其怀，复梦梵僧语曰：“汝所妊者即梁朝僧祐律师，祐则南齐剡溪隐岳寺，僧护也。宜从出家，崇树释教”云。凡十二月在胎，四月八日降诞。九岁能赋。十五厌俗，诵习诸经，依智君页律师受业。洎十六落发，所谓除结，非欲染衣，便隶日严道常弱冠，极力护持，专精克念，感舍利现于宝函。隋大业年中，从智首律师受具。武德中依首习律，才听一遍，方议修禅。君页师呵曰：“夫适遐自迹，因微知章，修舍有时，功愿须满，未宜即去律也。”抑令听二十遍，已乃坐山林，行定慧，晦迹于终南仿掌之谷。所居乏水，神人指之，穿地尺余，其泉迸涌，时号为白泉寺。猛兽驯伏，每有所依，名花芬芳，奇草蔓延。隋末徙崇义精舍，载迁丰德寺。尝因独坐，护法神告曰：“彼清官村，故净业寺，地当宝势，道可习成。”闻斯卜焉，焚功德香，行般舟定。时有群龙礼谒，若男若女，化为人形。沙弥散心，顾纹邪视。龙赫然发怒，将搏攫之，寻追悔，吐毒井中，具陈而去。宣乃令封闭，人或潜开，往往烟上，审其神变。或送异花一奁，形似枣花，大如榆荚，香气丰香孚，数载宛然。又供奇果，季孟梨柰，然其味甘，其色洁，非人间所遇也。门徒尝欲举阴事，先是潜通，以定观根随病与药。皆此类者。有处士孙思邈尝隐终南山，与宣相接，结林下之交，每一往来，议论终夕。时天旱，有西域僧于昆明池结坛祈雨，诏有司备香灯供具，凡七日，池水日涨数尺。有老人夜诣宣求救，颇形仓卒之状，曰：“弟子即昆明池龙也。时之无雨，乃天意也，非由弟子。今胡僧取利于弟子，而欺天子言祈雨。命在旦夕，乞和尚法力加护”宣曰：“吾无能救尔，尔可急求孙先生。”老人至思邈石室，冤诉再三，云：“宣律师示我，故敢相投也。”邈曰：“我知昆明池龙宫有仙方三十首，能示余，余乃救尔。”老人曰：“此方上界不许辄传，今事急矣，固何所吝。”少选，捧方而至。邈曰：“尔速还，无惧胡僧也。”自是池水大涨，数日溢岸，胡僧术将尽矣，无能为力。及西明寺初就，诏宣充上座。三藏奘师至止，诏与翻译。又送真身往扶风无忧王寺。遇敕令僧拜等，上启朝宰，护法又如此者。撰《法门文记》、《广弘明集》、《续高僧传》、《三宝录》、《羯磨戒疏》、《行事钞》、《义钞》等二百二十余卷。三衣皆綌，一食唯菽。行则杖策，坐不倚床，蚤虱从游，居然除受，土木自得，固已亡身。尝筑一坛，俄有长眉僧谈道，知者其实宾头卢也。复三果梵僧礼坛赞曰：“自佛灭后，像法住世，兴发毗尼，唯师一人也。”乾封二年春，冥感天人来谈律相，言钞文轻重，仪中舛误，皆译之过非师之咎，请师改正。故今所行著述，多是重修本是也。又有天人云：“曾撰《瘡洹图经》，计人间纸帛一百许卷。”宣苦告口占，一一抄记，上下二卷。又口传偈颂，号《付嘱仪》十卷是也。贞观中，曾隐沁部云室山，人睹天童给侍左右。于西明寺夜行道，足跌前阶，有物扶持，履空无害。熟顾视之，乃少年也。宣遽问：“何人中夜在此？”少年曰：“某非常

人，即《毗沙门天王》之子那吒也，护法之故，拥护和尚，时之久矣。”宣曰：“贫道修行，无事烦太子。太子威神自在，西域有可作佛事者，愿为致之。”太子曰：“某有佛牙宝掌虽久，头目犹舍，敢不奉献。”俄授于宣，宣保录供养焉。复次，庭除有一天来礼谒，谓宣曰：“律师当生睹史天宫”，持物一苞，云是棘林香。尔后十旬，安坐而化，则乾封二年十月三日也，春秋七十二，僧腊五十二。累门人窆于坛谷石室，其后树塔三所。高宗下诏，令崇饰图写宣之真相。匠韩伯通塑绩之，盖追仰道风也。宣从登戒坛及当泥曰，其间受法传教，弟子可千百人。其亲度曰大慈律师、授法者文纲等。其天人付授佛牙，密令文纲掌护，持去崇圣寺东塔。大和初，丞相韦公处厚建塔于西廊焉。宣之持律，声振竺乾，宣之编修，美流天下，是故无畏三藏到东夏朝谒，帝问：“自远而来，得无劳乎？欲于何方休息？”三藏奏曰：“在天竺时常闻西明寺宣律师，秉持第一，愿往依止焉。”敕允之。宣持禁坚牢，扞虱以绵纸裹投于地。三藏曰：“扑有情于地之声也。”凡诸密行，或制或遮，良可知矣。至代宗大历二年，敕此寺三纲：“如闻彼寺有大德道宣律师传授得释迦佛牙及肉舍利，宜即诣右银台门进来，朕要观礼。”至十一年十月，敕：“每年内中出香一合，送西明寺故道宣律师堂，为国焚之祷祝。”至懿宗咸通十年，左右街僧令霄、玄畅等上表乞追赠。其年十月敕谥曰澄照，塔曰净光。先所居久在终南，故号南山律宗焉。天宝元载灵昌太守李邕，会昌元年工部郎中严厚本，各为碑颂德云。

系曰：律宗犯即问心，心有虚实故。如未得道，起覆想说，则宜犯重矣。若实有天龙来至我所，而云犯重，招谤还婆罗汉同也。宣屡屡有天之使者或送佛牙，或充给使，非宣自述也。如遣龙去孙先生所，岂自言邪？至于乾封之际，天神合沓，或写《瘡洹图经》、《付嘱仪》等，且非寓言于鬼物乎？君不见《十诵律》中诸比丘尚扬言，目连犯妄，佛言：“目连随心想说无罪。”佛世犹尔，像季嫉贤，斯何足怪也。又无畏非开元中者，贞观、显庆已来莫别有无畏否？

○唐京兆恒济寺道成传

释道成者，不知何许人也。居于天邑，演彼律乘。戒月扬光，圆而不缺；德瓶告实，满而不倾。当显庆中，敷《四分》一宗，有同雾市。时文纲律匠虽先依澄照大师，后习律文，乃登成之堂奥矣。又怀素著述，皆出其门。垂拱中，日照三藏译《显识》等经，天后诏名德十员助其法化，成与明恂、嘉尚同预证义。由是声飞神甸，位首方坛，谓之梧桐多栖凤鸟，谓之芳禴颇秀兰丛。门生孔多，无过此集，然不详终所。

系曰：成公与隋蒋州道成同号而异实，二者奚先？通曰：“隋成也精乎《十诵》，著述尤多；唐成也传乎《四分》，译讲偕妙。然其撰集则开悟迷沦，究其翻传则陶甄教道。譬犹后焰靡及乎前光，似宝或惭乎真宝，互有长短，用则无遗也。

○唐京师崇圣寺文纲传（名恪）

释文纲，姓孔氏，会稽人也。曾祖范，陈都官尚书；祖祀，祠部侍郎；考顶生逃海避隋，择木归舜，贞观始拜尚乘直长，咸光复儒业，旁通释教。是故纲也植宿根，从习气。慈母怀孕，杂食弃捐。有婆罗门僧头陀语其母曰：“若此男终绍三宝。”自尔每闻空中多异香，杂仙乐。及诞育之日，白鹤翔集，若临视焉。比襁褓中，午后不受乳哺，犹坚持斋者。童龀，随师访道。十二出家，冠年受具。精虑苦行，专念息心，藜羹糗粮，麻衣草荐。操有彝检，口无溢言。寻诣京兆沙门道成律师，禀毗尼藏。二十五讲律，三十登坛。每勤修深思，凝视反听，净如止水，巖若断山。或风雨宴居，或昼夜独得。故能吉祥在手，不舍其瓶，威德迎风，不绝于气。出笼瘠雁，坐致虚空，起屋下层，自然成就。惟甘露之婆口，喻利剑之伤人，慎之重之，广矣至矣。由是八方来学，《四分》永流，请益者举袂云临，赞叹者发声雷骇。久视中，天作淫雨，人有忧色。纲敏之，乃端坐思惟，却倚屋壁。奄至中夕，錫尔半倾，唯余背间，巖然山立，识者以为得神通，因定力故。日月灵迹，幽明潜感，兆于集事，应乎遣言。左右怪之，纲曰：“夫真实无相，尘色本空。正觉圆常，大悲湛定，不可取也。”是以一时法主，四朝帝师，同迦叶之入城，遇匿王之说戒，竹园门外别有沙弥，毕树枝间广闻？鸟。所以受润者博，入见者深。万病已痊，获欢喜之药；一心不染，解烦恼之绳。又恭承丝纶，京都翻译，追论惠用，远契如因，翘诚满朝，檀施敌国，但依布萨，尽用庄严。累历伽蓝二十余所，凡是塔庙，各已华丰。犹且刺血书经，向六百卷；登坛受具，仅数千人。至苦至勤，纳无我之海；不寝不食，种无生之田。长安四年，奉敕往歧州无忧王寺迎舍利。景龙二载，中宗孝和皇帝延入内道场行道，送真身舍利往无忧王寺入塔。其年于乾陵宫为内尼受戒。复于宫中坐夏，为二圣内尼讲《四分律》一遍。中宗嘉尚，为度弟子，赐什物彩帛三千匹，因奏道场灵感之事。六月七日，御札题榜为灵感寺是也。诸寺辟硕德以隶焉。夫其左鍤宿，右上林，南台终山，北池渭水，千门宫阙，化出云霄，万乘旌旗，天回原隰。先天载睿宗圣真皇帝，又于别殿请为菩萨戒师，妃主环阶，侍从罗拜。兜率天上，亲听法言；王舍城中，普闻净戒。恩旨赐绢三千余匹，纲悉付常住随事修营，或金地缭垣，用增上价；或宝坊飞阁，克壮全模；或讲堂经楼，舍利净土；或轩廊器物，厨库园林，皆信施法财，周给僧宝。方将示迷津，引觉路，濯热火宅，拯溺毒流，而乃奄忽神迁，斯须薪尽，虽有应化，何其速欤！以开元十五年八月十五日怡然长往，时春秋九十有二。其年九月四日，塔于寺侧焉。闻哀奔丧，执紼会葬，香花幢盖，缁素华夷，填城塞川，簪云翳景，盖数万人。有若法侣，京兆怀素、满意、承礼、襄阳崇拔、扶风凤林、江陵恒景、淄川名恪等百余人，咸曰：“智河舟迁，法宇栋桡而已哉！有若弟子，淮南道岸、蜀川神积、歧陇慧綽、京兆神慧、思义、绍觉、律藏恒暹、崇业等五十余人，并目以慈眼入于度门，金棺不追，灰骨罔答。乃请滑台太守李邕为碑。邕象彼马迁，法其班氏，以二人而同传，必百行以齐肩。不忝怀素前，不惭宣师后，李北海题品，不其韪乎！有淄州名恪律师者，精执律范，切勤求解，尝厕宣师法筵，躬问《钞序》义。宣师亲录，随喜灵感坛，班名于经末，又附丽文纲之门也。”

○唐京师恒济寺怀素传（宾律师）

释怀素，姓范氏，其先南阳人也。曾祖岳，高宗朝选调为绛州曲沃县丞。祖徽，延州广武县令。父强，左卫长史，乃为京兆人也。母李氏梦云雷震骇，因而娠焉。诞育之辰，神光满室。见者求占，此子贵极，当为王者之师傅。也幼龄聪黠，器度宽然，识者曰：“学必成功，才当逸格。”耳闻口诵，皆谓老成。年及十岁，忽发出家之意，猛利之性，二亲难沮。贞观十九年，玄奘三藏方西域回，誓求为师。云与龙而同物，星将月以共光，俱悬释氏之天，悉丽著明之象。初寻经论，不费光阴。受具已来，专攻律部。有邳郡法砺律师一方名器，五律宗师，迷方皆俟其指南，得路咸推其乡导，著疏十卷，别是命家。见接素公，知成律匠。研习三载，乃见诸瑕，喟然叹曰：“古人义章未能尽善”咸亨元年，发起雄心别述《开四分律记》。至上元三年丙子归京，奉诏住西太原寺傍听道成律师讲，不辍缉缀。永淳元年，十轴毕功，一家新立，弹纠古疏，十有六失焉。新义半千百条也。傅翼之彪，搏攫而有知皆畏；乘风之震，砰车訇而无远不闻。所化翕然，所传多矣。复著《俱舍论疏》一十五卷，《遗教经疏》二卷，《钞》三卷，《新疏拾遗钞》二十卷，《四分僧尼羯磨文》两卷，《四分僧尼戒本》各一卷。日诵《金刚经》三十卷，讲《大律》已疏计五十余遍，其余书经画像，不可胜数。于本寺别院忽示疾，力且孱然，告秀章曰：“余律行多缺，一报将终。”时空中有天乐浏亮，奄然而逝，俗龄七十四，法腊五十三。葬日，有鸿鹤绕塔悲鸣，至暮方散。素所撰述，宗萨婆多。何邪？以法密部缘化地部出，化地从有部生，故出受体以无表色也。又斥二宗云：“相部无知，则大开量中得自取大小行也。南山犯重，则与天神言论，是自言得上人法也。”大抵素疏出，谓之新章焉。开元中，嵩山宾律师造《饰宗记》以解释之，对砺旧疏也。又谓为东西塔律宗，因传习处为名耳。大历中，相国元公载奏成都宝园寺置戒坛，传新疏，以俸钱写疏四十本，《法华经疏》三十本，委宝园光翌传行之。后元公命如净公为素作传。韦南康皋作灵坛，传授毗尼新《疏记》，有承袭者，刊名于石。其辞酋丽，其翰兼美，为蜀中口实焉。

○唐光州道岸传

释道岸，姓唐氏，世居颍川，是为大族，汉尚书令琳、司空珍、吴尚书仆射固、雍州刺史彬、凉镇北将军瑶之后也。永嘉南度，迁于光州，衣冠人物，辉映今古。岸生而不群，少而奇概，爰在髫髻，有若老成。齿胄胶庠，徇齐坟典，犹恐闻见未博，艺业有遗。遂浮江淮，达洙泗，探禹穴，升孔堂，多历年所矣。操翰林之鼓吹，游学海之波澜，讨论百家，商擢三教。乃叹曰：“学古入官，纡金拾紫，儒教也。餐松饵柏，驾鹤乘龙，道教也。不出轮回之中，俱非筏喻之义，岂若三乘妙旨，六度宏功，镕铄世间，掌握沙界哉”遂落发出家，洗心访道，一音克举，四句精通。坚修律仪，深入禅慧。夜梦迦叶来为导师，朝阅真经，宛契冥牒。由是声名籍甚，远近吹嘘，为出世之津梁，固经行之领袖。十方龙象，罔不师范焉；万国鹓鸾，无敢酬对者。向若回兹妙识，适彼殊途，议才必总于四科，济世雅符于三杰。有若越

中初法师者，秘藏精微，罔不明练，道高寰宇，德重丘山。岸闻善若惊，同声相应，乘杯去楚，杖锡游吴。云雾一披，钟鼓齐振，期牙合契，澄什联芳。由是常居会稽龙兴寺焉。杨越黎庶，江淮释子，辐凑乌合，巷少居人，罕登元礼之门，且睹公超之市。岸身遗缠盖，心等虚空，不择贤愚，无论贵贱，温颜接待，善诱克勤，明鉴莫疲，洪钟必应。皆窥天挹海，虚往实归，其利博哉，无得称也！时号为大和尚。登无畏座，讲木叉律，容止端严，辞辩清畅，连环冰释，理窟毫分，瞻仰者皆悉由衷，听受者得未曾有。于是高僧大士，心醉神倾，捐弃旧闻，佩服新义，江介一变，其道大行。孝和皇帝精贯白业，游艺玄枢，闻而异焉。遣使征召，前后数介。然始入朝，与大德数人同居内殿，帝因朝暇，躬阅清言。虽天眷屡回，而圣威难犯，凡厥目对，靡不魂惊，皆向日趋风，灭听收视。岸人望虽重，僧腊未高，犹沦居下筵，累隔先辈，惜帝有轮王之位，不起承迎，以吾为舍那之后，晏然方坐。皇帝睹其高尚，伏以尊严，偏赐衣钵，特彰荣宠。因请如来法味，屈为菩萨戒。师亲率六宫，围绕供养，仍图画于林光宫。御制《画赞》，辞曰：“戒珠皎洁，慧流清淨，身局五篇，心融八定。学综真典，观通实性，维持法务，纲统僧政。《律藏》冀兮传芳，象教因乎光盛。”比夫灵台影像，麟阁丹青，功德义殊，师臣礼异。铨择网管，统帅僧徒者，有司之任也。以岸盛德广大，至行高邈，思遍雨露，特变章程。所历都白马、中兴、庄严、荐福、罔极等寺，纲维总务，皆承敕命，深契物心，天下以为荣，古今所未有。中宗有怀罔极，追福因心，先于长安造荐福寺。事不时就，作者烦劳，敕岸与工部尚书张锡同典其任。广开方便，博施慈悲，人或子来，役无留务，费约功倍。帝甚嘉之，频邀赏锡，何间昏晓。既荷天泽，言酬恩地，遂还光州，度人置寺。于是癯陀苑囿，郁起僧坊，拘邻比丘，便为人宝，能事斯毕，夫何恨哉！江海一辞，星霜二纪，每怀成道之所，更迫钟漏之期。遂去上京，还至本处。将申顾命，精择门人，僧行超、玄俨者，是称上足也。克传珠髻之宝，俾赐金口之言，右胁而卧，示其泡幻也。以开元五年岁次丁巳八月十日灭度于会稽龙兴道场，时年六十有四。海竭何依？山崩安仰？天人感恻，道俗哀号，执紼衣衾，哀动盈万计。弟子龙兴寺慧武寺主义海、都维那道融、大禹寺怀则、大善寺道超、齐明寺思一、云明寺慧周、洪邑寺怀莹、香严寺怀彦、平原寺道纲、湖州大云寺子■、兴国寺慧纂等，秀禀圭璋，器承磨琢，荷导蒙之力，怀栝羽之恩，思播芳尘，必题贞石，乃请礼部侍郎姚弈为碑纪德。初，岸本文纲律师高足也，及孝和所重，其道克昌。以江表多行《十诵律》，东南僧坚执罔知《四分》。岸请帝墨敕执行南山律宗。伊宗盛于江淮间者，岸之力也。

○唐百济国金山寺真表传

释真表者，百济人也。家在金山，世为弋猎。表多？捷，弓矢最便。当开元中，逐兽之余，憩于田畎间，折柳条贯虾蟆成串，置于水中，拟为食调。遂入山网捕。因逐鹿，由山北路归家，全忘取贯蟆欵。至明年春，猎次，闻蟆鸣。就水，见去载所贯三十许虾蟆犹活。表于时叹惋，自责曰：“苦哉，何为口腹，令彼经年受苦？”乃绝柳条，徐轻放纵。因发意出家，自思惟曰：“我若堂下辞亲，室中割爱，难离

欲海，莫揭愚笼。”由是逃入深山，以刀截发，苦到忏悔，举身扑地，志求戒法，誓愿要期弥勒菩萨授我戒法也。夜倍日功，绕旋叩蝼，心心无间，念念翘勤，经于七宵。诘旦，见地藏菩萨手摇金锡为表策发，教发戒缘作受前方便。感斯瑞应，叹喜遍身，勇猛过前。二七日满，有大鬼现可怖相，而推表坠于岩下，身无所伤。匍匐就登石坛上，加复魔相未休，百端千绪。至第三七日质明，有吉祥鸟鸣曰：“菩萨来也。”乃见白云若浸粉然，更无高下，山川平满，成银色世界，兜率天主逶迤自在，仪卫陆离，围绕石坛，香风花雨，且非凡世之景物焉。尔时慈氏徐步而行，至于坛所，垂手摩表顶曰：“善哉！大丈夫求戒如是，至于再，至于三，苏迷卢可手攘而却，尔心终不退。”乃为授法，表身心和悦，犹如三禅意识与乐根相应也。四万二千福河，常流一切功德，寻发天眼焉。慈氏躬授三法衣、瓦钵，复赐名曰真表。又于膝下出二物，非牙非玉，乃签检之制也，一题曰九者，一题曰八者，各二字，付度表云：“若人求戒，当先悔罪，罪福则持犯性也。”更加一百八签，签上署百八烦恼名目，如求戒人，或九十日，或四十日，或三七日行忏，苦到精进，期满限终，将九、八二签参合百八者，佛前望空而掷。其签堕地，以验罪灭不灭之相。若百八签飞逗四畔，唯八、九二签卓然坛心而立者，即得上上品戒焉。若众签虽远，或一二来触九、八签，拈观是何烦恼名，抑令前人重覆忏悔已，止将重悔烦恼签和九、八者，掷其烦恼签，去者名中品戒焉。若众签埋覆九、八者，则罪不灭，不得戒也。设加忏悔过九十日，得下品戒焉。”慈氏重告诲云：“八者新熏也，九者本有焉。”嘱累已，大仗既回，山川云雾。于是持天衣，执天钵，犹如五夏比丘，？道下山，草木为其低垂覆路，殊无溪谷高下之别。飞禽鸢兽，驯伏步前。又闻空中唱告村落聚邑，言菩萨出山来，何不迎接？时则人民男女布发掩泥者，脱衣覆路者，毡罽毼承足者，花纛因美褥填坑者，表咸曲副人情，一一迪践。有女子提半端白覆于途中，表似惊忙之色，回避别行。女子怪其不平等，表曰：“吾非无慈不均也，适观缕间皆是鬘子，吾虑伤生，避其误犯耳。”原其女子，本屠家贩买得此布也。自尔常有二虎左右随行，表语之曰：“吾不入郛郭，汝可导引至可修行处。”则乃缓步而行三十来里，就一山坡，蹲踞于前。时则挂锡树枝，敷草端坐。四望信士，不劝自来，同造伽蓝，号金山寺焉。后人求戒，年年忏罪者绝多，今影堂中道具存焉。

系曰：表公革心变行，一日千里，果得慈氏为授戒法。此五十受中何受邪？通曰：“近上法见谛自誓也。发天眼通是证初二果也。非谛理现观而何？专据石坛，与多子塔前自誓同也。”或曰：“所授签检以验罪灭之相，诸圣教无文。莫同诸天传授，或魔鬼所为，不可为后法乎？”通曰：“若彰善瘴恶，利益不殊。弥勒天主是天传授，非魔必矣。诸圣教中有忏罪求征祥，证其罪灭不灭。然其佛灭度，弥勒降阎浮说瑜伽，岂可不为后世法耶？《十诵律》云：‘虽非佛制，诸方为清净者，不得不行也。’”

○唐安州十力寺秀律师传

释秀公者，齐安人也。髫年天然有离俗之意焉。既丁荼蓼，便往蜀部，礼兴律师，讽诵经典，易若温寻。又依之进具，果通达毗尼，乃为兴公传律上足弟子欤？如是四载，入长安，造宣律师门，为依止之客。勤以忘劳，涉十六年，不离函丈。穷幽诸部，陶练数家，将首疏为宗本，然向黄州报所生地。次往安陆，大扬讲训。声美所闻，诸王牧守攸共遵承正化，缁徒咸慕细行。有贞固律师居于上席；解冠诸生最显清名；余皆后殿。其诸成业，不可胜算。春秋七十余，卒于十力寺本房焉。

○唐京师崇圣寺灵蕃传

释灵蕃者，不知何许人也。勤乎切问，靡憚寻师。乾封中，于西明寺躬预南山宣师法席。然其不拘常所，或近文纲，或亲大慈，皆求益也。末涂惧失宣意，随讲收采所闻，号之曰记，以解删补钞也。若然者推究造义章之始，唯慈与蕃也。又别撰《轻重诀》，故苑陵玄胄亲睹其文，故援引之以解量处轻重仪焉。金革之故，其诀湮灭，无复可寻矣。

○唐京兆崇福寺满意传

释满意，不知何许人也。风神峭拔，识量宽和，经论旁通，专于律学。武德末，所遇邳都法砺律师，作疏解昙无德律，遂往抠衣，明其授受。如是讲导三十许年，乃传付观音寺大亮律师。亮方授越州昙一。盛化之间，出龙象之资，无过意之门也矣。

○唐京兆西明寺崇业传

释崇业，不知何许人也。初同弋阳道岸学毗尼于文纲之法集。业之服勤，淬砺罔怠，黉肆之间推居元长。与淄州名恪齐名，挺拔刚毅过之，美声洋洋达于禁闼。睿宗圣真皇帝操心履道，敕以旧邸造安国寺，有诏业入承明熏修别殿，为帝授菩萨戒，施物优渥，金回舍修菩提寺殿宇，抑由先不畜盈长之故也。开元中微疾，嘱弟子曰：“吾化穷数尽，汝曹坚以防川，无令放逸。”语讫，终于所居寺之别院。业即南山之嗣孙矣。

○唐越州法华山寺玄俨传（融济）

释玄俨，俗姓徐氏，晋室南迁，因官诸暨，遂为县族。年始十二，辞亲从师，事富春僧晖。证圣元年，恩制度人，始堕僧数，隶悬溜寺。俨幼而明敏，长则韶令，标格峻整，风仪凜然。迨于弱冠，乃从光州岸师谿受具戒。后乃游诣上京，探赜律范，遇崇福意律师并融济律师，皆名匠一方，南山上足，咸能升堂睹奥，共所印可。由是道尊戒洁，名动京师。安国授记，并充大德。后还江左，偏行《四分》，因著《辅篇记》十卷、《羯磨述章》三篇，至今僧徒远近传写。初，光州岸公尝因假寐

，忽梦神僧谓曰：“玄俨当为法器，云何教以小乘？”后乃命宣《般若》。由是研精覃思，采摭旧学，撰《金刚义疏》七卷，古德所不解，先达所未详，我则发挥光明，若指诸掌。誓以一生宣讲百遍。越邑精舍，时称法华，晋沙门昙翼曾结庵山巔，入是法三昧，感遍吉菩萨。徒观其塔类多宝，涌出以证经；宫如转轮，飞行而听法。双乌所以示兆，今尚翔鸣；六象所以呈奇，时犹隐现。不可得而思议者，盖斯之谓欤。信如来之福庭，是菩萨之隐岳。俨乃考盘是卜，束钵深栖，建置戒坛，招集律行。若夫秦衡上士，燕代高僧，数若稻麻，算同竹？，伏膺请益，蹶蹶簪簪。宴坐不出，几三十载。开元二十四年，帝亲注《金刚般若经》，诏颁天下，普令宣讲。都督河南元彦冲躬请俨重光圣日，遂阐扬幽赞，允合天心，令盲者见日月之光。聳者闻雷霆之响。俨之演畅，盖有力焉。夫乐小法者迷自我而为病，通大方者憎开空之法道。若夫会三归一，触理蠅事，自优波离已下犹或病诸。而俨纲纪小乘，演畅大法，晤佛境之非有，识魔界之为空。故能使涅槃将生死一如，烦恼与菩提齐致，发心而登佛地，非我而谁？白黑归依，当仁不让。昔僧护法师常居石城，宴坐青壁，仰其中峰，如有佛像，愿造十丈，以图兜率。良愿未谐，护公长逝。梁武皇帝诏僧祐律师驰传经理，规模刻划，意匠才施。俄而山豕潜崩，全身坐现，合高百余尺。虽金石丝竹，四天之供施常闻；功德庄严，十地之雕镌尚阙。俨乃内倾衣钵，外率檀那，布以黄金之色，熔以白银之相，铜锡铅锳，球琳琅玕，七宝由是浑成，八珍于焉具足。虽宝积献盖，界现三千；迦叶贡衣，金逾十万；如须弥之现于大海，若杲日之出于高山，此又俨之功德不可思议者也。故洛州刺史徐峤、工部尚书徐安贞，咸以宗室设道友之礼；国子司业康希铣、太子宾客贺知章、朝散大夫杭州临安县令朱元？，亦以乡曲具法朋之契。开元二十六载，恩制度人，采访使润州刺史齐遒、越州都督景讷咸、采访卢见义、泗州刺史王弼，无不停净境，禀承法训。齐公乃方舟结乘，奉迎俨于丹阳、余杭、吴兴诸郡，令新度释子躬授具戒。自广陵迄于信安，地方千里，道俗受法者殆出万人。凡礼《佛名经》一百遍，设无遮大会十筵，而入境住持，举无与比。夫秉法传授，从佛口生，有门人法华昙竣崇默、龙兴崇一、开元智符、称心崇义、香严怀节、宝林洪需觉引灌顶，皆不倾油钵，无漏浮囊。经不云乎？如旃檀林，繖檀围绕；如师子王，师子围绕。信俨之威神有在，而法主之功德不刊。将知三界无安，百灵共尽，此生已适于后息，他世应见于前心。以天宝元载岁次壬午，缘化已毕。十一月三日，现疾于绳床，七日午时，坐终于戒坛院，春秋六十有八。粤其月二十五日，窆于寺南秦山之下。高树双塔，光明逾于白云；列植千松，秀色罗于明月。经始则神邕、崇晓，住持则惟湛、道昭，并躬护圣场，亲传智樱其余三千门人，五百弟子，承般若之深法，受毗尼之密行，尽号颺门，无待弥勒。天宝十五载岁次景申，万齐融述《颂德碑》焉。

○唐杭州灵智寺德秀传

释德秀，俗姓孙氏，富阳人也。少出尘区，早栖梵宇。当圆戒检正护浮囊，匪定常师，留神律府。讲谈之外，尝哀鬼神乏食，恒以深更施其饮食。浙汭之民，倾诚畏服。及终于定山，颇多灵异，则天宝初载也。迁神座入塔时，天降舍利七颗，门人

以瓶盛之，緘于其塔。或发之，见秀齿上生舍利，纷纷而坠。后人还累璧成浮图。乡人云：“恒有白蛇蟠屈守塔，樵牧之童无敢近者。”

○唐开业寺爱同传（玄通）

释爱同，俗姓赵氏，本天水人也。代袭冠冕，弱龄挺拔，惠然肯来，为佛家子。具戒后，讲弥沙塞律，远近师稟，若鳞羽宗乎鯤凤也。昔南宋朝闕宾三藏觉寿译成此律，因出《羯磨》一卷，时运迁移，其本零落，寻求不获，学者无依。同遂于《大律》之内，抄出《羯磨》一卷，彼宗学者盛传流布，被事方全。孝和之世，神龙中盛重翻宣，同与文纲等参预译场，推为证义。义净所出之经，同有力焉。著《五分律疏》十卷，复遗嘱西明寺玄通律师重施润色。后安史？扰，焚燎丧寺，今无类矣。

○唐五台山谿律师传

释谿律师者，五台县人也。彩服出家，冠年受戒，仪则清雅，众稟纲绳。习毗尼宗秘菩萨行。谿除训徒外，守默无挠，远近有事，靡不豫知，人谓为得他心通也。一食终日，弊衣遮体，不贮颗粒，房无缕综。其强本节用，造次不可及也。入灭之日，祥云郁密，天乐铮？从，阖寺僧徒皆闻异香馥馥。乃召集寺众，执手告辞，嘱累门人，加趺而灭云。

○唐扬州龙兴寺法慎传

释法慎，姓郭氏，江都人也。孩抱之岁，誓齿空门，亲爱所钟，志不可夺。从瑤台成律师受具戒。依太原寺东塔，体解律文，绝其所疑，时贤推服。或一言曲分于象表，精理自得于环中，声振京师，如晞爱日。诸寺众请纲领，乃默然而东归。既还杨都，俯允郡愿，恒诵《金剛般若经》、《如意轮》。般若佛心，我得此心，众生亦得。如意胜愿，我如此愿，众生亦如。谓“天台止观，包一切经义；东山法门，是一切佛乘。色空两亡，定慧双照，不可得而称也。”慎暑不摄齐，食不求饱，居不易坐。四方舍施，归于大众，一身有无，均于最下。朝廷之士衔命往还，路出维杨，终岁百数，不践门闕，以为大羞。仰承一眄，如洗饥渴。慎与人子言依于孝，与人臣言依于忠，与人上言依于仁，与人下言依于礼。佛教儒行，合而为一。学者流误，故亲校经论。延来者听受，故大起僧坊。将警群迷，故广图菩萨因地。善护诸命，故曲济众生寿量。以文字度人，故工于翰墨。以法皆佛法，故兼采儒流。以我慢为防，故自负衣钵。以规矩为任，故纲正缙林。以发挥道宗，故上行恭礼。以感慕遗迹，故不远他邦。以龙象参议，故再至京国。以轨度端明，故研精《律部》。欬！黄门侍郎卢藏用才高名重，罕于推挹，一见于慎，慕味循环，不能离坐。退而叹曰：“宇宙之内，信有高人！黄门于院中置以《经藏》，严以香灯，天地无疆，像法常在。太子少保陆象先、兵部尚书毕构、少府监陆余庆、吏部侍郎严挺之、河

南尹崔希逸、太尉房琯、中书侍郎平章事崔涣、礼部尚书李憺、辞人王昌龄、著作郎綦母潜，金所瞻奉，愿同洒扫。感动朝宰如此。以天宝七载十月十四日晨兴盥漱，就胡床加趺，心奉西方，既曛而灭于龙兴寺别院，春秋八十三，夏六十二。缙素弟子，北距泗沂，南逾岭徼，望哭者千族，会葬者万人。其上首曰会稽昙一、闽僧怀一、南康崇睿、晋陵义宣、钱塘谭山寺惠鸾、洛京法瑜崇元、鹤林寺法励、法海、维杨惠凝、明幽、灵祐、灵一等，罔不成乐说辩才入《法华》三昧。众所知识，物之依怙。天上甘露，正味调柔；人中象王，利根成熟。音乐树下，长流福慧之泉；雪山峰顶，仰见清凉之月。金刚决定，烦恼无余。优昙开敷，香洁盈满。法施之恩，郡居之感，哀奉色身，经始灵塔于芜城西蜀冈之原。像教也，幽公自幼及衰，恒所亲侍，后请吏部员外郎赵郡李华为碑纪述，大历八年癸丑十二月也。大理司直张从申书，赵郡李阳冰题额。其塔亦幽公经度。建塔之地，广袤如素，高卑得中。周临四衢，平视千里。门人环蒔列柏，荐以名香。其塔属会昌中例，皆毁焉。

○唐杭州华严寺道光传

释道光，姓褚氏，逾龀出家。方冠受具，诣光州和尚学通毗尼。于时夏浅德崇，坛场属望，盖天资真士，为东南义虎，云雨慈味，笙鏞道声。光持《法华经》，创塔庙，泊没身不怠也。上元元年庚子仲秋示疾，终于本寺，春秋七十九，法腊五十八。是日驰阳昧昧，淫雨淫淫，思思，烈风崇朝，嘉木为折，乃东土福尽之征也。俄然喜气五色，亭亭如盖，移晷不散，偏映精庐，即西方往生之意也。初光未歿，其月三日质明，支疾凝神，依色身观，弥陀具相现在其前。满庭碧花，昔所未睹者。四日昧爽，有异人请光为和尚，遂开目弹指曰：“但发菩提心。”至五日，曼陀罗花自天而雨。门人神烈义津追慕弗遑，各分法味，流布行化，香火无穷云。

○唐扬州大云寺鉴真传

释鉴真，姓淳于氏，广陵江阳县人也。总？俊明，器度宏博，能典谒矣。随父入大云寺，见佛像，感动夙心，因白父求出家。父奇其志，许焉。登便就智满禅师，循其奖训。属天后长安元年，诏于天下度僧，乃为息慈配住本寺，后改为龙兴。殆中宗孝和帝神龙元年，从道岸律师受菩萨戒。景龙元年，诣长安。至二年三月二十八日，于实际寺依荆州恒景律师边得戒。虽新发意，有老成风，观光两京，名师陶诱。三藏教法，数稔该通，动必研几，曾无矜伐。言旋淮海，以戒律化诱，郁为一方宗首。冰池印月，适足清明；猊座扬音，良多响答。时日本国有沙门荣睿、普照等东来募法，用补缺然。于开元年中，达于扬州，爰来请问，礼真足曰：“我国在海之中，不知距齐州几千万里。虽有法而无传法人，譬犹终夜有求于幽室，非烛何见乎？愿师可能辍此方之利乐，为海东之导师乎？”真观其所以，察其翹勤，乃问之曰：“昔闻南岳思禅师生彼为国王，兴隆佛法，是乎？又闻彼国长屋曾造千袈裟来施中华名德，复于衣缘绣偈云：‘山川异域，风月同天，寄诸佛子，共结来缘。’以此思之，诚是佛法有缘之地也。”默许行焉。所言长屋者，则相国也。真乃慕比丘

思托等一十四人，买舟自广陵赍经律法离岸，乃天宝二载六月也。至越州浦，止署风山。真夜梦甚灵异。才出洋，遇恶风涛，舟人顾其垂没，有投弃栈香木者。闻空中声云：“勿投弃。”时见舳舻各有神将介甲操仗焉，寻时风定。俄漂入蛇海，其蛇长三丈余，色若锦文。后入鱼海，鱼长尺余，飞满空中。次一洋，纯见飞鸟集于舟背，压之几没。泊出鸟海，乏水。俄泊一岛，池且泓澄，人饮甘美。相次达于日本，其国王欢喜迎入城大寺安止。初于卢遮那殿前立坛，为国王受菩萨戒。次夫人、王子等，然后教本土有德沙门足满十员，度沙弥澄脩等四百人，用白四羯磨法也。又有王子一品亲田舍宅造寺，号招提，施水田一百顷。自是已来，长敷律藏，受教者多，彼国号大和尚，传戒律之始祖也。以日本天平宝字七年癸卯岁五月五日，无疾辞众，坐亡，身不倾坏，乃唐代宗广德元年矣。春秋七十七，至今其身不施漆，国王贵人信士时将宝香涂之。僧思托著《东征传》详述焉。

○唐杭州天竺山灵隐寺守直传

释守直，字坚道，钱塘人也，姓范氏，齐信安太守？之八叶。礼既冠众，君子器之。夙有丘园之期，不顾玄纁熏之锡。遂诣苏州支硎寺圆大师所受具足律仪。是夜，眼中光现长一丈余，持久方灭，盖得戒之验也。后抵江陵，依真公。三年练行。寻礼天下二百余郡，圣迹所至，无不至焉。见无畏三藏，为受菩萨戒。闻普寂大师传《楞伽》心要讲《起信》宗论二十余遍；南山《律钞》四十遍，平等一雨，大小双机在乎圆音，未尝少异。乃立愿诵《华严经》还于中宵梦神人施珠一颗。及觉，惘惘然如珠在握。是岁入五台山，转《华严经》二百遍，追夙心也。宏览《大藏经》三过，广正见也。至开元二十六年，有制举高行，道俗请正名隶大林寺，后移籍天竺住灵隐峰，时大历二年也。至五年三月，寓于龙兴净土院，谓左右曰：“夫至人乘如而来，乘如而去，示其心然也。而愚夫欲以长绳系彼白日，安可得乎？吾景落桑榆，岂淹久也？”以其年此月二十九日告终，春秋七十一，僧腊四十五。其间临坛度人多矣，显名者洞庭辩秀，湖州皎然、惠普、道庄、会稽清江、清源、杭州择邻、神偃、常州道进。昼公著《塔铭》云。

○唐洪州大明寺严峻传

释严峻，姓樊氏，濉州人也。父任硖州长史、昭王府司马。峻性地夷然，学习明利。年及十九，应进士举。倏罹荼蓼，思报劬劳，投南阳佛寺。后抵荆州玉泉山兰若，遇真禅师，示其禅观，入城泊大云寺。峻秉持戒印，用之不殒，凭附浮囊，渡之攸往。众请临坛，复举律之宗主，僦？承命。忽逢观净禅师，顿明心法。大历元年，思往清凉山，未达庐陵，见颜鲁公，一言相契，胶漆如也。二年春，宜春太守俾僧正驰疏请召。四年春，洪州刺史李华员外延入大明寺住止。三月中，俄命沐浴更衣，举望空虚，合掌而逝，春秋五十九。迁塔，弟子圆约等于寺前大泉池立碑存焉。

○唐会稽开元寺昙一传

释昙一，姓张氏，盖韩人也。其先轩辕赋姓，至良佐汉，侯于留。魏晋已还，衣冠继代。曾祖恒，隋太常卿，扈跸杨都，遂家于越。恒生孝廉翼，翼生处士藏，藏生一，令闻江南，今四叶矣。一宿植净因，生知慧性，弱而敏悟，长而聪明。年十五，从李滔先生习《诗》、《礼》，终日不违。十六，听云门寺茂亮法师经论，一闻悬解。法师异之，谓其母孟氏曰：“此佛子也，可令削发，当与授记。”亮即孝和皇帝菩萨戒师也。一闻而欢喜，有度世之志。景龙中，承恩出家，隶在僧录。年满受具于丹阳玄昶律师，学通《事钞》于当阳县胜律师。既而钻木见烟，窥墙睹奥。开元五年，西游长安，依观音寺大亮律师，传《毗尼藏》，崇圣寺檀子法师学《唯识》、《俱舍》等论，安国寺印度沙门受菩萨戒。于是莲花不染之义，甘露甚深之旨，一传慧炬，了作梵雄。远近瞻仰，如宗师矣。然刃有余地，时兼外学，常问《周易》于左常侍褚无量，论《史记》于国子司业马贞。遂渔猎百氏，囊括《六籍》，增广闻见，自是儒家，调御人天，皆因佛事。公卿响慕，京师藉甚。时丞相燕国公张说、广平宋规、尚书苏瑰、兖国陆象先、秘书监贺知章、宣州泾县令万齐融，皆以同声并为师友，虽支许之会虚嘉，宗雷之集庐岳，未云多也。《四分律》者，后秦三藏法师梵僧佛陀耶舍传诵中华，与罗什法师共为翻译，今之讲授，自此员来。魏法聪律师始为演说，聪授道覆，覆授光。洎隋朝相部励律师作《疏》十卷，西京崇福寺满意律师盛传此《疏》，付授亮律师。其所传授一，一依励律师《疏》及唐初终南宣律师《四分律钞》三卷，详略同异，自著《发正义记》十卷。明两宗之金驳，发五部之铃键。后学开悟，夜行得烛，前疑泮释，阳和解冰，佛日昭？而再中，法栋峥嵘以高峙《发正记》中？破南山持犯中可见也。二十五年，仗锡东归。明年诏置开元寺，长史张楚举为寺主，因而居焉。一声振京华，道高吴会，布大慈以摄众，修万行以表仪。顺风问道者毂击肩摩，函丈请益者波委云萃。虚受之量，随而演说，故前后讲《四分律》三十五遍，《删补钞》二十余遍焉。江淮释子受木叉者，非一登坛即不为得法。从持僧律，盖度人十万计矣。至德之际，国步多艰，缙徒慢法，罕率经教。国相王公出镇于越，以一德名素高，请为僧统。一变清静，大阐熏修，浹旬之间，回邪入正。善诱潜化，皆此类焉。始者一入关谒明达法师，目之曰：“汝人中师子也。”又遇遵善寺尼慈和，歌曰：“昙一师，解毗尼，大聪明，更无疑。”为达人之所谚多矣。天宝十四载，浙河潮水南激钱塘，大云伽蓝当兹湍洑旱，因请一讲律，学徒千人咸发大愿。每上，念摩诃般若，乃止涛激，以福伍胥、龙王。用兹庄严，祈于卫护。五月晦夜，惚恍之间，见一神人，衣冠甚伟，稽首谢曰：“蒙垂法施，即改波流。”未逾九十日，涨沙五十里，道俗惊叹，得未曾有。一蔚为法主，大扬教迹，发明前佛之付嘱，保证后佛之护念。四句作偈，受持者了于未了；一音演法，谛听者闻所不闻。非夫天地淳精，江山粹灵，与法作程，间世而生，孰能玄通密证如此其大者乎？寺中洪钟，一所作也，远征鳧氏，近法雷门。生存累年，匠其规制，歿后三日，成于熔造，声应百里，扛乎万钧，蒲牢叫而地震，师子吼而山，警悟聋俗，导引迷方，胡可言也！法谢形离，薪尽火灭，以大历六年十一月十七日迁化于寺之律院，报龄八十，僧腊六十一。即以明年十一月

二十四日迁座于秦望山，从先和尚之莹也。一春秋已高，精爽逾励，既不衰惫，初无疾苦。忽谓侍者曰：“吾将扫礼坟塔，归骨于此。”数日之后，奄然而终。江淮之南，河洛之表，衣乡衰制服，执紼送丧，号哭满山，幡花蔽野，比夫剧孟之母送车千乘，孔丘之墓栽树万株，可同年哉！门人越州妙喜寺常照、建法寺清源、湖州龙兴寺神玩、宣州隐静寺道昂、杭州龙兴寺义宾、台州国清寺湛然、苏州开元寺辩秀、润州栖霞寺昭亮、常州龙兴寺法俊等，早发童蒙，咸承训诱，三千弟子仰梁木而增悲，八万门人望綈檀而不及。时会稽徐公浩素敦乡里之旧，为碑颂德焉。大历十一年也。

卷十五

◎明律篇第四之二（正传十九人附见三人）○唐余杭宜丰寺灵一传

释灵一，姓吴氏，广陵人也。神清气和，方寸地虚，与大和元精合其纯粹。年肇九岁，僻嫌朽宅，决入梵园，堕息慈之伦，禀出家之制。暨乎始冠，受其具足，学习无倦，律仪是修。示见谈笑，欲明解脱。示人文艺，以诱世智。初不计身中有我，我中有身。德全道成，缘断形谢，以宝应元年冬十月十六日，寂灭于杭州龙兴寺，春秋三十五，凡满十五安居。临终，顾谓弟子行荼毗法，树小浮图焉。时左卫兵参军李纾、嘉兴县令李汤、左金吾卫兵曹参军独孤及相与悼梁木之既坏，虑陵谷之当迁，后之人礼应真之塔婆，昧应真之德行，故刻石于武林山东峰之阳也。一家富货殖，既而削发，推千金之产，悉让诸孤昆弟，所取者惟纳衣锡杖。自尔叩维阳法慎师，学相部律，造乎微而臻乎极。友善者慧凝、明幽、灵祐、会稽昙一、晋陵义宣、同门三益，作者七人也。一咳唾尘境，继日经行，宴坐必择山椒树下。初舍于会稽山南悬溜寺，接禅者隐空、乾靖，讨论第一义谛。或游庆云寺，复居余杭宜丰寺。寺邻生丹山，门对佳境，礚然独往。暴风偃山，正智不动，巨浪沃日，浮囊不飘。于是著《法性论》，以究真谛，此一之了语也。每禅诵之隙，辄赋诗歌事，思入无间，兴含飞动。潘阮之遗音页，江谢之阙文，必能缀之，无愧古人。循循善诱，门弟子受教，若良田之纳膏雨焉。一迹不入族姓之门，与天台道士潘志清襄阳朱放、南阳张继、安定皇甫曾、范阳张南史、吴郡陆迅、东海徐嶷、景陵陆鸿渐为尘外之友，讲德味道，朗咏终日。其终篇必博之以文，约之以修，量其根之上下而授之药焉。一居寺高隅，初无井泉，一旦呀然而涌，喷金砂之溜于庭之左右，挹之弥清，之无竭，盖精至之感矣。诗行于世，有选其尤者入《盼气集》焉。

○唐吴郡东虎丘寺齐翰传

释齐翰，字等至，吴兴沈氏之子。高祖陈国子祭酒，曾祖隋魏州司马，祖考三世不仕。翰绮岁从父至山寺，蹈高静无尘之躅，惻然有宿命之知，固请舍家。至天宝八载八月五日奉制度，配名永定寺。九载十月，跻五分坛纳形俱戒，移名开元。大历中转隶武丘，皆两州道俗所请从命也。翰道性渊默，外则淡然。迹不近名，身不关事，长在一室，寂如无人，岂比夫骈行鼓簧之士哉？颛门相部《义疏》，精敏罕俦。明《法华经》主苏湖戒坛，每当请首，则今时所谓坛长也。大历十年入流水念佛道场，是夜西方念中顿现，盖纯诚之所致也。即以其年终于本院，春秋六十八，法腊二十六。翰遇疾之日，谓门弟子曰：“有鹤从空飞下，回翔我前，尔曹见乎？必谢之期，小圣犹病，安能免哉？”受业门人如隐、戒坛宣兑等。与吴兴皎然结法门昆弟之交，俱高洁，难可轻慕焉。

○唐润州招隐寺朗然传

释朗然，俗姓魏，世袭冠冕，其先随东晋南渡，则为南徐人也。开元中入道，受业于丹阳开元寺齐大师。天宝初受具于杭州华严寺光律师。后徙灵隐寺，依远律师，通《四分律钞》，重稟越州昙一律师，精研律部《讲训》，生徒四远响应。肃宗至德二年，恩命举移，隶名于慈和寺。上元中，刺史韦儼又请为招隐统领大德。即以其年讲授之暇，著《古今决》十卷，解释《四分律钞》数十万言，繁杂义例，条贯甚明，大行于世。观其先列古人之义，有所不安，则判断之，故号决也。《决》中自序，初依天竺威律师学习，复从远一二师也。凡戒坛则二十六登，皆为坛席之主。《律钞》凡二十八过讲。有馈遗者随丰薄，受而转施悲信二田。凡于教理，披文究义，皆言宿习之力也。执持戒检，斯须不违。大历十二年冬癸卯，趺坐如常，恬然化灭，时年五十四，僧腊三十五。越十三年春辛酉，建塔于山西原，乡衰麻之徒泣血千计。高行弟子清浩、择言等。请益弟子御史中丞洪府观察使韦儼、吏部员外李华、润州刺史韩贲、湖州刺史韦损、御史大夫刘暹、润州刺史樊晃，皆归心奉信。屯田员外郎柳识为碑颂焉。

○唐越州称心寺大义传

释大义，字元贞，俗姓徐氏，会稽萧山人也。以天授二年五月五日，特稟神异，生而秀朗。七岁，父训之以经典，日可诵数千言。年十二，请诣山阴灵隐寺求师，因习内法，开卷必通，人咸叹之。属中宗正位，恩制度人，都督胡元礼考试经义，格中第一。削染，配昭玄寺。自兹听习，旁瞻玄儒。开元初，从吴郡圆律师受具。复依本州开元寺深律师，学《四分律指训》。义因游长安，深公已亡，乃抠衣法华寺玄俨律师，其俊迈出伦，俨云：“于今传法，非子而谁？”及称心本寺超律师请为寺任。开元中丧亲，誓入天台佛陇转《藏经》，答劬劳也。天宝中遂筑北坞之室，即支遁、沃洲之地也。初梦二梵僧曰：“汝居此与二十日。”至宝应初，复梦曰：“本期二十日，今满矣。魔贼将至，不宜更处。”无何，海贼袁晁窃据剡邑，至于丹丘。义因与大禹寺迴律师同诣左？朗禅师所，学止观，而多精达。前后朝贵归心者，相国杜鸿渐、尚书薛兼训、中丞独孤峻、蕞州刺史徐峤、次徐浩，皆宗人也。以大历己未岁五月终于本院，春秋八十九，僧腊六十三。殡于寺之北坞旧居，因造塔焉。义前后戒坛计二十七登，受戒弟子三万余人。终时，室中闻天乐声，验乎生诵《法华经》、《大涅槃经》、小大乘戒本，以为口业德行，非归兜率，不往净土，未可议其生处也。

○唐常州兴宁寺义宣传

释义宣者，晋陵人也。宿殖利根，桔然出俗，不烦师训，砥砺厥心。纳法后，孜孜律科，时无虚度。玄儒旁综，长在篇章，卒问捷给。而稟延陵恭让之风，雅得毗尼之体。初扬州法慎传于旧章，淮甸之间，推为硕匠。天宝初，宣敛衽抠衣，谘询弥久，辈流率服。慎且叹赏曰：“可畏乎！”宣讲终南《事钞》，请业于周律师之庭，考核尤精，乃著《折中记》六卷以解之。盖慊融济、著、胜诸师有所纰谬故也。使

是非各尽其分，人免据宗而阿比，从此立称耳。毗陵多出名士僧，有三宣、慧、德、义是欤。时于江都习业，与会稽昙一、闽川怀一、庆云灵一同门为朋也。晋陵既有三宣，慎门复出三一焉。江表资为美谈。宣天宝末盛行化导，罔究其终。

系曰：夫名以制义，所出无穷，奈何师资踵武，而犯教祖之讳乎？通曰：“《春秋》贵贱不嫌同号也。”或曰：“滕齐不敌，俱书侯，乃曰不嫌同号。号与名岂得例诸？”通曰：“号大不嫌，名小岂嫌乎？矧以义宣始为名者，安知弟子成事于南山之门邪？然出家者必也无妨。一则姓既以华从梵，咸称释氏。一则西域无讳，此合从旃。且讳者周人以事鬼神，夏商无讳明矣。况乎宣师已生兜率，小为天人，大为菩萨，岂宜以鬼神事之？致令唐初高德胜士，往往止存一字名，职由讳之极矣。属今修撰，乃阙文也。乃知真谛无讳，俗谛闻似则惧。”或曰：“今沙门姓既为释，名复不讳，言我不随俗谛，云何对君主称臣？莫西域有否？”通曰：“姓名不对王者，臣妾表疏合然。昔齐帝问王俭，遂令对见称名。自汉至唐肃宗朝，始见称臣，由此沿而不革。良以沙门德薄，日就衰微，一往无复矣。又以法委国王，诚难改作。王谓为是，楷定莫移。故佛言虽非我制，诸方为清净者，不得不行也。”

○唐苏州开元寺辩秀传

释辩秀，俗姓刘氏，汉楚王交三十一代孙也。秀幼孤，诸父哀字，礼如教立，孝自天生。而宿殖缘深，心田欲稔；因请伯氏，出家长行，哀而舍旃。事灵隐谋禅师，便能问津，图入道之意。所闻指训，如凉风入怀，醒然清悟。天宝四年，受戒于东海鉴真大师，传律于会稽昙一。至德中举高行，隶名于吴郡开元寺。乾元中，下诏天下二十五寺，各定大德七人，长讲戒律，秀应其数也。顷年于净土一门，不愆于念。尝谓人曰：“昔闻西方之行是有相大乘，此乃蓬心不直，非达观之说。何邪？夫出言即性，发意皆如，而一色一香，无非中道，况我正念乎？”秀坛场一十六番，度人孤制，律枢正持，僧纲自肯，湖南北皆宗仰焉。以建中元年六月十五日寝疾而终，春秋六十七，法腊三十五。当其逝日，有庭树一本，枝叶扶疏，朝花正敷而遽萎瘁。其年七月五日，迁灵龕于武丘西寺松门之右。门人道亮、道该、清会，偕绕繖檀之香树也。故观察使韦元甫、李栖筠、虢州刺史李纾、御史中丞李道昌尽钦慕往德，亦林下之交。较昼为碑颂焉。

○唐京师安国寺如净传

释如净，不详何许人也。甫参法位，当纳戒津，明练毗尼，砥砺名节。时恒讲勘，徒侣云屯。辞笔偕长，博达儒典。先是关中行智首律师《四分律疏》，魏郡法砺律师著《疏》别行。尔时关辅河北，各竞宗派，微似参辰。隋末唐初，道宣律师以首《大疏》为本，造《删补律钞》三卷，稍为会要，行事逗机。贞观已来，三辅、江、淮、岷蜀多传唱之。次樊三藏弟子怀素者，先习《钞宗》，后委弃宣、砺之学，于咸亨年中别述《开四分律记》，后号新章欤。至代宗大历中，新章旧疏，互相长

短。十三年，敕集三宗律匠，重定二家隆杀，时净推为宗主，语在《圆照传》。至建中二年，奏二疏并行，净之力也。盖以国相元公载笃重素公，崇其律教，乃命净为新疏主作传焉。

○唐汉州开照寺鉴源传（慧观）

释鉴源者，不知何许人也。素行甄明，范围律道，绊刍表率，何莫由斯。后讲《华严经》，号为胜集，日供千人粥食，其仓箬中米粟才数百斛，取之不竭，沿夏涉秋，未尝告匮，其冥感如此。其山寺越多征应，有慧观禅师见三百余僧持莲灯，凌空而去，历历如流星焉。开元中，崔冀公宁疑其妖妄，躬自入山宿，预禁山四方面各三十里火光。至第三夜，有百余支灯现，兼红光可千尺余。冀公蹶然作礼，叹未曾有。时松间出金色手，长七尺许，有二菩萨黄白金色闪烁然。复庭前柏树上，昼现一灯，其明如日，横布玻璃。山可三里所，宝珠一颗圆一丈，熠颿可爱。西岭山门悬大虹桥，桥上梵僧、老叟、童子间出，有二炬烂然空中，如相迎送交过之状。下有四菩萨，两两偶立，放通身光，可高六七十尺。复见大松林后忽有寺额，篆书三学字。又灯下垂绣带二条。东林之间，夜出金山。月当于午，金银二色灯列于知铉师坟侧。韦南康皋每三月就寺设三百菩萨大斋，菩萨现形捧灯，僧持香灯引挹之，炉在寺门矣。白中令敏中睹瑞，兴立此寺。大中八年，改额曰开照。源律师道化，与地俱灵哉！弟子传讲，东川所宗也。

○唐吴郡双林寺志鸿传

释志鸿，俗姓钱氏，湖州长城下若人。本名俨，志鸿字也。少出俗于石门乡寺，则梁静林也。削染受具讫，往茂苑，亲道恒师盛集，研核精微。时昙清省躬，互相切磋，卒成洪绪。然慊先德释南山《钞》，商略不均，否臧无准，捕蝉忘后，补衮不完，囊括大慈、灵蕃已下四十余师记钞之玄，勒成二十卷，号《搜玄录》。大历中，《华严疏》主澄观披寻，乃为序冠于首。然其解判不无所长，其如科节繁碎，是其短也。春秋一百有八岁，敕署为长寿大师焉。近世止行其字而已。今双林累遭兵革，加以水潦，碑碣失踪，于言行也。吁！其俨公氏族本生必与南山宣律师相同，亦为美事矣。

○唐京兆安国寺乘如传

释乘如，未详氏族。精研律部，颇善讲宣，绳准缁徒，罔不循则。代宗朝翻经，如预其任。应左右街临坛度人，弟子千数。先是五众身亡，衣资什具悉入官库，然历累朝，曷由厘革。如乃援引诸律，出家比丘生随得利，死利归僧，言其来往本无物也。比丘贪畜，自兹而省者，职由于此。今若归官，例同籍没。前世遗事，阙人举扬。今属文明，乞循律法，断其轻重。大历二年十一月二十七日敕下，今后僧亡，物随入僧，仍班告中书门牒，天下宜依。如之律匠，非止训二众而已，抑亦奋内众

之遗事。立功不朽，如公是乎！终西明、安国二寺上座。有《文集》三卷，圆照鸠聚流布焉。

○唐襄州辩觉寺清江传

释清江，会稽人也，不详氏族。幼悟幻泡，身拘羈鞅，因入精舍，便恋空门，父母沮劝，建乎难拔。礼昙一律主为亲教师，讽诵经法，寓目俱通。长者品量之曰：“释门千里驹也。”于浙阳天竺戒坛求法，与同学清源从守直和尚下为弟子。还听习一公《相疏》并南山《律钞》，间岁精义入神，举皆通畅。而善篇章，儒家笔语，体高辞典，又擅一隅之美，时少伦？其褊农之性，不与人类。尝于一公少因不足，亦有舍和尚之讥。由是游方服勤，凡云律筵，无不预者。自责己曰：“天下行半，少有如我本师者。”还会稽，一公犹老，当其僧大集时，击木唱：“某再投和尚摄受。”时一公诟骂，江雨泪而忏悔曰：“前念无知，后心有悟，望和尚大慈，施与欢喜。苟不许收，则越人不可以强售章甫也。”一公悯其数四求哀，乃曰：“为汝含垢。”遂为师资如初。江有禅观之学。大历八年于汝鰲遇忠国师，因弟子说自忠曰：“此律师是和尚乡人。”乃欣然相会，寻往南阳，再谒国师，密传心要焉。

系曰：“江尝为《七夕诗》，或谓之四背中一背也。通曰：“诗人兴咏，用意不伦。慧休《怨别》，陆机《牵牛星》，屈原《湘夫人》岂为色邪？皆当时寓言兴类而已。若然者，言火则焚口，说食则疗饥也矣。江之舍师，后乃扬师之美，反权合道也。实为此诗警世无常，引令入佛智焉。其故何也？详江遇忠国师大明玄理，无以域中小乘法拘之哉 1

○唐会稽云门寺灵澈传

释灵澈，不知何许人也。禀气贞良，执操无革，而吟咏情性，尤见所长。居越？云门寺，成立之岁，为文之誉袭远。讲贯无倦，生徒戾止如闾闾焉。故秘书郎严维、刘隋州长卿、前殿中侍御史皇甫曾，睹面论心，皆如胶固，分声唱和，名散四陲。澈游吴兴，与杼山昼师一见为林下之游，互相击节。昼与书上包佶中丞，盛标拣其警句最所重者，“归湘南作，则有‘山边水边待月明，暂向人间借路行，如今还向山边去，唯有湖水无行路’句。此僧诸作皆妙，独此一篇，使老僧见，欲弃笔砚。伏冀中丞高鉴深量，其进诸乎？其舍诸乎？方今天下有故，大贤勤王，辄以非急干请视听，亦昭愚老僧不达时也。然澈公秉心立节，不可多得，其道行空慧，无惭安远。复著《律宗引源》二十一卷，为缙流所归。至于玄言道理，应接靡滞，风月之间，亦足以助君子之高兴也。”其为同曹所重也，如此。昼又赍诗附澈去见，佶礼遇非轻。又权德舆闻澈之誉，书问昼公，回简极笔称之。建中、贞元已来，江表谚曰：“越之澈，洞冰雪。”可谓一代胜士，与杭标、较昼分鼎足矣。不测其终。

○唐扬州慧照寺省躬传

释省躬，睦州桐庐人也。为童强识，耆宿呼语，怪其志大而言高，无厌樊笼。忽投圣德寺慕道从师，敕恩得度。性灵天发，于毗？道，学如温习。复择名师，得姑苏开元道恒师。恒曰：“甚矣吾得躬也，门人日益亲。”及乎探赜精微，愈征愈远，时有击论互指为迷者，必请见躬为其判之，坐分曲直。谚曰：“义尽省躬”，言到躬义无不尽也。其博综律乘，碑御师门也若此。恒曰：“自吾有躬也，恶言不闻矣。”躬避席叶拱而对曰：“某不佞也，仰师之道，若采扶桑以啖蚕。所患者，未能呕繁丝以报主耳。”恒曰：“视子吐园客五色丝，可供黼绣之资。言太谦矣。”晚赴维杨之召，广训徒焉。然其满口雌黄，品藻否臧古今之义。生徒明敏者各录之，都加润色，号《顺正记》十卷，行之。复著《分轻重物仪》别行，沿袭《十三章门条例》，外加近世现有物之重轻，颇为要用，躬复高儒学，作碑颂越多，以其曾化邗沟，故呼淮南记主，自号清冷山沙门焉。

○唐吴郡包山神皓传（维亮）

释神皓，字恒度，姓徐氏。八代祖詵，齐竟陵王西玄卅学士。子陵，梁尚书左仆射，其文与庾子山齐名，迨陈国亡，因佐吴邑，遂家姑苏。皓乃为吴郡人也。天性耿洁，风韵朗迈。幼负脱俗之姿，寻依钱塘龙泉道场一公出家。天宝六年，降版诏精择真行，一州许度三人，皓居荐首，因隶僧籍于包山福愿道常初进具于兴大师，次通《律钞》于昙一。后十讲《律钞》，五升坛常遂乘舟归包山，使野叟诛茅，山童扫石，逍遥栖息。旋增修屋宇。乾元元祀，有诏天下二十七寺，各奏大德七人，长讲戒律。因请住开元寺，欲果其愿，且惧简书，遂僊？从命。奉戒弟子开州刺史陆向前、给事中严浚、服道弟子礼部侍郎刘太真、前大理评事张象、钦风弟子前廉使亚相李栖筠请纲任海隅。一邑缁伍，三变至于道。末年工于圆宗，别置西方法社，诵《法华经》九千余部。贞元六年十月开元寺遇疾，至十二月，顾嘱弟子维亮曰：“我弃世后，可归洞庭故山置塔。”说法而终。是夜琉璃色天，星如雨，西方兆泉，密现于前。春秋七十五，僧腊四十三。门人维亮有文有道，独步当时，执师之丧，不以证而废教也。传法弟子道超、灵竣道？、道棱、维让、维诚、皆一时英迈。较昼为《坟塔碑》颂美云。

○唐京师安国寺藏用传

释藏用，不详何许人也。从其拔俗，依栖嵩山空公为师。及乎年当应法，即于汾川炬律师所受上品形俱法。登诣洛中业公讲肆，研核律文，循其奥妙，无所不臻。洎闻有禅观之学，遂登庐陟霍，涉汉泛湘，望双峰之丛林。又归，开法京辇，道既精粹，训且均敷，蔼然为物楷模，向风宗重。当建中中，已全三十许腊。寻应诏充临坛首席，相继度弟子越多。及居东城化塔，乃代宗之邸第也，推用主其纲任。缁刍至息慈，皆遵畏爱焉。席熊延客，挥麈开谈，指衡山石也，有以识前身；传曹？钵

也，有以知后际。是以门多长者之辙，室满度人之筹，益物良深，坐镇雅俗。贞元中，左司正郎王、南台崔公继和之。如是数公将议标题，兵部正郎程浩作都序，职方正郎知制诰吴通微书之。四年戊辰岁也。用公长于律学，急护任持，为上都之表则也。

○唐湖州八圣道寺真乘传

释真乘，姓沈氏，德清人也。厥父玄望孝廉举调兖州司马。母氏妊乘，有神光异气之祥。识者言“沈氏必大其閹閹。”暨诞生也瑰伟，长与宗族诸子杂处，若群草中之琪树焉。总？之后，司马以文学喻之，令修官业，且愀然如有不得已之色。居处玩戏，则以佛像班布。父观其宿习，果请出家。属颜鲁公许试经得度，时已暗诵五百纸。比令口讽，一无差跌，大见褒异。落发配住八圣道寺得戒。后于通玄寺常进师所综习毗居。进公见其俊迈也，诫同门曰：“乘虽少龄，不可以伯仲齿之。”后西上京师云华寺，学《法华》天台《疏义》，大著声望。又章信寺众僧辟其讲发，醉千日者一听而自醒，迷终身者搏闻而永悟，经宗律柄，兼讲无亏，藉甚缙行，弱赫京邑。贞元十一年，功德使梁大夫以德宗亟幸安国寺，奏乘移隶，以备应对，充供奉大德数焉。时本师无滞亦以道业，实蒙恩渥，奏举乘为国祈福。无滞忽梦乘捧一白莲华南去。无何，乘果疾，乞归田间，敕允。既还乡里，本郡守李公钊奇、田公敦、浙东率薛公戒，或踵门而劝登法座，或驰简而延莅戒坛。乘迫以法缘，悉所勉强，以是八为律学座主，四为临坛正员。凡训授度人，或巾屨结缘，一无所受。游五台山，礼文殊圣容，所见瑞相，不可胜言。后在护国寺礼《佛名经》一百周。忤法之余，撰《法华经解疏记》十卷。以元和十五年冬十月示疾而终于本寺。乘精于律法，长于演说。以长庆二年十月十三日焚身于韶村西隅，遵遗命也。万年县尉王甄为碑述德焉。

○唐杭州灵隐山道标传

释道标，富阳人也。俗姓秦氏，其远祖与嬴同姓，世为汧陇大族。及晋东渡，衣冠随之，后为杭人也。其高曾至王父，皆沿以儒素，不甘为吏，故州里尊奉之。标生则孤明，长而深趣，老而坚固，盖良善之因有自来矣。年七岁，时神清气茂，不亲凡童。倏有大沙门手摩其顶曰：“此孺子目秀如青莲，得非我释氏之威凤乎？苟能舍家，必有善称。不然乘云霓，薄天汉，吾不可得而知也。”父允其请，遂为灵隐山白云峰海和尚弟子。妙高之上，唯日月是丽；娑竭之宫，固云雷斯蓄。至德二年，诏白衣通佛经七百纸者，命为比丘。标首中其选，即日得度，蒙配天竺寺焉。永泰初受具品于灵光寺絳律师。登以护戒严谨，为时所推。毗奈多罗之言，罔不该贯。凡度人戒计六坛，为众纠绳经一十二载。置田亩岁收万斛，置无尽财，与众共之。贞元中以寺务克丰，我宜宴息，乃择高爽，得西岭之下，葺茅为堂，不于人事，用养浩气焉。标经行之外，尤练诗章，辞体古健，比之潘刘。当时吴兴有昼，会稽有灵澈，相与酬唱，递作笙簧。故人谚云：“较之昼，能清秀；越之澈，洞冰雪；

杭之标，摩云霄。”每飞章寓韵，竹夕花时，彼三上人当四面之敌，所以辞林乐府常采其声诗。由是右庶子姑臧李公益书云：“重名之下果有斯文。西还京师，有以夸耀。”又景陵子陆羽云：“夫日月云霞为天标，山川草木为地标，推能归美为德标，居闲趣寂为道标。”名实两全，品藻斯当。尔后声价轶于公卿间，故与之深者有相国李公吉甫、大司空严公綬、右仆射韩公皋、礼部侍郎吕公渭、滑毫节制卢公群、襄阳节制孟公简、同州刺史李公敷、凤翔尹孙公、浙东廉使贾公全、中书舍人白公居易、隋州刺史刘公长卿、户部侍郎丘公丹、外郎裴枢、秘阁严维、小谏朱放、越廉问薛戎、夕拜卢元辅、常州释元浩、润州释南容、金华释乾辅、吴门释光严、上都释智崇等，并心交尘外，分契林中。万境在空，驱之为射御；五峰满眼，立之为疆常文雄而再鼓不衰，神王而一战自胜者也。以长庆三年示有微疾，六月七日归灭于所居兰若。至冬十月三日，葬于旧山，春秋八十有四，法腊五十八。弟子如玢、如、行俭、省言、常俭、智猷、日超等，皆得师之法，仿仰不遑。空围绕于繖檀，恨满盈于石室，至今杭民谓之西岭和尚矣。开成五年中郑素卿录德行刊碑颂，立于天竺山之东墟存焉。

○唐衡岳寺昙清传

释昙清，未详何许人也。幼持边幅，罔或迷方，以谨昏呶，究穷佛旨。乃负笈来吴北院道恒宗师法会，与省躬犹膝薛之前后也。旋留南岳化徒，适会元和中阆州龙兴寺结界，时义嵩讲素新《疏》，杰出辈流，因云：“《僧癰律》云：齐七树相去，尔所作羯磨者，名善作羯磨。准此四面，皆取六十三步等，如是自然界约，令作法界上僧。”须尽集时，清遂广征难，如是往返，经州涉省，下两街新旧章南山三宗共定夺，嵩公亏理。时故相令狐楚犹为礼部外郎，判转牒，据两街传律断昙清义为正，天下声唱。勇执纪纲，清能干城矣。后著记号《显宗》焉。

系曰：清公南山宗崛起别峰，人咸景仰，与嵩、悟二公遇于必争之地，清果得隽。矧夫闾苑也，僻用律文，三隅不反。既成图状，学者流传，致其嵩公如填海底。至大中中玄畅公荐加褒贬，贬嵩又转沈尾闾中矣。

○唐京师西明寺圆照传（利言）

释圆照，姓张氏，京兆蓝田人也。年方十岁，笃愿依西明寺景云律师。云亦一方匠手，四部归心。照当应法，乃受近圆，谨愿执持，如怀宝器。寻究经论，访问师承，《维摩》、《法华》、《因明》、《唯识》、《涅槃》、《中观》、《华严》新经，或深入堂奥，或略从染指。仍旁求于儒墨，兼擅美于《风骚》。《律藏》珠珍，专探日用。后则霜坛秉法，雁序度人。洎乎开元年中，敕选名德僧参其译务，照始预焉。至代宗大历十三年，承诏两街临坛大德一十四人齐至安国寺，定夺新旧两《疏》是非。盖以二宗俱盛，两壮必争，被擒翻利于渔人，互击定伤于师足。既频言竞，多达帝聪，有敕令将二本《律疏》定行一家者。时照等序奏云：“按《四分

律》部主，梵云昙无德，秦言法藏。自姚秦弘始五年壬寅岁罽宾三藏佛陀耶舍，秦言觉明，讽出梵文，沙门竺佛念听而笔受，成四十五卷。至十一年岁次戊申，支法领又从西国将梵本来，于长安中寺重雘校，殆十四年辛亥译毕，沙门慧辩等笔受，成六十二卷。后有魏朝道覆律师于法聪讲下纂成《疏》六卷，北齐慧光律师造《疏》二本，次道云律师修《疏》九卷，次道晖撰《疏》七卷，隋朝法愿教《疏》十卷。自唐平一天下也，四方昌阜，三宝增明，有智首律师述《疏》二十一卷，次慧满律师造《疏》二十卷，事各一时流通绝矣。当武德元年戊寅岁，有相州日光寺法砺律师制《疏》，至九年丙戌岁成十卷，宗依《成实论》，今称《旧疏》是也。洎高宗天皇大帝咸亨元年岁在庚午，有西太原寺怀素律师撰《开四分律宗记》十卷，宗依《根本一切有部》、《大毗婆沙》、《俱舍》等论，称《新章疏》是也。至我皇帝受佛付嘱，钦尚释门，信重大乘，遵承密教。见两《疏》传授，各擅颞门，学者如林，执见殊异，数兴诤论。圣慈愍念，务息其源，使水乳无乖，一味和合。时遣内给事李宪诚宣敕，勾当京城诸寺观功德使镇军大将军刘崇训宣敕云：‘《四分律旧疏》、《新疏》宜令临坛大德如净等于安国寺律院金定一本流行。’两街临坛大德一十四人俱集安国寺，遣中官赵凤谕敕尚食局索一千二百六十人斋食并果实解斋粥一事，已上应副。即于安国寺供僧慧彻、如净等十四人，并一供送充九十日斋食，用茶二十五串，藤纸笔墨，充大德如净等金定律疏用。兼问诸大德各得好在否？又敕安国寺三纲：‘金定律疏院，一切僧俗辄不得入，违者录名奏来云。’其时天长寺昙邃、净住寺崇睿、西明寺道邃、兴？、本寺宝意、神朗、智钊、超倓、崇福寺超证、荐福寺如净、青龙寺惟僊、章信寺希照、保寿寺慧彻、圆照共奉表谢。答诏云：‘师等道著依经，功超自觉，承雪宫之旨奥，为火宅之凉。《四分律仪》，三乘肩键，须归总会，永息多门。一国三公，谁执其咎。初机眩曜，述复孔多，爰命有司俾供资费，所烦笔削，伫见裁成。所谢知悉。’其日品官杨崇一宣敕荐福、温国两寺三纲与净土院检校僧等‘严饰道场，命僧行道，用五十四人，起今月一日，转经礼佛，六时行道；至来年二月一日散。其设斋食料一事已上，令所司祇供，宜各精诚，问师等好在。’及解道场，中官李宪诚宣敕语温国寺转念道扯四分律临坛大德等：‘释门三学，以心印相传；无上菩提，以戒法为根本。道场毕日，即宜赴大安国寺楷定《律疏》，十道流行。’至二月八日，敕检校道场大德昙邃、飞锡等，道场定取十日散，设斋外，各赐绢帛。其十四人律师，并令赴安国寺修《疏》，程才品用，各得其宜。众推如净、慧彻同笔削润色，圆照笔受正字，宝意纂文金定，超倓笔受。其崇睿已下九人证义，共议篇题云：‘敕金定《四分律疏》卷第一，京城临坛大德某等奉诏定’，以此为题也。”照为首唱，诸公和之。其间厥义非长，若农夫之去草；其义合理，犹海客之采珠。可谓名解毗尼，不看他面。俄属德宗即位，改元建中，其年五月《疏》草毕。六月望，敕圆照依国子学大历新定字样抄写进本。至十二月十二日送祠部进《新金定疏》十卷。仍乞新旧两《疏》许以并行，从学者所好。敕宜依照，务其搜集，专彼研寻。著《大唐安国寺利涉法师传》十卷、《集景云先天开元天宝诰制》三卷、《肃宗代宗制旨碑表集》共二卷、《不空三藏碑表集》七卷、《隋传法高僧信行禅师碑表集》三卷、《两寺上座乘如集》三卷、《金定律疏一行制表集》三卷、《般若三藏续古今翻译图纪》二卷、《大

乘理趣六波罗蜜多经音义》二卷、《三教法王存没年代本记》三卷（上卷明佛、中道、下儒也）《翻经大德翰林待诏光宅寺利言集》二卷、《再修释迦佛法王本记》一卷、《佛现八相身利益人天成正觉记》一卷、《判方等道场欲受近圆沙弥忏悔灭罪辨瑞相记》一卷、《五部律翻译年代传授人记》一卷、《庄严寺佛牙宝塔记》三卷、《无忧王寺佛骨塔记》三卷、《传法三学大德碑记集》十五卷、《建中兴元贞元制旨释门表奏记》二卷、《御题章信寺诗太子百寮奉和集》三卷、《贞元续开元释教录》三卷。照自序云：“伏以开元十八年岁在庚午，沙门智升修撰《释教录》，洎乎甲戌，经六十五年，中间三藏翻经，藏内并无收管，恐年代浸远，人疑伪经。又先圣大历七年许编入，制文犹在。”时帝敕宜依。至今江表多集此集中经而施用焉。照于律道，颇有功多。肃代二朝，尤为杰立，累朝应奉，赐紫、充临坛两街十望大德、内供奉检校、鸿胪少卿，食封一百户。后终于别院。春秋八十二，法腊五十八云。

系曰：刊正二宗，会归一见，庶几知有定分，不横驰。求何以诸师却请双行，不其惑欤！通曰：“是此举也，则元载所请，帝乃曰俞。究其始因，乃新章也，挟力轮摧相部，独存于我，专利于人。亦犹纪昌俄遇飞卫，并其箭术，成我材官。御大辂而废其椎轮，得火生而焚其木母。窃量诸德，微愤不平，故奏双行，同不佞定。则何异乎眼头生目，匪成三点之伊，必须声后知音，方验一夔之足。因排法砺，三本生焉。旧有南山，四家出矣。又如东汉季也，灭一跋扈，生四强臣。初止政出一门，末云赂归四贵。若然者，骈？悬瘤，虽多无用。然则吾善用多矣。《大集经》云：‘如是诸见，不妨诸佛法界及大涅槃，依之修行，皆得解脱。’此通方之大解也哉。”

卷十六

◎明律篇第四之三（正传十九人附见二人）○唐朔方龙兴寺辩才传

释辩才，姓李氏，襄阳人也。母氏妊之，倏恶荤血，冥然一食，虚淡终辰。及其诞弥，异香盈室，宗党怪焉。七岁依岷山寂禅师出家，厥长者明记：每受经法，必以等身为限。字不重问，义不再思，师甚器之。年十六，遂削发，隶本州大云寺。次乃周游列郡，登陟名山，就荆州玉泉寺纳具戒。闻长安安国寺怀威律师、报恩寺义颁律师，法门具瞻，师资表率，遂伏膺请业。有疑必决，无义不通，厕于二宗，推为上首。天宝十四载，玄宗以北方人也，稟刚气，多讹风，列刹之中，余习骑射，有教无类，何可止息。诏以才为教诫，临坛度人。至德初，肃宗即位是邦也，宰臣杜鸿渐奏才住龙兴寺，诏加朔方管内教授大德。俾其训励，革猥狎之风，循毗尼之道。复命为国建法华道常及驾回，既复两京，累降玺书，末涂尤于大乘顿教留心。永泰二年，贼臣仆固怀恩外招诱蕃戎，内翦金革。才劝勉毳裘，不诛华族。大历三载，迫入充章信寺大德。时府帅虢国常公素仰才名，与护戎任公，时亲道论。十三年冬，现身有疾，至暮冬八日，垂诫门徒已，安坐绳床，默然归灭，春秋五十六。越己未岁二月迁神于寺内西北隅。先是有邑子石颙从役于城上，其夜未渠，闻管弦之声自西至，乃天乐也。异香从空散下，则生净方之兆也。才自长安而旋于塞上，既受虢公知遇，大营福业，成此精庐，皆才之敦劝矣。敕谥大师曰能觉，仍赐紫衣一副，追远之荣，声闻塞外。天复中廷尉评王儋为碑颂德云。

○唐京师章信寺道澄传

释道澄，姓梁氏，京兆人也。父涉中书舍人。生而奇表，辄恶荤肴，出家如归，无所顾恋。忽遇禅僧，摩顶与立名曰道澄，瓶锡常随，冥合律范，号律沙弥也。受具之后，习听《南山律》于诸学处，微其玷缺。然性都率略，住寺不恒，或奉恩、庄严、草堂等寺，所到便居，护生为切。建中二年，坐夏于云阳山，有虎哮吼入其门。澄徐语之，其虎摇尾舐耳而退。徙居章信寺，或问其故，澄曰：“出家者可滞一方乎？西域三时分房，俾无贪著，观门易立矣。不然者，岂通方广恕乎？”贞元二年二月八日，帝于寺受菩萨戒，京甸倾瞻，赐赆隆洽，所受而回施二田矣。五年，帝幸其寺，问澄修心法门。又敕为妃主嫔御受菩萨戒。十六年四月，敕赐号曰大圆。十九年九月十八日，终于此寺焉。

○唐钟陵龙兴寺清彻传

释清彻，未知何许人也。周游律肆，密护根门，即无常师，唯善是与。初于吴苑开元寺北院道恒律师，亲乎阃奥，深该理致，而钟华望无不推称。宪宗元和八年癸巳中，约志著记二十卷，亦鸠聚诸家要当之说，解《南山钞》，号《集义》焉。或云后堂至十年毕简，今豫章、武昌、晋陵讲士多行此义。尝览此记，繁广是宗。彻未

知其终。

系曰：彻公言行，无乃太简乎？通曰：“繁略有据，名实录也。昔太史公可弗欲广三五之世事耶？盖唐虞之前，史氏淳略，后世何述焉？今不遂富贍，职由此也。又与弗来赴告不书同也。诸有繁略不均，必祛诮让焉。”

○唐抚州景云寺上恒传

释上恒，姓饶氏，临川南城人也。童而有知，志学之年，发心舍家，从母党在空门而求摄受，教诵佛典，日计千言。壮齿，从南岳大圆大师纳戒，而听涉精苦。大历中，不去父母之邦，请于景云寺，修习无亏，亟淹年序。《南山事钞》，讲贯尤专。贞元初，徙居豫章龙兴寺，与庐阜法真、天台灵祐、荆门法裔、兴果神凑、建昌慧璿游也，谔合韵，水乳相资。法付王臣，故与姜相国公辅、颜鲁公真卿、杨冯、韦丹四君友善。提振禁防，故讲《四分律》而迁善灭罪者无央数众。坐甘露坛二十许年，十有八会，救拔群生，剡浮东震，男女得度者一万五千余人。元和十年，微云乖？，十月己亥，化于庐山东林寺，归全身于南冈石坟。住世七十七年，安居五十五夏。门人等树松柏，太原白居易为石《塔铭》云。

○唐钱塘永福寺慧琳传

释慧琳，字抱玉，俗姓柯，新安人也。？龄受业于灵隐西峰，为金和尚弟子，所传法要，断无重问。大历初，受具足戒于灵山会，习学三教，一领无遗。不乐声华，止好泉石，一入天眼二十余年，天眼即天目也。其山高三千丈，周围三百里，与天柱、庐阜等相俦匹。上有二湖，谓为左右目，登涉艰阻，数日乃到巅顶，多蛟龙，池潭三所。最上池，人不可近，气臭逆人，不可久视。或说山神作白鹿形，每五月与震泽龙会，必暴风雨焉。琳居此，率多妖异，而心不挠。元和丁亥，太守礼部员外城南杜陟。请出永福寺登坛。至己丑岁春，刺史兵部郎中裴常棣召临天竺寺坛。度人毕，归寺讲训生徒，向二十载。郡守左司郎中陆则、刑部侍郎杨凭、给事中卢元辅、中书舍人白居易、太府卿李幼公、刑部郎中崔鄯、刑部郎中路异相继九邦伯，皆以公退至院，致礼稽问佛法宗意，染指性相。此诸名公簪组上流，辞学高度，或号毗昙孔子，或名胜力菩萨，非琳何以感动哉？太和六年四月二十五日示灭，享寿八十有三，法腊六十四。以其年五月十二日葬于今永安寺西山之阳，码瑙坡之左，石塔岿然存矣。

○唐江州兴果寺神凑传

释神凑，姓成氏，京兆蓝田人也。生而奇秀，？角出尘，远慕戒律，祈南岳希操师受具，复参钟陵大寂禅师。然则志在《楞严经》，行在《四分律》，其他诸教，余力则通。大历八年，制悬经、论、律三科，策试天下出家者，中等第方度。凑应是

选，诏配九江兴果精舍。后从僧望移居东林寺，即雁门贾远之旧道场也，有甘露戒坛、白莲池在焉。既居是，嗣兴佛事，虽经论资神，终研律成务。凑羸瘠，视之颓然，州将门人医疗，而不愿进药。元和十二年九月遘疾，二十六日俨然坐终于寺。十月十九日，门人奉全身窆于寺西道北，纡雁门坟左，若僧诤葬近郭文之墓也。春秋七十四，夏腊五十一。凑以精进心脂不退轮，以勇健力挝无畏鼓，故登坛秉法垂三十年。一盂而食，一榻而居，衣缝少麻，坐荐藁秸。由兹檀施臻集于躬，即回入常住无尽财中，与众共之。每夜捧炉秉烛，行道礼佛，十二时，少有废阙，如是经四十五载。生常遇白乐天为典午于郡相善，及终，悲悼，作《塔铭》云：“本结菩提香火社，共嫌烦恼电泡身，不须惆怅随师去，先请西方作主人。”

○唐京兆圣寿寺慧灵传

释慧灵，未详何许人也。幼脱尘机，勤从诵习，及当应法，戒品方圆，锐意毗尼，探赜持犯，以行副解，心口相符。由是讲训，名望翕如也。人皆奉畏，神明如也。大中七年，宣宗幸庄严寺，礼佛牙，登大塔，宣问耆年，乃赐紫衣。其年六月，敕补灵为新寺上座矣。帝望寺西北废总持寺，乃下敕曰：“朕以政闲赏景，幸于庄严，其寺复殿重廊，连甍比栋。幽房秘宇，窈窕疏通，密竹翠松，垂阴擢秀，行而迷道，天下梵宫，高明寡匹。当建之时，以京城西昆明池势微下，乃建木浮图，高三百尺。藩邸之时，游此伽蓝，睹斯胜事。其总持寺，大业中立，规制与庄严寺正同，今容像则毁，忍草随荒，香径芜侵，尚存基址。其寺宜许重建，以副予心。”三月十一日，令三教首座辩章勾当修寺，及毕工，推灵为纲任，崇圣寺赐紫睿川充寺主，福寿寺临坛大德赐紫玄畅充都维那。灵居寺职，清众咸序，帝所钦重。寺中常贡梨花蜜，其色白，其味愈常，蜡房所取者。灵居新寺终矣。究其灵公如曾预代宗永泰中参译证义，则可年百奇岁矣。如不见不空、良贲，乃春秋夏腊无理知焉。

○唐吴郡破山寺常达传

释常达，字文举，俗姓顾，海隅人也。发迹何阳大福山，游学江淮诸胜寺。达允迪中和，克完戒法，专讲《南山律钞》。后求《涅槃》圆音，《法华》止观，复通《阴符》、《老》、《庄》百家之书，其余分时之学，尽二王之笔迹。后随方参禅，诣于宗极。俄属武宗灭法，叹曰：“我生不辰，不自我后1由是寝默山栖，委裘遁世而无焉。宣宗重建法幢，荐兴精舍，合境民人皆达之化导，故太守韦曙特加崇重。身不衣缁纁，室唯蒙薛萝，四众知归，诸方慕化，其洁白鹤鹭如也。咸通十二年，合郭僧民请绍四众教诲。或游遨糠牧，或啸傲海鉢，不出林麓，动经数载。虽贵士单车诣门，莫得而见。于七五言诗追用元和之体，著《青山履道歌》，播人唇吻。忽于自恣明辰，鸠众于长廊，合掌遂申长别，辞甚刚正。因卧疾不起，绝食七日而逝，实咸通十五年九月十六日也，春秋七十四，僧腊五十一。门人会清、傅朗奉灵柩殡于寺之东南三百步。后年即坟起塔，颖川陈言撰塔铭，邑大夫汝南周思辑为檀信，乾符四年立碑焉。

○唐越州开元寺丹甫传

释丹甫者，不知何许人也。性多警达，言必刚直，讲授惟勤，执持雅正。会稽风土，律范渊府也。甫之唱导，从之者若玄金之就磁石焉。本习业于亘文律师法集，文即省躬之游夏也，甫即躬之嗣孙。顺正命章，幹通秘蹟。越自昙一、玄俨之后，罕能追蹑，甫之声尘迈于前烈。然尔时允文匠手，相部风行，甫介于大律之间，行事之时，草从风偃焉。咸通末出门生智章等传讲，今亦法嗣存焉。或闻著《手记》，寻且未获，吁，惜哉！

○唐吴郡嘉禾灵光寺法相传

释法相，姓俞氏，吴长水人也。天宝中诞育，为婴儿卓异。七岁投师，受经法三浹旬，诵通《法华》全部。弱冠往长安安国寺，得满足戒，即大历中也。便于上京习毗尼道，诸部同异，无不该综，涉十一载，蔚成其业。传法东归，请学者如林。吴郡太守奏于开元寺置戒坛，相预临坛之眩寻充依止，兼众推为寺纲管，恒施二众归戒。行佩漉囊，器不畜长。每有鸟栖于座侧，驰？不去。会昌元年二月十日午时三刻，告弟子清？、清高：“吾当灭矣。”俨然累足右胁而逝。时众昼闻管弦清亮，乃天乐也；夕睹异光。春秋八十九，僧腊六十九。四月迁塔于来苏乡之原，白塔是也。后弟子率义州刺史曹信、大理司直吴方重修塔，发之，见相遗骨若铜色，舌相不坏，若芙蓉焉。齿全四十二。香汤沐之，重葬，盖景福二年癸丑岁五月二十二日也。高弟子公静，静弟子行蕴，蕴弟子仁表，表弟子玄杲，杲本清白之僧也，同鸿启重修灵光一寺，为兵革残毁之后也。杲公、启公后偕隐天台习禅观，相次终于山，焚之皆获舍利焉。

○唐天台山国清寺文举传

释文举，姓张氏，婺州东阳人也。年甫志学，遂投师请法。十九落发，始堕息慈。贞元三年，敕度得戒。后十五年间，以《四分律》为学，时术之，昼夜翹勤，遂登讲训。次通《法华经疏义》，得智者之膏腴焉。举身量六尺余，其形如山，其貌如玉，静若止水，动如浮云。目不回视，口无戏言，四威仪中，无非律范。丹丘二众，仰为绳准。其奔走他方听受者，与佛窟则公禅道并驱而相高也。寻敕为国清寺大德。先是智者大师答隋炀帝问，立七日金光明道场，每年九月，遐迩征镇侯伯人送供，事既无碍，黑白二众无远不届，人才填委，饮食阙焉。典座僧患之。大和中主事僧清蕴咨谋于举，置寺庄田十二顷。自此光明会不闻告乏，举之功欤！以会昌二年五月化去，门人幼清立塔于寺之西峰。春秋八十三，僧夏五十五。韩？为碑颂德也。

○唐会稽开元寺允文传

释允文，字执经，姓朱氏，今秀州嘉禾人也。权舆九岁，厥父云亡，然理命舍文奉佛。师授《维摩》、《法华》二经，敏速之性，再稔皆通，高达之士谓之重理耳。或戏问文曰：“尔出家之后，拟营何事业乎？”率然对曰：“当陟莲华台而作狮子吼。”或呵诮之曰：“耆宿前敢尔。”或曰：“志欲得大，此子将来未易测也。”至十六岁，削顶周罗，披安陀会。相次裹足西上，投嵩山临坛大德远和尚边，获无作法，时年二十三矣。是夏即就中京攻相部律宗并《中观论》，补衣分卫，寒燠四周。既扣义门，必入师室，玄枢律范，尤见精微。大和五年，为思定省，忽叹归欤。既返故乡，淹时寝疾，未遑讲唱。后闻钱塘天竺寺讲《大涅槃经》，蔚为胜集，文往学焉。星岁未周，锋芒且露。开成元年，因游台峤，止息越之嘉祥寺，众藉清芬，甄命敷其经律。文戢约听徒，颇为严毅。常训之曰：“夫绊刍行非家法，具足别解脱律仪、众同分，是其自性，于其形色精进故，怖畏故，防守故。如是方疾得道果矣。不然，则弟子既堕，师道徒施。”闻其警策，有涕泗交横，悛心革行，思过半矣。会昌三年，移居静林寺，专以《涅槃》宣导。属乎武宗澄汰，例被搜扬。昼披缝掖之衣，夜著缦条之服，罔亏僧行，唯追俗讥。大中伊始，复振空门，重整法仪，乃隶名开元寺三十人数。七年，寺之耆旧命讲律乘。乾符三年丙申秋，罢讲，览藏经。以中和二年壬寅六月二十九日微疾作而长逝，享龄七十有八，法腊五十五。其年七月十二日葬于石奇山之阳。遗言不许封树也。初文讲演升座，学徒畏惮，喑鸣之际，人皆披靡，乃戒威德之若是。于嘉祥、静林、今大善三寺，讲相《疏》二十七座，大经二十五座。其为人也貌古而修长，锐顶而黑干黑，执持密緻，振鹭在庭，未足方其洁也。然亦猎涉儒墨，慕白傅自作志，预著《方坟铭》，藏于篋笥。门人怀益，因寻阅文籍，见而悲咽，遂从先师之志，建小塔焉。后门人怀肃、思寂命名德虚受增加后序。赞宁登会稽，曾礼文真相，见法孙可翔，苦节进修，叶杜多之，行故熟其事迹也。

○梁京兆西明寺慧则传（元表）

释慧则，姓糜氏，吴郡昆山人也。九岁，博游才义，总玩儒经。善种发萌，条然厌俗，以大中七年就京西明寺出家。勤知讽诵，皆如曾习。九年，于本寺承恩得度。十四年，栖法宝大师法席覆讲，当年敕补备员大德。咸通三年，就崇圣寺讲《俱舍论》并《丧服仪》，出《三界图》一卷。七年，于祖院代畅师讲。十五年，敕署临坛正员。广明元年，巢寇犯阙，关中？扰，出华州下络避乱。中和二年，至淮南，高公骈召于法云寺。讲罢还吴，刺史杨公苦留，却游天台山国清寺挂锡。乾宁元年至明州育王寺，撰《塔记》一卷，《出集要记》十二卷。武肃王钱氏命于越州临坛。以开平二年八月八日示疾坐亡。受生七十四，法腊五十四。窆于？山之冈。八戒弟子刺史黄晟营塔。则生常不好诤直，以？为谦推人为上。除讲贯外，轮诵经咒，自《法华》已降可三四十本，以资口业。览大藏教两遍，讲钞七十遍，《俱舍》、《丧仪》、《论语》各数遍。清苦执持，近古罕有。入室弟子希觉最露锋颖焉。又元表者，贞谅之士也，言多峭直，好品藻人事，而高义解，从习毗尼，兼勤外学，书史方术，无不该览。早预京师西明寺法宝大师讲肆，迨广明中，神都版荡，遂出

江表，居越州大善寺，讲《南山律钞》。诸郡学人，无不趋集。表义理纵横，善其谈说，每挥麈柄，听者忘疲，号鉴水阁梨。著《义记》五卷，亦号《鉴水》。出门人清福，冠其首焉。

○梁苏州破山兴福寺彦翱传（寿钗梨）

释彦翱，姓龚氏，吴郡常熟人也。揭厉戒津，镕铄尘务，勤求师范，唯善是从。末扣击继宗记主，得其户牖，乃于本生地讲导，同好鸠聚，律风孔扇，号为毗尼窟宅焉。先是海隅，巫咸氏之遗壤，招真治之旧墟，古寺周围不全，墮垣而已。尝一夜有虎中猎人箭，伏于寺阁，哮吼不止。翱悯之，忙系鞋，秉炬下阁，言欲拔之。弟子辈扶遏且止者三四，伺其更阑各睡，乃自持炬就拔其箭。虎耽耳舐矢镞血，顾翱而瞑目焉。质明，猎师朱德就寺寻虎，翱告示其箭，朱德悛心罢猎焉。武肃王钱氏知重，每设冥斋，召行持明法。时覆肩衣自肱而堕，还自搭上，或见鬼物随侍焉。所谓道德盛则鬼神助也。以贞明六年六月，终于山房，年九十九岁云。次寿阁梨者，淮浦左右，贞谅不群，防护正念，时少双偶。传《南山律钞》极成，不看他面。唐季杨氏奄有广陵，频召供施。四远崇重，食惟正命。不畜盈长，户不施关。及临坛度弟子，正秉羯磨，未周三法，忽尔坐亡于覆釜之畔，闻见惊叹欤！

○后唐天台山福田寺从礼传

释从礼，襄阳人也。善事父母，颇扬乡里之誉。迨丧偏亲，乃果决舍家，于时年已壮矣。及登具足，请师传授戒文。念性殊乖，卒难舍本，往往睡魔相挠。礼忿其昏浊，作铁锥刺额兼掌，由是流血，直逾半稔，方遂诵通。自尔精持律范，造次颠沛必于是。以梁乾化中游天台，乃挂锡于平田精舍。后推为寺之上座，持重安详，喜愠不形于色，唯行慈忍。恒示众曰：“波罗提木叉是我大师，须知出家非戒，则若猿驪之脱锁焉。”每所行持，切于布萨，诫众令护惜浮囊。时夏亢阳，主事僧来告“将营罗汉斋，奈何园蔬枯悴！请阁梨为祈祷。”礼曰：“但焚香于真君堂。”真君者，周灵王太子，久闻仙去，以仙官受任为桐柏真人右弼，王领五岳司侍帝晨。王子乔来治此山，是故天台山僧坊道观，皆塑右弼形像，荐以香果而已。自此俗间号为山王土地，非也。时主事向仙祠而咒曰：“上座要雨，以滋枯悴。”至夜，云起雨霏，三日而止。又僧厨阙用水槽栈，而山上有赤树中为材，来白礼。礼曰：“某向真君道去，但庀徒具器以伺之。”无何，大风卒起，曳仆其树，取用足焉。其感动鬼神，率多此类。两浙武肃王钱氏闻之，召入州府，建金光明道场，檀施优渥。回施众僧，身唯一布纳。通夜不寐，一食常坐，且无盈长。同光三年乙酉岁冬十一月入灭，春秋七十九，僧腊五十二。火葬，收舍利，立塔存焉。

○后唐杭州真身宝塔寺景霄传

释景霄，俗姓徐氏，丹丘人也。初之听涉在表公门，后慕守言阁梨义集，敷演于丹

丘。执性严毅，寡与人交。狷急自持，多事凌置，形器恶弱。后纳请往金华东白山，奖训初学。时有江西徽猷律匠，出义记曰《龟鉴录》，多学彭亨，领徒到霄寺，正值讲次，当《持犯篇》再三叹赏。自此声溢价高。每晨滴茶，一旦化为乳焉。著记二十卷，号《简正》，言以思择力故，去邪说而简取正义也。武肃王钱氏召于临安故乡，宰任竹林寺。未几，命赴北塔寺临坛，天成二年也。次命住南真身宝塔寺，终焉。迁葬于大慈山坞，以本受师号，塔曰清凉是欵。

○后唐东京相国寺贞峻传

释贞峻，姓张氏，郑州新郑人也。唐张果先生之裔孙。今荥阳有张果里，其坟楸木贾存焉。峻风度宽裕，髻龄不弄。年十四，忽超然离俗，人莫我知。虽二亲褻衣，昆弟截路，终弗能沮之。乃投相国寺归正律师出家，神机骏发，乍观可惊。虽背碑覆棋，彼不足多也。未几，讽彻《净名》、《仁王》诸经，计数万言。时同侪戏之曰：“汝是有脚经笥也。”峻辞让斯题，恭逊而已。及削染为僧形，即听《俱舍论》，随讲诵颂八品，计六百行。至十八升论座。年满于嵩山会善寺戒坛院纳法，因栖封禅寺，今号开宝律院，学新章律疏。二十三，策名讲授，长宿称奇。当大顺二年，灾相国寺，重楼三门，七宝佛殿，排云宝阁、文殊殿里廊，计四百余间，都为煨烬。时寺众惶惶，莫知投迹。或曰如请得峻归寺，寺可成矣。乃相率往今开宝，坚请峻归充本寺上座。前后数年，重新廊庑，殿宇增华。又请为新章宗主，复开律讲，僧尼弟子日有五十余人，执疏听采。峻之律行，冰雪相高。暑无裸意，寒止举衣，食惟知量，清约太过。乾化元年，临坛秉法。及梁朝革命，所度僧尼计三千余人。以同光二年夏四月十二日微疾而终。春秋七十八，法腊五十八。葬于寺庄，纤慧云禅师塔焉。

○汉钱塘千佛寺希觉传

释希觉，字顺之，姓商氏，世居晋陵。觉生于溧阳，家系儒墨，属唐季丧乱，累被剽略，自尔贫窶。尝傭书于给事中罗隐家，偶问名居，隐曰：“毗陵商家儿，何至于此！”叹息再三，多与雇直，劝归乡修学。至年二十五，叹曰：“时不我与。或服冕乘轩，皆一期尔！”忽求出家于温州开元寺，文德元年也。龙纪中受戒，续揣摩《律部》，禀教于西明寺慧则律师，时在天台山也。则乃法宝大师之高足。广明中，关中丧乱，避地江表，觉始窥其墙，终见室家瑰富。以则出《集要记》解《南山钞》，不称所怀。何耶？古德妄相穿凿，各竞师门，流宕忘返，觉遂著记广之，曰《增晖录》，盖取曹植云“萤烛末光，增晖日月”。谦言增晖《集要》之日月也，二十卷成部。浙之东西，盛行斯录。暨乎则公长往，乃讲酬于永嘉。武肃王钱氏季弟铎牧是郡，深礼重焉。寻为愚僧所诬诉，释而不问，徙于杭大钱寺。文穆王造千佛伽蓝，召为寺主，借紫，私署曰文光大师焉。四方学者骋骛而臻。觉外学偏多，长于《易》道，著《会释记》二十卷，解《易》，至上下《系》及末文甚备。常为人敷演此经，付授于都僧正赞宁。及乎老病，乞解见任僧职。既遂所怀，唯啸傲山房。

，以吟咏为乐。年八十一，然犹抄书籍异本，曾无告倦。未终之前，舍衣物，作现前僧得施，复普饭一城僧。自此困惫，每睡见有一人纯衣紫服，肌肤软弱如绵纩焉，意似相伴。才欲召弟子将至，此人舒徐下床，后还如故。亲向赞宁说此，某知是天人耳。嘱托言毕而绝，享年八十五。生常所著拟江东《谗书》五卷，杂诗赋十五卷，注林鼎《金陵怀古》百韵诗、杂体四十章。觉之执持，未尝弛放，勤于讲训，切于进修。学则弥老而不休，官则奉身而知退，可谓高尚其事，名节俱全，长者之风，蔼然如在。所居号释氏西斋，慕吴兢之蕴积编简焉。

○周东京相国寺澄楚传

释澄楚，姓宗氏，不知何许人也。爰祖暨考，偕贲丘园，高蹈不仕。母赵氏妊楚也，忽畏膻臊之臭。及乎诞生之夕，光烂充室，邻落咸惊。洎当七岁，亲党携之入寺，见佛像，辄嗟叹而作礼。归家问父曰：“唯佛独尔，余者如何？”父曰：“蠢动皆佛，何况人矣。”楚曰：“儿愿学佛，聊报二亲劬劳。”其父默而许旃。至十岁，于相国寺礼智明为师。未几，有童子聚戏而招诱之，楚曰：“汝何愚呆好嬉戏耶？且雪山善财亦童子，还如是否？”旁有闻者奇之曰：“子异日成法门伟器必矣。”受具已来，习新章《律部》，独能趣入毗奈耶窟冗。然其击难酬答，露牙伸爪，时号律虎焉。王公大人请益者，日且众矣。晋高祖闻而钦仰，诏入内道场，赐紫袈裟，寻署大师，号真法焉。自此皇宫妃主有慕法者求出家，命楚落发度戒。表里冰霜，更无他物，命为《新章律》宗主焉。以显德六年十月十一日无疾而终，首北面西，示佛涅槃相也。俗龄七十一，僧夏五十。始末临坛度僧尼八千余人。门人慧照等依西域法焚之，得碎身，分构砖塔藏之。左街首座悟皎作《舍利塔记》焉。

系曰：楚师明律，时号宗主者何？通曰：“律有三宗，砺、素、宣是欤。宗各有主，故云也。”观夫是名也，岂无稽古乎？通曰：“宗主二字，出《阿含经》也。”论曰：原夫人有人法，禁戒威仪是也。天有天法，光洁静虑是也。我佛利见，据于大千，化境斯宽，法门必众。举其会要，不过戒也、定也、慧也。此三为路，出其生死之乡；专一为门，通其涅槃之域。若乃资乎急用，在乎毗尼。毗尼防闲三业，三业皆净，六尘自祛。圣贤践修，何莫由斯道也。故论云：“生死流转者三縛，縛心心难解脱。”当知此唯善说法律，能令解脱，非由恶说。因是而窥禁律乃度世之检括也。且夫菩萨戒净，则彰离垢之名；辟支戒完，则引无师之智。声闻戒足，时俱解脱而可期；内众戒坚，招感人天之不坠。由是观之，戒法之时大矣哉！自所推能，从言索理，则毗尼也，木叉也。因则声教律焉，果则别解脱焉。直以时论，三世诸佛咸同制也。横从界说，十方净刹悉共行之。所以优波离过去七佛，咸以戒律嘱累之。论云：“戒如捉贼，善擒制也。定如？贼，用机械也。慧如杀贼，清道路也。以此成功立效，克取究尽三菩提者，决达清静之域也。”戒律之功，功无与伦。矧以此法在师而不在资，唯闻佛制；行内而不通外，无许俗传。故曰曲授秘方，赐诸内众。事有悬合，物宜象求，在乎家人，严君设训。家人载々，同佛制教焉。妇子嘻嘻，同佛听门矣。一听一制，见其猛以济宽；一阴一阳，见其开物成务。夫

如是，知戒律是佛之家法明矣。大则三聚感三身于果中，小则形俱持尽形于因地。受既如是，随则若何？有威仪焉，有细行焉。为有顺违，乃生持犯，由是繁广，因事制宜。及佛泥丸，集成《律藏》。初惟水乳相合，一家之业无殊；后则参辰各墟，五部之分不类。梦之占征矣，宗轮之论作焉，剡浮树高，分影犹归于月窟；阿耨池溢，下流须到于孟津。迨夫大教东传，梵书西至。甘露本天人之食，汉土争尝；金乌还海上之飞，东方旧识。除经已译，问律何传？起后汉灵帝建宁三年，初翻义决律。次有比丘诸禁律至，即曹魏法时三藏游于许洛，睹魏土僧无律范，于嘉平中译《羯磨僧糴戒》本，此乃此方戒律之始也。自尔《萨婆多律》，先化关中。《五分僧糴》，风行雨施。迦叶遗部，戒本独来，婆粗富罗，闻名而已。况乎僧糴部者，法显赍归。诸师判注，云是根本大众所传，非是百载五宗也。今著传家疑其未可。何邪？所览《僧糴》现本，止三十卷文，因有数疑：一本小而末大（谓诸部文多，《僧糴》卷略）；二中不含五部意；三不应大集悬记也。或曰：“此略本传此方，犹《法华》、《华严》等经，巨万亿颂中略出一分也。《僧糴》亦尔。”又说“《昙无德律》译有重单，准《僧传》止觉明口诵也。若据《律序》，有支法领重译之文焉。”如此古今相竞，且无指归以义交征，其辞必息。寻律文本，即知异同，如众学戒初题云尸叉闍赖尼，如破伊兰叶，言此是觉明本也。如言式叉迦罗尼，如破伊罗叶，即是支法领本也。又一本三十卷，一本六十卷，谓纸墨分开不定，非也分。三十为六十，不其太相悬谬矣。若斯二译，皂白已分。复次元魏已前，诸受戒者用四分羯磨纳戒。及乎行事，即依诸律为随。何异乎执《左氏经》本专循《公羊》之传文也？至魏孝文世，有法聪律匠于北台山始手披口释，道覆律师随听抄记，遂成《义疏》。权与既尔，肯构繁乎。天轮而只候中星，大鼎而唯提附耳。邺中法砺，唐世怀素，新旧两名，各擅其美。砺乃《成实有部》，受体双陈；素惟寻祖《萨婆》，开宗独步。其有终南上士，澄照大师，筭蚤三生，逡巡千里，交接天人之际，优游果证之中，知无不为，绳愆纠谬，以护持教法为己任者，实一代之伟人焉。是以天下言行事者，以南山为司南矣。丁乎大历，新旧疏家互相短长，敕集三宗律师，重加定夺。时如净为宗主，判定二家，当建中中，始言楷正，号《金定疏》是也。至今东京三宗并盛。至于乘法出没不伦，殊涂同归，师资尚异。至若成公演化，灵著敷扬，不离三辅之间，俱覩百工之巧。文纲、道岸自北徂南，发正辅篇，从微至著，道流吴会，实赖伊人。净公作评家之师，源尚致感通之瑞，或抗表论没官之物，或成图证结界之非，或杰立一方，或才雄七众，述锋芒之义记，出豕亥之疑文。或帖纷籀，或整齐龃齟，若匪乘时之哲，便应逸气之英。不令像运之中微，降年惟永；终使寿星之下照，法命惟长。道假人扬，其在兹矣。近以提河水味，转不如前；座像尘埋，仍观更没。大小乘之交恶，上中下之相凌，活寄四邪，行违七聚。威仪既缺，生善全亏，谓律为不急之文，放僧落自由之地。马令脱轡，象阙施钩，不习律仪，难调象马。遂令教法日见凌夷，短则行果微亡，折则年龄减少，合夫《洪范》中凶短折也。又曰慈父多败子，脱或翻恶归善，变犯成持，或众主之劝修，或名师之训导，假王臣之外护，必法教之中兴。如是则同五福中之一寿五考终命欤！又曰严家无格虏，故云毗尼是正法之寿命焉。此科所班，乃是炼金液转还丹之手，劝人服之，使其近添其寿，远则升仙。故我世尊凡制一戒，获其十利功德，

意在令正法久住耳。

卷十七

◎护法篇第五（正传十八人附见一人）○唐京师大庄严寺威秀传

释威秀，不知何许人也。博达多能，讲宣是务，志存负荷，勇而有仪。其于笔语脍炙，特推明敏。无何，天皇即位，龙朔二年四月十五日敕勒僧道咸施俗拜。时则僧徒惶惑，罔知所裁。秀嗟教道之中微，叹君王之慢法，乃上表称沙门不合拜。征引诸史，爰历累朝抑挫，朝才发令，夕又改图，皆非远略也。方引经律论以为量果，词皆婉雅，理必渊明。如云故出家不存家人之礼，出俗无沾处俗之仪，其道显然，百代不易之令典也。表上，敕百官集中台都议其事。时朝宰五百三十九人请不拜，三百五十四人请拜。时大帝至六月敕不拜君而拜父母，寻亦废止。秀之为法，实谓忘身乎！抗表之际，当年四月二十一日也。时京邑僧等二百余人往蓬莱宫，申表上请。时相谓秀等曰：“敕令详议，拜否未定，可待后集。”秀等乃退。于是大集西明寺，相与谋议，共投启状，闻诸达官贵戚，若敕头然。时宣律师上雍州牧沛王启，别上荣国太夫人启等。秀之批鳞，所谓以身许法也。

○唐京兆大兴善寺复礼传

释复礼，京兆人也，俗姓皇甫氏。少出家，住兴善寺。性虚静，寡嗜欲。游心内典，兼博玄儒，尤工赋咏，善于著述，俗流名士皆慕仰之。三藏地婆诃罗、实叉难陀等译《大庄严》、《华严》等经，皆敕召礼令同翻译，缀文裁义，实属斯人。天皇永隆二年辛巳，因太子文学权无二述《释典稽疑》十条，用以问礼，请令释滞，遂为答之，撰成三卷，名曰《十门辩惑论》。宾主酬答，剖析稽疑，文出于智府，义在于心外，如斯答对，坚阵难摧。赤幡曳而魔党降，天鼓鸣而修罗退，权文学所举《稽疑》数义也，于余则难，在礼殊易。何邪？盖不知教有弛张，文存权实，谓为矛盾。故行吊伐之师，如小偏裨须请军门之命。无二既披来论，全释旧疑，乃复书云：“续晨晷之足，凿混沌之窍，百年之疑，一朝顿荆永遵觉路，长悟迷源，？烦恼之薪，餐涅槃之饭，请事斯语，以卒余年云。”此虽一时之解纷，实为万代之龟鉴也。礼之义学，时少比俦，兼有文集行于世。加复深综玄机，特明心契，作《真妄颂》问天下学士，击和者数人。当草堂宗密师铨择臻极，唯清凉澄观得其旨趣，若卢郎之米粒矣。余未体礼师之见。故唐之译务，礼为宗匠，故惠立谓之“译主”。“译主”之名，起于礼矣。妙通五竺，融贯三乘，古今所推，世罕伦匹。其论二轴编入《藏》，酬外难之攻，但用此之戈盾也矣。

○唐京兆魏国寺惠立传

释惠立，本名子立，天皇改为惠立，俗姓赵氏，天水人也。远祖因官徙寓新平，故为豳人焉。爰祖及父，俱驰高誉。立即隋起居舍人司隶从事毅之第三子也。生而岐嶷，有弃俗之志。年十五，贞观三年出家，住豳州昭仁寺，此寺即破薛举之战场也。

。立识敏才俊，神清道迈，习林远之高风，有肇融之识量。声誉闻彻，敕召充大慈恩寺翻经大德，次补西明寺都维那，后授太原寺主，皆降纶旨，令维寺任。天皇之代，以其博考儒释，雅著篇章，妙辩云飞，益思泉涌，加以直词正色，不惮威严，赴火蹈汤，无所屈挠。频召入内，与黄冠对论。皆愜帝旨，事在别传。立以玄奘法师求经印度，若无纪述，季代罕闻，遂撰《慈恩三藏行传》，未成而卒。后广福寺沙门彦惊续而成之，总十卷。故初题云沙门惠立本，释彦惊笺是也。立削藁云毕，虑遗诸美，遂藏诸地府，世莫得闻。尔后临终，令门侍掘以启之，将出，乃即终焉。初立见尚医奉御吕才妄造《释因明图注》三卷，非斥诸师正义。立致书责之，其警句有云：“奉御于俗事少闲，遂谓真宗可了，何异乎鼯鼠见釜灶之堪陟，乃言昆丘之非难；蛛螫睹棘林之易罗，亦谓扶桑之可网。不量涯分，何殊此焉！才由兹而寝。太常博士柳宣闻其事息，乃归信，以书檄翻经僧众云“其外御其侮，释门之季路也”。

○唐洛京佛授记寺玄嶷传

释玄嶷，俗姓杜氏。幼入玄门，才通经法，黄冠之侣推其明哲，出类逸群，号杜？炼师。方登极筴，为洛都大恒观主。游心《七略》，得理《三玄》，道术之流，推为纲领。天后心崇大法，杨阐释宗，义悟其食蓼非甘，却行远舍，愿友初服，向佛而归。遂恳求剃落，诏许度之，住佛授记寺，寻为寺都焉。则知在草为英，在禽为雄，信有之矣。续参翻译，悉彼宗之乖谬，知正教之可凭。或问之曰：“子何信佛邪？”嶷曰：“生死疾，宜早图之，无令临衢整辔，中流伫楫乎？有若环车望斗，劾鬼求仙，以此用心，非究尽也。”乃造《甄正论》一部，指斥其失，令归正真，施設主客问答，极为省要焉。嶷不知厥终。

系曰：知彼敌情，资乎乡导；或入必争之境，免书弗地之讥。又犹秉烛霄征，便匪如人入？。历闻玄嶷曾寄黄冠，熟其本教。及归释族，斥彼妄源。不须四月而试之，已纳一城之款矣。由是观之，脱有棘逆之者，则曰吾当说汝真。斯是之谓欤！

○唐江陵府法明传

释法明，本荆楚人也。博通经论，外善群书，辩给如流，戒范坚正。中宗朝入长安，游访诸高达，适遇诏僧道定夺《化胡成佛经》真伪。时盛集内殿，百官侍听。诸高位龙象，抗御黄冠，翻覆未安，危臬危瓦难定。明初不预其选，出场擅美，问道流曰：“老子化胡成佛，老子为作汉语化？为作胡语化？若汉语化胡，胡即不解。若胡语化，此经到此土，便须翻译。未审此经是何年月，何朝代，何人诵胡语，何人笔受？”时道流绝救无对。明由此公卿叹赏，则神龙元年也。其年九月十四日，下敕曰：“仰所在官吏废此伪经，刻石于洛京白马寺，以示将来。”敕曰：“朕叨居宝位，惟新阐政，再安宗社，展恭？之大礼，降雷雨之鸿恩，爰及缙黄，兼申惩劝。如闻天下诸道观皆画《化胡成佛变相》，僧寺亦画玄元之形，两教尊容，二俱

不可。制到后限十日内并须除毁。若故留，仰当处官吏科违敕罪。其《化胡经》累朝明敕禁断，近知在外仍颇流行，自今后其诸部《化胡经》及诸记录有《化胡》事，并宜除削。若有蓄者，准敕科罪。”其月洛京大恒道观主桓道彦等上表固执，敕批曰：“朕以匪躬忝承丕业，虽抚宁多失，而平恕实专。矧夫三圣重光，玄元统序，岂忘老教，偏意释宗。朕志款还淳，情存去伪。理乖事舛者，虽在亲而亦除；义符名当者，虽有怨而必录。顷以万机余暇，略寻三教之文。至于《道德》二篇，妙绝希夷之境。天竺有空二谛，理秘真如之谈。莫不敷畅玄门，阐扬至赜，何假《化胡》之伪，方盛老君之宗。义有差违，文无典故，成佛则四人不同，论弟子则多闻舛互。尹喜既称成佛，已甚凭虚。复云化作阿难，更成乌合。鬼谷、北郭之辈，未践中天；舍利、文殊之伦，妄彰东土。胡汉交杂，年代亦乖。履水而说涅槃，曾无典据；蹈火而谈妙法，有类俳優。诬诈自彰，宁烦缕说。经非老君所制，毁之则匪曰孝亏；文是鄙人所谈，除之则更彰先德。来言虽切，理实未安。宜悉朕怀，即断来表。”明之口给，当代无伦。援护法门，由之御侮，恶言不入耳，其是之谓乎！

系曰：《化胡经》也，二教不平，其争多矣。无若法明一言蔽之。设或凝神杼思，久不可酬。况复万乘之前，孰能卒对？昔杨素见嵩阳观画《化胡》，素曰：“何不化胡成道，而成佛乎？”道士无言。观夫明之垂问，义含两意，正为化胡成佛，旁？诸天仙言语与人不同，天言传授诸经，是谁辩译！其犹一箭射双凫，又若一发两豕从之谓欤！

○唐润州石埭山神悟传

释神悟，字通性，陇西李氏之子。其先属西晋版荡，迁家于吴之长水也。世袭儒素，幼为诸生。及冠，忽婴恶疾，有不可救之状。咎心补行，力将何施？开元中诣溪光律师，请耆域之方，执门人之礼。师示以遣业之教，一曰理忏，二曰事忏。此二者，圣之所授，行必有征。遂于菩提像前，秉不屈之心，？难捐之指。于时有异光如月？胧绀宫，极苦可以感神明，至精可以动天地。盖人之难事欤！天宝四年，受具足戒，身始披缁。八年，举尤异行，名隶于寺。逮其晚节，益见苦心。每置法华道场九旬，入长行礼念观佛三昧，于斯现前因。语门人曰：“夫阴薄日以何伤，风运空而不动，苟达于妄，谁非性也。”方结宇于劳劳山东。中据石埭，达分仙径，诸猛兽驯于禅榻，祥云低于法堂。中夜有山神现形，谓悟曰：“弟子即隋故新成侯曹世安，生为列侯，死典南岭。今师至止，愿以此地永奉经行。”言讫，隐而不见。故吏部员外李华、殿中侍御史崔益同谒悟，尝问孔老圣教优劣，请陈题品。对曰：“路伽邪典籍皆心外法，味之者劳而无证，其犹泽朽思华，乾池映月，比其释教，天何远乎？”如是往复，应答如流。华、益拱手，无以抗敌。其捍护释门，疆场畴敢侵轶乎？华乃一代之文宗，与萧颖士齐名，笔语过之。若此之儒，孰能贱角也。凡诸不逞之徒疑经难法者，悟必近取诸身，远喻于物，如理答酬，无不垂头搭翼者。十年辛卯春，寝疾，加趺坐而逝。享龄六十三，法腊二十六。闍维之日，获舍

利五百余粒，珠颗累累，粲然在瞩。门人湛一、圆一等主之，迁塔焉。

○唐金陵钟山元崇传（？禅师）

释元崇，俗姓王氏，琅簫临沂人也。晋丞相始兴文献公子薨之后，自南朝伦废，世居句容。祖祢已来，非贤即哲。崇幼而孤秀，嶷若断山。心喻芙蕖，形同玉洁，风尘不杂，立志夷简。时年十五，奉道辞家，负笈洞天，餐霞卧云，师范陶许，精研妙句，独证微隐。乃恐至理未融，解脱方阻，因归心释典，大畅佛乘，三教齐驱，邁心世表。于是声振吴越，縑素异焉。采访使润州刺史齐平阳公闻其行业，虚伫久之，适会恩制度人，哀充举首。以开元末年因从瓦官寺璇禅师谕受心要，日夜匪懈，无忘请益。璇公乃揣骨千里骏足可知，因授深法。崇灵台虚彻，可舍百神，心鉴高悬，尘无私隐。既而声价光远，物望所知，金陵诸德请移所配栖霞寺。春秋逾纪，服勤道务，彝伦有叙，时众是瞻。至德初，并谢绝人事，杖锡去郡，历于上京，遍奉明师，栖心闲境，罕交俗流。遂入终南，经卫藏，至白鹿，下蓝田，于车罔川得右丞王公维之别业。松生石上，水流松下，王公焚香静室，与崇相遇，神交中断。于时天地未泰，？狼构患，朝贤国宝，或在迈轴。起居萧舍人昕与右丞诸公，并硕学雄才，尊儒重道，偶兹一会，抗论弥日，钩深索隐，襟期许与。王箫叹曰：“佛法有人，不宜轻议也矣！及言旋河洛，登陟嵩少，怀达磨之旨要，得《华严》之会归，声价渐高，衣冠羡仰。京师名德咸请住持。志在无为，赧然不顾。乃放浪人世，追踪道，流考盘灵踪，遂东适吴越天台、四明，清心养素。数年之后，遐想钟山，飞锡旧居，考以云房，道俗咸喜，玉反山辉。大历五年，刺史南阳樊公雅好禅寂，及属县行春，顺风稽首，谕请道要，益加师礼矣。时道俗以为此寺灵胜，游憩者多，监主护持，须选名德。金议无以易禅师者。崇频告辞恳苦，众咸再三，事不获已，顺受弥缝其间，总二十年。藉四方之财，因道化之力，乐栌云构，丹闥日新，盖存乎无为无所不为者也。功成身退，安禅高顶，前后学徒，讎可胜计。至大历十二年，示疾言归，不加药饵。八月二日，卒于山院，春秋六十有五。临终，命门人无令封树，弟子如泉、澄添等奉全师教，以其月八日瘞于摄山之阳，依岩为窟，累石不磨不砢，遵遗诰也。崇身长六尺，仪表端肃，望之俨然，即之生畏。意密情恕，心和行高，天姿龙象，生此歧。享龄非永，惜哉！弟子等共建丰碑，以纪化迹，树于寺之门首焉。

○唐京兆大安国寺利涉传

释利涉者，本西域人也，即大梵婆罗门之种姓。夙龄强志，机警溢伦，宗党之中，推其达法。欲游震旦，结侣东征，至金梭岭，遇玄奘三藏，行次相逢，礼求奘度。既而群经众论，凿窍通幽，特尔远尘，归乎正道，非奘难其移转矣。奘门贤哲辐凑，涉季孟于光、宝之间。其为人也，犹帛高座之放旷。中宗最加钦重，朝廷卿相感义与游。开元中于安国寺讲《华严经》，四众赴堂，迟则无容膝之位矣。檀施繁炽，利动人心。有颖阳人韦玘，垂拱中中第，调选河中府文学，迁大理评事秘校。见

涉讲筵币帛堆积，就乞选粮，所获未厌。表请释道二教定其胜负，言释道蠹政可除。玄宗诏三教各选一百人，都集内殿，韦玘先陟高座，挫叶静能及空门思明，例皆辞屈。涉次登座，解疑释结，临敌有余，与韦往返百数千言，条绪交乱，相次抗之，棼丝自理，正直有归。涉重问韦曰：“子先登席，可非主耶？未审主人何姓？”玘曰：“姓韦。”涉将韦字为韵，揭调长吟。偈词曰：“我之佛法是无为，何故今朝得有为？无韦始得三数载，不知此复是何韦？”涉之吟作，百官悚然。帝果忆何韦之事，凜然变色曰：“玘是庶人宗族，敢尔轻蔑朕玄元祖教及凌置释门。”玘下殿俯伏待罪，叩头言：“臣非庶人之属。”涉贵其钳利口以解疏狂，奏曰：“玘是关外之人，非玄贞之族类。”敕贬象州，百姓赐涉钱绢，助造明教寺，加号明教焉。二教重熙，涉之力也。因著《立法幢论》一卷。公卿间有言曰：“涉公是韦掾之膏肓也。”涉曰：“此举也，矢在弦上，不得不发。”自此京城无不改观，言谈讲者，以涉为最焉。晚节遭其谴谪汉东，寻属宽宥，移徙南阳龙兴寺。时惠忠国师知重涉名，聊款关相谒，曰：“纳衣小僧向前，某被门徒朝要连坐于此，适观师当有贵气，可作高道国德，勿同吾也。”乃开篋提衣物，令忠师曳娄，由此襄邓之人皆惊涉如此悬记，忠师道声又光阐焉，盖涉望重之故也。上元二年，诏忠师入供养。肃宗时入宫起居，太上皇，乃引忠见上皇曰：“此人何如利涉？”则知涉才业优长，帝王器重，复多著述。大历中西明寺翻经沙门圆照撰《涉传》，成一十卷，足知言行之多也矣。

○唐越州焦山大历寺神邕传

释神邕，字道恭，姓蔡氏，东晋太尉谡即度江祖十五代孙也。因官居于暨阳，邕生于是邑。母宣氏始娠之际，率多征异。襁褓中闻唱经声，必有凝神侧听之儿。角聪晤过人。年十二辞亲学道，请业于法华寺俊师。每览孔释二典，一读能诵。同辈者罕不欣慕。开元二十六年，敕度隶诸暨香严寺名籍。依法华寺玄俨师，通《四分律钞》。俨识其志气，谓人曰：“此子数年后，卒为学者之司南矣。尔其勉之。”俨新出辅篇律记，邕挾其膏腴，穷彼衢术，一宗学者少能与其联轡方轨焉。性非局促，又从左溪玄朗师习《天台止观》、《禅门》、《法华》、《玄疏》、《梵网经》等，四教三观等义，秘藏载后，观性知空，爰至五夏，果精敷演，吴会间学者从之。天宝中本邑郭密之请居法乐寺西坊，恢拓佛舍，层阁摩霄，半澄江影，廊宇完备。后乃游问长安，居安国寺，公卿藉其风宇，追慕者结辙而至。方欲大阐禅律，倏遇禄山兵乱，东归江湖，经历襄阳，御史中丞庾光先出镇荆南，邀留数月。时给事中窦绍、中书舍人苑咸，钻仰弥高，俱受心要。著作郎韦子春，有唐之外臣也，刚气而赡学，与之酬抗。子春折角，满座惊服。苑舍人叹曰：“阇梨可谓尘外摩尼，论中师子。1时人以为能言矣。旋居故乡法华寺，殿中侍御史皇甫曾、大理评事张河、金吾卫长史严维、兵曹吕渭、诸暨长丘丹、校书陈允初赋诗往复，卢士式为之序，引以继支许之游，为邑中故事。邕修念之外，时缀文句，有集十卷，皇甫曾为序。自至德迄大历中，频受请登坛度戒，起丹阳泊乎金华，其间释子皆命为亲教师也。又以县南路通衢婺，其中百余里殊无伽蓝，释侣往来宴息无所。邕愿布法桥，接

憩行，遂于焦山可以为梵场也。得邑人骑都尉陈绍钦等率群信构净刹，一纪方乃集事焉。前吏部侍郎徐浩出佐明州，以邦国聚落，乃白廉使皇甫温奏赐额曰大历焉。先是中岳道士吴筠造邪论数篇，斥毁释教，昏蒙者惑之。本道观察使陈少游请邕决释老二教孰为至道，乃袭世尊之摄邪见，复宝琳之破魔文，爰据城堑，以正制狂。旗鼓才临，吴筠覆辙，遂著《破倒翻迷论》三卷，东方佛法再兴，实邕之力欤。未游天台，又纂地志两卷，并附于新论矣。邕颐丰角，风韵朗拔，前后廉问皆延置别榻，请为僧统，以加崇揖之礼。贞元四年戊辰岁十一月十四日，遇疾，遗教门人，趺坐端相而归寂于大历法堂焉。以十二月十四日奉灵仪于寺北原，遵僧制也。报龄七十九，法岁五十。明年冬十一月方建塔矣。秘书省校书郎陆淮为其铭，上首弟子智昂、灵澈、进明、慧照等咸露锋颖，禅律互传。至十一年，户部员外郎丘上卿为碑纪德焉。

○唐朗州药山惟俨传

释惟俨，俗姓寒，绛县人也。童龀慷慨，敏俊逸群。年十七，从南康事湖阳西山惠照禅师。大历八年，纳戒于衡岳寺希澡律师所，乃曰：“大丈夫当离法自净，焉能屑屑事细行于布巾邪？”遂谒石头禅师，密证心法，住药山焉。一夜明月，陟彼崔嵬，大笑一声，声应澧阳东九十许里。其夜澧阳人皆闻其声，尽云是东家，明辰展转寻问，迭互推寻，直至药山，徒众云：“昨夜和尚山顶大笑是欤？”自兹振誉，遐迩喧然。元和中李翱为考功员外郎，与李景俭相善。俭除谏议，鹰翱自代，及俭获谴，翱乃坐此出为朗州刺史。翱闲来谒俨，遂成警悟。又初见俨，执经卷不顾，侍者白曰：“太守在此。”翱性褊急，乃倡言曰：“见面不似闻名。”俨乃呼，翱应唯，曰：“太守何贵耳贱目？”翱拱手谢之，问曰：“何谓道邪？”俨指天指净瓶曰：“云在青天水在瓶。”翱于时暗室已明，疑冰顿泮。寻有偈云：“炼得身形似鹤形，千株松下两函经。我来相问无余说，云在青天水在瓶。”又“偈选得幽居惬野情，终年无送亦无迎。有时直上孤峰顶，月下披云笑一声”。初翱与韩愈、柳宗元、刘禹锡为文会之交，自相与述古言，法《六籍》为文黜浮华，尚理致，言为文者韩、柳、刘焉。吏部常论“仲尼既没，诸子异端，故荀孟复之，杨墨之流洗然遗落。殆周隋之世，王道弗兴，故文中子有作，应在乎诸子左右。唐兴，房魏既亡，失道尚华，至有武后之弊，安史之残。吾约二三子同致君复尧舜之道，不可放清言而废儒，纵梵书而猾夏，敢有邪心归释氏者，有渝此盟，无享人爵，无永天年。先圣明神，是纠是殛”！无何，翱邂逅于俨，顿了本心。末由户部尚书，襄州刺史，充山南东道节度使，复遇紫玉禅翁，且增明道趣，著《复性书》上下二篇。大抵谓本性明白，为六情玷污，迷而不返，今牵复之，犹地雷之复见天地心矣。即内教之返本还源也。其书露而且隐，盖而又彰，其文则《象》、《系》、《中庸》，隐而不援释教；其理则从真舍妄，彰而乃显自心。弗事言陈，唯萌意许也。韩柳览之，叹曰：“吾道萎迟，翱且逃矣！”俨陶炼难化，护法功多，回是子之心，拔山扛鼎，犹或云易。又相国崔群、常侍温造相继问道，俨能开发道意。以大和二年将欲岁冬，告众曰：“法堂即颓矣。”皆不喻旨，率人以长木而枝柱之，俨抚掌大笑云：

“都未晓吾意。”合掌而寂，春秋七十云。

系曰：尝览李文公《复性》二篇，明佛理不引佛书，援证而征，惟《易》《礼》而止。可谓外柔顺而内刚逆也，故曰得象而忘言矣。经云治世诸言皆成正法者，李公有焉。俨公一笑，声彻遐乡，虽未劳目连远寻，而《易》例有诸，隆墀永叹，远壑必盈，道感如然不知其然也。

○唐京师章信寺崇惠传

释崇惠，姓章氏，杭州人也。？稚之年，见乎器局，鸷鸟难笼，出尘心切。往礼径山国一禅师为弟子，虽勤禅观，多以《三密教》为恒务。初于昌化千顷最峰顶结茅为庵，专诵《佛顶咒》数稔。又往盐官硖石东山，卓小尖头草屋，多历年月。复誓志于潜落云寺遁迹，俄有神白惠曰：“师持《佛顶》少，结莎诃，令密语不圆。莎诃者，成就义也。今京室佛法为外教凌轹，其危若缀旒，待师解救耳。”惠趋程西上，心亦劳止，择木之故，于章信寺挂锡，则大历初也。三年戊申岁九月二十三日，太清宫道士史华上奏，请与释宗当代名流角佛力道法胜负。于时代宗钦尚空门，异道愤其偏重，故有是请也。遂于东明观坛前架刀成梯，史华登蹶如常磴道焉。时缙伍互相顾望推排，且无敢蹶者。惠闻之，谒开府鱼朝恩，鱼奏请于章信寺庭树梯，横架锋刃，若霜雪然，增高百尺。东明之梯极为低下，时朝廷公贵、市肆居民，骈足摩肩而观此举。时惠徒跣登级下层，有如坦路，曾无难色。复蹈烈火，手探油汤，仍餐铁叶，号为蕘，或嚼钉线，声犹脆飴。史华怯惧惭惶，掩袂而退。时众弹指叹嗟，声若雷响。帝遣中官巩庭玉宣慰再三，便赍赐紫方袍一副焉。诏授鸿胪卿，号曰护国三藏，敕移安国寺居之。自尔声彩发越，德望峻高。代宗闻是国一禅师亲门高足，倍加郑重焉。世谓为巾子山降魔禅师是也。

系曰：或谓惠公为幻僧欤？通曰：“夫于五尘变现者曰神通，若邪心变五尘事则幻也。惠公持《三密瑜伽护魔法》，助其正定，履刃蹈炎，斯何足惊乎？夫何幻之有哉？《瑜伽论》有诸三神变矣。

○唐洛阳同德寺无名传

释无名，姓高氏，渤海人也。祖官今西京，乃为洛阳人矣。冲孺之龄，举措卓异，口不啖辛血，性不狎喧哗，邈矣出尘，故难留滞。年二十八，若瘦雁之出笼，投师习学，依随隶同德寺。及精《律藏》解一字以无疑；闻有禅宗，思千里而请决。举领整裘，开局见路，辞飞笔健，思若涌泉。因随师游方，访祖师之遗迹，得会师付授心樱会先语诸徒曰：“吾之付法，无有名字。”因号无名也。自此志历四方，周游五岳，罗浣庐阜、双峰、公、钅卢岭、牛头、剡溪、若耶、天台、四明，罔不询问，风格高远，神操朗澈，博识者睹儿便伏，僻见者发言必摧。时德宗方纳鲜于叔明、令狐？料简僧尼事，时名有表直谏，并停。寻时鲜于叔明、令狐？等流南海百

姓。至贞元六年，往游五台，居无定所。九年十二月十二日于佛光寺先食讫，俨然坐化，春秋七十二，腊四十三。十一年闍维，获舍利一升。泽潞节度使李抱真建塔于佛光寺，贞元六年庚午岁也。或云：“名著《疏》解《弥陀经》焉。”

○唐庐山归宗寺智常传

释智常者，挺拔出伦，会履清约，遍参知识，影附南泉，同游大寂之门，乃见江西之道。元和中，驻锡庐山归宗净院。其徒响应，其法风行。无何，白乐天贬江州司马，最加钦重。续以李渤员外，元和六年隐嵩少，以著作征起，杜元颖排之，出为虔州刺史南康，曾未卒岁，迁江州刺史。渤洽闻多识，百家之书，无不该综，号李万卷矣。到郡，喜与白乐天相遇，因言浔阳庐山阜山水之最，人物贤哲隐沦。论惠远遗迹，遂述归宗禅师善谈禅要，李曰：“朝庭金榜早晚有嗜菜阿师名目。”白曰：“若然，则未识食菜阿师欤？”白强劝游二林，意同见常耳。及到归宗，李问曰：“教中有言，须弥纳芥子，芥子纳须弥。如何芥子纳得须弥？”常曰：人言博士学览万卷书籍，还是否耶？”李曰：“忝此虚名。”常曰：“摩踵至顶只若干尺身，万卷书向何处著？”李俯首无言，再思称叹。续有东林寺僧神建讲诸经论，问“触目菩提”，常略提举。神建不体，乃发状讼常示恶境界。时李判区分甚闻诣理。常有异相，目耀重瞳，遂将药？手，恒磨错，不觉目眦俱红，号赤眼归宗矣。

系曰：佛理幽邃，一言蔽之者，玄解之言。逗猛利者，药妙疾轻之验也。○唐杭州千顷山楚南传

释楚南，闽人也，俗姓张氏。爰在髫龄，冥然跪于父母前，诉志出家。投开元寺昙藹师而受训焉。当授经法，目所经睹，辄诵于口。执巾侍盥，洒扫应对，颇能谨愿。迨乎冠岁，乃落发焉。诣五台登戒，就赵郡学相部律。往上都，学《净名经》。一律一经，略通宗旨，则知顿机，不甘为渐教缚。遂往芙蓉山，根性未发。谒黄砭山禅师，问答虽多，机宜顿了。倏值武宗废教，南遂深窜林谷。大中兴教，出遇升平相裴公休出抚宛陵，请黄砭出山，南随侍。由此便诣姑苏报恩寺，专行禅定，足不逾阕，仅二十余载。乾符四年，苏州太守周慎嗣向风，请住宝林院。又请居支硎山。至五年，昌化县令徐正元与紫溪戍将饶京同召住千顷慈云院。训示禅徒之外，唯俨然在定，逾月或浹旬。光启三年，前两浙武肃王钱氏请下山供施。昭宗闻其道化，赐其鹿胎衣五事，别赉紫衣。文德六年二月，忽双虹贯堂室，二鹿蹶然入寺，法堂梁折。至五月，辞众，后于禅床垂两足、伸二臂于膝，奄然而卒。春秋七十，僧腊五十六。迁塔于院西隅。大顺二年壬子岁二月，宣州孙儒寇钱唐之封略。兵士发塔，见南全身不散，爪发俱长，悔罪而去。南公平昔著《般若经品颂偈》一卷、《破邪论》一卷，以枝梧异宗外敌，见贵于时也。

○唐南岳七宝台寺玄泰传

释玄泰者，不知何许人也。性参方正，言不浪施，心静之情，义而后动。所居兰若，在衡山之东，号七宝台。不衣蚕缕，时谓泰布纳欵。从见德山禅师，豁如自适，誓不立门徒，逍遥求志，而于词笔，笔若有神。四方后进巡礼相见，皆用平怀之礼。尝以衡山之阳多被山民莫辈斩木烧山，损害滋甚。泰作《畚山谣》，远迩传播，达于九重，敕责衡州太守禁止。岳中兰若由是得存，不为延燎，泰之力也。终年六十五。临逝说偈曰：“不用剃头，不须澡浴一堆猛炎，千足万足。”偈终，垂一足而逝。阇维，收舍利，紵坚固大师塔左，营小浮图焉。又为《冢骨偈》、《诸禅祖塔铭》、《歌》、《颂》等，好事者编聚成集而行千代焉。

○唐京兆福寿寺玄畅传

释玄畅，字申之俗姓陈氏，宣城人也。畅爰在弱龄，便持异操，戏则聚沙为塔，摘叶为香。年九岁，于泾邑水西寺依清逸上人，教授经法。年十九，削发。二十岁，往福州兜率戒坛受具足戒，听掇律科，深得宗旨。新增细缕，一染色佳，而往越中求闻异说。仰京室西明寺有宣律师旧院，多藏毗尼教迹，因栖惠正律师法席。自入京华，渐萌头角，受京城三学大德，益广见闻。方事讲谈，遽钟堙厄，则会昌废教矣。时京城法侣颇甚徬徨，两街僧录灵宴、辩章，同推畅为首，上表论谏。遂著《历代帝王录》，奏而弗听。由是例从俗服，宁弛道情，龙蛇伏蛰而待时，玉石同焚而莫救。殆夫武皇厌代，宣宗在天，坏户重开，炎岗息炽。畅于大中中，凡遇诞辰，入内谈论，即赐紫袈裟，充内外临坛大德。懿宗钦其宿德，蕃锡屡臻。乃奏修《加忏悔一万五千佛名经》，又奏请《本生心地观经》一部八卷，皆入《藏》。畅时充追福院首领，又充总持寺都维那，寻署上座。畅讲律六十座，度法者数千人，撰《显正记》一十卷，科《六帖名义图》三卷、《三宝五运》三卷，虽祖述旧闻，标题新目，义出意表，文济时须。乾符中，懿宗简自上心，特赐师号曰法宝。二年三月二十一日示灭，俗龄七十九，僧腊五十九。弟子赐紫惠柔大德师遂宗绍，以其年四月二十五日窆于长安邑高阳乡小梁村。四年丁酉岁，尚书礼部侍郎崔沆与畅交分殊深，著《碑》述遗迹焉。

○后唐南岳般舟道场惟劲传

释惟劲，福州长溪人也。节操精苦，奉养栖约，破纳拥身，衣无缁纈，号头陀焉。初参雪峰，便探渊府。乾化中，入岳住报慈东藏，亦号三生藏，中见法藏禅师鉴灯，顿了如是广大法界重重帝网之门，因叹曰：“先达圣人，具此不思议智慧方便，非小智之所能。又岳道观中亦设此灯，往因废教时窃移入仙坛也。有游岳才人达士，留题颇多。劲乃叹曰：“卢橘夏熟，宁期殖在于神都；《舜韶》齐闻，不觉顿忘于肉味。嗟其无识，不究本端。盗王氏之青毡，以为旧物；认岭南之孔雀，以作家禽。后世安知？于今区别。”乃作五字颂，颂五章，览者知其理事相融，灯有所属，属在乎互相涉入，光影含容，显华严性海主伴交光，非道家之器用也。楚王马氏奏赐紫，署宝闻大师，梁开平中也。劲续《宝林传》，盖录贞元已后禅门祖祖相继

源脉者也。别著《南岳高僧传》，未知卷数，亦一代禅宗达士，文彩可观。后终于岳中也。

系曰：物涉疑似，难辄区分，劲公志鉴灯，若遗物重获归家也。后之人必不敢攘物归家也。故曰前事不忘，后世之元龟也。○周洛京福先寺道丕传

释道丕，长安贵胄里人也。唐之宗室，父从晏，襄宗沿堂五院之首。母许氏为求其息，常持《观音普门品》，忽梦神光烛身，因尔妊焉。及其诞生，挺然歧嶷，端雅其质，属藉诸亲异而爱之如天童子。年始周蓀，父将命汾晋，会军至于霍山，没王事。丕虽童稚聚戏，终鲜笑容。七岁，忽绝荤膻，每游精舍，怡然忘返。遂白母往保寿寺礼继能法师，尊为轨范。九岁，善梵音礼赞。是岁襄宗幸石门，随师往迎驾。十九岁，学通《金刚经》义，便行讲贯。又驾迁洛京，长安焚荡，遂背负其母，东征华阴。刘开道作乱，复荷母入华山，安止岩穴。时谷麦勇贵，每斗万钱。丕巡村乞食，自专胎息，唯供母食。母问还食未？丕对曰：“向外斋了。”恐伤母意，至孝如此。年二十岁，母曰：“汝父霍山亡没，战场之地，骨曝霜露。汝能收取归葬，不亦孝乎？”遂辞老亲往霍邑，立草庵，鸠工集聚白骨，昼夜诵经，咒之曰：“古人精诚所感，滴血认骨。我今志为孝子，岂无灵验者乎？傥群骨中有动转者，即我父之遗骸也。”如是一心注想，目未轻舍，数日间，果有枯骸从骨聚中跃出，竞骛丕前，摇曳良久。丕即擗踊抱持，如复生在，赍归华阴。是夜其母梦夫归舍，明辰骨至，其孝感声誉日高。至二十七岁，遇曜州牧娄继英，招丕住洛阳福先弥勒院，即晋道安翻经创浴之地也。天祐三年丙寅，济阴王赐紫衣。后唐庄宗署大师曰广智。丕于梁朝后主、后唐庄宗、明宗、凡内建香坛，应制谈论，多居元席。及晋迁都今东京，天福三年诏入梁苑，副录左街僧事，与传法阿闍梨昭信大师俱道儿童颜，号二菩萨。是故朝贵士庶，多请养生之术。丕精勤不懈，一佛一礼。《佛名经》，《法华》、《金刚》、《仁王》《上生》四经，逐一字礼。然其守杜多之行，分卫时至，二弟子随行。开运甲辰岁为左街僧录，虽临僧务，日课修持。相国李公涛、西枢密太傅王公朴、翰林丞旨陶公？等，无不倾心归重。至汉乾祐中，谢病乞西归。未允之际，属汉室凌夷，兵火连作，恣行剽掠。丕于廊庑之下，倚壁诵念，二日纷纭，一无见者。时京城见闻，益加钦尚。逃归洛邑，周太祖潜隐所重。广顺元年，敕召为左街僧录，不容陈让，还赴东京，居于僧任。世宗尹妖府政，嫌空门繁杂，欲奏沙汰，召丕同议。时间难交发，开喻其情，且曰：“僧之清尚，必不露于人前。僧或凶顽，而偏游于世上。必恐正施曦，草和兰？而芟；方事淘澄，金逐沙泥而荡。大王储明欲照，蓄智当行，为益皇帝邪？为损君亲邪？若益君乎，不令一物失所。若损亲也，是坏六和福田。况以天下初平，疮痍未合，乞待后时，搜扬未晚。故老子云：‘治大国如烹小鲜。’虑其动则糜烂矣。”世宗深然其言，且从停寝。及世宗登极，丕谓僧曰：“吾皇宿昔有志，汝当相警护持。”坚乞解归洛阳，又立礼《首楞严经》。二年，果敕并毁僧寺，并立僧帐，盖限之也。毁教不深，乃丕之力也。以显德二年乙卯六月八日微疾。十日，令弟子早营粥食云：“有首楞严菩萨”，众多相迎，令鸣椎，俄然而化，春秋六十七，僧腊四十七。缁素号哭，

诸寺具威仪送葬于龙门广化寺之左，立石塔焉。未终之前，寺钟无故嘶哑，表刹龙首忽焉陨坠。僧澄清梦寺佛殿梁折，极多异兆焉。

系曰：周武灭佛法。隋开皇辛亥岁，太府丞赵文昌入冥见邕受对，寄语文帝拔救。周世宗澄汰，毁私邑，勒立僧帐，故说大渐招其恶报。或有入冥见之，并赞成厥事者，同居负处，略同周武。未知是乎？

论曰：九重所以成深严，七札其能捍忧患。高墉峻垒，加校尉而守之；犀革兕皮，介将军而战者，君既安所，臣亦建功。犹释门之外侮忽来，得法将之中权斯敌。使其大道丧而重复，玄纲绝而又张。我有仲由，恶言不入。外御其侮，不可暂亡也。嗟乎，真教东传，累更年纪，受其艰否，屈指可寻！法系有为，四相以之迁贸；明虽无损，一轮以之蚀侵。桓楚无端效莽，得时而变法；德舆伊始欺孤，余力而责僧。赖远公之致书，因朝达之抗疏，只成暴政，空鲠人情。元魏怀邪，周邕尚辩，昙始乃呈其诡迹，道安盛奋其辞锋。是待秦坑，能逃汉律，始安二德，疑其住寿应真，出没其形，扶危拯溺者矣。秀也钟其厄运，愤此反常，上笺若攻垒之先登，为法偶犯颜而不死。复礼答权文学难词，蔚成解判。惠立斥吕奉御《图注》，免横窥窬。两面俱通，玄嶷造乎《甄正》，一场贾勇。法明定其《化胡》，答孔老于李华，名儒慑伏；挫是非于韦氏，辩势酋强。邕也掩徐，独记于天台；俨也令李，成书于《复性》。其或角史华之术因蹶刀梯；谏德宗之非，乃停沙汰。申答而惊李渤，作谣而占衡山。《破邪》之论可宗，《鉴灯》之颂归我。以前诸德超世卓然，式遏寇仇，阅墙御侮。言其薄者，则发愤忘食，殊弗防其反污。其如皋原纵火，兰艾之臭同焚；树木摧风，鸾鹄之巢共覆者，其惟会昌灭虐我法之谓乎？从汉至唐，凡经数厄，钟厄爰甚，莫甚武宗焉。初有道士赵归真者，授帝留年之术，宠遇无比。每一对扬，排毁释氏，宜尽除之。盖以归真曾于敬宗朝出入宫掖，势若探汤。及其祸缠，暴殄自然，事体如浆。京邑诸僧竞生谗谤。归真痛切心骨，何日忘之。还遇武皇，因缘狎昵，署为两街教授先生。时谏官抗疏，宰臣李德裕屡言。归真惧其动摇，奏迎罗浮邓元起、南岳刘玄靖入，帝谓神仙坐致。由是共为椅角，同毁释门，意报僧讥诮之仇耳。众轻覆车，群噪惊蛰，须弥危臬危瓦困其劫尽之风；有顶低摧，倚其宿舂之杵。诟云终否，当有复时。大中行废教之诛，会昌非后天之老。吁咄哉！归真奇秘之术，今古所无。何邪？能寄喜怒于天子之心，虽王晋、安期，俱弗如也。尔时玄畅法宝大师也，纳两街之请，操一割之刀，纂辑古今，搜扬经史，成其别录，上其表笺。逆龙鳞之手已伸，探虎穴之心且勇。膏肓之疾，圭刀之散何施？混浊之河，铢两之胶谩解。如皆畏震，所谓坐看畅公手拓不周山，不免共工之触折也。凡今缙伍，无纵毁讥。毁讥小人也，及罹祸毒，君子受之，亦犹城门火而池鱼死也。傥云周武不落于阿鼻，归真自登于仙籍，宣宗诛之，已塞责矣。是故比丘但自观身行，莫伺玄门，非干已事。又以空门染习如然，无斗四支而伤具体，各是圣人设教，无相夺伦。如此行时，名真护法也。老氏云：“六亲不和，则有孝子。”如无孝子之名，信六亲大和也。已上诸公，皆家中有竞，号啕谏乎？因得善父母之名欤！今我传家，止劝将来二教和同，弗望后生学其诤直，险在其中矣，为君不颯然

则临机可用，相事当行，必任弛张，勿为胶柱。然后知时名为大法师也。传又云乎，“相时而动，无累后人”，其斯之谓欤！

卷十八

◎感通篇第六之一（正传十五人附见三人）○后魏西凉府檀特师传

释檀特师者，一名慧丰，不知何许人也。身虽剃染，率略无检制，饮酒啖肉，语嘿无常。逆论来事，后必如言。居于武威，肆意狂逸。时宇文仲和为刺史，请之入州，历观厩库，乃云：“何意畜他官物邪？”仲和不谕其旨，怒之，不令在城。未几，仲和拒不受代，朝廷令独孤信擒之。仲和身死，资财没官。周文闻之，降书召之。檀特至歧州，会齐神武来寇玉壁，檀特曰：“狗岂能到龙门邪？”神武果不至龙门而还。侯景未叛东魏之前，忽捉一杖，杖头刻为猕猴形，令其面常向西，日夜弄旃。又索一角弓牵挽之。俄而侯景启降，寻复背叛归梁，皆可征验。至大统十七年春初，忽著一布帽。周文左右惊问之。檀特曰：“汝亦著，王亦著也。”至三月而魏文帝崩。复取一白绢帽戴之，左右复问之。檀特曰：“汝亦著，王亦著也。”未几丞相夫人薨。后复戴，问对同前，寻丞相第二子武邑公薨。其事验多如此也。俄而病卒，周文命葬之。

○后魏晋阳河秃师传

释河秃师者，不详何许人也。魏孝昌中，于晋阳市肆间行往，乍愚乍智，作沙门形。时人不测，止呼为河秃师。及齐神武诞第二子洋，文宣帝也，武明太后见家贫甚，与亲戚言及家计，正忧饥冻死耳。洋方生数月，尚未能言，錫言曰：“得活”，二字分明。太后左右大惊，而不敢言，谓为妖怪。时传秃师神异，射事多中，巧诱而至。太后意占其儿子早言为怪，乃遍问诸子，文襄魏永熙后旁以禄位历问之，至洋再三举手，指天而已，口无所言。若诸子，皆别无举措矣。后不测其终。

○陈新罗国玄光传

释玄光者，海东熊州人也。少而颖悟，顿厌俗尘，决求名师，专修梵行。迨夫成长，愿越沧溟，求中土禅法。于是观光陈国，利往衡山，见思大和尚，开物成化，神解相参。思师察其所由，密授《法华》、《安乐行门》。光利若神锥，无坚不犯，新犹劫贝，有染皆鲜。禀而奉行，勤而罔忒，俄证《法华》三昧，请求印可。思为证之：“汝之所证，真实不虚，善护念之，令法增长。汝还本土，施設善权，好负螟蛉，皆成蜾蠃。”光礼而垂泣，自尔返锡江南。属本国舟舰附载，离岸时，则彩云乱目，雅乐沸空，绛节霓旌，传呼而至。空中声云：“天帝召海东玄光禅师。”光拱手避让，唯见青衣前导，少选入宫城，且非人间官府。羽卫之设也，无非鳞介，参杂鬼神。或曰：“今日天帝降龙王宫，请师说亲证法门，吾曹水府，蒙师利益。”既登宝殿，次陟高台，如问而谈，略经七日。然后王躬送别，其船泛洋不进。光复登船，船人谓经半日而已。光归熊州翁山，卓锡结茅，乃成梵刹。同声相应，得法者蛰户爰开；乐小回心，慕膻者蚁连倏至。其如升堂受？者一人，入火光三昧

一人，入水光三昧二人，互得其二种法门。从发者彰三昧名耳。其诸门生，譬如众鸟附须弥山，皆同一色也。光末之灭，罔知攸往。南岳祖构影堂，内图二十八人，光居一焉。天台国清寺祖堂亦然。

系曰：夫约佛灭后，验入道之人，以教理行果四法明之，则无逃隐矣。去圣弥近者，修行成果位证也。去圣稍遥者，学教易见理亲也。其更绵邈者，学教不精，见理非谛。夫一念不生，前后际断，斯顿心成佛也。理佛具足，行布施行，曾未尝述行佛，具体而微。东夏自六祖已来，多谈禅理，少谈禅行焉。非南能不说行，且令见道如救头然之故。南岳思师切在兼修，乘戒俱急，是以学者验诸行果。其如入火光三昧者，《处胎经》中以禅定摄意入火界三昧，刹土洞然。愚夫谓是遭焚。若入水界三昧，愚夫见谓为水，投物于中。菩萨心如虚空不觉触烧者，此非二乘所能究尽也。斯乃急于行果焉。无令口说而身意不修，何由助道邪？

○隋江都宫法喜传

释法喜，南海人也，形容寝陋，短弱迂疏，可年四十许。岭表耆老咸言：“儿童时见识之，颜貌如今无异。”蛭蜒间相传云已三百岁矣。亦自言旧识庐山慧远法师，说晋宋朝事，历历如信宿前耳。平素时悄默，见人必语，语必含深意，吉凶之征，有如影响。人亦不欲与喜相见，惧直言灾恶忤逆意也。陈朝马静为广州刺史，方上任，喜直入州上厅事，画地作马头形，以示其子而去。静本扶风名族，雄勇多武略，不闲事体。及临州也，每出行部，从甲士数万，旌旗剑戟，若虹霓映乎霜雪，言以此可用威边徼。其奢僭过度，王者之不若，被人诬告谋反。静惧，即遣妻子百余人入朝，示无图变。陈王犹惑，遣临汝侯观其形势曰：“必有反状，便可行戮，实无逆谋，直往代之。”临汝利其财产，至州不验是非。静恃心无异，束手诣临汝，便叱左右擒而斩之。此画地之明效矣。喜之先见，皆同此类。炀帝闻之，追来扬州。未久，宫内树一堂新成，喜匆匆升堂观览，俄惊走下阶，唱言“几压杀”其日夜阑，大雨堂崩，毙者数人，其后又于宫内环走，言索羊头。帝闻恶之责以狂言，敕锁著一室。数日，三卫于市见喜坦率游行。还奏，敕所司覆验禁闭之处，门锁如故。守当者云：“喜见在室内。”于是开户，见袈裟覆一聚白骨，其锁贯项骨不脱。帝甚惊怪，敕遣长史王恒疾往验之，袈裟覆白骨，骨皆钩锁相连，铁锁磨其项骨。帝闻愕然称叹，尤增信重，敕令勿轻摇荡，曰：“圣者神变无方。”至暮，喜还在室，或言或笑，守门复奏。帝令脱锁，纵其所适。有于一日赴数家斋食，或时饮酒啖肉，都无拘忌。俄而有疾，常所卧床自撒荐席，椶簟而纯寝。令人于下铺炭甚炽，数日而终，半身焦烂。葬于香山寺侧。后四年，南海郡奏喜见还在郡。敕遣开棺，空无所有矣。

○隋蕲州钦师传

释钦师者，不知何许人也。大业中，至广平，形神乖谬，造次难知，发语不常，既

往爰中。见灵通寺树砖浮图五级，欲务高敞，工作？杂。钦望而笑，谓寺众曰：“造此奚为？”众曰：“功德佛事，须用壮观，法师何斯怪问耶？”笑曰：“造烽火楼也。”当时缙伍互相非之曰：“风狂辈言，何可取！至九年，塔尚未成，贼寇四起，州官警严，于浮图上置候望烽火，方信钦言不妄矣。在所耆旧亦不知钦从何而来。止宿之处，亦无踪迹。然则时时变身，在豕彘之牢，即随豚豨群队。童子马世达等数人睹钦始变之时，乃停留伺察，意更观其复人形也。后果忽复形，却于看人之后大叫曰：“你辈欲何所观耶？”群人惊愕，合掌拜之。其变无常，皆若此也。及天下丧乱，亦失钦声迹矣。

系曰：“魏隋之僧且多应现者何？通曰：“菩萨作用，随类化身，以神通为游戏耳。于游戏而利益世主焉。”或曰：“魏、齐、陈、隋与宣师耳目相接，胡不入《续传》耶？”通曰：“有所不知，盖阙如也。亦犹大宋文轨既同，土疆斯广，日有奇异，良难遍知。纵有某僧也，其柰史氏未编，传家无据，故亦阙如，弗及录者，留俟后贤者也。”

○唐泗州普光王寺僧伽传（木叉慧俨慧岸）

释僧伽者，葱岭北何国人也。自言俗姓何氏，亦犹僧会本康居国人，便命为康僧会也。然合有胡梵姓名，名既梵音，姓涉华语。详其何国，在碎叶国东北，是碎叶附庸耳。伽在木土，少而出家。为僧之后，誓志游方。始至西凉府，次历江淮，当龙朔初年也。登即隶名于山阳龙兴寺。自此始露神异。初将弟子慧俨同至临淮，就信义坊居人乞地，下标志之，言决于此处建立伽蓝。遂冗土获古碑，乃齐国香积寺也。得金像衣叶，刻普照王佛字居人叹异云：“天眼先见，吾曹安得不舍乎？”其碑像由贞元、长庆中两遭灾火，因亡踪矣。尝卧贺跋氏家，身忽长其床榻各三尺许，莫不惊怪。次现十一面观音形，其家举族欣庆，倍加信重，遂舍宅焉。其香积寺基，即今寺是也。由此奇异之踪，旋萌不止。中宗孝和帝景龙二年，遣使诏赴内道场，帝御法筵言谈，造膝占对休咎，契若合符。仍褒饰其寺曰普光王。四年庚戌，示疾，敕自内中往荐福寺安置。三月二日，俨然坐亡，神彩犹生，止瞑目耳。俗龄八十三，法腊罔知。在本国三十年，化唐土五十三载。帝惨悼黯然。于时秽气充塞，而形体宛如，多现灵迹。敕有司给绢三百匹，俾归葬淮上，令群官祖送，土庶填郛。五月五日，抵于今所。帝以仰慕不忘，因问万回师曰：“彼僧伽者何人也？”对曰：“观音菩萨化身也。经可不云乎？应以比丘身得度者，故现之沙门相也。”初伽化行江表，止嘉禾灵光寺。彼泽国也，民家渔梁鐸弋交午。伽苦敦喻，其诸杀业陷堕于人，宜疾别图生计。时有裂网折竿者多矣。伽闲而宴息，见神告曰：“天方亢阳，百姓苗死身胡藏？其懒龙耶！”伽曰：“为之奈何？”神曰：“若今夕但小指出窗隙外，其如人何？”伽依之，其夜霆击异常，质明视指，微有红线脉焉。伽曰：“吾与此壤无缘。”乃行抵晋陵，见国祥寺荒废，乃留衣于殿梁而去，后人闻异香芬馥。伽尝记之曰：“伊寺有人王重兴。”去三十年后，果有僧俗姓全，为檀那矣。通天万岁中于山阳众中悬知嫌鄙伽者，乃昌言曰：“吾有五十万钱奉助功德，

勿生横议。”伽于淮岸招呼一船曰：“汝有财施吾，可宽刑狱。汝所载者剽略得耳。”盗依言尽舍，佛殿由是立成。无几，盗败，拘于扬子县狱。伽乘云下，慰喻言无苦。不日，果赦文至，免死矣。昔在长安，驸马都尉武攸暨有疾，伽以澡罐水狗之而愈，声振天邑。后有疾者告之，或以柳枝拂者，或令洗石师子而瘳，或掷水瓶，或令谢过。验非虚设，功不唐捐。却彼身灾，则求马也；警其风厄，则索扇欵。或认盗夫之钱，或咋黑绳之颈，或寻罗汉之井，或悟裴氏之溺，或预知大雪，或救旱飞雨，神变无方，测非恒度。中宗敕恩度弟子三人，慧岸、慧俨、木叉各赐衣盂，令嗣香火。洎乎已灭，多历年所，尝现形往汉南市漆器。及商人李善信船至寺觅买斋器，僧忽见塔中，形像凝然，而指曰：“正唯此僧来求买矣。”远近嗟叹。又尝于洪井化易材木，结筏而至焉。大历中，州将勒寺知十驿，俾出财供乘传者。至十五年七月甲夜，现形于内殿，乞免邮亭之役。代宗敕中官马奉诚宣放，仍赍舍绢三百匹、杂彩千段、金澡罐、皇太子衣一袭，令写貌入内供养。又乾元中，州牧李（亡名）。有推步者云：“为土宿加临，灾当恶弱。”伽忽现形，抚李背曰：“吾来福至，汗出灾销。”后无他咎。尝于燕师求毡罽，称是泗州寺僧。燕使赍所求物到，认塔中形信矣。遂图貌而归，自燕鳞展转传写，无不遍焉。长庆元年夜半，于州牧苏公寢室前歌曰：“淮南淮北自此福焉。自东自西，无不熟矣。”其年独临淮境内有年耳。二年，寺塔皆焚，唯伽遗形俨若无损。咸通中，庞勋者本徐州戍卒，擅离桂管，沿路劫掠，而攻泗州，围逼其城。伽于塔顶现形，外寇皆睡，城中偶出击之，惊窜而陷，宿州以事奏闻，仍锡号证圣大师也。文德元年，外寇侵軼，州将婴城拒敌。伽现形于城西北隅。寇见，知坚垒难下，骇而宵遁。大顺中彭门帅时溥令张谏攻于北城，除剿戮外，有五百余人拘鞠场中，谏凭按恍惚间见僧衣紫，诲之曰：“此辈平人，何可杀耶？不如舍之。”言毕不见。谏遂纵之而逸。乾宁元年，太守台蒙梦伽云：“寒东南少备。”蒙不喻旨，以绵宽法服施之。十二月晦夜半，有兵士逾垒而入，蒙初不知。复梦一僧以锡杖置于心上，冷彻心骨，惊起。蒙令动鼓角，贼惊奔，获首领姓韩，至是方晓矣。由此多于塔顶现小僧状，倾州瞻望，然有吉凶表兆于时，乞风者分风，求子者得子，今闻有躬礼者。往往有全不见伽形相者，或见笑容者吉，不然则凶，其不可爱度者如此。洎乎周世宗有事于江南，先攻取泗上。伽寄梦于州民，言不宜轻敌。如是达于州牧，皆未之信。自尔家家梦同，告之，遂降，全一郡生民，赖伽之庇矣。天下凡造精庐，必立伽真相，诔曰大圣僧伽和尚。有所乞愿，多遂人心。李北海邕、胡著作浩各为碑颂德。今上御宇也，留心于此，其年三月有尼游五台山回，因见伽于塔顶，作婴孩相，遂登刹柱，舍身命供养。太平兴国七年，敕高品白承睿重盖其塔，务从高敞，加其累层。八年，遣使别送舍利宝货，同葬于下基焉。其日有僧怀德预构柴楼，自持蜡炬，焚身供养。炎燎之中，经声不绝。又将欲建浮图，有巨木三根，沿淮而下，至近浮桥且止，收为塔心柱焉。续敕殿头高品李庭训主之。先是此寺因■中金像刻其佛曰普照王，乃以为寺额。后避天后御名，以光字代之。近宣索《僧伽实录》，上览已，敕还其题额曰普照王寺矣。弟子木叉者，以西域言为名，华言解脱也。自幼从伽为剃{髟采}弟子，然则多显灵异。中和四年，刺史刘让，厥父中丞忽夜梦一紫衣僧云：“吾有弟子木叉葬寺之西，为日久矣，君能出之。”仍示其葬所。初梦都不介意，再梦如初

，中丞得梦中所示之处，欲施斫之，见有一姓占居，于是饶钱市焉。开穴可三尺许，乃获坐函，遂启之，于骨上有舍利放光。命焚之，收舍利八百余颗，表进上僖宗皇帝，敕以其焚之灰塑像，仍赐谥曰真相大师。于今侍立于左，若配飨焉。弟子慧俨，未详氏姓，生所恒随师僧伽，执侍瓶锡，从楚州发至淮阴，同劝东海裴司马，妻吝白金沙罗而堕水。抵盱眙，开罗汉井，宿贺跋玄济家。俨侍十一面观音菩萨旁。自尔诏僧伽上京师。中宗别敕度俨并慧岸、木叉三人，各别赐衣钵焉。

○唐嵩岳少林寺慧安传

释慧安，姓卫氏，荆州支江人也。其貌端雅，绀发青目，降神乃隋开皇初年也。安受性宽裕，不染俗尘，修学法门，无不该贯。文帝十七年，敕条括天下私度僧尼，勘安云，本无名姓，亡入山谷。大业中，开通济渠，追集夫丁，饥殍相望。安巡乞多钵食，救其病乏，存济者众。炀帝闻之，诏安，遂潜入太和山。至帝幸江都，海内扰攘，乃杖锡登衡岳寺，行头陀法。贞观中，至蕲州，礼忍大师。麟德元年游终南山，石壁而止。时所居原谷之间，早霜伤絺絺，安居处独无。四十里外皆苦青女之灾矣。天皇大帝闻而召焉，安不奉诏。永淳二年至滑台，草亭居止，中坐绳床，四方坦露。敕造寺以处之，号招提是也。如是却还家乡王泉寺，时神秀禅师新归寂，咸请住持。安弗从命。天后圣历二年四月，告门人学众曰：“各归闭户。”至三更，有神人至，扃卫森森，和铃鈇鈇，风雨偕至。其神旋绕其院数遭，安与之语，丁宁教诫，再拜而去。或问其故，曰：“吾为嵩山神受菩萨戒也。”天后尝问安甲子，对曰：“不记也。”曰：“何不记耶？”乃曰：“生死之身如循环乎？环无起尽，何用记为？而又此心流注，中盼无盼，见沤起灭者，亦妄想耳。从初识至动相灭时，亦只如此，何年月可记耶？”天后稽颡焉。闻安阙井，敕为凿焉。安曰：“此下有赤祥，慎其伤物。”将及泉，见虾璫金色，蠢然出沮洳间，合其悬记。帝倍加钦重。殆中宗神龙二年九月，敕令中官赐紫袈裟并绢，度弟子二七人。复诏安并静禅师入中禁受供施。三年，赐摩纳一副，便辞归少林寺。至景龙三年三月三日，囑门人曰：“吾死已，将尸向林间，待野火自焚之。勿违吾愿。”俄尔万回和尚来见，安猖狂执手，言论移刻，旁侍倾耳都不体会。至八日，闭户，偃身而寂。春秋一百三十许岁，起开皇二年，至景龙三年故也。火焚尸毕，收舍利八十粒，内五粒红紫色进内，余散施随力造塔。先天二年门人建浮图焉。

○唐虢州阆乡万回传

释万回，俗姓张氏，虢州阆乡人也。年尚弱龄，白痴不语，父母哀其浊气。为邻里儿童所侮，终无相竞之态。然口自呼“万回”因尔字焉。且不言寒暑，见贫贱不加其慢，富贵不足其恭，东西狂走，终日不息。或笑或哭，略无定容，口角恒滴涎沫，人皆异之。不好华侈，尤少言语，言必讖记，事过乃知。年始十岁，兄戍辽阳，一云安西，久无消息，母忧之甚，乃为设斋祈福。回俛白母曰：“兄安，极易知耳，奚用忧为？”因裹斋余，出门径去，际晚而归，执其兄书云：“平善。”问其所

由，默而无对，去来万里。后时兄归云：“此日与回言，适从家来，因授饼饵共啖而返。”举家惊喜。自尔人皆改观，声闻朝廷。中宗孝和皇帝诏见崇重。神龙二年，敕别度回一人而已。自高宗末，天后时常诏入内道场，赐锦绣衣裳，宫人供事。先为儿时，于阆乡兴国寺累瓦石为佛塔。入内之后，其塔遂放光明，因建大阁而覆之。然其施作，皆不可辄量，出言则必有其故。敕赐号为法云公，外人莫可得见。先是天后朝任酷吏行罗织事，官稍高隆者日别妻子。博陵崔玄炜位望俱极，其母卢氏贤而忧之曰：“汝可一日迎万回，此僧宝志之流，可以观其举止，知其祸福也。”乃召到家，母垂泣作礼，兼施中金匕箸一双。回忽下阶掷其匕箸向堂屋上，掉臂而去。一家谓为不祥。经数日，令升屋取之，匕箸下得书一卷，观之乃讖纬书也，遽令焚之。数日，有司忽来其家，大索图讖，不获得雪。时酷吏多令盗投蛊道物及伪造秘讖，用以诬人，还令诬告得实，屠戮藉没其家者多。崔氏非圣人掷匕箸，何由知其伪图讖也。中宗末，尝骂韦后为反悖逆，斫尔头去。寻而诛死。太平公主为造宅于怀远坊中，与主宅前后尔。又孝和亲送金城公主出降吐蕃，幸始平，回出迎驾。时崔日用、武平一、宋之问、沈？期、岑羲、魴稷皆肃揖，郑重问讯。诸公云：“各欲求圣人一言以定吉凶。”抚沈背曰：“汝真才子。”沈不胜其喜曰：“圣人与我受记，诸子不可更争。”又谓武曰：“与汝作名佛童，当无忧也。”目羲稷有不善之色，岑以马避之，目稷云：“此多是野狐，其言何足惧也？”乃顾曰：“汝亦不免。”及羲稷之诛，人益贵重。同时有僧伽，化迹不恒。中宗问回曰：“此何人也？”回曰：“观音之化身也。”贞观中，三藏奘师西归云：“天竺有石藏寺，奘入时见一空房，有胡床锡杖而已。因问此房大德，咸曰：‘此僧缘阙法事，罚在东方，国名震旦，地号阆乡，于兹万回矣。’”奘归求见，回便设礼问西域，宛如目瞩。奘将访其家，回谓母曰：“有客至，请备蔬食。”俄而奘至。神异之迹，多此类也。正谏大夫明崇俨者，道术之士，谓人曰：“万回神僧也。”玄宗潜龙时，与门人张炜等同谒。回见帝甚至褻黷，将漆杖呼且逐之，同往者皆被驱出。曳帝入，反扃其户，悉如常人，更无他，重抚背曰：“五十年天子自爱，已后即不知也。”张公等门外历历闻其言，故倾心翼戴焉。五十年后，盖指禄山之祸也。睿宗在邸时，或游行人间。回于聚落街衢中高声曰：“天子来。”或曰：“圣人来。”其处信宿间，帝必经过徘徊也。惠庄太子，乃睿宗第二子也，天后曾抱示回，曰：“此儿是西域大树精，养之宜兄弟也。”安乐公主，玄宗之季妹，附会韦后，热可炙手，道路惧焉。回望车骑，连唾之曰：“腥，腥，不可近也。”不旋踵而祸灭及之。帝愈知回非常人也，出二宫人日夕侍奉之，特敕于集贤院图形焉。暨回垂卒，而大呼遣求本乡河水，门人徒侣求觅无所。回曰：“堂前即是河水何不取耶？”众于阶下掘井，河水涌出，饮毕而终。回宅坊中井皆咸苦，唯此井甘美。后有假托，或称小万回，以惑市里，多至诛死焉。至于终后，右常侍徐彦伯为碑，立阆乡玉涧西路矣。

系曰：日行万里，非人必矣。为鬼神邪？为仙术邪？通曰：“观行知人，回无邪行，非鬼神也。无故作意，非仙术也。此得通耳。故《智度论》中此通有四：一身能飞行，如鸟无碍；二移远令近，不往而到；三彼没此出；四一念能至。”或曰：“

四中回具何等？”通曰：“俱有哉，故号如意通矣。《瑜伽论》神境同也。云或罗汉有大堪，能现三神变焉。”

○唐齐州灵岩寺道鉴传

释道鉴，姓冯氏，吴郡人。未知从来，而居历下灵岩山寺，踪迹神异，不测僧也。元和中，有冯生者，亦吴郡人也，以明经调选未捷，因侨寄长安。一日见老僧来，诣冯居，谓之曰：“汝吾姓也。”因相与往还，仅于岁余遂注拟作尉于东越。方务治装，鉴负锡来告去。冯问：“师去，安所诣乎？”鉴曰：“吾庐在齐州灵岩之西庑下，薄游神京，至今正十年矣。幸得与子游，今归旧所，故来相别。然吾子尉于越乡，道出灵岩寺下，当宜一访我也。”冯诺之曰：“谨受教矣。”数日，冯出关东之赴任，至灵岩寺门，立马望曰：“岂非鉴师所居寺乎？”即入访之。时一僧在庭，冯问“道鉴上人庐舍安在”？僧曰：“此寺无道鉴。”冯疑异，默而计曰：“鉴公纯直，岂欺我乎？”于是独游寺中，行至西庑下，忽见壁画一僧，与鉴师貌同。冯大惊嗟：“鉴师果异人欤？且能降神与我交。”久之，视其真相旁题云：“冯氏子，吴郡人也。年十岁学浮图法，以道行有闻，卒年七十八。冯阅其题，方悟云“汝吾姓也”，言非谬矣。一说苏州西去城二十许里，有灵岩山寺，西北庑下画沙门形，云是梁天监十五年作游方居士状，经过山寺，寓过宵宿，而于僧厨借笔砚，僧众皆不留意。诘旦，僧遍搜索而亡有客，见殿隅画一梵僧，面骨权奇，肤色皴黑，眉长且垂，眸子电转，皆盼青白，昂鼻方口，张唇露齿，擎拳倚右肩之上，身屈可长一丈五寸，衣粗纳袈裟，臂擐大珠，徒跣。众见惊慑，莫测其来。远近咸格，有焚香礼叹者，有请福攘灾者。或于晴夜，殿中析窾，闻有行道之声。由是鸟雀不敢污践檐楹之间矣。然则乡人谓之灵岩和尚，或云灵岩圣僧。尝见形谓一老姥曰：“贫道好食茱粽。”疑是圣者，翌日持簞入殿供养，迄今年别三月三日民竞送之，以蔣叶角黍米淪之，吴人谓之茱粽也。唐先天二年，陆鲁公疾，医工未验，公忧虑增剧。门遇一僧分卫，屈入，遂索水器含漱之，即时病间。鲁公喜，赠物颇丰，了不回视。遂问：“和尚居处何寺？”答曰：“贫道住苏州吴县西灵岩寺。郎君为官江表，望入寺相寻。”斯须已去。未久，调补尚书祠部郎，续迁桂州廉使。常念当年救病之僧，迂路姑苏，入灵岩寺觅焉。乃说其形貌，合寺僧云：“非此所有。”陆尽日徘徊不忍去，忽于殿中见圣者形，曰：“往年疗某者，此僧也。”寺僧说其由致，通感难知。陆舍钱数万，备香火之资，却留旬日，供养方去。又寺中净人每于像前占烛灯，添油助炷，意盗油涂发耳。居无何，其发焦卷而堕，傍人劝令礼忏，别买麻膏增炷，平复如初。又武宗将废佛教也，近寺有陆宣者，梦圣者云：“受弟子供施年深，今来相别，且归西天去也。”宣急命画工图写真貌。至会昌五年，毁拆寺宇，方知告别之意焉。距咸通七年蝗灾，尔时弥空亘野，食人絺縠，至于入人家食缯帛之物。百姓徬徨莫能为计。时民人吴延让等率耆艾数十百人诣像前焚香泣告，即日虫飞越境焉。乾符五年，寺众当诣阙乞钟归寺，差僧撰日登途。圣者先入右神策军本局，预陈嘱托。及正请钟僧到，见司吏，怪问：“数日前有僧来，云隶苏州灵岩山寺。”其僧曰：“某行无伴侣。”后右军胥因事游吴，见壁画云：

“此是七月中曾来司内计会钟僧也。”然吴中极彰灵异，且不测厥由。曾有梵僧来，礼画像云：“智积菩萨何缘在此？”叹嗟弥久，而自此号“智积应身”也。

系曰：同异之说，史氏多之，今详寺曰灵岩，僧画像，此为同也。州曰历下、姑苏，遇者曰陆与冯，此为异焉。斯盖见闻不齐，记录因别也。原夫圣人之应身也，或南或北，或汉或胡，或平常之形，或怪差之质，故令闻见必也有殊，复使传扬自然多说。譬犹千里之外，望日月以皆同，其时边旁云物状貌有异耳。既是不思议应现矣，则随缘赴感，肆是难同。可发例云：“所传闻异辞也。”

○唐武陵开元寺慧昭传

释慧昭，未详何许人。其为僧也，性僻而高，恒修禅定，貌颇衰羸，好言人之休戚，而皆必中。与人交言，且不驯狎。闭关自处，左右无侍童。每日乞食，里人有八十余者云：“昭居此六十余年，其容貌无异于少时昔日也。”但不知其甲子。元和中，有陈广者，由孝廉调为武陵官，而酷好浮图氏。一日因诣寺，尽访诸僧，昭见广，且悲且喜曰：“陈君何来之晚乎？”广愕然，自揣平生不识此僧，何言来晚？乃曰：“未尝与师游，何责迟暮？”昭曰：“此非仓卒可言，当为子一夕静话，方尽此意。”广甚惊异，后时诣昭宿，因请其事。昭曰：“我刘氏子，宋孝文帝之玄孙也。曾祖鄱阳王休业、祖士弘，并详于史氏。先人文学自负，为齐竟陵王子良所知。子良招集贤俊文学之士，而先人预焉。后仕齐梁之间，为会稽令。吾生于梁普通七年夏五月，年三十方仕于陈，至宣帝时为卑官，不为人知，徒与沈彦文为诗酒之交。后长沙王叔坚与始兴王叔陵皆多聚宾客，大为声势，各恃权宠，有不平心。吾与彦文俱在长沙之门下。及叔陵被诛，吾惧不免，因皆销声匿迹于林谷，拾橡栗而食，掬溪涧而饮。衣一短褐，虽寒暑不易，以待所忧之所定。无何，有一老沙门至吾所居曰：“子骨法甚奇，当无疾耳。”彦文再拜请其药，曰：‘子无刘君之寿，奈何？虽服吾药，亦无所补。’遂告别，将去，复谓我曰：‘尘俗以名利相胜，竟何有哉？唯释氏可以舍此矣。’恭纳其言，自是不知人事，凡十五年。又与彦文俱至建业，时陈氏已亡，宫阙尽毁。台城牢落，荆榛蔽路，景阳并塞，结绮基颓，文物衣冠，荡然而荆故老相遇，相携而泣，且曰：‘一人无良，已至于是，隋氏所灭，良可悲乎！’又闻后主及诸王皆入长安，乃率沈挈一囊乞食于路，以至关中。吾长沙王之故客也，恩遇甚厚，闻其迁往瓜州，则径往就谒。长沙王长于绮纨而早贵盛，虽流放之际，尚不事生业。时方与沈妃酣饮。吾与沈再拜于前，长沙悲恸，久之沥泣而起，乃谓吾曰：‘一日家国沦亡，骨肉播迁，岂非天乎？’吾自此且留晋昌，氏羌之塞。数年而长沙殂，又数年彦文亡，吾因剔{髟采}为僧，遁迹会稽山佛寺，凡二十年，时已百岁矣。虽容体枯瘠，而力不衰，尚日行百里。因与一僧同至长安，时唐高祖已有天下，建号武德。至六年，吾自此或居京洛，或游江左，至于三蜀五岭，无不住焉，殆今二百九十年矣。虽烈寒酷热，未尝有微恙。贞元末，于此寺梦一丈夫，衣冠甚盛，熟视乃长沙也。吾迎延坐，话旧伤感，如平生时。而谓吾曰：“后十年，我之六世孙广当官于此郡，师其念之。”乃问之曰：‘王今何为？’

’曰：‘冥官极尊。’既而又泣曰：‘师存而我之六世矣，悲夫！吾梦觉，因纪君之名于经笥中，至去岁凡十年，乃以君之名氏访于郡人，尚怪君之未至。昨因乞食里中，遇邑吏访之，果得焉。及君之来，又依然长沙之貌也。然自梦及今十一年矣！故讶君之晚也。’已而悲惋，泣下数行，因出经笥示之。广再拜，愿执屨锡为弟子。昭曰：“君且去，翌日当再来。”广受教而还，明日至其居，昭已遁去，莫知其适。时元和十一年也。至大和初，广为巴州掾，于山南道路逢昭，惊喜再拜曰：“愿弃官，请从师为物外之游。”昭亦许之，其夕偕舍于逆旅。至大将曙，广早起而省昭已去矣。广茫然若有所丧，神情沮败，自是尽不知所往也。然则昭自梁普通七年生，于时岁在丙午，下至唐元和十年乙未，凡二百九十年，则与昭言如合符契焉。

系曰：慧昭既三百年住世也，前不可测，后未可涯，与夫宾头罗罍尊者一贯，胡不念恩地之裔孙邪？通曰：“神仙隔一尘，犹未可与之游。且广是具缚凡夫，昭为度世上士，飞鸢与渊鱼，踪迹相远，此何怪欤？”

○唐岸禅师传

释岸禅师，并州人也，约净土为真归之地。行方等忏，服勤无缺。微有疾，作禅观不亏，见观音、势至二菩萨现于空中，持久不灭。岸召境内画人，无能画者，忽有二人云从西京来，欲往五台，自乐输工。画菩萨形相续事毕，赠鞋二襪，忽隐无踪。岸知西方缘熟，告诸弟子云：“吾今往生，谁可偕行？”有小童子稽颡曰：“愿随师去。”乃令往辞父母，父母谓为戏言，而令沐浴，著净衣，入道场念佛，须臾而终。岸责曰：“何得前行？”时岸索笔赞二菩萨曰：“观音助远接，势至辅遥迎，宝瓶冠上显，化佛顶前明。俱游十方刹，持华候九生。愿以慈悲手，提奖共西行。”述赞已，别诸弟子入道场，命门徒助吾念佛，端坐而终，春秋八十。时垂拱元年正月七日也。

○唐会稽永欣寺后僧会传

释后僧会者，本康居国人也，以吴赤乌年中谒大帝。初吴人未识僧形，止曰胡人入境。乃祈舍利已，令帝开悟。末主天纪四年，会尸解真身隐焉。至唐高宗永徽中见形于越，称是游方僧，而神气瑰异，眉高隆准，颐峭眸碧，而瘦露奇骨，真梵容也。见者悚然，罔知阶位。时寺纲飭诘其厥由，骂而驱逐。会行及门，乃语之曰：“吾康僧会也，苟能留吾真体，福尔伽蓝。”步之间，立而息绝。既而青目微瞑，精爽不销，举手如迎揖焉，足跨似欲行焉。众议偃其灵躯，？于窀穸，人力殫矣，略不倾移。虽色身坚牢，而强事胶漆，迁于胜地，别立崇堂。时越人竞以香华、灯明、繒彩、幡盖、果实、衣器，请祈心愿，多谐人意。初越之军旅，多寓永欣，其妇女生产，兵士羣血，触污僧蓝，人不堪其淹秽。会乃化形往谒闽廉使李若初，且曰：“君侯即领越之藩条，托为迁之军旅。”语罢，拂衣而去，寻失踪迹。李公喜而

骇，且记其言，后果赴是郡。及上事讫，便谒灵迹，认于时言者，则斯僧也。命撤军家，勒就营幕。又正妇夜临蓐席，且无脂烛，邻无隙光。俄有一僧秉烛自牖而入。其夫旦入永欣，认会貌，即是授火救产厄之僧。自尔民间多就求男女焉。属会昌毁永欣也，唯今大善独留，号开元矣，遂移会身入是寺中。大中之后，有昙休律师为会别创堂宇，广其供具。又尝就闾阎家求草屨，至今越人多以芒鞋油幡上献，感应筭蚤，各赴人家，不可周述。今号超化大师。从永徽至今，未尝阙其供施焉。沙门虚受为碑纪述焉。

系曰：蔡邕是张衡后身，智威本徐陵前事，验皆昭？，理且弗虚。至于圣人功用自在，此亡彼出，利见无方。僧会捐世既遐，唐来化越，立迹屹然，异中之异。苟非应物现形，如水中月，孰能预于是乎？

○唐京兆法海寺道英传

释道英，不知何许人也。戒德克全，名振天邑，住寺在布政坊。咸亨中见鬼物，寺主慧简尝曰：“晓见二人行不践地，入英院焉。”简怪而问之，英曰：“向者秦庄襄王使使传语‘饥虚甚久，以师大慈，欲望排食并从者三百人，勿辞劳也’。吾以报云‘后日晓具饌，可来专相候耳。’”简闻之，言以酒助之。及期果来，侍从甚严，坐食仓黄，谓英曰：“弟子不食八十年矣。”英问其故，答曰：“吾生来不无故误，其如灭东周，绝姬祀。或责以功德，吾平日未有佛法可以忤度，唯以赦宥矜恤？独塞之，终为未补。以福少罪多，受对未毕。今此一踰，更四十年方复得食。”因历指座上云：“此是白起、王翦，为杀害多，罪报未终。”又云：“此陈轸，以虚诈故。”英曰：“王何不从人索食而甘虚腹，此奚可忍乎？”王曰：“慈心人少，余人不相见。吾缘贵人，不可妄行崇祸，所以然也。”英指酒曰：“寺主简公将献。”深有所愧。垂去谓英曰：“甚感此行伤费饘饩，可知弟子有少物即送相偿。城东通化门外尖冢，以其锐上而高大，是吾栖神之所。世人不知，妄云吕不韦墓耳。”英曰：“往遭赤眉开发，何有物来？”曰：“贼取不得。”英曰：“贫道非发丘中郎，是出家人，无用物所，必勿将来。”言讫，长揖而去。英感下趣如此，罔知终毕。

○唐京兆法秀传

释法秀者，未详何许人也。居于京寺，游于咸镐之间，以劝率众缘，多成善务，至老未尝休懈。开元末，梦人云：“将手巾袈裟各五百条，可于回向寺中布施。”觉后问左右，并云无回向寺。及募人制造巾衣，又遍询老旧僧俗，莫有此伽蓝否。时有一僧，形质魁梧，人都不识，报云：“我知回向寺处。”问要何所须并人伴等，答曰：“但赍所施物，名香一斤，即可矣。”遂依言授物，与秀偕行。其僧径入终南山，约行二日，至极深峻，初无所睹。复进程，见碾石一具，惊曰：“此人迹不到，何有此物？”乃于其上焚所赍香，再三致礼哀诉，从午至夕。谷中雾气弥漫，

咫尺不辨，逡巡开霁，当半崖间有朱门粉壁，绿牖璇题。刹飞夭矫之幡，楼直觚棱之影。少选，见一寺，分明云际，三门而悬巨榜曰回向寺。秀与僧喜甚，攀陟遂到，时已黄昏，而闻钟磬唱萨之声。门者诘其所从，迟回引入，见一老僧，慰问再三，倡言曰：“唐皇帝万福否？”处分令别僧相随，历房散手巾袈裟，唯余一分。指一房空榻无人，有衣服坐席，似有所适者。既而却见老僧，若纲任之首曰：“其往外者当已来矣。”其僧与秀复欲至彼授手巾等一房，但空榻者，亦无人也。又具言之，老僧笑令坐，顾彼房内，取尺八来至，乃玉尺八也。老僧曰：“汝见彼胡僧否？”曰：“见已。”曰：“此是将来权代汝主者。京师当乱，人死无数。此胡名磨灭王。其一室是汝主房也。汝主在寺，以爱吹尺八，罚在人间，此常所吹者也。今限将满，即却来矣。”明日遣就斋，斋讫曰：“汝当回，可将此尺八并袈裟、手巾，与汝主自收也。”秀礼拜而还，童子送出，才数十步，云务四合，则不复见寺矣。乃持手巾、袈裟、玉尺八进上，玄宗召见，具述本末。帝大感悦，凝神久之，取笛吹之，宛是先所御者。后数年，果有禄山之祸，秀所见胡僧，即禄山也。秀感其所遇，精进倍切，不知所终。世传终南山圣寺又有回向也。

系曰：昔梁武遣送袈裟入海上山，法秀诣回向寺，燕师命使寻竹林圣寺，此三缘者名殊而事一，莫是互相改作，同截鹤续鳧否？通曰：“圣人之作，犹门内造车，门外合辙，虽千万里之远，事亦符合者。盖无异路，故如樵子观仙棋，烂柯非止王质。有多人遇棋，且姓名不同，为烂斧柯者不一。今送衣入圣寺多者，亦如此也。”

○唐滑州龙兴寺普明传

释普明，不知何许人也，或云西域之僧。每谈禅法，举擢玄微，莫可测其沈寥之高远欤！大历初年，受胙县人请居阿兰若，学者蚁聚。尘中往来，白衣礼而施之，日以千计。或一睹相，自然惩忿窒欲，食甚怀音，沿善革恶，以岁计无央数也。右仆射义成军节度使贾耽者，本谪仙也，优游道学，率略空门。才覲明也，若羊祜之识旧环，蔡顺之见慈母焉。降心延请住州寺，迎引倾郭，巷无居人。由是为人说法，虽老不疲。行疾如风，质貌轻壮。以贞元八年壬申闰十二月十日，囑付门徒，奄然坐灭。生年或云三百岁，以其年百岁者见之，颜容不易之故。依天竺法火化，收舍利二七粒，坚固圆明。群信于明所居禅庭。立塔一所，后迁座于塔下焉。明亡之后十年，王师西征，安静边塞，滑人有材勇者柴清，因覷猥狁，深入虏庭。巡逻者多，乃昼伏夜动，迷方失路，迂直不分。清见明在前导，若老马之先驱焉。及抵汉城，忽然不见。归州就塔作礼，遐迩传之。

卷十九

◎感通篇第六之二（正传二十一人附见八人）○唐嵩岳破灶堕传

释破灶堕者，不知何许人也。天后之世，参事嵩岳安禅师，号老安是欤？通彻禅法，逍遥弗羁，恒理求而不见其前，别涂取而莫趋其后。尝遇巫氏能与人醮灶祓禳，若汉武之世李少君，以祠灶可以致物同也。凡其解奏之时，往往见鬼物形兆，闾里迭畏，传于众多，杀少牢以祭之者交午。重其主灶，乃幡盖拥之，秘而罕睹焉，杨子所谓灵场之威宜夜矣乎？时堕诣之，始劝巫者，终为神说法已，告云：“我闻师教，决定生天。”乃现其形，礼辞且曰：“蒙师提耳，获益弥深，得生殊胜天。”言讫而隐，其灶即神祠也，随而瓦解，自然破落，非人力也。遐迩惊骇，此师素不称名，由此全取他名，号破灶堕也。

○唐嵩岳闲居寺元皂传

释元皂，姓李氏，伊阙人也。禀气英奇，宽裕闲雅。既缘宿习，乃誓出家，于永淳二年遂登满足，乃隶名闲居寺。以习毗尼，虽勤无懈，执律唯坚。后悟少林寺禅宗，大通心要，深入玄微，遂卜庐于岳中庞坞。谓其徒仁素曰：“吾始居寺东岭。吾灭，汝必塔吾骸于此。”皂安于岩阿。时有峨冠裤褶，部曲繁多，轻步舒徐，称谒大师。皂睹其貌伟，精爽不伦，谓之曰：“善来仁者，胡谓而至？”曰：“师宁识我邪？”皂曰：“吾观佛与众生等，吾一目之，岂分别识也？”对曰：“我此岳神也。吾能利害生死于人，师安得一目我哉？”皂曰：“汝能生死于人，吾本不生，汝焉能死？吾视身与空等，视吾与汝等，汝能坏空与汝乎？苟能坏空及坏汝，吾则不生不灭也。汝尚不能如是，又焉能生死吾邪？”岳神稽首再拜曰：“我亦聪明正直于余神，岂能知师有广大之智辩乎？愿授之正戒，令我度世，助其威福。”皂曰：“神既乞戒，即既戒也。所以者何？戒外无戒，又何戒哉？”神曰：“此理也我闻茫昧，止求师戒我身为门弟子。”皂辞不获，即为张座，焚香秉炉正机曰：“付汝五戒，汝能奉持，即向曰能。不能，即曰否。”神曰：“洗耳倾听，虚心纳教。”皂曰：“汝能不淫乎？”神曰：“亦娶也。”曰：“非谓此也，谓无罗欲也。”神曰：“能。”曰：“汝能不盗乎？”神曰：“何乏我也，焉有盗取哉？”曰：“非谓此也，谓飧而福淫，不供而祸善也。”神曰：“能。”曰：“汝能不杀乎？”神曰：“政柄在躬，焉曰不杀？”曰：“非谓此也，谓有滥误混疑也。”神曰：“能。”曰：“汝能不妄乎？”神曰：“我本正直，焉能有妄？”曰：“非谓此也，谓先后不合天心也。”神曰：“能。”曰：“汝能不遭酒败乎？”神曰：“力能。”皂曰：“如上是为佛戒也。”又言：“以有心奉持而无心拘执；以有心为物而无心想身。能如是，则先天地生不为精，后天地死不为老，终日变化而不为动，毕尽寂默而不为休。悟此，则虽娶非妻也，虽飧非取也，虽柄非权也，虽作非故也，虽醉非降也。若能无心于万物，则罗欲不为淫，福淫祸善不为盗，滥误混疑不为杀，先后违天不为妄，降荒颠倒不为醉，是谓无心也。无心则无戒，无戒则无心，无佛

无众生，无汝及无我，无我无汝，孰能戒哉？”神曰：“我神通亚佛。”皂曰：“汝神通十句，五能五不能。佛则十句，七能三不能。”神悚然避席，启跪颇恭曰：“可得闻乎？”曰：“汝能仁戾上帝，东天行而西七曜乎？”曰：“不能。”又曰：“汝能夺地癸融五岳而结四海乎？”曰：“不能。”皂曰：“是为五不能也。”又曰：“佛能空一切相，成万法智，而不能即灭定业。佛能知群有性，穷亿劫事，而不能化导无缘。佛能度无量有情，而不能尽众生界。是为三不能也。定业亦不牢久，无缘亦谓一期，众生界本无增减。亘无一人，能主有法。有法无主，是谓无法。无法无主，是谓无心。如我解佛亦无神通也，但能以无心通达一切法耳。作用冥现有情前也。若有心有作，作用必不普周焉。”岳神曰：“我诚浅昧，未闻空义，愿师授我戒，我当奉行，更何业因可拘尘界？我愿报慈德，效我所能。”皂曰：“吾观身无物，观无常法窟，块然更有何欲？”神曰：“师必命我为世间事，展我少小神功，使已发心、初发心、未发心、不信心、必信心五等人目我神踪，知有佛有神，有能有不能，有自然有非自然者。”皂曰：“无为是，无为是。”神曰：“佛亦使神护法，师宁隳叛佛邪？随意垂诲。”皂不得已而言曰：“东岩，寺之障也，莽然无树。北岫有之，而背非屏拥。汝能移北树于东岭乎？”神曰：“已闻命矣。”又陈曰：“我必昏夜风雷摆摇震运，愿师无骇。”即郑重作礼辞去。皂门送而且观之，见仪卫逶迤如王者之行仗。又复碧靄红霞，紫岚皓气，间错四散，幢盖环佩，戈戟森森，凌高浸空，杳渺隐没焉。其夕果有暴风吼雷，奔云霆雷隆栋壮宇岌岌将圯，定僧瞻动，宿鸟声狂，互相敲磕，物不安所。乃谓众僧曰：“无怖，无怖，神与我契矣。”诘旦和霁，则北岩松栝尽移东岭，森然行植焉。而皂谓其徒曰：“吾歿后无令外知，若为口实，人将妖我也。”以开元四年丙辰岁，嘱累门人，若委蜕焉。春秋七十三。遂营塔于岳之东岭，影堂存于本院。后十二年告成，县尉许筹追皂之德为记焉。

○唐庐江颺山天柱寺惠符传

释惠符，姓戚氏，越州诸暨人也。登其弱冠，勇气过人，角力驰逐，无能及者。然其任侠，且厌在家，忽投香严寺，矫迹柔心，淳淑顿变。纳法之后，练行孤标。每夜沿山据草座，安禅不动。复研寻经论，见潜县之霍山，昔汉武尝徙南岳之祭于此，极成胜境。其中天柱寺可以栖神，乃结庵居焉。无几，有巨蛇张口，毒火焱焱。符徐语之曰：“汝寻宿债，吾可噬也。不然，洗身定意，如运业通，来为受戒。”斯须，弭按蜿蜒而去，果化成人形，来求出家。符为之落发，披衣受讫，礼辞而退。后被告符私度，具以实对辩。符云：“若私度有愆，甘听其罪。”官吏知非常而纵之。符凡见疮疖脓流，皆咒之则差。至开元十八年，无疾而终。乃从火葬，见骨节相连之状焉。

○唐长安西明寺惠安传

释惠安，未详何许人也。神龙中游于京兆，抑多先见。时唐休规既立边功，贵盛无

比。安往造焉，曰：“相公，甚美必有甚恶。将有大祸，且不远数月，然可攘去。”休规素知安能厌胜，诺而拜之。安曰：“更无他术，但奉一计耳。岂非注拟官品，出乎陶冶中？请选一有才干者用为曹州。”因得张君，本京官，即日升之宫赞，相次作守定陶，委之求二犬，可高数尺而神俊者。张君到任，锐意精求，得二犬如其所求以献之。休规大悦，召安视之，曰：“极善。”后旬余，安却来曰：“事在今夕，愿相君严为警备。”遂留安宿。是夜休规坐于堂之前轩，命左右十数辈执弧操矢，立于榻之隅。休规与安共处一榻，至夜分。安笑之曰：“相君之祸免矣。可以就寝。”休规喜而谢之，遂撤左右俱寝。迨晓，安呼休规可起矣。问安曰：“二犬何所用乎？”遂寻其迹，至园中，见一人仆地而卒。视其颈有血焉，盖为物所噬者。又见二犬在大木下，仰视之，一人袒而匿身。休规惊且诘之，其人泣而指死者曰：“某与彼俱贼也，昨夕偕来，欲害相国，盖遇此二犬环而且吠。彼为所噬，既殒。某藏匿无地，天网所罗，为犬蹲守，今甘万死。”且命缚之，曰：“此罪固当死，然非某心也，乃受制于人耳。”乃释之，贼拜泣而去。休规拜谢安曰：“非吾师，不然死于二夫之手矣。”安曰：“此相国之福，岂所能为哉？”又休规表弟卢軫在荆门，有术士告之曰：“君将有灾，当求善禳厌者，或能免矣。”軫知安奇术清行，为时所重，致书于休规。安即与一书曰：“事在其中耳。”及书达江陵而軫已卒，其家开其书，徒一幅空纸焉，殊无一字。休规益重之。后数年遁去，罔知所之。

○唐西域安静传（徐果师）

释安静，本西域人也。开元十五年振锡东游，至定陶，直问“丁居士何在？”乡人报之曰：“终已三载，葬在郊外。”且曰：“是人也乃在家菩萨，专勤梵行，尝礼事嵩山普寂禅师，云已得甚深法。将终，合掌加趺而坐，俨然而绝。曹城诸寺院钟磬不击自鸣也。”静至坟所，躬自发之，时五色云气腾喷而上，遂取其骨，皆金色连环共锁，可五丈许，铿然响亮，擐杖头而行。别树塔重葬，众咸惊叹。少顷，静瞥然灭没焉。

系曰：有情遗骸，引因残果也。凡夫身中节不相至，十地菩萨骨节解盘龙相结。佛则全身舍利焉。今丁居士骨有钩锁形，则超凡夫，未阶十住，此乃八臂那罗延身骨节头相钩是欤？证居士力量及此矣。譬若出金之砂之谓浑，不可谓为砂也。含玉之石之谓璞，不可谓为石也矣。

次又成都府大云寺有徐果师者，混物韬光，人罕详测。或入三昧，不失律仪。或示狂痴，语事多中。先为卫光嵩是难测之士，坤维间往往有人谓之徐果师。徐，姓也；果，名也；师，通称也。此亦强练志公之伦类矣，不知其终云。

○唐福州钟山如一传

释如一，不知何许人也。开元末为僧，典床座。俄有僧遍身疮疥，衣服褴褛，巡绕寺中。僧众睹之，无不厌恶。唯一见而悯焉，延入常住别堂，安置度夏。夏末辞去，一问：“去何所？”答曰：“归庵中。”又问：“庵在何也？”“只在大乘寺东。”一曰：“某日前方自彼来，勿见庵处。”曰：“不信，但来相访。”“某两日后专来。”一遂往，果见前僧在岩口相猴，因携手入一精舍，楼阁森耸，殿堂交错，且非人间景物。三日遣一公下山，回首见悉是岩石，方知圣寺耳。一由是倍力修进，愿预圣流云。

○唐西域亡名传

释天竺亡名，未详何印度人也。其貌恶陋，缠乾陀色缦条衣，穿革屣，曳铁锡，化行于京辇。当韦南康皋之生也，才三日，其家召僧斋，此僧不速自来。其日僧必历寺连名请至，韦氏家僮患其长一人，甚怒之，以弊席坐于庭中。既而斋毕，韦氏令乳母负婴儿出，意请众僧祝愿焉。梵僧先从座起，摄衣升阶，视之曰：“别久无恙乎？”婴儿若有喜色相认之意。众皆异之。韦君曰：“此子才生三日，吾师何言别久也？”梵僧曰：“此非檀越所知也。”韦君固问之，梵僧曰：“此子乃诸葛亮之后身耳。武侯鼎国时为蜀丞相，君所知也。缘蜀人受其赐且久，今降生于世，将为蜀帅，必福坤维之人。吾往在剑门，与此子为善友，既知其生于君门，吾不远而来。此子作剑南节度二十年，官极贵，中书令、太尉。此外非我所知也。”父然之，因以武子为字，又单字武也。张镒出为凤翔陇州节度，奏皋权知陇州。及镒为李楚琳所杀，牛勣请皋为帅。朱？不得已用皋为凤翔帅。德宗置奉义军节以旌之，续加礼部尚书。兴元中，驾还京，征为左金吾卫将军。贞元元年，为成都尹，代张延赏。到任和南蛮并战功，封南康郡王。顺宗即位，进太尉。南康在任二十一年，末涂甚崇释氏，恒持数珠诵佛名。所养鸚鵡，教令念经。及死，焚之，有舍利焉。皋又归心南宗禅道，学心法于净众寺神会禅师。在蜀，富贵僭差，重赋敛，时议非之，然合梵僧悬记焉。

○唐京兆抱玉传

释抱玉者，行业高奇，人事罕接。每言来事，如目击焉。见释子大光而诲之曰：“汝诵经宜高揭法音，彻诸天倾听，必得神人辅翼。”后皆符其记？。京邑归信千计。每夕独处一室，阖扉撤烛。尝有僧于门隙间窥其所以，见玉口中出庆云，华彩可爱。后年可九十许而终。终时方大暑，而尸无萎败。宰臣第五琦与玉相善，及终，临丧颇哀。琦以香乳灌其口，随有祥光自口而出，晃然四照。琦愈奇之。琦乾元二年十月贬忠州刺史。宝应初入为太子宾客，至京尹，玉皆预言荣贵车感相半，皆如其言，刻意归信焉。

○唐虢州阆乡阿足师传

释阿足师者，莫详出处。形质痴浊，精神瞢然，时有所言，靡不先觉。虽居无定所，多寓阆乡。以其踵法云公之尘躅，憧憧往来，争路礼谒，檀施山积，曾无顾瞻。人有隐忧，身婴所苦，获其指南者，其验神速。时陕州有富家翁张臻者，产业且多，财货增溢。少子息，臻恒惧钱帛身后无嗣。后产男，既愚且蠢，手足拳挛，语言謇涩，唯嗜饮食，殆与平人有异，口如溪壑，终日无厌。年可十七，父母钟爱，纵其须索，迎医求药，不远千里。数十年后家业罄穷，或有谓其臻曰：“阿足师其实宝志之流，何不敷布腹心，求救其疾？”乃夫妻来抵阆乡，

叩头？泪，告其拯拔。阿足瞑目久之，谓臻曰：“汝冤未散，尚须数年，悯汝勤拳，为汝除去。”即令撰日于河上致斋，广召众多，同观度脱。仍领引其男赴于道常时众知阿足奇异，观者如堵。少选，指呼壮夫三数辈叱曳其子，令投诸河，随急流而逝。臻且哀且惊，莫测其由。阿足语臻曰：“为汝除灾讫。”良久，其子忽于流数十步外耸身水面，戟手骂其父母曰：“与尔冤仇宿世缘业，赖逢圣者遽此解纷。傥或不然，未期毕日。”挺身高呼，辞理分明，都无痴浊之状。须臾沉水，不知其他。阿足由兹传播，归信之人如就市焉。所行化导皆此类矣，盖大历、建中中也。殆德宗贞元十二年丙子，

敕谥为大圆禅师至今陕虢之间，犹崇重焉。○唐天台山封干师传（木沔贡师寒山子拾得）

释封干师者，本居天台山国清寺也。剪发齐眉，布裘拥质，身量可七尺余。人或借问，止对曰“随时”二字而已，更无他语。乐独春谷，役同城旦，应副斋炊。尝乘虎直入松门，众僧惊惧，口唱《唱道歌》。时众方皆崇重，及终后，于先天年中在京兆行化，非恒人之常调，士庶见之，无不倾礼。以其蹶万回师之后，微亦相类，风狂之相过之，言则多中。先是国清寺僧厨中有二苦行曰寒山子，曰拾得，多于僧厨执爨，爨讫，二人晤语，潜听者多不体解。亦甚颠狂，纠合相亲，盖同类相求耳。时间丘胤（名化太祖庙讳生字代之）出收丹丘，将议巾车，苦头疼羌甚，医工寡效。邂逅干造，云：“某自天台来谒使君。”且告之患。干曰：“君何虑乎？”便索净器，吮水喷之，斯须觉体中颇佳。闾丘异之，乃请干一言定此行之吉凶。曰：“到任记谒文殊。”闾丘曰：“此菩萨何在？”曰：“国清寺厨执爨洗器者是。”及入山寺，问曰：“此寺曾有封干禅师？”曰：“有。”“院在何所？寒山、拾得复是何人？”时僧道翹对曰：“封干旧院即经藏后，今阒无人，止有虎豹时来此哮吼耳。寒拾二人见在僧厨执砾。”闾丘入干房，唯见虎迹纵横。又问：“干在此有何行业？”曰：“唯事春谷，供僧粥食，夜则唱歌讽诵不辍”如是再三叹嗟。乃入厨。见二人烧柴木，有围炉之状。闾丘拜之，二人连声咄吒，后执闾丘手褰之若婴孺，呵呵不已。行曰：“封干饶舌。”自此二人相携手出松门，更不复入寺焉。干又尝入五台巡礼，逢一老翁，问曰：“莫是文殊否？”翁曰：“岂可有二文殊？”干礼之未起，恍然失之。

次有木沔贡师者，多游京邑市廛间，亦类封干，人莫轻测。封丰二字，出没不同。韦述吏官作封疆之封，闾丘序三贤作丰稔之丰，未知孰是。

寒山子者，世谓为贫子风狂之士，弗可怕度推之。隐天台始丰县西七十里，号为寒暗二岩，每于寒岩幽窟中居之，以为定止。时来国清寺。有拾得者，寺僧令知食堂，恒时收拾众僧残食菜滓，断巨竹为筒，投藏于内。若寒山子来，即负而去。或廊下徐行，或时叫噪凌人，或望空曼骂。寺僧不而可，以杖逼逐，翻身抚掌，呵呵徐退。然其布襦零落，面貌枯瘁，以桦皮为冠，曳大木屐。或发辞气，宛有所归，归于佛理。初闾丘入寺，访问寒山，沙门道翘对曰：“此人狂病，本居寒岩间，好吟词偈，言语不常，或成或否，终不可知。与寺行者拾得以为交友，相聚言说，不可详悉。”寺僧见太守拜之，惊曰：“大官何礼风狂夫耶？”二人连臂笑傲出寺，闾丘复往寒岩谒问，并送衣裳药物，而高声倡言曰：“贼我贼。”退便身缩入岩石穴缝中，复曰：“报汝诸人，各各努力。”其石穴缝泯然而合，杳无踪迹。乃令僧道翘寻其遗物，唯于林间缀叶书词颂并村墅人家屋壁所抄录，得三百余首，今编成一集，人多讽诵。后曹山寂禅师注解，谓之《对寒山子诗》，以其本无氏族，越民唯呼为寒山子。至有“庭际何所有，白云抱幽石”句，历然雅体。今岩下有石，亭亭而立，号幽石焉。

拾得者，封干禅师先是偶山行至赤城道侧，仍闻儿啼，遂寻之。见一子可数岁已来，初谓牧牛之竖。委问端倪，云无舍，孤弃于此。封干携至国清寺，付与典座僧。或人来认，必可还之。后沙门灵熠摄受之，令知食堂香灯。忽于一日，见其登座，与像对？而跏。复呼桥陈如曰“小果声闻”。傍若无人，执箸大笑，僧乃驱之。灵熠咨尊宿等，罢其堂任，且令厨内涤器，洗濯才毕，澄滤食滓，以筒盛之。寒山来，必负而去。又护伽蓝神庙，每日僧厨下食，为乌鸟所取狼籍。拾得以杖扑土偶三二下，骂曰：“汝食不能护，安护伽蓝乎？”是夕神附梦与阖寺僧曰：“拾得打我。”明日诸僧说梦符同，一寺纷然，始知非常人也。时牒申州县，郡符下云：“贤士隐遁，菩萨应身，宜用旌之。”号拾得为贤士。又于寺庄牧牛，歌咏呼天。当其寺僧布萨时，拾得驱牛至僧集堂前，倚门抚掌大笑曰：“悠悠者聚头。”时持律首座咄曰：“风人，何以喧碍说戒？”拾得曰：“我不放牛也，此群牛者多是此寺知僧事人也。拾得各呼亡僧法号，牛各应声而过，举众错愕，咸思改往修来，感菩萨垂迹度脱。时道翘纂录寒山文句于寺土地神庙壁，见拾得偈词，附《寒山集》中。

系曰：按封干先天中游遨京室，知闾丘、寒山、拾得俱睿宗朝人也。奈何宣师《高僧传》中。闾丘，武臣也，是唐初人。闾丘《序》记三人，不言年代，使人闷焉。复赐绯，乃文资也。夫如是，乃有二同姓名闾丘也。又大洸祐公于宪宗朝遇寒山子，指其泐潭，仍逢拾得于国清，知三人是唐季叶时犹存。夫封干也，天台没而京兆出；寒拾也，先天在而元和逢。为年寿弥长耶？为隐显不恒耶？《易象》有之，“小狐汔济”，其此之谓乎！

○唐成都净众寺无相传（智诜禅师）

释无相，本新罗国人也，是彼土王第三子，于本国正朔年月生，于郡南寺落发登戒。以开元十六年泛东溟至于中国，到京。玄宗召见，隶于禅定寺。后入蜀资中，谒智诜禅师。有处寂者，异人也，则天曾召入宫赐磨纳九条衣，事必悬知，且无差跌。相未至之前，寂曰：“外来之宾，明当见矣。汝曹宜洒扫以待。”间一日果至，寂公与号曰无相。中夜授与摩纳衣，如是入深溪谷岩下坐禅，有黑犍二，交角盘礴于座下，近身甚急，毛手入其袖，其冷如冰，扪摸至腹，相殊不倾动。每入定，多是五日为度。忽雪深，有二猛兽来，相自洗拭，裸卧其前，愿以身施其食。二兽从头至足，嗅匝而去。往往夜间坐床下，捫虎须毛。既而山居稍久，衣破发长，猎者疑是异兽，将射之，复止。后来入城市，昼在冢间，夜坐树下。真行杜多之行也。人渐见重，为构精舍于乱墓前。长史章仇兼琼来礼谒之。属明皇违难入蜀，迎相入内殿。供礼之时，成都县令杨翌疑其妖惑，乃帖追至，命徒二十余人曳之。徒近相身，一皆战栗，心神俱失。顷之大风卒起，沙石飞飏，直入厅事，飘帘卷幕。杨翌叩头拜伏，喘而不敢语。忤毕风止，奉送旧所。由是遂劝檀越造净众、大慈、菩提、宁国等寺，外邑兰若钟塔，不可悉数。先居净众本院，后号松溪是坎。相至成都也，忽有一力士称舍力伐柴，供僧厨用。相之弟本国新为王矣，惧其却回，其位危殆，将遣刺客来屠之，相已冥知矣。忽日供柴贤者来，谓之曰：“今夜有客。”曰：“灼然，”又曰：“莫伤佛子。”至夜，薪者持刀挟席坐禅座之侧，逡巡觉壁上似有物下，遂跃起，以刀一挥，巨胡身首兮于地矣。后门素有巨坑，乃曳去瘞之，复以土拌灭其迹而去。质明，相令召伐柴者谢之，已不见矣。尝指其浮图前柏曰：“此树与塔齐，寺当毁矣。”至会昌废毁，树正与塔等。又言寺前二小池，左羹右饭，斋施时少，则令淘浚之，果来供设。其神异多此类也。以至德元年建午月十九日无疾示灭，春秋七十七。临终，或问之曰：“何人可继住持乎？”乃索笔书百数字，皆隐不可知，谐而叶韵。记？八九十年，事验无差失。先是武宗废教，成都止留大慈一寺，净众例从除毁。其寺巨钟乃移入大慈矣。洎乎宣宗中兴释氏，其钟却还净众，以其钟大隔江，计功两日方到。明日方欲为斋，辰去迎取，巳时已至，推挽之势直若飞焉。咸怪神速，非人力之所致也。原其相之舍利分塑真形，尔日面皆流汗，上足李僧以巾旋拭，有染指者，其汗颇咸，乃知相之神力自曳钟也。变异如此，一何伟哉！后号东海大师塔焉。乾元三年，资州刺史韩禪撰碑，至开成中李商隐作《梓州四证堂碑》，推相为一证也。

○唐扬州西灵塔寺怀信传

释怀信者，居处广陵，别无奇迹。会昌三年癸亥岁，武宗为赵归真排毁释门，将欲堙灭教法。有淮南词客刘隐之薄游四明，旅泊之霄，梦中如泛海焉。回顾见塔一所，东度见是淮南西灵寺塔。其塔峻峙，制度校胡太后永宁塔少兮耳。其塔第三层，见信凭栏与隐之交谈，且曰：“送塔过东海，旬日而还。”数日，隐之归扬州，即往谒信。信曰：“记得海上相见时否？”隐之了然省悟。后数日，天火焚塔俱尽，

白雨倾澍，傍有草堂，一无所损。由是观之，东海人见永宁塔不谬矣。

系曰：塔焚皆云往东海，海岂纳煨烬耶？通曰：“五行为物亦七大性，可弗周遍法界乎？顺则相生，逆则相害。虽逆顺各时，与法界同其分齐，证知唯有识耳。且天仙鬼物与人相反，殊胜诸天则定果宫殿，神仙则附物变化，鬼神则歆其食气，质碍之流，火化则得受用也。凡塔刹严丽，多被鬼神取施。海若川侯，亦非人也，如陈重云殿天火焚，东海人时见殿影焉。又近马氏霸湖南，末年天册阁为天火焚，朗州守此夜闻空中呵喝言‘回避，天册阁来也’。云中腾沸，若千万人升荷重物然，累日，方潭州火矣。若怀信见刘隐之梦，信亦不可测之僧也。”

○唐陕府辛七师传

释辛七师者，不显出家之号，时姓氏行次呼之，既熟人耳，更无别召体焉，实陕人也。始为儿时，甚闻谨肃，不尝狎弄，少即老成。其父为陕郡守，观七师之作为，谓其母曰：“是子非常儿孺，善宜护养之。”年甫十岁，迺知佛法可以宗尚，凡经卷冥然兮其此华此梵，都不缘师教。及钟荼蓼，陟之痛愈深，虽亲属劝勉，益加柴毁。先是郡城南有瓦窑七所，一日哀号之际，发狂遁去，其家僮辈蹊迹寻之。见其入窑灶中端坐，身有奇光，灿若金色。家僮惊，就问无言，惧而徒步。次窥一窑，复见七师，同前相状。如是历遍七窑，一一见其端坐发光。是以陕服之人重之若神，遇之罗拜焉。

○唐京师大安国寺和和传

释和和者，莫详氏族本生。其为僧也狂而不乱，愚而有知，罔测其由。发言多中，时号为圣。安国寺中居住，出入无拘检。见本寺修营殿阁未就，有越国公主降荣阳郑万钧虽琴瑟相谐，而数年无子。和因至公主家，钧焚香洒扫以待之。主拜跪归向，钧祈告之曰：“某自叨选尚，愿得一子为嗣，唯师能致之乎？”和曰：“易耳。但遗我三千匹绢，主当诞二男。”钧勤重如听佛语，出绢如所求施之。和取付修寺殿阁功德主。乃曰：“主有娠矣，吾令二天人下为公主作儿。所忧者公主不能并妊二子乎？为孪乳包羞耳。吾俾其同年而前后诞之。”果如其言，岁初年末，各生之矣。长曰潜耀，次曰晦明，皆美丈夫，后博涉成事焉。京邑之间传杨沸渭，量其位地，不可轻议哉。

○唐扬州孝感寺广陵大师传

释广陵大师者，维杨人也，不言法名，淮海之间，竟呼广陵大师也。形质寝陋，性多杰黠，真率之状，与屠沽辈相类，止沙门形异耳。好嗜酒啖肉，常衣总袈，厚重可知，盛暑亦不脱，蚤虱聚其上。侨寓孝感寺，独一室，每夕阖扉而寝，率以为常。或狂悖性发，则屠犬彘，日聚恶少斗驱，或醉卧道傍，杨民以是恶之。贞元中，

有一少壮素以力闻，尝一日少壮与人赌博，大师大怒，以手击碎博局。少壮笑曰：“呆儿何敢进壮士耶？”大师且骂而唾其面，于是索少壮斗击，观者围匝千数。少壮为大师所困，进道而逃。自此人方知有神力焉。亦于稠人广众中自负其力，往往入闾阖盼剽夺人钱帛，市人皆畏其勇而莫敢拒。后有一耆年僧，召大师诫敕之曰：“汝胡不谨守戒法，奈何食酒肉，屠犬豕，强抄市人钱物，又与无赖子弟斗竞，不律仪甚，岂是僧人本事耶？一旦众所不容，执见官吏，按法治之，何处逃隐？且深累佛法。”大师怒色对之曰：“蝇蚋徒喋臙腥，尔安知鸿鹄之志乎？然则我道非尔所知也。且我清中混外者，岂同尔齷齪无大度乎？”耆年且不能屈。后一日自外来归，入室闭户，有于门隙覘之。见大师坐席放神光，自眉间晃朗，照物洞然。观者惊报，少顷寺僧奔至，瞻礼称叹，或有忏悔曾谤之者，或有弹指赞咏之者。明日群僧伺候大师出，焚香致礼。及开户，瞑目如入禅定，已长往矣。自此广陵人写貌供养，号之为大师焉。

○唐南岳山明瓚传

释明瓚者，未知氏族生缘。初游方诣嵩山，普寂盛行禅法，瓚往从焉。然则默证寂之心契，人罕推重。寻于衡岳闲居，众僧营作，我则晏如，纵被诋诃，殊无愧耻，时目之懒瓚也。一说伊僧差越等夷，或随众斋跏，或以瓦釜煮土而食，云是弥陀佛应身，未知何证验之？一云好食僧之残食，故残也（残上声呼）。或随逐之，则时出言语，皆契佛理，事迹难知。天宝初，至南岳寺执役，昼专一寺之上，夜止群牛之下，曾无倦也。如是经二十年。相国邺公李泌避崔李之害，隐南岳而潜察瓚所为，曰：“非常人也。”听其中宵梵呗，响彻山谷。李公情颇知音，能辩休戚，谓瓚曰：“经音凄怆而后喜悦，必谪堕之人时将去矣。”候中夜，李公潜往谒焉，望席门自赞而拜。瓚大诟，仰空而唾曰：“是将贼我。”李愈加郑重，唯拜而已。瓚正发牛粪火，出芋啖之，良久乃曰：“可以席地。”取所啖芋之半以授焉。李跪捧尽食而谢。谓李公曰：“慎勿多言，领取十年宰相。”李拜而退。居一月，刺史祭岳，修道路极严。忽中夜风雷，而一峰颓下，其缘山蹬道为大石所拦，乃以数牛縻绊而挽之，又以数百人鼓噪以推之，物力竭而石愈固，更无他术。瓚曰：“奚用如许繁为？我始去之。”众皆大笑，瓚遂履石而动，忽转盘而下，声若震雷。山路既开，众僧礼而踊跃，一郡呼为至圣，太守奉如神明。瓚悄然乃怀去意。寺外虎豹忽尔成群，日有杀伤，无由禁止。瓚曰：“授我一小华，为尔驱除。”众曰：“大石犹可推，虎豹当易制。”遂与之荆挺，皆蹶后以观之。出门见一虎衔之而去。瓚既去矣，虎亦绝踪矣。李邺公于天宝末，肃宗北巡，至灵武即位，遣使访召。会泌自嵩颖奔赴行在所。帝喜用之，俾掌枢务，权逾宰相，判广平王府司马事。肃宗曰：“卿为朕师友。今父子三人资卿道义。”寻为崔圆、李辅国害其能，泌惧，乞游衡岳，诏许之。绝粒数年，遂见瓚焉。后终居相位，一如瓚之悬记矣。敕谥大明禅师，塔存岳中云。

○唐简州慈云寺待驾传（怀一）

释待驾，？姓王氏，金水县人也。冲孺出家，作为诡异，其父立名侍驾，当天宝末也。练行精进，时号头？。及玄宗巡幸，果自诣府剃{髡采}为僧，至是“待驾得度”，其言信矣。驾去县邑二十里，开径芟茅，独居山顶，后成一寺。此山绝多灵迹，初名石城，迨明皇至剑门，山神见形迎驾，称姓李氏，敕赐与玄孙之称。后陟武担东台，远望祥云紫气，盘结空界，问左右曰：“此何处？”对曰：“名城山。”乃悟山神扈卫之意，遂改云顶为慈云寺也。驾后卒于此寺。又福州楞伽寺释怀一，景龙中锐意于爱同寺东造精舍，相度地形，无水济用，方拱手而去。忽山禽击斗于地，一异之，命工冗深尺余，甘泉沸涌。此后伏腊而无加耗。寺中每有休咎，必暂减耗，候以知之，风俗谓之灵泉焉。以永泰二年归寂，弟子超悟奏乞代宗题寺额。上首曰智恒，次行。越州刺史皇甫政为碑纪德，襄州节度使于谏书焉。

○唐福州爱同寺怀道传（智恒）

释怀道，迈德高情，慈忍济物，思乎达法，恒尔游方。凡遇通人，卑礼求益。及还乡之日，礼佛勤劬，收举坐具，获珠一颗，后置于文殊塑像额心安之。其珠圆莹，且异蚌胎。又冥然降舍利骨，寻兮于南涧塔中。洎至德二年，令弟子僧常持《法华经》，不舍昼夜。俄有白

莢袈裟一领降于塔中，不知其来。此盖道修练之心感于冥理也。后滑台守李邕著碑文并书。相次智恒继居法华院，即怀一弟子也。道行与师相埒。卒后礼部侍郎刘太真作碑颂，褚长文书。次有超悟、行弼，皆名望相齐，化于闽俗，无不重焉。

○唐漳州庄严寺惠忠传（圆寂）

释惠忠，俗姓王，润州上元人也。初在母孕，忽遇异僧，谓曰：“所生贵子，当为天人矣。”诞育已来，不食荤腥，有异常童。禀性敦厚。年二十三，以经业见度，即神龙元年也。遂配庄严寺，志节高简，为时辈所推。闻牛头山威禅师袭达磨踪，得佛法印，遂造山礼谒。威见忠，乃曰：“山主来矣。”因为说法，顿悟上乘。威既得人，如老氏之逢尹喜，乃命入室付法传灯，并委山门之事，遂出麀聚。忠即继踵兹峰，夙夜精励。常头陀山泽，饮泉藉草，一食延时，每用一铛，众味同煮。用毕悬于树杪。方复绳床晏坐，终日如杌，衣不易时，寒暑一纳，积四十年，遂彰灵应非一。州牧明贤，频诣山礼谒，再请至郡，施化道俗。天宝初年始出止庄严。忠以为梁朝旧寺，庄严最盛，今已岁古凋残，兴怀修葺。遂于殿东拟创法堂，先有古木，鹊巢其顶，工人将欲伐之。忠曰：“且止，待鹊移去，始当伐之。”因至树祝曰：“此地造堂，当速移去。”言毕，其鹊竞衔柴迁寓他树。合郭道俗观者如堵，莫不叹异。又立基未定，忽有二神人为上其处，因乃定焉。虽汲引无废，神旷不挠，四方之侣，相依日至。以大历三年山门石室前有忠挂衣藤，是岁盛夏忽然砧悴。灵芝仙菌，且不复生。至九月，忠演法高座，无故水出绕座而转。至四年六月十五日，集众布萨，至晚乃命侍者剃发浴躯。是夜瑞云覆刹，天乐闻空，十六朝怡然坐

化。时风雨震荡，树木摧折，和州延祚寺僧徒其夕咸见白虹直东西，贯于山中，鸟兽哀鸣，林壑岩间哭声数日方止。岳牧韦公损闻而哀愴，遣使赠赙，并令上元令刘君备威仪送归山。于时炎蒸，至七月七，天降两绝凉。八日神枢出，纤尘不飞。又有群鹤徘徊举上，送至山门。瘞后数日，坟内放光，照于山林。五年春，依外国法荼毗，获舍利不可胜计，圆细如珠，光彩莹彻。远近道俗有恨无所克获，咸于焚身处煨火尽中至求，凡百千人，皆得舍利。故知法身圆应，感物无穷，圣力潜通，光腾千古。门人起木塔。春秋八十七矣。身逾七尺，霜眉径寸，仪容殊伟，燕颌龙腮，神气孤拔，色如金聚，含光玉润，若梵僧。所居帐帟弗张，蚊蚋不犯。曾居兰若幽栖，松竹深邃，尝有虎鹿并各产子，驯绕人室，曾无惧色。开元二十七年，上元令长孙遂初脱略异闻，躬造山询验。及到山半，猛虎当路纒吼，遂乃惊怖，莫知所为。忠闻出林晓喻，虎因寝声，伏于林中。遂恐慑，合掌礼谢而回。忠又向吴郡，具戒院中有凌霄藤，盛夏萎悴，人拟伐之。威大师曰：“勿剪。惠忠还日，其藤更生。”人不之信，及秋，忠还，其藤重茂矣。又昔有供僧谷仓在庄，夜有强盗来窃之，虎乃吼唤逐之。盗弃负器而逃。其类夥多，良难骤述。忠著《见性序》及《行路难》，精旨妙密，盛行于世。又邺中释圆寂，氏族生地俱不可寻。初从嵩山见老安禅师，道契相符，莫测涯岸。以高宗咸亨二年生，计终岁已一百有奇年矣。襄州节度使严绶，倾心供养，亦号无生和尚焉。

○唐洛京天宫寺惠秀传

释惠秀，俗姓李氏，今东京陈留人也。出离尘垢，慕尚逍遥。初以戒律饰躬，后以禅定为务。于荆郢之地，参问祖师，既了安然，回依洛邑天宫寺也。属则天频幸神都，而秀道声闻于后听，屡诏入礼重，其于悬记未然事，合同符契。长安中往资圣寺，唱道化人，翕然归向。忽诫禅院弟子，令灭灯烛。有白秀曰：“长明灯可留。”亦令灭之。因说火灾难测，不可不备，云：“尝有寺家，不备火烛，佛殿被焚。又有一寺，钟楼遭？。又有一寺，经藏煨烬，殊可痛惜。”时众不喻其旨。至夜遗火佛殿，钟楼经藏三所悉成灰炭。方知秀预知垂警。又玄宗在潞邸时，曾与诸王俱诣问法，从容留施一笛。玄宗出去，秀召弟子曰：“谨掌此笛，后有要时，当献上也。”及受睿宗传禅，弟子达摩等方悟其言，取笛以进。帝悦先知，回赐丰厚。秀偶示微疾，告诫门人，奄然归寂。享年一百岁。燕国公张说素所归心，送瘞龙门山，道俗数千人奔会悲悼焉。

○唐成都郫县法定寺惟忠传

释惟忠，少孺为僧，励精自行，在乎群等，莫不宗焉。出家法定寺，本是后汉永平中佛法始流中国便有，置德净伽蓝，神光屡现。至宋释惠持自庐阜辞远公法兄，誓化岷蜀。属譙纵不道，令数辈操刃欲屠持。持乃弹指，其众惊奔僵仆。隋开皇四年改名法定焉。寺有弥勒圣像。唐武德中忽有枯查沿江而至，夜发光明，因雕作像首。贞观中窦轨为长史剑门，佛首光见引达于府。窦公令人迎取，数百人亦不能胜。

乃令祝之，任欲何往，遂言：“可就法定否？”乃一人能举。寔遂造佛身，长史高士廉盖殿以安之。后有僧泛爱树其浮图，而获一巨蟹，身足二尺余。是塔颇多灵异，人或将酒肉乘醉诣圣佛前，立见灾祸矣。忠于天宝中于寺，愈加精苦。无何，塔为霆震，拔其塔心柱出外，忽有小木承代之意，众咸怪之，罔测厥由。忠乃叩蝼于圣弥勒像，告诉天龙合加畏重，何辄震击，夺塔心柱邪？是知庶女叫而雷击景公台，诚有所感。一日迅雷烈风，还同前震。覆睹之，乃龙神送旧柱，安置如故。当其易柱，阴云四合，有四神人以身扶翼，立与塔齐。忠之感物也若此。会昌坼寺之前，舍利七粒出相轮上，白光满空，向西飞去蜀，皆所目睹。将倒之时，赤光见干半天焉。又此寺有大枣树，将毁寺之年，其树枯瘁。及大中再置，其枣重荣也。忠后终于寺。

系曰：教法兴替，得非数乎？数算已定，晷刻弗移。如其会昌之前，舍利预飞，枣树先瘁，是知当替数之强，兴数必弱，兴不胜其替矣。大中之兴，替不胜其兴矣。若不为四相之迁，非系兴替之数也。教法是有为之法，讵免迁流者乎，吁！

卷二十六

◎兴福篇第九之一（正传十四人附见二人）○周京师法成传

释法成，本姓王，名守慎，官至监察御史。属天后猜贰，信酷吏罗织，乃避法官，乞出家为僧。苦节勤于化导，声发响随，行高质直。长安中，于京兆西市疏凿大坎，号曰海池焉，支分永安渠以注之，以为放生之所。池上佛屋经楼，皆成所造。穿池之际，获古石，铭云“百年为市，而后为池”。自隋朝置都立市，至于时正一百年矣。仪凤二年，望气者云：“此坊有异气。”敕掘之，得石函，函内贮佛舍利万余粒，光色粲烂而坚刚。敕于此处造光宅寺，仍散舍利于京寺及诸州府各四十九粒。武后于此始置七宝台，遂改寺额，成公居之。行其激劝，多以崇福为己任焉。

○唐五台山昭果寺业方传

释业方者，即解脱禅师之法孙也。身長七尺五寸，古貌轩昂，垂手过膝，眉长数寸，目有重瞳。人望凜然，礼诵无倦，绍脱高躅，动合无形，不舍利物，而再修梵宫。时太原府有士女造立文殊像一躯，将送入山，到池河侧，洪波泛涨。方乃隔岸焚香启告，河为流减，过文殊毕，水还弥溢。后终，建塔在寺西北一里，肉身见存，而多神异焉。

○唐上都青龙寺光仪传

释光仪，姓李氏，本唐宗室也。父琅王耶王与越王起兵欲复本朝，中兴帝道，不克，天后族诛之，而无噍类。仪方在襁褓中，乳母负之而逃。后数年，则天窃闻琅琊有子在民间，购之逾急。乳母将至扶风界中，鬻女工以自给。仪年八岁，状貌不群，神悟超拔。乳母疑遭貌取而败，且极忧疑。乃造布襦，置钱于腰腹间，于桑林之下，告之令去。“敕搜不慢，吾虑俱死，无益于事。汝聪颖，必可自立。或一旦富贵，无忘老姥。”言讫对泣。仪恻不自胜，乳母从此而逝矣。仪茫然行至逆旅，与群儿戏。有郡守夫人往夫所住处，方息，俱此见仪群聚，且貌俊爽，因而怜之。召谓之曰：“郎君家何在，而独行至此？”仪给之曰：“庄邻于此，有时闲戏耳。”夫人食之，又给之钱，乃解衣而内其钱。日暮寻径而去，拟投村墅。遇一老僧，呼曰：“尔小子，汝今一身，家已破灭，将奚所适？”仪惊愕伫立，老僧又曰：“出家闲旷，且无忧畏，小子欲之乎？”仪曰：“素所愿也。”老僧因携其手至大树阴，令礼十方佛，归依常住佛法僧已，因削其{髻采}。又出袈裟以披服之，小大称其体。其执持收掩，犹如几夏比丘。老僧喜曰：“此习性使然，善持僧行。”遂指东北曰：“去此数里有伽蓝，汝直诣彼，谒寺主云，我使汝为其弟子也。”言毕，老僧錫然亡矣，方知圣僧也。仪如言趣彼，寺主骇其言，因留之，经十年许，仪已洞明经律，善其禅观。而属中宗即位，唐室复兴，敕求琅王耶王后，仪方向寺僧言之。时众大骇，因出诣扶风李使君，即仪之诸父也。见之悲喜，乃舍之于家，方以状

闻，固请不可。使君有女，年齿相侔，一见仪而心悦，愿致情曲。仪恐慑而避焉。他日会使君夫人出其女，靓妆丽服，从者越多，来而逼之。仪固拒百端，终不屑就，给之曰：“身不洁，请沐浴待命。”女许诺，方令具汤沐，女出，因闭关。女还排户，既不得入，自牖窥之，方持削发刀，顾而言曰：“有于此根，故为欲逼，今若除此，何逼之为？”女惧止之，不可，遂断其势，投之于地。仪亦闷绝，户既不开。俄而使君、夫人俱到，女实情具告，遂破户视之，渐苏。命医工舁归蚕室，以火烧地，苦酒沃之，坐之于上，以膏传之。月余疮愈。使君奏仪是琅簫王子。有敕命驿置至京，引见慰问，优赉丰洽，诏袭父爵。仪恳让，誓愿为僧，确乎不拔。中宗敕令领徒，任置兰若，自恣化方。仪性好终南山，因居法兴寺。于诸谷口造庵寮兰若，凡数十处，率由道声驰远，谈说动人。或山行十里间，缁素侍者常数千百人，迎候瞻待，甚于权要卿相焉。仪恒居寂定，或言将来事，以决吉凶，必无差忒，人益归之。开元二十三年六月二十三日，先嘱累弟子：“当谨护身口，勿事喧哗。祖师意无别事，静则真法现前。此外提唱，皆不获已。”言极激切。因北首而卧枕肱，右胁著席而亡，此大涅槃之表兆也。遗言令葬于少陵原南，乃凿原成室而封之。柩之发也，异香芬馥，状貌如生。祖车出城，白鹤数百鸣唳空中，彩云依约，覆车数十里。道俗号篋，多持孝服。所葬之地，遂建天宝寺，弟子皆留而守之。

○唐镇州大悲寺自觉传

释自觉，博陵望都人也。稚齿厌于俗态，俄白亲老言：“儿乐从佛求度世去。”二亲惊愕，咄咤俾去，然无惭怍。再拜请命，乃强礼本部开元寺知钦。钦观其志气弗群，立字曰自觉。训之曰：“汝闻名思义。”答曰：“佛种从缘起，唯听明诲矣。”既而诵经及格蒙度。至德二年年满，镇州受具足法。即往灵寿县禅法寺习律经论，勤瘁九年，皆造微也。便言“当入太行山，于一磐石上结茅庵三亩，小？为兰若，不亦快乎”。大历元年九月晦，往平山县界，得重林山院，果应所求，遁迹自娱。至二年五月，天其旱赞，觉则跣足经行，冬则右肩偏袒。其林薄山谷，虎狼狃迹重复。唯拾果采蔬，卯时一食。时恒阳节度使张君患炎旱，闻觉精苦，躬入山请其祈雨。张语之曰：“某无政术，致累百姓三年亢阳，借苦引咎自责，良无补矣。或云龙王多依师听法，忘其施雨。愿师垂救旱之誓，有如白水。如念苍生，请辍禅定，略入军府。”觉乃虔恪启告龙神，未移晷刻，天辄大雨，二辰告足。张帅归向勤重，若孝子之事父母焉。觉始入法已来，学诸佛因中誓愿，其数亦四十九也。其一愿身长随大悲菩萨，次愿造铸大悲像寺。及乎发言响应，檀施臻萃，用赤金鼓铸成，举高四十九尺，梵相端严，眼臂全具。迨更年稔，寺亦随成，今城西山大寺是欤。遂于坛前诵念至三更，见神光二道作中金色，于晃朗中见弥陀佛、观音、势至左右翼从，佛垂金臂呼自觉声，渐下云来，摩其顶曰：“守愿勿悛，无宜懈怠，利物为先。汝去吾随，任从汝意。”言毕云收，香无泉迹。觉以愿心酬毕，返山林之间，择送终之处。贞元十一年二月望夜，有神人现半身，若毗沙门状，谓曰：“师今岁灭度矣。”举手谢神人曰：“往来定分，吾闻命矣。”其年六月十四日，奄归寂灭。门人欲奉神龛归山寺，州府人苦留，终于大悲寺南迁塔焉。则十三年四月八日

也。其大悲为恒阳奇事，感应潜通，至周显德初，敕铸九府圆法，天下铜像，一例除毁。时州人相率出钱赎此像，不允，登即炉橐熔冶。真定之人莫不悲悼，时炭炽飞烟，无之，从顶至胸，旋收铜汁，斯须计料，匠氏暴卒，自此罢工。迨宋太祖神德皇帝追铸令全，代忤前事焉。

○唐今东京相国寺慧云传

释慧云，姓姚氏，湖湘人也。性识精明，气貌疏朗。高宗麟德元年，正十岁矣，邈然有出尘之志。二亲多厌沮之，其心匪席，不可卷也。父哀其所愿，从往南岳初祖禅师稟承慈训，而能黠慧，好味经教，沈默如也。至于弱冠，于岳寺受具足法。自专护戒，且善毗尼，寻罢讲科，专营福事。发言响答，化俗风从。立事绝私，士庶钦揖。乃出重湖而游荆郢，江南振锡，浙汭携囊，务在劝人令舍慳玻随处盖造，缉修寺宇二十余所，皆功成不宰。天后久视元年，江北行化，因缘未会。长安元年，来观梁苑，夜宿繁台，企望随河北岸，有异气属天。质明，入城寻睹，乃歙州司马宅。西北园中池沼，云徙步临岸，见澜漪中有天宫影，参差楼阁，合沓珠璎，门牖彩绘，而九重仪像逶迤而千状，直谓兜率之宫院矣。云睹兹异事，喜贯心膺，吾闻《智严经》说，琉璃地上现宫殿之影，此不思议之境界也。今决拟建梵宫，答其征瑞。乃挂锡于安业寺。神龙二年丙午，往濮州属县报成寺，发愿为国摹写弥勒像，举高一丈八尺，募人出赤金。于时施者委输，逡巡若丘阜矣。遂振陆径，程巧工，一铸克成，相好奇特。殆景龙四年庚戌六月，属温王让位，奉睿宗叔父也。景云元年，云于寺东廊南隅造别殿安圣容。始云治材，方议版筑，檀越众议纷纭，未成建树。至二年辛亥，于福慧寺经坊北贸新安典午郑景宅。方事兴工，掘得古碑，则北齐天保六年乙亥岁置建国寺，乃高欢嗣子文宣帝也。睹之者皆惊叹，同舍利弗悲蚁垤焉。采访使君称异再三，遂治此记，改福慧为建国寺迎取安业圣容及殿材至寺。太极元年五月十三日改元延和，是岁刑部尚书王志？为采访使，至浚郊宣敕，应凡寺院无名额者，并令毁撤，所有铜铁佛像收入近寺。云移所铸像，及造殿宇门廊，犹亏彩绩。遇新敕，乃辍工。云于弥勒像前，泣泪焚香，重礼重告曰：“若与此有缘，当现奇瑞，策悟群心。”少顷，像首上放金色光，照耀天地，满城士庶皆叹希有。是时生谤毁者随丧两目，又有舌肿一尺许者。远近传闻，争来瞻礼，舍施如山。乃全胜概，像坐垂趺，人观稽顙。涉恶报者，云望像为其悔过，斯须失明者重视，舌卷者能言，皆愿为寺之奴，持钟扫地也。采访使王志？、贺兰务同录祥瑞奏闻。睿宗潜符梦想，有敕改建国之榜为相国，盖取诸帝由相王龙飞故也。仍敕佛授记寺大德明傒同共检校功德，勿令州府烦扰。中书舍人贾曾、侍郎崔沼、给事中卢逸、中书侍郎平章事岑羲皆捐俸禄，共构因缘。或启发心之元，或施外护之力。先天中行传神于潞郑玄宗即位，至八月十五日，上皇御书寺额，奉诏令大德真谛并弟子二人、品官一人，赍敕赐幡花及寺额至，迎受悬挂。云道化梁园，身荣福树，百龄有限，四相交迁，终于寺之别院。葬今京之东郊，寺庄塔亭存焉。时号造寺祖师。云去世后，天宝四载造大阁，号排云。肃宗至德年中造东塔，号普满者，至代宗大历十年毕工。或云造塔僧能分身行化，难测品阶。文殊、维摩，是王府友吴道子装

塑。又开元十四年，玄宗东封回，敕车政道往于闐国摹写天王样，就寺壁画焉。僧智俨募众画西庑北壁，三乘入道位次，皆称奇绝。今之殿宇，皆大顺年火灾之后盖造，大宋太祖重修。翰林待诏高益笔迹壁画，时推笔墨之妙矣。

○唐杭州华严寺玄览传（慧昶守如）

释玄览，姓褚氏，其先河南人也。食菜于钱塘，因是家焉。览诞膺明德，生而悬解，深达实相，以崇善本。自初念至于舍家，师承慧昶。昶师德无不满，众用皆足，年高行尊，久为师范，及见览无一息之间违仁，告门人曰：“无上之道，清静为本。有能一念用其心，吾未见学不足者。江表无真僧久矣，或以此子为法鼓耶？俾遐迩闻之。”其预为达匠之所甄异也如此。其本邑有故华严寺，览以包桑之地近于玄礼师之先茔，属隋室不竞，法宇弛颓，名将壑迁，迹亦时废。属于唐初，慕信人重建。文明岁，有敕许还旧额，广轮制度，兼移基址。背山临水，往返形胜。览初以具戒依天竺，次以僧录住一闲居，后以耆德统华严三寺。次第同致于道，道无不在，因教有迁也。览尝以悯物慈济为己任，遂议寺前平湖之通川为放生池。时大守袁从礼因兹劝勉，深入慈门，以禁六里。司马杨敏言感梦，又广至十里。是以蓼髻掉尾，噉喙浮沈，不虞其害，得遂生性焉。览又以经像为最则，殿前画四像，慈氏为首。铸金铜像三百五十座，弥陀为首。写经二千余轴，金字《涅槃经》为首。如是功德，以顺现报。故王考宗追赠和州刺史右散骑常侍封舒国公无量，则览之元昆也。量修学之日，临平湖龙见，无不往观，舒公晏然不离书案，气度如此。明皇初年，舒公侍讲，帝嘉尚之。归觐太夫人，年已期颐。昆季皆以华皓，晨昏之地说法而已。览以开元二十二年示疾，终于临平所造寺。春秋八十四。僧明了、大觉、普贤、神满、怀逊，皆参预法流，奉法器藏于缅甸洞之下基。工部侍郎徐安贞撰碑颂德焉。又闽中爱同寺释守如，多事劝诱，越上之民归若麀聚焉。崇树精庐，以为济众，急在利他。开元十年于寺营浴室，患地势斗高，清泉在下，桔槔无用，汲引步遥，终以为劳。思虑不迨，无由改作。忽一宵下流顿涸，距造浴室所二十余步，清泉迸出，时谓神功冥作，移此泉耳。七闽之民罔不归信，终于温室之偏房矣。

○唐东阳清泰寺玄朗传

释玄朗，字慧明，姓传氏。其先浦阳郡江夏太守拯公之后。曹魏世，避地于江左，则梁大士翕之六代孙，遂为乌伤人也。母葛氏初妊，梦乘羊车飞空蹶虚而觉身重。自兹已后，羣血恶闻。殆乎产蓐，亦如初寐，觉后心轻体安。婴儿不啼，颀尔而笑。九岁出家，师授其经，日过七纸。如意元年闰五月十九日，敕度配清泰寺。弱冠，远寻光州岸律师，受满足戒。旋学律范。又博览经论，搜求异同，尤切《涅槃》。赏恨古人虽有章疏，判断未为平允。往在会稽妙喜寺与印宗禅师商榷秘要，虽互相述许，大旨未周。闻天台一宗可以清众滞，可以趣一理，因诣东阳天宫寺慧威法师。威禀承括州智威，时传威是徐陵后身，灌顶师之高足也，朗亲附之，不患贫苦。达《法华》、《净名》、《大论》、《止观》、《禅门》等，凡一宗之教迹，研

核至精。后依恭禅师重修观法，博达儒书，兼闲道宗，无不该览。虽通诸见，独以止观以为入道之程，作安心之域。虽众圣继想，而以观音悲智为事行良津，游心十乘，谛冥三观，四悉利物，六即体遍。虽致心物表，身？人寰，精捐旧庐，志栖林壑。唯十八种十二头陀，隐左溪岩，因以为号。独坐一室，三十余秋，麻紵为衣，粝蔬充食，有愿生兜率宫，必资福事。乃构殿壁，绩观音、宾头卢像。乃焚香敛念，便感五色神光，道俗俱瞻，叹未曾有。此后或猿鼯来而捧钵，或飞鸟息以听经。时有盲狗来至山门，长嗥宛转于地，朗悯之，焚香精诚，为狗忏悔，不逾旬日，双目豁明。至开元十六年，刺史王上客屈朗出山，暂居城下。朗辞疾，仍归本居。厥后诲人匪倦，讲不待众。一郁多罗四十余年，一尼师坛终身不易。食无重味，居必偏厦。非因寻经典，不燃一烛。非因覲圣容，不行一步。其细行修心，盖徇律法之制，遂得远域沙门、邻境耆耄拥室填门，若冬阳夏阴，弗召而自至也。其寺宇凋弊，乃指授僧灵稟建。其殿宇形像，累二砖塔。绩事不用牛胶，悉调香汁。天台之教鼎盛，何莫由斯也？一日，顾谓门人曰：“吾众事云毕，年旦暮焉。”以天宝十三年九月十九日薄疾而终，春秋八十有二，僧夏六十一。置塔于岩所，生常撰《法华经科文》二卷。付法弟子衢州龙丘寺道宾、净安寺慧从、越州法华寺法源、神邕、常州福业寺守真、苏州报恩寺道遵、明州大宝寺道原、婺州开元寺清辩。韶年募道，志意求师，不逾三年，思过半矣。行其道者，号左溪焉。第其传法，号五祖矣。禹山沙门神迴著乎真赞矣。

系曰：观其唐世已上，求戒者得自选名德为师。近代官度，以引次排之，立司存主之，不由己也。朗之求戒，不其是乎？如是师资相练，恩义所生。脱临事请为，则喻同野马也。

○唐湖州佛川寺慧明传

释慧明，俗姓陈氏，汉太丘长实之后。世居颖川，永嘉南渡，祖为司徒掾。曾祖仲文有佐命于陈，封丹阳公。祖为双溪谷熟二县令。考为兰陵长，乃为兰陵人也。明母氏初感之日，如持佛戒，足恶履于荤园，口不尝于鲜器。神梦仿佛，如闻法音，既而诞焉。年渐及？，方祈舍俗，父母偕听。至受具时，即开元七年也。习学《律藏》，尝谓人曰：“昔者繁刑首作，伯成子遁焉。吾虽不舍律仪，而恶乎诤论纷纷。若心印心之法至矣哉！乃西诣方岩，顿开心地。天宝中有愿于清凉山。淮汴阻兵，明即旋策。与禅客遇，同游宛陵，于上石门置兰若三所，有大邾来扰，如抚？焉。时荐饥，群盗欲至，必号呼先告，往往有征焉。先是此乡好弋猎，明化之，皆焚？网器仗矣。至天宝五年，爰止乎鱼陂道常有■公者，白土史宗之流，迹迹行轍，世莫之识，始相见曰：“南祖传教菩萨，来何晚耶？”他日同登鱼陂峰顶，见东南有山苍琅独秀，谓■公曰：“吾与此山宿有缘矣。”天宝八年，有制度人。州将韦南金举高行，黑白状请，隶名州中宁化道场，明固辞。改隶佛川，即畴昔鱼陂所望之峰，梁吴均故宅之所，《地志》云：“青山南掘得古佛二躯，莫知年代。获像之地，灵泉涌起，因名佛川焉。”泉侧有吴王古祠，风俗淫祀，滥以牺牲。于是明夜

泊庙间，雷雨荐至，林摧瓦飞。顷之，雨收月在，见一丈夫容卫甚盛。明曰：“居士，生为贤人，死为明神，奈何使苍生每被血食，岂知此事殃尔业耶？”神曰：“非弟子本意，人自为之。”礼忏再三，因与受菩萨戒。神欣然曰：“师欲移寺，弟子愿舍此处，永奉禅宫。”后果移寺于祠侧，获铜盘之底，篆文有“慧明”二字焉。建中元年正月示疾，其日庭水春染，山雨昼冥，猛虎绕垣，悲啸而去。十二日，奄然长往，春秋八十四，僧腊五十一。二月十二日建塔于寺西山焉。传法弟子慧解、慧敏、如知三人也，若鶩子采菽之伦也。菩萨戒弟子，刺史卢幼平、颜真卿、独孤问俗、杜位、裴清，深于禅味。俾昼公为塔铭焉。

○唐湖州大云寺子瑀传

释子瑀字真瑛，姓沈氏，吴兴德清人也。其先亡国于沈，因以为氏，春秋沈子之后也。瑀生而聪慧，不以师授。年未总角，辞亲出家，以如意年中大赦度人，坏衣削{髡采}，煤灸世事，于洛京大福先寺受戒。勤勤祈请，假寐三日之夕，见有神人俨然在目，倏往忽来，或同或异，得非至诚乎？于是烛如来灯，佩菩萨樱证圣中归于大云道场，坚执律柄，僧纲矜举，不亦宜哉！瑀素履纯懿，无咎无誉。使天下之士有外道焉，有阐提焉，心如飘风，言若泉涌，挠我圣教，挤我妙门，瑀示以从容，诱以方便，莫不稽首挫色而闻命焉。常礼一万五千佛名兼《慈悲忏》，日夜一匝，或二日三日一匝。夜有圣僧九人降于礼忏之所，相与行道，弹指而去。或夜无灯烛，心口是念，圆光照室，如坐月中。如此则往往有之，瑀慨德清偏邑未有塔寺，遂锐怀营构。一唱齐和，乃成精宇。前后写经三藏，凡一万六千卷。天宝初，临安足法师死，经三宿，将入地狱，冥中见瑀引至王所，谓王曰：“此人能讲《涅槃经》，王宜宥之。”王曰：“唯闻岩仑师能讲，不闻此师名，何也？”如是再三，王不能屈，因赦之。曾是乡人施牛（音桃）者，天然不孕，因而出乳，其通感如是。以十一年秋禅坐而终。十二年春，将启灵龕，欲焚之，容色不变，如生，虽少林孕髭，蘄春育发，何独嘉也？大理评事摄监察御史姚淡、主客郎中姚涑、刺史杨慧才偕归信焉。

○唐明州慈溪香山寺惟实传

释惟实，姓汤氏，富阳人。其为人也，杜多其行，禅观其心，淡然静居，长坐不寐。初母氏抑其愿心，不容披削。既而笼开鸟逝，岸穴泉飞，学善财之遍参，同迦叶之练行。天宝中往明州若山，夜闻冥告曰：“达蓬圣迹名山，宜矣。”翌日且登其山，岩洞窈窕，石壁削成，秀异之多，实维灵境。有大佛足迹，询其山叟，则曰“彼开元年中始现斯瑞。”遂愿栖此，有终焉之志。时属海寇袁晁蜂蚁屯聚，分以剽劫，杀戮无辜。至于香山，众皆奔窜。实据榻瞑目，先以大石掩洞门。贼可三二百数，复舁巨石阔二丈余，镇其穴口。实起暗鸣，以掌举之，群盗罗拜以谢之而去。邑民重之，遂立精舍，弗再岁而成。大历八年也。太守裴微奏请署香山题额焉，诏度僧七人隶名矣。以贞元二年冬示疾，终于寺，则加趺而化也。春秋六十二，法腊

三十一矣。

○唐朔方灵武龙兴寺增忍传

释增忍，俗姓史氏，沛国陈留人也。典谒之年，登其乡校。百氏简策，寓目入神。艺文且工，乃随计吏，数举不捷。会昌初，薄游塞垣，访古贺兰山中，得净地者白草谷内，发菩提心，顿挂儒冠，直归释氏。乃？草结茆为舍，倍切精进。羌胡之族，竞臻供献酥酪。至五载，节使李彦佐嘉其名节，于龙兴寺建别院，号白草焉，盖取其始修道之本地也。忍刺血写诸经。大中七年，李公虑其枯悴，躬往敦谕曰：“师何独善一身，行小乘行？胡不延惜生性，任持教法，所利博哉！忍执情胶固，遂著《三教毁伤论》以见志，帅览而益加崇重。九年，因读《大悲经》，究寻四十二臂至无畏手，疑而结坛，浹旬祷请，自空中现其正印，双拳历历可观。遂命画工绘写此臂焉。或有讥谤者，忍再精懃虔告，画工濯笔铜碗中，忽感宝性花一朵，枝趺叶，一皆鲜明，睹者惊叹。至咸通十二年七月十日示灭于白草院，春秋五十九。以十月十七日藏神于水馆之南，建塔焉。初忍刺血写经，总二百八十三卷。画庐舍那阁三十五尺，门一丈六尺。起样画大悲功德三轴，自著《大悲论》六卷，并藏诸篋笥焉。后节使唐恒夫仰其遗迹，奏乞旌劝，敕谥大师曰广慧，塔曰念定。弟子无辙，亦致远之高足，赍血书经二卷、瑞花碗一枚，诣阙奏呈，宣赐紫衣。天复中终。及梁乾化初，中书令西平王韩公逊录遗迹奏闻，太祖敕致谥曰法空，别赐紫方袍，塞垣荣之。后唐同光中，从事薛昭纪为碑焉。

○唐京兆荷恩寺文瓚传

释文瓚，姓张氏，晋阳人也。天姿整恪，幼事师于并州崇福寺。学该群籍，控带三乘。至若金版银绳之策，龙韬象秘之文，罔不饥耘情田，波涛口海，宣畅皇化，对扬天休，一皆悦服。诏为翻译，并河南佛授记寺兼京兆安国、荷恩、崇福等寺大德。好修福事，设无遮一百会，凡圣混淆，一皆等施。纵风云连起，及至斋日，必晴明晏然，感动人

瘳，福无唐设。春秋六十馀，卒于本院。境内苦雾如泣，数日不解焉。○唐太原府崇福寺怀玉传

释怀玉，姓许，并州人也。少而警利，日览千言。早露锋芒，迥拔侪类。及其长也，戒节逾峻。梵场龟鉴，志在修葺，无间彼此，夏墟寺宇，经有阙而必补，像有凋而遍修，三任纪纲，特有崇建。仍校雠大藏经二十余本，祁寒盛暑，不废晨暮。增饰净土院，兴事任力，转加殊丽。代宗嘉之，委为灌顶道场主，真言秘诀有所在矣。春秋六十三，卒于本院云。

○唐晋州大梵寺代病师传

释代病者，台州天台人也，姓陈氏。以其尝发大愿，尽一报代众生之病，致本名不显矣。诞育之辰，祥光充室，邻里异焉。七岁丧父，哀毁几于灭性。白母求出家，母才艰阻，遂断一指，亲党敦劝，偏亲乃送于国清寺。因戒法登满，誓志观方。初止今东京，次于河阳，为民救旱，按经绩八龙王，立道常启祝毕，投诸河。举众咸睹画像沉跃不定，斯须云起肤寸，雷雨大作，千里告足。自此归心者众。先是三城间多暴风雹，动伤苗稼雉堞，号为毒龙为之也。代病为诵密语，后经岁序，都亡是患。盟津民立堂宇若生祠焉。大历元年，登太行，游霍山，乃深入幽邃，结茆而居。有盗其盂食，俄见二虎据路，会逢代病，盗叩头陈悔。慰谕毕，因摩挲虎头，如是累伏猛兽。其盗本樵子，愿依附为苦行焉。其中山神庙，晋绛之间传其箒蚤。代病入庙，劝其受归戒，绝烹牲牢。其神石像屡屡随劝颌首，顾其神妇，略无俞答之状。遂剃神之发，毁撤神妇。乡人怪之，闻白州邑。太守怒之曰：“此唐高祖初起至此，久困阴雨，其神见形示路，以迎义师。厥后砉石为像，荐飧无亏。此之髡师无状敢尔。”俾系闭于嘉泉寺，扃键且严。至二十日启关，寂然禅定，倾城咸往观礼，或声磬，舒徐而起。太宗急召之不来，以至约令断头。代病斩一指以付使者。太守感之，躬就迎请，移置大梵寺，别营砖浮图以藏其指节矣。由是檀信骈肩蹑踵。有蜚毒于酒者，贿贫女往施之。代病已知。贫女给之曰：“妾家酝觉美，酌施和尚求福。况以佛不逆众生愿。”代病曰：“汝亦是佛。”然贫女惧反饮，具以情告。代病执杯啜之，俄尔酒气及两胫足，地为之僨裂，闻者惊怪，以酒供养，自兹始也。汾隰西河人有疾，止给与净水，饮之必瘳。凡属荐饥，必募粮设食。后于赵城救斯荒歉，作施食道场，前后八会，遐迩赖之，道感多类。以贞元十九年秋七月八日，奄然加趺示灭。四众初谓如嘉泉寺之禅定欬，香花供养，至于隔岁。肌肉渐坚，方知永逝，遂漆布绩画之。武宗废塔像，无巨细皆毁除，或议之移入陶灶中。既而生瑞草一本，其状亭亭若盖，盘错紫纁，庇其风雨而有余也。宣宗即位，佛事中兴，纲簏比丘造小亭，移真形蜚于此。先于嘉泉寺断指节，已过百龄，筋肉甲爪光润，且如金色。或属兵革，城陷指亡。后有赍出逃难，事息归还。亦阴福其逋亡者，至今平阳人崇信焉。

卷二十七

◎兴福篇第九之二（正传二十一人附见三人）○唐京师光宅寺僧竭传

释僧竭者，不知何许人也，生在佛家，化行神甸。护珠言戒，止水澄心。每嗟靳固之夫，不自檀那之度，乃于建中中造曼殊堂，拟摹五台之圣相。议筑台至于水际，竭惧伤生命，俾立三日道场，咒其多足至无足，当移窞相避，勿成某梵行之难。将知至诚所感，征验弗虚，掘土及泉，了无蠢动焉。常以复素为漉袋，遇汲有虫，投诸井坎，时号护生井，恒盈不涸。又观其飞蛾蠛蠓，错认火明为可飞之路，故犯之，乃铸铜蟾为息烟调。天下传其制度。其曼殊院尝转经，每敕赐香。此寺本七宝台寺，内有天后所造之台，竭居于中焉。

○唐成都福感寺定光传

释定光者，不知何许人也。爰从入法，厥性弗拘，粝食断中，粗糲卒岁。方于庸蜀化导有缘，事或多魔，教钟中否。俄遭武宗毁废，例反儒宗。及乎佛日重晖，僧伦咸序，光同缔构寺宇，因铸大钟，计赤金万余斤。尔日鼓砮灰飞，投炉火炽，有祥烟两道自浮图相轮最高处出，冉冉射上，若虹譙焉。万人引望，五色腾凌，相感如然，信鼓斯应。其塔是阿育王藏舍利之所。大和初南蛮蒙苻颠剽掠入益城，分蛮卒舍于寺内廊庑，皆烹炙熏灼，僧皆奔迸。时塔顶出四道浓烟，分穗直上空虚，至夜。蛮讙睹此奇异，乃禁止污秽。此塔先在西北四十余步，天宝末长史章仇兼琼赴在至剑门，见一人长一丈余，持戟当路。兼琼惊问，对曰：“某是大石寺护塔神，故来奉迎，且有少事咨祈大夫也。缘大石寺塔在西南，未为极善，今请移东北四十二步。伏望便掘石此下，以镇舍利。”兼琼曰：“此易耳。”遂隐厥形，到府数日，乃令量其地处，先掘，果得巨石，其深无际。促石匠数十人鑿凿之，至夜，辄填满。遣人潜伺之，见有白鼃数十以喙推石末塞之，随以舌舐，其坚如铁铜矣。章仇止令勿凿，遂移塔于今所，即金花旧寺基也。光钟亦移入新寺焉。

○唐吴郡嘉禾贞侯传

释贞侯，俗姓武氏，云中人也。神宇高邈，以禅默为务。曳锡蹢步，南访灵迹，及至故鄣，有昆山寺者，林泉秀茂，则宋支昙谛尝考室于此，味道崇化二十余载，基

跖存焉。至元嘉中创成大伽蓝。属武宗废教，其寺屏除。侯至止于兹，与范阳卢君袭同兴弘觉法师第二生名迹，寺成，进士姚扶有诗。侯后游今秀州长水，见灵光寺，邑民欲树巨殿。时卢令移邑字民，欣然相遇，侯悉先知。或云“得他心宿命之明焉。”遂请侯首唱，而恶偃室之器，寓殿基后，编苫为浅室而居。四方檀信，弗召自臻。又与僧令恭君道等累岁方成今殿。其最高广，海内罕比。事毕，挈弊囊，振

旧锡归北，莫知其终。

○唐苏州支硎山道遵传

释道遵，字宗达，姓张氏，吴兴人也。夙负殊操，洁士称之，荣曜不足关于心，声尘未尝触其性。至年二十，诣天竺义威律师受具戒，事报恩寺兴大师。首宗毗尼传教也。后学天台一心三观法门，欲广写《法华经》，置道场，辟经院。一之日发其心，二之日规其趾，作不逾序，厥功成焉，居支硎之福地。大历元年，州将韦元甫、兵部尚书刘晏、侍御史王圆、开州刺史陆向、殿中侍御史陆迅、大理评事张象，竞诱真心，共获殊胜，乃相与飞表奏闻。诏书特署为法华道场，自江以东总一十七所，皆因遵之首置也。举精行大德二七人，常持此经，以报主恩。铸卢舍那及毗卢遮那像，及多宝塔，修净土当生业，造弥陀佛，复写天台教。益乎道场，置常住庄二区。平时讲《法华玄义》、《天台止观》、《四分钞文》，临坛度人，授心扬律，徒盈石室之筹。天宝中，于灵岩道场，行《法华》三昧，忽睹大明上烛于天，我身正念俨在光中。异日问荆溪然师曰：“智慧光明从心流出，非精志之所致耶？”又于本寺入法华道场，睹此身在空中坐，先证者知是涤垢之相。其年春秋七十一，僧夏四十六，以兴元元年七月二十九日告终于支硎山寺。僧益公、翰公一夜同梦大殿崩，果遵入灭。门人灵翰、法盛、道欣、犹子灵源追慕不已，树塔旌德焉。

○唐京兆大兴善寺含光传

释含光，不知何许人也。幼觉嚣尘，驰求简静。开元中见不空三藏颇高时望，乃依附焉。及不空却回西域，光亦影随，匪惮艰危，思寻圣迹。去时泛舶海中，遇巨鱼望舟，有吞噬之意。两遭黑风，天吴异物之怪，既从恬静，俄？师子国。属尊贤阿钭梨建大悲胎藏坛，许光并慧同受五部灌顶法。天宝六载回京，不空译经，乃当参议华梵，属师卒。后代宗重，光如见不空，敕委往五台山修功德。时天台宗学湛然解了禅观，深得智者膏腴，尝与江淮僧四十余人入清凉境界。湛然与光相见，问西域传法之事。光云：“有一国僧体解空宗，问及智者教法。梵僧云：‘曾闻此教定邪正，晓偏圆，明止观，功推第一。’再三嘱光或因缘重至，为明唐为梵附来，某愿受持。屡屡握手叮嘱。详其南印土多行龙树宗见，故有此愿流布也。”光不知其终。

系曰：未闻中华演述佛教，倒传西域，有诸乎？通曰：“昔梁武世，吐谷浑夸吕可汗使来求佛像及经论十四条，帝与所撰《涅槃》、《波若》、《金光明》等经疏一百三卷付之。原其使者必通华言，既达音字，到后以彼土言译华成胡，方令通会。彼亦有僧，必展转传译，从青海西达葱岭北诸国，不久均行五竺，更无疑矣。故车师有《毛诗》、《论语》、《孝经》，置学官弟子，以相教授。虽习读之，皆为胡语是也。又唐西域求《易》、《道经》，诏僧道译唐为梵。二教争菩提为道，纷籥不已，中辍设能翻传到彼，见此方玄赜之典籍，岂不美欤！又夫西域者，佛法之根

？11也。东夏者，传来之枝叶也。世所知者，知枝叶不知根？。而不知枝叶殖土，亦根生？11长矣，尼拘律陀树是也。盖东人之敏利，何以知耶？秦人好略，验其言少而解多也。西域之人淳朴，何以知乎？天竺好繁，证其言重而后悟也。由是观之，西域之人利在乎念性，东人利在乎解性也。如无相空教，出乎龙树，智者演之，令西域之仰慕。如中道教生乎弥勒，慈恩解之，疑西域之罕及。将知以前二宗，殖于智者、慈恩之土中，枝叶也。入土别生根？，明矣。善哉接者，见而不识，闻而可爱也。又如合浦之珠，北土之人得之，结步摇而饰冠佩。南海之人见而不识，闻而可爱也。蚕妇之丝，巧匠之家得之，绣衣裳而成黼黻。？抽之姬，见而不识，闻而可爱也。懿乎智者、慈恩，西域之师焉得不宗仰乎1

○唐剡沃洲山禅院寂然传

释寂然，姓白氏，不知何许人也。名节素奇，踵四圣种，故号头陀焉。大和二年，振锡观方，访天台胜境。到剡沃洲山者，在天姥岑之阴，对天台华顶、赤城，北望四明，金庭石鼓山介焉西北北。有支遁岭、养马坡、放鹤岑次焉。晋宋已来，兹山洞开。初有罗汉白道猷言西域来，戾止是山。次竺法潜、支道林居焉。高人胜士，接踵而栖此中。至于戴逵、王羲之、郗超、孙绰、许询游憩其间矣。见是中景异，闻名士多居，如归故乡，恋而不能舍去。既行道化，盛集禅徒。浙东廉使元相国稹闻之，始为卜筑。次陆中丞临越知之，助其完葺。三年郁成大院，五年而佛事兴。然每为往来禅侣谈说心要，后终于山院。大和七年，时白乐天在河南保姚为记，刘宾客禹锡书之。

○唐天台山福田寺普岸传（全亮唯约）

释普岸，姓蔡氏，汉东人也。冲弱之龄，迥然聪敏，骨目奇秀，天生不嗜荤膻，长有出尘之意。其父严毅，训授经籍，渐通其义，秉翰伸辞，宛然华藻。因入僧舍，暂执经卷，乃叹曰：“佛法玄微，非造次可及1决志辞亲。时怀海禅师居百丈山，毳纳之人骈肩累足，时号大丛林焉。岸叩其关，海摄受之。日随普请施役，夜独执烛诵经，曾不憊劳，遂谐剃染。及升戒品，便习禅那，壁坐忘疲，观心恒务。？亶附风而香远，戏猫逢兽而吼高，学者成围，请于安陆寿山院坐道场矣。如是环拱可四百余众，执器听瞿沙之说，投筹待？多之度。大利群机，得道者众。大和年中，谓众曰：“吾山水之游未厌，诸人勿相留滞。天台赤城，道猷曾止息焉。华顶石梁，智者昔降魔矣。将游之也。”自襄阳迢迢而来，从沃洲、天姥入天台乏西门，得平川谷中，峰名大舍，号平田是也。观其山四舍郁翠，东西山石门，而有三井龙潭。东入石桥圣寺，乃是绿身道猷尊者结茅居此。未几，见羆虎乳子，瞪目而视岸。岸以杖按其头曰：“贫道闻此山是神仙窟宅，罗汉隐居，今欲寄此安禅，檀越勿相惊挠。”经宿，领子而去。以大和七年癸丑十月二十七日营构丈室，携一童，侍给薪水耳。八年春，禅侣辐凑，众力义成此院，号平田焉。开成中，宛是大道常会昌三年七月，告众入灭，春秋七十四度。弟子全亮，俗姓陈氏。悟师之道，得凤之毛

，一人唯约，在上元入灭，肉身不朽。岸迁塔于是山前，此寺置五百罗汉殿，永嘉全亿长史尽半千形像，每一迎请，必于石桥宿夜，焚香具幢盖，螺钹引导入于殿，香风送至。幡幢之势前靡，而入门即止。其石梁圣寺在石桥之里，梵呗方作，香霭始飘。先有金色鸟飞翔，后林树石畔见梵僧，或行或坐，或招手之状，或卧空之形，11？息之间，千变万化。汉南国王钱氏频年施供养，祥瑞极繁。今上太平兴国三年，于滋福殿宣问两浙都僧正赞宁石桥长广量度，一皆实奏，帝叹嗟久之。至八年因福田寺道者自询誓断腕然炼，乞重造此寺，乃宣内殿头高品卫绍钦、张承贵革故规制，若化出天宫焉。今岸师影堂在寺之右。

○唐京师奉慈寺惟则传

释惟则者，拔俗志高，栖神物表，凡施善务，举则波随。常言：“像是生善之强缘，不得不多立。初之观也，如对严君。次则其心不乱，中则观门自成。末则如如焉，荡荡焉，三昧安得不现前乎？是以我曹劝化迷俗，得不以此是为先容欤？”由是若雕若塑，形像森然。恒事进修，天邑之间，偏加激励。属宪宗太皇太后郭氏元和中为母齐国大长公主追福，造奉慈精舍，搜择名德，则乃预选入居。未久之间，闻四明赞_山有阿育王塔，东晋刘萨诃求现，往专礼焉。乃匠意将七宝为末，用胶范成摹写脱，酷似。自甬东躬自负归奉慈寺供养，京邑人皆倾瞻归信焉。

○唐长安禅定寺明准传

释明准者，不详氏族，生缘本天台灵墟道场，出俗游方。至京邑，观古之神僧智苑于范阳北山刊石写经灌铁，以俟慈氏下生，免水火之虞。又东洛长寿寺写《华严》，圣善寺写《法华》，嵩山岳寺写《楞伽》，悉刊贞珉，皆图不朽。准遂于贞元戊寅岁春正月，见寺僧鑿山攻石，石悉顽恶，知匠氏不虔，山灵秘。时准疏告阴灵，请裨善务。俄于定中见若干幅贮无量石，冥冥之间，如有宰割，皆中刻字。时连率博陵崔公激劝幕府参佐各书一品，从《序》至《劝发》，凡二十八。圜廊挺立，不期毕工。准之化人，皆此类也。元和元年八月中也。后不详终所。

○唐洪州宝历寺幽玄传

释幽玄，俗姓刘，幽州人也。夙怀出俗之愿，年及弱冠，方遂前心，投并州贤禅师而了玄契。元和二年，振锡江左，至会稽大云寺，见三学僧寤定食轮，资缘都阙。玄言发响应，檀越供贍。未几，移居湖心龟山妙喜古寺。九年，属平昌孟简镇于越，枉驾问道，遂构成大院。十二载，复登南岳，栖止绝顶。十三年，豫章太守商祐笃重其道，命住东明寺，即东晋安帝世之所造，僧数繁凑。宝历中，为奏改为世福，兼置戒坛，续敕改为度僧寺。其间形像，皆玄之化导。大和元年，沈传中丞又加信向。玄于院南别造佛阁五层，功就，谓弟子曰：“福事无尽，生涯有期。物有阙然，后人庀具。吾终后，可将尸漆布安阁下。”言讫而化，门人特旁立塔焉。

○唐五台山智顗传

释智顗者，中山人也。自幼辞亲，来五台山善住阁院，礼贤林为师，诵经合格，得度。神情爽拔，气调高峙，于世资财，少欲知足。粝食充腹，粗衣御寒，余有寸帛，未尝不济诸贫病也。游方参玩，预诸讲席。传《法华》、《维摩》二部，穷源尽理。后桂锡高峰，息心却扫。距元和中，众辟为五台山都检校守僧长。顗与时迁徙，固辞不允，遂登此职。后遇岁当饥谨，寺宇萧条，有华严寺是大圣栖真之所，巡游者颇众，供施稀疏。院宇伦巡，例称不迨，众请为华严寺都供养主。时德不孤，有法照、无著、澄观之出世也。当观师制《华严经疏》，海众云集，请顗为讲主，日供千僧。十有余祀，食无告乏。皆云“有无尽藏之米面也”。岁久颇见丰盈。有邻院僧义圆，亦当代之硕德也，谓顗久知常住，私有谤言，非平等心，是贪饕者也。夜有神人报圆曰：“僧长是千佛之一数也，汝发轻言。若不悔过，当堕恶道。”圆乃诘朝鸣足忏悔，有兹验也。及钟武宗澄汰，顗遁乎山谷，不舍文殊之化境。未逾岁载，宣宗即位，敕五台诸寺度僧五十人，宣供衣帔，山门再辟。顗为十寺僧长兼山门都修造供养主。大中七年，与寰海游台，四众建无遮精妙供养。一月日，乃谓大众曰：“吾欲暂憩微骸，息心敛迹。佐助众务，吾无能为也，付诸俊哲，继吾遗躅。”乃净室安坐而灭，春秋七十七，夏腊五十八云。

系曰：僧中职任也，如网之纲，如屋之梁焉。肇自姚秦立正，魏世推都，北齐则十统分员，唐世则僧录命职。异乎常所闻者，五台山自贞元中智君贡始封僧长矣。亦犹鱼盐蜃蛤，祈望守之也。

○唐会稽吕后山文质传

释文质，俗姓祝氏，尚丘之远孙，衢州须江人也。叔氏为僧号唯宽，学通多本经论。宽被诏入长安，止大兴善寺，重诏入内道场，兼请受菩萨戒。质随宽入内。年十五，诵《法华》、《华严》、《维摩》等经。二十三，受具。七日诵周戒本，二夏便讲《四分律》二十七，讲通《俱舍》。四十年中，精晓诸大经论，后约束大悲、禹迹二禅师，参问心要。既博达矣，归诸暨法乐寺领徒。时有虎来听法，质摩其顶而去。后往永嘉，钟会昌之搜简，乃隐乐成县大芙蓉山，胎息而已。大中重兴，太守韦君累请不来，强置于榻，舁出州开元寺居。檀施骈列，回造大佛殿，并讲堂房廊形像，并写藏教，无不备焉。越州廉使沈貳卿命住吕后山院，本宁贲禅师旧化之地也。质唯居草庵而止。咸通二年十月十四日，告众言别。十五日，端坐而化，春秋八十四，僧腊六十二。窆于云谷，建塔，越州刺史段式为《行录》焉。

○唐明州国宁寺宗亮传

释宗亮，姓冯氏奉化人也。家傍月山而居，后称月僧焉。亮开成中剃落纳法，方事毗尼，循于四仪，且无遗行。而云我生不辰，属会昌之难，便隐家山深岩洞穴。大

中再造，国宁寺征选清高者隶名，亮预住持。建州太守李频为寺碑云：“于清心行不污者，得二十八人，以补其员，广住持也。律僧宗亮、禅僧全祐而已。国宁经藏，载加缮写，躬求正本，选纸墨，鸠聚？施，建造三门藏院诸功德廊宇，皆亮之力焉。晚年专事禅寂，不出寺门。处士方干赠诗云：“秋水一泓常见底，涧松千尺不生枝，空门学佛知多少，剃尽心花只有师。”终于本寺，春秋八十。亮恒与沙门贯霜、栖梧、不吟数十人，皆秉执清奇，好迭为文会，结林下之交。撰《岳林寺碑》、《诗集》三百许首，赞颂并行于代。而于福敬二田，锐心弥厚焉。亮为江东生罗隐追慕，乐安孙邰最加肯重，著《四明郡才名志序》，诸儒俊士外，独云：“释宗亮多为玄士先达癡仰焉。”

○唐越州开元寺昙休传

释昙休，字德敷，姓李氏。器度宏廓，志行修敕。纳法已来，未容少缺。习通渐教，颇至精微。《四分律》、相部、疏宗，蔚成渊府。初机请学，皆到甚深。休于讲训之余，飭绳寺任。伊寺者，梁所创，年涉四百，虽观阁岿然，且桷倾弛。休革故有方，缔构无隙，特加壮丽，轮焉奂焉。又护国经楼迨诸栋宇，悉见鼎新，次以寺之门楼也，则长安四年故昙一律师之经始也，既而颓废，仍重整覆，一同创制。复慊永徽中康僧会法师应身堂座卑庳，乃募人厘变旧规。咸通年中也。休之一言，檀信响应。后终于住寺，今之大善伽蓝是也。

○唐雅州开元寺智广传

释智广，姓崔氏，不知何许人也。德瓶素完，道根惟固，化行洪雅，特显奇踪。凡百病者造之，则以片竹为杖，指其痛端，或一扑之，无不立愈。至有？者则起，跛者则奔，其他小疾，何足言哉。乾宁初，王氏始定成都，雅郡守罗（亡名）罢任，携广来谒。蜀主王氏素知奇术，唯呼为圣师焉。先是咸通中南蛮王及坦绰来围成都，府几陷。时天王现沙门形，高五丈许，眼射流光，蛮兵即退。故蜀人于城北宝历寺立五丈僧相。后为牛尚书预毁。次兵火相仍，唯惧毗沙明之颓圯耳。王氏乃语广曰：“师之异术，道德动人，乘此可料理天王否？往吴尚书行鲁曾梦令修吾像，方事经营，除书忽到。请法力成之。”广唯其命，徙就天王阁下，居一隅，小榻而已。翌日，病者填噎其门，日收所施二十万至三十万钱。又发言劝人出材木，浹旬皆运至，堆，令三纲掌管焉。初广在雅郡本寺羯帝神堂内，居其半室，低门苦蓐，不许女人到门。唯有一竹筐子。每齐，受？二十文，必投筐内，满则置之佛殿。声钟集众，自他平等盥之。常日俗家请斋，亦体广意，止施二十文，净饭菜豉汁，此外不许一物，11？多不取，食毕而去，亦无辞告。其后益加神验，或遇病者，一搥一叱皆起。或令烧纸缙，掇散饮食。或遇甚痛恼者，捩纸蘸水，贴之亦差。光化元年修天王阁，向毕，乃循江渎池，咒食饲鱼。经夜，其鱼二尺已上万亿许，皆浮水面而殒。聊蹑流水，救十千鱼生忉利同也。

○唐鄜州宝台寺法藏传

释法藏，不详氏族，厥性方正，好行惠物。尝于葦川化众造寺，佛殿僧坊一皆严丽，雕刻华为，鄜羸命为壮观。藏偶病笃暴终。至一精庐，七宝庄严，非世所有。门外有僧，梵貌且奇特，倡言曰：“法藏汝造伽蓝，不无善报，奈何于三宝物有互用之愆，何从洗雪？”藏首露之，僧曰：“汝但缮写《金刚般若经》，恒业受持，岂不罪销！亦可延乎寿命。”言讫而苏。自躬抄度其经，午夜口诵。藏终时年一百一十岁云。雕阴人至今信重焉。

○唐五台山海云传（守节）

释海云，未详氏族乡里。来游圣迹，始于南台侧，选峭绝峰峦幽僻林谷而特居之。其刻苦

玩道，俭而难遵。从其游者，寡而无众。迨其入灭，门人守节，淘洒舍利起塔焉。昔传云是普贤菩萨应身也。门人守节即高力士之子也，从师墨俭，有进无退。云示之曰：“上都有卧伦禅师者，虽云隐晦，而实阐扬六祖印持，一时难测。化导之方，若尸鸠之七子均养也。汝急去从之。”及见伦，扣击未几，告云：“汝师海云入灭已。”节稟听斯言，荼蓼情苦，遂奔赴，如其言矣。乃继武接迹，盛化相承。迨将示灭，愁云郁结，鬼神悲号，有塔存焉。

系曰：海云是普贤应身，非耶？通曰：“菩萨下化，弗拘定相，应以比丘，即现说法。”若然，何乱文殊境，使主伴不分乎？通曰：“若如所问，凡夫分矣，圣人岂以我所求乎？”

○唐五台山佛光寺法兴传

释法兴，洛京人也。七岁出家，不参流俗。执巾提盥，罔惮勤苦。讽念《法华》，年周部帙。又诵《净名经》，匪逾九旬。戒律辄仪，有持无犯。来寻圣迹，乐止林泉，隶名佛光寺。节操孤颖，所沾利物，身不主持，付属门人。即修功德，建三层七间弥勒大阁，高九十五尺。尊像七十二位。圣贤、八大龙王，罄从严饰。台山海众异舌同辞，请充山门都焉。盖从其统摄，规范准绳，和畅无争故也。大和二年春正月，闻空有声云：“入灭时至，兜率天众今来迎导。”于是洗浴焚香，端坐入灭。建塔于寺西北一里所。

○唐五台山行严传

释行严，荥阳人也。家袭簪组，业嗣典坟。严稟庭诰以周旋，约成器能而济用，内要随计，俄发宿缘。因闻《妙庄严王经品》，白父母求出尘劳。堂亲抑禁，略无却

退。既而削饰去华，年充纳戒，诸方问道，绰有余能。闻五台山文殊应现，凡圣交踪，乃登游而隶名斯地。自尔一成慕学，三教偕明，谈论天人之际，听者茫昧，不知区域之内外耶！王公大人靡不回向。大和中，多行激劝，俾营福焉。自设大供，日计千人。闻见之流，皆鸣指赞叹曰：“行合解通，世之希宝也。助道之法，当如是修。”以大中三年右胁而灭，建塔寺西一里云。

○唐五台山佛光寺愿诚传

释愿诚，姓宋氏。望本西河，家袭素风，浚流远？，不扬胃绪，祖考不书。母阴氏夜梦庭树对发千花，余花寻谢，独结一果。乃觉有孕。母启愿心，得娠男子足矣。十月临蓐，果如其望，立字曰愿诚。后志存小字，不训法名者，遵慈母之意也。诚少慕空门，虽为官学生，已有息尘之志。迨栖金地，礼行严为师。严即儒宗圭璋，释氏师子也。一旦谓诚曰：“汝神情朗秀，宜于山中，精勤效节，可不务乎！大和三年落发，五年具戒。先诵诸经，悉皆精练，行人属耳，道望日拔。无何，会昌中随例停留，唯诚志不动。遥及大中再崇释氏，选定僧员，诚独为首矣。遂乃重寻佛光寺，已从荒顿，发心次第新成。美声洋洋，闻于帝听，飙驰圣旨，云降紫衣。后李氏奄有井门，遐奉文殊，躬游圣地。睹其令范，抚手愜怀，表闻唐天子，相继乃赐大师号圆相也，就加山门都检校。光启三载，羞饌命僧舍衣投施。钟声引众，悉至斋堂，右胁曲肱，寂然长往。建塔树碑寺之西北一里也。

○后唐五台山王子寺诚慧传

释诚慧，元礼之宗盟祖？，蔚州灵丘之故邑，父母深信，注意清凉。因瞻大圣之容，乃乞兴邦之子。既而有孕，遂诞贤童。才当？年，器？天假，自诣台山，永为佛子。时真容殿释法顺睹其作哲，化以苦空，劝舍俗衣，令披法服。暨登具足，尤习毗尼。自后孤游？谷，多处林泉。有王子寺僧湛崇等请居兹寺。慧主任之余暇，内外典教靡舍斯须。供赡精严，非不勤恪，恒转《华严经》，数盈百部。每至卷终，恳发愿曰：“以我捧经之手，救彼苦恼之人。”而属武皇与梁太祖日寻干戈，中原未定。武皇中流矢，创痛楚难任，思忆慧师，翹想焚香，痛苦乃息。遥飞雁帛，远达鸡园，命下重峦，迎归丹阙。武皇躬拜，感谢慈悲，便号国师矣。后乞归本寺，金峰显耀，玉树相依，九州之珍宝皆来，百寺之楼台普建。庄宗即位，诏赐紫衣，次宣师号。慧坚不受。帝复宣厥后，再朝天阙，更极显荣。受恩一月，却返五台。同光三年乙酉岁十二月，嘱累门人廷皂曰：“吾今化缘将毕，为吾进遗表，达于宸听。宜各努力，理无相代。”言讫入丈室，右胁而终也。俗龄五十，僧腊三十。帝闻惻怆，遣高品监护丧筵，仍敕赐祭。三朝火烬，五色骨存，收取舍利而起塔焉。谥曰法雨，塔曰慈云也。

卷二十八

◎兴福篇第九之三（正传十五人附见一人）○后唐洛阳中滩浴院智晖传

释智晖，姓高氏，咸秦人也。权舆总角，萌离俗之心，不狎童游，动循天分。錫遇圭峰温禅师，气貌瑰伟，虚心体道，?其门者，淑匿旌别矣。谓晖曰：“子实材器多能之士也。”请祈摄受，二十登戒。风骨耸拔，好尚且奇。山中阒然，曾无他事，唯钩索藏教，禅律亘通，日诵百千言，义味随嚼。闻佛许一时外学，颇精吟咏，得《骚雅》之体。翰墨工外，小笔尤嘉，粉壁兴酣，云山在掌。恒言“吾慕僧珍道，芬之六法，恨不与同时。对壁连图，各成物象之生动也”。然真放达之士哉。或振锡而游，纵观山水；或蹑屩而至，历览市朝。意住则留，兴尽而去。或东林入社，或南岳经行，悟宗旨于曹溪，宁劳一宿；访神仙于阮洞，拟到三清。事以志求，时无虚度。此外采药于山谷，救病于旅僧，惟切利他，以无别务。洎梁乾化四年，自江表来于帝京，顾诸梵宫，无所不备，唯温室洗雪尘垢事有阙焉。居于洛洲，凿户为室，界南北岸，葺数亩之宫，示以标榜，召其乐福业者占之。未期渐构，欲闰皆周，浴具僧坊，免焉有序。由是洛城缁伍，道观上流，至者如归，来者无阻。每以合朔后五日，一开洗涤，曾无盼然。一岁则七十有余会矣。一浴则远近都集三二千僧矣。晖躬执役，未尝言倦。又以木舄承足，少麻缝衣，彼迦叶波相去几何哉！其或供僧向暇，吟咏余闲，则命笔墨也，缅想嘉陵碧浪，太华莲峰，凝神邈然，得趣乃作，五溪烟景，四壁寒林，移在目前，暑天凛冽矣。加复运思奇巧，造轮汲水，神速无比。复构应真浴室，西庑中十六形像并观自在堂弥年完备。时杨侍郎凝式致政佯狂，号杨疯子者，而笃重晖，为作碑颂德。莫测所终。

○晋五台山真容院光嗣传

释光嗣，姓李氏，太原文水人也。冲幼孤静，罕杂童稚。信尚台山，乃为真容院浩威之高足也。纳戒后，器宇穹隆，?系包桑，出求禅法，历于年稔。内外之学优长，口海崩腾，良难抗敌。由是决意越重湖，登闽岭，盛谈文殊世界，闻者竦动。忠懿王王氏大施香茗，遣使送山寺焉。癸酉岁，至两浙，谒武肃王钱氏厚礼迟之，施文殊圣众供物香茶并钵盂一万。副应吴越诸州牧宰，皆刈俸入缘。仍泛海至沧州，运物入山。时降龙大师者率领弹压，缁伍畏焉，为其分散诸寺兰若，众寡均等。时徒侣坚请嗣主院，宣补僧官辖诸台寺院，命曰都纲，师号超化，居于僧上，若鯤凤之领鳞羽焉。十五年间，兴建梵宇，斋饲僧尼，不胜纪极。以天福元年遘疾，至九月五日迁灭。门人起塔，藏其灵骨舍利，至今存焉。

○晋今东京相国寺遵海传（彦求）

释遵海，姓李氏，谯郡人也。祖世不仕，母张氏梦神人授己宝珠，乃有娠焉。生且奇异，乳哺之时，善认人之喜愠。弥长，见寺观，必任步迟回，顾眄不舍。年甫十

一，礼亳州开元寺崇让律主为师范矣。诵《法华经》，二周毕部，由是勤于学问。殆登弱冠，受于戒律，持彼律仪，确乎转石。寻师西洛，问道梁园，初于智潜法师传《法华经》，讲精义入神，雌黄满口。梁开平二年戊辰岁，止相国寺药师院，首讲所业。至后唐长兴二年辛卯岁，门徒相续请其训导，已周一十九遍，升其堂者二十余人。洎天福二年，有五台山继颺大师精达《华严大经》，躬入东京，进晋祖降圣节功德。海仰颺师辩浪经江，下风附，乃允讲宣。海善下百川，蔚成藏海矣。梁宋之间以颺罢唱，请海敷扬，芟匝虚堂，缁素云萃，募四众镌石壁《华严经》一部于讲殿三面焉。嗟其油素，易罹炎上之灾；刻此贞珉，宁患白镬之食。工未告终，所施已足。又召僧俗人各念一卷，得二百四十人，成三部，四季建经会，近二十年，更无盼旷。复别施鬼神水陆法食，皆劝励庄严菩提心行矣。朝廷崇重，旌表其功，赐号真行大师。开运二年乙巳岁正月十六日示疾，策杖教诫门弟子讫，右胁而卧，口诵佛名，斯须长逝矣。享寿七十一，法腊五十一。门生奉遗旨葬于随河之北，寺庄东原也。

次有杭州龙华寺释彦求，姓叶氏，缙云人也。梁贞明中纳戒，造景霄律席，迴见毗尼秘，方将传讲，俄悟沓婆罗汉，反求坚固法。乃游闽岭，得长庆禅师心决。回浙，受丹丘人请，居六通院，其道望惟馨，与夫申椒菌桂争其芬烈矣。汉南国王钱氏钦其高行，命住功臣院。未归州治龙华寺，聚徒开演。求好营众事，务必身先，唯以利人为急，受施必归。常住房无关键，笥无扃锁，不容尼众礼谒，不苟声势。常属度戒，四远人聚，日供累千僧食，未尝告匮。言前后计饭巨万人焉。宋建隆中终于住寺云。

○晋曹州扈通院智朗传

释智朗，姓黄氏，单州城武人也。母刘氏梦数桑门圆坐为刘说法，历然在耳，遂妊娠焉。及生暨长，婉有僧之习气，淳靖简洁。苦辞亲出家，往曹州扈通院，事行满师，供给惟谨。洎乎剔染，成大比丘，学《四分律》、《净名经》，俱登阃阈。且曰“出俗之者何滞方守林，不能脱羁解绊乎？于广博知见无所堪能”。乃携瓶钵，南极衡阳，登岳栖般若寺，行胎息术，而览藏经事讫，入闽岭，曾无伴侣，形影相吊。逢猛兽者数四，皆欲呀口垂噬，又蹶步徐去矣。见洞山、雪峰二祖师决了禅训，有请问者，随答如飞，盖了达无羣矣。后旋本院，信向如归。而四事供僧，罔闻盼隙，四十余龄，役已无倦。以晋末丁未岁十一月二十三日迁灭。于时白衣饮痛，缁流茹伤，兽失猛以哀嗥，鸟停飞而宛转。或曰：“爱河苦海谁拯溺邪？”春秋七十七，法腊五十三。火葬，收舍利，起塔于院。朗为释子，衣物誓不经女人之手浣濯，不役徒弟。檀施之物像宝未省互用，盖以初律后禅，陶冶神用之故也。大名府少尹李铉为碑焉。

○汉东京天寿禅院师会传

释师会，俗姓巨，汉荆州刺史武之后，祖徙家北燕，遂为麟门人也。考讳知古，母赵氏。会童孩出俗，礼麟州温泉院道丕为师匠焉。业成，年满，受具于金台宝刹寺坛。梁开平中萍梗任飘于河朔，杯盂随步于江淮，乃抵汉南遇观音院岩俊，班荆话道，抵掌论心。且曰：“子还闻投子山有大同禅师已否？”曰：“闻而未见。”曰：“宜亟往焉。”及参大同，跬步之间，举扬之外，洗焉明白，其安坦然。乾化二年，来梁苑，谢俊公曰：“始者攸攸歧路，茫茫生死，紫实昧朱，狂斯滥哲。苟不奉师友指归，几一生空度。今以秽莠，请与薰同器而藏，可乎？”俊公与会肯德，留入法席。四年秋，有宝积坊罗汉院志修坚请会代居所住焉，苦盖五间而已。乃感檀越尚书左丞吴蔼、兵部侍郎张袞，若袁粲之谒宝亮，徐湛之礼惠通，共发奉章，赐额曰天寿焉。四海之僧，翕然而至。历三十五载，供僧二百余万，用其财宝，无少混淆，耿介可知也。天福七年，晋高祖以会行成于内，声闻于外，敕赐紫衣。开运元年，赐号曰法相。紫衣则藏以受持，师号则蔑其称谓。且曰：“我本不求名，名来自求我。知其白而守其黑，和其光而同其尘，世幻逡巡，时不我与。”三年七月二十六日累诸门人，帖然而灭，春秋六十七，夏腊四十八。阖维，收舍利数百粒，起塔于东郊汴阳乡也。刑部侍郎边归谠为《碑》颂德云。

○周宋州广寿院智江传

释智江，俗姓单，幽州三河南管人也。本富族游侠之子，虽乘竹马，？回火宅之门；乍玩沙堆，好作浮图之制。略闻竺干之教，必淡虑凝情，若潇湘之逢故人也。唐乾宁四载，始年十五，诣盘山感化寺遂成息慈，息慈业备。天复三祀，往五台山梨园寺纳木义法。目此担簦请业，择木依师，《净名》、《上生》二典精练，涣然冰释，心未属厌。梁龙德元年于商丘开元寺讲名数一支，所谓精义入神，散则繁衍，因著《瑞应钞》八卷，达者传之。生徒影附，缮写夥多。后唐同光元年，在微子之墟住院，缔构堂宇，轮奂可观。复塑慈氏、释迦二尊、十六罗汉像，咸加缋彩，克肖圣仪。善务方办，俄遘沉痾，以周显德五年孟秋顺终，享龄七十四。当属纆时，满院天人杂沓，若迎导之状，畴昔誓生睹史之昭应也。吏部员外郎李铉著塔铭云。

系曰：前人立义，皆按教文，岂得好恶随情，是非任见？已行前辙，不覆后车，胡不谨而循之？通曰：“夫创著述者有四焉：一前说极非，于文茫昧；一僻见谬解，领悟自乖；一乐繁嫌略；一好直怪迂。有一于此，无不著述也。江公《瑞应钞》未经披览，闻诸道路言亦济时须。苟不济用而变革古德义章，则何异以旧防无所用而坏之者，必有水败也。”

○周五台山真容院光屿传

释光屿，俗姓韩氏，应州金城邑人也。幼读儒书，有佐国牧民之志。频有神人梦中警策曰：“汝于佛法有大因缘。”遂投真容院附法威，侍其瓶锡，谨弟子之职。受

具后，诵《净名经》，彻简，每至依于义不依语。告喻本师而求听习，威寻许诺，遂诣太原三学院，涉乎寒燠，研？孜孜，屡改槐檀，乃讲《维摩》《上生》二座，忽谓同志曰：“余忆昔年每念依于义。迺栖学院，今讲二经，穷理见性，知果验因，得不依教起行，免背四依之行乎？”俄辞晋水，却返故山，戴《华严经》，绕菩萨殿，六时右旋礼佛。时晋高祖握图之三载也。名闻丹禁，遂赐紫衣。明年，授号通悟焉。山门僧官与大众坚命临坛，告辞不允。僧官谓曰：“师行解兼人，独善其已，良璞不剖，必见泣血。”辞不获已，度人三二载，坚求脱免。属少王嗣位，院乏主守，大众僉举：非屿而谁？辞曰：“此山四海客游之所，奈何不出院门有年岁矣，令知供养，有何所须？”虽免不从。自后供施委输。十八年中，供百万余僧。一夕云雾俱发，霰雪交零，屿之盖经白练一条可三四尺，忽尔不见。翌日深更，遗练俄还旧所也，盖阴神之送至欤？显德七年庚申岁十月示疾，谓诸子曰：“犹龙者厌乎大患，叹凤者悲于逝川，诸行无常，是生灭法。”言讫如蝉蜕焉。俗寿六十六，僧腊四十六。茶毗于东峰下，收诸灵骨，瘞于塔幢，舍利随缘供养焉。

○大宋东京观音禅院岩俊传

释岩俊，姓廉氏，邢台人也。诞育之来，蔚繁神异，挺身去缚，誓入空门。从捧戒珠，终身圆莹。乃持杯锡，言遍参寻，陟彼衡庐，登乎岷蜀。尝至凤林，錫逢深谷，见一区之晃耀，原七宝之纵横。时同侣相顾曰：“奇哉！可俯拾乎？”俊曰：“古人锄园触黄金，若瓦砾耳。苟欲怀之，自速祸也。傒吾野营覆顶，须此供四方僧。”言讫舍去，造谒舒州投子山主，问之曰：“客来昨宿何处？”俊曰：“在不动道常”曰：“既言不动，曷由至此？”对曰：“至此岂是动邪？”曰：“元来宿不著处。”然山主默认许之。迨思还赵，路出陈留，抵今东京。属乎梁少保陇西公资，即河阳节度使赠中书令芝之昆也，虽居贵仕，酷信空门，接俊谈玄，若刘遗民之奉贾远也。相与议舍第宅俾建仁祠。俊弗让违，以安形性。既考禅室而行祖风，慕道穷玄，堂宇盈塞。周高祖世宗二帝潜隐地，与俊布衣之交，每登方丈，必施跪礼。及其即位，延迟优渥，至乎朝达，见必稽顙，高谈虚论，若至宝山焉。以乾德丙寅三月示身有疾，弥留，弟子求医奉药，瞋目噤唇不食，垂诫门人后已，当怡颜俨肃，合掌诀众而灭。享龄八十五，坐夏六十五。初俊被朝恩，赐紫袈裟也，受而不服；锡净戒师号也，有而不称。属其策杖清羸，周祖敕侍者辈勿令大师一中食，俾其日吴更进？阍尼矣。俊诺而难遵。慈柔被物，暨乎自狭而广，实三院一门也。二堂东西，恒不减数百众。五十年盼，计供僧万百千数。京城禅林，居其甲矣。以其年四月八日归葬于东郊丰台村，白塔存焉。于日神都寺院各率幡幢，吹贝鸣铙，相继二三里。道俗送殡者万数。知制诰王著为碑昭懋厥德云。

○大宋西京宝坛院从彦传

释从彦，姓米氏，燕人也。始自识环，寻知跪橘，颀昂挺质，豁达为性。禁。年距十五，父母听许出家于并部慧觉禅院也。受戒后，经江鼓鼙，论海化鲲，流辈畏之，

咸知宗奉。乃怀心于祖教，望攻王于他山。由是北别冰天，南观桂海，不虞恶瘴，唯慕丛林，欣遇龙牙山禅师为决所疑，蔚成达者。后唐清泰丙申岁还游嵩少，洛中始安，人情辑睦，彦营构禅坊，延聚缁侣而供养之。历晋、汉、周三朝，皆加恩命，乃曰：“宠辱若惊，吾无惊久矣。然俗谛门中，感世主以绋绣缘饰朽木者哉。”以开宝二年八月三日示疾而终。四年辛未，改权从久，瘞于层塔焉。

○大宋东京普净院常觉传

释常觉，姓李氏、陈留人也。肇为鞠子，气调绝奇，入乡校中讽读经籍，群童咸出其下。洎登弱冠，往庐山游二林，陟五老，乃礼归宗寺禅师，充苦行焉。梁乾化二年，蒙去饰披缁矣。明年，于东林甘露戒坛纳解脱木义。厥后修身践言，虽三藏俱留于意表，而以心学为究尽之务。复入五台山，礼妙吉灵迹。迨后唐天成三载，始于东京丽景门之右树小禅坊，敕额为普净焉。而逐月三八日设闍京僧裕其或香汤汲注，樵蒸失供，觉必令撤小屋，抽榱桷而助爨焉。有公王仰重，表荐紫衣，坚拒弗受，汲汲以利行济物为己任耳。开宝四年十二月三日遘疾，轻安无挠。十一日告众，右肋而化。享年七十六，僧腊五十六。茶毗收舍利，五色磊落无算。尝居京邑，屡登斯院，览北海陶尚书偈为湘东张仲荀《序诗赠觉》而云：“起后唐天成至汉乾祐，每黑白月三取八日，浴京大众，累岁费钱可一百三十六万，数计缗千万矣。虽檀施共成，实觉公化导之力也。嘻！大火之下，陈留古封，周秦已来，战伐之国，人物众而土风尚利，舟车会而货殖惟错。昔梁惠王贤诸侯也，尝谓孟轲曰：‘何以利吾国？’是知礼让之化，不胜于好利之心，明矣。且梁去鲁千里而近，道犹不同，矧十万八千里乎？梁王、孟子，同世之人也，心或有异，况瞿昙上人乎？彼孟氏属斯文未丧，不能扬素王之道，今上人当去圣逾远，卒能行法王之教，苟非三业内净，六尘外清，以至公之行化于人，孰以至公之心受于化也1陶重叙曰：“自灵山覆篲，法海烟流，玉毫晦而微言绝，金杖折而异端作。惟上人也色空等观，物我都亡。麻麦一斋，自同禅悦；炎凉一纳，仅蔽枯形。前后王臣欲上章乞以大师为号，请以紫染方袍者，皆确而拒之”云云。张仲荀赠觉钵盂拄杖草屨，各用五言为章，刊于小碣。其为名流硕学旌别有如此者。

○大宋杭州报恩寺永安传

释永安，姓翁氏，温州永嘉人也。少岁淳厚，黄中通理。遇同郡征大师凤鸣越峤，玉莹蓝田，获落文心，沉潜学奥，以其出乐安孙癭拾遗之门也，而有慕上之心，往拜而乞度。然征性高岸而寡合，而安事之也曲从若环，盖哀其幼知择师耳。天成中，随侍出杭，俄有从十二头？之意，潜逃欲登闽岭，参问禅宗。属封强荆棘，却回结庵于天台。后遇韶禅师法集，顿遣群疑，重来礼征。咄之曰：“弃背孝养，尔自速辜，遗行于斯，还有裨补前咎计否？”安跪对曰：“从来无事，请用塞责。”征肯颌之。汉南国王钱氏召居报恩寺，署号禅师焉。乃以《华严》李《论》为会要，因将合经，募人雕板，印而施行。每有檀施，罕闻储畜，回舍二田矣。以开宝甲戌

岁终而焚之，其舌存焉。累投火锻，色虽同乎炽炭，寒则柔弱，今藏普贤道场中。春秋六十四，法腊四十四云。

○大宋钱塘永明寺延寿传

释延寿，姓王，本钱塘人也。两浙有国时为吏，督纳军须，其性纯直，口无二言，诵彻《法华经》，声不辍响。属翠岩参公盛化，寿舍妻孥，削染登戒。尝于台岭天柱峰九旬习定，有鸟类尺晏鸟，巢栖于衣榻中。乃得韶禅师决择所见，迁遁于雪窦山，除海人外，瀑布前坐讽禅嘿。衣无缁纛，布襦卒岁。食无重味，野蔬断中。汉南国王钱氏最所钦尚，请寿行方等忏，赎物类放生。泛爱慈柔，或非理相干，颜貌不动。诵《法华》计一万三千许部。多励信人营造塔像。自无贮畜，雅好诗道，著《万善同归》、《宗鉴》等录数千万言。高丽国王览其《录》，遣使遗金线织成袈裟、紫水精数珠、金澡罐等。以开宝八年乙亥终于住寺，春秋七十二，法腊三十七。葬于大慈山，树亭志焉。

○大宋西京天宫寺义庄传

释义庄，姓张氏，滑台人也。当免怀之日，及就传之秋，神彩克明，尘机顿去。乃于本府开元寺归善财之列，从升戒德。因乐游方，始于洛邑采听《法华》，见识过人，阐扬训物，众请居九曜院焉。匪亏法食，用济往来。慈以利生，始末无间。建隆初左散骑常侍申公奏赐紫衣，禀学僧尼三十余员。庄性敦勤，进讲外兢兢五十年间，二时礼忏，至老不替。于太平兴国戊寅年八月奄终，俗寿七十八，僧腊五十九。明年二月，迁塔于龙门菩提寺西焉。

○大宋西京广爱寺普胜传

释普胜，姓张氏，深州陆泽人也。幼岁情爱褊薄，俄决志趋五台山华严寺，师事超化大师。或问之曰：“子胡以越山逾域而求出家？彼饶阳者，岂无仁祠哲匠乎？”胜对曰：“附神骥可以日千里矣。某知妙吉净刹感征胶戾，令我小凡速成果证，可不是乎？”众聆斯说，曰：“任气小儿，有此高识，我曹俱弗如也。”胜曰：“某非衽金革死而不厌之徒也，愿入慈门而思利物耳。”迨乎受具，南临潞府讲通《上生经》矣。闻崇法大师传《唯识论》，盛化洛都，往从学焉。凡百章疏，经目便识之。不几稔间，习通精贍。胜所传者《中山贞辩钞》，讲多误失所然，昌言曰：“繁略不均，解判非当。”乃删多补少为四卷，行于世。太祖神德皇帝赐紫衣师，号曰宣教也。以太平兴国四年秋七月四日示疾，终于净土院，享寿六十三，坐四十三夏。门人等收舍利葬于龙门山宝应寺西阜，建塔旌表之。

○大宋东京开宝寺师律传

释师律，范阳人也，姓贾氏，大丞相魏国公耽之后，《唐书》有传。律弱龀端谨，不与群童斗伎。裁十五岁，于悯中寺落发，礼贞涉为师。严肃垂勖，所履不出边幅之外。涉默异之曰：“不可屈身下位而抑其名节乎？成比丘已，可去游方。”律奉训南逝，得其禅要。回锡故乡。时梁世迨大周朝，其间帝王重臣，率皆宗仰。居于夷门山，旧封禅也，营构乎殿宇圣仪，丰厨秘藏，供僧饶美。约勒后生，别院翕如，罔违彝宪。朝廷以紫衣徽号，用旌厥德，律视之蔑如也。一日谓弟子庶几曰：“吾无愿不报，厥龄欲颓，汝宜知之。勿俗情而悲悼也。”乾德二祀正月二十三日而终，春秋八十一，法腊六十二。太平兴国五年三月，改葬于北部浚仪之原，进士贾守廉为塔铭焉。

论曰：佛出于世，经译于时，大要在乎果因，所推归乎罪福。罪也者，下三涂之阶陞也。福也者，上诸圣之阶陞也。阶陞是同，上下有异耳。此命章曰兴福者，乃欲利他焉。如秤低昂，如室明暗，则知二事必不同时。又类薰蕕不同器而藏，尧桀不同国而治也。凡夫气分，唯说罪多。圣者品流，但闻福厚。顺性故易造，逆意故难修。修有多门，行有众路。大约望檀波罗蜜多令度无极也。始则人天福行，施食与浆，桥梁义井。次则轮王行中下品善。上品十善者，则梵天福行也。一造偷婆，二补修故寺，三请佛转法轮。次则二乘净福行，同三品善，止自利功强耳。次究尽位福行，乃成二严庄严相好。从三轮无碍，见万法体空，获利殊多，尽未来际。夫如是福之广矣大矣，乃知圣者为福则易尔。何耶？纯净之故也。凡夫则反是，易薰染之故也。是以佛亦为穿针之福，知福不宜厌焉。目连然燎，迦叶蹋泥，无尽意贡瓔珞宝珠，沓婆罗分僧卧具。伊皆大人有作，圣者权方，欲其因罪不厌除，福不厌齟齬以教传岭外，法布中原，年所弥深，行持渐薄，内众修福，就彼持门，先哲息愆，行其忏法矣。夫修理忏也，淡虑观心，心无所生，生无所祝当尔之时，顺违无相，则罪灭福生之地也。若行事忏也，心凭胜境，境引心增，念念相资，绵绵不断，礼则五轮投地，悔则七聚首心，或期瑞而证知，乃见罪灭之相也。昔者齐太宰作净住法，梁武帝忏六根门，澄照略成《住法图》，真观广作《慈悲忏》。至乎会昌年内，玄畅大师请修加一万五千《佛名经》，是以两京礼经，则口唱低头，旋磬一声，谓之小礼。自淮以南，民间唯礼《梁武忏》，以为佛事。或数僧呗，歌赞相高，谓之禳忏法也。其有江表行水忏法者，悔其滥费过度之愆，此人伪造，非真法也。又有剽古人逐字礼《华严》、《法华经》，以为礼无漏法藏也。由此有四众之徒，于字上安南无，字下安佛，诚叨滥也。有倡言曰：“但务生善，唯期灭罪，何判为非邪？”通曰：“翻译之后，传行已来，若天上之恒星，如人形之定相。或别占一座，便曰客星。或新起肉隆，乃为胼赘者耳。君不见《春秋》夏五邪，郑杜诸家岂不能添月字乎？盖畏圣人之言，成不刊之典，不敢加字矣。夫子曰：‘吾犹及史之阙文。’将知佛教还可加减否？如慧严重译《泥丸经》，加之品目，忽梦神人怒责，声色颇厉曰：‘《涅槃尊经》，何敢辄尔轻加斟酌！是知兴福不如避罪，斯言允矣。今则不勤课励，靡事增修，因搜颖脱之数员，贵显孟安之三宝，就今有作，何代无人？或京兆开乎海池，或终南建乎兰若，铸大悲之铜像，造相国之伽蓝。或代病利人，或护生掘土，铸钟感瑞，立刹参云，刻像繁多，修台浩博，披榛平田之梵

宇，脱样阿育之浮图，刊石为经，鸠财立藏。或治病于井络，或化人于廊羸。如斯人也，入殊邦之乡导，合二姓之良媒。日月伏根，照洞庭之幽暗；乾坤玄凿，开混沌之窍端。所行博哉，续运长矣！公羊子有之曰：‘是上之行乎下也。’《诗》云：‘尔之教矣，民胥效矣。’愿吾徒望上而学之。”

卷二十九

◎杂科声德篇第十之一（正传二十六人附见六人）○南宋钱塘灵隐寺智一传

释智一者，不详何许人也。居灵隐寺之半峰，精守戒范，而善长啸。啸终，乃牵曳其声，杳入云际，如吹箳叶，若揭游丝，徐举徐扬，载哀载咽，飏飏凄切，听者悲凉，谓之哀松之梵。颇生物善，或在像前赞咏流靡。于灵山洞边，养一白猿，有时蓦山逾涧，久而不还。一乃吮吻张喉作梵呼之，则猿至矣。时人谓之白猿梵召。一公为猿父，犹狙公也。其后涧边群狙聚焉。每至众僧斋讫，敛生饭送猿台所，后令山童呼三二声，则群猿竞至。洎乎唐武宗废教，伊寺毁除焉，鞠为茂草之墟，饭猿于台事皆堙灭。一师不详所终。

○元魏洛阳慧凝传

释慧凝，未知何许人也，栖止洛邑而无异艺，正修练心戒耳。尝得疾暴终，七日而苏，起说冥间报应及见区分，更无毫发之差。所睹者五沙门，一是宝明寺智圣，以坐禅苦行得升天堂。次一是般若寺道品，以诵《涅槃经》四十卷，同前智圣。次是融觉寺昙谟最称讲《涅槃》、《华严经》，领徒千数。琰摩王曰：“讲经者心怀彼我，以骄耽物，比丘中第一粗行。今唯试坐禅诵经。”最曰：“贫道立身已来，唯好讲导，不能禅诵。”王曰：“付司。”即有青衣数辈，拥送最向西北门，屋舍皆黑，似非好处。次是禅林寺道恒，唱云：“教导劝诱四辈檀越，造一切经、人中像十躯。”王曰：“沙门之体必须摄心守道，志在禅诵，不干世事，不务喧繁。虽造经像，止欲得他财物。既得财物，贪心即起。既长贪行，三毒炽然，具足烦恼。”与最同入黑门。第五是灵觉寺宝明，自称未出家时，尝作陇西太守，造灵觉寺。即弃官入道，虽不禅诵，礼拜不阙。王曰：“卿作刺史之日，曲理枉法，劫夺民财，假作此寺。非卿之力，何劳说此？”亦付青衣送入黑门矣。凝由此省悟，最先见王，属吏检寻名籍误追摄耳。时胡太后闻之，遣黄门侍郎徐纥依凝之说，散访验寺额并僧名有无，奏报云：“城东有宝明寺，城内有般若寺，城西有融觉、禅林、灵觉三寺，并智圣、道品、昙谟最、道弘、宝明等，皆实有之。”太后称叹久之，诏请坐禅诵经者一百僧，常在内殿供养焉。续有诏不听比丘持经像在街路乞索。如私有财物造经像者任意。凝入白鹿山隐居修道，自此京邑城下比丘多修禅观，诵持大部经法焉。

系曰：昙谟最坐讲法而人我，因入黑门中。若禅诵者，人我随增，知亦不免。最与道士姜斌争论，护法之功可补前过。无谓传法之人皆堕负处。胡后偏见不亡，吁哉！

○唐成都府法聚寺员相传

释员相，蜀人也。七岁出家，博综内外，善属文，时号奇童。内修律范，人无间然。龙朔元年，有疾而终于此寺。将启手足，房内长虹若练而飞上天，寺塔铃索无风自鸣。其大门屋壁画剥落，每夜有鼓角声，经百余日方息。从此鸟雀不栖其屋。咸亨四年，甘露降于讲堂前棕榈树焉。相终，弟子收文集三十余卷。寺中石像碑，相作辞，龚灵旷同撰，是欤。

○唐越州妙喜寺僧达传

释僧达，姓王氏，会稽人也。稚齿英奇，不参戏弄，于龟山妙喜道场出俗。其寺南梁初建。后乐游方，见黄梅忍禅师，若枯苗得雨，随顺修禅，罔有休懈。遇印宗禅师，重磨心鉴。光州见道岸律师，更励律仪。四众依归，如水宗海。开元七年示疾而终，春秋八十二云。

○唐京兆神鼎传

释神鼎者，不详何许人也。狂狷而纯直，发垂眉际。每持一斗巡长安市中乞丐。得食，就而食之。人或施粗帛巾布，锦绮罗縠，并缀联衣上而著，且无选择。尝入寺中，见利贞法师讲于座前，倾听少时，而问贞曰：“万物定已否？”贞曰：“定。”鼎曰：“阇梨若言定，何因高岸为谷，深谷为陵，有死即生，有生即死？万物相纠，六道轮回，何得定邪？”贞曰：“万物不定。”鼎曰：“若不定，何不指天为地，呼地为天，召星为月，命月为星？何得不定邪？”贞无以应之。时众惊其辩发如流。贞公奥学，被挫其锋，颇形惭色。张文成见之，叹嗟谓之曰：“观法师迅辩，即是菩萨行位人也。”鼎曰：“菩萨得之不喜，失之不怨，撻之不怒，辱之不嗔。鼎今乞得即喜，不得即怨，撻之即怒，辱之即嗔，由此观之，去菩萨远矣。”时众错愕，合掌而散焉。

系曰：答人之问，迟巧不如拙速。今传家隔几百年，辄伸酬对。通曰：“谷变陵迁，生来死往，万类相纠，五道轮回，正是不迁之法，可非定耶？经云世间相常住是也。又言天地星月，各据其伦，终归磨灭。可非不定耶？经云劫火洞然，大千俱坏是也。今不坏世间相而谈实相，可非定不定耶？虽定不定，俱解脱相欤？又言有喜怒非菩萨者，菩萨虽喜怒非喜怒，非菩萨而谁也？今聊雪利贞之郁悒欤？”

○唐京兆泓师传

释泓师者，齐安人也。神龙中来游京辇，简傲自持，而罕言语。语则瑰怪，颇善地理之学，占择莹兆，郭景淳、一行之亚焉。而出入于郾公韦安石之门。与韦既密，一日谓之曰：“贫道于凤栖原见一段地，约二十亩，有龙起伏之形势，有藏此者必累世居台鼎。”韦曰：“老夫有别墅在城南，候闲隙陪国师访地，问其价几何。同游林泉，又资高兴。”异日，韦寻前约，方命驾次，韦公夫人曰：“令公为天子大

臣，国师通阴阳术数，奈何潜游郭外而营生藏？非所宜也。”遂止。韦曰：“舍弟滔有中殇男未葬，便示此地。”泓曰：“如贤弟得此地，不得他将相，止列卿而已。”滔买葬中殇，后为太常卿礼仪使而卒。泓每行视山原，即为图状，尝自洛东言于张说曰：“缺门道左有好山冈，丞相可用之。”说曰：“已位极人臣，吉孰过此？”泓曰：“无人胜此。”遂咨源监察乾曜，曰：“先人有遗旨矣。”后曜请假东洛迁奉而回，已经年矣。泓再经缺门，其地已成莹兆，问居人，曰：“源氏之松柏也。”泓曰：“冥数合归源氏，坐可待其变化。”不数年，曜果登庸焉。泓曾诫燕公曰：“宅勿于西北隅取土。”后成坑，三二处为穴，泓惊谓燕公曰：“祸事！令公富贵一身耳。更二十年，祸及贤郎耳。”及均、昶受禄山伪官，肃宗复京，以减死论，太上皇苦执令处斩。皆符泓言。然中、睿朝皆崇重泓，号国师。占相之言，未尝差谬。

○唐洛阳罔极寺慧日传（真法师）

释慧日，俗姓辛氏，东莱人也。中宗朝得度，及登具足，后遇义净三藏，造一乘之极，躬诣竺乾，心恒羡慕。日遂誓游西域。始者泛舶渡海，自经三载，东南海中诸国，昆仑、佛誓、师子洲等，经过略遍，乃达天竺，礼谒圣迹。寻求梵本，访善知识，一十三年。咨禀法训，思欲利人，振锡还乡，独影孤征。雪岭胡乡，又涉四载。既经多苦，深厌阎浮，何国何方，有乐无苦？何法何行，能速见佛？遍问天竺三藏学者，所说皆赞净土，复合金口；其于速疾，是一生路；尽此报身，必得往生极乐世界，亲得奉事阿弥陀佛。闻已顶受，渐至北印度健驮罗国。王城东北有一大山，山有观音像，有志诚祈请，多得现身。日遂七日叩头，又断食，毕命为期，至七日夜且未央，观音空中现紫金色相，长一丈余，坐宝莲华，垂右手，摩日顶曰：“汝欲传法，自利利他，西方净土极乐世界弥陀佛国，劝令念佛诵经，回愿往生，到彼国已，见佛及我得大利益。汝自当知净土法门，胜过诸行。”说已忽灭。日断食既困，闻此强壮。及登岭东归，计行七十余国，总一十八年，开元七年方达长安。进帝佛真容、梵夹等，开悟帝心，赐号曰慈鴈三藏。生常勤修净土之业，著《往生净土集》，行于世。其道与善导、少康异时同化也。又以僧徒多迷五辛中“兴渠”。“兴渠”人多说不同，或云芸苔胡葵，或云阿魏，唯《净土集》中别行书出云：“五辛，此土唯有四，一蒜，二蓴，三葱，四薤，阙于兴渠。”梵语稍讹，正云形具，余国不见。回至于阆，方得见也。根粗如细蔓，菁根而白，其臭如蒜，彼国人种取根食也。于时冬天到彼，不见枝叶。苔葵非五辛，所食无罪。”日亲见为验欤？以天宝七年卒于住寺，报龄六十九。葬于白鹿原，成小塔焉。余姚休光寺释真法师，金华人也，俗姓王氏。真？11辞家，童蒙悟道，发大精进，坚持戒地。一门之中，数人缁服，真学习师古，义成先圣，八部经理，宛在掌中，三乘法源，尽于度内。天宝六年，太守秦公、长史狄公知其行高，遂以名荐，主休光寺焉。二公常相谓曰：“真公通深妙法，玄无上义，问一得三。言发响应。昔利涉辩博，僧会智周，与之齐驱，未可同日。”以其八年终于寺，本县令王？述德刊铭，洪元？书焉。

○唐越州大禹寺神迴传

释神迴，未详何许人也。幼入法流，齐庄自任节高行峭，不恶而严。晚年慕称心寺大义律师，同习三观于天台宗，得旨于左溪禅师，即宝应年中也。加以辞笔宏赡，华藻纷纭，为《朗师真影赞》、《法华经文句序》，冠绝于时，为世所贵。不详厥终焉。

○唐京兆镇国寺纯陀传

释纯陀者，本西域人也，梵名无由翻就华言也。从游京邑，人所钦重。上元中便云东渡，人见之，颜容若童稚之色，言已年六百岁矣。或谓为八十岁人也。言谈气壮，举动不衰。代宗皇帝闻之，诏入，礼遇极丰，俾求留年之道。陀曰：“心神好静，今为尘境汨之，何从冥寂乎？若离简静外，欲望留年，如登木朵芙蕖，其可得乎？陛下欲长年，由简洁安神。神安则寿永，寡欲则身安。术斯已往，贫道所不知也。”帝由是笃重之，以永泰三年预知必逝，遣弟子赍衣钵进上，帝赐弟子紫衣。陀终于镇国寺焉。

○唐天台山国清寺道邃传

释道邃，不知何许人也。幽识远晤，执志有恒，悬解真宗，不由邪术。未传隋智者教道，素得玄微，荆溪之门，杳难窥望。大历中湛然师委付《止观辅行记》，得以敷扬，若神骥之可以致远也。于时同门元浩迥知畏服，不能争长矣。贞元二十一年，日本国沙门最澄者，亦东夷卉服中刚决明敏僧也。泛溟渤，达江东，慕天台之法，求綽师之禅决。属邃讲训，委曲指教，澄得旨矣。乃尽缮写一行教法东归。虑其或问从何而闻，得谁所印？俾防疑误，乃造邦伯作援证焉。时台州刺史陆淳判云：“最澄闍梨，形虽异域，性实同源，特稟生知，触类玄解。远传天台教旨，又遇龙象邃公，总万行于一心，了殊涂于三观，亲承秘密，理绝名言。犹虑他方学徒未能信受，所请印记，安可不任为凭云。”澄泛海到国，赍教法指一山为天台，号一寺为国清，风行电照，斯教大行。倭僧遥尊邃为祖师。后终于住寺焉。

○唐怀安郡西隐山进平传

释进平，姓吴氏，京兆人也。早出家于永安山明福院，风表端雅。诸经大论，皆所研寻。销文炼注，令人乐闻。末思禅观，于洛下遇荷泽会师了悟，且曰：“甚矣，不自外知者，所知难乎哉！”后至唐州遂居西隐山。刺史郑文简请入城，阐扬宗旨。示灭年八十一，大历十四年三月入塔。

○唐宁州南山二圣院道隐传

释道隐，姓王氏，彭原人也。风宇高峙，情性宏淡。少脱尘劳，誓从冲漠。既循师范，因愿游方，得荷泽师顿明心要。迨旋乡上，道声洋洋，慕其法者，若登华阴之市也。匪召员臻，檀施丰？，郁成精舍焉。以大历十三年三月晦嘱累四部，从于中夜趺坐而终，春秋七十二，法腊三十五。弟子辩真建塔藏焉。今师资二座全身不朽矣。议者以为得道真正，其器亦然，譬犹炼册之鼎，药成鼎亦化金矣。在《华严》有诸菩萨成就如虚空忍，得无来身，以无去故。得不生身，以不灭故。得不聚身，以无散坏故。其隐师之谓欤！

○唐温州陶山道晤传

释道晤者，不知何许人也。高趣放荡，识量难赅。末住永嘉陶山侧精舍，则隐居修《真诰》之所也。大历中，代宗为陶真君树此精舍，晤于此进修靡怠，人亦倾仰。一夕加趺而卒，身肉无沮，如入三昧，议不焚葬。后五年，忽举右手，状若传香。州官民庶异之，以事奏，敕赐紫袈裟，谥曰实相大师。至今塔中，州民祈祷，幡花填委焉。

系曰：凡诸入灭举其指者，盖示其得四沙门果之数也。昔求那跋摩举三指而灭，言已证二果欤？其次法京垂灭，屈三指。慧景反握二指，捋之还屈。今晤之伸指，岂不同诸？

○唐京兆欢喜传（无侧）

释欢喜，不知何许人也。性无羁束，慈忍宽和，人未尝见其愠色，故号之焉。观国之光，至于京辇，贵达下民延之，少见违拒。言语不常，事迹难测。德宗皇帝闻而重之。兴元十二年敕永泰寺置戒坛度僧，时喜与保唐禅宗，别敕令受戒，缁伍荣之。至其年六月十九日，卒于本寺焉。有会稽云门寺释无侧者，外国人，未知葱岭南北生也。若胡若梵，乌可分诸？建中中越磧东游，得意则止，度其冬夏。后栖越溪云门寺修道。然善体人意，号利智梵僧焉。相传则是康宝月道人后身也，必尝以事征验而知。与名德相遇，谈话终夕。吴兴皎然题侧房壁云：“越山千万云门绝，西僧貌古还名月。清朝扫石行道归，林下眠禅看松雪。”其高邈之状在昼辞焉。

○唐湖州杼山皎然传（福琳）

释皎然，字昼姓谢氏，长城人，康乐侯十世孙也。幼负异才，性与道合，初脱羁绊，渐加削染。登戒于灵隐戒坛守直律师边，听毗尼道，特所留心。于篇什中，吟咏情性，所谓造其微矣。文章隽丽，当时号为释门伟器哉。后博访名山，法席罕不登听者。然其兼攻并进，子史经书，各臻其极。凡所游历，京师则公相敦重，诸郡则邦伯所钦，莫非始以诗句牵劝，令入佛智，行化之意，本在乎兹。及中年，谒诸禅祖，了心地法门，与武丘山元浩、会稽灵澈为道交，故时谚曰：“较之昼，能清秀

。”贞元初，居于东溪草堂，欲屏息诗道，非禅者之意，而自诲之曰：“借使有宣尼之博识，胥臣之多闻，终朝目前矜道侈义，适足以扰我真性。岂若孤松片云，禅座相对，无言而道合，至静而性同哉？吾将入杼峰，与松云为偶。”所著《诗式》及诸文笔，并寝而不纪。因顾笔砚曰：“我疲尔役，尔困我愚，数十年间了无所得。况汝是外物，何累于人哉？住既无心，去亦无我，将放汝各归本性，使物自物，不关于予，岂不乐乎？”遂命弟子黜焉。至五年五月，会前御史中丞李洪自河北负谴，再移为湖守，初相见未交一言，恍若神合。素知公精于佛理，因请益焉。先问宗源，次及心印，公笑而后答。他日言及《诗式》，具陈以宿昔之志。公曰：“不然。”固命门人检出草本，一览而叹曰：“早年曾见沈约《品藻》、慧休《翰林》、庾信《诗箴》，三子所论殊不及此，奈何学小乘褊见，以宿志为辞邪？”遂举邑中辞人吴季德，梁常侍均之后，其文有家风，予器而重之。昼以陆鸿渐为莫逆之交，相国于公谏、颜鲁公真卿命裨赞《韵海》二十余卷。好为《五杂俎篇》，用意奇险，实不忝江南谢之远裔矣。昼清静其志，高迈其心，浮名薄利，所不能啖。唯事林峦，与道者游，故终身无堕色。又兴冥斋，盖循绕面然，故事施鬼神食也。昼旧居州兴国寺，起意自捐衣囊施之。尝有军吏沈钊，本德清人也，夕从州出，乘马到骆驼桥，月色皎如。见数人盛饰衣冠，钊怪问之，“如何到此”？曰：“项王祠东兴国寺然公修冥斋，在兹伺耳。”钊翌日往覆，果是鬼物矣。又长城赴胥钱沛行役，泊舟吕山南，见数十百人，得非提食器负束帛，怡然语笑而过。问其故，云：“赴然师斋来。”时颜鲁公为刺郡，早事交游而加崇重焉。以贞元年终山寺。有集十卷，于谏序集。贞元八年正月敕写其文集入于秘阁，天下荣之。观其文也，？？而不厌，合律乎清壮，亦一代伟才焉。昼生常与韦应物、卢幼平、吴季德、李萼、皇甫曾、梁肃、崔子向、薛逢、吕渭、杨逵，或簪组，或布衣，与之交结，必高吟乐道。道其同者，则然始定交哉。故著《儒释交游传》及《内典类聚》共四十卷、《号呶子》十卷，时贵流布。元和四年，太守范传正、会稽释灵澈同过旧院，就影堂伤悼弥久，遗题曰：“道安已返无何乡，慧远来过旧草堂。余亦当时及门者，共吟佳句一焚香。”其遗德，后贤所慕者相继有焉。又唐黄州大石山释福琳，姓元氏，荆州人也。父为襄阳判司，素崇释氏。琳幼好佛门，恒循检操，早知割爱，就玄静寺谦著师下剃染。登满足法已，躬礼荷泽祖师，乃契真心。后至黄陂，剪茅营舍，终成大院，安集四方禅侣。琳终时年八十二，兴元二年四月入塔。

○唐安陆定安山怀空传

释怀空，俗姓商氏，河阳人也。膏粱之子，幼且矜庄。乃辞所亲，就本州大都山广福院出家。大明禅师默识空之器局不常，教诵群经。纳法之后，观方京都。属北秀禅师阐化，造而决疑。后往安陆定安山，倏遇一叟，劝空镇压此川，我沾大利。乃结茅而止，前叟即土地神耳。寻因村民逐虎入山，见空欢喜而白之曰：“此中多虎暴，村落不安，愿和尚示以息灾之法。”空曰：“虎亦众生也，若屠杀于彼，彼必来报。迭相偿报，何时断期乎？老僧为诸君计者，善可禳去。”乡人曰：“愚下无知，唯教所在。”空曰：“汝归舍，同心陈置道场，施设大会。”空预法筵。至日

之夕矣，有一虎于庵前瞑目伏地。空曰：“咄哉恶类，一报未灭，更增宿殃，噬人伦也。天不见诛，死当堕狱。吾悯汝哉！虎被责已，忽迟回而逝。明日斋散上山，其虎在庵前，领其七子，将斋余掷之，各食讫。为其忏悔，七虎相次俱亡。百姓胥悦，且曰：“从师居此，俗无疵疠，仍季谷熟。”致拜而退。时张辽大夫为州牧，遣府吏慕容兴往请入州，空谢病不起。部领工匠，为建禅宫。毕，示疾而终，享年八十三。贞元三年三月十六日火葬，收舍利入塔焉。

○唐澧州慧演传

释慧演，姓苗氏，襄阳人也。父为东平纠曹。演幼入开元寺，闻经欢喜，求于辩章法师所度脱。章日讲《涅槃经》，演常随听入神。既通深义，复能讲谈。一日结侣同游华下，思登毛女峰，观仙掌，路出洛中，乃参荷泽祖师，通达大观。因入南岳，遂住澧阳，江南得道者多矣。贞元十二年终，享龄七十九云。

○唐荆州国昌寺行觉传（皓玉）

释行觉，姓刘氏，巨鹿人也。稚岁英敏，立不易方，负志出家，亲难沮劝。早投本部永泰伽蓝，受业纳戒。后于洛都遇会禅师开悟玄理，秉心矫迹。游方见江陵古寺，殿宇摧堕，阒而无人。觉卸囊挂锡。明日，见樵夫惊怪，言“此是国昌寺，废已三周”。将知人事相因，道从缘会，学者至矣，乡人来矣，郁成一寺。时节使崔尚书请召入城，谢而不赴。檀施继臻，乃兴盛化。贞元十五年告终，年九十二。荆楚之人营塔焉。又南岳山释皓玉者，赵氏之子，上党人也。出尘于法清寺，后于荷泽会下，大明心印，入岳中兰若养道。衡阳太守王展员外倾重。终时年八十有余，兴元中入塔云。

○唐鄂州开元寺玄晏传

释玄晏，江夏人也，姓李氏。祖善而博识多学，注《文选》，行讲集于梁宋之间。考邕，北海太守，《唐书》有传。晏稚昧之龄，决志离俗，至德初年，诵经高第，依僧崇真剃落，配住开元寺。大历三年，从大闍梨真悟受具足法，便寻律范，目不视靡曼，足不履邪径，于四仪中，无终食之间违教。仪形峭拔，眉目秀朗，如孤鸿野鹤，独立迥泽，望风瞻想，自有远致。性多分剂，苟与恶比丘共住，遑遑然如以？罗炭浴身也。不出户牖，焚香扫地，端坐终日。人不堪其忧，而晏居之，以为三禅之乐不敌也。晏少习毗尼，长学《金刚》，解空破相，臻极玄奥。而闻《律藏》有一时外学之说，或赋诗一章，运思标拔，孤游境外。彭城刘长卿名重五言，大嗟赏之。由是风云草木，每有赋咏，辄为工文者之所吟讽也。晏房舍在寺之北隅，颇为湫陋，凡当时名士共营草堂，有若陈郡袁滋、赵郡李则、卢来卿、于文炫、祭直偕檀舍同缔构也。鄂岳连师何公旌其行业，请居晋安，不移其志。建中伊始，符载与杨衡、李演约晏为尘外之侣焉。以贞元十六年九月十四日示灭，春秋五十八，僧

腊三十四。迁塔于黄鹤山南原也。

○唐南岳澄心传

释澄心，姓朱氏，东海人也。厥父任济源令。天宝中，安史之乱遇害。心稚齿随母氏至河内，贫极，母即从人。心不乐随嫁。心之志气不群，乃投应福寺智明法师求教勖，披削登戒。后云游鸟宿，务急参玄于秀师高足门下，了其法要。乃观诸方名迹，遂止衡岳。请益之僧，摩肩骈足。时太守吴宪忠请心入州治，谢而不行。再命栖于龙兴寺，来问道者，丈室恒满。贞元十八年壬午十一月示灭，春秋七十六，以其月二十七日入塔云。

○唐杭州天竺寺道齐传（法如）

释道齐，俗姓赵氏，钱塘人也。幼而察慧，器度浩然，入于庠序，经籍淹通。偶立当衢，见僧分卫，行讽《净名经》，冥然喜之。且召入家设食，问僧“为居何寺”？答曰：“定水伽蓝。”因请父母出家，母曰：“吾生汝时，梦手擎日月，尝占是梦，云贵子，有五等之分。脱或舍家，吾无望矣。”由是往定水从师。年十七，进具，习毗尼法。复投灵隐寺，学《华严经》义。自尔于天竺寺修习禅定，行杜多行。其山有石窟，齐于中坐，忽巨蟒矫首？呀为吞噬之状，愀然不动。时有虎豹近于石室，群鹿时时褻扰。又山椒乏水，以锡杖？地，其泉迸流，实供其用。贞元二十一年，四方学者劝请讲《华严经》，时雪飘飞，忽生花二本，状若芙蕖，熠飏光发，观者嗟叹，见所未见。齐道誉惟馨，其节俭恶衣恶食，人所不胜。后终于山寺焉。又唐太行山释法如，俗姓韩，慈州人也。少为商估，心从平准，至今东京相国寺，发心依洪思法师出家。隶业偕通，遂往嵩少间，游于洛邑，遇神会祖师授其心诀。后登太行山，见马头峰下可以栖神，结茅而止。有褚墩戍将王文信率众建精庐焉。刺史李亚卿中丞命入城，不赴。示寂，报龄八十九。元和六年三月迁塔云。

○唐金陵庄严寺慧涉传

释慧涉，俗姓谢氏，会稽人也。即东晋太傅安之后。是知杰气英灵，盼代而出。津梁拔俗，异世岂无？涉为人清素，戒节孤峻，好寂为乐，不栖名闻。以大历之初，于金陵庄严寺遇牛头山忠禅师，一言知归，遂命入室，授其法要。服膺道化，待之弥载，不憚其劳。泊忠捐世，踵武兹岭，无游人境。一衣方丈，操节弥高。自是以来，问道者众，四维方域，无不沾洽，五十年中，翕然归德。以长庆二年终于山院，春秋八十有二。门弟子惟晏等奉全师礼，建塔于寺之西北，勒铭纪德。若考师之艺文，则草堂庐岳，各美于当代矣。

○唐京兆千福寺云邃传（清源）

释云邃，不知何许人也。通综经论，解将行兼。仍贯群书，号为该博。好远泛爱，人无盼然。累朝诏入内道场，顺宗已来，掌领译务。宪宗初，勾当右街诸寺观释道二教事，别敕充西明、千福两寺上座。风猷淹雅，纲任肃然。昔贤以道生比郭林宗，邃公有焉。次润州栖霞寺释清源，姓冯，南徐延陵人也。稚年贞素，长亦弗群，俗态不拘，法流爰入。造涉公为弟子焉。学赡经律，人罕畴匹。栖于摄山，积其龄稔。长庆初，工部尚书李相国德裕镇于浙西，洗心道域，延居京口，谕禀禅要，雅契夙心。及赞皇去郡，返锡栖霞，终于住寺。

○唐京师保寿寺法真传

释法真，不知何许人也。器识悠深，学问宏博，研穷梵典，旁赅儒书。讲导之余，吟咏情性。公卿贵士，无不宗奉。洎长庆中，帝颇锐怀佛事，真屡膺召命，内殿祇奉。四年，赴禁中道场，睿武昭愍皇帝御于法席，顾问三宝功能，真得应对，而辩给圆转，援据粲然。帝悦，因请云：“久废坛度僧，未全法者皆老朽。”盖两河间兵革未偃之故。寻诏两街佛寺各置僧尼受戒坛场，自三月十日始至四月十日停，仍令两街功德使各选择有戒行僧谓之大德者，考试僧尼等经，僧能暗诵一百五十纸，尼一百纸，即令与度。真频奉敕修功德，故遂奏请。真之德望，实唱导之元，罔知终所。

○唐吕后山道场宁贲传

释宁贲，姓李氏，陇西人也。家于亳州蒙城，幼奉释尊，而不言乎簪组之绪，无得称其代讳焉。贲所吐论，皆以觉了，不取诸相。心通定慧，而尽虚空，无以边中可测，无以文字求我。因往洪州，寻道一祖师，见而奇之，语而异之，大乘法器得其人矣。遂乃具戒，作入室弟子。师资数岁，道议殊伦。欲往天台，至越吕后山岑寥曰：“即是诸佛住处，何必天台也？”贲菩提直干，挺秀七尺。村豪里宿睹其异状，归依瞻仰，老幼争先。同味醍醐，疾病皆愈。是时多有行路留戾，欲暴僧徒，贲乃引之而前，威之而退，惊骇仪貌，礼足归依。调御山林，魔邪慑伏。不下岩岭近万余辰，德远道高，僧徒弥众。先时居处隘陋，兼无殿堂。众议经营，任人资福，远村穷墅亦竞助缘。土石木工，程材售巧，约山横栋，临涧飞檐，斤师斧子，鸟立猿，揆景促力，星再回天，殿堂成矣，佛像列矣。精耀俯仰，照山蛇云，人天不殊，别开佛土。大和二年六月七日，远闻道场之内有鼓錡丝竹之声，是夜二更，恬然化灭。生形七十五，炎腊四十一。是月权殡于杉园，礼也。斋祭殊品，哀号震山，惨树色于禅枝，咽水声于石穴。物尚知感，人情可量。大和五年九月茶毗，建塔于道场巽山，禀先意也。

○唐阆州长乐寺法融传

释法融，姓严氏，阆中人也。稚齿好朴素，恶华楚之服。父训令秉笔，便画佛形像

。至于聚戏，抔沙为塔，所作无非佛事。年甫十三，见释子，扼其衣坐执经卷，苦求出家。依长乐寺慧休法师为弟子，经诵偕通，乃沾戒善。遂讲南山《律钞》。后游云水，见嵩岳普寂禅道风行，密付心樱往弋阳福宁寺，放荡闲居，学道者至。以大和九年示疾而终，春秋八十九。其年正月十日，门人奉神座入塔焉。

卷三十

◎杂科声德篇第十之二（正传十九人附见六人）○唐上都大安国寺好直传

释好直，俗姓丁氏，会稽诸暨人也。幼不喜俗事，酒肉荤茹，天然不食。因投杭坞山藏师落发。元和初受具于杭之天竺寺。凡百经律论疏钞，嗜其腴润。一旦芒屨策杖，诣洪州禅门，洞达心要，虚往实归。却于本郡大庆寺，求益者提训，凡二十余载，为江左名僧。见儒士能青眼，故名辈多与之游，往往戏为诗句，辞皆错愕。凡从事廉问护戎于越，入境籍声实而造其户，不独能诱，亦善与人交者。大和中游五台，路出京邑，一夕而去。前护戎郗志荣、宋常春二内侍尤味其道，孜孜远招。开成初再至京国，二贵人同力唱和，牵輶留，致安国寺大方丈以居之。王畿龙象，莫不钦重。无何召入为供奉大德，非所好也，1111？俗受之。然归欤之叹，未尝少弃。四年十月二十五日嘱累弟子讫，奄然而寂，春秋五十六，夏三十二。郗宋二家率财权瘞于浚水，东人皆悲之，门人鉴诸后归葬于崇山之南，华严寺起塔。会是四年，起居舍人韦绚为碑纪代焉。

○唐天台山禅林寺广修传（高闲）

释广修，俗姓留氏，东阳下昆人也。淑质贞亮，早预邃师之门，研穷教迹，学者云拥。日诵《法华》、《维摩》、《金光明》、《梵网》、《四分戒本》。六时行道弗休，弥年更笃。每一岁行忏法七七日，则第四随自意三昧也。开成三年，日本国僧圆载来躬请法，台州刺史韦珩请讲《止观》于郡斋。以会昌三年癸亥岁二月十六日终于禅林本寺，俗寿七十三，法腊五十二。迁神于金地道场，法付门人物外焉。咸通七年，门人良汶发坟火葬，淘收舍利一千余粒，重塔藏焉。又湖州开元寺释高闲，本乌程人也。髫年卓蹠，范露异才。受法已还，有邻坚志，苦学劳形，未尝少惰。后入长安，于荐福、西明等寺隶习经律，克精讲贯。宣宗重兴佛法，召入对御前草圣，遂赐紫衣，仍预临洗忏戒坛，号十望大德。性情节会，矗然难屈。老思归乡，终于本寺。弟子鉴宗，敕署无上大师，亦得闲之笔法。闲常好将较川白紵书真草之踪，与人为学法焉。

○唐高丽国元表传（全清）

释元表，本三韩人也。天宝中来游华土，仍往西域，瞻礼圣迹，遇心王菩萨指示支提山灵府，遂负《华严经》八十卷，寻访霍童，礼天冠菩萨，至支提石室而宅焉。先是此山不容人居，居之必多霆震猛兽毒虫，不然鬼魅惑乱于人。曾有未得道僧辄居一宿，为山神驱斥，明旦止见身投山下数里盼。表赍经栖泊，涧饮木食，后不知出处之踪矣。于时属会昌搜毁，表将经以花榈木函盛，深藏石室中。殆宣宗大中元年丙寅，保福慧评禅师素闻往事，躬率信士迎出甘露都尉院，其纸墨如新缮写，今贮在福州僧寺焉。又会稽释全清，越人也。耨耔戒地，芬然杜若。于《密藏》禁咒

法也，能劾鬼神。时有市侩王家之妇患邪气，言语狂倒，或啼或笑，如是数岁。召清治之，乃缚草人长尺余，衣以五彩，置于坛，咒禁之。良久，妇言乞命，遂志之曰：“顷岁春日于禹祠前相附耳。如师不见杀，即放之远去。”清乃取一甌以鞭驱乌灵入其中，而呦呦有声，絨器口以六乙泥朱书符印之，瘞于桑林之下，戒家人无动之，妇人病差。经五载后，值刘汉宏与董昌隔江相持，越城陷，人谓此为窖藏，掘打甌破，见一鸦闯然飞出，立于桑杪而作人语曰：“今得见日光矣。”时清公已卒也。

○唐镇州龙兴寺头陀传

释头陀，本下郢磨家之子，然其器度温润，若长者之规。厥父课令其守磨，夜深悯驴牛之困惫，自己代之。放其畜啮草饮水歇卧者。父母知之，为其罢业。儿亦乞出家，遂落发受具。持无嗔怒，唯收拾粪扫物为衣，可重数斤。卧具三十年未尝更易。苦节之行，无有伦比，真定之民重之。而不受人供施，号抖擞上人焉。

系曰：粪扫衣者，四圣种之一也。凡修练者必愿成此行，奈何少堪任之！其胜之者，勇猛堪能之人也。○唐南岳山全繡传

释全繡，本余杭人也，入径山礼法济大师求剃染。禀质强渥，且耐饥寒。诸所参寻，略得周遍，乃隐衡岳中立华庵。木食涧饮，结软草为衣，伏腊不易。有赠繡诗云：“窠居过后更何人？传得如来法印真。昨日祝融峰下见，草衣便是雪山身。”此太常孙渥旧相南迁有作，事详《南岳高僧传》云。

系曰：草衣在南岳炎方，壮年即可，未知衰老徙居幽朔耐否？如能，则上上根胜士也。○唐越州明心院慧沐传

释慧沐，俗姓祝氏，即世暨阳人也，代为著姓。沐幼冲之岁，家法严明，训授儒经，郁成造秀。将随计吏，谒觉智寺契真禅师，即谥大观者是也，因以微讽。沐由兹开悟。明年剃度，乃诣洪井，礼观音禅师，顿了心契。咸通七载，还归故乡，邑宰韦公乃率信心者，造栖真院，四方禅客无远不届。廉使裴延鲁召沐，因营鉴水坊精舍成，还以坊为题榜，既而居之，安而能迁。允明州橡齐肇请，住玉笥峰，未久而卒。寿八十八，腊四十五，则乾宁五年七月三日也。

○唐幽州南瓦窑亡名传（祝融峰禅者）

释亡名，履行尤峻，独居燕城南窑灶间。天祐中，幽蓟不稔，道殍相望。因分卫回，闻车辙中呱呱之声，悯而收归，乃饥民所弃女子也。以求牛乳哺之。当七八岁，引于城中求色帛以衣之。及笄年也，容色艳丽，殆非凡俗，或讥呵者，僧终无渝志。适遇燕师刘仁恭从禽逐兔，直入僧居窑内。一卒见女子侍僧之侧，遂白师，刘往

亲见，问其故，皆以实对。刘曰：“弟子欲收之，可乎？”僧曰：“诺。”早验无吝意，自扶上马。归府，元真处子也，刘益哀之，不令伍于下位。仍重其僧，谓为果位中人也。别造精舍以处之，刘旬两往谒焉。其僧疾没，门人入讣，女方独坐，闻之哀恸而死焉。刘为僧营塔标志矣。又祝融峰禅者（亡名），为人抗直，不事威仪，每一举扬，善标宗要，道俗归之若市。尝饮酒遇毒，当时吐下，透落腐衣裂石，体中无恼。每有一蛇一虎为卫护状。迨终阖维，留骨一片，大如琵琶槽。僧众构火重焚，焚时色同火质，火尽灰寒，色白如雪，岂非得全身分坚固设利罗乎！至今岳中传其言句，立其浮图，号祝融峰道者焉。

○唐洪州开元寺栖隐传（宝安）

释栖隐，字巨微，姓徐氏。少而端厉，神解天然。佩褱之岁，酷好出尘，父母不可坏其意。削{髟采}之后，纳法已还，其盼服勤于学，深入毗尼壶奥焉。又于风雅之情，非雕刻而得，成自天姿。广明中，避巢寇，入庐山折桂峰，实嘉遁也。然多于花朝月夕，晚照高秋，练句成联，合篇为集，往往酋健浏亮，散在人口。身拥零破麻纳，不识者谓之山叟野人，殊无能者。得归宗禅旨，与同举扬，且无吝法。平常与贯休、处默、修睦为诗道之游，沈颜、曹松、张凝、陈昌符皆处士也，为唱褒之友。隐为群士响臻，淡然若水。后寇盗稍平，入荆楚，登祝融，踪迹啸傲。光化三年，游番禺，受知于太尉徐彦若。同光二年，于洪井钜鹿魏仲甫邂逅，以文道相善。后唐天成中卒。诗弟子应之携隐之诗计百许首，投仲甫为集序，今所行者号《桂峰集》是也。次嘉禾灵光寺释宝安，俗姓夏，姑苏常熟人也。风神爽拔，性行淑均。壮年家务所婴，誓思脱屣。及进具之后，专习定门，洞达真诀，而不衣丝缕，惟专分卫，寝则刍谿。安昔游五台，嗟南人之不识，遂率道俗同模筑五台之制于灵光寺，今且存焉。事毕，无疾而终。受生一百有十八岁，法腊七十八。由身不坏，门徒布漆之，别院供养。至会昌毁寺，遂焚之。

○唐河东悬瓮寺金和尚传

释金和尚者，姓王氏，西河平遥人也，所生之地猪坑村。幼而魁岸，为人鲁质。所作诡异，与平人不类。于嵩岩山出家。其后身裁一丈，腰阔一围，言事多奇差，终后如在。乡人供祭之，乞愿，皆遂人意。西河至稽胡皆郑重焉。

○梁四明山无作传

释无作，字不用，姓司马氏，姑苏人也。父陈宛丘县尉。母戴氏始妊时，梦异沙门称姓徐，住持流水寺，欲寄此安居，言讫加趺而坐。其父同夜梦于盘中书一字，甚称心，自言可以进上天子。至明，终说所梦，母曰：“意其腹中必沙门也。”矢之曰：“如生儿，放于流水寺出家。”及生，果歧嶷可爱，且恶荤膻之气。年迨四岁，母自教诵习，利金易砺，记忆无遗。厥父欲其应童子举业，渐见风范和润，且恒

有出尘之意。俄尔父偷窥姚氏之女且美容仪，酷欲取之。母切忌之，因曰：“或舍是子出家，宽汝所龆”父乃许之，送入流水寺中。才及月余，姚氏仇离时谓此女是善知识，为作之出家增上缘矣。年二十，受具足法。相次讲通《删补律钞》、《法华》、《上生》等经、《百法论》。一性五性宗教，励精寻究。孔老书篇，无不猎涉。后参其玄学于雪峰存禅师，深入堂奥。至庐陵三顾山，檀越造云亭院，豫章创南平院，请作住持，皆拂衣而去。前进士唐稟作《藏经碑》，述作公避请之由。居洪井十载，且未识洪师钟氏之面。乃游会稽四明，因有终焉之志。吴越武肃王钱氏仰重，召略出四明，因便归山，盖谢病也。有诗杼意呈王，王亦不留。诗云：“云鹤性孤单，争堪名利关？衔恩虽入国，辞病却归山。”时奉化乐安孙癭退居啸傲，不交缁伍，唯接作，交谈终日。进士杨？亦慕为林下之游。以梁开平中卒于四明，春秋五十六。初作善草隶，笔迹酋健，人多摹写成法。述诸色礼忏文数十本，注道安《六时礼佛文》一卷，并诗歌，并行于代。作不入尼寺，不谒公门，不修名刺，不趋时利，自号逍遥子焉。

○梁成都府东禅院贯休传（处默昙域）

释贯休，字德隐，俗姓姜氏，金华兰溪登高人也。七岁，父母雅爱之，投本县和安寺圆贞禅师出家为章侍。日诵《法华经》一千字耳。所暂闻不忘于心。与处默同削染，邻院而居，每隔篱论诗，互吟寻偶对，僧有见之，皆惊异焉。受具之后，诗名耸动于时，乃往豫章，传《法华经》、《起信论》，皆精奥义，讲训且勤。本郡太守王詠弥相笃重。次太守蒋瑰开洗忏戒坛，命休为监坛焉。乾宁初，赍志谒吴越武肃王钱氏，因献诗五章，章八句，甚惬旨，遗赠亦丰。王立去伪功，朝廷旌为功臣。乃别树堂立碑，记同力平越将校姓名，遂刊休诗于碑阴，见重如此。休善小笔，得六法。长于水墨，形似之状可观。受众安桥强氏药肆请，出罗汉一堂，云：“每画一尊，必祈梦得应真貌，方成之。与常体不同。自此游黟歙，与唐安寺兰闾梨道合。”后思登南岳，北谒荆师成汭，初甚礼焉，于龙兴寺安置。时内翰吴融谪官相遇，往来论道论诗。融为休作集序，则乾宁三年也。寻被诬谮于荆师，黜休于功安。郁悒中题砚子曰：“入匡始身安。”弟子劝师入蜀，时王氏将图僭伪，邀四方贤士，得休甚喜，盛被礼遇，赐赆隆洽，署号禅月大师。蜀主常呼为“得得来和尚”。时韦蔼举其美号。所长者歌吟，讽刺微隐，存于教化。体调不下二李、白、贺也。至梁乾化二年终于所居，春秋八十一。蜀主惨怛，一皆官葬。塔号白运。于城都北门外升迁为浮图，乃伪蜀乾德中，即梁乾化三年癸酉岁也。休能草圣。出弟子昙域，癸酉年集师文集，首安吴内翰《序》，域为《后序》。韦庄尝赠诗曰：“岂是为穷常见隔，只应嫌酒不相过。”又广成先生杜光庭相善，比乡人也。休书迹，好事者传号曰姜体是也。尝睹休真相，肥而矬，蜀宰相王锺作赞。昙域戒学精微，篆文雄健，重集许慎《说文》，见行于蜀。有诗集，亚师之体也。

○梁庐山双溪院国道者传

释国道者，未知何许人也。器凝淳粹，行敦高迈，块然独处，翩翩在形器之上矣。参学攸广，欲歇孤征，爱庐山秀异，誓隐沦以求其志。考筑草舍，濯园殖蔬，任山中居人？龠或问其故，答曰：“贫道无心而种，无心而舍也。”验此见知，实达道之上流矣。修睦僧正恒倾意奉重，诗赠国公云：“入门空寂寂，真个出家儿。有行鬼不见，无心人谓痴。”后终于院，葬于双溪山原，有小浮图焉。今以“国”字呼之，为名邪姓邪？未得详焉。

○梁泉州智宣传

释智宣，泉州人也。壮岁慕法，学义净之为人也。轻生誓死，欲游西域，礼佛八塔，并求此方未流经法。以唐季结侣渡流沙，所至国土，怀古寻师，好奇？异，聚梵夹，求舍利。开平元年五月中达今东京，进辟支佛骨并梵书多罗叶夹经律。宣壮岁而往，还已衰耄矣。梁太祖新革唐命，闻宣回，大悦，宣赐分物，请译将归夹叶。于时干戈，不遑此务也。

○梁江陵府龙兴寺齐已传

释齐已，姓胡，益阳人也。秉节高亮，气貌劣陋。幼而捐俗于大洊山寺，聪敏逸伦，纳圆品法，习学律仪。而性耽吟咏，气调清淡。有禅客自德山来，述其理趣，已不觉神游寥廓之常乃躬往礼讯，既发解悟，都亡朕迹矣。如是药山、鹿门、护国，凡百禅林，孰不参请。视其名利，悉若浮云矣。于石霜法会，请知僧务，梁革唐命，天下纷纭于时高季昌稟梁帝之命，攻逐雷满出渚宫，已便为荆州留后，寻正受节度。迨乎均帝失御，河东庄宗自魏府入洛，高氏遂割据一方，搜聚四远名节之士，得齐之义丰、南岳之已，以为筑金之始验也。龙德元年辛巳中礼已于龙兴寺净院安置，给其月俸，命作僧正，非所好也。其如闲辰静夜，多事篇章，乃作《渚宫莫问篇》十五章，以见意，且徇高之命耳。已颈有瘤赘，时号诗囊。栖约自安，破纳拥身，少麻缠膝。爱乐山水，懒谒王侯，至有“未曾将一字，容易谒诸侯”句为狎。华山隐士郑谷诗相酬唱。卒有《白莲集》行于世，自号衡岳沙门焉。

○后唐灵州广福寺无迹传

释无迹，姓史氏，朔方人也。当宣宗御宇，佛法中兴。大中九年，年正十三，决志舍家，投白草院法空大师为弟子，操执密缙，拂攘嚣尘。咸通三年，用宾于京室，得戒度于西明寺矣。凡于百艺，悉愿游焉。慕定林威能画，戴安道能琴，我则讲贯之余，兼而综习。先是唐恒夫尝作镇朔方，后于辇下相遇，以家僧之礼待焉。盖知言行相高，复能唱导闻。恒夫白两街功德使，请隶西明寺。旋属懿宗皇帝于凤翔法门寺迎真身，右宣副使张思广奏迹充乎赞导，悦恠上心，宣赉稠厚。光启中传《授佛顶炽盛光降诸星宿吉祥道场法》，归本府。府帅韩公闻其堪消分野之灾，乃于鞠场结坛修饰，而多感应。景福中，太尉韩公创修广福寺，奏迹住持。皆以律范绳之

，塞垣盼求戒者必请为力生焉。梁乾化丙子岁，中书令韩公洙奏署师号曰鸿远欤。后唐同光三年乙酉岁四月一日，坐终于文室。筋骨如生，风神若在，蕃汉之人观礼称叹曰：“昔至德中当府龙兴寺有高士辩才坐亡，遂漆布之。乾宁元年府帅举奏，敕谥曰能觉。今迹师可不异时而同事哉！中令韩公命工布漆焉。庄宗朝军府从事薛昭纪为碑颂德云。

○后唐明州国宁寺扑光传

释光，字登封，姓吴氏，永嘉人也，唐史官左庶子兢之裔孙也。幼舍家于陶山寺剃度。居必介然，不与恒人交杂。好自标遇，慢易缁流。多作古调诗，苦僻寡味，得句时有得色。长于草隶，闻陆希声谪宦于豫章，光往谒之。陆恬静而傲气，居于舟中，凡多回投刺，且不之许接。一日设方计于谒，与语数四，苦祈其草法，而授其五指拨镫诀。光书体当见酋健，转腕回笔，非常所知。乃西上，昭宗诏对御榻前书，赐紫方袍。后谒华帅韩建，荐号曰广利。自华下归故乡，谒武肃王钱氏，以客礼延之。而性畔岸，弗惬王情，乃归甬东终焉。有文集，知音者所贵。出笔法弟子从瑰、温州僧正智琮，皆得墨诀。有朝贤赠歌诗，吴内翰融、罗江东隐等五十家，仅成一集。时四明太守仰谄素重光高蹈，躬为丧主，理命令葬。后三年，淮西域焚之，发棺俨若生相，髭发爪皆长。茶毗收舍利，起小塔焉，则后唐长兴中也。

○晋宣州自新传

释自新，姓孙氏，临淄人也。濯戒寻师，曾无懈废，闻膺禅师化被钟陵，往参问焉。从云居长往，回锡尝隐广德山中。属两浙文穆王钱氏率吏士躬征苑陵，入山寺，群僧皆窜，唯新晏如。问曰：“何不避乎？”对曰：“东西俱是贼，令老僧去何处逃避？”王惊其讦直，回戈遣归，见武肃王问之，言无所屈。加之高行，造应瑞院居之，假号曰广现大师。初新尝入宣城山采药，穿洞深去，始则暗昧，寻见日分明，行仅数里，洞侧有别窍，溪水泛泛然。隈一大松，枝下有草庵，一僧雪眉拥纳坐禅。旁有一磬火器，新击磬，遂开目惊曰：“嘻！师何缘至此？”乃陈行止，揖坐，取石敲火煎茗，香味可爱。日将夕矣，僧让庵令新宿，顾其僧上松巅大巢内，闻念《法华经》，声甚清亮。逡巡，又咄骂云：“此群畜生毛类，何苦生人恐怖？速归林薄，不宜辄出。”叱去，新窥之，乃虎豹弭耳而去，明日谓其僧曰：“愿在此侍巾屨。”僧曰：“自居此地，百见草枯，四绝人烟，非师栖息处。”又问：“莫饥否？”相引溪畔，有稻百余穗，收谷，手擲三椀黄粱。挑野蔬和煮，与食。后遣回去。送至洞口曰：“相遇非偶然也。所食茶与菜糜，师平生不乏食矣。”遂遵路回本院已，月余日命同好再往寻之，失洞踪迹。后在浙中，充宝塔寺主，以天福中卒于住寺，年八十余。今影在冷水湾前，小院存焉。

○汉杭州耳相院行脩传

释行脩，俗姓陈，泉州人也。少投北岩院出家，小心受课，诵念克勤。十三削发，往长乐府戒坛受上品律仪。年始十八，参雪峰山存禅师，随众请问，未知诤旨。辞存师，言入浙去。存曰：“与汝理定容仪，令彼土人睹相发心。”遂指其耳曰：“轮郭幸长，垂珙犹短，吾为汝伸之。”双手平曳，登即及肩，如是者三，自此长垂，见者举目。后唐天成二年丁亥岁入浙中，倾城瞻望，檀施纷纷。遂构室于西关高峰，为其宴息，后郁成大院。脩别无举唱，默默而坐。人问，唯笑而止。士女牵其耳交结于颐下，杭人号长耳和尚。以乾祐三年庚戌岁十一月示疾，动用如平时，以三月中夜坐终。檀越弟子以漆布，今亦存焉。后寄梦睦州刺史陈荣曰：“吾坐下未完。”检之，元不漆布，重加工焉。

○大宋宜阳柏阁山宗渊传

释宗渊，姓宫氏，高密人也。幼通经籍，察惠若神，忽愿出家于东莱北禅院。后参学江表岳中祖师胜友，资神润已，往造实归。僻好吟诗，于荆楚间尝师学于齐己之体，自言缘情在品物流形之外。览天下山川，且曰“步仞之丘，巨兽无以隐其躯”。爱宜阳柏阁山居之，以求其志。其孤洁耿介，凡俗不可造次而见。日别持《观音支品》，盖曾有善相人言渊促龄，勉令受持《普门品》也。至太平兴国五年十月，预言终期，令水土作座，如鹿顶形。连促木工，明日斋时要用，至是果坐终焉。乡人无远近皆来焚香设拜，当年迁小塔于宝云寺之山原，年八十三。有《洛西集》。著挽辞五十首，一云：“举世应无百岁人，百年终作冢中尘。余今八十有三也，自作哀歌送此身。”纸衣一袭葬焉。后开发，神色宛然，弟子淡然、奉明葬之于岩穴之中矣。

论曰：太极是生两仪，两仪生万物，𠄎因缊而出，鼓动而萌。由庶类以蚩蚩，稟自然而历历。自然者道，道惟本心，心无不通，通物之理之谓道也。道其不一，蕃息流形，若宽天倪。物亦惟一。乾一也，坤一也，殆乎因动成变，以变求占，则生象不一欤？至如鸟兽交气，草木构精，或用其牡而疏其雄，或同乎根而异乎实。鰾飞似鸟，橘移成枳，交驩为伦，羽嘉生凤，若此之伦，物类糅错之所致也。杂之时大矣哉！事有重𠄎，物有纷纶，乃彰杂名，非一名而统荆故曰义虽博，则知可以一名举也。昔梁《传》中立篇第十曰《唱导》也，盖取诸经中“此诸菩萨皆唱导之首”之义也。唱者，固必有和乎？导者，固必有达者。终南释氏观览此题，得在乎歌赞表宣，失在乎兼才别德也。譬若别均天分，重赋全才，虎双翼而飞，鹰四足而击也。于是建立《杂篇》，包藏众德，何止声表？无所不容。或曰：“《续传》改作名题，自何稽古？”通曰：“象班孟坚加九流中杂流也。如其立教，如其为人，匪独阴阳，不专刑律，或兼名墨，或涉纵横，则可目之为杂家流也。《汉书》有变，拾太史公之遗；澄照建题，正梁慧皎之僻。”或曰：“胡不闻杨子云疾其杂乎？”通曰：“彼恶夫淮南、太史公不宗孔而无纯德耳。此则应杂而杂，断无杂咎欤！今作传者，若游夏焉，观其起隐终哀，何敢措一辞也。”或曰：“何忽变《唱导》成《声德》耶？”通曰：“声之用大矣哉！良以诸佛刹土，偏用一尘以为警悟。唯忍土

最尚音声，行为佛事及观音说圆通，世尊称赞者，为被闻熏。故若毗目仙人，香积世界，乐不乐爰居之耳，圆不入方凿之穿。是以影胜大王止前驱之象马，钵囊释子动合会之人天。返魂者随呗声而到家，光洁者闻呗声而欢喜。乃可谓宫商佛法，金石天音，哀而不伤，乐而不佚，引之入慈悲之域，劝之离系缚之常脱或执受不精，器能无取，乃不可谓为声德也。于今搜有邻之德，聚兼讲之才，三人之师，于斯见矣，四战之国，孰敢攻乎？得非备五彩而服章，含八风而成乐，则有登天竺而作猿梵，动塔铃而贯虹电，副天请而都讲随，占地理而宰臣应，观音摩其发顶，弥勒诉其雷神。始化倭民，坐亡举指，见慈颜而不怒，作《诗式》以安禅。巨蟒不惊，山魔慑伏，临神鉴而悬知澄汰，礼天冠而誓隐灵踪。破瓮飞鸟，劳身代畜。衡山衣草，禹寺明心，养童女以身全，遇毒流而命在。德符禅月，躯涉磧沙。或辩之利通，或声之流靡，猗嗟硕德，于烁群公！若诸根之互能，同五事之俱举，故强名为杂也。？接縋檀之树，数倍馨香；鹰蛾鸟育金翅之巢，千重猛鹫。咨尔同道，听乎直言。为僧不应于十科，事佛徒消于百载。如能以高为本，以德为枝，以修为花萼，以证为子实，然后婆娑挺盖，郁密成阴，周覆三千大千，号之曰大菩提树也欤 1

后序

前代诸家，或云《僧传》、《僧史》、《记录》，乃题号不一，亦声迹有殊。至梁沙门慧皎云《高僧传》，盖取高而不名者也。则开其德业，文为十科，见于传内。厥后有唐《续高僧传》，仿仰梁之大体而以成之。洎乎皇朝《大宋高僧传》之作也，清风载扬，盛业不坠。赞宁自至道二年奉睿恩掌洛京教门事，事兰心旷之日，遂得法照等行状，撰已易前来之阙如。寻因治定其本，虽大义无相乖，有不可者以修之，先者所谓加我数年，于《僧传》则可矣已。斯幸复治之，岂敢以桑榆之年为辞耶？时方彻简，咸平初承诏入职东京右街僧录，寻迁左街。乃一日顾其本，未及缮写，命弟子辈緘诸篋笥，俾将来君子，知我者以《僧传》，罪我者亦以《僧传》，故于卷后而书之云耳。